

New Testament

Cemuhî Language

Cemuhî - Bible - New Testament

Tii Iitihi: Élele Iitihi na mwo Coho

Mataio	3
Maréko	81
Luka	130
Ioane	2132
Apostolo	270
Roma	344
1 Korénit	377
2 Korénit	409
Galat	431
Éféso	444
Filipi	456
Kolosé	464
1 Tésalonik	472
2 Tésalonik	479
1 Timoté	483
2 Timoté	493
Tit	500
Filémon	505
Ébérû	507
Cang	534
1 Pétérû	542
2 Pétérû	551
1 Ioane	557
2 Ioane	565
3 Ioane	566
Jude	568
Pii Beetihi	571

Cemuhî - Bible - New Testament

Tii Iitihi: Élele Iitihi na mwo Coho

Mataio

Mataio 1

Ni watihe lésu Kériso

Luka 3.23–38

¹ Wo lésu *Kériso, ke e wie mu ko *Davita, pa piebehi *Abérama. Ke woélé-ni ni watihe lésu:

² Abérama Isaaka Iakobo *Juda (me lépwo âjiénen)

³ Pérès (me Zéra; nyaa telu, ke wo Tamar) Esron Ram

⁴ Aminadab Nachon Salma

⁵ Booz (nyaa ten, ke wo Rahab) Obed (nyaa ten, ke wo Rut) Jessé

⁶ Davita. Wo Davita, ke pa daame [ne *Isaraéla. Ke é alechen, ke ni bée watihe lésu, ke wo]: *Solomona (nyaa ten, ke ê mwode Uri ânebun)

⁷ Roboam Abia Asa

⁸ Josafat Joram Ozias

⁹ Iotam Akaz Ézékia

¹⁰ Manassé Amon Josias

¹¹ Iékonia (me ni âjiénen). Ke é ha a benaamwon naa, ke lé pawie lépwo Isaraéla mu ha amu telé, ke lé péélé nge *Babulona me lépwo *apenem tice ja kon.

¹² Ke é ne alechen, [ke ni bée watihe lésu, ke wo]: Salatiel Zorobabel

¹³ Abihoud Éliakim Azor

¹⁴ Sadok Akim Élioud

¹⁵ Élazar Matan Iakobo

¹⁶ Josef. Ê mwode Josef, ke wo Maria, ê nyaa te lésu na pii kon pie Kériso.

¹⁷ Woélé naa ati a jéhi ni watihe lésu Kériso. Tabuhi mu ko Abérama, die ko Davita, ke pwo ¹⁴ ni niide apulie. Ke tabuhi mu ko Davita, die ko a bwo pé wie a bele Isaraéla mu Juda nge Babulona, ke pwo ¹⁴ ni niide apulie. Ke é mulang, ke ¹⁴ mwo ni niide apulie die ko a bwo pituie te pa *Mesia.

A bwo âbeeble te lésu

Luka 2.1–7

¹⁸ Weengi a jepule ko a bwo pituie te lésu Kériso, pa Mesia: Wo Maria, ê nyaa ten, ke mwo te ju pinimelu kolu me Josef. Ke é ânebuhe a bwo piaten delu, ke caa pwoapulie kon, na e pwaadeniin bé na a *Jenen litih.

¹⁹ Ke e niimihi wo Josef pie, me e ne mwo Maria. Kehe icehi ana pa apulie na e te pipwoipieng, ke time e uce pii pwaatihi, beme time uce tanim Maria ne he pwahamii ni apulie.

²⁰⁻²¹ É he e ko pitautinaado ne ko anaa, ke e bwo alih ne ha a niûn pa *âcélo te Padaame, na e pii ten pie: «Josef, pa piebehi Davita, go nemwo pwo me mwotiko me go pé Maria. Be mepwo é ne ko pa cuwo ewa aiu na e kon, ke e pwaadeniin bé na a Jenen litih. Ke mepie e bo pituie, ke go bo ne me a niin pie lésu. Be o bo weeng pana e bo *celuimi a bele ten mu he ni ta pwo ten.»

²² Ke ati ni naado naa, ke e tuie, beme pacuwohi ali e pii wo Padaame, na e pwaadeniin bé wo pa *péroféta ten pie:

²³ O bo pwoapulie ko êgi toomwo, ke e bo picile pa ewa aiu. Ke bo ne me a niin pie Émanuél, a bwopiinen pie, e pelenye wo Padué. *Ésaïe 7.14*

²⁴ Ke me e ûmiê wo Josef, ke e pwo ana e pii ten wo pali âcélo. Ke e pé Maria ê mwoden ne pelen.

²⁵ Kehe icehi ana time lu uce pipule dieli ko a bwo piâbeele ewa te Maria. Ke wo Josef, ke e ne me a nii pali cuwo ewa pie lésu.

Mataio 2

Lé pipaunueng wo lépwo maagoi

¹ E piâbeele wo lésu ne Bétéléma ne *Judé, ha a benaamwon de pa daame *Érode. Ke ni bée maagoi, nina lé pitemang na lé cémun ne ko ni ceni, ke lé âbé mu he na e caama lang a téale. Ke lé tuie nge *lérusaléma.

² Ke lé tahimwo ni apulie lérusaléma pie: «E wé wo pa cuwo ewa na e mwo te ju piâbeele, pana me e bo daame he lépwo *Juif? Be geme alih a ceni ten he e tuie, a ine a bwo piâbeele ten. Ke geme ko âbé me geme pipaunueng [ke me geme ne ten ni âpipati teme].»

³ Ke wo pa daame Érode, ke e téne a jepule ko a bwo tehenebé te lépwo maagoi me nina lé pii. Ke hauli a pwonimen. Ke ati lépwo lérusaléma, ke mwotilé.

⁴ Ke e tapiti ati ni caa te lépwo *apwoâpwailo, me ni *dotéén ko patén. Ke e tahimwolé pie: «He é wé ace duaan celi e bo piâbeele ne hen wo pali *Mesia [li geé ko ucéieng]?»

⁵ Ke lé hegi ne ten pie: «É ne Bétéléma ne Judé, be weengi a pwooti te Padué, li e caa tii wo pa péroféta, pie:

⁶ *Adéihi a amu Bétéléma, a amu mu *Juda! Piubwo go koja ni bée amu. Be e bo wie mu pelem pa daame na ubwo nang; pana e bo wéihi a bele tong, a bele *Isaraél.» *Miché 5.1*

⁷É mulang, ke e tote lépwo maagoi wo Érode. É he te piwoélé cehi, ke e pii telé pie: «Geé pii tong ehi ace benaamwon celi geé tabuhi alihî hen ali ceni.»

⁸[Me lé pii ten] ke e pahedelé ngemwo Bétéléma, ke e pii telé pie: «Geé â hane ehi pali cuwo ewa, ke mepie geé tooeng, ke geé mwojuia mwobé me geé pii tong. Be nimung mwo me é ân me é pipaunueng, [ke me é ne ten ni âpipati tong.]»

⁹Nebwén, ke lé engen wo lépwo maagoi. Ke lé te tai alihî mwo ali ceni. Ke lé âcehin, ke me e tehene nge he bebenihe a mwa na e mu hen wo pali cuwo nahi ewa, ke e cuwo.

¹⁰Ke me lé alihî pie e cuwo lang ali ceni, ke lé te junihe pipwodéén kuti.

¹¹Ke lé taa ha ali mwa, ke lé too pali cuwo ewa me Maria, ê nyaa ten. Ke lé tidihi jililé, ke lé pipaunu pali cuwo ewa. Ke lé tuu ni âne éelele telé, ke lé ne ten ni muko pétaapwo âpipati telé, na te junihe ubwo ni cuhin: mwani megelef, me ni encens, me ni tabe ûde na a niin pie *myrrhe*.

¹²É alechen, ke e pii telé wo Padué ne he ni niûlé pie, me time lé uce mwojuia ngemwo pele Érode. Kehe lé pé ace céiu pwaaden celi ité, me lé mwojuia ngemwo ha amu telé.

Lé cela ko Érode

¹³É he lé caa mwojuia ngemwo wo lépwo maagoi, ke pwo a niû Josef. E ali pa *âcélo na e pii ten pie: «Go piepin! Go cuwoda, ke go pé lu téénemeewa, ke go celuimilu nge *Aigupito! Be e pwo me e hane pali cuwo ewa wo Érode, beme e taunueng. Ke geé mu lang dieli ha a tan na é bo paciheko mwo.»

¹⁴Ke e cuwoda wo Josef, ke e pé luli téénemeewa, ke lé engen he bwén, nge ha amu Aigupito.

¹⁵Ke lé mu lang dieli ko a bwo mele te Érode. Ati ni naado naa, ke e tuie, beme pacuwoshi ali e pii wo Padaame, na e pwaadeniin bé wo pa péroféta ten, pie: *É caa todebé pa naîng, ke é pawieeng mu Aigupito. Osé 11.1*

E pwo me taunu ni cuwo ewa

¹⁶Wo Érode, ke e alihî pie lé pipwohuô ten wo lépwo maagoi. Ke e te junihe okéé kuti. Ke e pwo me taunu ati ni nahi ewa aiu na élé neole koja a alo jo, ha ati a Bétéléma, me ni bée duaan ko jien. Be e temehi mu ko lépwo maagoi ali benaamwon li e tuie hen ali ceni.

¹⁷Ke me wonaa, ke e pacuwoshi ali e pii wo Padué, na e pwaadeniin bé wo péroféta lérémia pie:

¹⁸ *Nye téne ni pwoé, me ni pihemun ne Rama , he e é niimi ni naîn wo Rachel † . Pwocoon me lé tanyuueng, be caa tielé ati.Jérémie 31.15*

Lé mwojuia mwo mu Aigupito

19 É ne alecehe a bwo mele te Érode, ke pwo a niû Josef ne Aigupito. Ke e ali pa âcélo te Padaame

20 he e pii ten pie: «Go cuwoda, ke go pé luli téénemeewa, ke go mwojuia imilu ngemwo ha amu Isaraéla, be lé caa mele wo lépwoli nimelé me lé taunu pali cuwo ewa.»

21 Ke e cuwoda wo Josef, ke e péélu mwojuia ngemwo ha amu Isaraéla.

22 Kehe icehi ana e téne pie wo Arkélaos, pa naî Érode, ke e caa te pé mwo a pwodaame ne Judé, alecehe a bwo mele te caa ten. Ke mwoti Josef me e mwojuia ngemwo lang. Ke e pii ten mwo wo Padaame ne ha a niûn pie, me lé â ha amu Galilé.

23 Ke lé mu ha a céiu mwopopwaalé na pii kon pie Nazaret, beme e pacuwohi ana lé caa pii wo lépwo péproféta pie, [wo pa Mesia, ke] o pa apulie mu Nazaret.

Mataio 3

Ioane pa apipuu apulie

Maréko 1.1–8; Luka 3.1–18; Ioane 1.19–28

1 Alecehe ni jo na hiwon, ke e cuwoda wo pa céiu apulie na a niin pie *Ioane pa apipuu apulie. Ke e mu ha a da ne *Judé, ke e patemehi te ni apulie na lé âbé céiieng, ke e pii telé pie:

2 «Geé pininim, ke geé taatééhi ni mulihewé! Be caa é mwonu a *Mwametau he Miiden!»

3 Wo Ioane, ke weeng pali e caa pipwojepule kon wo péproféta Isaia pie: *Pwo pa apulie ha a da na e toii da pie: "E âbé wo Padaame! Pwopweehi a pwaadeniin! Pwo me belece a duaan na e engen hen!"* Ésaïe 40.3

4 Wo Ioane, ke e cuwohe a epwén na pwo ko pumii *chameau*, ke a taihenan a iiwota. Ke e wii koléé, ke e ûdu duhimepu.

5 Ke te junihe hiwon ni apulie na lé âbé céiieng ne ha a da, mu *lérusaléma, me ati a amu Judé, me ni piduaa éémwa Ioridano.

6 Ke lé pii beetihni ni ta pwo telé ne he pwahamii ni apulie ati. Ke e puulé ne ha a éémwa Ioridano.

Geé pwo ce huô celi wâé!

7 Hiwon mwo ni apulie mu he lupwo dihe pwoitihi te lépwo *Juif, wo lépwo *Farasaio, me lépwo *Saducéen, na lé âbé céii Ioane, beme puulé. Ke me e alilé, ke e pii telé pie: «Wogewé ni nahi bwien, me ni agele! Woo na e pii tewé pie, geé o cela ko ni cuhinaado na e bo ne tewé wo Padué?»

8 Geé mi pwo ce huô celi wâé, beme a béhabwiinen pie, caa taatééhi ni mulihewé!

⁹É mu ko ade na geé niimihi pie, o celuimikewé mu ko ana wo *Abérama ke pa watihewé? Ûhu! Be é pii tewé pie: Mepie nime Padué, ke o jan ne kon me e bitehi ni péi ce, me ni piebehi Abérama!

¹⁰«E caa te pwopweehi a gi ten [wo Padué]. Ke e bo tahagéi ne ko ni waan ati ni acuwo na time uce wâé ni acehin, ke e bo cini ne pwo miû!»

O bo tauti ni apulie

¹¹«Woéo, ke é puukewé ko a tabe, beme o a béhabwiinen pie geé caa pitaatééhi ni mulihewé. Kehe icehi ana wo pana e bo âbé alecehung, ke e bo puukewé ko a *Jenen litihi me a miû. Weeng, ke te junihe pwojunuun kojaéo, ke time uce jan ne kong me é tuwo ni tai ko ni dihibwaan.

¹²E caa te mi pipwopweeng, beme e tauti ni apulie, ke e bo pineité nina wâé jélé me nina ta jélé, pwohewii a bwo pineitééhi na a pidenaado koja a piin. Ke e ne ehi ni pidenaado, kehe e cini ni piin ne ha a miû na te tice paceli jan me e taunuhi.»

Pipuu lésu

Maréko 1.9–11; Luka 3.21–22

¹³É alechen, ke e engen wo lésu mu ha amu Galilé, ke e â ha a éémwa loidano beme e puueng wo loane.

¹⁴Kehe icehi ana time uce nime loane me e pwo, ke e pii te lésu pie: «Kona é ko ade na go âbé céiiéo? Pana time uce jan me é puuko. Wâé heme go puuéo.»

¹⁵Ke e hegi ne ten wo lésu pie: «[Te wâé ana go pii, kehe icehi ana] é jenaa, ke wâé heme genyu pacuwohi ana *mwomwon ne he pwahamii Padué.» É mulang na e puueng wo loane pwohewii a bwopiinen den.

¹⁶Ke me e wie mu he tabe wo lésu, ke e te tehi kuti a miiden, ke e alahi a Jenen litihi te Padué, he e opé ne huîn pwohewii a meni pwojo.

¹⁷Ke pwo a pwocihe bé mu he miiden na e pii pie: «Wo panaa, ke pa Naîng [na te céiu nang] na te nihe eânimung den, weeng kuti pana é caa pipégalieng ne ha a pwonimung.»

Mataio 4

E tacebwéni lésu wo Caatana

Maréko 1.12–13; Luka 4.1–13

¹É alechen, ke e pé lésu na a *Jenen litihi te Padué, nge ha a da, beme e tacebwénieng wo *Caatana, pa apipé ne konye.

²Ke time e uce wiinaado wo lésu he na 40 ni tan, be e *pipaciile, ke caa menen.

³Ke e tooeng wo Caatana, pa atacebwénikenye, ke e pii ten pie: «Hemepie wogo pa *Naî Padué, ke go taatééhi ni péi ce me pwoloa!»

⁴ Ke e hegi ne ten wo lésu pie: «Caa te tii ne he ni *tii iitihi pie: *Time e uce mulie cehi ko a pwoloa wo pa apulie, kehe e te mulie mwo ko ni pwooti na e pii wo Padué.*» *Deutéronome 8.3*

⁵ Ke e pé lésu nge ha a pwomwo ubwo iitihi, *lérusaléma, ke e pééeng da pwo puni a *mwaiitihi.

⁶ Ke e pii ten pie: «Hemepie wogo pa Naî Padué, ke go téele mu éni! Be caa te tii ne he ni tii iitihi pie: *E bo pahede ni âcélo ten wo Padaame Padué beme lé wéiko. Ke lé bo hegiko, ke o time uce tanahi ni am ne ko ni péi.*» *Psaume 91.11–12*

⁷ Ke e hegi ne ten wo lésu pie: «Ûhu, be caa te tii ne mwo he ni tii iitihi pie: *Go nemwo tacebwéni Padaame Padué hem.*» *Deutéronome 6.16*

⁸ E pééeng mwo wo Caatana, da pwo a céiu juwole na te junihe e daaité. Ke e habwii ten ati ni amu, me ni mwametau pwo bwohemwo, me ni wâé telé, me ni naamuulé.

⁹ Ke e pii ten pie: «Mepie go tidihi jilim he pwahamiing, me go pipaunuéo, ke é bo ne tem ati ninaa.»

¹⁰ Ke e pii ten wo lésu pie: «Go engen kojaéo, go Caatana! Be caa te tii ne he ni tii iitihi pie: *Go pipaunu Padaame Padué hem, ke te weeng cehi na me go penem den.*» *Deutéronome 6.13*

¹¹ Nebwén, ke e ne lésu wo Caatana. Ke lé âbé too lésu ne ni *âcélo, ke lé penem den.

E tabuhi ni penem den wo lésu

Maréko 1.14–15; Luka 4.14–15

¹² É ne alechen, ke e téne wo lésu pie, lé caa ne *loane pa apipuu apulie he karépu. Ke e engen wo lésu, ke e â ha amu Galilé.

¹³ Ke time e uce mu Nazaret, kehe e â pimu Kapernaüm, a behi a bajié Galilé, ha a duaan Zabulon me Neftali.

¹⁴ É nelang he na e pacuwoshi ali e pii wo Padué, na e pipwaadeniin bé wo péroféta Isaia pie:

¹⁵ *Téne, wogeu lupwo amu Zabulon me Neftali, wogeu mwonuhi a jié; ne gaale cemwo ko a Ioridano; lupwo duaan ne Galilé; amu na pihiwon ni bele hen, na time lé uce bele tong:*

¹⁶ *Lé alahi a pwéélang na ubwo ne nina lé mu ha a melepiing. A pwéélang na pwomelaan ko nina lé mu ha a bwén iitihi.*

[Lé o mulie cemwo!]Ésaïe 8.23—9.1

¹⁷ Ke te tabuhi kuti mulang, ke e patemehi a pwooti te ni apulie wo lésu. Ke e pii telé: «Geé pininim, ke geé taatééhi ni mulihewé! Be caa é mwonu a *Mwametau he Miiden!»

E tote ni bécéiuhe acémun den

Maréko 1.16–20; Luka 5.1–11

¹⁸[É ha a céiu tan] ke e uti a nicepwon Galilé wo lésu. Ke e ali lupwo apulie na lupwo apwotau, wo Simon na pii kon pie Pétéru, me André pa âjiénen, he lu ko ne pua ha a jié.

¹⁹Ke e pii telu pie: «Geu âbé céing, be é bo pwo me wogeu lupwo apwotauhi apulie.»

²⁰Ke lu te necu kuti li pua telu, ke lu âcéi lésu.

²¹Ke lé te ju piân, ke e ali Cang me loane, lupwo naî Zébédé, he lé teko pwoni pua ne pwo ong me caa telu. Ke e todelu wo lésu.

²²Ke lu ne caa telu, me ali ong, ke lu âcéin.

E pwo me tieden ni cunu ko ni apulie

Maréko 1.35–39; Luka 4.42–44, 6.17–19

²³E engen pitih a amu Galilé wo lésu, ke e pacémuni ni apulie ne he ni *mwotapitihi te ni *Juif, ke e pipatemehi a *Pwooti Wâé ko a Mwametau [he Miiden]. Ke e pwo me tieden ati ni cunu me ni picani te ni apulie.

²⁴Ke lé téne jepule kon, pitih a province Siri. Ke lé pébé céieng ni béen na lé mu he ni picani, me ni béé bwo pwo cunu, me ni béen na pwo duéé kolé, me nina éjén jélé, me ni béen na tebwomwa jélé. Ke e te tai pwo me tieden ni cunu kolé naa wo lésu.

²⁵Hiwon ni apulie na lé âcéi lésu: ni apulie bé mu Galilé, ke é mu ha a céiu duaan ko a *Dix Villes*. Ke lé âbé mu mwo Iérusaléma, me ati a amu *Judé, ke é ne gaale cemwo ne ko a éémwa loredano.

Mataio 5

a bwo pipune ne pwo juwole

(*Pwahamii tii: Mataio 5—7*)

Luka 6.17–49, 12.22–34

¹Me e ali ni apulie na hiwon wo lésu, he lé ko âbé, ke e taa pwo juwole, ke e tebwo, beme pacémunilé. Ke lé âbé tebwo pelen ne nina lé âcéin.

Adéikewé

²Ke e pii telé pie:

³ «*Adéi nina lé pwo me piwahin jélé, be o bo a delé a *Mwametau he Miiden.

⁴ Adéi nina lé é, be e bo pwopweehi ne kolé [wo Padué].

⁵ Adéi nina bwala ni pwonimelé, be bo a delé a bwohemwo ati!

⁶ Adéi nina menelé me nimelé me lé ûdu ko ana te nime Padué kon, be e bo ne telé ati nina nimelé kon!

⁷Adéi nina lé pipati, be e bo pipatilé wo Padué.

⁸Adéi nina mang ni pwonimelé ne ko Padué, be lé o bo alieng!

⁹Adéi nina lé pébé a péém, be e bo pii kolé wo Padué pie ni naîn!

¹⁰ Adéi nina pitéétilé ko a bwo piténédehi nen delé a pwooti te Padué, be o bo a delé a Mwametau he Miiden.

¹¹ Adéikewé, heme lé pitakewé, ke heme lé pwotahi ne kowé, ke hemepie lé getikewé, watihen woéo.

¹²Be lé caa te wonaa te ni péroféta na lé ânebuhewé. Kehe geé pipwodéén me pituumé, be geé bo hegí a ceme ni penem dewé na ubwo ne jedá he *miiden!»

Wogewé ni pwéélang pwo a bwohemwo

¹³ «Wogewé ni jié pwo a bwohemwo. Kehe mepie patieden a neme a jié, ke he genye o woté ace bwopwon me nye ne mwo ace nemen? O caa te piticenaado ne kon, ke o tahi ole pwomwo, ke lé o engen pwon ne ni apulie.

¹⁴ «Wogewé ni pwéélang pwo bwohemwo, pwohewii a pwomwo ubwo na e mu pwo juwole, be o pwocoon me nye neduwoshi.

¹⁵Ke piwien mwo ne ko a mwomiû, be time nye uce ne miû ko a mwomiû, me nye talui ko ace cio! Kehe genye ne da ko miiden, beme e pwéélang ati ko ni apulie na lé mu ha a mwa.

¹⁶Ke wâé heme wonaa a pwéélang kowé! Wâé heme tuie ne he pwahamii ati ni apulie. Ke é mulang, ke lé o alihí ni naado na wâé na geé pwo, ke lé o pipaunu Padué Caa tewé na e jedá he miiden.»

É tuie me é punuun ni patén

¹⁷ «Geé nemwo niimihi pie é tuie me é pwo me tieden ni *patén de Moosé, me ni bwopiinen de ni péroféta. Kehe time é uce âbé beme é pétaabwon, kehe é tuie beme é punuun.

¹⁸Geé téne ehi, be é pii tewé a juuju pie: Hemepie e mwo tekó mu a miiden me a bwohemwo, ke time o uce pétaabwon ace céiu atii mu ko ni patén, dieli ko ace bwo pacuwoshi na ati ni naado.

¹⁹ «É mu ko anaa, ke wo pace apulie celi e tahi taabwon ace céiu patén celi te ju wahin, ke me e picaa te ni béén me lé pipwohewiieng, ke wo panaa, ke te junihe wahin nang ne ha a Mwametau he Miiden. Kehe wo pa apulie na e âcehi ni patén, ke me e picaa te ni béén me lé wonaa, ke wo panaa, ke te junihe ubwo nang ne ha a Mwametau he Miiden.

²⁰Éa, wâé heme ubwo a bwo piténédehi ne ni patén de Padué tewé, koja a bwo piténédehi nen de ni *dotéén ko patén, me ni *Farasaio. Be mepie time uce wonaa, ke o time geé uce taa ha a Mwametau he Miiden.»

Go necu a okéé

²¹ «Geé te temehi pie, e caa pii [wo Padué] te ni watihenye, pie: *Go nemwo taunuhi apulie. Exode 20.13* Be wo paceli e taunu pace céiu, ke o pééeng nge céii pa atautinaado, me e pwocuhinaado ten.

²² Kehe woéo, ke é pii pie: Hemepie go okéé ne ko pace céiu acéihi béém, ke go bo cuwo he pwahamii Padué, ke e bo tautiko. Ke heme go pii te pace céiu béém pie: “Pipenem a punim!”, ke mepie go pii me ta nang, ke go ucéihi a cuhinaado na te junihe ubwo, ne ha a miû.

²³ «Ke é hemepie go pébé a âpipati tem ne ha a *mwaiitihi, ke me e âbé ne ha a pwonimem aceli piehadenniu me pa béém acéihi,

²⁴ ke wâé heme go mwo ne lang a âpipati tem. Ke go mwojuia ngemwo me geu mi pipwopweehi me pa âjiénem. Ke nebwen, ke go bo mwojuia mwo me go bwobe ne a âpipati tem.

²⁵ «Me mwo ko wogo he pwaaden nge ha a mwotautinaado, me pana e neko ha a tautinaado, ke geu mi pipwopweehi me weeng. Be koli e bo neko te pa atautinaado me e pwocuhinaado tem, ke me e neko te ni pwoli, me lé neko he karépu.

²⁶ Ke é pii tem a juuju pie: O time go uce wie mu he karépu, hemepie mwo time go uce téele pwocuhi ati ni cuhinaado tem!»

A pwooti ko pitahagéi piaten

²⁷ «Geé te temehi pie, e caa pii [wo Padué] pie: *Go nemwo pibune. Exode 20.14*

²⁸ Kehe woéo, ke é pii pie: Hemepie go te ju ome ê mwode pace céiu, ke me nimem kon, ke pwohewiin heme geu caa tekó pipule me weeng.

²⁹ Be hemepie watihen a naamiim ne pwo jui me go tupwo ne ha a ta, ke go pétaabwon, ke go tahi nge ité kojako! Be o wâé ne kom hemepie tieden ace céiu duaa éém, kojan heme hején a éém, ke me o tahiko ne ha a miû!

³⁰ Ke mepie watihen a im ne pwo jui me go pwo ana ta, ke go tahagéi, ke go tahi taabwon nge ité kojako! Be wâé hemepie tieden ace céiu duaa éém, kojan hemepie hején a éém, ke me go â ha a miû!»

³¹ «Geé te temehi pie, caa pii mwo pie: *Wo pana e cibéé ê mwoden, ke wâé heme e pwo ace tii me pitahagéi piaten. Deutéronome 24.1*

³² Kehe woéo, ke é pii pie: Go nemwo cibéé ê mwodem na time uce ê abune aiu. Be koli go bo cineeng me e bune aiu, hemepie lu piaten mwo me pace céiu. Ke wo pace céiu apulie celi e pééeng me ê mwoden, ke e bune toomwo.»

A pwooti ko piapwo

³³ «Geé te temehi mwo pie, e caa pii [wo Padué] te ni watihenye pie: *Go nemwo gele ne ha a *piapwo tem. Wâé heme go pajuujuhi a piapwo tem ne he pwahamii Padué. Nombres 30.2*

³⁴Kehe woéo, ke é pii pie: Go nemwo piapwo! Go nemwo piapwo da he miiden, be atebwo iitih te Padué,

³⁵ai, é pwo bwohemwo, be é he na nelang ni an, ai é *lérusaléma, be a pwomwo ubwo te Padaame ubwo.

³⁶Ke go nemwo piapwo ne pwo punim, be time uce jan me go pwo me pwojo ai bwiile ace apun celi céiu.

³⁷Kehe go te ju pii cehi pie “éa”, heme nimem, ke “ûhu”, heme muhi tem. Be ni béé behin, ke e âbé mu ko *Caatana, pana ta nang.»

A pwooti ko pitaacunaado

³⁸«Geé te temehi pie, caa pii pie: *Naamiim me de a naamiing, ke a pecuwom me de a pecuwong.* Exode 21.24

³⁹«Kehe woéo, ke é pii pie: Mepie e pwo aceli ta ne kom wo pace céiu apulie, ke go nemwo taacu ne ten. Ke me e ahi a kwoom ne pwo jui, ke go ne ten mwo a céiu.

⁴⁰Ke mepie e pééko nge ha a mwotautinaado wo pace céiu apulie, ke me e pé a cimii tem, ke go ne ten mwo a palito tem.

⁴¹Ke mepie e cuwokom wo pace céiu apulie me go engen he celi céiu *kilomètre*, ke go engen he celi alo me weeng.

⁴²Ke é hemepie e ilehi kojako ace céiu naado wo pace céiu apulie, ke go ne ten. Ke é hemepie e ilehi, ke me e bo te ne tem mwo, ke go nemwo biteko ne kon.»

Geé pipwoééhe nina lé téétikewé!

⁴³«Geé te temehi pie, caa pii pie: *Go pwo me eânimem de ni béén.* Lévitique 19.18 Ke: “Go tééti ni béén na lé téétiko.”

⁴⁴Kehe icehi ana woéo, ke é pii pie: Geé pwo me eânimewé te nina lé téétikewé, {ke geé adéi lèpwona lé apwokewé}, ke geé pwoitihi me de nina lé pwo me geé mu he ni picani.

⁴⁵Be, me geé wonaa, ke wogewé lèpwo naî Padué, pa Caa tewé na e jedo he miiden. Be e pwo me téale ne ko nina wâé jélé, me nina ta jélé. Ke e pwo me ute ne ko nina wâé jélé, me ni béén na time uce wâé jélé.

⁴⁶«Be mepie te ju eânimewé cehi te nina eânimelé tewé, ke o ade ace cemewé mu pele Padué? Be wo lèpwo *atai mwani cuhi puni apulie, ke lé te pwo mwo anaa!

⁴⁷Ke mepie geé te pwobwocu me adéi cehi ni béewé, ke ade aceli geé pwo celi nihe piwâé? Be lé te pwo mwo anaa ne ni béén na time lé uce temehi Padué!

⁴⁸Ke wogewé, ke wâé heme geé pwoipikewé ati ne he ni pipwoééhe, pwohewii pa Caa tewé na e jedo he miiden.»

Mataio 6

A pwooti ko a bwo pipati

¹[E pii mwo wo lésu pie]: «Wâé heme go pwo ana te nime Padué kon, me pajuujuhi ni patén. Kehe icehi ana go pipwocileko! Go nemwo pwo ne he pwahamii ni apulie, beme lé pipii me wâé go. Be me wonaa, ke o time go uce hegi ace cemem ne pele Caa na e jeda he miiden.

²Ke me go ne mwani te ni béen na tice delé, ke go nemwo pihabwiiko, me pwohewii ni apipulekenye. Be lé pwo ne he ni *mwotapitihi, ke é ne he ni apimu te ni apulie ne ha a pwomwo ubwo. Be lé hane beme lé pipaunulé ne ni apulie. Ke é pii a juuju pie: Lé caa te hegi a cemelé!

³⁻⁴«Ke wogo, ke go nemwo pihabwiiko heme go pwo ana wâé. Me go ne mwani te ni béen na tice delé ko a im ne pwo jui, ke wâé heme time e uce temehi na a im ne pwo eaamu! Be e bo ne a cemem wo Padué Caa tem na e alahi ati ni naado.»

A pwooti ko a bwo pwoiitihi

⁵«Me geé pwoiitihi, ke geé nemwo pwohewii lépwo apipulekenye. Be lé cuwo heme lé pwoiitihi ne he ni mwotapitihi, me ni apimu te ni apulie ne he ni pwomwo ubwo. Be wâé telé heme lé alilé ne ni apulie. Kehe é pii tewé a juuju pie: Lé caa te hegi a cemelé.

⁶Kehe wogo, ke me go pwoiitihi, ke go taa ha a nemwa tem, ke go capuhi a pomwa, ke go pwoiitihi te Padué Caa tem na time genye uce alieng. Be e te alahi ana go pwo ne ha aduwo, ke e bo ne a cemem.

⁷«Ke me geé pwoiitihi, ke geé nemwo pwo jame cihe pwohewii ni béé apulie na time lé uce temehi pa ju Dué. Be lé te niimihi pie, e o te ténelé ko nina hiwon na lé pii.

⁸Ke geé nemwo pipwohewiilé, be e te temehi nina nimewé kon wo Padué Caa tewé, ânebuhe ni bwo pi-ile tewé.

⁹«Kehe geé woni ko ace bwo pwoiitihi tewé: “Caa teme jeda he miiden, wâé heme paciitihi a niim.

¹⁰Wâé heme e âbé a Mwametau tem. Wâé heme pwo ana te nimem kon ne éni pwo bwohemwo, me pwohewii ne jeda he miiden.

¹¹Go ne teme ce wiinaado celi jan ne kome ati he ni tan.

¹²Go pineuhi ni ta pwo teme, pwohewiin he geme pineuhi ni ta na lé pwo teme.

¹³Go nemwo nekeme he ni tacebwén. Go celuimikeme koja a ta.

{Be te etem a Mwametau, me a junuum me *a wâé tem, dieli mwo. Amen!}

¹⁴«Be é pii tewé pie: Me geé pineuhi ne te ni béen ni ta pwo telé, ke e o pineukewé mwo wo Padué Caa tewé jeda he miiden.

15Ke me pie time geé uce pineuhi ni ta pwo te ni béén, ke time e o uce pineukewé ko ni ta pwo tewé wo Caa tewé.»

A pwooti ko a pipaciile

16 «Me geé *pipaciile (me geé patupwo wiinaado, beme geé pwoiitihi), ke geé nemwo pihabwiikewé, pwohewii ni apipulekenye. Be lé habwii ne he ni pwahamiilé pie lé pipaciile, beme lé o alilé ati ne ni apulie. É pii tewé a juuju pie: Lé caa te hegi ni cemelé.

17 Kehe wogo, ke me go pipaciile, ke go puu a pwahamíim, ke go timi a punim.

18 Ke o time lé uce alihí ne ni apulie pie go pipaciile. Kehe te icehi Padué Caa tem, na time genye uce alieng, na e alihí ana go pwo ne ha aduwo, ke e bo ne ace cemem.»

Ni wâé na e pele Padué

19 «Geé nemwo hane ni wâé pwo bwohemwo, be koli bo bune kojakewé, ai koli bo muti, ke nyaale tieden.

20 Kehe geé taineibuhi ni naamuuwé [ne pele Padué] ne he miiden. Be time o uce paale, ke time o uce ili ne naado. Ke time o uce nyaale, ke muti, ke te tice abune lang.

21 Be é he na e lang ni naamuum, ke e lang a pwonimem.

22 «Go téne, ni naamíim, ke a pwéélang ko a éém. Ke me te wâé ni naamíim, ke e te mu ha a pwéélang ati a éém.

23 Ke me ta ni naamíim, ke ati a éém, ke e mu ha a melepiing. Ke me e â melepiing na a pwéélang na e kom, ke o te junihe melepiing kuti!»

Go pipégali a mwani, ai wo Padué

24 «Te tice pace apulie celi jan ne kon me pa apipenem de lupwoce daame celi alo julu, ati ha a pwonimen. Be e o pipenem ehi te pace céiu, ke e o tééti pa céiu. Kehe time uce jan me geé tai pipenem de Padué me a mwani.»

Hane ânebun a Mwametau ten

25 «Weengaa a watihen me é pii tewé pie: Geé nemwo gia ko ni mulihewé me ni éewé. Geé nemwo tee pitahimwokewé pie: “Genye o bo wii de?” ke “Genye o bo cuwohe ce de?” Be a mulihewé, ke junihe pwonaado ne kon koja a wiinaado; ke a éewé, ke junihe pwonaado ne kon koja a epwén!

26 «Geé omehi ni meni, be time lé uce picemi, me pitii âdaanu, ke time lé uce pine ehi wiinaado ne ko ni tan. Be te wo Padué Caa tewé jedá he miiden na e pawiinaadonilé. Kona wogewé, ke time geé uce piwéden koja ni meni? Uhuu!

27 Time uce é mu ko a bwo gia, celi geé o mwo ne mwo aceli céiu tan, ne he ni mulihewé!

28«É mu ko ade na geé gia mwo ko ce epwénnewé? Geé cuwoteeke alihni muun, be lé cim ne he meté, ke time lé uce péi ke wolinaado.

29Ke é pii tewé pie: Wo pa daame *Solomona, ati ha a wâé ten, ke ni epwénen, ke time uce junihe wâé koja a muun na te ju céiu.

30«Ke geé cuwoteeke alihni meté: E cim jenaa, ke o cini meé ne pwo miû. Kehe wo Padué, ke e te ne ni epwénelé. Ke kona time e o uce ne ce epwénnewé celi piwéden? Te junihe wahin kuti ni céihi tewé!

31«Geé nemwo gia me geé pii pie: “Genye o wii de, me ûdu de?” ke “Nye o cuwohe ce de?”

32Be ni béén na time lé uce temehi Padué, ke time lé uce mwaale ko a bwo hane ninnaa. Kehe icehi ana wogewé, ke e te temehi nina nimewé kon wo Padué Caa tewé na e jedha he miiden.

33Geé hane ânebun a *Mwametau he Miiden, ke geé pwo nina nime Padué kon, ke e bo ne tewé ati nina tice tewé.

34Ke é pii mwo tewé pie: Geé nemwo gia ko a tan meé, be a tan meé, ke e bo te pwo a penem den. A gia jenaa, ke te é jenaa.»

Mataio 7

Ni bée pipune te lésu ne pwo juwole

Luka 6.37–49, 11.9–13, 13.24–27

Geé nemwo tauti ni béén

1[E pii mwo wo lésu pie]: «Geé nemwo tauti ni béén, beme e o nemwo tautikewé wo Padué.

2Be e o bo tautikewé wo Padué pwohewii a bwo tautilé tewé, ke e o bo pwo tewé nina geé pwo telé!

3-4Go te ju alihni ehi a meté na e hamii pa âjiénem. Kehe time go uce alihni a ba-acuwo na ubwo na e hamii! Ke go woté ko ace bwopiinen de pa béeém pie: “Go ne me é pétaabwon a meté na e hamii”?

5«Wogo, ke pa apipulekenye, kehe bwi go! Go mi pétaabwon a ba-acuwo na ubwo na e hamii! Ke é mulang, ke go bwobe ali ehi ace bwo pétaabwon na a meté na e hamii pa âjiénem!

6«[Geé wéihi ehi nina wâé, na e âbé mu ko Padué.] Be time nye uce ne te ni wotaahen nina iitihi, be koli lé o bitelé ne mwo konye me lé wiikenye. Ke time genye uce tahi ne te ni puwokwo ni perle na te junihe ubwo ni cuhin, be lé o bo caaite.»

Geé ilehi me hane ke cii

7«Wâé heme geé tee ilehi taaci [koja Padué] be e bo ne tewé. Ke geé tee hane taaci, be geé bo tooli. Ke geé tee cii taaci a pomwa, be e o bo tehi ne tewé.

⁸Éa, be wo pana e ilehi, ke o bo ne ten. Ke wo pana e hane, ke e o tooli. Ke wo pana e cii a pomwa, ke o tehi ne ten.

⁹«He woo mu hadeniiwé, celi e o ne ace péi te pa naîn, hemepie e ilehi kojaeng ace pwoloa?»

¹⁰Ke he woo celi e o ne ten ace bwien, hemepie e ilehi ace ikua?

¹¹Be wogewé l épwo apulie na ta gewé, kehe geé temehi ne nina wâé te ni naîwé. Ke me wonaa, ke wo Padué Caa tewé jeda he miiden [na te junihe wâé nang] ke e bo ne ce naado celi te junihe wâé wéden te l épwona lé ilehi kojaeng.»

A ju âne ni patén

¹²«Geé pwo ne te ni b één ce naado celi nimewé me lé pwo ne tewé. Weengaa kuti a âne ni *patén de Moosé, me ati ni tii te ni péroféta.»

A pomwa na picu

¹³«Geé taa ha a pomwa na picu. Be ubwo a pomwa nge ha a duaan na e patiedenikenye ne hen dieli mwo. Be ticecoon a bwo â ha a pwaaden naa, ke hiwon nina lé â hen.

¹⁴Ke te junihe picu a pomwa nge ha *a ju mulip, ke pwocoon a bwo â hen. Ke time uce hiwon nina lé tooli.»

L épwo péroféta agele

¹⁵«Geé pipwocile l épwo péroféta agele! Be lé o âbé céikewé he lé pwohewii ni muto, kehe icehi ana l épwo wota apiyii.

¹⁶Geé o te temehilé mu ko ni bwo penem delé. Be time genye uce tabwo ace tabe megele mu ko ace éé muceni! Ke time genye mu uce tabwo ace majing mu ko ace acuwo celi pwo dan!

¹⁷⁻¹⁸Be a acuwo na wâé, ke e te ne ni acehin na wâé [me wii] ke pwocoon me e ne ce acehin celi ta. Ke a acuwo na ta, ke e ne ni acehin na ta, ke pwocoon me e ne ce acehin celi wâé.

¹⁹Ke o tahagéi a acuwo na time e uce ne ce acehin celi wâé, ke o tahieng da pwo miû.

²⁰«Ke te piwien ne ko l épwo péroféta agele, be geé o temehilé mu ko ni penem delé.»

Go pii ke go pwo

²¹«Mepie nimem me go tuie da ha a *Mwametau he Miiden, ke time go uce ju cuwo ko pii cehi pie: “Padaame, Padaame!” Wâé heme go pwo mwo ana nime Caa tong kon na e jeda he miiden!»

²²Be é ha a Tan na e bo tauti ni apulie hen wo Padué, ke o hiwon nina lé o pii tong pie: "Padaame, Padaame, geme mu patemehi a pwooti tem, ke peni ni duéé ne he niim. Ke hiwon ni penem na geme pwo ko a junuum!"

²³«Ke é bo te ju pii telé gaale pie: Time é uce temehikewé. Geé engen kojaéo, be wogewé, ke lépwo apwo ne nina ta! [Be time geé mu uce pwo nina nimung kon.]»

A ocine ko lupwo mwa

²⁴«Wo pana e téne a pwooti tong, ke me e piténedehi, ke e pwohewii pa apulie na e tauti ehi ni naado, ke e bahi a mwa ten ne pwo a péi.

²⁵Ke e cuwo ole a ute, ke e téte a jaa, ke udan, ke e tatééhi a mwa, kehe icehi ana time e uce tupwo, be caa bahi ne pwo a péi.

²⁶Kehe wo pana e téne ni pwooti tong, ke time e uce ténedehi, ke e pwohewii pa muti na e pacuuli a mwa ten ne ha a won.

²⁷Ke e cuwo ole a ute, ke e téte a jaa, ke udan, ke e tanahi ati a mwa, ke e tupwo.»

Pwo mwomwon den me e pacémunilé

²⁸Ke me e pii ati ni pwooti naa wo lésu, ke lé téetih a bwo cihe ten ne ni apulie.

²⁹Be time e uce pwohewii ni *dotéén ko patén delé. Be e te pacémunilé mu ha a pihuô [na e te ne ten wo Padué].

Mataio 8

E pwo me tieden a cunu ko pa katia

Maréko 1.40–45; Luka 5.12–16

¹É alechen, ke e opé mu pwo juwole wo lésu, ke lé âcéin ne ni apulie na te junihe hiwon jélé.

²Ke e âbé ne kon wo pa céiu katia. Ke e tidihi jilin he pwahamiin, ke e pii ten pie: «Padaame, hemepie te nimem, ke go pwo me tieden a katia kong!»

³Ke e cine ngen a in wo lésu, ke e ti kon, ke e pii ten pie: «Éa, te nimung! Caa wâé go!» Ke te tieden kuti kojaeng a katia kon.

⁴Ke e pii ten pie: «Go nemwo pwojepule kon! Kehe go â pihabwiiko ne te pa *apwoâpwailo. Ke go ne [te Padué] ali âpwailo li e pii wo *Moosé ne he li patén den. Be me wonaa, ke me lé alihî ati ne ni apulie pie caa wâé go.»

A céihi te pa céiu caa te coda

Luka 7.1–10

⁵E ân wo lésu, ke e taa Kapernaüm, ke e âbé beniieng wo pa céiu caa te coda te lépwo Roma. Ke e ileeng beme e picani ten.

⁶Ke e pii pie: «Au Padaame, pa eabwé tong, ke e tee ko pule pwomwo, be tebwomwa nang, ke te junihe cunu nang kuti.»

⁷Ke e hegi ne ten wo lésu pie: «Wâé, é bo ân, be é bo pwo me tieden a cunu kon.»

⁸Ke e hegi ne ten wo paje pie: «Ûhu, time uce jan ne kom, me go tuie nge ha a pomwa tong, be te junihe pwonaado ne kom. Kehe go te ju cihe cehi, beme o tieden a cunu ko pa eabwé tong.

⁹Be woéo, ke é piténede pa apihuô tong, ke é uce pihuô te ni coda. Ke me é pii te pace céiu pie: “Go engen!”, ke e engen. Ke me é pii te pace céiu pie: “Go âbé!”, ke e âbé. Ke me é pii te pa eabwé tong pie: “Go pwo ani”, ke e te pwo.»

¹⁰Ke e te junihe téele wo lésu, ke e picedi pali caa te coda. Ke e pii te lépwona lé ko âcéin pie: «Geé te ju tabemi ehi: Time é uce téele too pace apulie celi ubwo ace céihi ten pwohewii paje, ke piwien mwo ne ha a *Isaraéla, [a bele te Padué].

¹¹Éa, o bo hiwon celi lé o bo âbé ha a *Mwametau he Miiden, mu pwo a bwohemwo ati. Ke o pwo ce atebwo telé ne ha a piwiinaado ubwo me ni watihenye, *Abérama, Isaaka, me lakobo.

¹²Ke hemepwo é ne ko lépwona me lé taa ha a Mwametau, ke time uce jan ne kolé me lé taa. Ke o bo tahilé ole pwomwo ha a melepiing ité koja Padué! Ke lé bo é ko piwii pecuwo.»

¹³Ke nebwén, ke e pii wo lésu te pali caa te coda pie: «Go mwojuia ngemwo ha a pomwa tem! Be é ko a céihi tem, ke e o tuie ana go ilehi!» Ke é ha a benaamwon naa, ke caa te tieden kuti ali cunu ko pali eabwé.

E pwo me wâé ni apulie

Maréko 1.29–34; Luka 4.38–41

¹⁴E â ha a pomwa te Pétéru wo lésu, ke e too ê mwaa Pétéru he e tekо pule, be e pwopilijing.

¹⁵Ke e pétaa ko a in wo lésu, ke te tieden kuti kojaeng ali pilijing. Ke e cuwoda wo ênaa, ke e pwo me lé wiinaado.

¹⁶É he babwén, ke lé pébé céii lésu ni apulie na hiwon jélé, na pwo ni duéé kolé. É mu ko a pwooti ten, ke e peni ni duéé, me lé wie mu kolé. Ke e pwo me tieden ati ni cunu ko ni béén.

¹⁷É nelang he na e pacuwohi ali e pii wo Padué, na e pwaadeniin bé wo péproféta Isaia pie: E caa pé ni picani tenye, ke e pé kojakenye ni cunu konye. *Ésaïe 53.4*

Lépwona nimelé me lé âcéi lésu

Luka 9.57–62

¹⁸É ha a céiu tan, ke hiwon ni apulie na élé aujeni lésu. Ke me e alilé, ke e pii te lépwo acémun den pie, me lé tai gaale ko a céiu duaan ne gaale cemwo ko a jié.

¹⁹Ke é mulang, ke e âbé céiieng wo pa céiu *dotéén ko patén, ke e pii ten pie: «Pa apipune, [nimung me] é âcéim, na ati he ce piduaan celi go bo â hen.»

²⁰ Ke e hegi ne ten wo lésu pie: «Ni wota apiaba, ke pwo ni amwaale telé; ke ni meni, ke pwo ni mwonahilé. Kehe woéo, pa *Nahi Apulie, ke te tice duaan celi me é mwaale hen.»

²¹ Ke piwien mwo ne ko pace céiu apulie celi nimen me e âcéi lésu, be e pii ten pie: «O te jan me é mwo mi â pinneduwo caa tong?»

²² Ke e hegi ne ten wo lésu pie: «Ûhu, go âbé céing, ke go necu ni amele, me lé te pinneduwolé!»

E pacuwohi a udan wo lésu

Maréko 4.35–41; Luka 8.22–25

²³ E taa pwo ong wo lésu, ke lé âcéin wo lépwo acémun den.

²⁴ Alecehen, ke e tabuhi tahieng me ubwo a dan, ke e taa jié ha ali ong. Ke mepwo wo lésu, ke e teko pule ha ali ong.

²⁵ Ke lé paumiêeng wo lépwo acémun den, ke lé pii ten pie: «Padaame! Go celuimikenye, be genye o caa mwiiê!»

²⁶ Ke e pii telé pie: «É mu ko ade na mwotikewé? Te junihe wahin kuti ni céihi tewé!» Ke e cuwoda, ke e cihe okéé ne ko ali dan me a jié. Ke e cuwo ali tamu, ke te ju au kuti.

²⁷ Ke lé téetih, ke lé pipii telé pie: «He woo pa apulie ce, na lu piténedeeng a dan me a jié?»

E pawiehi ni duéé @ mu ko lupwo alo apulie

Maréko 5.1–20; Luka 8.26–39

²⁸ Lé tuie ngen wo lésu me lépwo acémun den ha a duaan ne gaale cemwo [ne pejié Galilé] ne ha amu Gadara. É ne ha amu naa, ke pwo lupwo apulie na pwo duéé kolu. Ke te junihe mwoti ni apulie kolu, be lupwo a-okéé, ke te junihe pwo niihelu. Ke time lé mu uce piâ ha a duaan naa. Ke me lu ali lésu, ke lu te wie kuti mu he iitihi, ke lu opé beniieng.

²⁹ Ke lu toii da pie: «Pa *Naî Padué, ade aceli nimem me go pwo temu? Nimem me go pwocuhinaado temu, ânebuhe ace benaamwon ko pwocuhinaado?»

³⁰⁻³¹ Ke lé cuwokon ne li duéé, ke lé pii ten pie: «Mepie go pawiekeme, ke go pwo me geme gaale he ni puwokwo ne!» Be pwo a pubu puwokwo, na lé teko um ne gaale cemwo.

³² Ke e hegi ne telé pie: «Geé ân!» Ke lé wie mu ko lupwoli apulie, ke lé taa he li puwokwo. Ke lé te téte kuti ne li puwokwo mu pwo ali juwole ole he jié. Ke lé tai mwiiê nelang.

³³ Ke wo lépwo awéihi puwokwo, ke lé te téte kuti nge ha a mwopopwaalé. Ke lé piuti ati a jepule ko ana e tuie ne ko lupwo apulie naa.

³⁴ Ke lé te tai âbé kuti céii lésu ne ni apulie mu ha a mwopopwaalé. Ke me lé alieng, ke lé wâgo kon pie, me e engen mu ha amu telé.

Mataio 9

E pwo me wâé pa céiu tebwomwa

Maréko 2.1–12; Luka 5.17–26

¹ E mwojuia mwo wo lésu pwo ong ne ha a mwopopwaalé [Kapernaüm] he na e pimu lang.

² Ke lé âbé céiieng ne ni apulie, he lé pipaadoimibé ne pwo a apule pace céiu béélé na tebwomwa nang. Ke me e alihia céihi telé wo lésu, ke e pii te pali tebwomwa pie: «Go mwoiu, go pa béeing! Be caa pineuhi ni ta pwo tem!»

³ Ke wo lépwo bée *dotéén ko patén na lé mu lang, ke lé piniimihi pie, ‘E pii me ta Padué wo pa apulie ce [be e pwo me piwielu me weeng]!’

⁴ E te temehi nina lé niimihi wo lésu, ke e pii pie: «É ko ade na ta ni pwonimewé?

⁵ Ade aceli piticecoon? Me é pii ten pie: “Caa pineuhi ni ta pwo tem”, ai me é pii ten pie: “Go cuwoda, ke go engen”?

⁶ [Ke hemepie jan me é pwo me e engen ne ânebuhewé ati] ke geé bo temehi pie, pwo mwomwon dong, woéo, pa Nahi Apulie, me é pineuhi ni ta pwo te ni apulie ne pwo bwohemwo.] Ke e pii te pali tebwomwa pie: «Go cuwoda, ke go pé apule tem, ke go âmwo pelem.»

⁷ Ke e te cuwoda kuti wo pali, ke e âmwo ha a pomwa ten.

⁸ Ke me lé alihia anaa ne ni apulie, ke mwotilé. Ke lé pipaunu Padué, be e ne ni *pipwojunuun na ubwo te ni apulie!

E tote Mataio (Lévi)

Maréko 2.13–17; Luka 5.27–32

⁹ E engen wo lésu, ke e ali pa apulie na pii kon pie Mataio, pa *atai mwani cuhi puni apulie [me de lépwo Roma] he e ko tebwo ha a mwotai mwani ten. Ke e pii ten wo lésu pie: «Go âbé céing!» Ke e te cuwoda kuti wo panaa, ke e âcéi lésu.

¹⁰ É alechen, ke lé wiinaado pele Mataio wo lésu me lépwo acémun den. Ke hiwon ni apulie na lé piwiinaado me woélé: wo lépwo atai mwani, me ni bée apulie na ta ni mulihelé.

¹¹ Ke me lé alihia anaa wo lépwo *Farasaio, ke lé pii te lépwo *acémun de lésu pie: «É mu ko ade na wo pa caa tewé, ke lé piwiinaado me lépwo atai mwani, ke ni bée apulie na ta jélé?»

¹² Ke e te ténelé wo lésu, ke e pii telé pie: «Time lé uce hane ce dotéén wo lépwona te wâé jélé, kehe te icehi lépwona cunu jélé.

¹³ Wâé heme geé temehi a bwopiinen na e pii wo Padué pie: *Time uce a *âpwailo ko wota ana wâé tong. Kehe nimung ko a pipwoééhe.* Osé 6.6 «Be time é uce âbé tote nina lé niimihi pie wâé ni mulihelé. Kehe é âbé tote nina lé temehi pie ta ni mulihelé.»

A ocine ko a pipaciile
Maréko 2.18–22; Luka 5.33–39

14 Lé tuiybé pele lésu wo lépwo bée acémun de *loane pa apipuu apulip. Ke lé pii ten pie: «Wogeme, me lépwo Farasaio, ke geme te cuwo ko *pipaciile. Be geme patupwo wiinaado beme geme pwoitihi. Kehe é ko ade na time lé uce pipaciile wo lépwo acémun dem?»

15 Ke e hegi ne telé wo lésu pie: «Kona te piwahin lépwona todelé ne ko a piaten, heme e mwo teko mu pelelé wo pa apiaten? Úhu! Be e o bo âbé a tan na o bo pé kojalé pa apiaten. Ke é mulang na lé o bobe pipaciile.

16 «Te tice pace céiu apulie celi me e pé ace memwaanu celi mwo te ju wâé, me e woli ne ko ace memwaanu celi ukéiu. Be [mepie e puu a mwaanu, ke] bo nihe ubwo a tie kon.

17 Ke geé niimihi a *mwotabe na pwo ko iiwota. Be time nye uce pé ace tabe megele celi mwo coho, me nye pa a mwotabe na caa ukéiu. Be [pwocoon me cibu, ke] e bo pabuwoshi, ke genye o patieden a tabe megele me ni mwotabe. Úhu! Wâé heme nye ne a tabe megele na mwo coho ne ha a mwotabe na mwo coho, beme cile ehi a tabe megele, me ali mwotabe.»

E pwo me wâé lu alo toomwo
Maréko 5.21–43; Luka 8.40–56

18 Me e mwo ko pii telé anaa wo lésu, ke e âbé céiieng wo pa céiu apulie na piubwo nang ne ha amu. Ke e tidihi jilin he pwahamii lésu, ke e pii ten pie: «E mwo teko ju mele ê naîng! Go âbé ne ni im huîin, beme e o mulie mwo.»

19 Ke lé cuwoda wo lésu me lépwo acémun den, ke lé âcéin.

Ê toomwo na 12 ni jo ko a cunu kon

20 É he lé ko â he pwaaden, ke e tuiybé ê toomwo na caa 12 ni jo na cunu nang hen, be e mu tuie ni benaamwon na e mu téte kon a cewéle. E piâché alecehe lésu, ke e ti ko a baaé epwénen.

21 Be e pipii ten pie: “Mepie é te ju ti ko a epwénen cehi, ke o caa te tieden a cunu kong.”

22 Ke e biteeng wo lésu, ke me e alieng, ke e pii ten pie: «Go mwoiu, go êje! Be caa wâé go, mu ko a céihi tem!» Ke te tieden kuti ali cunu kon.

Ê naî pa apulie na piubwo nang

23 E tuie wo lésu nge ha a pomwa te pa apulie na piubwo nang. Ke e ali lépwo acuu oopwé he lé caa ko piwâam ne ko a pineduwo, ke te junihe ubwo kuti ni pwocihe lang.

24 Ke e pii telé pie: «Geé engen! Geé ko pii pie e caa mele; kehe woéo, ke é pii pie e teko ju puluta!» Ke lé pihoonieng.

25 Ke e tai pawielé wo lésu, ke e taa ha ali mwa. Ke e pétaa ko a i êgi cuwo nahi toomwo, ke e te cuwoda kuti.

²⁶Ke lé te piuti kuti pitih a duaan naa a jepule kon.

Lu niê mwo wo lupwo bwi

²⁷É mulang, ke e engen wo lésu. Ke lu âcéin wo lupwo bwi na alo julu, he lu ko toii céin pie: «Pa *Naî Davita, go pipwoééhemu!»

²⁸Ke me e tehene nge pelen wo lésu, ke lu âbé céiieng wo lupwoje. Ke e pii telu pie: «Kona geu caa teko céihi kuti pie, jan ne kong me é pwo anaa?» Ke lu hegi ne ten pie: «Éa, go Padaame.»

²⁹Ke e pétaa ko ni naamiilu wo lésu, ke e pii telu pie: «Wâé heme pwo ne teu ana geu céihi ne kon!»

³⁰Ke lu caa te niê kuti. Ke e pii mwoiuhi telu pie: «Geu nemwo pwojepule ko nina é pwo teu!»

³¹Kehe icehi ana he lu wie, ke lu pwojepule ko nina e pwo wo lésu, pitih a amu naa.

E pwo me e cihe pa huuhu

³²Ke me lu engen koja lésu wo lupwoje, ke lé pébé céiieng pa apulie na huuhu nang, be pwo duéé kon.

³³Ke e peni ali duéé wo lésu, ke e te cihe kuti wo pali huuhu. Ke lé téetieng ati ne ni apulie na lé mu lang, ke lé pii pie: «Time genye mu uce alih celi wonaa, ne ha amu *Isaraéla!»

³⁴Kehe icehi ana lé pii wo l épwo Farasaio pie: «E peni ni duéé ko a junuu *Caatana, pa daame he ni duéé!»

E pahede ni 12 apostolo ten

Maréko 6.7–13; Luka 9.1–6

Te junihe ubwo a pitii âdaanu

³⁵E engen he ni pwomwo ubwo ke ni mwopopwaalé wo lésu. Ke e pacémuni ni apulie ne he ni *mwotapitihi. Ke e patemehi a Pwooti Wâé ko a Mwametau [he Miiden]. Ke e pwo me tieden ni cunu me ni picani.

³⁶Ke me e alih a pubu apulie, ke e te junihe pipwoééhelé. Be caa mwaale jélé, ke pitupwo jélé, pwohewii ni muto na tice awéilé.

³⁷Ke e pii te l épwo acémun den pie: «Nihe ubwo a pitii âdaanu na me pwo, kehe icehi ana time uce hiwon ni apenem.

³⁸Geé pwoiitihi, me ilehi koja pa eapwihi apwoamu, me e ne mwobé ce bée apenem, beme lé pitii âdaanu.»

Mataio 10

Ni nii l épwo 12 apostolo

¹E tode l épwo 12 *apostolo ten wo lésu, ke e ne telé a pihuô beme lé peni ni duéé, ke me lé pwo me tieden ni cunu me ni picani te ni apulie.

²Weengi ni nii lépwo 12 apostolo: Simon, na pii mwo kon pie Pétéru; André, pa âjiénen; Cang, pa naî Zébédé; Ioane, pa âjiéne Cang;

³Filip; Bartélemi; Toma; Mataio, pa *atai mwani cuhi puni apulie; Cang, pa naî Alfé; Tadé;

⁴Simon, pa Zélo; Judas Iscariot, pana e bwo pipwohuô te lésu.

E pahedelé ngen

⁵E pahede lépwo 12 apostolo naa wo lésu, me lé â he ni amu. Ke e ne ni pihuô telé, ke e pii telé pie: «Geé nemwo â pele ni apulie na time uce lépwo *Juif. Ke geé nemwo taa he ni mwopopwaalé ha amu *Samari.

⁶Kehe geé te â céii cehi ni apulie *Isaraéla, be lé pwohewii ni muto na lé pipatieden.

⁷Ke geé pipatemehi nge he pwaaden pie: “Caa é mwonu a *Mwametau he Miiden.”

⁸«Ke geé pwo me tieden ni cunu, ke geé pwo me lé mulie ni amele, ke geé pwo me wâé ni katia, ke geé peni ni duéé mu ko ni apulie. Be ana geé hegi he te tice cuhin, ke wâé heme geé ne mwo, me te tice cuhin.

⁹Ke me geé engen, ke geé nemwo pé ce mwani megele, ai mwani pwojo.

¹⁰Ke geé nemwo pé ce éele, me ce dihibwaawé, me ce bwajaawé. Geé te cuwohe ace epwén celi te céiu, be wo pa apenem, ke wâé heme e hegi a wiinaado ten me a cemen.

¹¹«Hemepie geé taa ha ace céiu pwomwo ubwo, ai ace céiu mwopopwaalé, ke geé hane pace apulie celi jan ne kon me e hegikewé. Ke geé mu pelen dieli geé bo engemwo mu ha a duaan naa.

¹²Ke me geé taa ha ace céiu pwomwo, ke geé *adéi a pwomwo naa.

¹³Ke me lé hegikewé ehi, ke e o mu pelelé a adéihi, ke mepie time lé uce hegikewé ehi, ke geé te pémwojuiéhi mwo a adéihi tewé.

¹⁴«Ke mepie te tice apulie celi lé hegikewé me tabemi ni pwooti tewé ne ha ace céiu duaan, ke geé wie mulang, ke geé tagiliihi ni muu pule ko ni awé [beme geé habwii pie time uce wâé ni huô telé].

¹⁵Ke é pii tewé a juuju pie: É ha ace Tan celi e bo tauti ni apulie hen wo Padué, ke o te junihe ubwo ace cuhinaado telé koja lépwo *Sodome me Gomore [li te junihe ta ni huô telé].»

O pwotahi ne kowé

¹⁶«Geé téne! É pahedekewé pwohewii ni muto nge ha awieme ni wota apiwii. Wâé heme geé piengen cile pwohewii ni bwien, ke me bwala gewé pwohewii pa meni pwojo.

¹⁷Be lé o imwikewé, ke lé o péékewé nge he ni mwotautinaado. Ke lé o tatikewé ko bwaliwota ne he ni *mwotapitihi.

¹⁸Ke lé o teuukewé nge he pwahamii ni gupéno me ni daame, beme lé tautikewé, wonaa mu kong. Wonaa beme ne tewé beme geé cihe telé kong, é ne mwo he pwahamii nina time uce ni Juif.

¹⁹«É heme lé bo péékewé, ke geé nemwo pwo me gia gewé ko ce bwopiinen telé. Be é ha a benaamwon naa, ke wo Padué, ke e bo te ne tewé ce pwooti celi me geé pii.

²⁰Be time o uce wogewé celi geé o cihe, kehe a Jene pa Caa tewé na e bo cihe kowé.

²¹«[É ha a benaamwon naa] ke wo pa céiu apulie, ke e o bo ne pa âjiénen beme taunueng. Ke e o wonaa mwo wo pa caa te ewa ne ko pa naîn. Ke ni ewa, ke lé bo cuwode ni nyaa me caa telé, beme lé taunulé.

²²Ke lé o téétikewé mu kong ati ne ni apulie. Kehe wo paceli e bo cumang die ha anebwén [ko a mulihen] ke e o bo celuimieng wo Padué.

²³«Ke me lé pwo me geé picani ne ha ace céiu pwomwo ubwo, ke geé cela nge ha ace céiu. É pii tewé a juuju pie: Mwo time geé uce engen ati he ni pwomwo ubwo Isaraéla, ke é o caa mwojuia mwo, woéo pa Nahi Apulie.»

O wonaa mwo tewé

²⁴«É pii tewé pie: Wo pa acémun, ke time e uce piwéden koja pa apacémunieng. Ke wo pa apenem, ke time e uce piubwo nang koja pa daame hen.

²⁵Be wo pa acémun, ke wâé heme e pwohewii pa apacémunieng. Ke wo pa apenem, ke wâé heme e pwohewii pa daame hen. Be mepie lé pii ko pa eapwihi pwomwo pie, Caatana, ke lé o te junihe pii me ta mwo nina élé ha a pwomwo naa.»

Geé nemwo pwo me mwotikewé

²⁶«Geé nemwo pwo me mwotikewé ko ni apulie. Be ati ni naado na neduwohi, ke o bo habwii.

²⁷Ke ni naado na é pii tewé neduwohi, ke geé pii beetih ne ha a pwéélang. Ke ni naado na pii ne he pwojéénewé, ke geé pii beetih ne ha awiemewé.

²⁸Geé nemwo pwo me mwotikewé ko ni apulie na lé taunuhi a éewé, be time o uce jan me lé taunuhi a jenewé. Wâé heme geé pwo me mwotikewé ko Padué. Be te weeng cehi na jan me e taunuhi a éewé me a jenewé ne ha a miû.

²⁹«Geé cuwoteeke aliji ni meni na wahin jélé: Nye icuhi lupwoce meni celi alo, ne ko a mwani celi te céiu. Kehe icehi ana te tice mu kolé celi e o tupwo ti ne he pule, hemepie time e uce temehi wo Padué Caa tewé.

³⁰Ke wogewé, ke e te tai temehi ati ni jéhi ni apuniwé.

31Ke é mu ko anaa, na é pii tewé pie: Geé nemwo pwo me mwotikewé! Be te junihe pwonaado ne kowé ne he pwahamii Padué, koja ni meni na te nihe hiwon jélé!»

Geé nemwo pineduwoéo

32«Wo pa apulie na e pii ne he pwahamii ni apulie pie, weeng pa apulie tong, ke woéo mwo, ke é o pii mwo pie weeng ke pa apulie tong, ne he pwahamii Caa tong jeda he miiden.

33Kehe wo pana e pii, ne he pwahamii ni apulie, pie time e uce temehiéo, ke woéo mwo, ke é o te pii, ne he pwahamii Caa tong jeda he miiden, pie time é uce temehieng.»

Lé pipiiden ne ni apulie mu kong

34«Geé nemwo niimihi pie é âbé beme é pébé a péém ne pwo bwohemwo. Úhu! Woéo pa watihen me time lé uce piténelé ne ni apulie.

35Be é âbé me é pineité *lupwo pwéénemeewa, me lu téénemeewa, me lu amwaan.*

36Ke wo lèpwona lé mu ha a mwa te pa apulie, ke bo woélé lèpwona lé pwotahi ne kon.» Miché 7.6

Geé patupwo ni mulihewé me dong

37«Wo paceli te junihe eânimén de lu nyaa me caa ten kojaéo, ke time uce jan me pa acémun dong. Ke wo pana te junihe eânimén de pa naîn, me ê naîn kojaéo, ke time uce jan me pa acémun dong.

38Wo pana time e uce canihi a *kuricé ten, me e âbé céing, ke time uce jan me pa acémun dong.

39Ke wo pana nimen me e cile a mulihen, ke e o patieden. Kehe wo pana e patieden a mulihen mu kong, ke e o bo tooli *a ju mulip.»

Wo pana e hegikewé ke e hegiéo

40«Hemepie e hegikewé wo pace céiu apulie, ke woéo pana e hegiéo. Ke wo pana e hegiéo, ke e hegi mwo pana e neéo bé.

41Ke mepie e hegi pace péroféta mu ko ana pa péroféta, ke o bo pwo ace cemen celi pwohewii ana ne te ni péroféta. Ke mepie e hegi pace céiu apulie celi e *mwomwon ne he pwahamii Padué, be e mwomwon, ke o bo pwo ace cemen celi pwohewii ana ne te pana e mwomwon. É pii tewé a juuju pie:

42Mepie e ne ace mwoûdu ko tabe bwala te ace pibéé ni cuwo nahi ewa ce, be pa acémun dong, ke e bo hegi mwo ace cuhin.»

Mataio 11

1É he e pii ati ni pihuô naa wo lésu te lèpwo **12** acémun den, ke e engen mulang, ke e â he ni bée pwomwo ubwo ne ha a duaan naa. Ke e pacémuni ni apulie, ke e pipatemehi telé a Pwooti Wâé.

Pa Mesia na lé ucéieng

Luka 7.18–23

2É he e mu he karépu wo *loane pa apipuu apulie, ke e téne a jepule ko Kériso, me nina e pwo. Ke e pahede lèpwo bée acémun den,

3beme lé â tahimwo lésu pie: «He caa te wogo kuti pali *Mesia li me e bo tuiebé? Ai, me geme mwo te ucéi pace céiu?»

4Ke e hegi ne telé wo lésu pie: «Geé mwojuia mwo, me geé â piuti te loane nina geé téne, me nina geé alih.

5Be lé caa niê mwo wo lèpwo bwi; ke lé caa engen ehi wo lèpwo tebwa; ke caa wâé mwo wo lèpwona katia jélé; ke lé caa téne mwo wo lèpwona bwéjé jélé; ke lé caa mulie cemwo wo lèpwo amele; ke lé caa hegi a Pwooti Wâé wo lèpwona tice delé!

6Adéi pana e ali temehiéo, me céihi ne kong!»

E cihe ko loane wo lésu

Luka 7.24–35

7Ke me lé mwojuia mwo wo lèpwo acémun de loane, ke e pii wo lésu te ni apulie na lé mu lang pie: «É he li geé â ha a da me geé téne loane, ke he ade aceli geé â alih? [Pa apulie na pipwoééhen na e pwohewii] a womeéle celi e papenemihi na a dan?

8Ûhu! Ke kona he ade aceli geé â alih? Pace céiu apulie celi e cuwohe ace epwén celi nihe wâé? Ûhu! Be nina te junihe wâé ni epwénelé, ke nina lé mu he ni pwomwo he daame!

9Te ade aceli geé â alih? Pace céiu péroféta? Éa, ke é pii tewé pie: Wo panaa, ke pa péroféta ubwo!

10Be te wo loane kuti, na e piieng wo Padué ne he ni tii iitihi pie: É *bo neole pa apipépwooti tong*. E *bo ânebuhem, me e pwopweehi a pwaadeniim.*»*Malachie 3.1*

11[E pii mwo wo lésu pie]: «É pii tewé a juuju pie: Te tice pace apulie pwo bwohemwo, celi e piwéden koja loane pa apipuu apulie. Kehe icehi ana wo pana te nihe wahin nang ne ha a *Mwametau he Miiden, ke te nihe piubwo nang koja loane.

12Tabuhi ha a benaamwon na e pipuu apulie wo loane dieli jenaa, ke lé hane ne ni apulie, me lé ne, ne éni pwo bwohemwo, a Mwametau he Miiden ko ni niihelé.

13Be é ânebuhe loane, ke ni *patén de Moosé, me ati ni péroféta, ke lé pipatemehi te ni apulie [pie e o caa ne a Mwametau ten wo Padué].

¹⁴Geé céhi ne ko nina é pii tewé: Wo loane, ke wo péroféta *Élia li me e bo âmwobé.

¹⁵«Wo paceli pwo ce pwojéénen me e téne, ke wâé heme e téne!»

Lé pipiikemu me loane

¹⁶⁻¹⁷«É bo pipwohewii ne ko ace de ni apulie jenaa? Lé pwohewii ni cuwo nahi ewa na lé pidaataa ha apimu te ni apulie. Be [muhi te ni béén me lé jele me ni bélélé]. Ke lé pii telé ni bélélé pie: “Geme cuu oopwé tewé, ke time geé uce pwolu. Ke geme pwo a nyebi ko mele, ke time geé uce é!” «Ni apulie jenaa, ke pwohewii ni cuwo nahi ewa naa,

¹⁸be e tuiebé wo loane pa apipuu apulie, ke e pawie wiinaado he ni bée benaamwon, ke time e uce ûdu tabe megele, ke lé pii ne ni apulie pie: “Pwo duéé kon!”

¹⁹«Ke é tuiebé, woéo pa Nahi Apulie, ke é wiinaado me ûdu [pwohewii ni bélélé]. Ke lé pii ne ni apulie pie: “Wo paje, ke te junihe pa aûdu, ke pa awiinaado! Ke e pabéé ni atai mwani, me ni bée apulie na ta jélélé!” «Kehe [a juuju ana nye mu pii pie]: “Nye alihia temehi a pitemang ne he ni bwomu [te nina lé mulie ha a pitemang].”»

Lé pwocuhinaado ne nina muhi telé me lé céhi

Luka 10.13-15

²⁰Ke e cihe me mwoiu te ni apulie wo lésu ne he ni pwomwo ubwo ko ni *pipwojunuun na hiwon na e caa pwo ne hen, be time lé uce pitaatééhi ni mulihelé.

²¹Ke e pii telé pie: «Geé pipwocile, wogewé ni apulie Korazin me Betsaïda! Be o bo ne cuhinaado tewé! Be é caa pwo ni naado na nihe ubwo ne pelewé [ke time geé uce céhi]! Geé cuwoteeke niimihi lupwo pwomwo ubwo Tir me Sidon ânebun [be te nihe ta ni huô te ni apulie lang]. Kehe icehi ana hemepie lé alihia ana é pwo ne pelewé, ke wieli caa te é bwolihi celi lé taatééhi ni mulihelé. Ke me lé o habwii ko ace bwo cuwohe cang delé, me pitimilé he dep.

²²Be é pii tewé a juuju pie: É ha ace Tan celi e bo tauti ni apulie wo Padué, ke o te junihe ubwo ace cuhinaado tewé koja lépwo Tir me Sidon.

²³«Ke te piwien ne mwo kowé, wogewé ni apulie Kapernaüm. Be geé niimihi pie pwonaado ne kowé, ke geé pwohewii Padué. Ûhu! E bo nekewé ole céii lépwo amele! Be e pwo ni naado na te junihe ubwo ne pelewé. É hemepie e pwo ni naado naa ne *Sodome, ke wieli me e o mwo teko mu jenaa a pwomwo ubwo naa.

²⁴Ke é pii tewé a juuju pie: É ha ace Tan celi e bo tauti ni apulie wo Padué, ke o te junihe ubwo ace cuhinaado tewé koja lépwo *Sodome!»

Padué Caa me ni naîn

Luka 10.21-22

²⁵ É ha a benaamwon naa, ke e pii wo lésu pie: «É pwo-olé tem, go Caa, Padaame he a miiden me a bwohemwo, be go neduwohi ni naado naa koja lépwo atemehinaado me lépwo apitemang, ke go habwii te lépwona time lé uce cémun.

²⁶ Be te âcehi ana te nimem kon.»

²⁷ [Ke e pii te lépwona lé téneeng pie]: «Ati nina e pele Caa tong, ke e caa ne tong. [E caa te pihabwieng dong, beme é temehieng ehi.] Te weeng cehi na e temehiéo, woéo pa Naîn. Ke te woéo cehi na é temehieng, ke é habwieng te ni béén beme lé temehieng mwo.»

É bo pwo me geé mwaale

²⁸ «Geé âbé céiiéo, wogewé nina junihe téé ni âneule tewé, ke mwaale gewé. Be é bo ne ce mwaale tewé.

²⁹ Geé pé a âneule na é ne tewé, ke geé engen ne ko ni pihuô tong. Be pana bwala a pating, ke é pwo me piwahin jo. Ke me geé âbé céiiéo, ke geé o tooli a ju mwaale.

³⁰ Éa, be a âneule na é ne tewé, ke te ju pwia, ke ni pihuô tong, ke te ju ticecoon a bwo âcehin.»

Mataio 12

Pa eapwihi a tan iitihi

Maréko 2.23–28; Luka 6.1–5

¹ É ha a céiu *tan iitihi, ke lé [uti a pwaaden na e] pitahagéi ni apwoamu wo lésu me lépwo acémun den. Ke mene lépwo acémun den, ke lé te pwo me tabwo ni ace blé, ke lé wii.

² Ke me lé alahi anaa wo lépwo *Farasaio, ke lé pii te lésu pie: «Go alahi ana lé pwo ne ni acémun dem! Be a naado na iitihi, ha a *tan iitihi!»

³ Ke e hegi ne telé wo lésu pie: «Kona time geé mu uce pine ne he ni tii iitihi ana e pwo wo pa daame *Davita? Be é ha a céiu tan, ke menelé, woélé me ni béén.

⁴ Ke e taa ha a *mwaiitihi [na pwo ko mwaanu]. Ke e pé ni pwoloa na ne me de Padué, ke lé eni me ni béén. Kehe ni pwoloa naa, ke te ni *apwoâpwailo cehi na pwo mwomwon delé me lé eni.

⁵ «Ke geé pine ne mwo he ni *patén de Moosé pie: Lé penem ha a mwaiitihi he ni tan iitihi wo lépwo apwoâpwailo. Ke time uce ta ne he pwahamii Padué!

⁶ Ke é pii tewé pie: E éni ana junihe piwéden koja a mwaiitihi!

⁷ Be e pii wo Padué ne he ni tii iitihi pie: *Time uce a âpwailo ko wota ana wâé tong. Kehe nimung ko a pipwoééhe.* Osé 6.6 «Ke wogewé, ke time geé uce temehi ace bwomune a pwooti naa, be geé tauti ni apulie ce, na time lé uce pwo celi ta ne he pwahamii Padué.

⁸Ke woéo pa Nahi Apulie, ke pa eapwihi a tan iitihi.»

E pwo me tieden a cunu ha a tan iitihi

Maréko 3.1–6; Luka 6.6–11

⁹É alechen, ke e taa ha a *mwotapitihi wo lésu.

¹⁰Kehe e ko mu lang wo pa apulie na mele a in. Ke nime ni Farasaio me [lé alih aceli e o pwo wo lésu, beme] lé o bo pipé ne kon. Ke lé te pwo me tahimwoeng pie: «He te pwo mwomwon denye, me genye pwo me tieden ace cunu ko pace céiu apulie ha a tan iitihi?»

¹¹Ke e hegi ne telé pie: «É hemepie e tupwo ne ha ace pwon ace muto tewé celi te ju céiu nang, ha ace tan iitihi, ke kona geé o pwo de? Geé â céieng da mu ha a pwon!»

¹²Be te junihe pipwonaado ne ko pa apulie koja a muto! Ke é mu ko anaa, na te ne me nye pwo ana wâé ha a tan iitihi.»

¹³Ke e pii te pali apulie pie: «Go cinebé a im.» Ke e cine ngen a in, ke caa te wâé mwo kuti, pwohewii a céiu.

¹⁴Ke wo l épwo Farasaio na lé mu lang, ke lé wie mu ha ali mwotapitihi. Ke lé â pwopithihi, beme lé hane ace bwopwonan me lé taunu lésu.

Pa eabwé na pipégalieng

¹⁵Me e téne wo lésu pie, lé ko pihane ace bwopwonan me lé taunueng, ke e engen mu ha a duaan naa. Ke hiwon ni béén na lé âcéin, ke e pwo me tieden ni cunu kolé.

¹⁶Ke e cihe me mwoiu ne kolé pie: «Geé nemwo pipatemehiéo!»

¹⁷Ke ni naado naa, ke e tuie, beme e pacuwoshi ali e pii wo Padué, na e pwaadeniin bé wo péroféta Isaia pie:

¹⁸ Weengi pa eabwé tong, na é caa pipégalieng, pana te junihe eânimung den. É ne kon a *Jenen Iitihi tong, ke e bo pipatemehi te ni bele a juuju ke a bwo celuimilé.

¹⁹ Time e o uce cihe okéé, ke time e o uce cihe me ubwo, ke time nye o uce téneeng heme e wiikau pwo pwaaden.

²⁰ Time e o uce tubwi ni womeéle na caa hajii. Time e o uce taunuhi ace miû celi caa tice niïhen. Time e o uce tanahi ni apulie na tice niïhelé. E o wonaa a bwo penem den, dieli e o bo â piwéden a mwomwon ke a juuju.

²¹ Ke lé bo tai céihi ne kon ati ni bele. Ésaïe 42.1–4

Pwo mwomwon den me e peni ni duéé

Maréko 3.20–30; Luka 11.14–23

²²Lé pébé céii lésu pa céiu apulie na bwi nang, ke huuhu nang, be pwo duéé kon. Ke e pwo me wâé nang wo lésu. Ke e cihe, ke e niê mwo.

²³Ke lé téetih i ati ne ni apulie, ke lé pipii telé pie: «Mepwo wo paje, ke wieli wo pali piebehi Davita, pali *Mesia li genye tee ko ucéieng?»

²⁴Kehe icehi ana lé pii wo l épwo Farasaio pie: «Ûhu! Wo pa apulie ce, ke e penem ko a junuu Caatana, pa daame he ni duéé! Be é mu ko anaa, na e peni ni duéé.»

²⁵Ke e te temehi ni bwo niimihinaado telé wo l ésu, ke e pii telé pie: «Hemepie e te pipwopa ne mwo kon ace céiu mwametau, ke a mwametau naa, ke o tanahi. Ke mepie e te pipwopa ne kon mwo ace céiu pwomwo ubwo, ai ace céiu pwomwoiu, ke o pwocoon me e mu mang!»

²⁶Ke mepie e cibéé ni duéé wo Caatana, pa daame he ni duéé, ke e o te pipwopa ne mwo kon! Ke kona e o woté ko ace bwopwonan me e cumang a mwametau ten?

²⁷Geé pii pie, é peni ni duéé ko a junuu Caatana. Ke hemepie wonaa, ke kona woo celi e ne te ni béewé ce junuun me lé peni ni duéé? Be lé habwii pie, geé getiéo.

²⁸«Ûhu! É peni ni duéé ko a Jenen litihi te Padué. Ke [é hemepie nimewé kon, ke te jan me geé alih i temehi pie] e caa tuiebé pelewé na a *Mwametau te Padué!

²⁹«É hemepie nimenye me nye taa ha a mwa te pace céiu apulie na pwo niihen, me nye pé ni naamuun, ke wâé heme nye mi cieeng. É mulang, ke genye bwobe pé ni naamuun mu ha a mwa ten.»

³⁰Wo pana time uce pa béoeng, ke e cubwoniéo. Ke wo pana time e uce picani tong me gemu taineibuhi, ke e papiidenihi.»

Lé cihe me ta ne ko a Jenen litihi

³¹«É pii tewé pie: O jan me pineu ni apulie na lé cihe me ta ne ko Padué. Kehe wo paceli e cihe me ta ne ko a Jenen litihi, ke time o uce pineuhi ni ta pwo ten.»

³²Ke o jan me pineu paceli e cihe me ta ne kong, pa Nahi Apulie. Kehe mepie e cihe me ta ne ko a Jenen litihi, ke o time uce jan me pineuhi ni ta pwo ten, ne ha a mulie ce, ke é ne mwo ha a *mulie dieli mwo.»

A acuwo me ni acehin

³³«A acuwo na wâé, ke e te ne ni acehin na wâé [me wii]. Ke a acuwo na ta, ke e te ne ni acehin na ta. Be nye o te temehi a acuwo mu ko ni acehin.»

³⁴[Ke wonaa mwo ne kowé] be geé o woté ko ace bwopiine ce naado celi wâé, wogewé ni nahi bwien, ke ni agele? Be nina e paobaanihi a pwonime pa apulie, ke weengaa nina e wie heme e cihe.»

³⁵Ni naado na wâé, ke e te âbé mu ko pa apulie na wâé nang, be wâé a pwonimen. Kehe ni naado na ta, ke e te âbé mu ko pa apulie na ta nang, be ta a pwonimen.»

36 «Éa, é pii tewé a juuju pie: O bo pwo a Tan na e bo tauti ni apulie hen wo Padué. E bo muko pétaapwo tautilé ko ni pwooti ta na lé pipii hauli.

37 Te é mu ko ni pwooti na go pii, na e bo te pihuôhi wo Padué pie, o pwocuhinaado tem, ai o celuimiko.»

Nimelé me lé alahi ce inenaado @ na pwojunuun

Maréko 8.11–12; Luka 11.24–32

38 É ha a céiu tan, ke lé âbé céii lésu ne ni bée *dotéén ko patén me ni bée Farasaio, ke lé pii ten pie: «Pa apipune, go pwo ace *pipwojunuun me geme alahi.»

39 Ke e hegi ne telé pie: «É mu ko ade na geé tee cuwo ko ilehi ce pipwojunuun, wogewé ni apulie jenaa? Te junihe ta gewé [be time geé uce piténede Padué!] O te tice mwo ace céiu pipwojunuun celi geé mwo alahi mwo, koja ali e too péroféta Jonas ânebun.

40 Be li cié li tan den, ke cié bwénin tina ali pilehe ikua. Ke te piwien ne mwo kong, pa Nahi Apulie, be cié ni tan, ke cié ni bwéning, tina a pule.

41 «E â Ninive wo Jonas, ke e pwopune te ni apulie lang. Ke lé téne a pune ten, ke lé pininim, ke lé pitaatééhi ni mulihelé. Kehe te e éni pelewé wo pa céiu apulie na e te nihe piwéden koja Jonas. Ke é ha a Tan na e bo tauti ni apulie hen wo Padué, ke wo l épwo Ninive, ke lé o cuwoda ânebuhewé, wogewé ni apulie jenaa, ke lé o pipé ne kowé! [Be muhi tewé me geé pininim, ke me geé bitekewé!]»

42 «[Ke geé te temehi mwo a jepule ko] ê toomwo daame ha amu Saba bwolihi. Be li e âbé mu ha amu ten na te junihe e ité, beme e téne pa daame *Solomona na oba nang ko a pitemang. Kehe te e éni pelewé pa céiu apulie na e te junihe piwéden koja Solomona! Ke é ha a Tan na e bo tauti ni apulie hen wo Padué, ke e bo cuwoda ânebuhewé ê toomwo daame naa, ke e bo pipé ne kowé, wogewé ni apulie jenaa. [Be muhi tewé me geé téne.]»

A bwo engen ke mwojuia te ni duéé

43 «[Geé cuwoteeke téne ani]: Hemepie pwo duéé ko pace céiu apulie, ke me e wie mu kon, ke e â wé? E âdé ke âbé he ni duaan na ticie hen. Be e hane ace duaan celi me e mu hen, kehe icehi ana time e uce tooli.

44 Ke e niimihi pie, ‘É o mwojuia ngemwo ha ali pomwa tong.’ Ke e mwojuia, ke e tooli ali mwa he tice ânen, ke te ju balé hen ehi, ke pwoiipihi ehi.

45 Ke e â hane ni duéé béén na 7 jélé, na te junihe ta jélé kojaeng. Ke lé taa pimu ha ali mwa. Ke wo pa apulie naa, ke bwo junihe ta nang mwo kojan ânebun! Ke o wonaa celi e o tuie ne kowé, wogewé ni apulie na ta gewé jenaa.»

A ju pwomwoiou te lésu

Maréko 3.31–35; Luka 8.19–21

46 É he e mwo teko cihe ne ko ni apulie wo lésu, ke lé tuiebé wo nyaa ten me l épwo ciéén, ke lé âbé cuwo pwomwo, be lé haneeng beme lé picihe.

⁴⁷Ke e pii ten wo pa céiu apulie pie: «Aje, élé âoté pwomwo wo nyaa tem me lépwo ciéém. Be lé ko haneko me lé cihe tem.»

⁴⁸Ke e hegi ne ten wo lésu pie: «He woo êce nyaa tong? Ke wooélé lépwoce ciééng?»

⁴⁹Ke e hiido lépwo acémun den, ke e pii pie: «Geé alih, be woélé-ni ni nyaa tong me ni ciééng.

⁵⁰Be wo pana e pwo ana te nime Caa tong kon, Padué na e jeda he miiden, ke te weengaa kuti pa âjiénung, ke ê pwaadeniing, ke ê nyaa tong.»

Mataio 13

A ocine ko pa apicemi

Maréko 4.1–20; Luka 8.4–15

¹É ha a tan naa, ke e wie mu ha a mwa he na e pimu lang wo lésu, ke e ole ticepwon. Ke e tebwo, beme e pacémuni ni apulie.

²Ke caa â hiwon ni apulie na lé âbé céiieng. Ke é mu ko anaa, ke e taa pwo a céiu ong, ke e tebwo. Ke lé te mu jeda ticepwon ne ni apulie.

³Ke e pwo-ocine he e pacémunilé ko ni naado na hiwon. Ke e pii telé pie: «Geé téne! E bwo mu wo pa céiu apulie, ke e bwo wie ha a céiu tan, beme e tagilihi ni âdaanu.

⁴Ke é he e ko tagilihi, ke lé tupwo nge pwo pwaaden ni béé pidenaado. Ke lé âbé ne ni meni, ke lé wii ati.

⁵Ke ni béén, ke lé tupwo ne ha a wii péi. Ke lé piepin ko cim, be time uce hiwon ni pule lang.

⁶Kehe icehi ana me e niê na a téale, ke éle li nahi âdaanu, ke lé meiu, be te tice waan.

⁷Ke ni béén, ke lé tupwo ne ha awieme ni mwawi ubwo. Ke me lé tai picim, ke lé taunuhi li pidenaado.

⁸Ke ni béén, ke lé tupwo ne ha a pule na wâé. Ke lé aca; ke ni béén ke 100 ni acehin, ke ni béén 60, ke ni béén 30.»

⁹Ke e pii mwo telé wo lésu pie: «Wo paceli pwo ce pwojéénen me e téne, ke wâé heme e téne!»

É ko ade na go mu pwo-ocine telé?

¹⁰Lé âbé mwonu lésu wo lépwo acémun den, ke lé tahimwoeng pie: «É mu ko ade na go mu pwo-ocine te ni béén, heme go cihe ne kolé?»

¹¹Ke e hegi ne telé pie: «E ne tewé wo Padué, me geé temehi a ju bwomune a Mwametau ten. Kehe icehi ana time uce jan ne ko ni apulie ati.

¹²Be wo pana caa pwo ne ten, ke o ne mwo pwon ce béén, beme pihiwon den. Kehe wo pana te tice ten, ke o pétaabwon kojaeng a nehinaado na mwo e pelen.

¹³É mu ko anaa, na é pwo-ocine telé, heme é pacihelé. Be lé omehi, kehe time lé uce alahi temehi; ke lé téne, ke time lé uce téne temehi.

¹⁴Ke weengaa a bwo pacuwohi na ali e pii wo Padué ne kolé, na e pwaadeniin bé wo péroféta Isaia pie: *Geé o te téne taaci, kehe time geé uce téne temehi. Geé o te omehi taaci, kehe time geé uce alahi temehi.*

¹⁵ *Mwoiu a puni a puapulie ce. Capuhi ni pwonimelé. Bwéjé ni pwojéénelé. Bwi ni naamiilé. Be time uce nimelé me lé alahi ko ni naamiilé, ke me lé téne ko ni pwojéénelé, ke me lé temehi ko ni pwonimelé. Te muhi telé me lé bitelé bé céiiéo, me lé taatééhi ni mulihelé, ke me é o pwo me wâé jélé!» Ésaïe 6.9–10*

¹⁶ «Ke hemepwo wogewé, ke geé pipwodéén, be geé alahi ko ni naamiiwé, ke geé téne ko ni pwojéénewé.

¹⁷ É pii tewé a juuju pie: Hiwon ni péroféta, ke hiwon ni apulie na mwomwon jélé, na te nihe nimelé me lé alahi nina geé alahi, kehe time lé uce alahi temehi. Ke nimelé me lé téne nina geé téne, kehe time lé uce téne.»

A bwopiine a ocine ko pa apicemi

¹⁸ «Geé téne a bwopiine a ocine ko pa apicemi:

¹⁹ Ni béé pidenaado, ke lé tupwo nge pwo pwaaden. [A pwaaden] ke ni apulie na lé téne a pwooti ko a Mwametau, ke time lé uce temehi. Ke e tuiebé wo *Caatana, pana ta nang, ke e céi mwo a pwootti na caa cemi ne he ni pwonimelé.

²⁰ «Ke ni béé pidenaado, ke lé tupwo ne ha a wii péi. [A wii péi] ke ni apulie na lé téne a pwootti, ke lé epin me lé hegi ha a pipwodéén.

²¹ Kehe icehi ana te tice waan ne kolé a pwootti na lé téne. Ke lé te pitaatééhi ni bwo niimihinaado telé. Hemepie e tuie ne kolé a tacebwén me pwo nina ta ne kolé, watihen a pwootti te Padué, ke lé patieden ni céihi telé.

²² «Ke ni béé pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwootti, kehe icehi ana pinekepé ni pwonimelé ne ko ni naado na e tuie ne pwo a bwohemwo ce. Ke lé téte cehi mwani me ni naamuu bwohemwo. É mu ko ninaa, ke e taunuhi a pwootti, ke te tice acehin.

²³ «Ke ni béé pidenaado, ke lé tupwo ne ha a pule na wâé. [A pule naa] ke ni apulie na lé téne a pwootti, ke lé temehi, ke pwo acehi a pwootti ne kolé: ni béén ke 100 acehin, ke ni béén ke 60, ke ni béén ke 30.»

Ni béé ocine ko a Mwametau

Maréko 4.30–34; Luka 13.18–21

A meté na ta

²⁴E pwo mwo a céiu ocine wo lésu, ke e pii te ni apulie pie: «A *Mwametau he Miiden ke pwohewii ani: «E bwo mu wo pa céiu apulie, pa apwo âdaanu. Ke e bwo tagiliihi ni pidenaado na wâé ne ha apwoamu ten.

²⁵Kehe icehi ana é he bwén, he e ko pule, ke e bwo tehenebé wo pa apipwokon, ke e tagiliihi ni âdaanu na ta, ha awieme ni âdaanu na wâé, ke e engen.

²⁶«Ke lé cim ne li âdaanu li wâé, ke lé aca. Ke lé te cim mwo li âdaanu li ta.

²⁷Ke me lé alihia anaa ne ni apenem ha apwoamu, ke lé pii te pali eapwihi ali apwoamu pie: “Go te alihia, go pa daame, be li go tagiliihi li âdaanu li wâé ha ali apwoamu tem. Ke kona lé âbé mu wé ne ni âdaanu na ta na élé hen?”

²⁸«Ke e hegi ne telé pie: “Ûhu, wo pa apipwokon na e pwo anaa.” «Ke lé pii ten pie: “Kona o te nimem me geme â tewii taabwon ni âdaanu na ta?”

²⁹«Ke e hegi ne telé pie: “Ûhu! Be mepie geé tewii ni âdaanu na ta, ke geé o tewii ne pehi ni âdaanu na wâé.

³⁰Kehe geé te nelé me lé te picim ibu, die ha a pitii âdaanu. Ke é bo pii te ni apenem dong pie, me lé mi taineibuhi ni âdaanu na ta, me lé cini, ke me lé ne ni âdaanu na wâé ha a mwoâdaanu tong.”»

A pide moutarde

³¹E pwo mwo a céiu ocine telé wo lésu, ke e pii telé pie: «A Mwametau he Miiden, ke pwohewii a pide *moutarde* na e cemi wo pa céiu apulie ha a cereda ten.

³²A cuwo nahi pidenaado na te junihe wahin. Kehe icehi ana me e cim, ke te junihe ubwo nang koja ati ni naado na nye cemi he ni cereda. Ke lé âbé ne ni meni, ke lé pwo ni mwonahilé ne he ni dihen, be caa â acuwo na junihe ubwo.»

A nyaa te pwoloa

³³E pwo telé mwo a céiu ocine wo lésu, ke e pii pie: «A Mwametau he Miiden, ke e pwohewii mwo a nyaa te pwoloa na e pé ê céiu toomwo, ke e iluuhi neibu me a 25 kilo ko *farine* dieli e â cibu da ali pwoloa!»

É mu ko ade na e pwo-ocine wo lésu?

³⁴Ati niniaa, ke e pii telé he ocine wo lésu. Be e te cuwo ko pwo-ocine telé heme e pacihe ni apulie.

³⁵E wonaa, beme e pacuwoshi ali e pii wo Padué na e pwaadeniin bé wo pa péroféta ten pie: É bo pwo-ocine heme é pacihelé. É bo pii ni naado na neduwoshi mu ha atabuhi ko a bwohemwo. Psaume 78.2

A bwopiine a ocine ko a meté na ta

³⁶Lé engen koja ni apulie wo lésu me lépwo acémun den, ke lé â pwomwo. Ke é nelang, ke lé pii ten pie: «Go cuwoteeke pii teme ace bwopiine ali ocine li go pii ne ko ni meté na ta.»

37Ke e hegi ne telé pie: «Wo pana e tagilihi ni pidenaado na wâé, ke woéo pa Nahi Apulie.

38-39A apwoamu, ke a bwohemwo. A pide âdaanu na wâé, ke ni nahi a Mwametau. Wo pa apipwokon, ke wo Caatana, pana ta nang. Ke a pide âdaanu na e cemi, ke ni naîn, [ke ni apulie na e kolé a duéé]. Ke a pitii âdaanu, ke anebwén ko a bwohemwo. Ke ni apenem, ke ni *âcélo.

40Ke lé bo tai ni pidenaado na ta, ke lé cini ne pwo miû. O wonaa ace [bwopwonen ne ko ni naî Caatana] ha anebwén ko a bwohemwo.

41«Be woéo pa Nahi Apulie, ke é bo nebé ni âcélo tong. Ke lé bo pétaabwon mu ha a Mwametau tong nina lé pwo nina ta, me lépwona lé pwo me tieden ni céhi te ni béén.

42Ke lé o bo tahilé da pwo a miû na ubwo. Ke é nelang he na lé o é me piyii pecuwo.

43«Ke ni béén na mwomwon jélé ne he pwahamii Padué, ke o pwomelaan jélé pwohewii a téale ne ha a Mwametau te Caa telé. Wo paceli pwo ce pwojéénen me e téne, ke wâé heme e téne!»

Ni wâé na neduwohi

44«A Mwametau he Miiden, ke pwohewii ni mwani megele na te junihe pwonaado ne kon, na neduwohi ha apwoamu. Ke e tooli wo pa apenem ha apwoamu. Ke e te junihe pipwodéén kuti, ke e te neduwohi mwo. Ke e icuhi ati nina eten, ke e pwocuhi a apwoamu naa.»

A perle na te junihe wâé

45«A Mwametau he Miiden, ke pwohewii mwo a *perle* na te junihe wâé, ke te junihe ubwo a cuhin. Pwo pa céiu a-icu, na e hane *perle*.

46Ke e tooli a *perle* naa. Ke e te icuhi ati kuti nina e pelen, beme e pwocuhin.»

A pua

47«A Mwametau he Miiden, ke pwohewii mwo a pua, heme nye tahi ole he jié, ke e pé ni muko pétaapwo ikua.

48Ke genye pé da huâiu, ke genye tai ni ikua na wâé, ke genye ne he ni éele. Ke genye tahi taabwon ni ikua na ta.

49Ke o wonaa ha anebwén ko a bwohemwo, be e bo pahede ni âcélo ten [wo Padué]. Ke lé o pineité nina lé *mwomwon ne he pwahamiin, me ni béén na time lé uce piténedeeng.

50Ke lé o bo tahi ni béén na time lé uce piténedeeng ne ha a miû na ubwo. Ke é nelang he na lé o bo é me piyii pecuwo.»

Ni muko pétaapwo wâé

51E tahimwo ni acémun den wo lésu pie: «Kona geé te temehi ni ocine naa?» Ke lé hegi ne ten pie: «Éa.»

52Ke e pii telé pie: «Wo pa *dotéén ko patén na caa pa apulie ha a Mwametau he Miiden, ke e pwohewii pa céiu eapwihi pwomwo na e pipégali mu he ni wâé ten nina mwo coho, me nina caa bwolihi.»

Time lé uce céihi ne kon ni Nazaret

Maréko 6.1-6; Luka 4.16-30

53Me e pii ati ni ocine naa wo lésu, ke e engen mu ha a duaan naa.

54Ke e â Nazaret, he na ubwo nang ne hen. Ke e pacémuni ni apulie [ko a pwooti te Padué] ne ha a *mwotapitihi. Ke lé te junihe téetieng, ke lé pitahimwolé pie: «He woo na e pacémunieng? Kona e âbé mu wé ni bwo temehinaado ten, ke ni *pipwojunuun na e pwo?»

55Be pali naî pali apenem ko ba-acuwo! Pali naî Maria, ke pa cuwo Cang, me José, me Simon, me Jude!

56Ke lé teko mulie pelenyne ni toomwo pwaadeniin! Ke he woo na e ne ten ni naado na e pwo?»

57Ke lé pitaaba ne kon wo lèpwo Nazaret, ke te muhi telé me lé céihi ne kon. Ke e pii telé pie: «Au, mwolihi! Be wo pa péproféta, ke lé te paciitieng ati ne he ni amu, kehe te icehi ne ha amu ten!»

58Ke time e uce pwo ce pipwojunuun celi hiwon nelang wo lésu, be time lé uce céihi ne kon.

Mataio 14

E mele wo loane pa apipuu apulip

Maréko 6.14-29; Luka 9.7-9

1É ha a benaamwon naa, ke e piténe ni jepule ko lésu wo *Érode Antipas, gupéno ne Galilé.

2Ke e pii te ni eabwé ten pie: «Wo pa apulie naa, ke wo *loane pa apipuu apulip, he e caa mulie cemwo mu ha amele! Ke weengaa a watihen me e pwo ni *pipwojunuun.»

3-4Weengi a jepule ko a bwo mele te loane: Wo Érode, ke lu piaten me Érodiade, ê mwode Filip, pa âjiénen. Ke e mu te cuwo ko pii ten wo loane pie: «Te tice mwomwon dem me go pé ê toomwo naa.» Ke e te pwo me imwi loane wo Érode, ke e cieeng, ke e neeng he karépu.

5Nime Érode me e taunueng, kehe icehi ana mwotieng ko ni apulie, be a hiwon kolé, ke lé niimihi pie pa péproféta [te Padué].

6Ke é ha a tan na lé pipaunuhi a bwo âbeeble te Érode, ke e pwolu he pwahamii ni apulie wo ê naî Érodiade. Ke te junihe wâé te Érode.

7Ke e *piapwo ne ten pie: «É o ne tem ati celi go o ilehi kojaéo.»

⁸Ke e cineeng wo nyaa ten, beme e pii te pa daame Érode pie: «Go ne tong a puni loane ne ha ace tam.»

⁹⁻¹⁰Ke te junihe piwahin Érode. Kehe icehi ana e caa mi piapwo ne he pwahamii ni apulie ati. Ke e pahede ni coda ten nge ha a karépu, beme lé â tahagéi a hene loane.

¹¹Ke lé pébé a punin ne ha ace tam, ke lé ne te êgi ewa toomwo. Ke wo êje, ke e pé nge céii nyaa ten.

¹²Ke é alechen, ke lé âbé wo lépwo acémun de loane, ke lé pé a één, ke lé â neduwohi, ke lé â pipatemehi te lésu ana e tuie ne ko loane.

Lé wiinaado ne ni apulie na 5000 jélé

Maréko 6.30-44; Luka 9.10-17; Ioane 6.1-15

¹³Me e téne ana e tuie ne ko loane wo lésu, ke e te piengen cehi pwo ong, ke e â ha a céiu duaan na e ité, na te piticie hen. Kehe icehi ana lé piténe ne ni apulie, ke lé wie mu he ni mwopopwaalé, ke lé piâcéin nge ticepwon.

¹⁴Ke me e ele ole mu pwo ali ong wo lésu, ke e alihia pubu apulie na te junihe ubwo, ke e te junihe pipwoééhelé. Ke e pwo me wâé ni béen na cunu jélé.

¹⁵E caa pwo me e nuule a téale, ke lé âbé céiieng wo lépwo acémun den, ke lé pii ten pie: «O caa babwén, kehe apiticie éni. Go ne ngemwo ni apulie ce, nge he ni mwopopwaalé na e mwonu, beme lé o pé ce wiinaado telé.»

¹⁶Ke e hegi ne telé wo lésu pie: «Ûhu, wâé heme lé mu éni, ke me geé ne ce wiinaado telé.»

¹⁷Ke lé pii ten pie: «Time uce jan, be te ju nim ni pwoloa, ke alo lupwo ikua na e peleme!»

¹⁸Ke e pii telé pie, me lé pébé céiieng.

¹⁹Ke nebwén, ke e pii te ni apulie pie, me lé tebwo he ni meté. Ke e pé li pwoloa li nim me lupwoli ikua. Ke e alehede da he miiden, ke e pwo-olé te Padué. Ke e ebii li pwoloa, ke e ne te lépwo acémun den, ke lé pipatihi ne ko ni apulie. [Ke e wonaa mwo ko lupwoli ikua.]

²⁰Ke lé tai wiinaado ati, ke caa pwoluu jélé. Ke lé taineibuhi mwo ni nehi wiinaado telé, ke lé paobaanihi ni éelele na 12 kon.

²¹A jéhi ni apulie aiu na lé wiinaado, ke e pwo 5000 jélé, ke time uce pine ni ewa me ni toomwo.

E engen pwo bwotabe wo lésu

Maréko 6.45-52; Ioane 6.16-21

²²Te ju é alechen, ke e pii wo lésu te lépwo acémun den pie: «Geé taa pwo ong, ke geé mi gaale ângedé ko a céiu goon.» Ke e mwo te mu wo lésu, ke e pamwojuiéhi mwo ni pubu apulie.

²³Ke me e caa pinelé ati, ke e taa pwo juwole, beme e pwoiitihi, ke bwénieng nelang.

²⁴Ke mepwo wo lépwo acémun den na lé mu pwo ali ong, ke caa élé ité koja a nicepwon. Ke e âbédelé na a dan; ke ni jié, ke taii ne ko ali ong.

²⁵Ke caa é pwopwometan, ke e âbé céilé pwo bwotabe wo lésu.

²⁶Ke me lé alieneng, he e ko engen pwo bwotabe, ke te junihe mwotilé, ke lé haa da ko miiden, be lé niimihi pie a duué!

²⁷Kehe icehi ana e te pwome pacihelé wo lésu, ke e pii telé pie: «Geé nemwo pwo me mwotikewé! Be woéo! Geé mwoiu!»

²⁸Ke e pii ten wo Pétérú pie: «Padaame, mepie te wogo, ke go pwo me é oté céiko ne pwo bwotabe.»

²⁹Ke e pii ten wo lésu pie: «Îgo, go opé!» Ke e ole mu pwo ong wo Pétérú, ke e â céii lésu pwo bwotabe.

³⁰Kehe icehi ana mwotieng ko a dan [me ni jié] be ubwo, ke e te tabuhi kopi neole ha a tabe. Ke e toii da pie: «Padaame, go celuimiéo!»

³¹Ke e te pétaa nge ko a in kuti wo lésu, ke e pii ten pie: «Te junihe wahin kuti a céhi tem! É ko ade na pinekepé ne tem?»

³²Ke me lu taa pwo ong, ke e cuwo ali dan.

³³Ke lé tidihi jililé ati nina lé mu pwo ong, ke lé pipaunu lésu, ke lé pii pie: «A juuju pie wogo, ke pa *Naî Padué!»

E pwo me wâé ni cunu ne Génésaret

Maréko 6.53–56

³⁴Lé caa nebwen ko tahagéi jié wo lésu me lépwo acémun den. Ke lé tuie gaale ha a duaan na e mwonuhi Génésaret.

³⁵Ke lé ali temehi lésu ne ni apulie lang. Ke lé pipii ngen pitih a duaan naa a bwo tuie ten. Ke lé tai pébé céieng ati ni cunu.

³⁶Ke lé pii ten pie: «Te jan heme lé te ju ti cehi ko a baaé epwénem?» Ke caa te wâé ati nina lé ti kon.

Mataio 15

A bwo picuhe ko ni bwomu

Maréko 7.1–13

¹Lé âbé mu *lérusaléma ne ni bée *Farasaio me ni bée *dotéén ko patén, ke lé âbé too lésu. Ke lé pii ten pie:

²«Time lé uce piténédehi a ju bwomu wo lépwo acémun dem, be time lé uce mi puu ni ilé ânebuhe a wiinaado pwohewii ni watihenye. Kehe é mu ko ade, go paje?»

³Ke e hegi ne telé pie: «Lépwoje! É mu ko ni ju bwomu tewé, ke time geé uce piténedehi nina nime Padué kon. Kehe é mu ko ade?

⁴Be e pii wo Padué pie: *Go paciiti lu nyaa me caa tem. Exode 20.12* E pii mwo pie: *Geé taunu pa apulie na e pipii me ta lu nyaa me caa ten. Exode 21.17*

⁵«Kehe icehi ana wogewé, ke geé te pii te ni apulie pie, te wâé heme lé pii te lu nyaa me caa telé pie: “Nimung me é ne teu ace céiu naado me bépicani teu, kehe icehi ana time uce jan, be é caa pwo me âpipati iithi te Padué.”

⁶«Ke é nelang he na geé pacémunilé, me time lé uce paciiti lu nyaa me caa telé! Ke me wonaa, ke geé caaite ne he pule ni pwooti te Padué ko ni bwomu tewé!

⁷Geé te ju gahe pwo! E te juuju wo péproféta Isaia, na e pwaadeni a pwooti te Padué ne kowé pie:

⁸ *Lé te ju pipaunuéo ko pwolé wo lépwo apulie ce, kehe te e ité kojaéo ni pwonimelé.*

⁹ *Lé pwoiitihi me *pwoâpwailo tong kehe te piticenaado ne kon. Ana lé pacémuni ni apulie kon, ke te ni patén delé ni apulie, kehe time uce a pwooti tong.*» *Ésaïe 29.13*

Ana e pwo me ta pa apulie

Maréko 7.14–23

¹⁰É alechen, ke e tote ni apulie wo lésu, ke e pii telé pie: «Lépwoje! Geé tabemiéo, ke geé temehi ehi ana me é pii tewé:

¹¹Time uce ana e taa pwo pa apulip ana e pwo me ta nang ne he pwahamii Padué. Kehe te icehi ana e wie mu pwon, ana e pwo me ta nang.»

¹²Ke lé âmwonusu lésu wo lépwo acémun den, ke lé pii ten pie: «Ni pwooti tem, ke te junihe ti ko ni Farasaio, he go te temehi?»

¹³Ke e hegi ne telé pie: «Wo lépwo Farasaio naa, ke lé pwohewii ni acuwo na time uce ni âcemi he Caa tong jeda he miiden. Ke e o bo taawii.

¹⁴Geé nelé! Be wo lépwo bwi, ke lé te pé lépwo bwi. Be wo pa bwi, ke me e pé pa céiu bwi, ke lu o tai tupwo ole ha ace pwon!»

¹⁵Ke e pii te lésu wo Pétérus pie: «Go patemehi ehi teme a ocine naa.»

¹⁶Ke e hegi ne ten wo lésu pie: «Kona wogewé mwo, lépwo acémun dong, ke time uce téele jan me geé temehi anaa?

¹⁷Geé téne, ati ni naado na ta pwo pa apulie, ke me e âtinan, ke é alechen, ke e te wie mwo mu ha a één. He time geé uce temehi anaa?

¹⁸⁻¹⁹Kehe te icehi ni pwooti na e wie mu pwo ni apulie, ke ni bwo niimihinaado na ta na lé wie mu he ni pwonimelé, ke weengaa kuti nina e ne me lé pwo ana

ta: Lé taunuhi apulie; Lé pibune; Lé pipule me ni apulie hauli; Lé bune; Lé pigeti ni béén; Lé pipii me ta ni béén.

²⁰«Weengaa nina ta genye kon, ne he pwahamii Padué. Kehe time uce ta genye ko ace bwo time uce puu ne ni inye.»

A céihi te ê toomwo Kanana

Maréko 7.24–30

²¹É alechen, ke e engen mu ha a duaan naa wo lésu, ke e â ha a céiu duaan na e mwonuhi lupwo pwomwo ubwo Tir me Sidon.

²²Ke e âbé céii lésu wo ê céiu toomwo mu ha amu naa, beme e cihe ne kon. Kehe time uce ê *Juif, be ê piebehi lépwo *Kanana [a bele na lé téétihi wo lépwo Juif]. Ke e toii da pie: «Padaame, pa *Naî Davita, go pipwoééhung me picani tong! Be pwo duéé ko ê naîng, ke te junihe cunu nang.»

²³Kehe icehi ana time e uce hegi ne ten wo lésu ko ace céiu pwooti. Ke lé âbé mwonueng wo lépwo acémun den, ke lé pii ten pie: «Go pwo me engen wo ê toomwo ne! Be e tee ko cuwo ko cihe céinye!»

²⁴Ke e pii ten wo lésu pie: «Wo Padué, ke e te neéo bé cehi ne ko ni apulie *Isaraéla, na lé pwohewii ni nahi muto na lé pipatieden.»

²⁵Kehe icehi ana wo êgi toomwo, ke e âbé tidihi jilin ânebuhe lésu, ke e pii ten pie: «Padaame, go picani tong!»

²⁶Ke e hegi ne ten wo lésu pie: «Time uce wâé heme nye pé ni wiinaado te ni cuwo ewa, me nye tahi ne te ni ‘nati wotaahen’.

²⁷Ke e pii ten wo êje pie: «Go te juuju, go Padaame, kehe icehi ana ni nati wotaahen mwo, ke lé te eni ni mewiinaado na lé tupwo mu pwo taap te pa caa telé.»

²⁸Ke e hegi ne ten wo lésu pie: «Êje, te junihe ubwo a céihi tem! Wâé heme pwohewii ana nimem kon!» Ke caa te tieden kuti ali cunu ko êgi naîn!

E pwo me tieden ni cunu

²⁹É alechen, ke e engen wo lésu mu ha a duaan naa. Ke e uti a nicepwon Galilé. Ke é mulang, ke e taa pwo juwole, ke e tebwo.

³⁰Ke lé âbé céieng ne ni apulie na te junihe hiwon jélé, ke lé pébé céieng nina tebwa jélé, ke nina bwi jélé, me ni tebwomwa, me ni huuhu, ke hiwon mwo ni béé cunu. Ke lé tai nelé ânebuhe lésu, ke e tai pwo me tieden ni pétaapwo cunu kolé.

³¹Ke ni huuhu, ke lé caa cihe. Ke ni tebwomwa, ke lé caa engen. Ke ni bwi, ke lé caa niê. Ke lé téétihi ne ni apulie, ke lé pipaunu Padué he lépwo Isaraéla!

Lé wiinaado ne ni apulie na 4000 jélé

Maréko 8.1–10

³² E tote ni acémun den wo lésu, ke e pii telé pie: «É te junihe pipwoééhe ni apulie ce! Be caa cié ni tan denye me woélé, ke tice wiinaado telé. Ke time uce wâé me é pamwojuiélé, be koli bo tice niihelé nge he pwaaden.»

³³ Ke lé pii ten wo lépwo acémun den pie: «Genye o woté ko ace bwo ne wiinaado telé ati, ne éni ha a duaan na apiticie? Be go alih, be te junihe hiwon jélé!»

³⁴ Ke e tahimwolé wo lésu pie: «Kona niile ce pwoloa celi e pelewé?» Ke lé pii ten pie: «7 ni pwoloa, ke pwo ni cuwo nahi ikua.»

³⁵ Ke nebwén, ke e pii te ni apulie pie me lé tebwo.

³⁶ Ke e pé li pwoloa li 7, me li nahi ikua, ke e pwo-olé te Padué. Ke e ebii, ke e ne te lépwo acémun den, ke lé pipwopii ne ko ni apulie.

³⁷ Ke lé wiinaado dieli caa tai pwoluu jélé. Ke é alechen, ke lé tai ni nehi wiinaado telé wo lépwo acémun den, ke e pwo 7 ni éelele na oba!

³⁸ Pwo 4000 ni aiu na lé wiinaado, ke time uce pine ni toomwo me ni cuwo ewa!

³⁹ Ke nebwén, ke e pii telé wo lésu pie, me lé mwojuia ngemwo pelelé. Ke e taa pwo ong, ke e â ha a duaan ne Magadan.

Mataio 16

Lé ilehi ce pipwojunuun

Maréko 8.11–13; Luka 12.54–56

¹ É ha a céiu tan, ke lé âbé céii lésu ne ni bée *Farasaio, me ni *Saducéen, be nimelé me lé pipwohuô ten. Ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie time e uce penem ko a junuu Padué.]

² Ke e hegi ne telé pie: «Me e megele a miiden heme e nuule a téale, ke geé pii pie, o wâé amu.

³ «Ke me pipiing a amu ko a acaama, ke geé pii pie, o ute. Be geé caa te temehi heme wâé a amu, ai é heme ta a amu. Kehe icehi ana me geé alih ni naado na e ko tuie jenaa, ke time geé uce temehi ace bwopiinen! [Be hemepie geé ko alih ehi, ke geé temehi ehi ana nime Padué me geé pwo.]

⁴ É mu ko ade na geé tee cuwo ko ilehi ce pipwojunuun, wogewé ni apulie jenaa? Te junihe ta gewé [be time geé uce piténéde Padué!] O te tice mwo ace céiu pipwojunuun celi geé mwo alih mwo, koja ali e too péroféta Jonas ânebun.» Ke e engen kojalé wo lésu.

A ‘nyaa te pwoloa’ te ni Farasaio

Maréko 8.14–21

⁵ É he lé hagéi a *jié Galilé wo lépwo *acémun de lésu, ke lé neuhi me lé pé pwoloa.

⁶Ke e pii telé wo lésu pie: «Geé pipwocilekewé ne ko a ‘nyaa te pwoloa’ te ni Farasaio me ni Saducéen!»

⁷Ke lé pipii telé wo lédwo acémun den pie: «Wieli é mu ko ana time genye uce pé pwoloa?»

⁸Ke e te téne wo lésu, ke e pii telé pie: «Te junihe wahin kuti ni céhi tewé! É mu ko ade na geé tee cuwo ko cihe ko a pwoloa?»

⁹Mwo te time geé uce temehi kuti? Kona time geé uce niimihi li nim pwoloa te li 5000 apulie? É ha a tan naa, ke li geé tai mwo celi niile éelele?

¹⁰Ai, li 7 pwoloa ne te li 4000 apulie, ke a tan naa, ke niile ce éelele celi geé tai mwo?»

¹¹«É caa te pii tewé pie: Geé pipwocilekewé ko a ‘nyaa te pwoloa’ te ni Farasaio, me ni Saducéen. Kehe time é uce pii tewé ce pwoloa celi me nye eni! Ke kona time geé uce temehi anaa?»

¹²Ke lé bwobe temehi wo lédwo acémun den pie, e pii telé pie, me lé pipwocile ni cémun de ni Farasaio me ni Saducéen.

Wo lésu ke pa Mesia

Maréko 8.27—9.1; Luka 9.18–27

¹³Ke lé engen wo lésu me lédwo acémun den, ke lé tuie nge ha a céiu duaan ko a pwomwo ubwo Césaré-Filip. Ke e tahimwolé pie: «Kona lé pii pie woté ne kong ne ni apulie? Lé pii pie woéo ke woo, woéo pa Nahi Apulie?»

¹⁴Ke lé hegi ne ten pie: «Lé pii ne ni béén pie wogo, ke wo *loane pa apipuu apulie. Ke lé pii ne ni béén pie péroféta *Élia. Ke lé pii mwo wo lédwo béén pie lérémia, ai pace céiu pibéé ni péroféta ânebun.»

¹⁵Ke e tahimwolé wo lésu pie: «Ke kona wogewé ke?»

¹⁶Ke e hegi ne ten wo Simon Pétérú pie: «Wogo, ke pa *Mesia, pa *Naî Padué na e mulip.»

¹⁷Ke e pii ten wo lésu pie: «Adéiko go Simon pa naî Jonas, be time uce wo pace céiu apulie paceli e pwo me go temehi anaa, kehe te wo Caa jeda he miiden.»

¹⁸Ke é pii tem jenaa ni pie: A niim pie Pétérú, [a bwopiinen pie ‘a péi’]. Ke é pwo a péi naa, ke é o bahi a *Mwaiitihi tong. Ke a junuu a melepiing, ke tice niihe ne kon.

¹⁹É bo ne tem ni kilé ko a *Mwametau he Miiden, ke ati nina go paciitihi† ne éni pwo bwohemwo, ke e o te paciitihi ne mwo jeda he miiden wo Padué. Ke ati nina go pii pie wâé ne éni pwo bwohemwo, ke e o te pii pie wâé ne mwo jeda he miiden.»

²⁰Ke e paciitihi ko lédwo acémun den wo lésu pie, me lé nemwo pii te ni apulie pie weeng pa Mesia.

E bo mele ke mulie cemwo

²¹Tabuhi ha a tan naa, ke e pii beetih te ni acémun den wo lésu pie: «Wâé heme é â *lérusaléma, beme é mu he ni picani na ubwo na lé o pwo wo lèpwo apihuô, me lèpwo caa te lèpwo *apwoâpwailo, me lèpwo *dotéén ko patén. Ke lé bo pwo me é mele. Kehe icehi ana é ha a béciehe ni tan alechen, ke é o bo mulie cemwo.»

²²Ke e tote lésu nge ha a céiu duaan wo Pétér, ke e cihe me ubwo ne kon, ke e pii ten pie: «Ûhu, Padaame! O te tice celi e o tooko celi wonaa!»

²³Ke e biteeng wo lésu ne kon, ke e pii pie: «*Caatana, go engen mu he pwahamiing! Be go teko pwobwoniéo koja ana te nime Padué kon. Be time go uce niimihi pwohewii Padué, kehe go niimihi pwohewii ni apulie!»

A bwo âcéi lésu

²⁴E pii te ni acémun den wo lésu pie: «Wo paceli nimen me e âbé céing [beme pa acémun dong] ke me e nemwo bo uce piniumieng mwo. Kehe wâé heme e canihi a *kuricé ten, ke me e âbé céing.

²⁵Be wo pana nimen me e celuimi a mulihen, ke e o patieden. Kehe wo pana e patieden a mulihen mu kong, ke o celuimieng.

²⁶He ade ne te pa apulie, hemepie e hegi ati ni naamuu a bwohemwo, ke me e patieden a mulihen? Kona ace de aceli o jan me e ne, beme e pwocuhi mwo a mulihen?

²⁷⁻²⁸«Geé tabemi ehi: É pii tewé ati anaa, be é o bo mwojuia mwobé, me é ne a pwodaame tong, woéo pa Nahi Apulie. Ke geme bo âbé me ni *âcélo tong ha a junuu Padué, me a bwo ubwo na a wâé ten. Ke é bo ne ce ceme ni penem de ni apulie. Ke pwo lèpwo béén na élé éni jenaa, na lé o mwo te alihia anaa, ânebuhe ce bwo mele telé.»

Mataio 17

Habwii a bwo ubwo na a wâé ten

Maréko 9.2–13; Luka 9.28–36

¹Alechehe ni tan na 6, ke wo lésu, ke e pé Pétér, me lupwo pwénaâjién wo Cang me loane. Ke lé taa pwo a juwole na te nihe ubwo.

²Ke pitaatééhi a bwo alieng ne he pwahamillé. Be pwodaadii a pwahamii pwohewii a téale, ke pwojo pwomelaa ni epwénen pwohewii a pwéélang.

³Ke lé te ali kuti *Moosé me *Élia, [lupwo alo péroféta ânebun na piubwo julu] he lé ko picihe me weeng.

⁴Ke e pii te lésu wo Pétér pie: «Padaame, te nihe wâé heme genye ko mu éni. Hemepie nimem, ke é o pacuuli ce mwa mwaanu celi cié ne éni, beme a dem a céiu, ke me a de Moosé a céiu, ke me a de Élia a céiu.»

⁵ É he e mwo teko cihe, ke e te âbé kuti a menii na pwomelaan, ke e taluilé. Ke lé téne a pwocihe bé mu ha ali menii, na e pii pie: «Wo paje, ke pa Naîng [na te céiu nang] na te junihe eânimung den. Ke geé piténedeeng!»

⁶ Ke me lé téne a pwocihe naa wo lépwo acémun den, ke lé tidihi jililé, ke lé miibule, be mwotilé.

⁷ Ke e âbé céilé wo lésu, ke e ti kolé, ke e pii telé pie: «Geé cuwoda! Ke geé nemwo pwo me mwotikewé!»

⁸ Ke me lé alehede, ke lé alihie pie, caa te piwoélé cehi me lésu.

⁹ Ke me lé homwobé mu pwo juwole, ke e pii mwoiuhi telé wo lésu pie: «Geé nemwo pii te ce bée apulie nina geé alihie, dieli ha ace tan celi é bo mulie cemwo mu ha amele, woéo pa Nahi Apulie.»

¹⁰ Ke lé tahimwo lésu pie: «Lé pii wo lépwo *dotéén ko patén pie, wo Élia, ke pana me e mi âbé ânebuhe [pa *Mesia]. Ke he wonaa be woté?»

¹¹ Ke e hegi ne telé wo lésu pie: «Éa kuti, e mi âbé wo Élia, beme e pine ehi ati ni naado he ni amu nen.

¹² Kehe icehi ana é pii tewé pie: E caa te âbé wo Élia, kehe time lé uce temehieng ne ni apulie, ke lé te pwo ten nina nimelé kon. Ke te pwohewii ne mwo kong, be é bo mu he ni picani mu kolé, woéo pa Nahi Apulie.»

¹³ Ke lé bwo temehi wo lépwo acémun den pie, e cihe telé ko *loane pa apipuu apulip.

E pwo me wâé pa céiu ewa @ na pwo duéé kon

Maréko 9.14–32; Luka 9.37–45

¹⁴ [Me lé homwobé mu pwo juwole] wo lésu me lépwo acémun den na cié jélé, ke lé tooli a pubu apulie. Ke e âbé céii lésu wo pa céiu apulie, ke e tidihi jilin ânebuhen.

¹⁵ Ke e pii ten pie: «Padaame, go pipwoééhe pa naîng, be e kon a duéé na e pwo me éjén nang, ke te junihe cunu nang kon. É he ni bée benaamwon, ke e mu tahieng da pwo miû, ai é he tabe.»

¹⁶ Ke é caa pééeng bé céii lépwo acémun dem, ke time uce jan me lé pwo me wâé nang.»

¹⁷ Ke e pii telé wo lésu pie: «[É te junihe pipwoééhewé] wogewé ni apulie jenaa! Mwo te time geé uce téele céihi, be wogewé ni apwo mwoiu pun! O é dieli éniile celi é o mwo te mu pelewé, ke me é mwo tee picani ne kowé? Geé pébé éni pa cuwo ewa naa!»

¹⁸ Ke e peni ali duéé wo lésu, ke e pii ten pie: «Go wie!» Ke e wie, ke te wâé kuti pali cuwo nahi ewa.

¹⁹ É alechen, ke me lé bwo te pimu cehi wo lésu me lépwo acémun den, ke lé âbé mwonueng, ke lé tahimwoeng pie: «É ko ade na time uce jan me geme pwo me e wie ali duéé?»

²⁰ Ke e hegi ne telé pie: «Wonaa be te junihe wahin kuti a céhi tewé. Kehe é pii tewé a juuju pie: Hemepie a céhi tewé, ke me te ju wahin pwohewii a pide *moutarde*, ke o te jan me geé pii te a juwole ce pie: “Go engen mulang”, ke e o te engen! Ke o te tice aceli o pwocoon ne kowé.

²¹{Be o te icehi mu ko a pwoiitihi te Padué, me a pipatupwo wiinaado, na o jan me geé pawiehi a bwo pwo duéé naa.}»

E pii mwo a bwo mele ten

²² É alechen, ke lé pipwotapitihi ne Galilé wo lésu me lépwo acémun den. Ke e pii telé pie: «O bo icuéo te ni apulie, woéo pa Nahi Apulie. Ke lé bo imwiéo,

²³ke lé o bo pwo me é mele, kehe é ha a béciéhe ni tan alechen, ke é bo mulie cemwo mu ha amele.» Ke me lé téne anaa, ke te junihe piwahin jélé kuti.

A cuhi puni apulie ko a mwaiitihi

²⁴ Lé tehene nge Kapernaüm wo lésu me lépwo acémun den. Ke lé âbé céii Pétérú wo lépwo *atai mwani cuhi puni apulie ko a *mwaiitihi, ke lé tahimwoeng pie: «Kona wo pa caa tewé, ke e te ne mwo a cuhi puni apulie ko a mwaiitihi?»

²⁵Ke e hegi ne telé wo Pétérú pie: «Éa! E te pwocuhin mwo!» É alechen, ke lu taa ha a mwa me lésu. Ke e te pwome cihe wo lésu, ke e pii te Simon Pétérú pie: «Simon, de ace bwo alihí nen dem? Woo paceli e o pwocuhin puni apulie ne te pa daame? Wo pa eapwihi amu, ai wo pa aâbé?»

²⁶Ke e hegi ne ten wo Pétérú pie: «Wo pa aâbé.» Ke e pii ten wo lésu pie: «Éa kuti, beme wo pa eapwihi amu, ke time e o uce pwocuhin.

²⁷Kehe icehi ana genyu nemwo pwotahinaado ne kolé. Go â tapwé, ke ace ikua celi go céi, ke go waa a pwon, be go o tooli a mwani, ke go pébé me a cuhi puni apulie tenyu ko a mwaiitihi.»

Mataio 18

A pwooti ko a pimiibule

Maréko 9.33–50; Luka 9.46–48

Woo pana piubwo nang?

¹ É ha a benaamwon naa, ke lé âbé céii lésu wo lépwo acémun den, ke lé tahimwoeng pie: «Kona woo paceli piubwo nang ne ha a *Mwametau he Miiden?»

²Ke e tote pa cuwo nahi ewa, ke e neeng ha awiemelé.

³Ke e pii telé pie: «Geé tabemi ehi, be é o pii tewé a juuju pie: Mepie time geé uce pwo me piwahin gewé, me geé pwohewii ni cuwo ewa, ke time geé o uce taa ha a Mwametau he Miiden.

⁴Ke hemepie pwo pace apulie celi e pwo me piwahin nang pwohewii pa cuwo nahi ewa ce, ke o bo piubwo nang ne ha a Mwametau he Miiden.

⁵Ke wo pana e hegi ne he niing pace cuwo nahi ewa pwohewii paje, ke e hegjéo. »

Go nemwo pwotahi a céihi ten!

⁶ «Go nemwo pwotahi a céihi te pa apulie na e céihi ne kong pwohewii a cuwo nahi ewa, be o te junihe ubwo a cuhinaado tem. Ke wâé heme cie ace pilehe péi ne ko a henem, ke o tahiko ole ha anumwihi!

⁷O te cuwo ko pwo ni bwomunen me nye tupwo ne ha a ta ne pwo a bwohemwo ce. Kehe go pipwocile, be o te junihe ubwo a cuhinaado te pana e pwo me lé tupwo ne ha a ta wo lépwo béén.

⁸ «Mepie a watihen a im, ai a am, me go pwo ana ta, ke go tahagéi, ke go tahi taabwon nge ité kojako. Be wâé heme go taa ha *a ju mulip pele Padué, hemepie te céiu a im, ai te céiu a am. Kehe te junihe pwoééhem heme go te cile lupwo im, me am, ke me tahiko ne ha a miû na te tice pwonehin.

⁹Ke me watihen a naamiim me go pwo ana ta, ke go tuu tahi nge ité kojako. Be wâé heme go taa ha a ju mulip pele Padué, hemepie te céiu a naamiim. Kehe te junihe pwoééhem me go tee cile lupwo naamiim, ke me tahiko ne ha a miû.

¹⁰ «Geé pipwocilekewé, beme geé nemwo tééti ni cuwo nahi ewa na lé céihi ne kong! Be é pii tewé a juuju pie: Ni *âcélo na lé te wéilé, ke te élé pele Caa tong jeda he miiden.

¹¹{Be woéo pa Nahi Apulie, ke é âbé me é *celuimi nina lé pipatieden.}»

A ocine ko a muto na e pipatieden

¹² «Ade ace bwo niimihinaado tewé ne ko a jepule ce? «Pwo pa céiu apulie, na pwo 100 ni muto ten. Ke mepie tieden aceli te ju céiu nang, ke e o pwo de? E o necu nelang li 99 muto, ke e o â hane ali muto li e pipatieden.

¹³Ke me e tooeng, [ke a tan naa] ke e te junihe pipwodéén ko a muto na te ju céiu, koja nina 99 na lé te mu. Ke geé tabemi ehi, be é pii tewé a juuju pie:

¹⁴O wonaa ne ko Caa tewé na e jeda he miiden, be time uce nimen me e patieden paceli te ju céiu nang mu ko ni naîn.»

Pa céiu acéihi béém na e pwo ana ta

¹⁵ «Mepie e pwo {tem} aceli ta wo pa céiu acéihi béém, ke go â tooeng, ke geu mi picihe ehi, ke go habwii ten ana ta na e pwo. Ke me e piténedeko, ke caa wâé, be go caa pééeng koja a ta.

¹⁶Ke me time e uce piténedeko, ke go pé pace ai wo lupwoce acéihi me geé picihe me weeng, beme lu bo pajuujuhi a picihe tewé [pwohewii ana caa te tii ne he ni tii iitihi pie]: *Wâé heme alo ai cié ni *apajujuhi nen. Deutéronome 19.15*

¹⁷Ke mepie muhi ten me e ténedekewé, ke go â pii te ni apwoiitihi. Ke mepie muhi ten me e ténedé ni apwoiitihi, ke geé nemwo pipéce ne kon, be e bo â pwohewii nina time lé uce céhi, me ni *atai mwani cuhi puni apulie.

¹⁸ «Geé tabemi ehi, be é o pii tewé a juuju pie: Ati nina geé paciitihi ne éni pwo bwohemwo, ke e o te paciitihi ne mwo jeda he miiden wo Padué. Ke ati nina geé pii pie wâé ne éni pwo bwohemwo, ke e o te pii pie wâé ne mwo jeda he miiden.»

Geé pipwoiitihi ibu!

¹⁹ «A céiu mwo, ke wo lupwoceli alo julu mu kowé, ke me céiu julu ne ko aceli lu pwoiitihi ne kon, ke e o bo pwo ne telu wo Caa tong jeda he miiden.

²⁰ Be mepie alo ai me cié celi lé neibulé ne he niing, ke woéo ha awiemelé.»

Pa eabwé na time e uce pineu pa béén

²¹ E âbé céii lésu wo Pétérú, ke e tahimwoeng pie: «Padaame, hemepie e te cuwo ko pwotahi ne kong wo pa béléng, ke o oniile jo ko pineueng? Dieli ko 7?»

²² Ke e hegi ne ten wo lésu pie: «Time é uce pii tem pie, é dieli ko 7, ai é dieli ko 7000. [Kehe go te pineueng taaci.]

²³ Be a Mwametau he Miiden, ke pwohewii ani: «E bwo mu wo pa céiu daame, ke nimen me e temehi ace jéhi ce kérédi te ni eabwé ten.

²⁴ Ke e tabuhi mu ko pa céiu, ke lé pébé céiieng pana e caa taa pwo ni *milliard* na hiwon ni kérédi ten.

²⁵ Ke caa time uce jan me e wodehin. Ke e pii wo pa daame pie: “Me icueng beme pa *apenem tice ja kon. Ke icu mwo mwoden, me ni naîn, me ni naamuun! Icuhi ati, beme e pwocuhi ni kérédi ten!”

²⁶ «Kehe icehi ana wo paje, ke e tidihi jilin he pwahamii pa daame, ke e é, me pii ten pie: “É ileko pie, go nemwo wele, be é bo te pwocuhi ne tem ati!”

²⁷ «Ke e te pipwoééhen wo pa daame, ke e ciitili taabwon ni kérédi ten, ke e neeng me e engen.

²⁸ «Ke nebwén, ke e engen wo pali eabwé, ke pitapitilu me pa bén ko penem, na e pé kojaeng a mwani péi na te ju céiu. Ke e imwi pali, ke e pwoti henen, ke e pii ten pie: “Go piepin me go wodehi ni mwani tong!”

²⁹ «Ke e tidihi wo pali he pwahamiin, ke e pii ten pie: “É ileko pie, go nemwo wele, be é bo te wodehin ne mwo tem!”

³⁰ «Kehe icehi ana muhi te paje, ke e neeng da he karépu, ucéihi ace bwo wodehi ne ni kérédi ten.

³¹ «Ke lé téetihi ne ni bélou ko penem, ke te junihe muhi telé, ke lé â pitéteiminaado te pa daame helé.

³²«Ke e tote pali eabwé wo pa daame, ke e pii ten pie: "Wogo, ke pa eabwé na piticenaado ne kom! Be li é ciitili ati li kérédi tem li te junihe ubwo, be he li go ko âbé é ne kong!"

³³Ke wogo mwo, ke me go pipwoééhe pa béis, pwohewii a bwo pipwoééhem dong!"

³⁴«Ke e te junihe okéé wo pa daame, ke e pwo me imwi pali eabwé, ke e neeng he karépu. Ke e pwocuhinaado ten, ucéihi ace bwo wodehi na ati ni kérédi ten.»

³⁵[Ke e panebwénihi a ocine naa wo lésu, ke e pii pie]: «O wonaa ana e o pwo tewé wo Caa tong jedo he miiden, hemepie time geé uce pineu pa béis acéihi he ni ju pwonimewé.»

Mataio 19

A piaten me a pitahagéi piaten

Maréko 10.1-12

¹Me e pii ati anaa wo lésu, ke e engen mu ha amu Galilé, ha a duaan *Judé ne gaale cemwo ne ko a éémwa loriidano.

²Ke hiwon ni apulie na lé âcéin, ke e pwo me wâé nina cunu jélé.

³Ke lé âbé céieng ne ni béeé *Farasaio, ke lé pwo me lé pipwohuô ten, ke lé tahimwoeng pie: «Kona te pwo mwomwon de pa apulie ne he ni patén, me e cibéé ê mwoden? He ade ace watihen me e cibééeng?»

⁴Ke e hegi ne telé wo lésu pie: «Kona time geé uce pine ana caa te tii ne he ni tii iitihi? Be caa tii pie, é ha atabuhi kon, me e tabuhi a bwohemwo wo Padué, ke e ne pa aiu me ê toomwo. Genèse 1.27

⁵Ke e pii wo Padué pie: *Ke é mu ko anaa, ke e patupwo lu nyaa me caa ten wo pa aiu, beme lu pimu me ê mwoden. Ke me wonaa, ke caa céiu julu. Genèse 2.24*

⁶«[É ko anaa na é pii tewé pie]: Caa time bo uce alo mwo lupwoce apulie, kehe caa te ju céiu julu. Ke geé nemwo pineitééhi mwo nina e caa pineibuhi wo Padué!»

⁷Ke lé hegi ne ten wo lépwo Farasaio pie: «Ke me wonaa, ke kona é ko ade na e pii wo *Moosé pie, pwo mwomwon de pa apulie me e pawie mwo ê mwoden, hemepie e pwo ace tii me pitahagéi piaten?»

⁸Ke e pii telé wo lésu pie: «E ne a mwomwon dewé, be te junihe mwoiu ni puniwé! Kehe icehi ana é ha atabuhi kon, ke time uce wonaa.

⁹É ko anaa na é pii tewé pie: Go nemwo cibéé ê mwodem na time uce ê abune aiu. Be, me go cibééeng, ke me go piaten mwo, ke go bune toomwo koja ê mwodem ânebun.»

Pwo ni béén na time lé uce piaten

¹⁰Lé pii te lésu wo lépwo acémun den pie: «Heme wonaa, ke wâé heme tice piaten!»

¹¹Ke e hegi ne telé pie: «A pwootti naa, ke time e uce ne, me de ati ni apulie, kehe wo Padué, ke e te ne cehi te ni béén me lé hegi.

¹²Be te pwo ni béén na time lé uce piaten, be time uce jan me lé pwo, mu he ni bwo âbeele telé. Ke pwo ni béén na te tice naîlé ko nina lé pwo ne ko ni éélé ni apulie. Ke pwo ni béén na time lé uce piaten, be watihen a *Mwametau he Miiden. [Be nimelé me lé pipwoeabwé ehi te Padué.] Wo paceli nimen me e hegi a pwootti naa, ke wâé heme e hegi!»

E adéi ni cuwo nahi ewa wo lésu

Maréko 10.13–16; Luka 18.15–17

¹³É alechen, ke lé âbé céii lésu ne ni bée apulie, ke lé pébé céiieng ni cuwo ewa, beme e ne ni in huîlé, ke me e pwoitihi me delé. Kehe icehi ana lé cihe me ubwo ne kolé wo lépwo acémun den, ke lé pacuwolé.

¹⁴Kehe icehi ana e pii telé wo lésu pie: «Geé ne ni cuwo nahi ewa me lé âbé céiiéo! Geé nemwo pacuwolé! Be a Mwametau he Miiden, ke a de ni apulie na lé pwohewii ni cuwo nahi ewa.»

¹⁵Ke e ne ni in wo lésu pwo puni ni cuwo ewa [ke e adéilé]. Ke é alechen, ke e engen mu ha a duaan naa.

Pa apulie na nihe pwo den

Maréko 10.17–31; Luka 18.18–30

¹⁶É he e mwo ko wonaa wo lésu, ke e te tuie kuti wo pa céiu apulie, ke e tahimwoeng pie: «Pa apipune, he ade aceli me é pwo celi o wâé, beme é hegi a *mulie dieli mwo ne pele Padué?»

¹⁷Ke e hegi ne ten wo lésu pie: «Kona é mu ko ade na go tahimwoéo ko aceli wâé? Te céiu pana wâé nang. Ke hemepie nimem me pwo ne tem *a ju mulip, ke go piténedehi ni patén den.»

¹⁸Ke e pii ten wo pali pie: «Kona de ce patén den?» Ke e hegi ne ten wo lésu pie: «Go nemwo taunuhi apulie; Go nemwo pibune; Go nemwo bune; Go nemwo geti ni apulie ;

¹⁹ Go paciiti lu nyaa me caa tem; Exode 20.12–16 Go pwo me eânimem de ni béén , pwohewii a bwo pieânimem dem.» Lévitique 19.18

²⁰Ke e hegi ne ten wo pali apulie pie: «É caa te ténedehi kuti ninaa, ke he ade aceli me é pwo mwo?»

²¹Ke e hegi ne ten wo lésu pie: «Mepie nimem me te junihe wâé ehi ni huô tem ne he pwahamii Padué, ke go engen, ke go â icuhi ati ni den, ke go ne ni cuhin ne te nina tice delé, be me wonaa, ke o pwo ce dem ne pele Padué. Ke nebwen, ke go âbé céing.»

²²Kehe me e téne anaa wo paje, ke te junihe piwahin nang, be te junihe pwo den, ke e engen.

A bwo taa ha a Mwametau

²³Ke e pii wo lésu te l épwo acémun den pie: «Geé tabemi ehi, be é pii tewé a juuju pie: Wo pa apulie na te junihe pwo den, ke te junihe pwocoon den me e taa ha a Mwametau he Miiden.

²⁴Kona a chameau, ke te jan ne kon me e taa ha a pwon ko a diti? Úhu, pwocoon, kehe é pii tewé pie: Wo pa apulie na te junihe pwo den, ke mwo te junihe pwocoon ne kon me e taa ha a *Mwametau te Padué.»

²⁵Ke lé te junihe téetih wo l épwo acémun den, ke lé pii pie: «Ke kona woo paceli jan me e piceluimieng?»

²⁶Ke e omelé wo lésu, ke e pii telé pie: «Ana time uce jan ne ko pa apulie me e pwo, ke jan ne ko Padué. Be ati ni naado, ke te tai jan ne ko Padué.»

²⁷Ke e pii ten wo Pétérue pie: «Wogeme, ke geme caa patupwo ati ni naado, beme geme âcéim. Ke he ade aceli geme o hegi?»

²⁸Ke e hegi ne telé wo lésu pie: «Geé tabemi ehi, be é o pii tewé a juuju pie: E bo taatééhi me mwo coho ati ni naado wo Padué. Ke é ha a tan naa, ke woéo pa Nahi Apulie, ke é o bo tebwo pwo atebwo tong ne ha *a wâé tong. Ke wogewé na geé âcéing, ke geé tebwo pwo ni 12 atebwo te l épwo daame, beme geé o pihuô te ni 12 pwomwoiou *Isaraéla.

²⁹«Ke wo paceli e patupwo a pomwa ten me ni âjiénen, me ni toomwo pwaadeniin, me lu nyaa me caa ten, me ni naîn, me ni apwoamu ten, watihen a niing, ke e o bo hegi celi piwéden, celi te junihe ubwo ke hiwon, ke o pwo den ko a mulie dieli mwo ne pele Padué.

³⁰Ke hiwon nina lé ânebun jenaa, na lé bo alece. Ke hiwon nina lé alece jenaa, na lé bo ânebun.»

Mataio 20

Ni apenem na piwie a cuhilé

¹[E pii mwo telé wo lésu pie]: «A *Mwametau he Miiden, ke pwohewii ani: «E bwo mu wo pa eapwihi a ni tabe megele, ke e bwo wie he mwo ju acaama ne ha apwojenep, beme e hane ce apenem den.

²Ke e too ni béén, ke lé caa piténelé pie, me e pwocuhilé ko a cuhi a tan na céiu ko penem. Ke e nelé nge ha apwoamu.

³É nge ko 9 inetéale ha acaama, ke e wie mwo ne ha apwojenep, ke e ali mwo ni béén na te tice celi lé pwo.

⁴Ke e pii telé pie: “Wogewé mwo, geé âmwo penem ha ali apwoamu tong, be é bo te ne ace cuhikewé celi jan.”

⁵«Ke lé engen. Ke e wie mwo he te ju goahen wo pali, ke e pé mwobé ni bée apenem. Ke piwien mwo ko cié inetéale alecehe a goahen.

⁶«Ke nebwén, ke e wie mwo nge ko nim inetéale, ke e too mwo ni bée na lé teko pitabée, ke e tahimwolé pie: “Lépwoje, kona geé teko pwo de? Te tice aceli geé pwo?”

⁷«Ke lé hegi ne ten pie: “Wonaa, be te tice paceli me e péékeme me geme penem.” «Ke e pii telé pie: “Wogewé mwo, ke geé â penem ha apwoamu tong.”

⁸ «Ke â babwén, ke e pii te pa caa te penem den pie: “Go todebé lépwo apenem, ke go pwocuhilé, ke go mi pwocuhi lépwoli lé bwo penem alece, ke go bwo panebwénihi ne ko lépwoli lé mi penem.”

⁹ «Ke lé mi âbé wo lépwoli lé bwo penem alece, ke lé pé ni cuhilé pwohewii a cuhi penem he na céiu tan.

¹⁰Ke me lé alahi anaa wo lépwoli lé mi penem, ke lé piniihi pie: ‘Wâé, be genye o hegi celi piwéden!’ «Kehe icehi ana lé te hegi mwo, pwohewii ana lé te hegi wo lépwo apenem alece.

¹¹Ke lé okéé ne ko pali eapwihi apwoamu,

¹²ke lé pii ten pie: “Wo lépwoje, ke lépwoli lé bwo tuie alece, ke te céiu a inetéale na lé penem hen, ke go ne me te piwie a cuhikeme! Kehe wogeme, ke geme picani ko ni bwo mwaale geme, ke cinikeme na a téale!”

¹³«Ke e hegi ne te pa céiu béélé wo pali eapwihi apwoamu, ke e pii ten pie: “Pa bééng, go nemwo niimihi pie é pihaamiko, be li genyu caa te piténekenyu ne ko a cuhiko.

¹⁴Go pé ni mwani tem, ke go engen, be nimung me é ne te nina lé alecehem celi piwien me wogo.

¹⁵Te pwo mwomwon dong me é pihuôhi ni mwani tong. É ko ade na go piniihi tahi he é pwo ana wâé ne ko ni bée?»

¹⁶[Ke e panebwénihi a ocine naa wo lésu, ke e pii pie]: «Wo lépwona lé alece, ke lé o bo ânebun, ke nina lé ânebun, ke lé bo alece.»

E pii a béociéhe a bwo mele ten

Maréko 10.32–34; Luka 18.31–34

¹⁷Lé mwo ko engen me lé â *lérusaléma wo lésu me lépwo ¹² acémun den [me ni bée apulie]. Ke e pé itéhi ni acémun den, ke e pii telé pie:

¹⁸«Geé téne, genye o caa taa lérusaléma. Ke é nelang he na o neéo, woéo pa Nahi Apulie, te lépwo caa te lépwo *apwoâpwailo, me lépwo *dotéén ko patén. Ke lé bo tautiéo die ko ace bwo taunuéo,

¹⁹ke lé o neéo te nina te tice céhi telé. Ke woélé, ke lé o pihooniéo, ke lé o ahiéo ko a bwaliwota, ke lé o cemeiteéo ne ko a *kuricé, dieli ko a bwo mele

tong. Kehe icehi ana é ha a bécéhé ni tan alecehen, ke é o mulie cemwo mu ha amele.»

Genye pwo me piwahin genye

Maréko 10.35-45

²⁰É alecehe anaa, ke lé âbé céii lésu wo mwode Zébédé me lupwo naîn. Ke e tidihi jilin he pwahamiin wo êje, beme e ilehi kojaeng a céiu naado.

²¹Ke e pii ten wo lésu pie: «De aceli nimem kon?» Ke e hegi ne ten pie: «É hemepie go bo mu ha a Mwametau tem me ha *a wâé tem, ke wâé heme go pwo me lu tebwo ko ni piduaam wo lupwo naîng ce: wo pa céiu ne pwo juim, ke wo pa céiu ne pwo eaamum.»

²²Ke e pii [te lupwoli pwénaâjién] wo lésu pie: «Time geu uce temehi ana geu ko ilehi! Kona geu o te ûdu a tabe ko picani na é o ûdu?» Ke lu hegi ne ten pie: «Éa, o te jan ne komu!»

²³Ke e pii telu pie: «Éa kuti, geu o te ûdu a tabe na é o ûdu. Kehe time o uce woéo na é pihuôhi pie, woo paceli e o tebwo pwo a ing ne pwo jui, ke é pwo eaamung. Be te wo Caa tong na e caa te piwâamihi ni atebwo naa, me de ni béen na e caa te pipégalilé.»

²⁴Me lé téne a pwocihe naa wo lépwo 10 acémun bélélu, ke lé te junihe okéé ne ko lupwo pwénaâjién naa.

²⁵Ke e todelé wo lésu, ke e pii telé pie: «Geé temehi pie, é ne pele ni béen na time uce ni apulie te Padué, ke lé caaite ni apulie wo lépwo daame me lépwo apihuô. Ke lé pwo me piubwo jélé.»

²⁶Kehe wogewé, ke geé nemwo pwohewiilé! Be wo pana nimen me piubwo nang ne hadeniiwé, ke wâé heme e pipwoeabwé tewé.

²⁷Ke wo pana nimen me e pihuô tewé, ke wâé heme pa céiu *apenem tice ja kon ne pelewé.

²⁸Wâé heme geé pipwohewiéo, woéo pa Nahi Apulie, be time é uce âbé beme lé pipwoeabwé tong. Kehe é âbé beme é pipwoeabwé te ni apulie, ke me é patupwo a mulihung, beme cuhi a bwo *celuimi ni apulie na hiwon jélé.»

E pwo me lu niê wo lupwo bwi

Maréko 10.46-52; Luka 18.35-43

²⁹É alecehe a bwo â lériko telé, ke lé wie wo lésu me lépwo acémun den. Ke te junihe hiwon ni apulie na lé âcéilé.

³⁰Pwo lupwo bwi na lu tebwo ko a jije pwaaden. Ke me lu téne pie e tuie wo lésu, ke lu te toii da kuti pie: «{Padaame,} pa *Naî Davita, go pipwoééhemu!»

³¹Ke lé pihaalu ne ni apulie, beme lu nemwo cihe. Kehe icehi ana lu bwo junihe cihe da ko miiden kuti, ke lu pii pie: «Padaame, pa Naî Davita, go pipwoééhemu, ke go picani temu!»

³²Ke e â cuwo wo lésu, ke e todelu, ke e tahimwolu pie: «Ade aceli nimeu me é pwo me deu?»

³³Ke lu hegi ne ten pie: «Padaame, me go tehi ni naamiimu, me gemu niê.»

³⁴Ke e te junihe pipwoééhelu wo lésu, ke e pétaa ko ni naamiilu. Ke lu caa te niê kuti [pwohewiin ânebun]. Ke lu âcéi lésu.

Mataio 21

E taa lérusaléma wo lésu

Maréko 11.1–24; Luka 19.28–48; Ioane 12.12–19

¹É he lé mwo ko engen me lé â *lérusaléma wo lésu me lépwo acémun den, ke lé caa âmwonuhi Betfagé, a mwopopwaalé na e mwonuhi a juwole ko ni Olivier. Ke e mi ne ngen lupwo alo acémun den wo lésu.

²Ke e pii telu pie: «Geu â ha a mwopopwaalé na e ânebuheny. Ke geu bo tooli nelang a buriko na lé taaeng, me a naîn. Ke geu tuwolu, ke geu péélu bé céiiéo.

³Ke mepie lé tahimwokeu ko aceli geu pwo, ke geu hegi ne telé pie: “Nime Padaame kolu.” Ke lé o nelu teu.»

⁴E tuie a bwopwonen naa, beme e pacuwohi ali e pii wo Padué, na e pwaadeniin bé wo pa péroféta ten pie:

⁵ Go pii te lérusaléma, pie: Go alih, go ê toomwo *Sion, be e âbé céïko wo Padaame hem! Te junihe bwala a pwonimen, be e âbé ha a péém. E tebwo pwo a nahi buriko , a wota na e pé ni âneule. Ésaïe 62.11; Zakari 9.9

⁶Ke lu engen wo lupwoli acémun, ke lu te tai pwo ati nina e pii telu wo lésu.

⁷Ke lu pébé ali nyaa te buriko me ali naîn, ke lé ne ni epwén huîilu wo lépwo acémun den. Ke e bwo taa tebwo huîi ali nahi buriko wo lésu.

Lé pipaunueng ne ni apulie

⁸Hiwon ni apulie na lé talihi ni mwaanu telé nge pwo a pwaaden ânebuhe lésu [beme lé pipaunueng]. Ke ni béén, ke lé tahagéi ni mii acuwo na mwo wamin, ke lé ne pwo a pwaaden.

⁹Ke hiwon ni apulie na lé ânebun ke lé alecehe lésu. Ke lé tai toii da pie: «Osana! Pipwoun de Padué! Pipaunu pa *Naî Davita! *Adéi pa apulie na e âbé ne he nii Padaame! Psaume 118.26 Osana me adéihi! Paunu Padaame na e daaité!»

¹⁰É he e tehene nge lérusaléma wo lésu, ke te junihe emegéi na ati ni apulie ha a pwomwo ubwo, ke lé pitahimwolé pie: «He woo pa apulie ce?»

¹¹Ke lé hegi ne telé ne ni apulie na lé âcéin pie: «Wo lésu mu Nazaret é Galilé, pali péroféta [li genye tee ko ucéieng].»

E peni lépwo api-icu mu ha a mwaiitihi

¹² E taa ha a *mwaiitihi wo lésu, ke e peni wie nina lé pwojenep nelang. Ke e tamiibutih ni taap te lèpwo ataatééhi mwani, ke ni atebwo te lèpwo a-icuhi meni.

¹³ Ke e pii telé pie: «E pii ne he ni tii iitihi wo Padué pie: *A mwa tong, ke bo toii kon pie a mwo ko pwoiitihi. Ésaïe 56.7* Kehe wogewé, ke geé ko pwo me ataduwo te lèpwo abune!» Jérémie 7.11

¹⁴ Lé âbé céii lésu ne ha a mwaiitihi ni bwi me ni tebwa, ke e pwo me wâé jélé.

¹⁵ Ke lé téetih ne ni caa te lèpwo *apwoâpwailo me ni *dotéén ko patén, he lé alih ni naado na wâé na e pwo wo lésu. Ke lé alih mwo ni cuwo nahi ewa na lé cihe da ko miiden ne ha a mwaiitihi, ke lé pii pie: «Osana! Pa Naî Davita!» Ke lé te junihe okéé ne ko lésu wo lèpwo apihuô naa.

¹⁶ Ke lé pii te lésu pie: «He go tekó téne nina lé pii ne ni cuwo nahi ewa ce?» Ke e hegi ne telé wo lésu pie: «Éa, time geé mu uce pine ni pwooti na tii ne he ni tii iitihi, na e pii pie: *É mu pwo ni ewa me ni cuwo nahi ewa na lé mwo âbeele, ke lé bo pii a wâé tem, âcehi ana te nimem kon.*» Psaume 8.3

¹⁷ Ke e nelé wo lésu, ke e wie mu ha a pwomwo ubwo beme e â Bétani, ke e pule lang.

A éé majing na te tice acehin

¹⁸ É ha acaama hen, he e mwojuia ngemwo ha a pwomwo ubwo, ke menen.

¹⁹ Ke e alih a *majing ne ko jije pwaaden, ke e piâmwonuhi, kehe e te ju tooli cehi ni madihin. Ke e pii ten pie: «O time o bo uce pwo mwo ce acehiko!» Ke caa te meiu kuti.

²⁰ Heme lé alih anaa wo lèpwo acémun den, ke lé te nihe téetih, ke lé pii pie: «Woté ace bwomunen me e piepin ko meiu?»

²¹ Ke e hegi ne telé wo lésu pie: «É pii tewé a juuju: Hemepie pwo ace céihi tewé, ke mepie time uce pinekepé tewé, ke o jan me geé pwo ana é pwo te pa majing ce. Ke o te jan mwo me geé pii te pa juwole ce pie: “Go engen mulang, ke go ole ha a jié!”, ke e o te pwo.

²² «Ati nina geé ilehi mu ko a pwoiitihi, ke geé bo hegi, hemepie geé céihi ne kon.»

Woo na e ne te lésu a pihuô?

Maréko 11.27—12.12; Luka 20.1-19

²³ E taa ha a mwaiitihi wo lésu, ke e pacémuni ni apulie. Ke lé âmwonueng wo lèpwo caa te lèpwo apwoâpwailo, me lèpwo apihuô, ke lé tahimwoeng pie: «Woo na e ne tem a pihuô me go pwo nina go ko pwo? Woo na e pahedeko?»

²⁴ Ke e hegi ne telé pie: «Woéo mwo, ke é o mwo tahimwokewé ko a céiu naado. Ke hemepie geé hegi ne tong, ke é bo pii tewé pana e ne tong a pihuô me é pwo ni naado naa.

²⁵Wooélén a e ne a pihuô te loane me e *pipuu apulie? Wo Padué, ai ni apulie?» Ke lé te junihe picihe kon, ke lé pipii telé pie: «Mepie genye hegi ne ten pie: “É mu ko Padué”, ke e o pii tenye pie: “Ke é mu ko ade na time geé uce céhi ne ko nina e pii tewé wo loane?”

²⁶Ke mepie genye hegi ne ten pie: “É mu ko ni apulie”, ke é mulang, ke genye pipwocilekenye ne ko ni apulie na lé céhi ne ko loane!» Be lé tai céhi ne kon pie pa péroféta [te Padué].

²⁷Ke é mu ko anaa, ke lé hegi ne te lésu wo lépwo apihuô pie: «Meniing, time geme uce temehi.» Ke e pii telé pie: «Ke woéo mwo, ke time é o uce pii tewé pie, he wooélén a e ne tong a pihuô me é pwo nina é ko pwo.»

A ocine ko lupwo pwénaâjén

²⁸[E pwo-ocine telé wo lésu pie]: «Ade celi geé niimihi ne ko a jepule ce? «Lé bwo mu wo pa céiu apulie, me lupwo naîn. Ke e pii te pa bécéiuhen pie: Pa naîng, go â penem ha apwoamu jenaa.

²⁹«Ke e hegi ne ten wo paje pie: “Te muhi tong.” «Kehe icehi ana é alechen, ke e pininim ne ko ali bwo hegi ne ten den. Ke e bwo te â penem ha ali apwoamu.

³⁰«Ke e pii te pali céiu wo caa telu pie: “Pa naîng, go â penem ha apwoamu jenaa.” «Ke e hegi ne ten pie: “Éa, wâé go caa. É o caa ân.” Kehe icehi ana time e uce ân.

³¹«Ke woo hadenii lupwonaa celi e piténede caa telu?» Ke lé hegi ne ten wo lépwo caa te lépwo apwoâpwailo me lépwo apihuô pie: «Wo pa bécéiuhen.» Ke e pii telé wo lésu pie: «Geé tabemi ehi, be é o pii tewé a juuju pie: Lé o ânebuhewé ne ha a *Mwametau te Padué wo lépwo *atai mwani cuhi puni apulie, me ni toomwo pwopwaaden.

³²Be e âbé céikewé wo loane pa apipuu apulie, beme e habwii tewé, wogewé a bele *Isaraéla, a pwaaden na *mwomwon ne he pwahamii Padué. Ke time geé uce céhi ne kon. Kehe icehi ana wo lépwo atai mwani me ni toomwo pwopwaaden, ke lé te céhi ne kon. Ke me geé alihie pie lé céhi, ke time geé uce pininim, me geé céhi ne kon.»

Lépwo awéihi na a ni tabe megele

³³«Geé tabemi a céiu ocine: E bwo mu wo pa eapwihi a ni tabe megele. Ke e cemi apwoamu ten, ke e bwo pwo a aba beme babé kon. Ke e bwo ini a pwon, beme acaaï ace tabe megele, ke me e bo céi ne hen a tabe hen. Ke e bahi a mwa na te junihe bwali da ko miiden, beme a mwowéa ko ali ni éé tabe megele. Ke nebwen, ke [e niimihi pie me] e mwo â pitabée ha ace céiu amu, ke e pwocuhi ni béé apulie, beme lé wéihi ali ni tabe megele ten, ke e engen.

³⁴«[Pwo ni wole alechen] ke tuie nge ha a benaamwon ko tabwo ace tabe megele. Ke e ne ngen ni apenem den, beme lé â hegi ce den mu ko a pitii âdaanu, koja lépwoli awéihi ni éé tabe megele.

³⁵Kehe icehi ana lé imwilé wo lépwoli awéihi ni tabe megele. Ke lé pitati pa bécéiuhen, ke lé taunu pa béalohen, ke lé taunu mwo pa béciéhen ko péi.

³⁶Ke e ne mwobé ni béé apenem. Kehe icehi ana te piwie ana lé pwo telé.

³⁷Ke nebwén, ke e ne ngen pa naîn, be e piniimihi pie lé o paciitieng.

³⁸ «Kehe icehi ana me lé alieng he e tehene ngen, ke lé pipii telé pie: “Geé téne! Te weengaa kuti pana e bo eapwihi ali ni tabe megele ha ace céiu tan! Wâé heme nye ju taunueng, beme bo a denye ali ni tabe megele!”

³⁹Ke lé imwieng, ke lé teuueng wie koja a apwoamu, ke lé taunueng.»

⁴⁰[Ke wo lésu, ke e tahimwo lépwona lé ko tabemieng pie]: «Ke kona mepie e tehenebé wo pali eapwihi ali apwoamu, ke e o woté te ni apenem naa?»

⁴¹Ke lé hegi ne te lésu wo lépwo caa te lépwo apwoâpwailo, me lépwo apihuô pie: «E bo taunu lépwona lé pwotahinaado, ke e bo uce ne te ce béen a apwoamu, beme lé bo uce wéa kon. Ke é ha a benaamwon celi lé tabwo ace tabe megele hen, ke lé o bo ne ten ce den.»

⁴²Ke e te pii telé mwo wo lésu pie: «Kona time geé uce pine ana tii ne he ni ti iitihi? Ali péi li lé tahi taabwon wo lépwo abahi mwa, ke te anaa kuti a ju paamwa. Be te ni âpihuô te Padaame. Ke nye téetihî a wâé ten, na nye caa ko alihî!Psaume 118.22–23

⁴³⁻⁴⁴«{Hemepie e tupwo wo pace céiu apulie ne pwo a péi naa, ke o tatubwi ati a één. Ke mepie e tupwo ali péi ne huîi pace céiu apulie, ke o te ju tagetieng.} Weengaa a watihen me é pii tewé pie: Ke e o pé kojakewé [a *adéihi ko] a Mwametau ten wo Padué. Ke e o ne te ace céiu bele, celi e bo ne ce acehi ni penem de lépwo ju nahi a Mwametau.»

⁴⁵Lé temehi wo lépwo apihuô te lépwo apwoâpwailo me lépwo *Farasaio, pie e ko pwo-ocine ne kolé wo lésu.

⁴⁶Ke te nimelé me lé imwieng. Kehe icehi ana mwotilé ko ni apulie, be te junihe hiwon ni béen na lé niimihi pie pa péroféta [te Padué].

Mataio 22

A piwiinaado ubwo ko a piaten

Luka 14.15–24

¹Ke e pwo-ocine telé mwo wo lésu, ke e pii telé pie:

²«A *Mwametau he Miiden, ke pwohewii ani: «E bwo mu wo pa céiu daame. Ke e piwâam ko a piwiinaado na te junihe ubwo ko pa naîn na e piaten.

³Ke e pahede ni eabwé ten, me lé â tote nina lé pahede céilé ne ko a piwiinaado. Kehe icehi ana wo lépwonaa, ke time uce nimelé me lé âbé wiinaado.

⁴«Ke e pahede mwo ni bée eabwé ten, me lé â pii telé pie: “É caa pipwopweehi ati. Be é caa pwo me lé taunuhi paaci me ni wota tong na gérén jélé. Geé âbé me nye piwiinaado ibu ko a piaten!”

⁵«Kehe icehi ana time lé uce pipéce ne kolé wo lépwona todelé. Ke lé tee muko engen ne ko ni penem delé, be e â ha apwoamu ten wo pa céiu, ke e â mu ha a magaha ten wo pa céiu.

⁶Ke wo lépwo béis, ke lé imwi lépwoli eabwé, ke lé pwotahinaado ne kolé, ke lé taunulé.

⁷Ke e te junihe okéé kuti wo pa daame. Ke e pahede ni coda ten me lé â taunu ni pwéréca naa, ke lé cini a pwomwo ubwo telé.

⁸«Ke e todebé ni bée eabwé ten, ke e pii telé pie: “Caa nebwén ali wiinaado ko piaten, kehe icehi ana wo lépwoli é caa todelé, ke time uce jan ne kolé.

⁹Ke geé â ati he ni dihe pwaaden, ke geé todebé ati ce apulie celi geé toolé.”

¹⁰«Ke lé engen uti ni pwaaden wo lépwoli eabwé, ke lé tode ati ni apulie na lé toolé, nina ta jélé, me nina wâé jélé, ke caa te ju â oba ali mwowiinaado.

¹¹«Ke e taa wo pa daame, beme e ali lépwoli lé ko wiinaado. Ke e ali pa apulie na time e uce cuwohe ace epwén ko piwiinaado.

¹²Ke e pii ten pie: “Pa béis, go woté ko ace bwo taabé tem éni, he te tice epwénem ko piwiinaado?” «Ke time e uce temehi ace bwo hegí nen ne ten wo paje.

¹³«Ke e pii te li eabwé ten wo pa daame pie: “Geé cie ni in me ni an, ke geé tahieng wie ne ha a melepiing, he na lé bo é nelang, ke lé piwii pecuwo.”»

¹⁴Ke e pii wo lésu pie: «Hiwon ni apulie na e todelé wo Padué, kehe time uce hiwon nina e pipégallilé.»

A cuhi puni apulie te lépwo Roma

Maréko 12.13–17; Luka 20.19–26

¹⁵É ha a céiu tan, ke lé pitapitilé wo lépwo *Farasaio, beme lé hane ace bwopwonen me lé pipwohuô te lésu ko ace bwo hegí nen den ne telé.

¹⁶Ke lé pahede ngen ni bée acémun delé, me ni béis na élé ha a duaan de *Érode. Ke lé â pii te lésu pie: «Pa apipune, geme temehi pie go pii a juuju, be go te patemehi ati ni naado na nime Padué me genye pwo. Be time uce mwotiko ko pa apulie, ke time go uce pipwoinen ne kolé.

¹⁷Ke anaa kuti ana nimeme me geme tahimwoko pie: He te wâé heme nye pwocuhi puni apulie te pa daame he lépwo Roma? Ai time uce wâé?»

¹⁸Kehe e te temehi a bwo pipwohuô telé wo lésu, ke e pii telé pie: «Lépwoje, wogewé ke lépwo agele! É ko ade na geé pihaamiéo?

¹⁹Geé cuwoteeke habwii tong ace mwani *cuhi puni apulie!» Ke lé ne ten a mwani péi.

²⁰Ke e pii telé pie: «A démee, ke a nii-î ana e pwo a mwani ce?»

²¹Ke lé hegi ne ten pie: «A de pa daame he lèpwo Roma.» Ke e pii telé wo lésu pie: «Ke caa wâé, ke geé ne mwo te pa daame nina te ni den, ke geé ne te Padué nina te ni de Padué.»

²²Ke lé te junihe téetih a bwo hegi nen den. Ke lé cepewieeng, ke lé engen.

A bwo mulie cemwo te ni amele

Maréko 12.18–27; Luka 20.27–38

²³Mwo te é ha a tan naa, ke lé âmwobé céii lésu wo lèpwo béé *Saducéen. [Woélé, ke te a céiu dihe pwouiithi te lèpwo *Juif] na time lé uce céihi pie, lé o mulie cemwo wo lèpwo amele. Lé âbé too lésu, [ke lé pwo me lé habwii pie lé juuju] ke lé tahimwoeng pie:

²⁴«Pa apipune, e caa pii wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé ê depweleton wo pa ciéén me lu piaten. Deutéronome 25.5* Be me wonaa, ke me bo pwo ce piebehi pa amele.

²⁵«[Ke te wâé. Kehe go cuwoteeke niimihi ani]: Pwo lèpwo pwénaâjién na 7 jélé, ke e piaten wo pa cuwolé, kehe icehi ana e mele he mwo te tice naîn. Ke lu piaten wo pa bálohen me êgi depwele.

²⁶Ke te piwien ne mwo ko pa bálohen, ke pa bécien, die ko pa bê7 hen.

²⁷Ke é alechelé ati, ke e bwobe mele wo êgi toomwo.

²⁸Ke [go ko pii pie] lé o bo mulie cemwo ne ni amele, ha ace céiu tan. Ke hemepie wonaa, ke o bo wooélé mu hadeniilé celi bo pa aiu he ê toomwo naa, ha a benaamwon naa? Be caa te tai lèpwo aiu hen ati! [Ke go cuwoteeke hegi!]»

²⁹Ke e hegi ne telé wo lésu pie: «Geé pipweéo, be time geé uce temehi ni tii iitihi, me a junuu Padué.

³⁰Be mepie lé mulie cemwo ne ni amele, ke time lé o bo uce piaten mwo. Kehe lé mulie pwohewii ni *âcélo ne pele Padué.

³¹He time geé uce pine ali e pii wo Padué ne ko a mulie cemwo? Be e pii pie:

³²Woéo Padué he *Abérama, ke Padué he Isaaka, ke Padué he lakobo. Exode 3.6

[A bwopiinen pie, lé tekoi tai mulie pele Padué!] Be time uce Padué he ni amele, kehe Padué he nina lé mulie!»

³³Ke lé téne anaa ne ni apulie na hiwon jélé, ke lé te junihe téetih a bwo pacémunilé te lésu.

A patén na piwéden

Maréko 12.28–34; Luka 10.25–28

³⁴Me lé téne wo lépwo Farasaio pie e capuhi ni pwo lépwo Saducéen wo lésu, ke lé pitaineibulé, beme lé â ali lésu.

³⁵Ke pwo pa céiu béélé, pa céiu *dotéén ko patén, na nimen me e pipwohuô te lésu, ke e tahimwoeng pie:

³⁶«Pa apipune, kona ade patén celi e piwéden na ati he ni patén?»

³⁷Ke e hegi ne ten wo lésu pie: «Weengi: *Go pwo me eânimem de Padaame Padué hem, ati ne ha a ju pwonimem, me a mulihem, me a bwo niimihinaadotem.* Deutéronome 6.5

³⁸Weengaa a patén na junihe piwéden ne ha ati ni patén.

³⁹Ke weengi a bálohe ni patén, na pwohewii ali ânebun: *Go pwo me eânimem de ni béén, pwohewii a bwo pieânimem dem.* Lévitique 19.18

⁴⁰«Ati ni *patén de Moosé, me ni cémun de ni péroféta, ke lé te tai âbé mu ko lupwo patén naa.»

Nihe pwonaado ne ko pa Mesia

Maréko 12.35–37; Luka 20.41–44

⁴¹Lé mu aujeni lésu wo lépwo Farasaio, ke e tahimwolé pie:

⁴²«De ace bwo niimihinaado tewé ne ko pa *Mesia? Pa piebehii?» Ke lé hegi ne ten pie: «Pa piebehi *Davita.» [A bwopiinen pie pa apulie na wahin nang kojaeng.]

⁴³Ke e pii telé pie: «Wo Davita, ke he caa ju tilieng na a *Jenen litih, ke e pii ko pa Mesia pie: “Padaame hung”. Kehe é mu ko ade?

⁴⁴Be e pii pie: *Pwootí te Padaame Padué, na e pacihe pa daame hung: “Go âbé tebwo éni pwo a juing.*

[É ne tem a pihuô, ke o pipaunuko dieli mwo.] É pwo me go caaite nina lé pipwopa ne kom. Psaume 110.1

⁴⁵«Ke me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace watihen me geé niimihi pie, wo pa Mesia, ke time uce pace apulie celi piubwo nang koja Davita?»

⁴⁶Ke te tice paceli e hegi ne ten. Ke é alecehe anaa, ke te tice paceli e bo uce tahimwoeng mwo ko ce bée naado.

Mataio 23

Nemwo pipwohewii ni Farasaio

Maréko 12.38–40; Luka 11.43–46, 20.45–47

¹É alechen, ke lé tabemi lésu wo lépwo acémun den me ni apulie na lé mu lang, he e pii telé pie:

²«Geé te ali lépwo *dotéén ko patén me lépwo *Farasaio, be a penem delé me lé pacémuni ni apulie ko ni *patén de Moosé.

³ «Ke wâé heme geé piténedehi ati nina lé pii tewé. Kehe icehi ana geé nemwo pipwohewiilé, be time lé uce pwo nina lé pii tewé!

⁴ Be ni pihuô telé, ke pwohewii ni âneule na te junihe téé, na lé ne me lé taawon ne ni apulie. Be te muhi telé me lé ti kon ko a mwodéilé na te ju céiu!

⁵ «Ati ni huô telé, ke lé pwo, beme lé alilé ne ni apulie [pie lé tekô âcehi ni pihuô te Padué]. Ke lé pwo me piubwo ni cuwo nahi éelele iitihi na mu pwo bwaadelé, ke é ko ni ilé. Ke lé pwo me bwali ni baaé epwénelé.

⁶ Ke lé te cuwo ko pipégali ni atebwo ânebun ne he ni piwiinaado ubwo, ke é ne he ni *mwotapitihi.

⁷ Be wâé telé heme lé pipaunulé ne ni apulie, ke me lé pii telé pie ‘Pa daame’.

⁸ «Kehe wogewé, ke geé nemwo pwo me lé pii kowé pie ‘Pa daame’. Be te céiu Pa daame. Be wogewé, ke lépwo pwénaâjién.

⁹ Ke geé nemwo pii ko pace céiu apulie éni pwo bwohemwo pie ‘Caa’, be te céiu pa Caa tewé, na e jedâ he miiden.

¹⁰ Ke geé nemwo pwo me pitoii kowé pie ‘Pa apihuô’, be te céiu Pa apihuô, na wo Kériso, pa *Mesia.

¹¹ Wo pace apulie celi piubwo nang ne pelewé, ke wâé heme e pwo me piwahin nang.

¹² Be wo pana e pwo me piubwo nang, ke o neeng ole. Ke wo pana e pwo me piwahin nang, ke o pineeng da.»

E paténe lépwo Farasaio wo lésu

¹³ E pacihe mwo lépwo Farasaio me lépwo dotéén ko patén wo lésu, ke e pii telé pie: «Geé pipwocile, wogewé lépwo apipulekenye ke lépwo apihaami! Be o te junihe ubwo a cuhinaado tewé! Be time geé uce taa ha a *Mwametau he Miiden wogewé, ke geé capuhi a pomwa ne ko ni béen na nimelé me lé taa.

{¹⁴ «Geé pwo ni jame pwoiitihi [beme nye o niimihi pie, ni apulie na wâé gewé]. Kehe icehi ana geé pé ati koja ni depwele ni delé. Ke é mu ko anaa kuti, na o bo ne tewé a cuhinaado na junihe ubwo koja a cuhinaado te ni béen.} }

¹⁵ «Wogewé, ke lépwo apulie na te junihe ta gewé! Be geé téte pitihî a bwohemwo me a jié, beme geé tooli ace apulie celi te ju céiu nang, ke me e hegi a pwoiitihi tewé. Ke me geé caa pééeng, ke geé pwo me pa apulie na te junihe ta nang kojakewé, ke jan me e â ha a miû, pwohewiikewé!

¹⁶ «Geé pwocilekewé, wogewé lépwo bwi na geé pipé lépwo bwi. [Be geé pitalupe heme geé pacémuni ni apulie ko ni *piapwo.] Be geé pii telé pie: “Mepie go piapwo cehi ne ko nii ‘a *mwaiitihi’, ke te piticenaado ne kon, kehe mepie go piapwo ne ko ce mwani megele celi e mu ha a mwaiitihi, ke wâé heme go pwo ana go piapwo ne kon.”

¹⁷«Wogewé, ke lépwo pitice pwonimewé, ke bwi gewé! Ade aceli junihe pwonaado ne kon? A mwani megele ai a mwaiitihi? É pii tewé pie: Te a mwaiitihi cehi ana pipwonaado ne kon, be a duaan na e mu hen wo Padué!

¹⁸«Ke piwien mwo, heme geé pii pie: “Hemepie go te ju piapwo cehi ne ko *apwoâpwailo, ke o te piticenaado ne kon. Ke heme go piapwo ne ko a âpwailo na e mu pwon, ke wâé heme go pacuwohi a piapwo naa.”

¹⁹«Woté? Kona te tice aceli geé temehi? Ade aceli junihe pipwonaado ne kon? A âpwailo, ai a apwoâpwailo, na e pwo me iitihi a âpwailo?

²⁰Geé téne, wo pana e piapwo ne ko a apwoâpwailo, ke e piapwo ati ne ko nina e pwon.

²¹Ke wo pana e piapwo ne ko a mwaiitihi, ke e piapwo ne ko a nii Padué, be a mwa ten.

²²Ke wo pana e piapwo ne ko a miiden, ke e piapwo ne ko a atebwo iitihi te Padué [na e daaité].»

Wogewé lépwo apineduwohi na a ta!

²³«Geé ne te Padué ana te ju céiu mu ko nina ¹⁰, é mu ko ni pétaapwo âdaanu. [Ke te wâé.] Kehe geé pipwocile! Be time geé uce âcehi ni junaado ne he ni patén: a ju céhi ne ko Padué, me a bwo pipwoiipi ni apulie, me a bwo pipwoééhelé. Wâé heme geé pacuwohi ati nina ubwo, me ati ni nahi patén.

²⁴Wogewé ni bwi na geé pé ni bwi! Geé tapulicéihi a tabe beme geé pétaabwon a nabu, kehe icehi ana geé nemihî a *chameau*!

²⁵«O te junihe ubwo a cuhinaado tewé, be geé te ju gahe pwo! Be geé puu ehi pwo mwojéi ni mwoûdu me ni tam, kehe icehi ana te ju oba kuti ni pwonimewé ko nina ta. Be geé te junihe tapi, ke geé tee cuwo ko hane nina wâé me dewé, ke geé bune ni apulie!

²⁶Wogewé ni bwi! Geé mi puu ni ne ni tamewé. Ke é mulang, ke o wâé ati ni tam.

²⁷«Wogewé lépwo apineduwohi na a ta! Be geé pwohewii ni bwomu na timi me pwojo pwomwo, ke te ju wâé bwo alihî nen. Kehe icehi ana é henen, ke te ju oba ko duapulie, me ati ni naado na caa muti.

²⁸Wogewé mwo, be é ne pwomwo, ke te junihe wâé gewé ne ko ni apulie, kehe é jengedé ne kowé, ke te ju oba ko gele me nina ta.»

Wogewé na geé taunu ni péroféta

²⁹«O te junihe ubwo a cuhinaado tewé, wogewé lépwo dotéén ko patén me lépwo Farasaio! Be geé pwonaamu ni bwomuhe lépwo péroféta, me ni apulie na mwomwon jélé ne he pwahamii Padué. [Kehe te wo lépwo watihewé kuti li lé taunulé!]»

³⁰Ke geé pipii tewé pie: “Hemepie teko wogenye he ni benaamwon naa, ke wiel me time nye uce taunulé!”

³¹«Kehe icehi ana heme geé ko pii anaa, ke geé pihabwiikewé pie, wogewé, ke te ni ju naî lépwona lé taunulé.

³²Te wâé, ke geé te panebwénihi ni penem de ni watihewé!

³³Wogewé ni nahi bwien! Ke e bo pwocuhinaado tewé wo Padué, ke e bo tahikewé ne ha a miû! Ke time geé o uce piceluimikewé koja anaa!

³⁴«Geé tabemi ehi, be é o pahede ni péproféta me nina lé pitemang, ke nina me lé pacémunikewé. Ke geé o tahi bwaliiwota ko ce béén ne he ni mwotapitihi. Ke geé o pwotahinaado ne ko ce béén nge he ni amu. Ke geé o cemeite ce béén ne ko ce *kuricé. Ke geé o taunu ce béén ko ce béé bwopwonen.

³⁵«Ke é mu ko anaa, na e bo tautikewé wo Padué ko a bwo taunu lépwona lé céhi ne kon: tabuhi mu ko Abel, pa apulie na e mwomwon, die ko Zakari†, pa naî Baraki. Be geé taunu Zakari ne ha awieme apwoâpwailo me a duaan na junihe iitihi.

³⁶É pii tewé a juuju pie: E bo pwocuhinaado tewé wo Padué, wogewé ni apulie jenaa, ko ati nina lé pwo ne ni watihewé.»

A pipwoééhe te lésu @ ne ko lépwo lérusaléma

Luka 13.34–35

³⁷[E pii mwo wo lésu pie]: «Au, mwolikewé wogewé lépwo *lérusaléma! Be geé taunu lépwo péproféta [na e nelé bé céikewé wo Padué] be geé ahi ni béén ko péi, ke geé taunu ce béén ko ce béé bwopwonen. Mu te cuwo ko nimung me é taineibukewé, pwohewii a nyaa te ja, heme e taineibuhi ni naîn haahi ni puuin. Kehe icehi ana te muhi tewé.

³⁸Ke geé téne, [é o mwo engen kojakewé] ke e o patupwo a mwaiitihi tewé wo Padué.

³⁹Ke é pii tewé pie: O caa time geé bo uce aliéo mwo dieli ha ace tan celi geé o bo pii pie: *Adéi pa apulie na e âbé ne he nii Padaame!» Psaume 118.26

Mataio 24

O bo tanahi a mwaiitihi

Maréko 13.1–2; Luka 21.5–6

¹É alechen, he e ko wie mu ha a *mwaiitihi wo lésu, ke lé ko picedi ni aba kon wo lépwo acémun den. Ke lé piâbé mwonu lésu beme lé habwii ten.

²Ke e pii telé pie: «Geé te alihia ati ninaa? Ke é pii tewé a juuju pie: O time e bo uce mu éni mwo ace céiu péi pwo ace céiu. Be ati, ke o tai tanahi taabwon.»

Ana e o tuie

Maréko 13.3–37; Luka 21.7–30, 17.26–37

³[É alechen] ke e tebwo pwo a juwole ko ni Olivier wo lésu [ne he bebenihe a mwaiitihi]. Ke lé âbé mwonueng wo lépwo acémun den, ke te piwoélé cehi me weeng, ke lé tahimwoeng pie: «He éniile celi e o bo tuie ana go ko pii? Ke o ade ace inenaado ko ace bwo mwojuia cemwo tem, ke a pwonehi a bwohemwo?»

⁴Ke e hegi ne telé pie: «Geé pipwocile, beme geé nemwo pipweéo!

⁵Be o hiwon nina lé o âbé heme lé pé a niing. Ke lé o pii tewé pie: "Woéo pa *Mesia", ke lé o pipwohuô te ce apulie celi hiwon jélé.

⁶«Ke geé o téne heme lé cihe ko ce pa celi e mwonu ai e ité. Kehe geé nemwo pwo me mwotikewé! Be e o mi tuie ninaa, kehe icehi ana time uce téele a pwonehi a bwohemwo.

⁷Be a céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau. Ke o bo pwo ni menele na ubwo ne he ni pétaapwo piduaan, ke ni penem bwohemwo.

⁸É ne he ni bwomunen naa, ke o pwohewii ni bécéiuhe picani ko a piâbeeble ewa.»

O pwotahi ne ko ni acéihi

⁹«[É ha a benaamwon naa] ke lé o bo téétikewé mu kong ati ne ni apulie pwo bwohemwo. Ke lé o bo imwikewé, ke pwotahi ne kowé, dieli lé o bo taunukewé, mu ko ana wogewé ke ni apulie tong.

¹⁰«Ke o bo hiwon nina lé o bo patieden ni céhi telé. Ke lé o bo pitéétile nina pibéél, ke lé o bo pi-iculé mwo.

¹¹O hiwon ni péroféta agele na lé o bo tuiebé, ke lé o bo pipwohuô te ce apulie celi hiwon jélé.

¹²Ke a ta, ke o bo piubwo da ne pwo a bwohemwo, ke o bo hiwon nina lé o bo patieden ni pwonimelé ne ko Padué, ke é ne ko ni béél.

¹³Kehe icehi ana wo pana e cumang die ha anebwén [ko a mulihen] ke e bo celuimieng wo Padué.

¹⁴Ke o bo pipatemehi ati ne pwo a bwohemwo a Pwooti Wâé ko a Mwametau, beme lé o bo téne ne nina time lé uce téele temehi Padué. Ke é alechehe anaa, ke o caa a pwonehi a bwohemwo.»

Lé o te junihe picani ne ni apulie

¹⁵«Geé bo alih ali naado li e caa cihe kon wo péroféta Daniéla, he e bo mu ha a duaan na iitihi: ali naado li e pwotahi ati ni naado, na nihe mwakile nang, ke muhi tenye kon.» Wo paceli e pine anaa, ke wâé heme e temehi [beme e bo cihe kon]!

¹⁶«Ke é ha a benaamwon naa, ke wâé heme lé tai cela da pwo ni juwole ne nina lé mu *Judé!

¹⁷Ke wo pana e âoté pwomwo, ke e nemwo taamwo hane ce naado mu ha a mwa ten.

¹⁸Ke wo pana e mu ha apwoamu, ke e nemwo mwojuia ngemwo pelen, me e pé ce epwénen.

¹⁹Au, mwolihi! Be é he ni tan naa, ke o pwoééhe ni toomwo na pigiaa jélé, me nina lé mwo paditihi ewa.

²⁰«Ke geé pwoiitihi te Padué pie, me a bwo cela tewé, ke me time e o uce tuij ha ace benaamwon celi ta-amu hen, ai é ha ace *tan iitihi.

²¹Be, é ha a benaamwon naa, ke lé o te junihe mu he ni picani ne ni apulie. Be mwo te tice pace apulie celi e caa mu he ce picani celi wonaa, tabuhi ha atabuhi ko a bwohemwo, dieli jenaa. Ke o te tice mwo pace céiu apulie celi e o bo mu he ce picani celi wonaa.

²²«É hemepie time e uce niimihi wo Padué pie, me e pineole a jéhi ni tan naa, ke wieli me o te tice pace céiu apulie celi e o celuimi a mulihen! Kehe icehi ana e te niimihi pie me e pineole, wonaa mu ko nina e caa pipégalilé.»

Lépwo ‘mesia’ na ni agele

²³«Mepie e pii tewé wo pace céiu apulie pie: “Geé alih! E éni wo pa *Mesia!”, ai “E ha a duaan ce!”, ke geé nemwo céihi ne kon.

²⁴Be lé o bo tehenebé ce ‘mesia’ me ce ‘péroféta’ celi ni agele. Ke lé o pwo ce *pipwojunuun celi lé o téetihi ne ni apulie, beme a bwopwonen me lé pipwohuô telé. Ke lé o te hane mwo me lé pipwohuô te nina e caa pipégalilé wo Padué.

²⁵Ke é ko anaa na é caa mi pii tewé ni naado na o bo tuij!

²⁶«Ke mepie lé pii tewé pie: “Geé alih, e ha a melé wo pa Mesia!”, ke geé nemwo ân. Ke me lé pii tewé pie: “Geé alih, be e taduwo éni!”, ke geé nemwo céihi ne kon.

²⁷Be a bwo âmwobé tong, woéo pa Nahi Apulie, ke o pwohewii a ilehi heme e pwéélang ati a miiden, mu ha a céiu baaéén die ha a céiu baaéén.

²⁸Be [pwohewii ana nye mu pii pie]: “É he na e lang a déhi wota, ke lé taineibulé nelang ne ni bwaaoléé.”»

A bwo âmwobé te Iésu

²⁹«É he ni tan naa, ke lé o te junihe mu he ni picani ne ni apulie. Ke é alecehe anaa, ke: O *time e uce niê na a téale*. O *bwén ne ha a wole*. Lé o bo *tupwo ne ni ceni*. O *éjén ni pipwojunuun he miiden* . Ésaïe 13.10; 34.4

³⁰«Ke é mulang, ke e o tuie a inenaado ne jedi he miiden, ko a bwo tuie tong, woéo pa Nahi Apulie. Ke lé o haa ko ni bwo mwotilé ati ne ni bele pwo a bwohemwo, be lé aliéo, he é âbé pwo ni nii, ne ha ati a junuung me a bwo ubwo jo.

³¹Ke me e cuu a tutu na ubwo [wo pa céu *âcélo] ke é o pawiebé ni âcélo tong, beme lé neibu nina é caa pipégalilé. Ke lé o taineibulé ne ha a céu behi amu, die ha a céu behin, pitihia bwohemwo.»

A inenaado ko a éé majing

³²«Wâé heme geé temehi a inenaado ko a majing. Be, me e tile, ke geé caa temehi pie, caa é mwonus a cim naado.

³³«Wonaa mwo, heme geé alahi ati ni naado naa, ke geé o temehi pie, o caa pacuwoshi ati.

³⁴É pii tewé a juuju pie: [Time o uce bwolihi.] Be lé o mwo te alahi anaa ne ni béé apulie jenaa, ânebuhe ace bwo mele telé.

³⁵Be o tieden a miiden me a bwohemwo, kehe o time uce tieden a pwooti tong.»

Geé tee ûmiê!

³⁶«Te tice pace apulie celi e temehi ace tan me ace inetéale celi e o tuie hen ni naado naa. Te tice paceli e temehi, heme woéo pa Naîn, heme ni âcélo te Padué. Kehe te wo Caa cehi na e temehi.

³⁷«A tan na é bo âbé hen, woéo pa Nahi Apulie, ke o pwohewii a benaamwon de Noé.

³⁸⁻³⁹Be lé teko wiinaado me ûdu ne ni apulie; ke lé piaten, ke lé ne ni naîlé toomwo me lé aten. Ke te tice aceli lé temehi dieli ha a tan na e taa ha ali ong wo Noé. Ke e te âbé kuti ali jaa, ke e tai péélé ati. «Ke o te piwien mwo me a bwo âmwobé tong, woéo pa Nahi Apulie.

⁴⁰Be é ha a tan naa, ke lupwo apulie na lu mu ha apwoamu, ke o pé pace céu, ke o ne pa céu.

⁴¹Ke alo lu toomwo na lu ko cemeii *blé* ibu, ke o pé ê céu, ke o ne ê céu.

⁴²Wâé heme geé tee ûmiê, be time geé uce temehi ace benaamwon celi e o tuie mwobé hen wo Padaame hewé!

⁴³Geé cuwoteeke niimihi ani: Wo pa eapwihi pwomwo, ke time e uce temehi ace inetéale celi e o taa ha a mwa ten wo pa abune na e âbé he bwén. Be hemepie e teko wéa, ke me time e o uce neeng me e taa pelen.

⁴⁴Weengaa kuti ana é pii tewé pie: Geé te piwâam. Be é o bo âbé, woéo pa Nahi Apulie, kehe time geé uce temehi ace benaamwon.»

Pa eabwé na e piténedehi

⁴⁵«He wooélé pa eabwé na e piténedehi, ke e pipwoipieng? Wo pana e pii ten wo pa daame hen pie: “É ne tem a penem [na pwonaado kon]: Go ne ce wiinaado te lépwo apenem dong he ce benaamwon celi wâé.”

⁴⁶«Ke o te nihe wâé ne ko pa eabwé naa, hemepie e tuiebé wo pa daame, hemepie e teko penem ehi!»

⁴⁷É pii tewé a juuju pie: E o ne ten a pihuô ati ne ko ni den.

⁴⁸Kehe icehi ana wieli pa apulie ta wo pa apenem naa, ke wieli e piniihi pie: ‘O bwoli pa caa tong me e âmwobé.’

⁴⁹Ke e ahi lèpwo béeén ko penem. Ke e te nihe wiinaado me ûdu me lèpwo apiolo.

⁵⁰Ke e o bo âmwobé wo pa caa ten ha a tan na time e uce ucéieng, ke é ha a inetéale na time e uce temehi.

⁵¹Ke e bo ne a cuhinaado na junihe ubwo te pa apenem naa, woélé me lèpwo béeé apenem na ta jélé, ke lé o é ke piwii pecuwo.»

Mataio 25

Ni ewa toomwo na 10 jélé

¹[E pii mwo wo lésu pie]: «A *Mwametau he Miiden, ke pwohewii ani: «Lé bwo mu ne ni ewa toomwo na 10 jélé. Ke lé bwo pé ni mwomiû helé, beme lé â ucéi pa apiaten.

²Nim léna lé piténedehi, ke nim léna lé pilééng.

³⁻⁴«Léli ewa toomwo li lé piténedehi, ke lé âbé imi ni mwomiû helé, ne pehi ni tabe hen. Kehe wo léli ewa toomwo li lé pilééng, ke lé âbé imi ni mwomiû helé, kehe icehi ana tice tabe hen.

⁵«[Ke caa bwén] ke time e uce epin ko âbé wo pali apiaten. Ke caa nime léli ewa toomwo me lé pule, ke lé pule.

⁶«É ha awieme bwén, ke lé téne a pwocihe na e pii pie: “Neko pa apiaten! Geé wie me nye â beniieng.”

⁷«Ke lé tai ûmiê wo léli ewa toomwo, ke lé pwopweehi li mwomiû helé.

⁸Ke lé pii te léli apiténédehi wo léli ewa toomwo apilééng pie: “Au! Caa tice tabe he ni mwomiû heme! Geé ne ce tabe he ni mwomiû heme ko ni nehi tabe tewé.”

⁹«Ke lé hegi ne telé pie: “Ûhu! Caa time uce jan. Kehe geé â pele ni a-icu me geé pwocuhi ce tabe he miû tewé.”

¹⁰«Kehe icehi ana me lé mwo ko engen, ke e tuiebé wo pali apiaten. Ke wo léli ewa toomwo li lé caa te piwâam, ke lé caa tai taa me pali apiaten ha ali mwopiaten. Ke e capuhi a pomwa.

¹¹«Mepwo é ne ko léli ewa toomwo apilééng, ke lé bwo tehenebé, ke lé toii pie: “Pa daame, pa daame, tehi a pomwa!”

¹²«Kehe icehi ana e hegi ne telé wo pali apiaten pie: “[Geé engen kojaéo] be time é uce temehikewé.”»

¹³[Ke e panebwénihi a ocine naa wo lésu, ke e pii pie]: «Geé ûmiê, be time geé uce temehi ace tan me ace inetéale [celi é o tehenebé hen].»

Ocine ko lépwo eabwé na cié jélé

Luka 19.11-27

¹⁴[E pii mwo wo lésu pie]: «A Mwametau he Miiden, ke pwohewii ani: «E bwo mu wo pa céiu apulie. Ke nimen me e â pitabée, ke e tote ni eabwé ten, ke e pawie ne telé ni naamuun.

¹⁵«Ke e muko pétaapwo ne telé nina jan me lé pwo. E ne te pa céiu nina *5 million*, ke wo pa céiu ke *2 million*, ke wo pa béciéhen ke *1 million*, ke e engen.

¹⁶Ke e engen wo pa eabwé na e hegi nina *5 million*, ke e â penem ko ni mwani naa, ke e tooli mwo nina *5 million*.

¹⁷Ke wonaa ne mwo ko pana e ne ten nina *2 million*, ke e te hane béén mwo, ke e tooli mwo nina *2 million*.

¹⁸Ke mepwo wo pali e ne ten ana *1 million*, ke e â ini a pwon, ke e neduwohi ali mwani te pali caa ten, [ke time e uce penem kon].»

Wogo pa eabwé na wâé go!

¹⁹«Caa bwolihi a bwo engen de pali daame, ke e mwojuia mwobé. Ke e tote lépwoli eabwé ten, ke e tahimwolé ko aceli lé pwo ko li mwani ten.

²⁰«Ke e hegi ne ten wo pali eabwé li e ne ten li *5 million* pie: “Padaame, li go ne tong li *5 million*. Ke weengi nina *5 million* mwo, ni âpenem dong beme ni béén.”

²¹«Ke e pii ten wo pali daame pie: “Wâé! Wogo pa eabwé na wâé go. Be go piténédehi ne he ni naado na wahin, ke é bo ne tem ce naado celi ubwo. Ke go taabé me genyu pipwodéén ibu.”

²²«Ke e âbé wo pali báalohe eabwé, ke e pii te pali daame hen pie: “Pa daame, weengi li *2 million* li go ne tong. Ke weengi nina *2 million* mwo, ni âpenem dong beme ni béén.”

²³«Ke e pii ten wo pali daame pie: “Wâé! Wogo mwo pa eabwé na wâé go, be go piténédehi ne ko a naado na wahin, ke é bo ne tem ce naado celi ubwo. Kehe go taabé me genyu pipwodéén ibu.”»

Wogo pa eabwé na ta go!

²⁴«Ke e âbé wo pa béciéhen, ke e pii ten pie: “Pa daame, é caa temehi pie, wogo, ke pa apulie na go okéé, be go tii ni âdaanu na time go uce cemi, ke go taineibuhi nina time go uce penem kon.

²⁵Ke mwotiéo, ke é neduwohi ni mwani tem, [be koli é o patieden]. Ke weengi, ke go te pé mwo.”

²⁶«Ke e hegi ne ten wo pali daame hen pie: “Wogo ke pa eabwé na ta go, be pa apwoemaan! Woté? Go caa te temehi pie, é tii nina time é uce cemi, ke é taineibuhi nina time é uce penem kon.

²⁷É mu ko ade na time go uce ne ha a mwomwani a mwani tong?! Be, mepie go wonaa, ke wiel me é céi ne pehi celi e taa ne pwon!”

²⁸«Ke e pii te lépwo bée eabwé ten pie: “Geé pé kojaeng a 1 million na eten, ke geé ne te pana hiwon ni mwani ten!

²⁹Be wo pana caa pwo ne ten, ke o ne mwo pwon ce béén, beme pihiwon den. Kehe wo pana tice ten, ke o pétaabwon kojaeng a nehinaado na mwo e pelen.

³⁰Ke wo pa eabwé piticenaado ne kon naa, ke o tahieng ole ha a melepiing, he na lé o é nelang, ke piwii pecuwo.”»

O pineitééhi ni muto me ni nani

³¹[E pii mwo wo lésu pie]: «É heme é âmwobé, woéo pa Nahi Apulie, ne ha a junuung me *a wâé tong, woéo me ni *âcélo tong, ke é o tebwo pwo atebwo tong he daame.

³²«Ke é o taineibuhi ne he pwahamiin ati ni bele. Ke é bo pineité ni apulie, pwohewii pa awéihi muto heme e pineitééhi ni muto me ni nani.

³³Ke é o bo ne ni muto pwo juing. Ke ni nani, ke é bo nelé pwo eaamung.»

Adéihi be geé hegíeo!

³⁴«Ke, woéo pa daame, ke é bo pii te nina lé mu pwo juing pie: “Geé âbé, wogewé na e adéikewé wo Caa tong, me geé hegi a Mwametau na e caa pipwopweehi me dewé, ânebuhe atabuhi ko a bwohemwo.

³⁵É mu ko ana, he li menung, ke geé pwo me é wiinaado, ke é he nimung me é ûdu, ke geé pwo me é ûdu, ke he é mwo coho, ke geé hegíeo.

³⁶Ke é he tice naamuung, ke geé ne ni naamuung. Ke é he li cunu jo, ke geé âbé caniêeo. Ke é he li é mu he karépu, ke geé âbé die pelong.”

³⁷«Ke lé o hegi ne tong nina mwomwon jélé pie: “Pa daame, he éniile celi geme aliko he celi menem, ke geme pwo me go wiinaado? Ke éniile celi nimem me go ûdu, ke geme pwo me go ûdu?

³⁸Ke éniile celi go mwo coho, ke geme hegíko? Ke éniile celi tice naamuum, ke geme ne ce naamuum?

³⁹Ke éniile celi cunu go, ke geme caniêko? Ke go mu he karépu, ke geme âdé die pelem? [He éniile naa?]”

⁴⁰«Ke e hegi ne telé pie: “É pii tewé a juuju pie: É ati he ni benaamwon na geé pwo ninnaa ne te lépwo âjiénung na wahin jélé, ke woéo pana geé ko pwo tong.”»

Geé engen, be time geé uce hegíeo!

⁴¹«Ke é bo pii te nina lé mu pwo eaamung pie: “Geé engen kojaéo, be e apwokewé wo Padué! Geé â ha a miû na e te éle dieli mwo, na e caa pipwopweehi wo Padué, me de *Caatana me ni duéé ten.

⁴²Be é he li menung, ke time geé uce pwo me é wiinaado. Ke é he nimung me é ûdu, ke time geé uce pwo me é ûdu.

⁴³Ke é he li é coho, ke time geé uce hegéo. Ke é he li tice naamuung, ke time geé uce ne ce epwénung. Ke é he li cunu jo, ke time geé uce caniééo. Ke é he li é mu he karépu, ke time geé uce âbé die pelong.”

⁴⁴«Ke lé o hegi ne tong pie: “Pa daame, he éniile celi geme aliko, he celi menem, ke nimem me go ûdu, ke go coho, ke tice naamuum, ke cunu go, ke go mu he karépu? Ke time geme uce picani tem? [He éniile naa?]”

⁴⁵«Ke é o hegi ne telé pie: “É pii tewé a juuju pie: Ati he ni benaamwon na muhi tewé me geé picani te ni âjiénung na wahin jélé, ke woéo pana time uce nimewé me geé picani tong.”

⁴⁶«Ke lé bo engen, me lé hegi a cuhinaado dieli mwo. Ke mepwo nina lé piténede Padué, ke lé bo engen me lé hegi a *mulie dieli mwo ne pele Padué.»

Mataio 26

Lé hane me lé taunu lésu

Maréko 14.1–2; Luka 22.1–2; Ioane 11.45–53

¹É he e nebwén ko pwocémun ko ninaa wo lésu, ke e pii te lépwo acémun den pie:

²«Lépwoli, geé temehi pie é he na alo tan, ke caa a tan ko Pacika. Ke o icuéo, ke cemeiteéo ne ko a *kuricé, woéo pa Nahi Apulie.»

³[He e ko pii anaa wo lésu] ke lé ko pitapitilé wo lépwo caa te lépwo *apwoâpwailo, me lépwo apihuô te lépwo *Juif, ne pele Kaïfe, pa daame helé.

⁴Be nimelé me lé taunu lésu. Ke lé pihane ace bwopwonen me lé pipwohuô ten, me lé imwieng neduwohi.

⁵Be lé pipii telé pie: «O time uce wâé heme nye imwieng ha a piwiinaado ubwo ne he pwahamii ni apulie, be koli lé bo okéé.»

Tapulicéihi tabe ûde ne ko lésu

Maréko 14.3–9; {Luka 7.36–50}; Ioane 12.1–8

⁶[É ha a benaamwon naa, ke] e mu Bétani wo lésu ha a mwa te Simon, pa katia.

⁷É he lé mwo ko wiinaado, ke e tuiebé ê céiu toomwo, imi a mwotabe péi na oba ko tabe ûde na te junihe ubwo a cuhin, ke e cepulicéihi ne pwo puni lésu.

⁸Ke me lé alieng wo lépwo acémun den, ke te junihe time uce wâé telé. Ke lé pipii telé pie: «He e pihoonihi a tabe ûde ne, kona woté?»

⁹Ana te junihe ubwo a cuhin! É ko ade na time e uce icuhi, ke me genye ne a mwani te nina tice delé?»

¹⁰E te temehi nina lé niimihi wo lésu, ke e pii telé pie: «É mu ko ade na geé ili ê toomwo ce? Ana e pwo tong, ke te junihe wâé.

11Be o tee élé pelewé wo lépwona tice delé, kehe woéo, ke time é o uce tee mu pelewé.

12Wo ênaa, ke e tapulicéhi ne kong a tabe ûde, be e caa mi pipwopweehi a bwo ole tong he pwon.

13Ke é pii tewé a juuju pie: É heme bo pipii beetih a Pwoot Wâé ne he ni piduaan ati ne pwo a bwohemwo, ke lé bo tee piuti mwo a jepule ko ana e pwo ê toomwo ce, beme tee pipaniimieng.»

E icu lésu wo Judas

Maréko 14.10–11; Luka 22.3–6

14E â too ni caa te lépwo apwoâpwailo wo pa céiu béé lépwo **12** *apostolo na a niin pie Judas Iscariot.

15Ke e pii telé pie: «Ade aceli geé bo ne tong, hemepie é ne lésu tewé?» Ke lé ne ten nina 30 mwani péi.

16Ke e tabuhi pihane ace pwaaden me e icu lésu telé.

A piwiinaado te Padaame

Maréko 14.12–42; Luka 22.7–46; Ioane 13.21–38; 1 Korénit 11.23–25

17É ha a bécéiuhe tan ko ‘pieni pwoloa tice nyaa ten’, ke lé âbé céii lésu wo lépwo acémun den, ke lé pii ten pie: «Geme o â piwâam ko a wiinaado ko Pacika. Kona é wé, he celi nimem me genye piwiinaado nelang?»

18Ke e hegi ne telé pie: «Geé â ha a pwomwo ubwo, pele pa apulie [na é bo piieng dewé] ke geé pii ten pie: “E pii wo Padaame pie: ‘Caa tuie a benaamwon dong. Ke é pelem he na me é wii a wiinaado ko Pacika, wogeme me ni acémun dong.’”»

19Ke lé pwo ana e pii wo lésu, ke lé piwâamihi a wiinaado ko Pacika.

Pwo pa béewé na e bo pi-icuéo

20Caa babwén, ke lé tebwo pwo taap wo lésu me lépwo **12** apostolo ten.

21Ke é he lé ko wiinaado, ke e pii telé pie: «É pii tewé a juuju pie: E bo pi-icuéo wo pa béewé.»

22Ke te junihe piwahin jélé kuti, ke lé muko pétaapwo tahimwoeng pie: «Padaame, he time uce woéo?»

23Ke e hegi ne telé wo lésu pie: «Wo pana gemu tai pétaa ole ha a tam me weeng, ke weeng pana e bo pi-icuéo.

24«É bo mele, woéo pa Nahi Apulie, pwohewii ana e caa pii beetih a ne ni tii iitihi. Kehe wo pa apulie na e pi-icuéo, ke o te junihe pwoééhen! Au, mwolihi! Be wo panaa, ke wieli me o te wâé ne kon, hemepie time e uce ko âbeeble!»

25Ke e tahimwo lésu wo Judas, pana e icueng, pie: «Kona time uce woéo, go Padaame?» Ke e hegi ne ten wo lésu pie: «Go caa teko pii.»

A pwoloa me a tabe megele

²⁶ É he lé ko piwiinaado ibu, ke e pé a pwoloa wo lésu, ke e pipwo-olé te Padué. Ke e ebii, ke e pwopatihi ne ko l épwo acémun den, ke e pii telé pie: «Geé pé, ke geé eni, be ani, ke a ééng.»

²⁷ Ke é alechen, ke e pé a mwoûdu ko tabe megele. Ke e pwo-olé te Padué, ke e ne telé. Ke e pii pie: «Geé tai ûdu.

²⁸ Be ani, ke a cewéhung na e o caa téé me de ni apulie, beme pineuhi ni ta pwo telé. Be a pipwoâpwailo na e pacuwoshi a *piapwo na e pwo wo Padué [pie e ne a péém ne ha awiemelé me weeng].

²⁹ «Ke é pii tewé pie: O caa time é bo uce ûdu mwo ace tabe megele [ne éni pwo bwohemwo] dieli ha ace tan celi genye bo ûdu ace tabe megele celi mwo coho me wogewé, ne ha a Mwametau te Caa tong.»

Go bo piwotétaa kong, go Pétéruru

³⁰ Ke lé nyebihi a psaume ko a tan ubwo naa, ke é mulang, ke lé taa pwo a juwole ko ni Olivier.

³¹ Ke e pii wo lésu te l épwo acémun den pie: «É jenaa he bwén, ke geé o bo tai engen kojaéo. Be caa te tii ne he ni tii iitihi pie: O bo taunu pa awéihi muto, ke lé o pipiiden ne ni muto. *Zakari 13.7*

³² «Kehe icehi ana é hemepie é mulie cemwo mu ha amele, ke é bo ânebuhewé ne Galilé.»

³³ Ke e pii ten wo Pétéruru pie: «Wieli lé o engen kojako wo l épwoje, kehe time o uce woéo!»

³⁴ Ke e hegi ne ten wo lésu pie: «É pii tem a juuju pie: É ha a bwén jenaa, ânebuhe a bwo to te a ja, ke o caa ocié go ko piwotétaa kong pie, time go uce temehiéo.»

³⁵ Ke e pii wo Pétéruru pie: «Ûhu! Piwien hemepie genyu tai mele, kehe time é o uce wotétaa kom!» Ke tai woélé ati, ke lé te tai pii ten ana céiu.

Te junihe téé lésu

³⁶ Ke é mulang, ke lé â ha a céiu duaan [na cemi acuwo hen] na pii kon pie Getsémané. Ke e pii te l épwo acémun den wo lésu pie: «Geé tebwo éni, be é mwo â pwoiitihi.»

³⁷ Ke e pé Pétéruru me lupwo naî Zébédé. Ke caa tabuhi piwahin lésu, ke pinekepé ten.

³⁸ Ke e pii telé pie: «Te junihe téé ke piwahin a pwonimung. Kehe geé tee mu éni, ke genye tai piûmiê ibu. [Geé nemwo pule!]»

³⁹ Ke e te ju piâdé kojalé, ke e tidih jilin, ke e miibule. Ke e pwoiitihi da céii Padué, ke e pii pie: «Caa, hemepie te jan, ke go pé kojaéo ni picani me ni téé ce! Kehe icehi ana go nemwo pwo ana nimung kon, kehe ana nimem kon.»

40Ke me e mwojuia mwobé céii lépwo acémun den na cié jélé, ke e alihí pie lé teko pule. Ke e pii te Pétérú pie: «Be he time uce jan me nye piúmiê ibu, he na te ju céiu inetéale?

41«Geé te ûmiê, ke geé pwoiitihi, beme o te pwo niihewé, hemepie tacebwénikewé. Be nimewé me geé pwo ana wâé, kehe icehi ana tice niihewé.»

42Ke e engemwo kojalé wo lésu, ke e pwoiitihi mwo, ke e pii pie: «Caa wé, mepie time uce jan me pé kojaéo ni picani me ni téé ce, ke é ilehi kojako pie, go picani tong, beme é piténedehi ana te nimem kon.»

43Ke me e mwojuia mwobé céii lépwo acémun den, ke e toolé mwo he lé teko pule. Be caa te junihe emaan jélé, ke lé tee ko pipucing.

44Ke e engemwo kojalé, ke e âmwo pwoiitihi, ke e te pii mwo ana e caa mi pii.

45Ke me e mwojuia mwobé céilé, ke e toolé mwo he lé teko pule, ke e pii telé pie: «Woté? Geé mwo teko mwaale, ke pule mwo? Wâé ne kowé! Kehe icehi ana o caa neéo, woéo pa Nahi Apulie, ne te lépwona lé pwo nina ta!

46Geé cuwoda! Me nye engen! Be caa e lang wo pana e icuéo!»

Lé imwi lésu

Maréko 14.43–50; Luka 22.47–53; Ioane 18.3–12

47É he e mwo ko pii anaa wo lésu, ke e te ju tehenebé wo Judas, pali céiu bée lépwoli 12 apostolo ten. Ke lé âbé céin ne ni apulie na te junihe hiwon jélé, imi ni teua me ni ba-acuwo. Be lé nelé ngen wo lépwo caa te lépwo apwoâpwailo, me ni apihuô te a bele te lépwo Juif.

48Ke wo Judas, pana e icu lésu, ke e caa pipatemehi telé ana me e pwo: «Wo pa apulie na é o mwomwaaueng, ke te weeng kuti. Ke geé imwieng.»

49Ke he lé tehenebé, ke e te â céii lésu kuti, ke e pii ten pie: «Bwocu tem, go pa apipune!» Ke e mwomwaaueng.

50Ke e pii ten wo lésu pie: «Îgo, go pwo ana me go pwo.» Ke lé te imwi lésu kuti.

51Kehe icehi ana wo pa apulie na e mu pele lésu, ke e te pwome céi kuti a teua ten mu ha a mwon, ke e te tahi kuti ole pwo a puni pa apenem de pa *daame he lépwo apwoâpwailo. Kehe icehi ana e te ju tahagéi a jéené.

52Ke e pii ten wo lésu pie: «Go ne homwo a teua tem ne ha a mwon! Be wo lépwona lé pwopa ko teua, ke lé o te mele ko teua.

53«Go téne, hemepie nimung, ke é o tote Caa tong, beme e nebé céiiéo a céiu mwocoda ko ni *âcélo na te junihe hiwon jélé, beme lé pwopaing!

54Kehe me wonaa, ke wieli me time e o uce pacuwohi ana e pii ne he ni tii iitihi! Be e pii pie, ke o wonaa a bwo engen ne ni naado.»

55 Ke e pii te lépwona lé imwieng, pie: «Woté? Geé âbé pééo ko teua me beba-acuwo, pwohewiin heme woéo pace ataunuhi apulie! Ati he ni tan, ke é te mu hadeniiwé, he é teko pacémuni ni apulie ne ha a *mwaiitihi, kehe icehi ana time geé uce imwiéo!

56 «Kehe ati ninaa, ke e tai pacuwoshi a pwootti na lé pii wo lépwo péroféta ne he ni tii iitihi.» Ke ati lépwo acémun den, ke lé cepewieeng, ke lé cela.

A mwohuô te lépwo Juif

Maréko 14.53–65; Luka 22.54–71; Ioane 18.13–24

57 Lé pé lésu nge céii Kaïfe, pa daame he lépwo apwoâpwailo. Be lé pitapitilé ne pelen wo lépwo *dotéén ko patén me lépwo apihuô te lépwo Juif.

58 Ke e pi-ilipuwolé ngen wo Pétér. Ke e tuie nge pele pa daame he lépwo apwoâpwailo, ke e tebwo pwo napwomwo, ne pele ni apenem, ni awéa. Be nimen me e alihí aceli e o tuie ne ko lésu.

59 Wo lépwo caa te lépwo apwoâpwailo, me ati a *mwohuô te lépwo Juif, ke lé hane ce apulie beme lé pipé ne ko lésu, be nimelé me lé pwocuhinaado ten, me e mele.

60 Ke hiwon ni agele na lé âbé pipé ne ko lésu, kehe icehi ana time lé uce tooli ace ju watihen me lé taunueng. Ke é he caa e mwonu me nebwén a pitautinaado telé, ke lu tehenebé wo lupwo alo apulie.

61 Ke lu pii pie: «E pipii den wo panaa pie, me e bo paniihi a mwaiitihi te Padué, ke me e bo pacuuli mwo, he na cié ni tan.»

62 Ke e te cuwoda kuti wo pa daame he lépwo apwoâpwailo, ke e tahimwo lésu pie: «Kona te tice béhegi nen dem? He time go uce téne nina lé ko pipé ne kom?»

63 Kehe icehi ana time e uce hegi wo lésu. Ke e te tahimwoeng mwo wo pali daame pie: «É ne he nii Padué na e mulip, ke é ileko pie, go hegi. Kona te wogo kuti, pa *Mesia, pa *Naî Padué?»

64 Ke e hegi ne ten wo lésu pie: «Go caa teko pii. Ke é pii tewé pie: Tabuhi jenaa ni, ke geé bo aliéo, woéo pa Nahi Apulie, heme é tebwo *pwo a jui Padué na te junihe pwojunuun [beme é pihuôhi ati ni naado]. Ke geé bo aliéo, heme é âbé he ni nii, mu he miiden.»

Wâé heme e mele!

65 [Ke te junihe emegéi na pali daame he lépwo apwoâpwailo, ke e te nihe okéé] ke e pitie ni epwénen, ke e pii te ni bée atautinaado pie: «E cihe me ta ne ko Padué [be e pwo me piwielu me weeng]! Caa jan! Necu ce bée bwo pipé ne kon, be e caa teko pipé ne kon mwo! Be geé caa te téne ana e pii.

66 Ke ade aceli geé niimihi ne kon?» Ke lé tai hegi ne ten ati pie: «Wâé heme e mele.»

⁶⁷ Ke lé cumi ne he pwahamiin, ke lé nuô i kon. Ke lé tahi pale ni ilé ne kon wo lépwo béén,

⁶⁸ ke lé pii ten pie: «He woo na e ahiko? Go cuwoteeke pihane, go ‘Mesia’, hemepie wogo ke pace péroféta [celi go temehi ati ce naado]!»

E piwotétaa ko lésu wo Pétérú

Maréko 14.66–72; Luka 22.56–62; Ioane 18.16–27

⁶⁹ Mepwo wo Pétérú, ke e tee tebwo jeoté pwomwo. Ke e âbé céiieng wo ê céiu eabwé, ke e pii ten pie: «Éé, wogo, ke pa céiu bée lésu, mu Galilé!»

⁷⁰ Ke e wotétaa ne he pwahamii ni apulie, ke e pii pie: «Ôhu! Time é uce temehi ana go ko pii!»

⁷¹ Ke e te â wie kuti ha a pwobabé. Ke e alieneng wo ê céiu toomwo na e penem lang, ke e pii te nina lé mu lang pie: «Uhuu, wo paje, ke pa bée lésu mu Nazaret!»

⁷² Ke e pii mwo wo Pétérú pie: «Ôhu! É piapwo pie time é uce temehieng!»

⁷³ É alechen, ke nina lé mu lang, ke lé âbé céii Pétérú ke lé pii ten pie: «Uhuu! Wogo ke pa céiu acémun den! Be nye téne ne he patim.»

⁷⁴ Ke e te junihe pimwoiu wo Pétérú, ke e pii pie: «Geé téne! Time é uce temehi panaa. Wâé heme e pwocuhinaado tong wo Padué, hemepie é gele!» Ke me e mwo ko pii anaa, ke e te to kuti ali ja.

⁷⁵ Ke e bwo niimihi ali e pii ten wo lésu, pie: «Ânebuhe a bwo to te a ja, ke go ocié ko piwotétaa pie, time go uce temehiéo.» Ke e wie wo Pétérú ke e te junihe é kuti.

Mataio 27

Lé pé lésu nge pele Pilate

Maréko 15.1; Luka 22.66–71

¹ É he mwo te junihe acaama, ke lé pitapitilé neibu wo lépwo caa te lépwo *apwoâpwailo, me lépwo apihuô te a bele te lépwo *Juif. Ke lé piténelé ko ace bwo taunu lésu.

² Ke lé cieeng, ke lé pééeng nge céii *Pilate, pa gupéno te lépwo Roma.

A bwo mele te Judas

Apostolo 1.18–19

³ Mepwo wo Judas, pali e icu lésu, ke e alihí pie, lé o caa taunueng. Ke e bwo pininim ne ko ana e pwo te lésu, ke te junihe piwahin nang kon. Ke e mwojuia ngemwo pele lépwo caa te lépwo apwoâpwailo, me lépwo apihuô. Ke e ne mwo telé li 30 mwani péi li lé ne ten.

⁴ Ke e pii telé pie: «Au, é pwo ana ta. Be é icu pa céiu apulie na te tice ta pwo ten, me e mele.» Ke lé hegi ne ten pie: «Te tice aceli geme alihí ne kon!»

⁵ Ke e tahi nge céilé ne ha a *mwaiitihi li mwani. Ke e â piwogéi henen.

⁶Ke lé tai li mwani wo lépwo caa te lépwo apwoâpwailo, ke lé pii pie: «Ade aceli genye o pwo ko ni mwani ce? Genye nemwo ne pehi ni âpipati ko mawaiithi, be ni mwani cuhi cewéle.»

⁷Ke lé piténelé pie, me lé pwocuhi a pule na a niin pie ‘a pule te pa apwo ila pule’ beme a iitihi te ni coho.

⁸É mu ko anaa, na ni apulie, ke lé pii ko a duaan naa pie, ‘a ninaado na pwo cewéle hen’. Ke lé mwo tekó pii kon dieli jenaa.

⁹Ati ninaa, ke e tuie, beme e pacuwoshi [li ocine] li e pwo wo péroféta lérémia, ne he ni tii ten: Lé pé li 30 mwani péi, wonaa a jéhin na lé niimihi na a bele *Isaraéla me lé pwocuhin me den.

¹⁰Ke lé pwocuhi ali pule te pali apwo ila pule. Be weengaa ana te nime Padaame kon.

E tauti lésu wo Pilate

Maréko 15.2–20; Luka 23.1–25; Ioane 18.28—19.16

¹¹Lé pé lésu nge he pwahamii Pilate, pa gupéno te lépwo Roma. Ke e tahimwoeng wo Pilate pie: «Kona te wogo kuti pa daame he lépwo Juif?» Ke e hegi ne ten wo lésu pie: «A juuju a bwopiinen dem.»

¹²Ke nebwén, ke lé pipé ne kon wo lépwo caa te lépwo apwoâpwailo, me lépwo apihuô te a bele. Kehe time e uce hegillé.

¹³Ke e te pwo me pii ten wo Pilate pie: «Kona time go uce téne nina ta na lé pii ne kon?»

¹⁴Kehe icehi ana time e uce hegi ne telé wo lésu. Ke e te junihe téele kon wo Pilate.

Nimelé ko Barabas

¹⁵Caa te cemang ne ko Pilate, ha a tan ko *Pacika, me e pawie mu he karépu pace céiu apulie celi nime a bele kon.

¹⁶Ke é ha a jo naa, ke pwo pa céiu apwokarépu na pii kon pie Barabas, na lé te junihe temehieng ne ni apulie.

¹⁷Ke [hiwon ni apulie na] lé tehenebé pele Pilate, ke e pii telé pie: «Kona nimewé me é pawie Barabas, ai wo lésu, na pii kon pie ‘pa *Mesia’?»

¹⁸Be e te temehi pie, lé ne lésu ten wo lépwo caa te lépwo apwoâpwailo ha a pipwokon delé.

¹⁹Ke nebwén, ke e tebwo pwo atebwo ten, beme e tauti lésu. Ke é ha a benaamwon naa, ke e tehenebé wo pa céiu apulie na e pébé céiieng a pwooti te mwoden. Be e pii pie: «É tibwén, ke pwo a niûng ne ko pa lésu naa, ke te junihe time wâé jo kon. Go patuwoeng, ke go nemwo ti kon, be pa apulie iitihi!»

²⁰⁻²¹Ke e pii mwo te lépwo apulie wo Pilate pie: «É bo patupwo ne tewé pace céiu apwokarépu. Ke he woo hadenii lupwoje, celi nimewé kon?» Ke lé hegi ne

ten pie: «Barabas!» Be lé cinelé wo lépwo caa te lépwo apwoâpwailo, me lépwo apihuô, beme lé pii anaa, ke me e mele wo lésu.

Cemeiteeng ne ko a kuricé!

²²Ke e pii telé wo Pilate pie: «Ke he ade aceli é o pwo te lésu, pana pii kon pie ‘Mesia’?» Ke lé hegi ne ten pie: «Pwo me cemeiteeng ne ko a *kuricé!»

²³Ke e tahimwolé mwo pie: «Kona ade aceli e pwo celi ta?» Kehe icehi ana lé bwo nihe cihe me ubwo pie: «Pwo me cemeiteeng ne ko a kuricé!»

²⁴Ke e alih wo Pilate pie time lé uce tabemieng, be caa junihe ubwo a bwo iluulé. Ke e pé a mwotabe, ke e puu ni in ne he pwahamiilé ati, ke e pii telé pie: «Time uce woéo pa watihe a bwo mele te pa apulie ce. Kehe te wogewé cehi!»

²⁵Ke lé tai hegi ne ten pie: «Éa, te wogeme lépwo watihen, wogeme me ni naîme! Ke hemepie geme pwo aceli ta, ke wâé heme geme te hegi a cuhinaado ko a bwo mele ten.»

²⁶Ke e pawie ne telé Barabas wo Pilate. Ke e pwo me ahi lésu ko a bwaliwota. Ke e patupwoeng ne te ni coda, beme lé â cemeiteeng ne ko a kuricé.

Lé pihoonieng ne ni coda

²⁷Ke lé pé wie lésu wo lépwo coda, ke lé â pwo a céiu napwomwo na ubwo. Ke lé tote ati ni mwocoda.

²⁸Ke lé céi ni epwénen, ke lé ne kon a epwén na megele [pwohewii a epwéne pa apulie na piubwo nang] beme lé pihoonieng.

²⁹Ke lé péi a kuron ko ni mii acuwo na pwo dan, ke lé neole pwo punin. Ke lé ne ha a in ne pwo jui a bewomeéle [pwohewii a bwaja pa daame]. Ke lé tidihi jililé he pwahamiin, ke lé pii ten pie: «Bwocu, go pa daame he lépwo Juif! Adéiko!»

³⁰Ke lé cumi ne kon, ke lé pé ali bewomeéle, ke lé tati a punin kon.

³¹Ke me lé caa nebwen ko a bwo pihoonieng, ke lé céi mu mwo kon ali epwén megele, ke lé te ne mwo kon ni epwénen. Ke é mulang, ke lé pééeng wie, beme lé â cemeiteeng ne ko a kuricé.

Lé cemeite lésu ne ko a kuricé

Maréko 15.21–32; Luka 23.26–43; Ioane 19.17–27

³²Me lé ko wie mu ha a pwomwo ubwo, ke pitapitilé me pa apulie mu ha a pwomwo ubwo Cirène na pii kon pie Simon. Ke lé cuwokon, beme e canihi ali kuricé te lésu.

³³Ke lé tuie nge pwo a céiu tihi juwole na pii kon pie Golgota, a bwopiinen pie ‘pwo a piipuni apulie’.

³⁴Ke wo lépwo béen, ke lé pineibuhi a tabe megele me a tabe na maga. Ke lé ne te lésu, ke me e nemi, ke time uce nimen me e ûdu.

³⁵ Nebwén, ke lé cemeiteeng ne ko ali kuricé wo l épwo coda. Ke lé pipii ne kolé ni epwénen. Ke lé picéi metii ne ko {a epwén bwali ten}.

³⁶ Ke lé tebwo beme lé wéa kon.

³⁷ Ke lé cemeite ne pwo punin a eaa acuwo na tii ne kon a watihe a bwo mele ten, pie: IÉSU PA DAAME HE LÉPWO JUIF.

³⁸ Ke lé cemeite mwo lupwo alo apulie na lu pwotahinaado, ne he ni piduaa lésu: wo pa céiu ne pwo juin, ke wo pa céiu ne pwo eaamun.

³⁹ Me lé alieneng wo l épwona lé âdé ke âbé ha a duaan naa, ke lé tagiliihi ni punilé, ke lé pijeta kon.

⁴⁰ Ke lé pii pie: «Kona time uce wogo kuti pana me go tanahi ali mwaiitihi, ke me go bo pacuuli mwo he na cié ni tan? Ke wâé, be mepie wogo pa *Naî Padué, ke go piceluimiko mwo, ke go opé mu ko a kuricé naa!»

⁴¹ Ke lé pihoonieng mwo wo l épwo caa te l épwo apwoâpwailo, me l épwo *dotéén ko patén me l épwo apihuô, ke lé pii pie:

⁴² «E niimihi pie pa daame henye, l épwo Isaraéla. Ke e temehi me e celuimi ni béen, kehe time e uce temehi me e piceluimieng mwo! Hemepie e ole mu ko a kuricé naa, ke wiel genye o bo céihi ne kon!

⁴³ «E céihi ne ko Padué, ke e pii pie, weeng, ke pa Naîn. Ke mepie eâname Padué ten, ke wâé hemepie e celuimieng jenaa!»

⁴⁴ Ke te piwien ne mwo ko lupwona lu pwotahinaado na cemeitelu ne he ni piduaa lésu. Be lu te pihoonieng mwo.

E mele wo lésu

Maréko 15.33–41; Luka 23.44–49; Ioane 19.28–30

⁴⁵ É he te ju goahen ehi, ke te ju melepiing ati ha amu, die ko cié inetéale alecehe goahen.

⁴⁶ Ke me tekó ju cié ni inetéale, ke e toii me ubwo wo lésu pie: «*Éli, Éli, lama sabaktani?*» A bwopiinen pie: «Padué hung, Padué hung, é mu ko ade na go pawiééo?»

⁴⁷ Ke me lé téneeng ne ni béen na lé mu lang, ke lé niimihi pie, e tote péroféta *Élia [beme e picani ten].

⁴⁸ Ke e te téte kuti wo pa céiu bélén, imi a mwaanu, ke e pate ha a tabe megele na maga. Ke e ne ko a ba-acuwo, ke e ne te lésu beme e ûdu.

⁴⁹ Kehe lé pii ten wo l épwo béen pie: «Go mwo cuwo lang, be wiel nyé o ali Élia, hemepie e âbé celuimieng!»

⁵⁰ Kehe icehi ana e cihe da me ubwo wo lésu, ke ele a nenehen.

Hiwon ni inenaado ko a bwo mele ten

51 Ke a mwaanu [na e capuhi bwonihi a duaan na junihe iitihi] ne ha a mwaiithi, ke te tie ne ha awiemen kuti, mu jed a die jeoté ko a baaéen. Ke penem a bwohemwo, ke buwo ni péi.

52 Ke te tehi kuti ni bwomu, ke lé mulie cemwo mu ha amele a hiwon ko apulie te Padué.

53 Ke é alechen, he e mulie cemwo mu ha amele wo lésu, ke lé wie mu he ni bwomu. Ke lé taa *lérusaléma, a pwomwo ubwo iitihi, ke lé pihabwiilé te ni apulie na hiwon jélé.

54 Wo l épwo coda roma na lé wéa ko lésu, me pa caa telé, ke lé téethi a bwo éjén na a bwohemwo, me ati nina e tuie. Ke te junihe ubwo kuti a bwo mwotilé, ke lé pii pie: «A juuju pie, wo pa apulie ce, ke pa Naï Padué!»

55 Hiwon ni toomwo na lé mu lang, na lé omehi mu ité. Woélé kuti na lé âcéi lésu mu Galilé beme lé picani ten.

56 É hadeniilé, ke e lang wo Maria mu Magdala, me Maria nyaa te Cang me José, me nyaa te lupwo naï Zébédé.

Neeng he iitihi

Maréko 15.42–47; Luka 23.50–56; Ioane 19.38–42

57 É he babwén, ke e tehenebé wo pa céiu apulie na pii kon pie Josef, pa apulie mu ha a mwopopwaalé Arimaté, pana te junihe pwo den. Weeng mwo, ke pa apulie na e mu te âmwo céi lésu.

58 Ke e â pele pa daame Pilate, ke e ilehi a éé lésu. Ke e pii te l épwo coda wo Pilate pie, me lé neeng den.

59 Ke e pé a éé lésu wo Josef, ke e tawii ko a mwaanu na mwo te ju wamin.

60 Ke e pééeng ngen, ke e neeng he iitihi na e mwo te ju pwo, a pwon na e ini ne ha a péi, beme te a den, weeng Josef. Ke nebwen, ke e papitibehi a pilehe péi, ke e capuhi bwonihi ali pwon. Ke e engen.

61 Ke wo Maria mu Magdala me ê céiu Maria, ke lu teko tebwo ânebuhe ali mwa péi.

Lé wéhi ali mwa péi

62 [Ati ninaa, ke lé pwo he paciile] a tan ânebuhe a *tan iitihi te l épwo Juif. [He paciile] ke lé mu piwâamihi a piwiinaado ko a tan iitihi. Ke é ha acaama hen, [é he capéto] a tan iitihi, ke lé pitaptilé ne pele Pilate wo l épwo caa te l épwo apwoâpwailo, me l épwo *Farasaio.

63 Ke lé pii ten pie: «Go te alahi, go pa daame, be wo pali ageti ni apulie li, wo lésu, ke li e mi pii ânebuhe a bwo mele ten, pie: “É ha a béciéhe ni tan aleche a bwo mele tong, ke é o mulie cemwo mu ha amele.”

64 «Kehe wâé heme go pii te ni coda pie, me lé wéhi ehi ali mwa péi he na cié ni tan. Be koli lé bo bune a één wo l épwo acémun den, ke lé bo pii te a bele pie,

e caa mulie cemwo mu ha amele. Ke mepie wonaa, ke a jepule gele naa, ke o te junihe ubwo kojan ânebun!»

⁶⁵Ke e pii telé wo Pilate pie: «Wâé. Woélé-ni ni bée coda. Ke hemepie nimewé, ke geé pwo me lé wéhi a mwa péi!»

⁶⁶Ke lé engen, ke lé â piwâamihi a bwo wéhi na ali mwa péi. Ke lé pwomangihî a péi bwonihî a pomwa hen. Ke lé ne li coda, beme lé wéhi.

Mataio 28

E mulie cemwo wo lésu

Maréko 16.1–10; Luka 24.1–12; Ioane 20.1–10

¹Caa nebwén a *tan iitihi te lépwo *Juif. Ke é he pwoiitihi, he mwo te ju acaama, ânebuhe a bwo taa tuie te a téale, ke lu engen me lu â he iitihi wo Maria mu Magdala me ê céiu Maria.

²Ke te penem kuti a bwohemwo. Be e ole mu he miiden wo pa céiu *âcélo te Padaame, ke e papitibehi ali pilehe péi mu ha a pwo ali mwa péi, ke e tebwo pwon.

³Te ju pwomelaan pwohewii a ilehi, ke te junihe pwojo a epwénen.

⁴Ke te junihe ele jene lépwo coda na lé wéhi ali mwa péi, ke éjén jélé ko a bwo mwotilé, ke lé tupwo pwohewii nina lé caa mele.

⁵Ke e pii te luli toomwo wo pali âcélo pie: «Geu nemwo pwo me mwotikeu. Be é te temehi pie geu hane lésu, pali lé cemeiteeng ne ko a *kuricé.

⁶Caa time uce e éni! Be e caa mulie cemwo mu ha amele, pwohewii ali e caa mi pii. Geu âbé me geu alihî ali duaan li lé neeng hen.

⁷Ke geu epin, me geu â pii te lépwo acémun den pie: «E caa mulie cemwo mu ha amele wo lésu, ke e mi â ânebuhewé ne Galilé. Ke geé bo alieng nelang.” Weengaa ana me é pii teu.»

⁸Ke lu engen he epin mu ha ali iitihi. Ke te pimwotilu, kehe icehi ana lu te junihe pipwodéén mwo. Ke lu téte nge pipatemehi a jepule ne te lépwo *acémun de lésu.

⁹Ke é nge he pwaaden, ke lu téeti lésu he pitapitilé. Ke e pii telu pie: «Bwocu teu!» Ke lu téte ne kon, ke lu imwi ni an, ke lu pipaunueng.

¹⁰Ke e pii telu pie: «Geu nemwo pwo me mwotikeu, kehe geu â pii te lépwoli bééng pie me lé â Galilé, be lé bo aliéo nelang.»

A jepule na lé uti wo lépwo coda

¹¹É he lu ko â he pwaaden wo luli toomwo, ke lé téte nge ha a pwomwo ubwo wo lépwo bée coda, li lé wéhi ali mwa péi. Ke lé too lépwo caa te lépwo *apwoâpwailo, ke lé piuti telé ati nina e tuie.

¹²Ke wo lépwonaa, ke lé tote ati ni béelé, me lépwo apihuô, beme lé pitapitilé, ke me lé picihe ko a jepule naa. Ke lé piniiimihi ibuhi pie, me lé ne ace mwani celi te junihe ubwo ne te lépwo coda.

¹³Ke lé pii telé pie: «Weengi ana me geé uti: Lé bune a één wo lépwo acémun den he geé mwo ko pule.

¹⁴Ke mepie e téne anaa wo gupéno pa daame hewé, ke bo wogeme na geme bo cihe ne kon, beme e o nemwo okéé ne kowé.»

¹⁵Ke lé pé ali mwani wo lépwo coda, ke lé pwo ana lé pii telé. É mu ko anaa, na lé mwo tee ko piuti wo lépwo Juif, dieli jenaa.

E pihabwiieng de ni acémun den

Maréko 16.14–18; Luka 24.36–49; Ioane 20.19–23; Apostolo 1.6–8

¹⁶Lé â ha amu Galilé wo lépwo ¹¹ acémun de lésu. Ke lé â pwo a juwole na e pii telé wo lésu pie me lé bo â lang.

¹⁷Ke e âbé benilé wo lésu, ke lé pipaunueng. Kehe icehi ana pwo ni béén na time lé uce mwomwohi pie weeng.

¹⁸Ke e âmwonulé wo lésu, ke e pii telé pie: «Wo Padué, ke e ne tong ati ni *pipwojunuun ne jeda he miiden, ke éni pwo bwohemwo.

¹⁹É mu ko anaa, na é pii tewé pie: Geé engen pitihî a bwohemwo. Ke geé pwo me lé céihî ne kong, beme lé âbé céing. Ke geé puulé ne he nii Caa, me pa Naîn, me a *Jenen litihî.

²⁰Ke geé pacémunilé, beme lé piténedehi ati ni pihuô na é caa ne tewé. Ke woéo, ke é o tee mu pelewé ati he ni tan, die ha a pwonehi a bwohemwo.»

Maréko

Maréko 1

Ioane pa apipuu apulie

Mataio 3.1–12; Luka 3.1–18; Ioane 1.19–28

1 E tabuhi ne éni a *Pwooti Wâé te lésu Kériso, pa *Naî Padué.

2 Be caa tii ne ha a tii te *péproféta Isaia a pwooti te Padué pie: É bo neole pa apipépwooti tong. E bo ânebuhem, me e pwopweehi a pwaadeniim. *Malachie 3.1*

3 Pwo pa apulie ha a da na e toii da pie: “E âbé wo Padaame! Pwopweehi a pwaadeniin! Pwo me belece a duaan na e engen hen!” *Ésaïe 40.3*

4 Wo *Ioane pa apipuu apulie, ke e tuie ne ha a da, ke e patemehi te ni apulie pie: «Geé pininim, ke geé bitekewé. Ke geé pwo me puukewé, beme geé habwii pie pitaatééhi ni mulihewé. Be me wonaa, ke e bo pineuhi ni ta pwo tewé wo Padué.»

5 Te junihe hiwon ni apulie na lé âbé céii loane ne ha a da mu *Judé, ke é ha a pwomwo ubwo *lérusaléma. Ke lé pii beetihi ni ta pwo telé, ne he pwahamii ni apulie ati. Ke e puulé ne ha a éémwa lоридано.

6 E cuwohe a epwén na pwo ko pumii *chameau*, ke a taihenan a iiwota. Ke e wii koléé, ke e ûdu duhimepu.

7 E toii pie: «Wo pana e bo âbé alecehung, ke te junihe pwojunuun kojaéo. Time uce jan ne kong me é ciiéo, ke me é tuwo ni tai ko ni dihibwaan.

8 Woéo, ke é puukewé ko a tabe, ke weeng, ke e bo puukewé ko a *Jenen litihī.»

Puu lésu ke tacebwénieng

E puu lésu wo loane

Mataio 3.13—4.11; Luka 3.21–22, 4.1–13

9 É ha a benaamwon naa, ke e tuiebé wo lésu mu Nazaret, a mwopopwaalé ne Galilé. Ke e puueng wo loane ne ha a éémwa lоридано.

10 Te ju é ha a benaamwon na e wie mu he tabe wo lésu, ke e alihi a miiden he tehi, ke e alihi a Jenen litihī he e opé ne huîin, pwohewii a meni pwojo.

11 Ke pwo a pwocihe bé mu he miiden, na e pii ten pie: «Wogo pa Naîng [na te céiu go] na te nihe eânimung dem. Wogo kuti, na é caa pipégaliko ne ha a pwonimung.»

E tacebwéni lésu wo Caatana

12-13 Te ju é alecehe anaa, ke e pé lésu nge ha a da na a Jenen litihī, beme e tacebwénieng wo *Caatana. Ke e mu lang he na 40 ni tan. E mu pele ni wota apiaba, ke ni *âcélo, ke lé penem den.

E tote ni bécéiuhe acémun den

Mataio 4.12–22; Luka 5.1–11

¹⁴ É ha a céiu tan, ke lé imwi loane, ke lé neeng he karépu. E engen wo lésu, ke e â Galilé, me e â pipatemehi a Pwooti Wâé te Padué.

¹⁵ Ke e pii telé pie: «E caa tuie a benaamwon na e caa pipégali wo Padué, ke caa é mwonus a Mwametau ten. Geé taatééhi ni mulihewé, ke geé céihi ne ko a Pwooti Wâé!»

¹⁶ [É ha a céiu tan] ke e uti a nicepwon ne Galilé wo lésu. Ke e ali Simon me André, lupwo pwénaâjién, na lu ko ne pua, be lupwo apwotau.

¹⁷ Ke e pii telu pie: «Geu âbé céing, be é bo pwo me wogeu lupwo apwotauhi apulie.»

¹⁸ Ke lu te necu kuti ni pua telu, ke lu âcéi lésu.

¹⁹ Ke lé te ju piân, ke e ali Cang me loane, lupwo naî Zébédé, he lu ko tebwo ha a ongelu, ke lu ko pwoni ni pua telu.

²⁰ E te pwome todelu wo lésu, ke lu ne caa telu Zébédé me ni apenem den ne ha a ong, ke lu âcéin.

E pwo me wâé ni apulie

Mataio 8.1–4, 14–17; Luka 4.31—5.16

²¹ Lé tuiybé ha a pwomwo ubwo ne Kapernaüm wo lésu me ni acémun den. Ke é ha a *tan iitihi, ke e taa ha a *mwotapitihi [te ni *Juif] ke e pacémunilé.

²² He lé téne, ke lé téetihi a bwo cihe ten, be time e uce pwohewii ni *dotéén ko patén. Be e te pacémunilé mu ha a pihuô [na e te ne ten wo Padué].

Pa apulie na pwo duéé kon

²³ [He e mwo ko cihe wo lésu] ke e taa ha a mwotapitihi wo pa apulie na pwo duéé kon. Ke e wiikau ke e pii pie:

²⁴ «lésu mu Nazaret, te tice celi go pwo peleme. Go âbé pwotahi ne kome? É te temehiko, be wogo pa apulie na e pipégaliko wo Padué, ke e neko bé.»

²⁵ Ke e hení ali duéé wo lésu, ke e pii ten pie: «Go capuhi a pwom, ke go wie mu ko pa apulie naa!»

²⁶ Ke e pegili pali apulie na ali duéé, ke e wie, he wiikau mu kon.

²⁷ Ke lé te nihe tai téetihi ne ni apulie, ke lé te pitahimwolé pie: «He ade celi e ko pwo wo pa apulie ce? E pacémunikenye ko ace céiu bwomunen celi mwo coho. Be pwojunuun, ke e pihuôhi mwo ni duéé, ke lé te piténedeeng!»

²⁸ Ke e te engen kuti a jepule ko lésu, pitihí amu Galilé.

Ê mwaa Simon Pétéru

²⁹ E wie mu ha a mwotapitihi wo lésu. Ke e te pwome â pele Simon Pétéru me André. Ke lu piâcéin wo Cang me loane.

³⁰Ke me lé tehene ngen, ke nina lé mu lang ke lé te pwome pii te lésu pie: «E tee ko pule ê mwaa Simon, be e pwopilijing.»

³¹Ke e âbé céiieng wo lésu, ke e pétaa ko a in, ke e pwiieng da, ke te tieden kuti kojaeng ali pilijing. Ke e cuwoda, ke e pwo me lé wiinaado.

E pwo me tieden ni pétaapwo cunu

³²É he babwén, alechehe a bwo nuule na a téale, ke lé pébé céii lésu ati ni cunu me lépwona pwo ni duéé kolé.

³³Ke lé pitaineibulé ne ko a pomwa ati ne ni apulie ha a pwomwo ubwo.

³⁴Ke e pwo me tieden ati ni pétaapwo cunu wo lésu. Ke e pawiehi mwo ni duéé na hiwon, ke time e uce nelé me lé cihe, be lé te temehieng.

E patemehi a Pwooti Wâé ne Kapernaüm wo lésu

³⁵É ha acaama, he mwo te melepiing, ke e caama wo lésu, ke e â ha apiticie, ke e pwoiitihi.

³⁶Ke lé haneeng wo Simon me lépwo béén,

³⁷ke me lé tooeng, ke lé pii ten pie: «Lé ko haneko ati ne ni apulie.»

³⁸Ke e hegi ne telé pie: «Genye engen mu éni, ke genye â he ni bée mwopopwaalé ko jijenye. Be é nelang mwo, he na me é â pipatemehi a Pwooti Wâé, be anaa kuti a watihen me é opé.»

³⁹Ke e engen pitihi a amu Galilé wo lésu, ke e pipatemehi a Pwooti Wâé ne he ni mwotapitihi, ke e pawiehi ni duéé.

Pana katia nang

⁴⁰E âbé mwonu lésu wo pana katia nang. Ke e tidihi jilin ânebuhen, ke e ileeng me e pwo me wâé nang, ke e pii pie: «Hemepie te nimem, ke go pwo me tieden a katia kong!»

⁴¹E te nihe pipwoééhen wo lésu, ke e cine ngen a in, ke e ti ko pali katia, ke e pii ten pie: «Éa, te nimung! Caa wâé go!»

⁴²Ke e te engen kuti ali katia, ke caa wâé nang.

⁴³Ke e pii me mwoiu ten wo lésu pie: «Go engen.

⁴⁴Ke go nemwo pii te ni apulie! Kehe go â pihabwiiko ne te pa *apwoâpwailo, ke go ne te Padué ali âpwailo li e pii wo *Moosé ne he li patén den. Be me wonaa, ke me lé alihî ati ne ni apulie pie caa wâé go.»

⁴⁵Kehe e engen wo pali, ke e â piuti te ni apulie ati nina e pwo ne kon wo lésu. É mu ko anaa, ke caa pwocoon me e wie ne ha a pwomwo ubwo wo lésu. Ke e â mu ha apiticie. Ke ni apulie, ke lé bwo tuiebé ne kon mu he ni piduaan.

Maréko 2

E pwo me wâé pa céiu tebwomwa

Mataio 9.1–8; Luka 5.17–26

1E âmwobé wo lésu ne Kapernaüm he ni tan alecehen. Ke lé téne pie caa e mwo pwomwo.

2Ke hiwon ni apulie na lé pitaineibulé ne ha a mwa, ke â pitice ahilé, piwien die ha a pomwa, ke é pwomwo.

3Ke lé âbé céiieng ni bée apulie he lé pébé céiieng pa apulie na tebwomwa nang; paa jélé na lé pipaadoimieng.

4Kehe pwocoon me lé âmwonueng, wonaa mu ko a pubu apulie. Ke lé temeeng da pwo mwa, ke lé tapwii a céiu duaa mwa ne he bebenihe lésu, ke lé neole pali tebwomwa pwo apule ten.

5Ke me e alihia céihi telé wo lésu, ke e pii te pali tebwomwa pie: «Pa naîng, caa pineuhi ni ta pwo tem!»

6Lé mu lang mwo ne ni bée *dotéén ko patén, ke lé pitautinaado ne he ni pwonimelé:

7‘Woté? Pa apulie ce, ke e cihe pwohewiin heme wo Padué! Be he wooélé na e temehi me e pineuhi ni ta pwo ten? Te icehi Padué!'

8Ke e te ju temehi ni bwo niimihinaado telé wo lésu, ke e pii telé pie: «É mu ko ade na wonaa ni bwo niimihinaado tewé?

9Ade aceli piticecoo? Me é pii te paje pie: “Caa pineuhi ni ta pwo tem”, ai me é pii ten pie: “Go cuwoda, ke go pé apule tem, ke go engen”?

10[Ke mepie jan me é pwo me e engen ne ânebuhewé ati] ke geé bo temehi pie, pwo mwomwon dong, woéo, pa *Nahi Apulie, me é pineuhi ni ta pwo te ni apulie ne pwo bwohemwo.] Ke e pii te pali tebwomwa pie:

11«Aje, go cuwoda, ke go pé apule tem, ke go âmwo pelem!»

12Ke e te cuwoda kuti wo pali, ke e te pé kuti ali apule ten, ke e wie ne he pwahamii ni apulie. Lé te nihe téetihne ni apulie, ke lé pii pie: «Time genye mu uce téele alihia ace naado celi wonaa! Te a juuju pie wo Padué, ke te junihe ubwo nang.»

E tote Lévi (Mataio)

Mataio 9.9–13; Luka 5.27–32

13E mwojuia ngemwo ticepwon ne Galilé wo lésu. Ke lé âbé céiieng ne ni apulie na hiwon jélé. Ke e pacémunilé [ko a pwooti te Padué].

14É he e ko ân, ke e ali Lévi (Mataio), pa naî Alfé, he e ko tebwo ha a mwotai mwani [me de l'épwo Roma]. Ke e pii ten wo lésu pie: «Go âbé céing!» Ke e te cuwoda kuti wo paje, ke e âcéi lésu.

15 É alechen, ke lé wiinaado wo lésu me lédwo acémun den pele Lévi. Ke hiwon ni atai mwani me ni apulie na ta ni mulihelé, na lé tai taa pwo taap me woélé, be te nihe hiwon jélé na lé âcéi lésu.

16 Ke me lé alahi anaa wo lédwo dotéén ko patén me lédwo *Farasaio, ke lé pii te lédwo acémun den pie: «É mu ko ade na wo pa caa tewé, ke lé piwiinaado me ûdu me lédwo atai mwani, ke ni bée apulie na ta jélé?»

17 Ke e ténelé wo lésu, ke e pii telé pie: «Time lé uce hane ce dotéén wo lédwona te wâé jélé, kehe te icehi lédwona cunu jélé. Ke time é uce âbé tode nina lé niimihi pie wâé ni mulihelé. Kehe é âbé tode nina lé temehi pie ta ni mulihelé.»

A ocine ko a pipaciile

Mataio 9.14–17; Luka 5.33–39

18 É ha a céiu tan, ke lé ko *pipaciile wo lédwo acémun de *loane pa apipuu apulie me lédwo Farasaio. [Be lé patupwo wiinaado beme lé pwoitihi.] Ke lé tuiebé pele lésu ni bée apulie, ke lé pii ten pie: «É mu ko ade na lé te pipaciile wo lédwona, ke lé te wiinaado ne ni acémun dem?»

19 Ke e hegi ne telé wo lésu pie: «Kona lé te pipatupwo wiinaado wo lédwona todelé ne ko a piaten, heme e mwo teko mu pelelé wo pa apiaten? Úhu! Heme e mwo teko mu pelelé wo pa apiaten, ke lé mwo te wiinaado ke ûdu.

20 Kehe e o bo âbé a tan na o bo pé kojalé pa apiaten. Ke é mulang na lé o bobe pipaciile.

21 «Te tice pace apulie celi me e pé ace memwaanu celi mwo te ju wâé, me e woli ne ko ace memwaanu celi ukéiu. Be [mepie e puu a mwaanu, ke] bo nihe ubwo a tie kon.

22 «Ke geé niimihi a *mwotabe na pwo ko iiwota. Be time nye uce pé ace tabe megele celi mwo coho, me nye pa a mwotabe na caa ukéiu. Be [pwocoon me cibu, ke] e bo pabuwohi, ke genye o patieden a tabe megele, me ni mwotabe. Úhu! Wâé heme nye ne a tabe megele na mwo coho, ne ha a mwotabe na mwo coho!»

Pa eapwihi a tan iitihi

Mataio 12.1–8; Luka 6.1–5

23 É ha a céiu *tan iitihi, ke lé [uti a pwaaden na e] pitahagéi ni apwoamu wo lésu me lédwo acémun den. Ke é nge he pwaaden, ke lé tabwo ni ace blé wo lédwo acémun den.

24 Ke lé pii te lésu wo lédwo bée Farasaio pie: «Aje, é mu ko ade na lé wonaa wo lédwo acémun dem ha a tan iitihi! Be iitihi!»

25-26 Ke e hegi ne telé pie: «Kona time geé mu uce pine ne he ni *tii iitihi ana e pwo wo pa daame *Davita, ha a benaamwon de Abiatar, pa *daame he lédwo apwoâpwailo? Be é ha a céiu tan, ke menelé, woélé me ni béen, be tice celi lé wii. Ke e taa ha a *mwaiitihi [na pwo ko mwaanu] wo Davita. Ke e pé a pwoloa

na ne me de Padué, na te icehi lépwo apwoâpwailo na jan ne kolé me lé eni. Ke e eni, ke e ne mwo te lépwo bén.»

²⁷Ke e pii mwo wo lésu pie: «Wo Padué, ke e pwo a tan iitihi me de ni apulie. Kehe time e uce pwo ni apulie me de a tan iitihi!

²⁸«É mu ko anaa, ke woéo pa Nahi Apulie, ke pa eapwihi a tan iitihi.»

Maréko 3

E pwo me tieden a cunu ha a tan iitihi

Mataio 12.9–14; Luka 6.6–11

¹É alecehe anaa, ke e â taamwo ha a *mwotapitihi wo lésu, [ha a *tan iitihi]. Pwo pa apulie na e mu lang na mele a in.

²Ke lé te ju ome lésu wo lépwo *Farasaio, beme lé alihí pie, he e o te pwo me wâé nang ha a tan iitihi. Wonaa beme lé pipé ne kon.

³Ke e pii te pali cunu wo lésu pie: «Go cuwoda [ânebuhelé ati].»

⁴Ke e pii te lépwona lé mu lang pie: «Woté? He te ne me pwo ana wâé, ha a tan iitihi, ai ana ta? Me celuimi a mulip, ai me taunuhi?» Ke time lé uce cihe.

⁵Ke e te ju omelé he okéé, be lé pwo me e mu he ni picani ko a bwo mwoiu ne ni pwonimelé. Ke e pii te pali apulie pie: «Go cinebé a im.» Ke e cine ngen a in, ke caa te wâé mwo kuti.

⁶Wo lépwo Farasaio, ke lé te pwome â wie mu ha ali mwotapitihi, ke lé picihé me lépwo bée *Érode Antipas, ke lé tai hane ace bwopwonan me lé taunu lésu.

Hiwon ni apulie na lé âbé céii lésu

⁷Lé â ticepwon ne Galilé wo lésu me ni acémun den. Ke hiwon ni apulie na lé âcéilé: ni apulie na lé âbé mu Galilé, mu *Judé,

⁸mu *lérusaléma, mu Idumé, ke é ha a céiu duaan mu ko a éémwa Ioridano, ke é he ni duaan mu ko a Tir ke é mu Sidon. Ke lé tai âbé ali lésu, be lé téne nina e pwo.

⁹Ke e pii te lépwo acémun den wo lésu pie: «Geé pipwopweehi ace cuwo nahi ong, be é kon heme nihe hiwon ni apulie, be koli lé bo haiteéo!»

¹⁰Be e caa pwo me wâé ni apulie na hiwon jélé. Ke nina lé mu he ni picani ko ni cunu kolé, ke lé téte ne kon, beme lé ti kon.

¹¹Ke é he lé alieneng ne ni apulie na pwo duéé kolé, ke lé tupwo ke lé tidihí jililé ânebuhé, ke lé toii pie: «Wogo ke pa *Naî Padué!»

¹²Ke e cihe me mwoiu ne kolé pie: «Geé nemwo pipatemehiéo!»

E pipégali ni apostolo ten na 12

Mataio 10.1–4; Luka 6.12–16

¹³É alecehen, ke e taa pwo juwole wo lésu. Ke e tote ni apulie na te nimen kolé, ke lé âbé céiieng.

¹⁴Ke e pipégali mu hadenilé lèpwona ¹² jélé beme ni béen, ke me lé â patemehi a *Mwametau te Padué. {Ke e ne me niilé pie *apostolo.}

¹⁵Ke e ne telé a pihuô beme lé peni ni duéé.

¹⁶Weengi ni nii lèpwo ¹² apostolo: Simon, na e toii me a niin pie Pétérú;

¹⁷Cang, pa naî Zébédé; Ioane pa ciéé Cang (e toii niilu wo lésu pie Boanergès, a bwopiinen pie ‘lupwo nahi tikekele’);

¹⁸André; Filip; Bartélemi; Mataio; Toma; Cang, naî Alfé; Tadé; Simon, pa Zéloote;

¹⁹Judas Iscariot, pana e bwo icu lésu.

Nime a pwomwoiu te lésu me e pééeng nge ité

²⁰Ke e mwojuia ngemwo pwomwo wo lésu. Ke hiwon ni apulie na lé pitapitilé nelang. Ke tice bwopwonen me lé wiinaado wo lésu me lèpwo acémun den.

²¹Ke é he lé téne anaa ne ni apulie mu ha a pwomwoiu ten, ke lé âbé pééeng kojalé. Be lé pipii telé pie: «Pa apiolo!»

E hegi ne te nina lé pipé ne kon

Mataio 12.22–50; Luka 11.14–23, 8.19–21

²²Pwo lèpwo *dotéén ko patén na lé ole mu Iérusaléma. Ke lé pipii pie: «E ko lésu wo Caatana, pa caa te ni duéé. Be weeng na e ne ten a pihuô me e peni ni duéé.»

²³E todelé wo lésu, ke e tahimwolé pie: «Kona e o woté ko ace bwopwonen me e te pipawieeng mu ko pa apulie wo Caatana?» Ke e pii telé ni ocine ce:

²⁴«É hemepie e te pipwopa ne kon ace céiu mwametau, ke o pwocoon me e mu mang.

²⁵Ke me lé pipiéi hadenilé ne ni apulie ha a pwomwoiu, ke a pwomwoiu naa, ke o pwocoon me e mu mang.

²⁶Ke é hemepie e pipwopa ne mwo kon wo Caatana, ke mepie time e uce piténedeeng mwo, ke o caa time uce bwolihi a pihuô ten. O caa te wonaa a bwo pipatieden den.

²⁷É hemepie nimenye me nye taa ha a mwa te pace céiu apulie na pwo niihen, me nye pé ni naamuun, ke wâé heme nye mi cieeng. É mulang, ke genye bwobe pé ni naamuun mu ha a mwa ten.»

Pana e pihooni a Jenen litihí

²⁸«Geé téne ehi, be é pii tewé a juuju pie: O te jan me pineu pa apulie na e pwo nina ta, te piwien hemepie e cihe me ta ne ko Padué.

29Kehe wo pana e cihe me ta ne ko a *Jenen litih, ke o time uce jan me pineuhi ni ta pwo ten. Ke ni ta pwo ten, ke o tee mu dieli mwo.»

30E pii anaa wo lésu, be me de lépwo dotéén ko patén. Be lé pii pie pwo duéé kon.

A ju pwomwoiu te lésu

31Ke é alecehen, ke lé tehenebé wo nyaa te lésu me lépwo âjiénen. Ke lé âbé tebwo pwomwo. Ke lé pahede pa céu apulie me e taa tote lésu.

32Hiwon ni apulie na lé mu aujeni lésu, ke lé pii ten pie: «Aje, élé âoté pwomwo wo nyaa tem me lépwo ciéém. Be lé ko haneko.»

33Ke e pii telé pie: «He woo êce nyaa tong? Ke wooélé lépwoce ciééng?»

34Ke e te ju ome ni apulie na lé ko tebwo aujenieng, ke e pii telé pie: «Geé alih, be woélé-ni ni nyaa tong me ni âjiénung.

35Be wo pana e pwo ana nime Padué kon, ke te weengaa kuti pa ciééng, ke ê pwaadeniing, ke ê nyaa tong.»

Maréko 4

A ocine ko pa apicemi

Mataio 13.1–23; Luka 8.4–15

1E pacémuni ni apulie mwo ko a pwooti wo lésu, ne ticepwon ne Galilé. Ke hiwon nina lé taineibulé ne kon. Ke é mu ko anaa, ke e taa ha a céu ong, na e teko mu he tabe, ke e tebwo. Ke lé te mu jedu huâiu ne ni apulie.

2Ke e pwo-ocine he e pacémunilé ko ni naado na hiwon. Ke e pii telé pie:

3«Geé téne! E bwo mu wo pa céu apulie, ke e bwo wie ha a céu tan, beme e tagiliihi ni âdaanu.

4Ke é he e ko tagiliihi, ke lé tupwo nge pwo pwaaden ni béé pidenaado. Ke lé âbé ne ni meni, ke lé wii ati.

5«Ke ni béén, ke lé tupwo ne ha a wii péi. Ke lé piepin ko cim, be time uce hiwon ni pule lang.

6Kehe icehi ana me e niê na a téale, ke éle li nahi âdaanu, ke lé meiu, be te tice waan.

7Ke ni béén, ke lé tupwo ne ha awieme ni mwawi ubwo. Ke me lé tai picim, ke lé taunuhi li pidenaado, ke te tice acehin.

8«Ke ni béén, ke lé tupwo ne ha a pule na wâé. Ke lé cim, ke piubwo jélé da, ke lé aca. Ke ni béén, ke 30 ni acehin; ke ni béén 60; ke ni béén mwo, ke lé taa die pwo 100.»

9Ke e pii mwo wo lésu pie: «Wo paceli pwo ce pwojéénen me e téne, ke wâé heme e téne!»

É mu ko ade na e pii ni ocine?

¹⁰É he lé te pimu cehi wo lésu me l épwo ¹²*apostolo ten me l épwo b één, ke lé tahimwoeng pie: «É mu ko ade na go pii ni ocine naa?»

¹¹Ke e hegi ne telé pie: «Wogewé na e ne tewé wo Padué, me geé temehi a ju bwomune a Mwametau ten. Kehe ni b éé apulie, ke lé te ju téne cehi ni ocine.

¹²Be [e pii ne kolé wo Padué pie]:

[Mwoiu a puni a puapulie ce.] Be lé tee omehi taaci, kehe time lé uce alih temehi. Lé tee téne taaci, ke time lé uce téne temehi. Te muhi telé me lé bitelé b é céiiéo, ke me é pineuhi ni ta pwo telé.] Ésaïe 6.9–10

A bwopiine a ocine ko pa apicemi

¹³É alechen, ke e pii te nina lé mu lang wo lésu pie: «Kona time geé uce temehi a ocine ko pa apicemi? Ke geé bo woté ko ace bwo temehi ne ni b éé ocine ko a Mwametau?

¹⁴Pa apicemi, ke e cemi a pwooti te Padué.

¹⁵[Ke ni b éé pidenaado, ke lé tupwo nge pwo pwaaden.] A pwaaden, ke ni apulie na lé téne a pwooti, kehe e pwome abé pé kojalé a pwooti wo *Caatana, na caa cemi ne he ni pwonimelé.

¹⁶«Ke ni b éé pidenaado, ke lé tupwo ne ha a wii péi. [A wii péi] ke ni apulie na lé téne a pwooti, ke lé pwome hegi ko a pipwodéén.

¹⁷Kehe icehi ana te tice waan ne kolé a pwooti na lé téne. Ke lé te pitaatééhi ni bwo niimihinaado telé. Hemepie e tuie ne kolé a tacebwén, me pwo nina ta ne kolé, watihen a pwooti te Padué, ke lé patieden ni céhi telé.

¹⁸«Ke ni b éé pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwooti,

¹⁹kehe icehi ana pinekepé ni pwonimelé ne ko ni naado na e tuie ne pwo a bwohemwo ce. Ke lé téte cehi mwani me ni pétaapwo naamuu bwohemwo. É mu ko ninaa, ke e taunuhi a pwooti, ke te tice acehin.

²⁰«Ke ni b éé pidenaado, ke lé tupwo ne ha a pule na wâé. [Ke a pule naa] ke ni apulie na lé téne a pwooti, ke lé hegi ne he ni pwonimelé. Ke pwo acehi a pwooti ne kolé. Ke ni b één, ke 30 ni acehin; ke ni b één, ke 60, ke ni b één mwo, ke lé taa die pwo 100.»

Ni b éé ocine ko a Mwametau

Mataio 13.31–32; Luka 8.16–18, 13.18–19

A ocine ko a mwomiû

²¹E pii telé mwo wo lésu pie: «Time nye uce ne miû ko a mwomiû, me nye talui ko ace cio, ai me nye ne haahi ace apule. Kehe genye ne da ko miiden.

²²Ati ni naado na neduwohi, ke o bo habwii ne ha a pwéélang, beme nye alih ehi.

²³Wo paceli pwo ce pwojéénen me e téne, ke wâé heme e téne!»

²⁴Ke e pii telé mwo pie: «Geé pipwocile nina geé téne! Be e o bo pwo tewé wo Padué nina geé pwo te lèpwo bén. Ke e o bo pwo celi nihe piubwo koja nina geé pwo.

²⁵Be wo pana caa pwo ne ten, ke o ne mwo pwon ce bén. Kehe wo pana tice ten, ke o pétaabwon kojaeng a nehinaado na mwo e pelen.»

Âdaanu na te picim cehi

²⁶Ke e pii mwo wo lésu pie: «Mepwo a *Mwametau te Padué, ke pwohewii ani: «E bwo mu wo pa céiu apulie, ke e bwo cemi ni âdaanu ne ha apwoamu ten.

²⁷Ke é alechen, ke e mwo pwome mwaale, ke e pule he bwén, ke e ûmiê ha acaama. Ke é ha a benaamwon naa, ke lé cim li âdaanu, ke piubwo jélé da. Kehe icehi ana wo paje, ke time e uce temehi ace bwo cim nen.

²⁸Be te a penem de a pule me e pwo me cim ni âdaanu. Ke e ne me piubwo jélé da, dieli lé ne ni acehilé, me ni pidé.

²⁹Ke me caa pun ni âdaanu ha apwoamu, ke wo pa apulie naa, ke e bo pipwopweeng me e pitii âdaanu.»

A ocine ko a pide moutarde

³⁰Ke e pii mwo wo lésu pie: «He a Mwametau te Padué, ke he pwohewii ace de? Weengi a ocine, me geé temehi:

³¹«A Mwametau te Padué, ke e pwohewii a pide *moutarde* na genye cemi he pule; a cuwo nahi pidenaado na te junihe wahin.

³²Kehe icehi ana me e cim, ke te junihe ubwo nang koja ati ni naado na nye cemi he ni cereda. Be bwo ubwo ni dihen, ke lé âbé ne ni meni, ke lé te pwo mwonahilé ne ha a boom kon.»

³³É he e pii te ni apulie a pwooti te Padué wo lésu, ke e pii ni ocine na pwohewii a ocine ce. Ke e pwo a bwopiinen, beme lé pé ce delé mu ko ni bwo téne temehi nen delé.

³⁴Be e te cuwo ko pwo-ocine telé, kehe me bwo te piwoélé cehi me lèpwo acémun den, ke e bwo te pipatemehi telé ati.

E pacuwohi a udan wo lésu

Mataio 8.23–27; Luka 8.22–25

³⁵É ha a babwén naa, ke e pii wo lésu te lèpwo acémun den pie: «Nye gaale ângedé ko a céiu goon.»

³⁶Ke lé pééeng pwo a ong na lé tebwo hen, ke lé cepewie ni apulie. Kehe icehi ana lé âcéilé ni bén ne he ni bée ong.

³⁷É alechen, ke e tabuhi tahieng a dan. Ke te piubwo da a bwo tahieng. Ke te piubwo ni pihijié, ke e taii ne ha a ong.

³⁸Kehe wo lésu, ke e teko pule alecehe ali ong, pwo a paapun. Lé paûmiêeng wo lépwo acémun den, ke lé pii ten pie: «Pa apipune, genye o caa mwiiê! Woté! Time uce junaado ne tem?»

³⁹Ke e ûmiê, ke e hení ali dan. Ke e pii te ali jié pie: «Go cuwo!» Ke caa te ju wâé mwo a amu, ke e cuwo ali dan.

⁴⁰Ke e pii telé pie: «É mu ko ade na mwotikewé? Time geé uce téele céhi kuti?»

⁴¹Kehe te nihe mwotilé, ke lé pipii telé pie: «Éé! Be he woo pa apulie ce, me lu piténedeeng a dan me a jié?»

Maréko 5

E cibéé ni duéé na hiwon jélé @ mu ko pace céiu apulie

Mataio 8.28–34; Luka 8.26–39

¹Ke lé tehene nge Gadara wo lésu me lépwo acémun den ko a goon ne gaale cemwo pejié ne Galilé.

²Ke me e ole mu pwo ali ong wo lésu, ke e te wiebé kuti mu ha a iitihi wo pa apulie na pwo duéé kon. Ke e âbé beni lésu.

³⁻⁴Be wo panaa, ke pa apimu he iitihi. Ke te tice bwopwonen me lé imwieng, me lé cie lupwo in me lupwo an; piwien mwo heme cieeng ko ace itihe toki. Be lé te cuwo ko cieeng kon, ke e te cuwo ko tahagéi. Ke te tice pace apulie celi pwo niihen me e imwieng me e ju mu.

⁵Téteda he ni benaamwon, heme bwén ke pwang, ke e teme da ni pwowiikau ne ha ali iitihi, ke é ne pwo ni juwole. Ke e pitanahieng ko ni péi.

⁶Me e ali lésu mu ité, ke e téte beniieng, ke e tidihi jilin ânebuhen,

⁷ke e toii da pie: «lésu, pa *Naî Padué na nihe e daaité, ade aceli nimem me go pwo tong? É ileko ne he nii Padué pie go nemwo pwo tong aceli ta!»

⁸E pii anaa, be e pii ten wo lésu pie: «Duéé, go wie mu ko pa apulie ce!»

⁹Ke e tahimwoeng wo lésu pie: «He piwoté ace niim?» Ke lé hegi ne ten ne ni duéé pie: «A niime pie Bwehi duéé, be hiwon geme.»

¹⁰Ke e wâgo ko lésu wo pali, ke e pii ten pie: «[Hemepie go pawiehi ni duéé mu kong] ke go nemwo cibéélé mu éni ha amu!»

¹¹⁻¹²Ke lé wâgo kon mwo [ne li duéé] ke lé pii ten pie: «Me geme ân, ke me geme taa he ni puwokwo ne!» Be pwo a bwehi puwokwo na nihe hiwon jélé na lé ko um gaale hamwo juwole.

¹³Ke e ne telé ana lé ilehi wo lésu. Ke lé wie mu ko pali apulie, ke lé gaale he li puwokwo. Ke lé te tai téte kuti li puwokwo mu hamwo juwole, ke lé ole he jié, ke lé mwiiê. Caa te piâmwonuhi a 2000.

Piân a jepule

¹⁴Wo lépwo awéhi puwokwo, ke lé téte ngen, ke lé â piuti a jepule naa, ne ha a mwopopwaalé ke é na ati ha amu. Ke lé âbé ni apulie, beme lé alahi nina e ko tuie.

¹⁵Ke lé tehenebé pele lésu, ke lé ali pali apulie li pwo duéé kon, he e caa ko tebwo, ke e caa cuwohe ni epwén, be caa ju wâé nang. Ke lé téetieng, ke te junihe mwotilé.

¹⁶Ke lépwona lé alahi nina e tuie, ke lé piuti te lépwo béén ali jepule ko pa apulie naa, me ni puwokwo.

¹⁷Ke lé wâgo ko lésu wo lépwo apulie mu ha amu naa, ke lé pii ten pie: «Nimeme me go engen mu ha amu teme.»

¹⁸Ke me e taa pwo ali ong wo lésu, ke wo pali lé wie mu kon li duéé, ke e ileeng pie: «Nimung me é âdé céim.»

¹⁹Kehe icehi ana te muhi te lésu, ke e pii ten pie: «Go mwojuia ne ha a pomwa tem, pele lépwo bém. Ke go uti telé a bwo pipwoééhem de Padaame, ke ati ni naado na e pwo me dem!»

²⁰Ke e mwojuia mwo wo paje, ke e uti ne ha a duaan na pii kon pie *Dix Villes* ni naado na e pwo me den wo lésu. Ke lé tai téetihi ne ni apulie.

E pwo me wâé lu alo toomwo

Mataio 9.18–26; Luka 8.40–56

²¹E taa pwo ali ong wo lésu, ke e gaale ko a goon ne gaale cemwo. Ke me e ole mu pwo ong, ke hiwon ni apulie na lé mu aujenieng ne ticepwon.

²²Ke e tuiebé wo Jaïrus, pa céiu caa te *mwotapitihi, ke e ali lésu, ke e â tidihjilin ânebuhen.

²³Ke e pii ten pie: «Go âbé epin, be e caa pwo me e mele ê naîng! Go âbé me go ne ni im huîn, beme tieden a cunu kon, ke me wâé nang mwo.»

²⁴Ke e âcéin wo lésu. Ke te nihe hiwon mwo ni apulie na lé ân, ke lé caa ju pitité.

Ê toomwo na 12 ni jo ko a cunu kon

²⁵Ke e mu hadenii ni apulie naa ê céiu toomwo na caa 12 ni jo na cunu nang hen, be e mu tuie ni benaamwon na e mu téte kon a cewéle.

²⁶Caa junihe hiwon ni dotéén na e mu â alilé, ke lé bwo pwo me junihe cunu nang kuti. Ke e caa ju patieden ati ni mwani ten, kehe icehi ana time uce wâé nang, kehe bwo junihe cunu nang kuti.

²⁷Ke e téne a jepule ko lésu, ke e âbé ne ha a tapitihi naa. Ke e piâbé alecehe lésu, ke e ti ko a epwénen.

²⁸Be e niimihi pie, ‘Mepie é te ju ti ko a epwénen cehi, ke o caa te pitieden a cunu kong.’

²⁹Ke me e pwo, ke e te cuwo kuti a bwo téte kon na ali cewéle. Ke e téne ne kon pie caa tieden a cunu kon.

³⁰Ke wo lésu mwo, ke e téne pie, e engen kojaeng a céiu duaa niihen, ke e biteeng, ke e tahimwo ni apulie pie: «He woo na e ti ko a epwénung?»

³¹Ke lé hegi ne ten wo l épwo acémun den pie: «Go ko cuwo ha awieme ni apulie na lé ko pitité! Ke é mu ko ade na go tahimwohi pie, woo na e ti kom?»

³²Kehe icehi ana e te piniê aujenieng wo lésu, beme e niê hane pie, he woo na e pwo anaa.

³³Ke e te ju éjén êgi toomwo ko a bwo mwotieng, be e temehi ana e ko tuie ne kon. Ke e âbé ke e tidihi jilin ânebuhe lésu, ke e pii ten ati a juuju.

³⁴Ke e pii ten wo lésu pie: «Adéiko go êje! Caa wâé go mwo ko a céihi tem! Ke go engen, ke me e mu pelem a péém. Be caa te tieden a cunu kom!»

Ê naî Jaïrus

³⁵É he e mwo ko pii anaa wo lésu, ke lé tehenebé ni béé apulie mu pele Jaïrus, pali eapwihi mwotapitihi, ke lé pii ten pie: «Au! E caa mele wo êgi naîm. Kehe go nemwo pahauli pa apipune.»

³⁶E téne ni pwocihe naa wo lésu, kehe time e uce pipéce ne kon, ke e pii te Jaïrus pie: «Go nemwo pwo me mwotiko! Kehe go céihi ne kong!»

³⁷E te ju pé cehi Pétérú, me Cang me loane, lupwo pwénaâjién. Be time uce nimen me lé âcéin ne ce béé apulie.

³⁸Ke lé tuie nge ha a pomwa te Jaïrus. Ke te junihe hiwon kuti ni pwocihe lang. Ke wo lésu, ke e ali ni apulie he lé ko é, ke lé pihemun.

³⁹Ke e taa ha ali mwa, ke e pii telé pie: «É mu ko ade na geé te junihe pié ne da kon? Kona geé é kona woté? Geé ko pii pie e caa mele ê cuwo ewa ne; kehe woéo, ke é pii pie e teko ju puluta!»

⁴⁰Ke lé pihoonieng. Ke e tai pawielé wo lésu, ke e pé lu nyaa me caa te êgi ewa, me l épwo acémun den na cié jélé. Ke lé taa ha a céiu nemwa na lé ne êgi cuwo nahi ewa hen.

⁴¹Ke e pétaa ko a in, ke e pii ten pie: «*Talita, koumi!*» A bwopiinen pie: «Ê naîng, go cuwoda!»

⁴²Ke e te cuwoda kuti, ke e engen! Ê cuwo nahi toomwo naa, ke 12 ni jo hen. Ke lé te junihe téetih ne nina lé mu lang.

⁴³Ke e pii telé wo lésu pie: «Geé ne celi e wii.» Ke e pii mwoiuhi telé pie: «Geé nemwo pii te ce béé apulie ana e tuie ne éni.»

Maréko 6

Time lé uce céihi ne kon ni Nazaret

Mataio 13.53–58; Luka 4.16–30

¹E engen mu ha a duaan naa wo lésu, ke e â Nazaret, he na ubwo nang ne hen. Ke lé âcéin wo lédwo acémun den.

²É ha a tan ko pwoitihi, ke e taa ha a *mwotapitihi, ke e pacémuni ni apulie na hiwon jélé [ko a pwooti te Padué]. Ke me lé téne, ke lé te junihe téetieng, ke lé pitahimwolé pie: «Kona woo na e picaa ten nina e ko pii? E âbé mu wé ni bwo temehinaado ten, ke ni *pipwojunuun na e pwo?

³Be pali apenem ko ba-acuwo, pali naî Maria, ke pa cuwo Cang, me José, me Jude, me Simon! Ke lé teko mulie pelenye ni toomwo pwaadeniin!» Be lé pitaaba ne kon wo lédwo Nazaret, ke te muhi telé me lé céhi ne kon.

⁴Ke e pii telé wo lésu pie: «Au, mwolihi! Be wo pa péproféta, ke lé te paciitieng ati ne he ni amu, kehe te icehi ne ha amu ten, ne pele ni âjiénen!»

⁵Ke te tice bwopwonen me e pwo celi pwojunuun nelang. Kehe icehi ana te pwo ni béé cunu na e ne ni in huîlé, ke wâé jélé.

⁶E te junihe téetihi, be te ju time lé uce céhi kuti ne ni apulie.

E pahede ni 12 apostolo ten

Mataio 10.5–15; Luka 9.1–6

É alechehe anaa, ke e â patemehi a Pwooti Wâé wo lésu, ati ne he ni mwopopwaalé na élé aujenihi a Nazaret.

⁷Ke e tote lédwo ¹² *apostolo ten, ke e nelé ngen he pialo. Ke e ne telé a pihuô beme lé peni ni duéé.

⁸Ke e pii telé pie: «Geé nemwo pé ce naado hemepie geé engen: mepie ace pwoloa, ke ace éele, ke ace mwani ne he ni mwomwani tewé. Kehe geé te ju pé cehi ce bwajaawé,

⁹me ce dihibwaawé, ke te picéiu ce epwénewé.»

¹⁰Ke e pii telé mwo pie: «Mepie lé hegikewé ne ha ace céiu pwomwo, ke wâé heme geé mu lang, dieli geé bo engemwo mu ha a duaan naa.

¹¹Ke heme time uce nime ni apulie me lé hegikewé ne ha ace céiu duaan, ke me te muhi telé me lé tabemikewé, ke geé engen mulang. Ke geé tagilihi ni muu pule ko ni awé, beme geé habwii pie time uce wâé ni huô telé [be muhi telé ko a pwooti te Padué].»

¹²Ke lé ân wo lédwo apostolo, ke lé patemehi te ni apulie pie: «Geé pitaatééhi ni mulihewé.»

¹³Ke lé peni ni duéé na hiwon mu ko ni apulie. Ke lé ne *huile* ko ni apulie na cunu jélé, ke lé pwoitihi ne kolé, ke wâé jélé.

Érode Antipas me lésu

Mataio 14.1–12; Luka 9.7–9

¹⁴ E téne a jepule ko lésu wo pa daame *Érode Antipas, be caa nihe piân a jepule kon. Be lé pii ne kon wo lédwo béen pie: «Wo *Ioane pa apipuu apulie,

he e caa mulie cemwo mu ha amele! Anaa kuti a watihen me e pwo ni pipwojunuun.»

¹⁵Kehe lé pii ne ni béén pie: «Wo péroféta Élia.» Ke lé pii ne ni béén mwo pie: «Pa céiu péroféta ha a céiu benaamwo amu.»

¹⁶Kehe me e téne anaa wo Érode, ke e pii pie: «Éé! E caa mulie cemwo mu ha amele wo loane pa apipuu apulie, pali é pwo me tahagéi henen!»

E mele wo loane pa apipuu apulie

¹⁷⁻¹⁸Weengi a jepule ko a bwo mele te loane: Wo Érode, ke lu piaten me Érodiade, ê mwode Filip, pa âjiénen. Ke e mu te cuwo ko pii ten wo loane pie: «Te tice mwomwon dem me go pé ê mwode pa âjiénem!» Ke e te pwo me imwi loane wo Érode, ke e cieeng, ke e neeng he karépu.

¹⁹Ke e tééti loane wo êje Érodiade, ke nimen me e pwo me e mele. Kehe icehi ana te pwocoon den me e pwo,

²⁰be e te paciiti loane wo Érode, be e te temehi pie, pa apulie na e mwomwon, ke e iitihi, ke e te pipwopain. Te nime Érode me e tabemieng, kehe icehi ana heme e téneeng, ke caa time e uce temehi aceli me e pwo.

Cuwo a bwo niimihinaado te Érodiade

²¹Ke mepwo êje Érodiade, ke e hane ace bwopwonan me e pwo me e mele wo loane. Ke te ju cuwo ehi ne kon a tan na lé pipaunuhi a bwo âbeeble te pa daame Érode. Be e pwo a piwiinaado ubwo wo Érode, ke e tode ati ni gupéno, ke ni caa te coda, me ni apulie na piubwo jélé ne ha amu Galilé.

²²Ke e taa ha a mwa naa ê naî Érodiade, ke e pwolu. Ke lé te junihe pipwodéén wo Érode, me lépwona lé piwiinaado me weeng. Ke e pii te êgi ewa pie: «Go ileéo ko celi nimem kon, be é o caa te ne tem.»

²³Ke e *piapwo ne ten pie: «É o te ne tem ati celi go o ilehi kojaéo, te piwien heme a awieme a mwametau tong.»

Ne tong a puni loane!

²⁴Ke e wie wo êgi toomwo, ke e pii te nyaa ten pie: «He ace de celi me é ilehi koja pa daame?» Ke e hegi ne ten pie: «Go ilehi kojaeng a puni loane pa apipuu apulie.»

²⁵Ke e te pwome téte wo êgi toomwo, ke e â too pa daame Érode, ke e pii ten pie: «Nimung me go ne tong a puni loane ne ha ace tam.»

²⁶Ke te junihe piwahin Érode. Kehe icehi ana pwocoon den me e tapihi, be e caa piapwo ne ânebuhe ni béén na e caa todelé.

²⁷Ke e te pwome pii te pa céiu coda pie: «Go ân, ke go pébé céiiéo a puni loane.» Ke e engen wo pali coda, ke e â ha ali karépu, ke e â tahagéi a hene loane.

²⁸Ke e pébé ali punin ne ha a tam, ke e ne te êgi ewa toomwo. Ke e pé wo êgi, ke e â ne te nyaa ten.

²⁹Ke me lé téne anaa wo lépwo acémun de loane, ke lé â pé a één, ke lé â ne ha a iitihi.

Lé wiinaado ne ni apulie na 5000 jélé

Mataio 14.13–21; Luka 9.10–17; loane 6.1–15

³⁰ Lé mwojuia mwo wo lépwo apostolo, ke lé pipitilé ne ko lésu. Ke lé uti ten ati ni naado na lé pwo, ke ni naado na lé patemehi te ni apulie ati.

³¹Ke e pii telé pie: «Geé âbé céing ne ha a céiu duaan na tice apulie hen, beme geé o mwo mwaale.» Be tice benaamwon me lé wiinaado, be hiwon ni apulie na lé âbé céiilé.

³²Ke lé te piân cehi pwo a céiu ong, ne ha a céiu duaan na tice apulie hen.

³³Kehe icehi ana te junihe hiwon ni apulie na lé alilé he lé engen, ke lé te temehilé. Ke lé tétebé mu ati he ni mwopopwaalé, ke lé tuiebé ânebuhe lésu me lépwo acémun den [ne ko a céiu goon].

³⁴ Ke me e ole mu pwo ali ong wo lésu, ke e ali li apulie he te nihe hiwon jélé. Ke e te nihe pipwoééhelé, be lé pwohewii ni muto na tice awéilé. Ke e picaa telé ni naado na hiwon.

³⁵ Ke e caa pwo me e nuule a téale, ke lé âbé céieng wo lépwo acémun den, ke lé pii ten pie: «O caa babwén, kehe apiticie éni.

³⁶Go ne ngemwo ni apulie ce, nge he ni mwopopwaalé me ni pwomwo na e mwonu, beme lé pwocuhi celi me lé wii.»

³⁷Kehe icehi ana e hegi ne telé wo lésu pie: «Ûhu! Geé ne ce wiinaado telé!» Ke lé tahimwoeng pie: «Kona geme â pwocuhi pwoloa me de ati ni apulie? Nihe ubwo a cuhin!»

³⁸Ke e pii telé pie: «Be he niile ce pwoloa celi e pelewé? Geé â alih.» Ke lé pitahimwolé, ke lé pii ten pie: «Nim ni pwoloa, ke alo ni ikua.»

³⁹Ke e pii telé pie: «Geé pii te ni apulie ce pie: “Geé pwo ce pubuuwé, ke geé tebwo he ni meté.”»

⁴⁰Ke lé pwo ni pubuulé me pi 100, ke pi 50, ke lé tebwo.

⁴¹Ke e pé li pwoloa li nim me lupwoli ikua wo lésu, ke e alehede da he miiden, ke e pwo-olé te Padué. Ke e ebii li pwoloa, ke e ne te lépwo acémun den, ke lé patihi ne ko ni apulie. Ke lé wonaa mwo ko lupwoli ikua.

⁴²Ke lé tai wiinaado ati, ke caa pwoluu jélé.

⁴³Ke lé taineibuhi mwo ni nehi mepwoloa, me ni ne-ikua, ke lé pwo na 12 ni éele kon.

⁴⁴Ke a jáhi ni apulie aiu na lé wiinaado, ke pwo 5000 jélé.

E engen pwo bwotabe wo lésu

Mataio 14.22-33; Ioane 6.16-21

45 Te ju é alechen, ke e pii wo lésu te lépwo acémun den pie: «Geé taa pwo ong, ke geé mi gaale ângedé ko a céiu goon, ha a mwopopwaalé Betsaïda. Be é mwo tee mu, beme é pamwojuiéhi mwo ni apulie.»

46 Ke me e caa pinelé ati, ke e taa pwo juwole, beme e pwoiitihi.

47 É he caa bwén, ke caa élé ha awieme jié wo lépwo acémun den, pwo ong. Ke e te pimu cehi âdaalé ha a meiuhi wo lésu.

48 Caa é pwopwometan, ke e alihí pie pwocoon a bwo tahi kaale telé, be âbédélé na a dan. Ke e âbé céilé pwo bwotabe. Be nimen me e wédenilé.

49-50 Ke me lé alieng he e ko engen pwo bwotabe, ke te junihe mwotilé, ke lé haa da ko miiden, be lé niimihi pie a duéé! Kehe icehi ana e te pwome pacihelé wo lésu, ke e pii telé pie: «Geé nemwo pwo me mwotikewé. Be woéo! Geé mwoiu!»

51 Ke e taa céilé ne pwo ali ong. Ke e cuwo ali dan. Ke te junihe emegéi nalé.

52 Be time lé uce temehi ni pipwojunuun na e tuie he li e pipwopatihi ni pwoloa wo lésu. Be capuhi ni pwonimelé.

E pwo me wâé ni cunu ne Génésaret

Mataio 14.34-36

53 Lé caa nebwén ko tahagéi jié wo lésu me lépwo acémun den, ke lé tuie gaale ha a duaan na e mwonuhi Génésaret, ke lé taa ali ong.

54 Ke me lé ele ole, ke lé alihí temehi lésu ne ni apulie lang.

55 Ke lé téte nge ati ha amu telé, ke lé pébé céiieng ni cunu ne pwo ni apule telé ati ne he na lé téne pie e lang.

56 É ati he na e â lang wo lésu, he ni mwopopwaalé, ke ni pwomwo ubwo, me ni amu, ke lé pébé ni cunu ne he ni apimu te ni apulie ati. Ke lé piwâgo ko lésu, ke lé pii ten pie: «Te jan heme lé te ju ti cehi ko a baaé epwénem?» Ke caa te wâé ati nina lé ti kon.

Maréko 7

A bwo picuhe ko ni bwomu

Mataio 15.1-9

1 Lé âbé wo lépwo *Farasaio, me ni bée *dotéén ko patén na lé âbé mu *lérusaléma. Ke lé pitapitilé ati ne ko lésu.

2 Ke lé alihí pie, lé â wiinaado wo lépwo bée acémun den, kehe time lé uce puu ni ilé pwohewii a bwopwonan de ni ukéiu telé.

3-4 Be wo lépwo *Juif, ke lé te engen ne ko a huô ha a bwomu te ni ukéiu telé: Lé mi puu ehi ni ilé, ânebuhe ni bwo wiinaado telé. Ke lé wonaa mwo, he lé mwojuia mwobé mu he ni apimu te ni apulie ati. Ke hiwon ni bée bwomu na lé

âcehin mwo, pwohewii a bwo puu mwoûdu, me mwotabe, me ila. Ke mepwo é ne ko lèpwo Farasaio, ke lé mwo te junihe pipaunuhi.

⁵É mu ko anaa, na lé pii te lésu, woélé me ni dotéén ko patén pie: «Wo lèpwo acémun dem, ke time lé uce mulie pwohewii a bwomu te ni watihenye. Be lé wiinaado ko ni ilé na tooli. Kehe é mu ko ade, go paje?»

⁶Ke e hegi ne telé wo lésu pie: «Geé te ju gahe pwo! E te juuju wo péroféta Isaia, na e pwaadeni a pwooti te Padué ne kowé. Be e tii pie: Lé te ju pipaunuéo ko pwolé wo lèpwo apulie ce, kehe te e ité kojaéo ni pwonimelé.

⁷Lé pwoitihi me *pwoâpwailo tong kehe te piticenaado ne kon. Ana lé pacémuni ni apulie kon, ke te ni patén delé ni apulie, kehe time uce a pwooti tong.» Ésaïe 29.13

⁸Ke e pii mwo telé wo lésu pie: «Geé caa patupwo ni pihuô te Padué. Ke geé caa tai engen ne ko ni pihuô tewé lèpwo apulie.

⁹Geé tahi taabwon ni pihuô ten, ke geé bwo te wéihi nina te ni pihuô me ni bwomu tewé!

¹⁰Be e caa pii wo *Moosé pie: Go paciiti lu nyaa me caa tem. Exode 20.12 E pii mwo pie: Geé taunu pa apulie na e pipii me ta lu nyaa me caa ten. Exode 21.17

¹¹«Kehe icehi ana wogewé, ke geé te pii te ni apulie pie, te wâé heme lé pii te lu nyaa me caa telé pie: “Nimung me é ne teu ace céiu naado me bépicani teu, kehe icehi ana time uce jan, be é caa pwo me âpipati iitihi te Padué.”

¹²«Ke wonaa ana geé picaa telé, me lé tapi lu nyaa me caa telé!

¹³Ke geé caaite ne he pule ni pwooti te Padué ko ni bwomu tewé! Ke hiwon mwo ni naado na wonaa na geé pwo mwo.»

Ana e pwo me ta pa apulie

Mataio 15.10-20

¹⁴É alechen, ke e tote mwo ni apulie wo lésu, ke e pii telé pie: «Lépwoli! Geé tabemiéo. Ke geé temehi ehi ana me é pii tewé:

¹⁵Time uce ana e taa pwo pa apulie ana e pwo me ta nang ne he pwahamii Padué. Kehe te icehi ana e wie mu ha a pwonimen ana e pwo me ta nang.

{¹⁶Wo paceli pwo ce pwojéénen me e téne, ke wâé heme e téne!}»

¹⁷É mulang, ke e engen koja ni apulie wo lésu, ke e âmwo pelen. Ke lé tahimwoeng wo lèpwo acémun den ko a ocine na e mwo ko ju nebwén ko pii.

¹⁸Ke e hegi ne telé pie: «Kona wogewé mwo, ke time uce téele jan me geé temehi anaa? Geé téne, te tice ace céiu naado celi e taabé mu pwomwo celi e pwo me ta pa apulie ne he pwahamii Padué.

¹⁹Be ni naado mu pwomwo, ke time lé uce taa ha a pwonimen. Be lé te ju taa ha a nan cehi, ke é alechen, ke lé te wie mwo mu ha a één.» E habwii nelang wo lésu pie, e caa ne me jan me nye wii ati mu ko ni wiinaado.

²⁰⁻²¹Ke e pii telé mwo pie: «Nina lé wie mu he pwonime ni apulie, ke te weengaa kuti, nina e ne me lé pwo ana ta: Lé pipule me ni apulie hauli; Lé bune; Lé taunuhi apulie;

²²Lé pibune; Lé pwo me tai pwo delé ati ko ni naado; Lé pwotahinaado ne ko ni béén; Lé pigeti ni béén; Lé mulie hauli; Lé pitaaba; Lé cihe me ta ne ko ni béén; Lé pipaunulé. «Ke te tice aceli lé temehi ne ko nina wâé.

²³Ati ni ta naa, ke nina lé wie mu he pwonime pa apulie. Ke te weengaa kuti nina e pwo me ta ne kon ne he pwahamii Padué.»

A céihi te ê toomwo Kanana

Mataio 15.21-28

²⁴É alecehen, ke e engen mu ha a duaan naa wo lésu. Ke e â ha a duaan na e mwonuhi lupwo pwomwo ubwo Tir me Sidon. É nelang, ke e mu ha a céiu pwomwo, ke time uce nimen me lé temehi ne ni apulie pie e lang. Kehe icehi ana e piengen a jepule.

²⁵⁻²⁶É mu ko anaa, na e piténe a pwooti kon wo ê céiu toomwo mu ha amu naa. Kehe time uce ê Juif, be ê piebehi l'épwo Fénisi ha a province Siri. Ke e âbé céii lésu, ke e tidihi jilin he pwahamiin, ke e pii ten pie: «Padaame, é ileko pie go pawiehi a duéé na e ko ê naîng.»

²⁷Ke e hegi ne ten wo lésu pie: «Nye ne me lé wiinaado ânebun ne ni cuwo nahi ewa. Be time uce wâé heme nye pé ni wiinaado telé, me nye tahi taabwon ne te ni nahi wotaahen.»

²⁸Ke e pii ten wo êje pie: «Go te juuju, go Padaame. Kehe icehi ana ni nahi wotaahen mwo, ke lé te eni ni mewiinaado na lé patupwohi ne ni cuwo nahi ewa mu pwo taap.»

²⁹Ke e pii ten wo lésu pie: «É mu ko a bwo hegi nen dem, ke jan me go mwojuia ngemwo pelem. Be e caa wie ali duéé mu ko ê naîm.»

³⁰Ke e mwojuia ngemwo ha a pomwa ten wo êje. Ke e ali êgi naîn, he e tekopule pwo ali apule. Be e caa wie ali duéé mu kon!

E pwo me wâé pa huuhu ke bwéjé

³¹É mulang, ke e engen mu ha a piduaan ne Tir wo lésu, beme e mwojuia ngemwo ticepwon ne Galilé. Ke e pitahagéi ngen ni duaan Sidon me *Dix Villes*.

³²Ke lé pébé céiieng pa apulie na huuhu nang ke bwéjé nang. Ke lé wâgo ko lésu, ke lé ileeng pie: «Go ne lupwo im huïin, beme wâé nang!»

³³Ke e pééeng wo lésu, ke lu â ité koja ni apulie. Ke e cine gaale ni mwodéin he ni pwojééne paje. Ke e pwo me titi ni mwodéin ko ni tabepwon, ke e ti ko a upehen.

³⁴Ke e alehede da he miiden, ke e pwo me taa nene kon, ke e pii te pali apulie pie: «*Efata!*» A bwopiinen pie: «Go tehiko!»

³⁵Ke te tehi kuti lupwo pwojéénen. Ke te wâé kuti ali upehen, ke caa jan me e cihe ehi.

³⁶Ke e pii wo lésu te lépwona lé alihia anaa pie: «Geé nemwo pwojepule kon!» Kehe icehi ana me e ko pii anaa telé, ke lé bwo junihe pwojepule kuti kon, ne te ni apulie ati.

³⁷Be lé te junihe téele, ke lé tai pii pie: «Geé alihia! Be te junihe wâé kuti ni naado na e pwo! Be e pwo me lé ténekenye ne nina bwéjé jélé; ke e pwo me lé cihe ne nina huuhu jélé.»

Maréko 8

Lé wiinaado ne ni apulie na 4000 jélé

Mataio 15.32–39

¹É ha a benaamwon naa, ke lé pitapitilé ne pele lésu ni apulie na hiwon jélé. Ke tice wiinaado telé. Ke e tote ni acémun den wo lésu, ke e pii telé pie:

²«É te junihe pipwoééhe ni apulie ce, be caa cié ni tan denye me woélé, ke tice wiinaado telé.

³Ke hemepie é pamwojuiélá, ke o tice niihelé nge he pwaaden, be hiwon lépwona lé âbé mu ité.»

⁴Ke lé pii ten wo lépwo acémun den pie: «Genye o woté ko ace bwopwonan me lé wiinaado, ne éni ha a piticie?»

⁵Ke e tahimwolé pie: «Kona niile ce pwoloa celi e pelewé?» Ke lé pii ten pie: «⁷ ni pwoloa.»

⁶Ke e pii te ni apulie pie me lé tebwo. Ke e pé li pwoloa li ⁷, ke e pwo-olé te Padué. Ke e ebii, ke e ne te lépwo acémun den, ke lé patihi ne ko ni apulie.

⁷Ke e pwo mwo ni cuwo ikua telé. Ke e pwo-olé te Padué, ke e pii te lépwo acémun den pie me lé patihi mwo.

⁸Ke lé wiinaado dieli caa pwoluu jélé. Ke é alechen, ke lé tai ni nehi wiinaado wo lépwo acémun den, ke e pwo ⁷ ni éelele na oba.

⁹É nge ha a 4000 ni apulie na lé wiinaado. Ke e pii telé wo lésu pie, me lé mwojuia ngemwo pelelé.

¹⁰Ke e taa pwo ong, weeng me lépwo acémun den. Ke lé â ha a céiu duaan na pii kon pie Dalmanouta.

Lé ilehi ace inenaado ni Farasaio

Mataio 16.1–12

¹¹É ha a céiu tan, ke lé tehenebé pele lésu wo lépwo béé *Farasaio, be nimelé me lé pipwohuô ten. Ke lé pitaacunaado me weeng, ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie time e uce penem ko a junuu Padué.]

¹² Ke pitaa nenehe lésu, ke e pii pie: «É mu ko ade na geé tee cuwo ko ilehi ce pipwojunuun, wogewé ni apulie jenaa? É pii tewé a juuju pie: O te tice ace céiu pipwojunuun celi geé o mwo alihii.»

¹³ Ke e jén ne kolé, ke e engen kojalé. Ke e taa pwo ong, ke lé gaale ko a céiu goon, [weeng me lépwo acémun den].

A ‘nyaa te pwoloa’ te lépwo Farasaio

¹⁴[Lé tuie gaale ko a céiu goon. Ke lé alihii] wo lépwo acémun den pie, lé pineuhi me lé pé ce pwoloa. Be te ju céiu a nehi pwoloa telé.

¹⁵ Ke e pii telé wo lésu pie: «Geé pipwocile a ‘nyaa te pwoloa’ te lépwo Farasaio, me a ‘nyaa te pwoloa’ te *Érode!»

¹⁶ Ke lé pipii telé wo lépwo acémun den pie: «Wielí é mu ko ana time genye uce pé pwoloa?»

¹⁷ E te téne wo lésu, ke e pii telé pie: «É mu ko ade na geé tee cuwo ko cihe ko a pwoloa? Be he time geé uce téele temehi? Woté, mwo tee ko capuhi ni pwonimewé?»

¹⁸ Pwo ni naamiiwé, ke he time geé uce alihii? Pwo ni pwojéénewé, ke he time geé uce téne?

¹⁹ Kona time geé uce niimihi ali tan li é ebii li nim pwoloa ne te li 5000 apulie? Ke niile ni éele na geé paobaanihi ko ni nehi pwoloa?» Ke lé hegi ne ten pie: «¹² ni éele.»

²⁰ «Ai, li ⁷ pwoloa ne te li 4000 apulie, ke a tan naa, ke niile ni éele li geé tai mwo?» Lé hegi ne ten pie: «⁷ ni éele.»

²¹ Ke e pii telé pie: «Kona time geé uce téele temehi kuti?!»

E pwo me e niê mwo pana bwi nang

²² Lé tuie nge ha a mwopopwaalé Betsaïda wo lésu me lépwo acémun den. Ke wo lépwo apulie lang, ke lé pébé pana bwi nang. Ke lé ile lésu me e pétaa kon.

²³ Ke e pétaa ko a in wo lésu, ke e pééeng wie mu ha a mwopopwaalé. Ke e ne a tabepwon ko ni naamii pali apulie. Ke e ne ni in ne huîn, ke e tahimwoeng pie: «Go ko alihii ce de?»

²⁴ Ke e tehi lupwo naamiin wo pali bwi, ke e pii pie: «É ali ni apulie, kehe icehi ana me é alilé, ke lé pwohewii ni acuwo na lé engen.»

²⁵ Ke e ne mwo lupwo in wo lésu ne ko ni naamiin, ke e bwo niê ehi wo paje. Ke caa wâé nang, ke e caa alihii pwaatihi ni naado.

²⁶ Ke e pii ten wo lésu pie: «Go mwojuia ne mwo pelem, kehe go nemwo taamwo ha a mwopopwaalé.»

Wo lésu ke pa Mesia

Mataio 16.13–28; Luka 9.18–27

²⁷Lé engen wo lésu me lépwo acémun den, nge he ni amu na e mwonuhi a pwomwo ubwo Césaré-Filip. Ke é he lé mwo ko â he pwaaden, ke e tahimwolé pie: «Kona lé pii pie woté ne kong ne ni apulie? Lé pii pie woéo, ke woo?»

²⁸Ke lé hegi ne ten pie: «Lé pii ne ni béén pie, wogo ke wo *Ioane pa apipuu apulie. Ke lé pii ne ni béén pie, wo péroféta *Élia. Ke lé pii mwo wo lépwo béén pie, pa céiu bée ni péroféta ânebun.»

²⁹Ke e tahimwolé wo lésu pie: «Ke kona wogewé ke?» Ke e hegi ne ten wo Pétérú pie: «Wogo ke pa *Mesia [na go âbé mu pele Padué]!»

³⁰Ke e te paciitihí kolé kuti me lé nemwo patemehi.

E bo mele ke mulie cemwo

³¹É alechen, ke e pii beetihí te ni acémun den wo lésu pie: «E bo tuie a benaamwon na é bo te nihe mu he ni picani hen, woéo pa Nahi Apulie. Be wo lépwo apihuô, me lépwo caa te lépwo *apwoâpwailo, me ni *dotéén ko patén, ke o te muhi telé kong. Ke lé bo pwo me é mele. Kehe icehi ana é ha a bécéhé ni tan alechen, ke é o bo mulie cemwo.»

³²E pii pwaatihi ne telé a pwooti naa. Kehe icehi ana e toteeng nge ha a céiu duaan wo Pétérú, ke e tabuhi pééleeng.

³³Ke e biteeng wo lésu, ke e ome lépwo acémun den. Ke e pééle Pétérú, ke e pii ten pie: «*Caatana, go engen mu he pwahamiing! Be time go uce niimihi pwohewii Padué, kehe go niimihi pwohewii ni apulie!»

A bwo âcéi lésu

³⁴É nelang, ke e tote ni apulie me lépwo acémun den wo lésu, ke e pii telé pie: «Wo paceli nimen me e âbé céing [beme pa acémun dong] ke me e nemwo bo uce piniimieng mwo. Kehe wâé heme e canihi a *kuricé ten, ke me e âbé céing.

³⁵Be wo pana nimen me celuimi a mulihen, ke e o patieden. Kehe wo pana e patieden a mulihen mu kong me a Pwooti Wâé, ke o celuimieng.

³⁶He ade ne te pa apulie, hemepie e hegi ati ni naamuu a bwohemwo, ke me e patieden a mulihen?

³⁷Kona ade aceli o jan me e ne, beme e pwocuhi mwo a mulihen?

³⁸«Be wo lépwo apulie jenaa, ke caa te lépwo apwo ne nina ta, ke time uce mwomwon jélé ne pele Padué. Ke wo lépwo béén, ke tanim jélé kong me a pwooti tong, ne ânebuhe ni apulie. Ke heme wonaa, ke woéo pa Nahi Apulie, ke o bo tanim jo kolé, hemepie geme bo âbé me ni *âcélo iitihi. É ha a tan naa, ke e bo habwii a bwo ubwo na a wâé ten wo pa Caa tong.»

Maréko 9

1 E pii telé mwo wo lésu pie: «É pii tewé a juuju pie: E bo ne éni a Mwametau ten wo Padué, ati ne ha a junuun. Ke pwo lépwo béén na élé éni jenaa, na lé o mwo te alihí anaa, ânebuhe ce bwo mele telé.»

Habwii a bwo ubwo na a wâé ten

Mataio 17.1–13; Luka 9.28–36

² É alecehe ni tan na 6, ke e pé Pétérū me Cang me loane wo lésu, ke lé taa pwo a juwole na nihe ubwo, ke lé te pimu cehi lang. Ke pitaatééhi a bwo ali lésu ne he pwahamiilé.

³ Ke â pwojo pwomelaa ni epwénen. Ke te tice pace apulie, éni pwo bwohemwo, celi jan ne kon, me pwo ace epwén celi pwojo pwohewii anaa.

⁴ Ke lé ali mwo *Élia me *Moosé [lupwo alo péroféta ânebun na piubwo julu] he lé ko picihe me weeng.

⁵⁻⁶ Ke te nihe mwoti Pétérū me lupwo bén. Ke e pii te lésu pie: «Pa apipune, te nihe wâé heme genye ko mu éni. Wâé heme geme pacuuli ce mwa mwaanu celi cié, beme a dem a céiu, ke me a de Élia a céiu, ke me a de Moosé a céiu.» E pii anaa, be caa time e uce temehi aceli me e pii, be te junihe mwotieng.

⁷ Ke e te âbé kuti a menii, ke e taluilé. Ke lé téne a pwocihe bé mu ha ali menii, na e pii pie: «Wo paje, ke pa Naîng [na te céiu nang] na te junihe eânimung den. Ke geé piténedeeng.»

⁸ Ke lé piniê aujenilé, kehe icehi ana caa te piwoélé cehi me lésu.

⁹ Ke lé homwobé mu pwo juwole, ke e pii mwoiuhi telé wo lésu pie: «Geé nemwo pii te ce bée apulie nina geé alih, dieli ha ace tan celi é bo mulie cemwo mu ha amele, woéo pa Nahi Apulie.»

¹⁰ Ke lé piténedehi a pwocihe naa. Kehe icehi ana lé pitahimwolé pie: «He a bwopiine ace de, ana e pii pie: “É bo mulie cemwo mu ha amele”?»

Lé tahimwoeng ko Élia

¹¹ Ke é alechen, ke lé tahimwo lésu pie: «Lé pii wo lèpwo *dotéén ko patén pie: “Wo Élia pana me e mi âbé, ânebuhe [pa *Mesia].” Ke he wonaa be woté?»

¹² Ke e hegi ne telé wo lésu pie: «Éa kuti, e mi âbé wo Élia, beme e pine ehi ni naado he ni amu nen. Ke lé caa tii mwo ne kong ne he ni tii iitihi pie, e bo mu he ni picani wo pa Nahi Apulie, ke lé bo téétieng. Wonaa mu ko ace de?»

¹³ É pii tewé pie: E caa te âbé wo Élia, ke lé caa te pwo ten nina nimelé kon ne ni apulie. Be caa te tii ne he ni tii iitihi.»

E pwo me wâé pa céiu ewa @ na pwo duéé kon

Mataio 17.14–21; Luka 9.37–43

¹⁴ [Me lé homwobé mu pwo juwole] wo lésu me lèpwo acémun den na cié jélé, ke lé â too lèpwo bée acémun béeilé. Ke lé ali ni apulie na te junihe hiwon jélé, na lé mu aujenilé. Be lé picihe me lèpwo dotéén ko patén.

¹⁵ Ke me lé ali lésu ne ni apulie, ke lé te junihe téele. Ke lé téte nge céiieng, beme lé pwobwocu ten.

¹⁶Ke e tahimwo lépwo acémun den pie: «Kona ace de celi geé ko pipii me woélé?»

¹⁷Ke e hegi ne ten wo pa céiu mu ko ni apulie naa, ke e pii pie: «Pa apipune, é pwo me é pébé céiiko pa naîng. Be pwo duéé kon, ke e mu pwo me time e cihe.

¹⁸Pwo ni béé benaamwon na e mu pééeng, ke e tahieng ole pwo bwohemwo. Ke mu téte ni tabepwon, ke e mu piwii pecuwo, ke mu te ju mwoiu a één. Ke é ile lépwo acémun dem pie, me lé peni ali duéé, kehe icehi ana time uce jan me lé pwo.»

Te tai jan ati ne ko pana e céihi!

¹⁹Ke e pii telé wo lésu pie: «[É te junihe pipwoééhewé] wogewé ni apulie jenaa! Mwo te time geé uce téele céihi, be wogewé ni apwo mwoiu pun! O é dieli éniile celi é o mwo tee mu pelewé, ke me é mwo tee picani ne kowé? Geé pébé éni pa cuwo ewa naa!»

²⁰Ke lé pééeng bé. Ke me e ali lésu na ali duéé, ke e te pwo me éjén ati kuti pali cuwo ewa. Ke e tupwo, ke e ngaulieng nge pwo bwohemwo. Ke téte ni tabepwon.

²¹Ke wo lésu, ke e tahimwo pali caa te pali cuwo ewa pie: «Tabuhi éniile celi wonaa nang?» Ke e hegi ne ten pie: «Te tabuhi ha a bwo mwo te wahin nang.

²²Ke a duéé naa, ke pwo ni benaamwon na e mu tahieng da pwo miû, ke é he tabe, beme e mele. Kehe go pipwoééheme me picani teme, hemepie te jan me go pwo.»

²³Ke e hegi ne ten wo lésu pie: «É mu ko ade na go pii tong pie: “É hemepie te jan me go pwo”? Te tai jan ati ne ko pana e céihi!»

²⁴Ke e te toii kuti wo pali pie: «Uhuu! É céihi! Kehe icehi ana go picani tong, be time uce junihe ubwo a céihi tong!»

²⁵Ke e alih wo lésu pie, hiwon ni apulie na lé teko âbé ne kolu. Ke e te epin kuti ko peni ali duéé, ke e pii ten pie: «Wogo pa duéé na go pwo me time e cihe, ke me time e ténekenye, ke é pii tem pie: Go wie mu ko paje! Ke me time go bo uce taamwo kon!»

²⁶Ke e wiikau na ali duéé, ke e te pwo me éjén kuti pali cuwo ewa, ke e te wie kuti. Kehe icehi ana mepwo wo pali cuwo ewa, ke pwohewiin heme e caa mele. Ke hiwon ni apulie na lé pii pie e caa mele.

²⁷Kehe icehi ana e pétaa ole wo lésu, ke e pwiieng.

²⁸É alechen, ke e mwojuia ngemwo pwomwo wo lésu. Ke me lé te pimu cehi me lépwo acémun den, ke lé tahimwoeng pie: «É ko ade na time uce jan me geme pwo me e wie ali duéé?»

²⁹Ke e hegi ne telé pie: «Te é ko a pwopwoiitihi te Padué cehi na o jan me nye pawie a bwo pwo duéé naa.»

E patemehi mwo a bwo mele ten

Mataio 17.22—18.9; Luka 9.44–50

30 Lé wie mu ha a duaan naa wo lésu me lépwo acémun den, ke lé pitahagéi epin a amu Galilé. Be time uce nime lésu me lé temehi ne ni apulie pie e mu lang.

31 Be e ko pacémunihi ne te lépwo acémun den pie: «O bo icuéo te ni apulie, woéo pa Nahi Apulie. Ke lé o imwiéo, ke lé o bo pwo me é mele; kehe é ha a béciéhe ni tan alecehen, ke é bo mulie cemwo mu ha amele.»

32 Kehe icehi ana time lé uce temehi ana e pii. Ke mwotilé me lé tahimwoeng kon.

Woo paceli piubwo nang?

33 Lé tuie nge ha a mwopopwaalé Kapernaüm. Ke me lé taa ha a mwa, ke e tahimwolé wo lésu pie: «Kona ace de celi geé ko pipii he li genye ko âbé?»

34 Kehe icehi ana time lé uce hegi ne ten. Be he lé ko âbé he pwaaden, ke lé pitahimwolé pie: «Kona woo paceli piubwo nang ne ha awiemenye?»

35 Ke e tebwo wo lésu. Ke e pwo me lé aujenieng, ke e pii telé pie: «É hemepie pwo pace céiu apulie celi nimen me pa bécéiuhen, ke wâé heme pa bénebwénen, ke me e pwo me piwahin nang, ke me e penem me de ati ni apulie!»

36 Ke e pé pa cuwo nahi ewa, ke e neeng ha awimelé, ke e mwomwaaaueng, ke e pii telé pie:

37 «Wo pana e hegi ne he niing, pace cuwo nahi ewa pwohewii paje, ke e hegiéo. Ke wo pana e hegiéo, ke time e uce hegiéo cehi, kehe e hegi mwo pana e neéo bé.»

Pana time e uce âdekenye

38 Ke e pii wo loane te lésu pie: «Pa apipune, geme ali pa céiu apulie na e peni ni duéé ne he niim. Ke geme pii ten pie me e nemwo pwo. Be time uce pa béénye.»

39 Ke e hegi ne telé pie: «Geé nemwo tanyuueng! Be wo pana e pwo ni *pipwojunuun ne he niing, ke o pwocoon me e uce pii celi ta ne kong.

40 Be wo pana time e uce âdédekenye, ke pa béénye.

41 Ke é pii tewé a juuju pie: Wo paceli e ne tewé ace mwoûdu ko ju tabe, be wogewé lépwo bée *Kériso, ke wo panaa, ke e bo hegi mwo ace cuhin.»

Geé pipwocile!

42 «Go nemwo pwotahi a céihi te pa apulie na e céihi ne kong pwohewii a cuwo nahi ewa, be o te junihe ubwo a cuhinaado tem. Ke wâé heme cie ace pilehe péi ne ko a henem, ke o tahiko ole he jié!»

⁴³ «Mepie watihen a im me go pwo ana ta, ke go tahagéi. Be wâé heme go taa ha *a ju mulip pele Padué, hemepie te céiu a im. Kehe te junihe pwoééhem heme go te cile lupwo im, ke me tahiko ne ha a miû na te tice paceli jan me e taunuhi!

{⁴⁴ É ha a duaan naa, ke time lé uce mele ne ni ûnele kolé, ke o tee éle a miû, ke o te tice anebwén kon.}

⁴⁵ «Ke mepie watihen a am me go pwo ana ta, ke go tahagéi. Be wâé heme go taa ha a ju mulip pele Padué, hemepie te céiu a am. Kehe te junihe pwoééhem heme go cile lupwo am, ke me tahiko ne ha a miû!

{⁴⁶ É ha a duaan naa, ke time lé uce mele ne ni ûnele kolé, ke o tee éle a miû, ke o te tice anebwén kon.}

⁴⁷ «Ke mepie watihen a naamiim me go pwo ana ta, ke go tuu tahi taabwon. Be wâé heme go taa ha a *Mwametau te Padué, hemepie te céiu a naamiim. Kehe te junihe pwoééhem heme go tee cile lupwo naamiim, ke me tahiko ne ha a miû!

⁴⁸ É ha a duaan naa, ke time lé uce mele ne ni ûnele kolé, ke o tee éle a miû, ke o te tice anebwén kon.

⁴⁹ «Muko pétaapwo ni apulie, ke e bo ne telé a miû me a jié [beme pétaabwon ni ta pwo telé].

⁵⁰ A jié, ke a céiu naado na wâé, kehe mepie e patieden a nemen, ke he genye bo pwo nemenaado ko ace de? Wâé heme e mu kowé a jié, ke me geé mulie ne ha a wâé me ni béewé.»

Maréko 10

Piaten me a pitahagéi piaten

Mataio 19.1–12; Luka 16.18

¹ É mulang, ke e engen mu ha a duaan naa wo lésu. Ke e pitahagéi a amu *Judé. Ke e gaale ko a céiu goo a éémwa lоридано. [Ke é ati he ni duaan na e mu â hen] ke lé âbé ne ni apulie, ke lé mu aujenieng. Ke e pacémunilé ko a pwooti, be ana caa te cemang ne kon me e pwo.

² Ke lé âbé céiieng wo lèpwo bée *Farasaio. Ke lé pwo me lé pipwohuô ten, ke lé tahimwoeng pie: «Kona te pwo mwomwon de pa apulie ne he ni patén me e cibéé ê mwoden?»

³ Ke e uce tahimwolé wo lésu pie: «Kona e pii pie woté [ne he ni patén den] wo *Moosé?»

⁴ Ke lé hegi ne ten pie: «Time e uce paciitih wo Moosé ko pa apulie me e pamwojuia ê mwoden, ke wâé heme e pwo ace tii me pitahagéi piaten.»

⁵ Ke e pii telé wo lésu pie: «Geé téne, e tii me dewé a patén naa, be te nihe mwoiu ni puniwé!»

6Kehe icehi ana é ha atabuhi kon, he e tabuhi a bwohemwo wo Padué, *ke e ne pa aiu me ê toomwo. Genèse 1.27*

7 *É mu ko anaa, ke e patupwo lu nyaa me caa ten wo pa aiu, beme lu pimu me ê mwoden.*

8Ke *me wonaa, ke caa céiu julu. Genèse 2.24* «[É ko anaa, na é pii tewé pie]: Caa time bo uce alo mwo lupwoce apulie, kehe caa te ju céiu julu.

9Ke geé nemwo pineitééhi mwo nina e caa pineibuhi wo Padué.»

10Ke [lé engen kojalé] wo lésu me lépwo acémun den, ke me lé mwojuia ngemwo pwomwo, ke lé tahimwoeng mwo ko ali pitahagéi piaten.

11Ke e pii telé pie: «Mepie e cibéé ê mwoden wo pace apulie, ke me e piaten mwo, ke pa apibune.

12Ke hemepie e engen koja pa aiu hen ê toomwo beme e piaten mwo, ke ê apibune.»

E adéi ni cuwo nahi ewa wo lésu

Mataio 19.13–15; Luka 18.15–17

13Lé âbé céii lésu wo lépwo apulie, ke lé pébé céiieng ni cuwo nahi ewa, beme e ti kolé [ke me adéilé]. Kehe icehi ana lé cihe me ubwo ne kolé wo lépwo acémun den, ke lé pacuwolé.

14Ke me e alihia anaa wo lésu, ke time uce wâé ne kon, ke e pii telé pie: «Geé ne ni cuwo nahi ewa me lé âbé céiiéo. Geé nemwo pacuwolé, be a *Mwametau te Padué, ke a de ni apulie na lé pwohewii ni cuwo nahi ewa.

15Éa, é pii tewé a juuju pie: Wo pa apulie na time e uce hegí a Mwametau te Padué pwohewii ni cuwo nahi ewa, ke wo panaa, ke o pwocoon ne kon me e taa hen.»

16Ke e te pé kuti li cuwo nahi ewa, ke e haailé, ke e ne ni in huîlé, ke e adéilé.

Pa apulie na nihe pwo den

Mataio 19.16–30; Luka 18.18–30

17É he e mwo ko pwo me e engen wo lésu, ke e téte tehenebé wo pa céiu apulie. Ke e â tidih jilin he pwahamiin, ke e tahimwoeng pie: «Pa apipune, wogo pa apulie na te junihe wâé go kuti. He ade aceli me é pwo, beme é hegí a *mulie dieli mwo ne pele Padué?»

18Ke e hegí ne ten wo lésu pie: «Kona é mu ko ade na go pii kong pie, woéo ke pa apulie na wâé jo? Be te tice pace apulie celi wâé nang, kehe te icehi Padué.

19[Ke é ne ko a bwo tahimwohi nen dem] ke go temehi ehi ni patén: *Go nemwo taunuhi apulie; Go nemwo pibune; Go nemwo bune; Go nemwo pii ce pwootí celi ni gele ne ko ce bée apulie ; Go nemwo pwo ce huô celi ta ne ko ce bée;n; Go paciiti lu nyaa me caa tem.*» *Exode 20.12–16*

²⁰Ke e hegi ne ten wo pali apulie pie: «Pa apipune, é caa te ténedehi kuti ninaa, ha a bwo mwo wahin jo.»

²¹Ke e te ju omeeng wo lésu, be te junihe eânimén den, ke e pii ten pie: «Go téne, te ju céiu cehi a naado na mwo tieden kojako: Go engen, ke go â icuhi ati ni dem, ke go pé ni cuhin, ke go ne te nina tice delé. Be me wonaa, ke o pwo ce dem ne [pele Padué na e jeda] he miiden. Ke nebwén, ke go âbé céing.»

²²Kehe me e téne anaa wo paje, ke te junihe piwahin nang, be te junihe pwo den. Ke e engen.

A bwo taa ha a Mwametau

²³Ke wo lésu, ke e ome lépwo acémun den na élé aujenieng, ke e pii telé pie: «Geé téne, wo lépwona te junihe pwo delé, ke te junihe pwocoon ne kolé me lé taa ha a Mwametau te Padué!»

²⁴Ke lé te junihe téele ko a pwocihe naa, kehe icehi ana e bwo pii telé mwo pie: «Lépwo bééng, uhuu! Te junihe pwocoon ne ko pace apulie me e taa ha a Mwametau te Padué.

²⁵Kona a chameau, ke o te jan ne kon me e taa ha a pwon ko a diti? Úhu, pwocoon, kehe é pii tewé pie: Wo pa apulie na pwo den, ke mwo te junihe pwocoon ne kon me e taa ha a Mwametau te Padué.»

²⁶Ke lé te junihe téele kuti wo lépwo acémun den, ke lé te pipii telé mwo pie: «Ke kona woo paceli jan me e piceluimieng?»

²⁷Ke e omelé wo lésu, ke e pii telé pie: «Ana time uce jan ne ko pa apulie me e pwo, ke jan ne ko Padué. Be ati ni naado, ke te tai jan ne ko Padué.»

²⁸Ke e hegi ne ten wo Pétérú pie: «Wogeme, ke geme caa patupwo ati ni naado, beme geme âcéim!»

²⁹Ke e pii telé wo lésu pie: «É pii tewé a juuju pie: Wo paceli e patupwo a pomwa ten, me ni âjiénen, me ni toomwo pwaadeniin, me lu nyaa me caa ten, me ni naîn, me apwoamu ten, watihen woéo me a Pwooti Wâé,

³⁰ke o tabuhi jenaa, ke e bo hegi ce naado celi piwéden, celi te junihe ubwo ke hiwon. Ke o pwo ne ten ce pwomwo, me ce âjiénen, me ce ewa pwaadeniin, me ce nyaa me caa ten, me ce naîn, me ce apwoamu ten. Kehe e o bo hegi mwo ni picani me ni téé, [wonaa mu ko ana pa apulie tong]. Kehe é alecehen, ke o pwo den ko a mulie dieli mwo ne pele Padué.

³¹Te junihe hiwon nina lé ânebun jenaa, na lé o bo alece. Ke hiwon nina lé alece jenaa, na lé o bo uce ânebun.»

E pii a béociéhe a bwo mele ten

Mataio 20.17–19; Luka 18.31–34

³²É he lé ko taa *lérusaléma, ke e ânebun wo lésu, ke lé alecehen wo lépwo 12 acémun den, me ni bée apulie. Ke â pinekepé ne telé, ke mwotilé. Ke e pé

itéhi lépwo acémun den wo lésu, ke e patemehi telé ni naado na e bo tuie ne kon:

³³«Geé téne, genye o caa taa lérusaléma. Ke é nelang he na o neéo, woéo pa Nahi Apulie, te lépwo caa te lépwo *apwoâpwailo, me lépwo *dotéén ko patén. Ke lé bo tautiéo die ko ace bwo taunuéo, ke lé o neéo te nina te tice céhi telé.

³⁴Ke lé o pihooniéo wo lépwonaa, ke lé o cumi ne kong, ke lé o ahiéo ko a bwaliwota, ke lé o pwo me é mele. Kehe icehi ana é ha a béciéhe ni tan alechen, ke é o mulie cemwo mu ha amele.»

Genye pwo me piwahin genye

Mataio 20.20–28

³⁵É alechen, ke lu âbé céii lésu wo Cang me loane, lupwo naî Zébédé, ke lu pii ten pie: «Pa apipune, pwo a céiu naado na me gemu ilehi kojako, be nimemu me go ne temu.»

³⁶Ke e pii telu pie: «De aceli nimeu kon?»

³⁷Ke lu hegi ne ten pie: «É hemepie go bo mu ha a Mwametau tem me *a wâé tem, ke go patupwo ne temu, beme mu tebwo he ni piduaam: wo pa céiu ne pwo juim, ke wo pa céiu ne pwo eaamum.»

³⁸Ke e hegi ne telu pie: «Time geu uce temehi ana geu ko ilehi! Kona geu o te ûdu a tabe ko picani na é o ûdu? Kona te jan me geu mulie he ni picani pwohewiiéo?»

³⁹Ke lu hegi ne ten pie: «Éa, o te jan ne komu!» Ke e pii telu pie: «Éa kuti, geu o ûdu a tabe na é o ûdu, ke geu bo mulie he ni picani pwohewiiéo.

⁴⁰Kehe time uce woéo na é pihuô pie, woo paceli e o tebwo pwo a ing ne pwo jui, ke é pwo eaamung. Be te wo Padué na e caa te piwâamihi ni atebwo naa, me de ni béen na e caa te pipégalilé.»

⁴¹Me lé téne a pwocihe naa wo lépwo 10 acémun béélu, ke lé okéé ne ko loane me Cang.

⁴²Ke e todelé bé wo lésu, ke e pii telé pie: «Geé temehi pie, é ne pele ni béen na time uce ni apulie te Padué, ke lé caaite ni apulie wo lépwo daame me lépwo apihuô. Ke lé pwo me piubwo jélé.

⁴³Kehe wogewé, ke geé nemwo pwohewiilé! Be wo pana nimen me piubwo nang ne hadeniiwé, ke wâé heme e pipwoeabwé tewé.

⁴⁴Ke wo pana nimen me e ânebun, ke o wâé heme pa céiu *apenem tice ja kon te ni apulie ati.

⁴⁵Be woéo, pa Nahi Apulie, ke time é uce âbé beme lé pipwoeabwé tong. Kehe é âbé beme é pipwoeabwé te ni apulie, ke me é patupwo a mulihung, beme cuhi a bwo *celuimi ni apulie na hiwon jélé.»

E pwo me e niê pa bwi

Mataio 20.29–34; Luka 18.35–43

⁴⁶Lé tui nge ha a mwopopwaalé lériko wo lésu me lépwo acémun den. Ke me lé wie mu ha a mwopopwaalé, ke te nihe hiwon ni apulie na lé âcéilé. Ke pwo pa bwi na e tebwo ko a jije pwaaden, na a niin pie Bartimé, pa naî Timé. Wo panaa, ke pa a-ile, be pana te tice den.

⁴⁷Ke é heme e téne pie e tui wo lésu, pa apulie Nazaret, ke e toii da pie: «lésu, pa *Naî Davita, go pipwoééhung!»

⁴⁸Hiwon ni apulie na lé pihaaeng, beme e nemwo cihe. Kehe icehi ana e bwo te junihe cihe da ko miiden kuti, ke e pii pie: «Pa Naî Davita, go pipwoééhung, ke go picani tong!»

⁴⁹Ke e â cuwo wo lésu, ke e pii telé pie: «Geé toteeng.» Ke lé toteeng, ke lé pii ten pie: «Go mwoiu! Ke go cuwoda, be e toteko!»

⁵⁰Ke e te pwome tahi taabwon kuti a palito ten, ke e cuwoda, ke e âde lésu.

⁵¹Ke e tahimwoeng wo lésu pie: «Ade aceli nimem me é pwo me dem?» Ke e hegi ne ten pie: «Pa apipune, me é niê mwo!»

⁵²Ke e pii ten wo lésu pie: «Go engen, be caa wâé go mwo mu ko a céihi tem.» Ke e te niê kuti pwohewiin ânebun. Ke e âcéi lésu nge he pwaaden.

Maréko 11

E taa lérusaléma wo lésu

Mataio 21.1–19; Luka 19.28–48; Ioane 12.12–19

¹Lé âmwonuhi *lérusaléma wo lésu me lépwo acémun den. Ke lé tui nge mwonuhi lupwo mwopopwaalé Bétani me Betfagé die pwo a juwole ko ni Olivier. Ke e mi ne ngen lupwo alo acémun den wo lésu,

²ke e pii telu pie: «Geu â ha a mwopopwaalé na e ânebuheny. Ke geu bo tooli nelang a nahi buriko na lé taaeng, na mwo te tice apulie celi lé mu tebwo huîn. Ke geu tuwoeng, ke geu pééeng bé.

³Ke mepie lé tahimwokeu pie: “É mu ko ade na geu tuwoeng?”, ke geu hegi ne telé pie: “Nime Padaame kon. Ke e o te neeng bé.”»

⁴Ke lu ân, ke lu tooli ali nahi buriko ne ko jije pwaaden, na lé taaeng mwonuhi a pomwa ko a céiu mwa. Ke lu tuwoeng.

⁵Ke wo lépwona lé mu lang, ke lé tahimwolu pie: «He ade ana geu ko pwo? É mu ko ade na geu ko tuwo a nahi buriko naa?»

⁶Ke lu hegi ne telé ko ali e pii telu wo lésu, ke lé te nelu.

⁷Ke lu pébé céii lésu ali buriko. Ke lé ne ni epwén huîn wo lépwo acémun den, ke e bwo taa tebwo huîn wo lésu.

Lé pipaunueng ne ni apulie

⁸Hiwon ni apulie na lé talihi ni mwaanu telé nge pwo a pwaaden ânebuhe lésu [beme lé pipaunueng]. Ke wo lépwo bén, ke lé ne ni dihe acuwo na mwo wamin na lé tahagéi nge he ni apwoamu.

⁹Ke lépwona lé ânebuhe lésu, me lépwona lé alecehen, ke lé tai toii da pie: «Osana! Pipwoun de Padué! *Adéi pa apulie na e âbé ne he nii Padaame!Psaume 118.26

¹⁰Wâé hemepie adéihi a mwametau na e mwo ju tuie, a mwametau te *Davita, pa watihenye! Osana! me adéihi! Paunu Padué na e daaité!»

¹¹Ke e tuie nge lérusaléma wo lésu, ke e taa ha a *mwaiitihi, ke e alih [nina lé ko pwo nelang wo lépwona lé teko mu lang]. Ke nebwén, ke lé â Bétani me lépwo ¹² acémun den, be caa bwén.

A éé majing na te tice acehin

¹²É ha acaama hen, he lé wie mu Bétani, ke mene lésu.

¹³Ke e alih mu ité a *majing, na te junihe bupwi. Ke e piâmwonuhi beme e alih pie, te pwo ce acehin. Kehe me e piân, ke e te ju tooli cehi ni madihin, be time uce a benaamwon ko ni ace majing.

¹⁴Ke e pii ten pie: «É jenaa, ke te tice paceli e bo wii mwo ce acehiko!» Ke lé téneeng wo lépwo acémun den.

E peni lépwo api-icu mu ha a mwaiitihi

¹⁵Lé tehene nge lérusaléma. Ke e taa ha a mwaiitihi wo lésu, ke e peni wie lépwona lé pwojenep nelang. Ke e pwii taabwon ni taap te lépwo ataatééhi mwani, ke ni atebwo te lépwo a-icuhi meni.

¹⁶Ke e pii telé pie: «Geé nemwo pé da haulihi ce naado ne ha a mwaiitihi!

¹⁷Be e pii wo Padué ne he ni tii iitihi pie: *A mwa tong, ke bo toii kon pie a mwo ko pwoiitihi me de ati ni amu. Ésaïe 56.7* Kehe wogewé, ke geé ko pwo me ataduwo te lépwo abune!» Jérémie 7.11

¹⁸Wo lépwo caa te lépwo *apwoâpwailo me lépwo *dotéén ko patén, ke lé téne a jepule ko ana e pwo wo lésu. Ke lé hane ace bwopwonen beme lé taunueng, be mwotilé kon. Be caa junihe hiwon ni apulie na lé [â céieng be lé] picedihi nina e pii.

¹⁹Ke é he babwén, ke lé wie mu ha ali pwomwo ubwo wo lésu me lépwo acémun den.

Geé céihi ne ko Padué

Mataio 21.21–22

²⁰É ha acaama hen, ke lé â he pwaaden wo lésu me lépwo acémun den, ke lé alih ali éé majing li e piapwohi, he caa meiu ati, die ko ni waan.

²¹Ke wo Pétéru, ke e niimihi ali e pii wo lésu. Ke e pii ten pie: «Pa apipune, go alih! E caa meiu ali acuwo li go piapwohi haabwén.»

22Ke e pii wo lésu telé pie: «Wâé heme geé céhi ne ko Padué!

23Be é pii tewé a juuju pie: O te jan me geé pii te a juwole ce pie: “Go pwiiko, ke go engen mulang, ke go téele ole he jiél!”, ke e o pwo wo Padué! Kehe icehi ana wâé heme geé céhi pie, o tuie ana geé pii. Geé nemwo pwo me pinekepé ni pwonimewé!

24Anaa kuti a watihen me é pii tewé pie: Heme geé pwoiitihi me ilehi ace céiu naado, ke wâé heme geé céhi pie geé caa hegí. Ke me wonaa, ke e o ne tewé wo Padué.

25«Ke mepie geé cuwoda me geé pwoiitihi, ke wâé heme geé pineu mwo lépwona lé pwo tewé nina ta. Be me wonaa, ke wo Caa tewé na e jeda he *miiden, ke e o pineukewé mwo ko ni ta pwo tewé.

{**26**Kehe mepie time geé uce pineu lépwo bén, ke wo pa Caa tewé na e jeda he miiden, ke time e o uce pineukewé ko ni ta pwo tewé.}»

Woo na e ne te lésu a pihuô?

Mataio 21.23–27; Luka 20.1–8

27Lé taamwo Iérusaléma wo lésu me lépwo acémun den. Ke me e ko engen ha ali mwaiitihi wo lésu, ke lé âbé mwonueng ne ni bée caa te lépwo apwoâpwailo, me lépwo dotéén ko patén me lépwo apihuô.

28Ke lé tahimwoeng pie: «De ne ace pihuô me go pwo nina go ko pwo? Woo na e pahedeko?»

29Ke e hegí ne telé pie: «Woéo mwo, ke é o mwo tahimwokewé ko a céiu naado. Ke mepie geé hegí ne tong, ke é bo pii tewé pana e ne tong a pihuô me é pwo ni naado naa.

30Kona wo loane, ke e *pipuu apulie mu ko a pihuô te Padué, ai é mu ko a pihuô te ni apulie? Geé hegí ne tong!»

31Ke lé te junihe picihe kon, ke lé pipii telé pie: «Mepie genye hegí ne ten pie: “É mu ko Padué”, ke e o pii tenye pie: “Ke é mu ko ade na time geé uce céhi ne ko nina e pii tewé wo loane?”

32Ke mepie genye hegí ne ten pie: “É mu ko ni apulie”, ke [ade aceli e o tuie ne konye]?» Be mwotilé ko ni apulie na lé caa ju céhi ati pie, wo loane, ke pa péroféta [te Padué].

33Ke é mu ko anaa, ke lé hegí ne te lésu pie: «Meniing, time geme uce temehi.» Ke e pii telé pie: «Ke woéo mwo, ke time é o uce pii tewé pie, he wooélé na e ne tong a pihuô me é pwo nina é ko pwo.»

Maréko 12

Lépwo awéihi na a ni tabe megele

Mataio 21.33–46; Luka 20.9–18

¹ E pacihe ni apulie wo lésu, ke e piuti telé ni ocine: «E bwo mu wo pa eapwihi a ni tabe megele. Ke e bwo cemi apwoamu ten, ke e bwo pwo a aba, beme a babé kon. Ke e ini a pwon, beme acaaï ace tabe megele, ke me e bo céi ne hen a tabe hen. Ke e bahi a mwa na te junihe bwali da ko miiden, beme a mwowéa ko ali ni éé tabe megele. Ke nebwén, ke [e niimihi pie me] e mwo â pitabée ha ace céiu amu, ke e pwocuhi ni bée apulie, beme lé wéhi ali ni tabe megele ten, ke e engen.

² «[Pwo ni wole alecehen] ke tuie nge ha a benaamwon ko tabwo ace tabe megele. Ke e ne ngen pa céiu apenem den, beme lé ne ten ace den mu ko ali ni éé tabe megele ten.

³ Kehe icehi ana lé pitatieng, ke lé neeng ngemwo, he te tice celi lé ne ten.

⁴ Ke é mulang, ke e ne ngemwo pa céiu apenem den. Ke lé piahieng ko péi, ke lé tanahi a punin, ke lé piciheta ne kon.

⁵ «Ke nebwén, ke e ne ngemwo pa béciéhe ni apenem den, kehe icehi ana lé taunueng. Ke hiwon ni bée apenem den na e nelé ngemwo, ke lé piahi ni béén, ke lé taunu ni béén.

⁶ «Ke nebwén, ke caa te tice apulie celi me e nelé ngen, ju nehi céiu pa ju naîn, na te nihe eânimén den. Ke e neeng nge céii lépwo awéa ko ali ni éé tabe megele. Be e piniihihi pie, lé o paciitieng, be te pa naîn.

⁷ «Kehe icehi ana lé pipii telé pie: “Geé téne, te weengaa kuti pana e bo eapwihi ali ni tabe megele ha ace céiu tan. Wâé heme nye ju taunueng, beme bo a denye ali ni tabe megele!”

⁸ «Ke lé imwieng, ke lé taunueng, ke lé pé a één, ke lé tahi ne ité koja ali apwoamu.»

⁹ Ke wo lésu, ke e tahimwo lépwona lé ko tabemieng pie: «Ke e bo pwo de wo pali eapwihi ali ni tabe megele? E bo âbé, ke e bo taunu li apulie na ta jélé. Ke e bo uce ne te ce béén ali ni tabe megele, beme lé bo uce wéa kon.

¹⁰ Kona time geé uce pine ana tii ne he ni tii iitihi? *Ali péi li lé tahi taabwon wo lépwo abahi mwa, ke te anaa kuti a ju paamwa.*

¹¹ *Be te ni âpihuô te Padaame. Ke nye téetihî a wâé ten, na nye caa ko alihî!» Psaume 118.22–23*

¹² Ke he lé téne anaa wo lépwo apihuô te lépwo *Juif, ke lé hane me lé imwi lésu. Be lé te temehi pie, e ko pwo-ocine ne kolé. Kehe icehi ana mwotilé, be hiwon ni apulie [na wâé telé nang]. Ke lé neeng, ke lé engen.

A cuhi puni apulie te lépwo Roma

Mataio 22.15–22; Luka 20.19–26

¹³ Wo lépwo caa te pwoiitihi, ke nimelé me lé pipwohuô te lésu, ke lé ne nge céiieng ni *Farasaio, ke ni apulie mu pele *Érode [beme lé tahimwoeng ko ce

naado]. Be lé hane pwaaden beme lé pipé ne kon, mu ko ace bwo hegi nen den.

¹⁴Ke lé â pii ten pie: «Pa apipune, geme temehi pie go pii a juuju. Ke time uce mwotiko ko ni apulie, ke time go uce pipwoinen ne kolé, kehe go te patemehi ati ni naado na nime Padué me genye pwo. Ke anaa kuti ana nimeme me geme tahimwoko pie: He te wâé heme nye pwocuhi puni apulie te pa daame he lèpwo Roma? Ai time uce wâé?»

¹⁵Ke e te temehi wo lésu pie lèpwo apulie naa, ke lèpwo agele, ke e pii telé pie: «É ko ade na geé pihaamiéo? Geé cuwoteeke habwii tong ace céiu mwani péi.»

¹⁶Ke lé ne ten a mwani péi. Ke e pii telé pie: «A démee, ke a nii-î ana e pwo a mwani ce?» Ke lé hegi ne ten pie: «A de pa daame he lèpwo Roma.»

¹⁷Ke e pii telé wo lésu pie: «Ke caa wâé, ke geé ne te pa daame nina te ni den, ke geé ne te Padué nina te ni de Padué.» Ke lé nihe téethi a bwo hegi nen den.

A bwo mulie cemwo te ni amele

Mataio 22.23–33; Luka 20.27–38

¹⁸Lé âmwobé céii lésu wo lèpwo bée *Saducéen. [Woélé, ke te a céiu dihe pwoiitihi te lèpwo Juif] na time lé uce céihi pie, lé o mulie cemwo wo lèpwo amele. Lé âbé too lésu [ke lé pwo me lé habwii pie lé juuju] ke lé tahimwoeng pie:

¹⁹«Pa apipune, e caa tii me denye wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé ê depweleton wo pa ciéen me lu piaten. Deutéronome 25.5* Be me wonaa, ke me bo pwo ce piebehi pa amele.»

²⁰«[Ke te wâé. Kehe go cuwoteeke niimihi ani]: Pwo lèpwo pwénaâjién na 7 jélé, ke e piaten wo pa cuwolé, kehe icehi ana e mele he mwo te tice naîn.

²¹Ke wo pa béalohen, ke lu piaten me êgi depwele, kehe icehi ana e te mele mwo wo paje, he te tice naîlu. Ke te piwien ne ko pa béciéhen.

²²Ke te wonaa mwo ne ko lèpwoli 7 jélé. Be lé te tai mele, ke he te tice naîlé. Ke é alechelé ati, ke e bwobe mele wo êgi toomwo.

²³Ke [go ko pii pie] lé bo mulie cemwo ne ni amele ha ace céiu tan. Ke hemepie wonaa, ke o bo wooélé mu hadeniilé celi bo pa aiu he ê toomwo naa, ha a benaamwon naa? Be caa te tai lèpwo aiu hen ati! [Ke go cuwoteeke hegi!]»

²⁴E hegi ne telé wo lésu pie: «Geé pipweéo, be time geé uce temehi ni tii iitihi, me a junuu Padué.

²⁵Be mepie lé mulie cemwo ne ni amele, ke time lé o bo uce piaten mwo, kehe lé mulie pwohewii ni *âcélo ne pele Padué.

²⁶«[Geé ko tahimwoéo] ko a bwo mulie cemwo mu ha amele. He time geé uce pine ne he ni tii te Moosé a jepule ko ali nahi acuwo li e éle kon ali miû? Be é

nelang he na e pii ten wo Padué pie: *Woéo Padué he *Abérama, ke Padué he Isaaka, ke Padué he lakobo. Exode 3.6*

²⁷[A bwopiinen pie, lé teko tai mulie pele Padué!] Be time uce Padué he ni amele, kehe Padué he nina lé mulie! Geé te nihe pipweéo!»

A patén na piwéden

Mataio 22.34–40; Luka 10.25–28

²⁸É he lé mwo ko picihe, ke e tabemilé wo pa céiu *dotéén ko patén, ke e alihí pie, e te ju hegi ehi ne te lépwo Saducéen wo lésu. Ke e âbé mwonueng, ke e tahimwoeng pie: «Kona ade patén celi e piwéden na ati he ni patén?»

²⁹Ke e hegi ne ten wo lésu pie: «Weengi: Geé téne wogewé lépwo *Isaraéla! Wo Padaame Padué, ke te weengaa kuti pa ju Daame henye, na te céiu nang!

³⁰Ke go pwo me eânimem den ati ne ha a ju pwonimem, me a mulihem, me a bwo niimihinaado tem, me a niihem. Deutéronome 6.4–5

³¹«Ke weengi a bálohe ni patén: Go pwo me eânimem de ni béén, pwohewii a bwo pieânimem dem. Lévitique 19.18 Be te tice ace céiu patén, celi piwéden koja lupwo patén naa.»

³²Ke e pii ten wo pa dotéén ko patén pie: «Éa kuti! Te junihe a juuju, go pa apipune, ana go ko pii! Be wo Padaame, ke te weeng kuti pa ju Dué henye! Ke te tice mwo pace céiu!

³³Ke wâé heme eânimenye ten mwo ati ne he ni ju pwonimenye, me ni pitemang, me ni niihenye. Ke wâé mwo, heme eânimenye mwo te ni béén pwohewii a bwo pieânimenye tenye. Te junihe a junaado ana koja ni *âpwailo te Padué, me ni béé âpipati.»

³⁴Ke e alihí wo lésu pie e hegi ha a pitemang den, ke e pii ten pie: «Time uce wogo ité koja a *Mwametau te Padué.» Ke caa mwoti ni apulie me lé tahimwo lésu ko ce béé naado.

Nihe pwonaado ne ko pa Mesia

Mataio 22.41–46; Luka 20.41–44

³⁵É he e ko pacémunilé ne ha a *mwaiitihi wo lésu, ke e pii te nina lé ko tabemieng pie: «Lé pii wo lépwo dotéén ko patén pie, wo pa *Mesia, ke pa piebehi *Davita. [Te a juuju anaa, kehe icehi ana te junihe ubwo nang koja Davita.]

³⁶Be te wo Davita [na e pii anaa] he caa ju tilieng na a *Jenen litihí, be e pii pie: *Pwootí te Padaame Padué, na e pacihe pa daame hung: "Go âbé tebwo éni pwo a juing.*

[É ne tem a pihuô, ke o pipaunuko dieli mwo.] É pwo me go caaite nina lé pipwopa ne kom."Psaume 110.1

³⁷«Ke me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace watihen me geé niimih i pie, wo pa Mesia, ke time uce pace apulie celi piubwo nang koja Davita?»

Geé nemwo pipwohewii l épwo dotéén ko patén

Mataio 23.1–12; Luka 20.45—21.4

Lé tabemi lésu ni apulie na hiwon jélé, ke lé te junihe pipwodéén.

³⁸Ke e pacémunilé mwo pie: «Geé pipwocile! Geé nemwo pipwohewii l épwo dotéén ko patén! Be te junihe wâé telé me lé engen he ni epwén na bwali. Ke wâé telé heme nye tee pwobwocu telé, me pipaunulé ne he pwahamii ni apulie ati.

³⁹Lé te hane ni atebwo ânebun, ne he ni *mwotapitihi, ke é ne mwo he ni apiwiinaado na ubwo.

⁴⁰Ke lé te nihe pwo ni jame pwoiithi, beme nye o niimih i pie ni apulie na wâé jélé. Kehe icehi ana me lé ko wonaa, ke lé pé ati koja ni depwele ni delé! Ke te é mu ko anaa kuti, na o bo ne telé a cuhinaado na te junihe ubwo koja ni cuhinaado te ni béen.»

Ê depwele na te tice den

⁴¹[É mulang, ke e taa ha a mwaiithi wo lésu.] Ke e tebwo he bebenihe a duaan na lé mu ne mwani hen me de a mwaiithi. Ke e ali nina lé ko ne. Ke te pwo ni béen na te nihe pwo delé, ke lé ne ni mwani na te nihe hiwon.

⁴²Ke e tuiybé ê depwele na te tice den, ke e ne lupwo cuwo nahi mwani péi.

⁴³Ke e tote l épwo acémun den wo lésu, ke e pii telé pie: «É pii tewé a juuju pie: Ê depwele ce tice naamuun, ke e ne nina te junihe piwéden koja ni béen.

⁴⁴Be lé ne ni mwani na pikaoole mu ko ni cuhilé. Ke hemepwo weeng, ke te tice den. Kehe icehi ana e te ne ati ni mwani na jan me e mulie kon.»

Maréko 13

O bo tanahi a mwaiithi

Mataio 24.1–2; Luka 21.5–6

¹É alechen, ke e wie mu ha a *mwaiithi wo lésu. Ke e âbé céiieng wo pa céiu béé l épwo acémun den, ke e pii ten pie: «Pa apipune, te junihe wâé a mwa ce, ke ni péi ko a aba kon!»

²Ke e pii ten wo lésu pie: «Go te alih i ni pilehe mwa ce, be o time e bo uce mu éni mwo ace céiu péi pwo ace céiu mwo. Be ati ke o bo tai tanahi taabwon.»

Ana e o tuie

Mataio 24.3–44; Luka 21.7–33

³[É alechen] ke e tebwo pwo a juwole ko ni Olivier wo lésu [ne he bebenihe a mwaiithi]. Ke lé âbé mwonueng wo Pétér u me Cang, me loane, ke wo André. Ke te piwoélé cehi me weeng, ke lé tahimwoeng pie:

⁴«He éniile celi e o bo tuie ana go ko pii? Ke o ade ace inenaado kon, me gema o temehi pie, caa é mwonu, ke o bo tuie ni naado naa?»

⁵Ke e pii telé pie: «Geé pipwocile, beme geé nemwo pipweéo!

⁶Be o hiwon nina lé o âbé heme lé pé a niing. Ke lé o bo pii tewé pie: "Woéo pa *Mesia!" Ke lé o pipwohuô te ce apulie celi hiwon jélé.

⁷Ke me geé téne heme lé cihe ko ce pa celi e mwonu, ai e ité, ke geé nemwo pwo me mwotikewé! Be e o mi tuie ninaa, kehe icehi ana time uce téele a pwonehi a bwohemwo.

⁸«Be a céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau. Ke o bo pwo ni penem bwohemwo ne he ni pétaapwo piduaan, ke ni menele na ubwo. É ne he ni bwomunen naa, ke o pwohewii ni bécéiuhe picani ko a piâbeeble ewa.»

O pwotahi ne ko ni acéihi

⁹«Kehe wogewé, ke geé pipwocilekewé, be lé bo péékewé nge he ni mwopitaautinaado. Ke lé bo ahikewé ne he ni *mwotapitihi. Ke lé bo teuukewé nge he pwahamii ni gupéno me ni daame, beme lé tautikewé, wonaa mu kong. Wonaa beme ne tewé, beme geé cihe telé kong.

¹⁰Be wâé heme mwo mi patemehi a Pwooti Wâé ati nge he ni amu.

¹¹«É heme lé bo péékewé ngen me tautikewé, ke geé nemwo pwo me giagewé, ke geé nemwo mi pihane celi me geé bo pii. Be geé te ju pii cehi celi o bo ne tewé ha a inetéale naa. Be time uce wogewé celi geé o cihe, kehe a *Jenen litihi na e bo cihe.

¹²«[É ha a benaamwon naa] ke wo pa céiu apulie, ke e o bo ne pa âjiénen beme taunueng. Ke e o wonaa mwo wo pa caa te ewa ne ko pa naîn. Ke ni ewa, ke lé bo cuwode ni nyaa me caa telé, beme lé taunulé.

¹³«Lé o téétikewé ne ni apulie ati, wonaa mu ko a niing. Kehe wo pana e cumang die ha anebwén [ko a mulihen] ke e bo celuimieng wo Padué.»

Lé o te junihe picani ne ni apulie

¹⁴«Ke geé o bo alihia naado na ta, na e bo tuiebé ne ha a duaan na time uce ace amu nen: ali naado li e pwotahi ati ni naado, na te nihe mwakile nang, ke muhi tenye kon.» Wo paceli e pine anaa, ke wâé heme e temehi [beme e bo cihe kon]! «Ke é ha a benaamwon naa, ke wâé heme lé cela da pwo ni juwole ne nina lé mu *Judé!»

¹⁵Ke wo pana e âoté pwomwo, ke e nemwo taamwo hane ce naado mu ha a mwa ten.

¹⁶Ke wo pana e mu ha apwoamu, ke e nemwo mwojuia ngemwo pelen, me e pé ce epwénen.

¹⁷Au, mwolihi! Be é he ni tan naa, ke o pwoééhe ni toomwo na pigiaa jélé, me nina lé mwo paditihi ewa.

¹⁸«Ke geé pwoiitihi te Padué pie, me time e uce tuie ne kowé ni naado naa ha a benaamwon na ta-amu hen!

¹⁹Be é ha a benaamwon naa, ke lé o mu he ni picani ne ni apulie. Be mwo te tice pace apulie celi e caa mu he ce picani celi wonaa, tabuhi ha a tan na e tabuhi ati ni naado wo Padué, dieli jenaa. Ke o te tice mwo pace céiu apulie celi e o bo mu he ce picani celi wonaa.

²⁰«É hemepie time e uce niimihi wo Padué pie, me e pineole a jéhi ni tan naa, ke wiel me o te tice pace céiu apulie, celi e o celuimi a mulihen! Kehe icehi ana e te niimihi pie me e pineole, wonaa mu ko nina e caa pipégalilé.»

Lépwo ‘mesia’ na ni agele

²¹«Ke mepie e pii tewé wo pace céiu apulie pie: “Geé alahi! E éni wo pa Mesia!” ai “E ha a duaan ce!”, ke geé nemwo céihi ne kon.

²²Be lé o bo tehenebé ce ‘mesia’ me ce ‘péroféta’ celi ni agele. Ke lé o pwo ce *pipwojunuun celi lé o téetihi ne ni apulie, beme a bwopwonen me lé pipwohuô telé. Ke lé o te hane mwo me lé pipwohuô te nina e caa pipégalilé wo Padué.

²³Ke me wonaa, ke wogewé, ke geé o pipwocile! Be é caa mi patemehi tewé ni naado na o bo tuie!»

A bwo âmwobé te lésu

²⁴ «É he ni tan naa, ke lé o te junihe mu he ni picani ne ni apulie. Ke é alecehe anaa, ke: O *time e uce niê na a téale*. O *bwén ne ha a wole*.

²⁵ Lé o bo tupwo ne ni ceni. O *éjén ni pipwojunuun he miiden* .Ésaïe 13.10; 34.4

²⁶ «Ke nebwén, ke lé o bobe aliéo, woéo pa Nahi Apulie, heme é âbé he ni nii, ne ha ati a junuung me a bwo ubwo jo.

²⁷Ke é o pawiebé ni *âcélo, beme lé neibu nina é caa pipégalilé. Ke lé o taineibulé ne ha a céiu behi amu, die ha a céiu behin, pitih a bwohemwo.»

A inenaado ko a éé majing

²⁸«Wâé heme geé temehi a inenaado ko a *majing. Be, me e tile, ke geé caa temehi pie, caa é mwonu a cim naado.

²⁹Wonaa mwo heme geé alahi pie, e caa ko tuie li é caa pii, ke geé o temehi pie, o caa pacuwohi ati.

³⁰Ke é pii tewé a juuju pie: [Time o uce bwolihi.] Be lé o mwo te alahi anaa ne ni béé apulie jenaa, ânebuhe ace bwo mele telé.

³¹Be o tieden a miiden me a bwohemwo, kehe o time uce tieden a pwooti tong.»

Geé tee ûmiê!

³²«Te tice pace apulie, celi e o temehi ace tan me ace inetéale, celi o tuie hen ni naado naa. Te tice paceli e temehi, heme woéo pa Naîn, heme ni âcélo te Padué. Kehe te wo Caa cehi, na e temehi.

³³Geé pipwocile, ke geé nemwo tee pule! Be time geé uce temehi ace benaamwon celi e o tuie hen ninaa.

³⁴Be o pwohewii ne ko pa apulie na e engen mu ha amu ten. Ke e ne te lépwo apenem den a pihuô ne ko ati ni naamuun die ko a pomwa ten. Ke e pipatihi ne kolé ni pétaapwo penem delé. Ke e pii te pa awéihi pomwa pie: “Go mu ke go tee ûmiê.”

³⁵ «[Ke te piwien ne mwo kowé.] Wâé heme geé tee ûmiê! Be time geé uce temehi ace benaamwon celi e o tuie mwobé hen wo pali eapwihi pwomwo. Be wiel i é ko a babwén, ai é ha awieme bwén, ai é heme ko to a ja, ai é ko acaama.

³⁶Ke hemepie e pwome tehenebé, ke o time uce wâé heme e tookewé heme geé tee ko pule!

³⁷Ana é pii tewé, ke a pwooti me de ni apulie ati: Wâé heme geé tee ûmiê!»

Maréko 14

Lé hane me lé taunu lésu

Mataio 26.1–5; Luka 22.1–2; Ioane 11.45–53

¹Nehin alo ni tan, ke o cuwo lupwo tan ubwo te lépwo *Juif: a tan ko a *Pacika a céiu, ke a tan na lé eni a pwoloa na te tice nyaa ten. Ke nime lépwo caa te lépwo *apwoâpwailo, me lépwo *dotéén ko patén, me lé taunu lésu. Ke lé pihane ace bwopwonen beme lé pipwohuô ten, me lé imwieng neduwohi.

²Ke lé pipii telé pie: «O time uce wâé heme nye imwieng ha a piwiinaado ubwo, ne he pwahamii ni apulie, be koli lé bo okéé.»

Tapulicéihi tabe ûde ne ko lésu

Mataio 26.6–13; {Luka 7.36–50}; Ioane 12.1–8

³[É ha a benaamwon naa, ke] e mu Bétani wo lésu, ha a mwa te Simon, pa katia. É he lé mwo ko wiinaado, ke e tuiebé ê céiu toomwo, imi a mwotabe péi na te junihe wâé, na oba ko tabe ûde na te junihe ubwo a cuhin. Ke e taii ali mwotabe, ke e cepulicéihi ali tabe ûde ne pwo puni lésu.

⁴Ke me lé alien wo lépwona lé mu lang, ke te nihe time uce wâé telé, ke lé pipii telé pie: «Éé! E te nihe pihoonihi a tabe ûde ne.

⁵Be pwo *million* ko a cuhin! Ke é ko ade na time e uce icuhi, ke me genye ne a mwani te nina tice delé?» Ke lé te nihe cihe ne ko êgi toomwo.

⁶Ke e pii telé wo lésu pie: «Geé neeng! É mu ko ade na geé ilieng? E pwo ana nihe wâé ne kong.

⁷Be o tee élé pelewé wo lépwona te tice delé, ke heme nimewé, ke te jan me geé bo te pwopweehi ne kolé. Kehe woéo, ke time nye uce cuwo ko pimu ibu.

⁸Ênnaa, ke e pwo ana jan me pwo. Be é he e ne a tabe ûde ne ko a ééng, ke e caa mi pipwopweehi cawi a bwo ole tong he pwon.

⁹Ke é pii tewé a juuju pie: É heme bo pipii beetihi a Pwootî Wâé ne he ni piduaan ati ne pwo a bwohemwo, ke lé bo tee piuti mwo a jepule ko ana e pwo ê toomwo ce, beme tee pipaniimieng.»

E icu lésu wo Judas

Mataio 26.14–16; Luka 22.3–6

¹⁰Wo Judas Iscariot, pa céiu bée lépwo ¹² *apostolo, ke e â too ni caa te lépwo apwoâpwailo. Ke e pii telé pie: «É bo ne lésu tewé.»

¹¹Ke te nihe piwâénimelé, ke lé pii ten pie: «Geme bo ne ce mwani tem hemepie go pwo.» Ke e pihane ace pwaaden me e icu lésu telé.

A piwiinaado te Padaame

Mataio 26.17–35; Luka 22.7–34; Ioane 13.21–38

¹² E caa tuie a bécéiuhe tan ko ‘pieni pwoloa tice nyaa ten’, a tan na nye taunuhi a nahi muto me de a Pacika. Ke lé pii te lésu wo lépwo acémun den pie: «Geme o â piwâam ko a wiinaado ko a Pacika. Kona é wé he celi nimem me genye piwiinaado nelang?»

¹³Ke e ne ngen lupwo alo mu kolé, ke e pii telu pie: «Geu â ha a pwomwo ubwo, ke o pitapitikewé me pa apulie na e pé a mwotabe, ke geu âcéin.

¹⁴Ke me e â taa ha a mwa, ke geu pii te pa eapwihin lang pie: “E tahimwohibé wo pa apipune teme pie: ‘E wé ace nemwa celi me geme o pieni ibuhi ne hen a wiinaado ko a Pacika, me ni bée acémun dong?’”

¹⁵«Ke e o habwii teu a céiu nemwa na e ko miiden, a nemwa ubwo na caa pipwopweehi. Ke geu piwâamihi a wiinaado tenye nelang.»

¹⁶Ke lu â ha a pwomwo ubwo, ke lu te tai tooli pwohewii ana e pii telu wo lésu. Ke lu piwâamihi a wiinaado ko Pacika.

Pwo pa béewé na e bo pi-icuéo

¹⁷É he babwén, ke lé tuie wo lésu me lépwo ¹² apostolo ten.

¹⁸Ke lé tebwo, ke lé wiinaado. Ke é he lé ko wiinaado, ke e pii telé wo lésu pie: «É pii tewé a juuju pie: E bo pi-icuéo wo pa céiu béewé, pana nye te piwiinaado ibu me weeng.»

¹⁹Ke te piwahin jélé, ke lé muko pétaapwo tahimwoeng pie: «He time uce woéo?!»

²⁰Ke e pii telé pie: «Wo pa céiu béewé, wogewé lépwo ¹² apostolo, pana gemu tai pétaa ole ha a tam.

²¹É bo mele, woéo pa Nahi Apulie, pwohewii ana e caa pii beetihi ne ni tii iitihi. Kehe wo pa apulie na e pi-icuéo, ke o te junihe pwoééhen. Au, mwolihi! Be wo panaa, ke wieli me o te wâé ne kon hemepie time e uce ko âbeeble!»

A pwoloa me a tabe megele

²²Ke é he lé ko piwiinaado ibu, ke e pé a pwoloa wo lésu, ke e pipwo-olé te Padué. Ke e ebii, ke e pwopatihi ne ko l épwo acémun den, ke e pii telé pie: «Geé pé, be ani ke a ééng.»

²³Ke é alechen, ke e pé a mwoûdu ko tabe megele. Ke e pwo-olé te Padué, ke e ne telé. Ke lé tai ûdu.

²⁴Ke e pii telé pie: «Ani ke a cewéhung na e o caa téé me de ati ni apulie. Be a pipwoâpwailo na e pacuwohi a *piapwo na e pwo wo Padué [pie e ne a péém ne ha awiemelé me weeng].

²⁵Ke é pii tewé a juuju pie: O caa time é bo uce ûdu mwo ace tabe megele [ne éni pwo bwóhemwo] dieli ha ace tan celi é bo ûdu ace tabe megele celi mwo coho, ne ha a *Mwametau te Padué.»

Go bo piwotétaa kong, go Pétérú

²⁶Ke lé nyebihi a psaume ko a tan ubwo naa. Ke é mulang, ke lé taa pwo a juwole ko ni Olivier.

²⁷Ke e pii wo lésu te l épwo acémun den pie: «Geé o bo tai engen kojaéo. Be caa te tii ne he ni tii iitihi pie: O bo taunu pa awéihi muto, ke lé o pipiiden ne ni muto. *Zakari 13.7*

²⁸«Kehe icehi ana é hemepie é mulie cemwo mu ha amele, ke é bo ânebuhewé ne Galilé.»

²⁹Ke e pii ten wo Pétérú pie: «Wieli lé o engen kojako wo l épwoje, kehe time o uce woéo!»

³⁰Ke e hegi ne ten wo lésu pie: «É pii tem a juuju pie: É ha a bwén jenaa, ânebuhe a bwo okelo ko to te a ja, ke wogo, ke o caa ocié go ko piwotétaa kong pie, time go uce temehiéo.»

³¹Ke wo Pétérú, ke e te nene ko pii pie: «Ûhu! Te piwien hemepie genyu tai mele, kehe time é uce piwotétaa kom!» Ke tai woélé ati, ke te céiu ana lé pii.

E pwoiitihi ne Getsémané wo lésu

Mataio 26.36–40; Luka 22.39–46

³²Ke é mulang, ke lé â ha a céiu duaan [na cemi acuwo hen] na pii kon pie Getsémané. Ke e pii te l épwo acémun den wo lésu pie: «Geé tebwo éni, be é mwo â pwoiitihi.»

³³Ke e pé Pétérú, me Cang, me loane. Ke tabuhi pinekepé ten, ke mwotieng.

³⁴Ke e pii telé pie: «Te junihe téé ke piwahin a pwonimung. Kehe geé tee mu éni, ke geé ûmiê! [Geé nemwo pule!]»

³⁵Ke e te ju piâdé kojalé, ke e tidihi jilin, ke e ilehi koja Padué me e pétaabwon kojaeng ni picani ko a benaamwon naa, hemepie te jan.

³⁶Ke e pii pie: «*Abba, Caa! Jan ne kom ati ni naado. Go pé kojaéo ni picani me ni téé ce!* Kehe icehi ana go nemwo pwo ana nimung kon, kehe ana nimem kon.»

Lé pule wo lépwo acémun den

³⁷Ke e mwojuia mwobé céii lépwo acémun den na cié jélé, ke e alihí pie lé tekó pule. Ke e pii te Pétérú pie: «*Simon, woté, go tee ko pule? Time uce jan me go ûmiê he na te ju céiu inetéale?*

³⁸Geé te ûmiê, ke geé pwoiitihi, beme o te pwo niihewé hemepie tacebwénikewé. Be nimewé me geé pwo ana wâé, kehe icehi ana tice niihewé.»

³⁹Ke e engemwo kojalé wo lésu, ke e â pwoiitihi, ke e te pii mwo ana e caa te pii.

⁴⁰Ke me e mwojuia mwobé céii lépwo acémun den, ke e toolé mwo he lé tekó pule. Be caa te junihe emaan jélé, ke lé tee ko pipucing. Ke time lé uce temehi ace bwo hegi nen ne ten.

⁴¹Caa a béociéhe a bwo engen den kojalé, ke e mwojuia mwo. Ke e pii telé pie: «*Kona geé mwo tekó mwaale, ke pule mwo? Caa nebwen! Caa weengi a benaamwon!* Be o caa neeo, woéo pa Nahi Apulie, ne te lépwona lé pwo nina ta.

⁴²Geé cuwoda! Me nye engen! Be caa e lang wo pana e icuéo!»

Lé imwi lésu

Mataio 26.47–56; Luka 22.47–53; Ioane 18.3–12

⁴³É he e mwo ko pii anaa wo lésu, ke e te ju tehenebé kuti wo Judas, pali céiu béé lépwoli 12 apostolo ten. Ke lé âbé céin ne ni apulie na hiwon jélé, imi ni teua me ni ba-acuwo. Be lé nelé ngen wo lépwo caa te lépwo apwoâpwailo, me lépwo dotéén ko patén me lépwo apihuô.

⁴⁴Ke wo Judas, pana e pi-icu lésu, ke e caa patemehi telé ana me e pwo: «*Wo pa apulie na é o mwomwaaaueng, ke te weeng kuti. Geé imwieng, ke geé pééeng ngen, ke geé wéieng ehi.*»

⁴⁵Ke he lé tehenebé, ke e te âde lésu kuti, ke e pii ten pie: «*Bwocu tem, go pa apipune!*» Ke e mwomwaaaueng.

⁴⁶Ke lé te imwi lésu kuti.

⁴⁷Kehe icehi ana wo pa apulie na e mu pele lésu, ke e te pwome céi kuti a teua ten mu ha a mwon, ke e te tahi kuti ole pwo a puni pa apenem de pa *daame he lépwo apwoâpwailo. Kehe icehi ana e te ju tahagéi a jéené.

Kona woéo pace ataunuhi apulie?

⁴⁸Ke e pii ten wo lésu pie: «*Woté? Geé âbé pééo ko teua, me beba-acuwo, pwohewiin heme woéo pace ataunuhi apulie?!*

⁴⁹Ati he ni tan, ke é te mu hadeniiwé, he é teko pacémuni ni apulie ne ha a *mwaiitihi, kehe icehi ana time geé uce imwiéo! Kehe wâé me wonaa, be é jenaa, ke o caa pacuwahi ni naado na caa te tii ne he ni tii iitihi.»

⁵⁰Ke ati ni acémun den, ke lé neeng, ke lé cela.

E cela he te tice mwaanu kon @ wo pa ewa aiu

⁵¹Kehe icehi ana pwo pa ewa aiu na e piâcéin. E tawiieng ko a ciite. Ke me lé pwo me lé imwieng wo lépwo bée apulie,

⁵²ke lé te ju pé cehi a ciite ten, ke e cela, he te tice mwaanu kon.

A mwohuô te lépwo Juif

Mataio 26.57–68; Luka 22.54–71; Ioane 18.19–24

⁵³Lé pé lésu nge céii pa daame he lépwo apwoâpwailo. Be lé pitapitilé nelang wo lépwo caa te lépwo apwoâpwailo, me lépwo apihuô, me lépwo dotéén ko patén.

⁵⁴Ke e pi-ilipuwolé ngen wo Pétérú, ke e â taa pele pa daame he lépwo apwoâpwailo. Ke e tebwo pwo napwomwo ne pele ni apenem, ni awéa, ke e pwocadéu.

⁵⁵Wo lépwo caa te lépwo apwoâpwailo, me ati a *mwohuô te lépwo Juif, ke lé hane ce apulie beme lé pipé ne ko lésu, be nimelé me lé pwocuhinaado ten me e mele. Kehe icehi ana time lé uce tooli.

⁵⁶Be hiwon nina lé pipé ne kon, kehe icehi ana time lé uce piténelé.

⁵⁷Ke nebwén, ke lé cuwoda ne ni béén mu kolé, ke lé pii pie:

⁵⁸«Geme te téne he e pii pie: “É o paniihi a mwaiitihi te Padué ce, na lé bahi wo lépwo apulie. Ke é he na cié ni tan, ke é o bo pacuuli mwo ace céiu mwaiitihi na time uce bahi ko ni i apulie.”»

⁵⁹Kehe icehi ana wo lépwona lé pipé ne kon, ke time lé uce piténelé mwo.

A bwo hegi nen de lésu

⁶⁰Nebwén, ke e cuwoda ânebuhe ati lépwo apihuô wo pa daame he lépwo apwoâpwailo. Ke e tahimwo lésu pie: «Kona te tice béhegi nen dem? He time go uce téne nina lé ko pipé ne kom?»

⁶¹Kehe icehi ana time e uce hegi wo lésu. Ke e tahimwoeng mwo wo pali daame pie: «Kona woté? Te a juuju pie wogo, ke pa *Mesia, pa *Naî Padué, wo Padué na nye paciitieng?»

⁶²Ke e hegi ne ten wo lésu pie: «Éa, te woéo kuti. Ke geé bo aliéo, woéo pa Nahi Apulie, heme é tebwo *pwo a jui Padué na te junihe pwojunuun [beme é pihuôhi ati ni naado]. Ke geé bo aliéo heme é âbé he ni nii, mu he miiden.»

⁶³Ke me e téne anaa wo pa daame he lépwo apwoâpwailo, ke e te nihe okéé, ke e pitie ni epwénen, ke e pii te ni bée atautinaado pie: «Caa jan! Necu ce bée bwo pipé ne kon [be e caa teko pipé ne kon mwo]!

⁶⁴Be geé caa téneeng, he e pwo me piwielu me Padué! Ke he ade aceli geé niimihi ne kon?» Ke lé tai hegi ne ten ati pie: «Wâé heme e mele!»

⁶⁵Ke lé cumi ne kon wo lépwo bén, ke lé tawii a pwahamiin, ke lé nuô i kon, ke lé pii ten pie: «He woo na e ahiko? Go cuwoteeke pihane, hemepie wogo pace péroféta [celi go temehi ati ce naado!]» Ke lé pééeng ne ni apenem, ke lé taii punin.

E piwotétaa ko lésu wo Pétérú

Mataio 26.69–75; Luka 22.56–65; Ioane 18.16–27

⁶⁶Mepwo wo Pétérú, ke e te mu jeoté pwomwo. Ke e tehenebé ê céiu apenem de pa daame he lépwo apwoâpwailo.

⁶⁷Ke e ali Pétérú he e ko pwocadéu. Ke e te ju omeeng ehi, ke e pii ten pie: «Éé! Wogo ke pa céiu bée lésu mu Nazaret!»

⁶⁸Ke e hegi ne ten wo Pétérú pie: «Ûhu! Time é uce temehieng, ke time é uce temehi aceli nimem me go pii.» Ke e â pwo napwomwo. {Ke e to ali ja.}

⁶⁹Kehe wo êje, ke e te omeeng mwo, ke e pii mwo te ni apulie na lé mu lang pie: «Uhuu! Weeng ke pa céiu bée lépwo *acémun de lésu!»

⁷⁰Ke e pii mwo wo Pétérú pie: «Ûhu! Time é uce temehieng!» Ke é alechen, ke lépwona lé mu lang, ke lé pii ten mwo pie: «Uhuu! A juuju pie wogo pa céiu acémun den! Be wogo mwo, ke pa âbé mu Galilé!»

⁷¹Ke e pii mwoiuh wo Pétérú pie: «Éé! Geé téne! Time é uce temehi panaa! Wâé heme e pwocuhinaado tong wo Padué, hemepie é gele!»

⁷²Ke é he e mwo ko pii anaa, ke e okelo ko to na ali ja. Ke e bwo niimihi ali e caa pii ten wo lésu pie: «Ânebuhe a bwo okelo ko to te a ja, ke go caa ocié ko piwotétaa kong pie, time go uce temehiéo.» Ke e é wo Pétérú.

Maréko 15

Lé pé lésu nge pele Pilate

Mataio 27.1–31; Luka 22.66–23.25; Ioane 18.28–19.16

¹É he mwo te junihe acaama, ke lé pitapitilé neibu ati ni *mwohuô te lépwo *Juif: wo lépwo caa te lépwo *apwoâpwailo, me lépwo apihuô, me lépwo *dotéén ko patén. Be nimelé me lé temehi aceli me lé pwo te lésu. Ke lé cieeng, ke lé pééeng nge céii *Pilate [pa gupéno te lépwo Roma].

²Ke e tahimwoeng wo Pilate pie: «Kona te wogo kuti pa daame he lépwo Juif?» Ke e hegi ne ten wo lésu pie: «A juuju a bwopiinen dem.»

³Ke lé pipé ne ko lésu wo lépwo caa te lépwo apwoâpwailo, ke hiwon ni naado na lé pipé ne kon.

⁴Ke e tahimwoeng mwo wo Pilate pie: «Kona woté? Te tice celi go hegi kon? Go teko téne ati ni naado na lé ko pii ne kom?»

⁵Kehe icehi ana time e uce hegi. Ke e te junihe téele kon wo Pilate.

Nimelé ko Barabas

⁶Caa te cemang ne ko Pilate, ha a tan ko *Pacika, me e pawie mu he karépu pace céiu apulie celi nime a bele kon.

⁷[Ke é ha a jo naa] ke pwo pa céiu apulie na pii kon pie Barabas, na lé pimu ibu he karépu me lépwo béén. Be lé taunuhi apulie he lé pwobwoni lépwo Roma.

⁸Ke lé tehenebé pele Pilate ni apulie na hiwon jélé, ke lé ilehi kojaeng pie: «Go pwo ne teme a naado na caa te cemang ne kom me go pwo!»

⁹Ke e hegi ne telé pie: «Kona nimewé me é pawie mwo lésu, pa daame he lépwo Juif?»

¹⁰Be e te temehi pie, lé ne lésu ten wo lépwo caa te lépwo apwoâpwailo ha a pipwokon delé.

¹¹Kehe icehi ana wo lépwonaa, ke lé cine ni apulie beme lé pii pie: «Ne teme Barabas!»

Cemeiteeng ne ko a kuricé!

¹²Ke e tahimwolé mwo wo Pilate pie: «Kona ade celi me é pwo te pana geé pii kon pie ‘Pa daame he lépwo Juif?’»

¹³Ke lé cihe me ubwo pie: «Cemeiteeng ne ko a *kuricé!»

¹⁴Ke e tahimwolé mwo pie: «Kona ade aceli e pwo celi ta?» Kehe icehi ana lé bwo te nihe cihe da me ubwo pie: «Cemeiteeng ne ko a kuricé!»

¹⁵Ke wo Pilate ke e pawie ne telé Barabas, be nimen me lé piwâéeng ne ni apulie. Ke e patupwo lésu ne te ni coda. Ke lé ahieng ko a bwaliwota, ke lé â cemeiteeng ne ko a kuricé.

Lé pihoonieng ne ni coda

¹⁶Lé pé wie lésu, ke lé â pwo a céiu napwomwo na ubwo. Ke lé tote ati ni mwocoda.

¹⁷Ke lé pwo me e cuwohe a epwén na te junihe megele [pwohewii a epwéne pa apulie na piubwo nang, beme lé pihoonieng]. Ke lé péi a kuron ko ni mii acuwo na pwo dan, ke lé neole pwo punin.

¹⁸Ke lé cuwo aujenieng, ke lé pii ten pie: «Bwocu, go pa daame he lépwo Juif! Adéiko!»

¹⁹Ke lé ahi a punin ko a bewomeéle. Ke lé cumi ne kon, ke lé tidihi jililé he pwahamiin.

²⁰Ke me lé caa nebwén a bwo pihoonieng, ke lé céi mu kon ali epwén megele. Ke lé te ne mwo kon ni epwénen. Ke é mulang, ke lé pééeng ngen, beme lé â cemeiteeng ne ko a kuricé.

Lé cemeite lésu ne ko a kuricé

Mataio 27.32–44; Luka 23.26–43; Ioane 19.17–27

²¹Pwo pa céiu apulie mu ha a pwomwo ubwo Cirène na pii kon pie Simon, pa caa te Alexandre me Rufus. E piâbé lang, be e mwojuia mwobé mu ha apwoamu. Ke lé cuwokon wo lépwo coda, beme e canihi ali kuricé te lésu.

²²Ke lé pé lésu nge pwo a céiu tihi juwole na pii kon pie Golgota, a bwopiinen pie ‘pwo a piipuni apulie’.

²³Ke wo lépwo béén, ke lé pineibuhi a tabe megele me a tabe na maga. Ke lé ne te lésu, kehe icehi ana te muhi ten me e ûdu.

²⁴⁻²⁵É he ko 9 ni inetéale ko acaama, ke lé cemeiteeng ne ko ali kuricé wo lépwo coda. Ke lé picéi metii, beme lé pipii ne kolé ni epwénen.

²⁶[Ke lé cemeite ne pwo punin] a eaa acuwo na tii ne kon a watihe a bwo mele ten, pie: PA DAAME HE LÉPWO JUIF.

²⁷Ke lé cemeite mwo lupwo alo apulie na lu pwotahinaado, ne he ni piduaa lésu: wo pa céiu ne pwo juin, ke wo pa céiu ne pwo eaamun.

{²⁸Ke wonaa, caa *pajuujuhi ana caa mi tii ne he ni tii iitihi ne kon pie: *Lé pwo me e pwocuhinaado; be lé pii pie, pa apwotahinaado. Ésaïe 53.12}*}

²⁹Me lé alieng wo lépwona lé âdé ke âbé ha a duaan naa, ke lé tagiliihi ni punilé, ke lé pijeta kon. Ke lé pii pie: «Aje, kona time uce wogo kuti pana me go tanahi ali *mwaiitihi, ke me go bo pacuuli mwo he na cié ni tan?»

³⁰Go piceluumiko mwo, ke go opé mu ko a kuricé naa!»

³¹⁻³²Ke lé pihoonieng mwo wo lépwo caa te lépwo apwoâpwailo me lépwo dotéén ko patén. Ke lé pipii telé pie: «E niimihi pie pa daame henye, lépwo *Isaraéla. Ke e temehi me e celuimi ni béén, kehe time e uce temehi me e piceluimieng mwo! Hemepie e ole mu ko a kuricé naa, ke wieli genye o bo céihi ne kon!» Ke lu pihoonieng mwo lupwo alo na cemeitelu ne ko ni kuricé ne he ni piduaan.

E mele wo lésu

Mataio 27.45–56; Luka 23.44–49; Ioane 19.28–30

³³É he te ju goahen ehi, ke te ju melepiing ati ha amu, die ko cié inetéale alecehe a goahen.

³⁴Ke me tekó ju cié ni inetéale, ke e toii me ubwo wo lésu pie: «*Éloï, Éloï, lama sabaktani?*» A bwopiinen pie: «Padué hung, Padué hung, é mu ko ade na go pawiéeo?»

³⁵Ke me lé téneeng ne ni béén na lé mu lang, ke lé niimihi pie, e tote péroféta *Élia [beme e picani ten].

³⁶Ke wo pa céiu bélélé, ke te téte kuti imi a mwaanu, ke e pate ha a tabe megele na maga. Ke e ne ko a ba-acuwo, ke e ne te lésu beme e ûdu. Kehe lé pii ten wo lépwo béén pie: «Go mwo cuwo lang, be wieli nye o ali *Élia, hemepie e âbé neeng ole mu ko a kuricé!»

³⁷Kehe icehi ana e cihe da me ubwo wo lésu, ke ele a nenehen.

³⁸Ke a mwaanu [na e capuhi bwonihi a duaan na junihe iitihi] ne ha a mwaiitih, ke te ju tie ne ha awiemen kuti, mu jedi die jeoté ko a baaéén.

³⁹Pwo pa caa te coda roma na e cuwo ânebuhe lésu, ke me e alih a bwo mele ten, ke e pii pie: «A juuju pie wo pa apulie ce, ke pa *Naî Padué!»

Lé alieng wo léli toomwo

⁴⁰Pwo ni béé toomwo na lé mu lang mwo, na lé omehi mu ité: woélé me Maria Magdala, me Salomé, me Maria, nyaa te José me Cang (wo pana lé pii kon pie: Ewa Ai).

⁴¹Woélé kuti, na lé âcéi lésu, ke lé picani ten, he e mwo tee mu ha amu Galilé. Ke hiwon ni béé toomwo na lé mu mwo lang, na lé taa céin mwo ne *lérusaléma.

Neeng he iitihi

Mataio 27.57–61; Luka 23.50–56; Ioane 19.38–42

⁴²Ati ni naado naa, ke tai pwo heme [paciile] a tan ânebuhe a *tan iitihi te lépwo Juif. É he ni paciile, ke lé pwopweehi a piwiinaado ko a tan iitihi.

⁴³É he babwén, ke e tehenebé wo Josef, pa apulie mu ha a mwopopwaalé Arimaté, pa céiu apulie na pwo a niin ne ha a mwopitautinaado te lépwo Juif. Wo pali e tekó mwoiu ko ucéihi ace bwo tuiybé na a *Mwametau te Padué. E pipamwoiueng, ke e â pele pa daame Pilate, ke e ilehi a éé lésu. Be nimen me e pé a één ânebuhe a bwo tabuhi na a tan iitihi.

⁴⁴Ke me e téne wo Pilate pie e caa mele wo lésu, ke e téetih. Ke e tote pa caa te coda, ke e tahimwoeng pie: «Kona caa bwolihi ace bwo mele ten?»

⁴⁵Ke e piuti ten. Ke wo Pilate, ke e ne a pihuô te Josef, beme e pé a éé lésu.

⁴⁶Ke e engen wo Josef, ke e â patuwo a éé lésu mu ko a kuricé. Ke e tawiieng ko a mwaanu na e pwocuhin. Ke e pééeng, ke e neeng he iitihi, ha a pwon na ini ne ha a péi. Ke nebwen, ke e papitibehi a pilehe péi, beme e capuhi bwonihi ali pwon.

⁴⁷Ke wo Maria Magdala, me Maria nyaa te José me Cang, ke lu te alih a duaan na e ne lésu hen.

Maréko 16

E mulie cemwo wo lésu

Mataio 28.1–8; Luka 24.1–12; Ioane 20.1–10

¹[É he capéto ko a babwén] he caa nebwén a *tan iitihi te lèpwo *Juif, ke lé pwocuhi a tabe ûde wo Maria Magdala, me Salomé, ke wo Maria nyaa te José me Cang, beme lé â timi a éé lésu kon.

²He pwoiitihi, he e taawie na a téale, ke lé â he iitihi.

³⁻⁴É nge he pwaaden, ke lé pipii telé pie: «De e bo titééhi ne tenye ali péi mu ha ali pomwa ko ali mwa péi? Be te nihe ubwo!» Ke me lé tehene ngen, ke lé alahi pie caa titééhi!

⁵Ke lé taa ha ali mwa péi, ke lé ali pa nahi aiu he e ko tebwo pwo jui, ke e ne a jame epwén na pwojoo. Ke lé téetihi, ke nihe mwotilé.

⁶Ke e pii telé pie: «Geé nemwo pwo me mwotikewé! Geé hane lésu, pa mu Nazaret, pali lé cemeiteeng ne ko a *kuricé. Kehe e caa mulie cemwo mu ha amele, ke caa time uce e éni! Be éni ali duaan li lé neeng hen.

⁷Kehe geé mwojuia, ke geé â pii te Pétérú me lèpwo bée acémun pie: “E ucéikewé ne Galilé wo lésu, ke geé bo alieng nelang, pwohewii ana e caa pii tewé.”»

⁸Lé te â wie kuti mu ha ali mwa péi wo léli toomwo, ke lé te téte kuti. Be te nihe emegéi nalé, ke éjén jélé, ke time lé uce pii te ni apulie hauli, be te nihe mwotilé.

E pihabwieng de ni apulie ten

Mataio 28.9–20; Luka 24.13–53; Ioane 20.11–23; Apostolo 1.6–11

—Maria Magdala

⁹E caa mulie mwo wo lésu he pwoiitihi, he mwo nihe acaama. Ke e te mi pihabwieng de Maria Magdala, êgi toomwo li e pwo me wâé nang, li e pwo me lé engen kojaeng li 7 duéé.

¹⁰Ke e âbé wo êje, ke e piuti ana e alahi te lèpwo bée lésu, na élé ha a piwahin.

¹¹Ke lé téne he e pii telé pie: «E caa mulie cemwo wo lésu! Be é alieng!» Kehe icehi ana time lé uce céhi ne kon.

—Lupwo alo acémun den

¹²Pwo lupwo alo *acémun de lésu, na lu piâ pwo pwaaden mu ha a pwomwo ubwo. Ke e pihabwieng delu wo lésu, kehe caa ité a bwo alieng.

¹³Ke lu mwojuia mwo, beme lu â piuti te lèpwoli bée acémun, kehe icehi ana time lé uce céhi ne kolu!

—Lépwo 11 apostolo ten

¹⁴Ke a bénebwénen, ke e pihabwieng de lèpwo 11 *apostolo ten wo lésu, he lé mwo ko wiinaado. Ke e péélelé, ke e pii telé pie: «Te junihe mwoiu ni puniwé! Muhi tewé me geé céhi he lé pii tewé pie, é caa mulie cemwo!»

¹⁵Ke e pii telé mwo pie: «Geé engen pitih a bwohemwo, ke geé â patemehi a Pwooti Wâé te ati ni apulie .

¹⁶Ke wo pana e bo céihi ne kong, ke o bo puueng, ke o bo celuimieng, ke e bo mulie. Ke wo pana time e uce céihi, ke o bo tautieng, ke o bo pwocuhinaado ten.

¹⁷Weengi a béhabwiinen ne ko nina lé céihi: Lé o bo peni ni duéé ne he niing; Ke lé o bo cihe he ni bée pati apulie na te ité;

¹⁸ Ke o te jan me lé imwi ni bwien ne he ni ilé; Ke me lé ûdu ace tabe celi nye mele kon , ke time lé o uce mele; Ke lé o bo ne ni ilé ko ni cunu, ke bwo wâé jélé.»

¹⁹ É alecehe a bwo picihe telé naa, ke céida he miiden Padaame Iésu, ke e tebwo *pwo a jui Padué.

²⁰Ke wo l épwo acémun den, ke lé engen pitihia bwohemwo, beme lé patemehi a Pwooti Wâé. Ke e picani telé wo Padaame. Ke e *pajuujuhi a Pwooti na lé patemehi, be e ne telé a junuun, beme lé pwo ni inenaado na lé téetih ne ni apulie.

Luka

Luka 1

E pii beethi a tii ten wo Luka

1-3 Bwocu tem, go pa daame Téofile. É tii a tii ce, beme é piuti tem ati ni naado na e caa pwo wo Padué ne peleme, ne alecehe a bwo pituie te lésu. Hiwon ni apipajuujuhi na lé alihii ni naado naa, ke lé patemehi a *Pwooti Wâé. Ke wo lépwo béen, ke lé pwo me lé piuti ne he tii. Ke woéo mwo, ke me é hane ehi, beme é tii ke cile ehi a jepule be me dem, ne ko ati ni naado naa.

4 Be me wonaa, ke me go bwobe alihii pie, a juuju a pwootti na go caa hegí.

Zakari me Élisabet

5 É ha a benaamwon na e mwo daame ne *Judé wo Érode pa Bécéuhén, ke pwo pa céiu apulie lang, na pii kon pie Zakari, pa *apwoâpwailo mu ha a pwomwoiou te Abia [mu ha amu te *Aarona]. Ke ê mwoden, wo Élisabet, ê piebehi Aarona.

6 Ke tai woilu, ke mwomwon julu ne ânebuhe Padaame Padué. Be lu piténédehi ati ni patén me ni pihuô ten, ke te tice celi me tautilu kon.

7 Kehe icehi ana te tice naîlu, be pwocoon me pwo naî Élisabet. Caa tai ukéiu julu.

E âbeeti Zakari pa céiu âcélo

8 Ha a céiu tan, ke e pwo a penem den wo Zakari, ne ha a *mwaiitihi te Padué. Be te a tan na lé penem ibu hen me ni béen.

9 Âcehi a bwopwonen de lépwo apwoâpwailo, ke lé picéi metii, beme lé pipégali pace apulie mu kolé, na me e taa ha a duaan na iitihi, ne ha a mwaiitihi. É lang, he na cini *encens* [ni dep na ûde wâé heme nye cini] beme âpipati te Padué. Ke é ha a tan naa, ke hiwon ni metii te Zakari. Ke e taa pwo a penem den.

10 Nihe hiwon ni apulie na lé ko pwoitihi ne jeoté pwomwo, he e mwo ko cini *encens*.

11 Ke é he e ko wonaa, ke e te âbeetieng kuti wo pa céiu *âcélo te Padaame, na e cuwo pwo jui ne ko apwoâpwailo na mu cini *encens* ne pwon.

12 Ke e téetieng wo Zakari, ke te nihe mwotieng.

O bo pwo pace naîm

13 Kehe e pii ten wo pali âcélo pie: «Go nemwo pwo me mwotiko, go Zakari, be e caa téne ni pwopwoitihi teu wo Padué. Ke [bo pwoapulie ko] mwodem, ke e bo picile ewa, ke go bo pitoii kon pie loane.

14 Ke bo piwâénimeu, ke bo hiwon mwo ni béen na lé bo pipwodéen mwo.

¹⁵Pa naîm naa, ke bo pa apulie na nihe ubwo nang ne ale Padaame. Ke iitihi me e ûdu tabe megele, me ace céiu bwinwoiu, be caa ju tilieng na a *Jenen litihi, he e mwo te mu tina nyaa ten.

¹⁶«Ke nihe hiwon lépwona mu ha a puapulie *Isaraéla na e bo péélé ngemwo pele Padaame Padué helé.

¹⁷E bo mu kon a junuu a Jenen litihi, pwohewii *péroféta Élia ânebun. Ke e bo cile ehi me pwopweehi a puapulie ten, ânebuhe a bwo tuie te Padaame. Ke é mu kon, ke wo lépwo caa, ke lé bo pinenimelé ne ko ni naîlé. Ke lé bo pininim wo lépwona time lé uce piténede Padué, ke lé o pwohewii lépwo apulie na lé mwomwon ne ale Padué.»

É o woté ko ace bwo céihi nen dong?

¹⁸E pii wo Zakari te pali âcélo pie: «É o woté ko ace bwo céihi ne ko ana go ko pii? Be caa te nihe ukéiu jo, ke ê mwodong, ke caa te ukéiu nang mwo.»

¹⁹Ke e hegi ne ten pie: «Woéo, Gabriel, pa âcélo na é mu cuwo ale Padué, beme pa apenem den. Weeng na e neéo bé, beme é pipatemehi tem a jepule wâé ce.

²⁰Wâé heme go temehi pie, lé o bo tuie ati ni naado na é pii tem, ha a benaamwon na e caa ne wo Padué. Kehe icehi ana wogo, ke time go uce céihi ne kon! Ke o huuhu go, die ha a tan na o bo cuwo ati nina é pii tem!»

²¹Ke é he lu tee ko picihe wo Zakari me pali âcélo, ke e mwo ko ucéieng a pubu apulie. Ke lé téetih, be te nihe bwolieng lang.

²²Me e wie mulang, ke caa huuhu nang. Ke e te ju pwo inenaado telé ko a in. Ke lé temehi pie pwo celi e alih, celi e âbé mu ko Padué.

²³Nebwén, ke e panebwénihi a penem den wo Zakari ne *huâ iitihi, ke e âmwô ha a pomwa ten.

Pwoapulie ko Élisabet

²⁴É alechen, ke pwoapulie ko mwoden Élisabet, ke e te mu huâ he na nim ni wole. Ke e tee niimihi pie,

²⁵«Te nihe wâé Padaame ne kong, be é ânebun, ke te nihe tanim jo, be êna te tice naîng. Ke e piwâéeo, ke e pwii mu huîng a bwo tanim jo.»

Pipatemehi a bwo âbeelee te Iésu

²⁶Caa 6 ni wole na pwoapulie ko Élisabet. Ke wo Padué, ke e neopé pa âcélo ten, wo Gabriel, ne Nazaret ne Galilé,

²⁷ne pele ê céiu ewa toomwo na pii kon pie Maria. Wo ênaa, ke lu picihe me pa apulie na pii kon pie Josef, pa piebehi pa daame *Davita.

²⁸Ke e âbeetieng pa âcélo, ke e pii ten pie: «Adéiko, go Maria! Be e pelem wo Padaame Padué, ke wâé ten go.»

²⁹Ke e téetih wo Maria, be time e uce temehi nina e pii ten. Ke e piniimihi pie: ‘É ko ade na e adéiéo wo Padué?’

³⁰Ke e pii ten wo pali âcélo pie: «Go nemwo pwo me mwotiko, go Maria! Be e piwâéko wo Padué, ke e pipégaliko.

³¹Ke bo pwoapulie kom, ke go bo picile pa cuwo nahi aiu, ke go bo toii niin pie lésu.

³²Ke bo pa apulie na nihe ubwo nang ne he pwahamii Padué. Ke o bo toii kon pie ‘Pa *Naî Padué na e daaité’. Ke wo Padué, Padaame hen, ke e bo ne ten a pwodaame te pa daame Davita, pa watihen.

³³Ke bo pa daame he a puapulie Isaraéla dieli mwo, ke o te tice anebwén ko a pihuô ten.»

³⁴Ke e pii wo Maria te pali âcélo pie: «Kona anaa, ke o woté ace bwopwonen?! Be time gemu uce pipule me pa aiu hung, ai pace céiu aiu!»

O bo wonaa mu ko a Jenen litihi

³⁵E hegi ne ten wo pali âcélo pie: «E bo opé ne kom a Jenen litihi, ke bo e pelem a junuu Padué na nihe e daaité. Ke wo pa cuwo nahi ewa na go bo picileeng, ke weeng kuti na e pipégalieng wo Padué, ke bo toii kon pie pa Naî Padué.

³⁶«Go téne, lé mu pii ânebun ko ê béém Élisabet pie: “Te tice naîn”! Kehe icehi ana e bo picile ewa, be ko pwoapulie kon ni, caa 6 ni wolen.

³⁷Be te tice aceli pwocoon ne te Padué!»

³⁸Ke e hegi ne ten wo Maria pie: «Woéo ê apipenem de Padaame, ke me e pwo ne tong ana nimen kon.» Ke me wonaa, ke e engen kojaeng pali âcélo.

E â caniê Élisabet wo Maria

³⁹⁻⁴⁰É he ni tan alechen, ke e engen wo Maria me e â caniê Élisabet. A mwopopwaalé ten, ke e mu pwo a juwole ne ha a céiu duaan ko a Judé. E taa ha a mwa wo Maria, ke e pwobwocu ten.

⁴¹Me e téne a bwo pwobwocu te Maria wo Élisabet, ke e pipenem a ewa na e kon, ke caa ju tili Élisabet na a Jenen litihi.

⁴²Ke e toii da pie: «E te nihe adéiko wo Padué, ke e ne me ubwo go koja ati ni ewa toomwo! E te junihe *adéi a ewa na e kom.

⁴³Nihe a naado na nihe ubwo ne kong! Be go âbé caniêeo, wogo ê nyaa te Padaame hung!

⁴⁴«Go téne, go ê ju béléng, heme é téne a pwocihe tem, ke e pipwodéén ali cuwo ewa li e kong, ke e pipenem ne tinang!

⁴⁵Adéiko, be go caa céhi pie, e bo te pacuwohi nina e pii tem wo Padaame.»

Nyebi te Maria

⁴⁶ E pii wo Maria pie: «Pipwodéén a pwonimung, ke é pipaunu Padaame.

⁴⁷ Piwâénimung kon, be pa aceluimiéo!

⁴⁸ E pwo me pwonaado ne kong, ê apipenem den na wahin jo. Lé o pii kong pie: “Adéi êje!” ati ne ni niide apulie.

⁴⁹ Be e picani tong ko a juin, wo pana nihe ubwo nang. E adéiéo wo Pana iitihi a niin.

⁵⁰ Ubwo a bwo wâé nang *me de nina* lé paciitieng. E picani telé dieli mwo.

⁵¹ E penem ko a junuun, e ta papiideni nina lé cibehede.

⁵² E patupwo ni daame *mu* pwo ni atebwo telé, ke e eti da lépwona wahin jélé.

⁵³ E ne ni naamuu nina tice delé; e pamwojuiéhi nina pwo delé, heme tice âne ilé.

⁵⁴ E picani te a puapulie ten, a puapulie Isaraéla, pa apipenem den, be e pipwoééhen.

⁵⁵ Be e *piapwo ne te ni watihenye, ne te *Abérama me ni piebehieng. Ke e pacuwohi nina e caa pii. O time e uce neulé dieli mwo.»

⁵⁶ E mwo te mu pele Élisabet wo Maria he na cié ni wole. Ke e bwo mwojuia ngemwo pelen.

A bwo âbeele te loane

⁵⁷ Tuie nge ha a benaamwon na me e picile ewa hen wo Élisabet, ke e picile pa ewa aiu.

⁵⁸ Ke lé téne a jepule kon ne nina lé mu mwonueng, me a pwomwoiu ten, ke lé temehi pie e te junihe adéieng wo Padaame. Ke lé tai pipwodéén ati, ibu me weeng.

⁵⁹ Alechehe a naadenitan na céiu, ke lé âbé me lé *pwotegoop te ali cuwo nahi ewa [pwohewii ana e pii ne ni *patén de Moosé]. Nimelé me lé ne ten a nii caa ten: Zakari.

⁶⁰ Kehe icehi ana e pii telé wo nyaa ten pie: «Ûhu! O pii kon pie loane.»

⁶¹ Ke lé pii ten pie: «É mu ko ade? Be te tice ha a pwomwoiu tem celi e pé a nii apulie naa.»

⁶² Ke lé te ju pwo inenaado te caa ten, Zakari, beme lé tahimwoeng pie: «O nimem me pii pie woté kon?»

O pii kon pie loane

⁶³⁻⁶⁵ Ke e pwo inenaado telé wo Zakari, beme lé ne ten ace metii, beme e pwotii ne hen, ke e tii pie ‘loane’. Ke me e tii a nii loane, ke e te cihe mwo kuti, ke e pipaunu Padué. Ke lé téetih [ne nina lé téeneeng] ke mwotilé. Ke lé piuti a jepule kon ne ha ati ni piduaan ko a juwole ne ha amu Judé.

⁶⁶Ke é he lé téne a pwooti naa ne ni apulie, ke lé te nihe pitautinaado, ke lé pii pie: «Éé! O te nihe ubwo celi e bo pwo wo pa cuwo nahi ewa naa!» Be e pelen wo Padaame.

E paunu Padué wo Zakari

⁶⁷Wo Zakari, pali Caa te ewa, ke caa ju tilieng na a Jenen litih, ke e pipatemehi a pwooti na e ne ten wo Padué. Ke e pii pie:

⁶⁸ «Pipaunu Padaame, Padué he a puapulie Isaraéla! E celuimikenye, me tuwokenye *mu* he ni ta pwo tenye.

⁶⁹ Be e nebé pa *aceluimikenye, na nihe pwojunuun, wo pa piebehi Davita, pa apipenem den.

⁷⁰ Lé pipatemehieng bwolihi ne ni péroféta na e pipégalilé.

⁷¹ Be e caa pii pie: «É bo celuimikewé koja nina lé pii me ta gewé.»

⁷² Ubwo a pipwoééhe ten ne ko lépwo watihenye. E te pacuwahi a piapwo ten,

⁷³ na e ne te Abérama, caa tenye, ne ha a bwo eânimén den. Be e ko pii ne konye pie:

⁷⁴ «É celuimi ni naîm, koja lépwona lé pii me ta jélé, ke lé o pipenem dong, be o time o uce mwotilé.

⁷⁵ Ke o bo wâé tong jélé. Ke o wâé ni pwonimelé, na ati he ni mulihelé ne éni pwo bwohemwo.»

⁷⁶ Ke e pii mwo wo Zakari [ko pa naîn loane] pie: «Wogo pa naîng: O bo pii kom pie pa péroféta, pa apipépwooti te Padué na e mu âda he miiden. Go bo ânebuhe Padaame, *me* go pwopweehi a pwaadeniin.

⁷⁷ Go o pii te a puapulie ten pie: E bo celuimikewé! E bo pineuh ni ta pwo tewé!

⁷⁸ Nihe ubwo a bwo wâé nang! E pébé peleny a pwéélang, a bwo caama te a téale.

⁷⁹ A pwéélang na e pwoeihi nina lé mu ha a melepiing. Ke e habwii telé a pwaaden *mu* ha amele nge ha a péém.»

Caa ubwo loane

⁸⁰ Caa ubwo pali ewa aiu, loane, ke piubwo ngen mwo a junuu a Jenen litih ne kon. Ke e mulie ne ha a da, die ha a tan na e bo pihabwieng de a puapulie Isaraéla.

Luka 2

A bwo âbeele te Iésu

Mataio 1.18-25

¹⁻² É ha a benaamwo amu naa, he e daame ubwo te lépwo Roma wo Auguste, ke e mwo gupéno ne Siri wo Kirinius, pa apenem den. Ke e huôhi wo Auguste

pie, me pine a jéhi ni apulie na ati he ni amu na lé mu ko a mwohuô ten. Ke he bwo te a bécéiuhen me lé pwo anaa.

³Ke lé engen ati ni apulie, ke lé caa muko pipiiden nge he ni mwopopwaalé te ni ukéiu telé, beme lé tii ni niilé.

⁴⁻⁵Ke wo Josef, ke e engen mu Nazaret ne Galilé beme e â Bétéléma ha amu *Judé, beme e â tii a niin. Be he li e tuie nelang wo pa daame *Davita, pa watihen. Ke e pé Maria ê mwoden, na caa pigiaa nang, be e ucéihi a bécéiuhe naîn.

⁶Ke me lu mu Bétéléma, ke e tuiebé a benaamwon na me e caa picile ewa hen wo Maria.

⁷Ke e picile pa bécéiuhe naîn. Ke e taluieng ha a pwotuun, ke e neeng ha a mwowiewota, be tice ahilu [be nihe hiwon ni apulie].

Lépwo awéihi muto

⁸É ha a bwén naa, ke pwo ni apulie na lé wéihi ni muto telé ne ha a céiu duaa juwole.

⁹Ke e te tuiebé kuti pa céiu *âcélo te Padaame, ke e cuwo ânebuhelé, ke te pwéélang aujenilé kuti a bwo ubwo na a wâé te Padaame. Ke te junihe mwotilé kuti.

¹⁰Ke e pii telé wo pali âcélo pie: «Geé nemwo pwo me mwotikewé, be é pébé céikewé a pwootti na wâé, na lé o te nihe pipwodéén kon ati ne ni apulie!

¹¹Be é ha a bwén ce, ke e caa âbeele pa aceluimikewé, ne ha a mwopopwaalé te Davita: wo pali *Mesia, Padaame [li geé teko ucéieng].

¹²Weengi a inen beme geé ali temehieng: Geé o too pa cuwo ewa na taluieng ko a pwotuun, ke e pule ha a mwowiewota.»

¹³Ke me wonaa, ke lé te tuie opé kuti mu he miiden ni béis âcélo na nihe hiwon jélé. Ke lé aujeni pali âcélo, ke lé pwonyebi me pipaunu Padué:

¹⁴«Pipaunu Padué jedi he miiden! Péém ne éni pwo bwohemwo, *me de ati nina wâé ten jélé!*»

Lé â caniê pali cuwo ewa

¹⁵É alechen, ke li âcélo, ke lé engen kojalé, ke lé mwojuia daamwo he miiden. Ke lé pipii telé wo lépwo awéihi muto pie: «Genye â Bétéléma, me nye alihí aceli e tuie, ana e ko pii tenye wo Padaame.»

¹⁶Ke lé te piepin ko engen kuti, ke lé too Maria me Josef, me pali cuwo ewa he e ko pule ha a mwowiewota.

¹⁷Ke me lé caa alieng, ke lé â uti ati te ni apulie li e pii telé wo pali âcélo ne ko pali cuwo ewa.

¹⁸Ke lé te nihe téetihí ati ne nina lé téne.

¹⁹ Ke e te ju cile ehi ati ni naado naa wo Maria, ke e bo tee pitautinaado ne ha a pwonimen.

²⁰ Lé mwojuia ngemwo li awéhi muto, ke lé nihe pwonyebi me paunu Padué ko ati ni naado na lé alahi me téne. Be te tai cuwo ati li e pii telé wo pali âcélo.

Lé habwii lésu ne huâ iitihi

²¹ É alecehe a naadenitan na céiu, ke lu pé ngen pali naîlu wo Josef me Maria, beme *pwotegoop ten pwohewii ni *patén de Moosé. Ke lu ne me a niin pie lésu, ali nii apulie li e caa mi pii wo pali âcélo, ânebuhe a bwo pwoapulie ko Maria.

Lu neeng de Padué

²²⁻²⁴ Tuiybé a benaamwon na wo Maria, ke me e *pwoâpwailo ko a bwo wâé nang ne pele Padué, alecehe a bwo picile ewa ten. Be e caa tii ne he ni patén de Moosé pie: *Wâé heme e ne lupwoce uiajaap, ai lupwoce bun. Lévitique 12.8* É mu ko anaa, na lu â *huâ iitihi ne *lérusaléma wo Maria me Josef, beme lu pwoâpwailo. Ke lu pé ngen ali cuwo ewa, beme lu neeng de Padaame. Be caa tii mwo ne he ni patén pie: *Pa bécéiuhe ewa aiu, ke a de Padaame. Exode 13.2*

E pipwoun de Padué wo Siméon

²⁵ [É ha a benaamwon naa] ke pwo pa céiu apulie ne lérusaléma na pii kon pie Siméon, pa apulie na e mwomwon, ke e pipwoiipieng ne ale Padué. Ke e tee ucéihi a bwo tuie te pa Mesia, pa aceluimi na a puapulie *Isaraéla. Ke e huîn a *Jenen litihi.

²⁶ Ke e caa pii ten a Jenen litihi pie: «Go téne go Siméon, go o mwo te alahi a bwo tuie te pa Mesia te Padaame Padué, ânebuhe ace bwo mele tem!»

²⁷ Ke e pahedeeng nge ha ali *mwaiitihi. Ke he te ju é ha a benaamwon naa kuti, na lu ko pé ngen lésu wo lu nyaa me caa ten, beme lu habwieng te Padaame pwohewii li patén.

²⁸ Ke e pé pali cuwo ewa wo Siméon, ke e *adéi Padué, ke e pii pie:

²⁹ «Jenaa ni, go Padaame, ke [é pipwodéén] woéo pa apipenem dem! Go péeo ne pelem, ne ha a péém dem. Be caa pacuwohi ana go caa pii.

³⁰ Ni naamiing, ke lé ali pa aceluimi ati ni puapulie na go neeng deme,

³¹ na go caa pipwopweeng ne ânebuhe ni puapulie.

³² Pa pwéélang ko a bwohemwo, ke a bwo ubwo na a wâé te a puapulie tem, Isaraéla.»

³³ Wo lu nyaa me caa te pali cuwo ewa, ke lu téetihi nina e pii ne kon wo Siméon.

³⁴ Ke e adéilu, ke e pii te Maria pie: «É mu ko pa naîm, ke bo hiwon ne Isaraéla nina lé bo tupwo, ke hiwon mwo nina lé bo cuwoda. Ke bo pa inenaado te Padué, ke lé bo téétieng ni béé apulie.

35Be o bo pwéélang ko ni bwo niimihinaado na e ha aduwo ne te ni apulie. Ke me wogo, go êje, ke o te nihe cunu go kon, pwohewiin heme e woli a pwonimem ace teua.»

E pwo-olé te Padué wo Anne

36É ha a benaamwon naa, ke e ko mu [huâ iitihi] ê céiu toomwo pérféta na pii kon pie Anne, ê naî Fanuel, mu ha a pwomwoiou te Asser. Wo ênaa, ke lu pimu me pa aiu hen, he na te ju 7 ni jo, ke e mele kojaeng wo panaa. Ke wo Anne, ke caa ukéiu nang, ne ha a bwo depwele ten. Be caa 84 ni jo hen jenaa.

37Ke e mu huâ iitihi heme bwén ke pwang, beme e pipenem de Padué, ke me e pwoiitihi ke pipatupwo wiinaado me ûdu.

38Ke e tuiybé he lé ko mu lang wo Siméon [me pali cuwo ewa, me lu nyaa me caa ten]. Ke me e alilé, ke e pwo-olé te Padué, ke e pwojepule ko lésu te ati ni apulie na lé ucéihi ace bwo tuiybé te pa Mesia beme e celuimi ni apulie lérusaléma.

Lé mwojuia ngemwo Nazaret

39Wo lu nyaa me caa te lésu, ke lu pacuwohi nina e pii ne he ni patén de Padué: [ni naado na nye mu pwo heme e tuie a cuwo ewa]. É he lu caa pacuwohi ati, ke lu mwojuia mwo ne Nazaret ne ha amu Galilé.

Caa ubwo lésu

40Piubwo da lésu, pali cuwo ewa, ne ha a bwo temehinaado, me a pitemang. Ke e te mu pelein a adéihi te Padué.

Wo lésu he ko 12 ni jo hen

41-42É téteda he ni jo, ke te cemang me lu â lérusaléma wo lu nyaa me caa te lésu, ne ko a pwoiitihi ko a *Pacika. Ke é he 12 ni jo he lésu, ke e âcéilu.

43É alecehen, ke lu caa mwojuia mwo. Kehe icehi ana e te mu lérusaléma wo lésu. Ke time lu uce alihi pie tieeng,

44be lu niimihi pie, e pele ni béélé ko a engen. Kehe icehi ana é alecehe ana céiu tan, ke lu bwo alihi pie tieeng. Ke lu tabuhi haneeng ne ha awieme ni pwomwoiou telu me ni béélù.

45Ke time lu uce alieng, ke lu mwojuia mwo ne lérusaléma me lu â haneeng.

46É ha a bécéhe ni tan, ke lu bwo tooeng ne huâ iitihi, he e ko tebwo ha awieme ni apacémuni ni *Juif. Be e ko tabemilé, ke e tahimwolé ko ni *tii iitihi.

47Ke ati nina lé tabemieng, ke lé nihe téetihi a bwo temehinaado ten me a bwo hegi nen den.

É pwo ni penem de caa tong

48Ke é heme lu alieng wo lu nyaa me caa ten, ke lu te nihe téetieng, ke e pii ten wo nyaa ten pie: «É mu ko ade na go pwo temu anaa? Go téne, nihe mwotikemu me caa tem, ke gemu mwojuia mwo beme gemu haneko!»

⁴⁹Ke e hegi ne telu pie: «É mu ko ade na geu haneéo? Kona geu pineuhi pie, wâé heme é pwo ni penem de Caa tong? É mu ko anaa, na woéo éni ha a mwa ten.»

⁵⁰Kehe icehi ana time lu uce temehi ana nimen me e pii telu.

⁵¹É alecehen, ke lu mwojuia ngemwo me weeng ne Nazaret. Ke e te nihe piténede lu nyaa me caa ten. Ke wo nyaa ten, ke e te cile ne ha a pwonimen ati ni naado naa.

⁵²Ke piubwo da lésu, ke ubwo mwo a bwo temehinaado ten. Ke nihe wâé te Padué nang, ke ni apulie mwo.

Luka 3

Ioane pa apipuu apulie

Mataio 3.1–17; Maréko 1.1–11; Ioane 1.19–28

¹E tabuhi pipatemehi a pwootti te Padué wo Ioane, he caa ¹⁵ ni jo na e daame ubwo te lépwo Roma wo Tibère. Woélé-ni ni gupéno te daame Tibère nelang: Wo Ponce *Pilate, pa gupéno ne ha amu *Judé; Wo Érode Antipas ne Galilé; Wo Filip, pa ciéé *Érode Antipas, ne Ituré die Trakonite; Wo Lisanias, ne Abilène.

²Ke wo Hanne me Kaïfe, ke lupwo *daame he lépwo apwoâpwailo. Ke é ha a benaamwon naa, ke e ko mu ha a da wo Ioane pali naî Zakari. Ke e paciheeng wo Padué [beme e pipatemehi a pwootti ten].

A bwo pininim

³E engen ati he ni piduaan ko a éémwa lordinano, ke e patemehi te ni apulie pie: «Geé pininim, ke geé bitekewé. Ke geé pwo me puukewé, beme geé habwii pie pitaatééhi ni mulihewé. Be me wonaa, ke e bo pineuhi ni ta pwo tewé wo Padué.»

⁴Be caa tii ne ha a tii te péroféta Isaia pie: *Pwo pa apulie ha a da na e toii da pie: "E âbé wo Padaame! Pwopweehi a pwaadeniin! Pwo me belece a duaan na e engen hen!"*

⁵Bo pa ni atebwolu, tatibe ni juwole me ni bwojuwole, pamwomwonihu ni acine pwaaden; pwopweehi a engen den.

⁶Lé bo alahi ne ni apulie ana e pwo wo Padaame: Be e âbé me celuimikenye!"*Ésaïe 40.3–5*

A bwo tauti ni apulie!

⁷Hiwon ni apulie na lé âbé céii Ioane, beme e puulé [ne ha a éémwa]. Ke e pii [te ni béén mu kolé] pie: «Wogewé ni nahi bwien, me ni agele. Woo na e pii tewé pie, geé o cela ko ni cuhinaado na e bo ne tewé wo Padué?

⁸Geé mi pwo ce huô celi wâé, beme a béhabwiinen pie, geé caa taatééhi ni mulihewé! É mu ko ade na geé te niimihi pie, o celuimikewé mu ko ana wo

*Abérama ke pa wathewé? Úhu! Be é pii tewé pie: Mepie nime Padué, ke o te jan ne kon, me e bitehi ni péi ce, me ni piebehi Abérama!

⁹ «E caa te pwopweehi a gi ten [wo Padué]. Ke e bo tahagéi ne ko ni waan ati ni acuwo na time uce wâé ni acehin, ke e bo cini ne pwo miû!»

Geé pwo ce huô celi wâé

¹⁰ Hiwon nina mu ko ni béén na lé téne loane, na lé tahimwoeng pie: «He ade aceli me geme pwo [beme pitaatééhi ni muliheme]?»

¹¹ Ke e hegi ne telé pie: «Hemepie alo ce epwénem, ke go ne a céiu te pana tice ten. Ke é hemepie pwo ce wiinaado tem, ke go pati pana tice ten.»

¹² Pwo lépwo *atai mwani cuhi puni apulie, na lé âmwobé, beme e puulé wo loane. Ke lé tahimwoeng pie: «Pa apipune, ade aceli me geme pwo?»

¹³ Ke e hegi ne telé pie: «Me geé tai mwani *cuhi puni apulie [beme de lépwo Roma] ke geé nemwo uce pé ce mwani celi piwéden koja ni jéhi cuhi puni apulie.»

¹⁴ Ke pwo ni bée coda mwo na lé tahimwo loane pie: «Ke wogeme, ke o ade aceli me geme pwo?» Ke e hegi ne telé pie: «[Geé necu ni bwopemikewé na ta ne ko ni apulie]: Geé nemwo pwohuu telé, ke geé nemwo wâgo kolé me lé ne ce mwani tewé. Wâé heme geé ju pipwodéén cehi ko ni cuhikewé.»

E patemehi a bwo tuie te lésu

¹⁵ Ati ni apulie, ke lé ucéihi ne ha a pipwodéén aceli e o bo tuie, ke lé pitahimwolé pie: «Wieli wo loane pa *Mesia?»

¹⁶ Ke e hegi ne telé ati pie: «Woéo, ke é puukewé ko a tabe. Kehe icehi ana wo pana e bo âbé alecehung, ke e bo puukewé ko a *Jenen litih me a miû. Weeng, ke te junihe pwojunuun kojaéo. Ke time uce jan ne kong me é tuwo ni tai ko ni dihibwaan.

¹⁷ Ke e caa te mi pipwopweeng beme e [tauti ni apulie. Ke e bo pineitééhi nina wâé jélé me nina ta jélé, pwohewii a bwo] pineitééhi na a pidenaado koja a piin. Ke e ne ehi ni pidenaado, kehe e cini ni piin ne ha a miû na te tice paceli jan me e taunuhi!]»

¹⁸ Hiwon ni bwomunen na e pwo wo loane na wonaa, beme e pacihe a puapulie [te lépwo *Juif] me e pipatemehi telé a Pwooti Wâé.

Time uce wâé te Érode Antipas

¹⁹ E mu tee pii te gupéno Érode wo loane pie, time uce wâé a huô te Érode, be lu pimu me Érodiade, ê mwode pa âjiénen. Ke hiwon mwo ni bée naado na ta na e pwo wo Érode.

²⁰ Ke [é mu ko ana e pii wo loane, ke] e neeng he karépu. Ke me wonaa, ke e ne behin mwo ko ni huô ten na nihe ta.

E puu lésu wo loane

²¹É ha a benaamwon na e puu ni apulie hen wo loane, ke e puu mwo lésu. Ke é he e mwo ko pwoitihi wo lésu, ke e te tehi kuti a miiden.

²²Ke e te opé kuti ne huîin a Jenen litih pwohewii a meni pwojo. Ke pwo a pwocihe bé mu he miiden, na e pii ten pie: «Wogo pa Naîng na te céiu go, na te nihe eânimung dem. Wogo kuti, na é caa pipégaliko ha a pwonimung.»

Ni watihé lésu Kériso

Mataio 1.1-17

²³He ko 30 ngelang ni jo he lésu, ke e tabuhi patemehi a Pwooti Wâé. Ne he ni bwo niimihinaado te ni bée apulie, ke te pa naî Josef pa naî Éli. [Woélé-ni ni watihen]: Wo Josef, pa naî Éli,

²⁴pa naî Matat, pa naî Lévi, pa naî Melki, pa naî Janaï, pa naî Josef,

²⁵pa naî Matatias, pa naî Amos, pa naî Nahoum, pa naî Esli, pa naî Nagaïi,

²⁶pa naî Mahat, pa naî Matatias, pa naî Séméïn, pa naî Iosek, pa naî Ioda,

²⁷pa naî Ioanan, pa naî Résa, pa naî Zorobabel, pa naî Salatiel, pa naî Néri,

²⁸pa naî Melki, pa naî Adi, pa naî Kosam, pa naî Elmadam, pa naî Er,

²⁹pa naî Iéchoua, pa naî Éliézer, pa naî Ioram, pa naî Matat, pa naî Lévi,

³⁰pa naî Siméon, pa naî Juda, pa naî Josef, pa naî Ionam, pa naî Éliakim,

³¹pa naî Méléa, pa naî Mena, pa naî Matata, pa naî Natan, pa naî *Davita,

³²pa naî Jessé, pa naî Obed, pa naî Booz, pa naî Sala, pa naî Nachon,

³³pa naî Aminadab, pa naî Admin, pa naî Arni, pa naî Esron, pa naî Pérès, pa naî *Juda,

³⁴pa naî Iakobo, pa naî Isaaka, pa naî Abérama, pa naî Téra, pa naî Nahor,

³⁵pa naî Seroug, pa naî Réhou, pa naî Péleg, pa naî Éber, pa naî Chéla,

³⁶pa naî Kénan, pa naî Arpaxad, pa naî Sem, pa naî Noé, pa naî Lémek,

³⁷pa naî Matusalem, pa naî Énoka, pa naî Iéred, pa naî Malalél, pa naî Kénan,

³⁸pa naî Énos, pa naî Set, pa naî *Adamu, pa bécéiuhe naî Padué ne éni pwo bwohemwo.

Luka 4

E tacebwéni lésu wo Caatana

Mataio 4.1-11; Maréko 1.12-13

¹E mwojuia mwo wo lésu mu ha a éémwa loredano. Ke he caa ju tilieng na a *Jenen litih, ke e pééeng nge ha a melé.

²Ke e mu lang wo lésu he na 40 ni tan. Ke e pwo me tacebwénieng nelang wo *Caatana, pa apipé ne konye. Ke é ha a benaamwon naa, ke time e uce wiinaado, ke caa nihe menen.

³Ke e â céiieng wo Caatana, ke e pii ten pie: «Hemepie wogo pa *Naî Padué, ke go taatééhi ni péi ce me pwoloa!»

⁴Ke e pii ten wo lésu pie: «Caa te tii ne he ni tii iitihi pie: *Time e uce mulie cehi ko a pwoloa wo pa apulie.*» *Deutéronome 8.3*

⁵Ke e pééeng [da pwo a juwole] wo Caatana, ke e habwii ten, ha a cuwo benaamwon naa, ati ni amu me ni mwametau pwo bwohemwo.

⁶Ke e pii ten pie: «É o bo ne tem *a wâé te ati ni mwametau ce, me ni pihuô, be caa ne tong, ke é o te ne te paceli te nimung me é ne ten.

⁷Ke é bo tai ne tem ati, hemepie go tidihi jilim ne ânebuhung me go pipaunuéo.»

⁸Ke e hegi ne ten wo lésu pie: «Caa te tii ne he ni tii iitihi, pie: *Go pipaunu Padaame Padué hem, ke te weeng cehi na me go penem den.*» *Deutéronome 6.13*

⁹Ke e pé lésu nge *lérusaléma. Ke e pééeng da pwo a puni a *mwaiitihi, ke e pii ten pie: «Hemepie wogo pa Naî Padué, ke go téele mu éni!

¹⁰Be caa te tii ne he ni tii iitihi pie: *E bo pahede ni âcélo ten wo Padaame Padué, beme lé wéiko.*

¹¹Ke lé bo hegiko, ke o time uce tanahi ni am ne ko ni péi.» *Psaume 91.11–12*

¹²Ke e hegi ne ten wo lésu pie: «Ûhu, be caa te tii ne mwo he ni tii iitihi pie: *Go nemwo tacebwéni Padaame Padué hem.*» *Deutéronome 6.16*

¹³Heme e tacebwénieng ati wo Caatana, ke e engen kojaeng. Ke e ucéihi mwo ace céiu tan.

E tabuhi ni penem den wo lésu

Mataio 4.12–17; Maréko 1.14–15

¹⁴E mwojuia mwo ne ha amu Galilé wo lésu, he caa ju tilieng na a Jenen litih. Ke lé caa tabuhi pwojepule kon ne ha ati ni piduaan naa.

¹⁵Ke e pacémuni ni apulie ne he ni *mwotapitihi te ni *Juif, ke lé nihe pipii me wâé nang.

E mwojuia mwobé @ ne ha a mwopopwaalé ten

¹⁶E mwojuia mwobé wo lésu ne Nazaret, he na ubwo nang ne hen. Ke é ha a *tan iitihi, ke e taa ha a mwotapitihi, pwohewii ana mu te cemang me e pwo. Ke e cuwoda me e pine ni tii iitihi.

¹⁷Ke e ilehi [koja pa céiu apenem] a tii te péroféta Isaia. Ke e pale, ke e pipégali ni pwooti [na e pine telé]:

¹⁸ E kong a Jene Padaame. E neéo ngen , me é pé ngen: a Pwooti Wâé te nina tice delé; a bwo pawie ni apwocuhinaado; a bwo tehi ni naamii lèpwo bwi; ke a bwo tuwo lèpwona cielé.

¹⁹ Weengi a benaamwon den me e pipatemehi a pipwoééhe ke a wâé te Padaame. Ésaïe 61.1-2

²⁰ E capipihi ali tii wo lésu, ke e ne te mwo pali apenem, ke e tebwo. Ke lé te ju omeeng ati ne ni apulie na élé ha ali mwotapitihi.

²¹ Ke e pii telé pie: «Geé caa te téne nina e pipatemehi ne ni tii iitihi. Ke é jenaa, ke e caa pacuwohi [ne ânebuhewé ati].»

Muhi telé kon

²² Lé picedi lésu, me pii me wâé nang, be lé te junihe téetihi ni pwooti ten na pwojunuun. [Kehe icehi ana é alecehen] ke lé pipii telé pie: «[É mu ko ade na e wonaa a bwo cihe ten? He te pa apulie pwohewiikenye.] Be te pali naî Josef!»

²³ Ke e hegi ne telé pie: «Geé caa te téne ni naado na é pwo ne Kapernaüm. Ke nimewé me é pwo mwo celi wonaa ne éni ha amu tong. «Wieli geé pii tong a ocine ce: “Dotéén, go te pipwo mwo me tieden a cunu kom!”

²⁴ «Kehe icehi ana é pii tewé pie: “Au, mwolihi! Wo pa péroféta, ke time lé uce hegieng ehi ne ha amu ten.”

²⁵ «Te a juuju, be pwohewii a benaamwon de péroféta *Élia. Be li time uce ute, ke pwo a menele na nihe ubwo ne ha ati ni amu, he na cié ni jo ke pwo a behin. Ke nihe hiwon ni depwele ne ha amu *Isaraéla [na menelé].

²⁶ Kehe icehi ana time e uce ne ngen Élia wo Padué, beme e picani te êce céiu depwele ne Isaraéla, [amu ten]. Kehe e neeng nge pele ê céiu depwele ne ha a mwopopwaalé Sarepta, ne ha a céiu duaan ko a Sidon.

²⁷ «Ke geé te niimi mwo péroféta Élisé. Be li e pwo me tieden a katia ko Naaman, pa apulie mu Siri. Kehe icehi ana nihe hiwon ni katia ne Isaraéla.»

²⁸ Ke é he lé téne anaa wo lèpwo apulie ne ha ali mwotapitihi, ke lé te nihe okéé ne ko lésu.

²⁹ Ke lé te cuwoda kuti, ke lé teuueng da pwo a juwole, he na e mu lang a mwopopwaalé telé, beme lé bo cibetééeng ole jeoté.

³⁰ Kehe e te â ha awiemelé, ke e engen kojalé.

E pacémuni ni apulie @ ke e pwo me tieden ni cunu kolé

Mataio 8.14-17; Maréko 1.21-39

³¹ E tuie wo lésu ne Kapernaüm ne Galilé, ke e taa ha a mwotapitihi, ha a céiu tan iitihi. Ke e pacémuni ni apulie ko a pwooti te Padué.

³² Ke lé téetihi a bwo cihe ten, be e te pacémunilé mu ha a pihuô [na e te ne ten wo Padué].

E pawiehi ni duéé

33[É he e mwo ko cihe wo lésu] ke e taa ha a mwotapitihi wo pa apulie na pwo duéé kon. Ke e wiikau, ke e pii pie:

34«Éé! lésu mu Nazaret, te tice celi go pwo peleme! Go âbé pwotahi ne kome? É te temehiko, be wogo pa apulie na e pipégaliko wo Padué, ke e neko bé!»

35Ke e te henri kuti ali duéé wo lésu, ke e pii ten pie: «Go capuhi a pwom, ke go wie mu ko pa apulie naa!» Ke e tahi ole pali apulie na ali duéé, ne ânebuhe nina lé mu lang. Ke e wie mu kon, ke time e uce pwotahinaado ne kon.

36Ke lé te nihe tai téetihne ni apulie, ke lé pitahimwolé pie: «He ade celi e ko pwo wo pa apulie ce? Be pwojunuu nina e pii. Ke e pihuôhi mwo ni duéé, ke lé pitabemieng, ke lé wie!»

37Ke te piân a jepule ko lésu, pitihi amu naa.

E pwo me tieden ni cunu ko ni apulie

38E wie mu ha a mwotapitihi wo lésu, ke e â pele Simon Pétér. Ke lé pii ten pie, te nihe cunu êgi mwaa Simon, be e pwopilijing.

39Ke e âbé céiieng wo lésu, ke e ole nge huîn. Ke e pwohuu te ali pilijing, ke te tieden kojaeng kuti. Ke e cuwoda wo ênaa, ke e pwo me lé wiinaado.

40É he capéto ko a babwén, [he caa nebwén a tan iitihi telé] ke lé pébé céii lésu ati ni cunu. Ke e ne ni in huîlé ati, ke te muko tieden kuti ni cunu kolé.

41Ke lé wie mwo ni duéé, he lé cihe da ko miiden ko pii pie: «Wogo ke pa Naî Padué!» Kehe icehi ana e cihe me mwoiu ne kolé, ke time e uce nelé me lé patemehieng. Be lé caa temehi pie, weeng pa *Mesia.

E pipatemehi a Pwooti Wâé

42É ha acaama hen, ke e engen wo lésu, ke e â ha a céiu duaan na ticie hen. Kehe icehi ana lé haneeng ne ni apulie, beme lé ileeng pie, me e mwo mu pelelé.

43Ke e hegi ne telé pie: «Ûhu. Be wâé heme é pipatemehi mwo a Pwooti Wâé ne he ni bée mwopopwaalé. Be weengaa a watihen me é opé.»

44Ke e â pitihia *Judé, ke e pipatemehi a Pwooti Wâé ne he ni mwotapitihi.

Luka 5

E tote ni bécéiuhe acémun den

Mataio 4.18–22; Maréko 1.16–20

1É ha a céiu tan, ke e mu jeoté ticepwon ne Galilé wo lésu. Ke e patemehi a pwooti te Padué. Ke hiwon ni apulie na lé tebwo aujenieng, beme lé tabemieng.

2Ke e alihilupwo ong na lu ko mu jeoté ha a tabe mwonuhi ticepwon. Be lé caa ole mu pwon wo lépwo apwotau, ke lé ko puu ni pua telé.

³Ke e taa pwo a céiu ong, a onge Simon Pétér. Ke e pii ten pie: «Go picéi oté ali ong.» Ke e tebwo, ke e pacémunihi mwo ni apulie.

⁴Ke me e cihe ati, ke e pii te Simon [me ni béén] pie: «Geé taabé me genye te ju piole he na numwihi lang. Ke geé bwobe ne ni pua tewé.»

⁵Ke e hegí ne ten wo Simon pie: «Pa apipune, go téne, geme tee ko pwotau Jame a bwén ce, ke te tice celi geme pé. Kehe icehi ana é mu ko ana go pii teme, ke é o pwo.»

⁶Ke lé patupwo li pua telé. Ke te nihe hiwon kuti ni ikua na lé cuwo hen, ke pwo me e tie li pua telé.

⁷Ke lé pwo inenaado nge céii ni bélén na lé mu pwo a céiu ong, beme lé âbé picani telé. Ke oba lupwoli ong ko ikua, ke lu pwo me lu mwiiê.

⁸⁻¹⁰Ke te junihe mwotilé ati ko ana e tuie: wo Simon Pétér, me Cang me Ioane (lupwo naî Zébédé) me ati ni bélén. Ke e tupwo tidihi jilin ânebuhe lésu wo Simon, ke e pii pie: «Padaame, go piâdé ité kojaéo, be woéo, ke pa apulie na ta jo!» Kehe e pii ten wo lésu pie: «Go nemwo pwo me mwotiko! Tabuhi jenaa, ke bo wogo pa apwotauhi apulie.»

¹¹Ke lé mwojuia daamwo ticepwon, ke lé céida huâiu lupwoli ong. Ke lé necu ati, ke lé âcéi lésu.

E pwo me tieden ni cunu ko lupwo alo apulie

Mataio 8.1–4, 9.1–8; Maréko 1.40—2.12

Pa katia

¹²É he e mu ha a céiu mwopopwaalé wo lésu, ke e tuiebé wo pa céiu katia. Ke me e ali lésu, ke e tidihi jilin me pimiibule ne ânebuhé, ke e ilehi kojaeng pie: «Padaame, hemepie te nimem, ke go pwo me tieden a katia kong!»

¹³Ke e cine ngen a in, ke e ti kon, ke e pii ten pie: «Éa, te nimung! Caa wâé go!» Ke te tieden kuti kojaeng a katia kon.

¹⁴Ke e pii ten pie: «Go nemwo uce uti, kehe go â pihabwiiko ne te pa *apwoâpwailo. Ke go ne [te Padué] ali âpwailo li e pii wo *Moosé ne he li patén den. Be me wonaa, ke me lé alihí ati ne ni apulie pie caa wâé go.»

¹⁵Kehe icehi ana caa piân a jepule ko lésu. Ke nihe hiwon nina lé âbé céiieng me lé téneeng, me ilehi kojaeng pie, me e pwo me tieden ni cunu kolé.

¹⁶Kehe e mu â he ni duaan na te ticie hen, beme e pwoitihi.

Pa tebwomwa

¹⁷É ha a céiu tan, ke e pacémuni ni apulie wo lésu. Ke lé tabemieng ni bée *Farasaio me ni *dotéén ko patén, na lé âbé céiieng mu he ni mwopopwaalé mu Galilé, me *Judé, me *lérusaléma. Ke e mu ko lésu a junuu Padaame Padué, beme e pwo me wâé nina cunu jélé.

¹⁸Ke lé tuiebé ni bée apulie he lé pipaadoimi pa céiu bélén ne pwo apule ten, pana tebwomwa nang. Be nimelé me lé pééeng da huâ, me neeng ânebuhe lésu.

¹⁹Kehe icehi ana tice ace bwopwon, be junihe hiwon ni apulie. Ke lé pééeng da pwo mwa, ke lé tapwii a céiu duaa mwa. Ke lé neeng ole ne pwo apule ten ne ânebuhe lésu me ni apulie na élé aujenieng.

²⁰Ke e téetih a céhi telé wo lésu. Ke e pii te pali tebwomwa pie: «Pa bérng, caa pineuhi ni ta pwo tem.»

²¹Wo l épwo Farasaio me ni dotéén ko patén, ke lé pipii telé pie: «Wooélé pa apulie ce? Be e [pwo me piwielu me Padué, me] piciheta ne ko a niin! Be he wooélé na e temehi me e pineuhi ni ta? Te icehi Padué!»

²²Kehe icehi ana e te temehi wo lésu nina lé niimihi, ke e pii telé pie: «É mu ko ade na wonaa ni pwonimewé?»

²³Ade aceli piticecoon? Me é pii ten pie: “Caa pineuhi ni ta pwo tem”, ai me é pii ten pie: “Go cuwoda, ke go engen”?

²⁴[Ke hemepie jan me é pwo me e engen ne ânebuhewé ati] ke geé bo temehi pie, pwo mwomwon dong, woéo pa *Nahi Apulie, me é pineuhi ni ta pwo te ni apulie ne pwo a bwohemwo.» Ke e pii te pali tebwomwa pie: «Aje, go cuwoda, ke go pé apule tem, ke go âmwo pelem.»

²⁵Ke e te cuwoda kuti ne ha awieme ni apulie. Ke e pé apule ten, ke e âmwo pelen, he e pipwoun de Padué.

²⁶Ke lé nihe téetih ati ne nina lé alihi anaa. Ke te junihe mwotilé, ke lé pii éwaanihi telé pie: «Éé! Te nihe ité kuti nina nye alihi jenaa!» Ke lé pipwoun de Padué.

E tote Lévi (Mataio)

Mataio 9.9–13; Maréko 2.13–17

²⁷É alechen, ke me e â he pwaaden wo lésu, ke e ali Lévi (Mataio), pa *atai mwani cuhi puni apulie [me de l épwo Roma] he e teko tebwo ha a mwopenem den. Ke e pii ten wo lésu pie: «Go âbé céing!»

²⁸Ke e te cuwoda kuti wo Lévi, ke e necu ati, ke e âcéi lésu.

²⁹Ke é alechen, ke e pwo a piwiinaado na ubwo wo Lévi ne pelen, beme e pipwoun de lésu. Ke e tote mwo l épwo atai mwani bén, ke hiwon mwo ni bée apulie.

³⁰Ke lé mu lang mwo wo l épwo Farasaio ke ni bélén, l épwo dotéén ko patén. Ke lé tai pihu ne ko l épwo *acémun de lésu, ke lé pii telé pie: «É mu ko ade na geé piwiinaado me ûdu me l épwo atai mwani, ke ni bée apulie na ta jélé?»

³¹Ke e pii telé wo lésu pie: «Time lé uce hane ce dotéén wo l épwona te wâé jélé, kehe te icehi l épwona cunu jélé.

³²Be time é uce âbé tote nina lé niimihi pie wâé ni mulihelé. Kehe é âbé tote nina lé temehi pie ta ni mulihelé, beme lé bitelé, ke me lé pitaatééhi ni mulihelé.»

A pwooti ko a pipaciile

Mataio 9.14–17; Maréko 2.18–22

³³Lé pii te lésu ne ni béé Farasaio pie: «Geme te cuwo ko *pipaciile, wogeme ni Farasaio, me lépwo acémun de *loane pa apipuu apulip. [Be geme patupwo wiinaado beme geme pwoitihi.] Kehe é mu ko ade na time lé uce pipaciile wo lépwo acémun dem?»

³⁴Ke e hegi ne telé pie: «Kona lé te pipatupwo wiinaado wo lépwona todelé ne ko a piaten, heme e mwo teko mu pelelé wo pa apiaten? Úhu!

³⁵Kehe e o bo âbé a tan na o bo pé kojalé pa apiaten. Ke é mulang na lé o bobe pipaciile.»

³⁶Ke e pii telé mwo a ocine ce wo lésu pie: «Te tice pace céiu apulie celi e tie ace me-epwén celi mwo ju wamin, me e woli ne ko a epwén na caa ukéiu. Be o bo tie ali epwén li mwo ju wamin! A céiu mwo: Ke time uce piwie lupwo memwaanu ne ko a epwén, be caa ukéiu.

³⁷«Geé niimihi a *mwotabe na pwo ko iiwota. Be time nye uce pé ace tabe megele celi mwo coho, me nye pa a mwotabe na caa ukéiu. Be [pwocoon me cibu, ke] e bo pabuwoshi, ke genye o patieden a tabe megele me ni mwotabe.

³⁸Úhu! Wâé heme nye ne a tabe megele na mwo coho, ne ha a mwotabe na mwo coho!

³⁹Kehe icehi ana wo lépwona lé mu ûdu ni tabe megele na caa ukéiu, ke muhi telé ko ni tabe megele na mwo ju coho. Be lé pii pie: “Nihe wâé a neme ni tabe megele na caa ukéiu!”»

Luka 6

Pa eapwihi a tan iitihi

Mataio 12.1–14; Maréko 2.23—3.6

¹É ha a céiu *tan iitihi, ke lé [uti a pwaaden na e] pitahagéi nge he ni apwoamu wo lésu me lépwo acémun den. Ke é nge he pwaaden, ke lé tabwo ni ace blé wo lépwo acémun den. Ke lé elelehi ne he ni ilé, ke lé wii ni pidé.

²Ke lé pii telé wo lépwo béé *Farasaio pie: «Lépwoje, é mu ko ade na geé pwo anaa? A naado na paciitihi ha a tan iitihi!»

³Ke e hegi ne telé wo lésu pie: «Kona time geé mu uce pine ne he ni tii iitihi, ana e pwo wo pa daame *Davita? Be é ha a céiu tan, ke menelé, woélé me ni béén.

⁴Ke e taa ha a mwaiitihi [na pwo ko mwaanu]. Ke e pé ni pwoloa na ne me de Padué, ke e eni. Ke e ne me lé eni mwo wo lépwo béén. Kehe ni pwoloa naa, ke te ni *apwoâpwailo cehi, na pwo mwomwon delé me lé eni.»

⁵Ke e pii telé mwo wo lésu pie: «Woéo, pa Nahi Apulie, ke pa eapwihi a tan iitihi.»

E pwo me tieden a cunu ha a tan iitihi

⁶É ha a céiu tan iitihi, ke e taa ha a *mwotapitih wo lésu, ke e pacémuni ni apulie. E mu lang mwo wo pa apulie na mele a in ne pwo jui.

⁷Ke lé te ju ome lésu wo lépwo *dotéén ko patén me lépwo Farasaio, beme lé alahi pie, he e o te pwo me wâé pa apulie naa, ha a tan iitihi? Be lé hane ace bwopwonen me lé bo pipé ne kon.

⁸Kehe e te temehi ni âniimihinaado telé wo lésu, ke e pii te pali cunu pie: «Go cuwoda, ke go âbé éni, ânebuhe ni apulie ati!» Ke e cuwoda wo paje [ke e âbé céii lésu, ne ânebuhe ni apulie].

⁹Ke e pii wo lésu te nina lé mu lang pie: «Woté? He te ne me pwo ana wâé ha a tan iitihi, ai ana ta? Me celuimi a mulip, ai me taunuhi?»

¹⁰Ke e te ju ome taatéélé wo lésu. Ke e pii te pali apulie pie: «Go cinebé a im!» Ke e cine ngen a in, ke caa te wâé mwo kuti.

¹¹Ke lé te nihe okéé kuti wo lépwo Farasaio me lépwo dotéén ko patén. Ke lé picihe ko aceli me lé pwo te lésu.

E pipégali ni apostolo ten na 12

Mataio 10.1–4; Maréko 3.13–19

¹²É ha a céiu tan, ke e taa pwo juwole wo lésu. Ke e pwoiitihi te Padué jame a bwén.

¹³É pwopwometan, ke e tote ati nina lé mu âcéin. Ke e bwo pipégali mu pelelé lépwo apulie na ¹² jélé, ke e ne ni niilé pie *apostolo:

¹⁴Woélé-ni: Simon (e ne me a niin wo lésu pie Pétér); André, pa ciéén; Cang; Ioane; Filip; Bartélemi;

¹⁵Mataio; Toma; Cang, pa naî Alfé; Simon, pa Zélate;

¹⁶Jude, pa naî pa céiu apulie na pii kon pie Cang; Judas Iscariot, pana e bwo icu lésu.

Hiwon ni apulie na lé âbé céii lésu

Mataio 4.23–25

¹⁷Lé mwojuia mwo mu pwo juwole wo lésu me ni ¹² apostolo ten. Ke lé cuwo ha a duaan na te ju pule ehi. Ke hiwon ni apulie na lé âbé céilé. Be wo lépwo béén na lé mu âcéi lésu, me ni bée apulie mu *lérusaléma, ke é mu ati ha amu *Judé, ke é pejié mwonuhi lupwo pwomwo ubwo Tir me Sidon.

¹⁸Be lé tai âbé beme lé tabemi lésu, ke me e pwo me tieden ni cunu kolé. Ke e peni ni duéé na hiwon mu kolé.

¹⁹Ke hiwon nina lé hane me lé ti kon. Be pwo a *pipwojunuun na e wie mu kon, ke te tai tieden ni cunu kolé.

Pipune te lésu
 Mataio 5.1-12,43-48; 7.1-29
Adéikewé

20E biteeng wo lésu nge céii lépwo acémun den, ke e pii telé pie: «Adéikewé, wogewé na tice dewé, be o bo a dewé a *Mwametau te Padué!

21Adéikewé, wogewé na mwo menewé jenaa, be o bo pwoluu gewé! Adéikewé, wogewé na geé é jenaa, be geé o bo piap.

22Adéikewé heme lé téétikewé, me muhi telé kowé, me lé pihoonikewé, me lé pii me ta gewé, mu ko ana wogewé, ke wo lépwo apulie tong, woéo pa Nahi Apulie.

23Be lé te wonaa te lépwo péroféta wo lépwo watihelé. Ke é pii tewé pie: Geé pipwodéén, me piwâénimewé, be o ubwo a cemewé ne jeda he miiden* ko ni penem dewé!»

O bo pwo ni téé ne ko ni béén

24«[Weengi ni pwooti tong ne kowé] wogewé na pwo dewé: O bo pwo ni picani me ni téé ne kowé. Be ni naamuuwé, ke o caa te ninaa kuti ni ja ko ni pipwodéén dewé.

25O bo pwo ni picani me ni téé ne kowé, wogewé na pwoluu gewé. Be o bo menewé. O bo pwo ni picani me ni téé ne kowé, wogewé na geé pipwodéén jenaa. Be geé bo é me pihemun.

26O bo pwo ni picani me ni téé ne kowé, wogewé na lé pii me wâé gewé ne ni apulie. [Kehe time uce a bwopiinen pie wâé gewé!] Be o junihe ubwo ni cuhinaado [tewé koja] lépwo péroféta agele li lé nihe pii me ubwo jélé wo lépwo apulie.»

Geé pipwoééhe nina lé téétikewé!

27«É pii tewé, wogewé na geé tabemiéo pie: Geé pwo me eânimewé te nina lé téétikewé, ke geé pwo nina wâé ne ko nina muhi telé kowé.

28Ke geé *adéi nina lé piapwokewé, ke geé pwoitihi me de nina lé pii me ta gewé.

29Ke mepie e ahi a céiu kwoom wo pace céiu apulie, ke go ne ten mwo a céiu. Ke hemepie e pé ace palito tem, ke go ne ten mwo a cimii tem.

30Ke é hemepie e ilehi kojako ace céiu naado wo pace céiu apulie, ke go ne ten. Ke é hemepie e pé ace dem, ke go nemwo ilehi mwo kojaeng.

31[É pii tewé mwo pie]: Go pwo ne te ni béén ce naado celi nimem me lé pwo ne tem.»

32«Be mepie te ju eânimem cehi te nina eânimelé tem, ke kona é mu ko ade na go uce ucéihi ace cemem [koja Padué]? Be lé te wonaa mwo wo lépwo apulie ta.

33Ke hemepie go pwo nina wâé te nina lé pwo ana wâé tem, kona é mu ko ade na go ucéi ace cemem? Be lé te wonaa mwo wo lèpwo apulie ta.

34Ke é hemepie go te ne mwani cehi te ni bén na lé bo wodehi ne tem, ke é ko ade na go ucéihi ace cemem? Be lé te wonaa mwo wo lèpwo apulie ta.

35«Geé téne! Geé pwo me eânimewé te nina lé téétikewé. Ke geé pwo celi wâé ne ko ni apulie, ke geé ne telé me piticenaado ne kon. Be mepie geé wonaa, ke o nihe ubwo ce cemewé celi e bo ne tewé wo Padué, ne he miiden. Be [geé habwii ne he ni bwomu tewé pie] wogewé, ke ni ju naîn. Be weeng, ke te eânimen de lèpwona time lé uce pwo-olé ten, me lèpwona lé pwo nina ta.

36Wâé heme go pipwoééhe pwohewii pa Caa tem, be e pipwoééhe.»

Geé nemwo tauti ni bén

37 «Geé nemwo tauti ni bén, ke o time e uce tautikewé wo Padué. Geé nemwo pwo me lé pwocuhinaado wo lèpwo bén, beme time geé uce pwocuhinaado. Ke mepie geé pineuhi ni ta pwo telé, ke weeng, ke e o pineuhi ni ta pwo tewé.

38Geé ne, be e o bo ne tewé mwo wo Padué. Ke o te piubwo a ja kon ne tem mwo. Ke geé bo hegí ni naado na pieda ke nina nihe piwéden. Be e o bo ne tem pwohewii a bwo ne nen dem ne te lèpwo bén.»

39Ke e pii telé a ocine ce wo lésu, pie: «Kona wo pa bwi, ke o te jan ne kon me e pé pace céiu bwi? Úhu! Be lu o tai tupwo ne ha ace pwon!

40Ke é pii tewé pie: Wo pa acémun, ke time e uce piwéden koja pa apacémunieng. Kehe icehi ana mepie e nihe cémun ehi, ke e bo pwohewii pa apacémunieng.

41-42 «Go te ju alihí ehi a meté na e hamii pa âjiénem, kehe time go uce alihí a ba-acuwo na ubwo na e hamíim! Ke go woté ko ace bwopiinen de pa bénem pie: “Go ne me é pétaabwon a meté na e hamíim”? «Wogo, ke pa apipulekenye, kehe bwi go! Go mi pétaabwon a ba-acuwo na ubwo na e hamíim! Ke é mulang, ke go bwobe ali ehi ace bwo pétaabwon na a meté na e hamii pa âjiénem.»

A acuwo me ni acehin

43 «A acuwo na wâé, ke pwocoon me e ne ce acehin celi ta. Ke a acuwo na ta, ke pwocoon me e ne ce acehin celi wâé.

44Be genye alihí temehí a acuwo mu ko ni acehin. Be time genye mu uce tabwo ace majing mu ko ace éé muceni! Ke time genye mu uce tabwo ace tabe megele mu ko ace acuwo celi pwo dan.

45Ni naado na wâé, ke e âbé mu ko pa apulie na wâé nang, be wâé a pwonimen. Kehe ni naado na ta, ke e âbé mu ko pa apulie na ta nang, be ta a pwonimen. Be genye cihe mu ko nina e mu he ni pwonimenye.»

A ocine ko lupwo mwa

⁴⁶ «É mu ko ade na geé tee pii pie: “Padaame, Padaame!”, he time geé uce piténedeéo?

⁴⁷[Geé téne a ocine ce]: «Pa apulie na e téne ati ni pwootti tong, ke me e piténedeéo,

⁴⁸ke e pwohewii pa apulie na e pwo a mwa ten. Ke e ini ole die ko a péi, beme e ne pwon a mwa ten. Ke me ujaa, ke me e téte a tabe ne ko ali mwa, ke time e uce tanahi, be e bahi ne pwo a péi.

⁴⁹Kehe wo pana e téne ni pwootti tong, ke me time e uce ténedehi, ke e pwohewii pa apulie na e pacuuli a mwa ten, ke time e uce ne ace paan. Ke me e âbé a jaa, ke me e ti ko ali mwa, ke e te tupwo kuti, ke e te tanahi ati.»

Luka 7

A céihi te pa céiu caa te coda

Mataio 8.5–13

¹É heme e ko pii ati ninaa wo lésu te ni apulie, ke e mwojuia ngemwo Kapernaüm.

²Ke pwo pa céiu caa te coda roma na e mu lang, ke pwo pa apenem den na te nihe ubwo a pwonimen kon, ke nihe cunu nang, ke e caa pwo me e mele.

³Ke me e téne a jepule ko lésu, ke e ne nge céiieng ni béé apulie na piubwo jélé ne pele lépwo Juif, beme lé ilehi kojaeng pie, me e pwo me tieden a cunu kon.

⁴Ke lé â too lésu wo lépwonaa, ke lé wâgo kon me e picani te pali caa te coda, ke lé pii ten pie: «Go téne go Padaame, wo panaa, ke pa apulie na nihe wâé nang, ke wâé heme go picani ten.

⁵Be e pipwoééhe a bele tenye [wogenye lépwo *Juif] die ko ana e pwo a *mwotapitihi tenye.»

⁶Ke e âcéilé wo lésu. Kehe me lé âmwonuhi ali pomwa te pali caa te coda, ke e nebé céii lésu ni béén, beme lé pébé céiieng a pwootti ten ce: «Go téne go Padaame, time uce jan ne kom, me go tuie nge ha a pomwa tong, be te junihe pwonaado ne kom.

⁷Ke time uce jan ne kong mwo me é âdé céiko. Wâé heme go ju pii ace pwootti, ke o tieden a cunu ko pa apenem dong.

⁸Be woéo, ke é piténede pa apihuô tong, ke é uce pihuô te ni coda. Ke me é pii te pace céiu pie, me e ân, ke e ân. Ke me é pii te pace céiu pie: “Go âbé!”, ke e âbé. Ke me é pii te pa apipenem dong pie: “Go pwo ani!”, ke e te pwo.»

⁹Ke e te junihe téele wo lésu, ke e picedi pali caa te coda. Ke e biteeng nge céii ni apulie na nihe hiwon jélé na lé âcéin. Ke e pii telé pie: «Geé te ju tabemi ehi: Time é uce téele too pace apulie celi ubwo ace céihi ten pwohewii paje, ke piwien mwo ne [ha a bele te Padué], *Isaraéla.»

10Ke heme lé mwojuia ngemwo pele pali caa te coda wo lépwoli béén, ke lé too pali apenem den he caa wâé nang mwo.

E mulie mwo wo pa naî ê depwele

11É alechen, ke e engen wo lésu nge ha a mwopopwaalé na pii kon pie Naïn. Ke lé âcéin ni acémun den, me ni bée apulie na hiwon jélé.

12É heme lé tuie nge ha a pomwa ko ali mwopopwaalé, ke lé too ni apulie he lé ko pipaadoimi nge he iitihi pa apulie na e caa mele. Pana te céiu nang ne te nyaa ten, êgi depwele. Ke hiwon ni apulie na lé âcéilé.

13Ke me e alieng wo Padaame, ke te nihe ubwo a bwo pwoééhen, ke e pii ten pie: «Êje, go nemwo é.»

14Ke e gaaté, ke e ti ko ali piélele. Ke lé cuwo wo lépwoli lé pé. Ke e pii te pali amele pie: «Aje, é pii tem pie: Go ûmiê!»

15Ke e te caama tebwo kuti, ke e cihe! Ke e neeng ole wo lésu, ke e neeng de céii nyaa ten.

16Ati nina lé mu lang, ke te nihe mwotilé, ke lé picedi Padué. Ke lé pipii telé pie: «E opé penem peleny wo Padué! Be e nebé céiikenye pa céiu péroféta ten, na nihe ubwo nang.»

17Ke lé piuti nina e pwo wo lésu ne ha ati ni piduaan ne ko a *Judé.

Pa Mesia na lé ucéieng

Mataio 11.1-6

18Wo lépwo acémun de loane [pa apipuu apulie] ke lé uti ten ati nina e pwo wo lésu. Ke e tode lupwona alo julu wo loane,

19ke e nelu nge céii Padaame lésu, beme lu tahimwoeng pie: «He caa te wogo kuti pali *Mesia li me e bo tuiybé? Ai, me geme mwo te ucéi pace céiu mwo?»

20-21Ke lu engen, ke é he lu tehene nge pele lésu, ke lu alahi pie, e pwo me tieden ni cunu ko ni bée apulie. Ke e pawiehi ni duéé, ke e pwo me lé niê mwo ni béeén na bwi jélé. Ke lu pii ten pie: «E nekemu bé céiiko wo loane, beme gemu tahimwoko pie: Caa te wogo kuti pali Mesia li me e bo tuiybé? Ai, me geme mwo te ucéi pace céiu?»

22Ke e hegi ne telu pie: «Geu mwojuia mwo me geu â piuti te loane nina geu alahi, me nina geu téne. Be lé caa niê mwo wo lépwo bwi; ke lé caa engen ehi wo lépwo tebwa; ke caa wâé mwo wo lépwo katia jélé; ke lé caa téne mwo wo lépwo bwéjé jélé; ke lé caa mulie cemwo wo lépwo amele; ke lé caa hegi a Pwooti Wâé wo lépwo tice delé!»

23*Adéi pana e alahi temehiéo, me céihi ne kong!»

E cihe ko loane wo lésu

Mataio 11.7-19

²⁴É heme lu caa mwojuia mwo wo lupwoli acémun de loane, ke e pii wo lésu te ni apulie na lé mu lang pie: «É he li geé â ha a da [me geé téne loane] ke he ade aceli geé â alih? [Pa apulie na pipwoééhen na e pwohewii] a womeéle celi e papenemih na a dan?

²⁵Ûhu! Ke kona he ade aceli geé â alih? Pace céiu apulie celi e cuwohe ace epwén celi nihe wâé? Ûhu! Wo lépwona lé wonaa, ke nina lé mu he ni pwomwo he daame, ke nihe hiwon ni naamuulé.

²⁶Te ade aceli geé â alih? Pace céiu péroféta? Éa, ke é pii tewé pie: Wo panaa, ke pa péroféta ubwo!

²⁷Be te wo loane kuti na e piieng wo Padué ne he ni tii iitihi pie: *É bo neole pa apipépwooti tong. E bo ânebuhem, me e pwopweehi a pwaadeniim. Malachie 3.1*

²⁸«Geé téne ehi: Te tice pace apulie pwo bwohemwo celi e piwéden koja *loane pa apipuu apulie. Kehe icehi ana é pii tewé pie: Wo pana nihe wahin nang ne ha a *Mwametau te Padué, ke nihe pieda koja loane.»

²⁹Lé téne anaa wo lépwo *atai mwani cuhi puni apulie, ke ni béén mwo, ke lé caa tai alih pie, wo Padué, ke wâé nang ke mwomwon nang. Ke lé â céii loane beme e puulé.

³⁰Kehe icehi ana wo lépwo *Farasaio, me lépwo *dotéén ko patén, ke time lé uce piténedehi ana nime Padué me lé pwo, be muhi telé me lé â céii loane me e puulé.

Lé pipiikemu me loane

³¹Ke e pii mwo wo lésu pie: «É bo pipwohewii ne ko ace de ni apulie jenaa?

³²Lé pwohewii ni cuwo nahi ewa na lé pidaataa ha apimu te ni apulie. Be [muhi te ni béén me lé jele me ni béélé]. Ke lé pii telé ne ni béélé pie: “Geme cuu oopwé tewé, ke time geé uce pwolu. Ke geme pwo a nyebi ko mele, ke time geé uce é!”

³³«Be e tuiebé wo loane pa apipuu apulie, ke time e uce eni pwoloa, ke time e uce ûdu tabe megele, ke geé pii pie “Pwo duéé kon!”

³⁴«Ke é tuiebé, woéo pa Nahi Apulie, ke é wiinaado me ûdu [pwohewii ni béén]. Ke geé pii pie: “Wo paje, ke te nihe pa aûdu, ke pa awiinaado! Ke e pabéé ni atai mwani, me ni béé apulie na ta jélé.”

³⁵«Ke [a juuju ana nye mu pii pie]: “Nye alih a pitemang ne he ni bwomu te nina lé mulie ha a pitemang.”»

Tapulicéihi tabe ûde ne ko lésu

{Mataio 26.6–9; Maréko 14.3–9; loane 12.1–8}

³⁶É ha a céiu tan, ke e tote lésu wo pa céiu Farasaio beme lé piwiinaado. Ke é he lé mwo ko tebwo pwo taap,

³⁷ke e tuiebé ê céiu toomwo pwopwaaden, be e téne pie, e lang wo lésu. E pébé a mwotabe péi na oba ko tabe ûde.

³⁸Ke e tidihi jilin me pimiibule ne ânebuhe lésu, ke e é. Ke téé ni tabehaamiin ne pwo lupwo a lésu, ke e tahi ko ni apunin. Ke e mwomwaaahi ni a lésu, ke e céihi ne pwon ali tabe ûde.

³⁹Me e alihiaanaa wo pali eapwihi pwomwo, pali Farasaio, ke te junihe muhi ten, ke e niimihi pie, ‘Mepie pa céiu péroféta wo paje, ke e o te temehi pie ê toomwo ce, ke e toomwo pwopwaaden.’

⁴⁰Kehe icehi ana [e te temehi âniimihinaado ten] wo lésu, ke e pii ten pie: «Go téne, go Simon, be pwo ana nimung me é pii tem!» Ke e hegi ne ten wo paje pie: «Go cihe!»

⁴¹Ke e pii ten wo lésu [a ocine].

A ocine ko lupwo alo apulie na pwo kérédi telu

«E bwo mu wo pa céiu apulie. Ke pwo lupwo alo apulie na lu pwo kérédi ten, be wo pa céiu, ke 500000+, ke wo pa céiu ke 50000.

⁴²«Kehe icehi ana time uce jan me lu pwocuhin. Ke e pii telu pie: “Caa wâé! Geu necu ni kérédi teu.” Ke e tai pineulu die ko ni kérédi telu.»

[E panebwénihi a ocine ten wo lésu, ke e tahimwo Simon, pali Farasaio, pie]: «Wooélé mu ko lupwona, na e junihe alihia bwo wâé pali eapwihi mwani?»

⁴³Ke e hegi ne ten wo Simon pie: «Wieli wo pali nihe hiwon ni kérédi ten.» Ke e pii ten wo lésu pie: «Go juuju.»

Nihe ubwo a pipwoééhe te êgi toomwo

⁴⁴⁻⁴⁶Ke e biteeng wo lésu nge céii êgi toomwo, ke e pii te Simon pie: «Aje, heme é taabé éni ha a pomwa tem, ke time go uce pwopweehi ne kong [pwohewii ana nye mu te pwo]. Be time go uce ne ace tabe me a bépuu ne ni ang. Ke time go uce céihi tabe ûde ne pwo a puning. Kehe go te ali ê toomwo ce? Tabuhi he li e taabé éni, ke time e uce cuwo ko a [bwo pwo ne nina wâé. Be e] puu ni ang ko ni tabehaamiin, ke e tahi ko ni apunin. Ke e céihi a tabe ûde [na te junihe ubwo a cuhin] ne pwo lupwo ang.

⁴⁷Be nihe ubwo a pipwoééhe ten, be nihe hiwon ni ta pwo ten na caa pineuhi. Kehe go téne, wo pa apulie na time uce pineuhi ni ta pwo ten na hiwon, ke time uce ubwo ne kon a pipwoééhe.»

⁴⁸Ke e pii te êgi toomwo pie: «Êje, caa pineuhi ni ta pwo tem.»

⁴⁹Ke wo lépwona lé teko tai tebwo pwo taap me weeng, ke lé pipii telé pie: «Wooélé pa apulie ce, na jan me e pineuhi ni ta?»

⁵⁰Ke e pii te êgi toomwo wo lésu pie: «Adéiko go êje! E caa celuimiko na a céihi tem! Ke go engen, be e bo mu pelem a péém.»

Luka 8

E pacémuni ni apulie na lé âcéin

Mataio 12.46—13.23; Maréko 3.31—4.25

1 É alecehen, ke lé engen wo lésu me lépwo 12 acémun den, ke lé â nge he ni pwomwo ubwo me ni mwopopwaalé. Ke e patemehi ngelang a Pwooti Wâé ko a Mwametau te Padué.

Ni toomwo na lé âcéin

2 Pwo mwo ni toomwo na lé âcéi lésu: wo léli toomwo li e pwo me tieden ni cunu kolé, me pawiehi mu kolé ni duéé: Wo Maria mu Magdala li e pawiehi mu kon ni duéé li 7;

3 Wo Jeanne, êgi mwode Chuza, pa caa te lépwo apipenem de pa daame *Érode; Wo Suzane; Hiwon mwo ni toomwo na lé mu ne mwani me ni delé, beme ni bépican te lésu, me ni acémun den.

A ocine ko pa acemi

4 Nihe hiwon ni apulie na lé âbé céii lésu mu he ni muko mwopopwaalé. Ke e pii telé a ocine ce:

5 «E bwo mu wo pa céiu apulie, ke e bwo wie ha a céiu tan, beme e tagiliihi ni âdaanu. Ke é he e ko tagiliihi, ke lé tupwo nge pwo pwaaden ni bée pidenaado, ke lé engen pwon ne ni apulie. Ke lé âbé ne ni meni, ke lé wii ati.

6 Ke ni béén, ke lé tupwo ne ha a wii péi. Ke lé te pwome cim, kehe icehi ana lé meiu, be te tice tabe lang.

7 Ke ni béén, ke lé tupwo ne ha awieme ni mwawi ubwo. Ke me lé tai picim, ke lé taunuhi li pidenaado.

8 Ke ni béén, ke lé tupwo ne ha a pule na wâé. Ke lé cim, ke piubwo jélé da, ke lé ne ni acehin na nihe hiwon, die ko 100.» Ke e pii me ubwo wo lésu pie: «Wo paceli pwo ce pwojéénen me e téne, ke wâé heme e téne!»

Lé téne ke time lé uce piténédehi

9 Lé tahimwo lésu wo lépwo acémun den ko ace bwopiine a ocine naa.

10 Ke e hegi ne telé pie: «E ne tewé wo Padué me geé temehi a ju bwomune a Mwametau ten. Kehe ni bée apulie, ke lé te ju téne cehi ni ocine beme: *Lé tee omehi taaci, kehe time lé uce alahi temehi; ke lé tee téne taaci, kehe time lé uce téne temehi.*» *Ésaïe 6.9*

A bwopiine a ocine ko pa apicemi

11 E pii telé mwo wo lésu pie: «Weengi a bwopiine a ocine naa: Ni pide âdaanu, ke a pwooti te Padué.

12 «[Ke ni bée pidenaado, ke lé tupwo nge pwo pwaaden.] A pwaaden, ke ni apulie na lé téne a pwooti, kehe icehi ana e tuiebé mwo wo *Caatana, ke e céi

cemwohi a pwooti mu he ni pwonimelé. Be koli lé bo céhi ne kon, ke bo celuimilé.

¹³«Ke ni bée pidenaado, ke lé tupwo ne ha a wii péi. [A wii péi] ke ni apulie na lé hegi a pwooti ne ha a pipwodéén, ke lé tabuhi céhi ne kon ha a céu benaamwon. Kehe icehi ana time e uce pwo waan ne kolé a pwooti na lé téne. Ke me e tuie ne kolé ni tacebwén, ke lé patieden ni céhi telé.

¹⁴«Ke ni bée pidenaado, ke lé tupwo ne he ni mwawi ubwo. [A pule naa] ke ni apulie na lé téne a pwooti, kehe icehi ana me lé caa engen, ke pinekepé ne telé ne ko ni naado na e tuie ne pwo a bwohemwo ce. Ke lé téte cehi a mwani me ni naamuu bwohemwo, me ni naado na wâé telé. É mu ko ninaa, ke time lé uce ne ce acehin celi megele.

¹⁵«Ke ni bée pidenaado, ke lé tupwo ne ha a pule na wâé. [Ke a pule naa] ke ni apulie na lé téne a pwooti, ke lé hegi ne he ni pwonimelé na wâé, ke lé ténedehi, ke lé cumang ne kon, ke pwo acehi a pwooti ne kolé.»

A ocine ko a mwomiû

¹⁶[E pii telé mwo wo lésu pie]: «Time nye uce ne miû ko a mwomiû, me nye talui ko ace cio, ai me nye ne haahi ace apule! Kehe genye ne da ko miiden, beme lé o alihî ehi, ne nina lé â taabé ha a mwa.

¹⁷Ati ni naado na neduwohi, ke o bo habwii ne ha a pwéélang, beme nye alihî ehi.

¹⁸Geé cile ni pwooti na geé téne [beme piubwo da nina geé temehi]. Be wo pana caa pwo ne ten, ke o ne mwo pwon ce béen. Kehe wo pana te tice ten, ke o pétaabwon kojaeng a nehinaado na e niimihi pie e pelen.»

A ju pwomwoiou te lésu

¹⁹É alechen, ke lé tuiebé wo nyaa te lésu me lépwo ciéen, beme lé alieng. Kehe icehi ana pwocoon me lé â céieng ko a bwo hiwon ni apulie na lé aujenieng.

²⁰Ke e pii te lésu wo pa céiu apulie pie: «Aje, élé âoté pwomwo wo nyaa tem me lépwo ciéém. Be nimelé me lé aliko.»

²¹Ke e hegi ne telé pie: «Ê nyaa tong me ni ciéeng, ke ni apulie na lé téne a pwooti te Padué, ke lé piténédehi.»

E pacuwohi a udan wo lésu

Mataio 8.23–27; Maréko 4.35–41

²²É ha a céiu tan, ke lé taa pwo a céiu ong wo lésu me lépwo acémun den. Ke e pii telé pie: «Genye gaale ângedé ko a céiu duaa jié.» Ke lé engen.

²³Ke me lé ko ân, ke e pule wo lésu. Ke e tabuhi tahieng me ubwo a dan he jié. Ke ubwo a tabe, ke e taa ha ali ong.

²⁴Ke lé paûmiê lésu, ke lé pii ten pie: «Pa apipune, genye o caa mwiiê!» Ke e cihe me mwoiu ne ko ali dan me ali jié. Ke e te cuwo kuti ali udan, ke caa te ju au mwo.

²⁵Ke e pii telé pie: «É ko ade na time geé uce céihi?» Kehe icehi ana te nihe mwotilé. Ke lé téetieng, ke lé pipii telé pie: «É! Kona woo pa apulie ce na e pihuôhi a dan me a jié, ke lu piténedeeng?»

E cibéé ni duéé na hiwon jélé @ mu ko pace céiu apulie

Mataio 8.28–34; Maréko 5.1–20

²⁶Lé tuie nge ha amu Gadara wo lésu me l épwo acémun den, he bebenihe a amu Galilé.

²⁷⁻²⁹É ha amu naa, ke pwo pa apulie na pwo ni duéé kon. Caa nihe bwolihi na e pimu ha a iitihi, ke te tice naamuun. Ke hiwon ni benaamwon na lé mu pahaulieng li duéé [beme e pwotahinaado]. Ke wo l épwo apulie lang, ke lé mu cie lupwo in me lupwo an, ke lé taa kon a itihe toki. Kehe icehi ana e mu te tahagéi. Ke lé mu cineeng nge ha a melé ne li duéé. Ke heme e ole mu pwo ali ong wo lésu, ke e te âbé beniieng kuti wo paje. Ke wo lésu, ke e cibéé wie ni duéé mu kon. Kehe icehi ana e tidih ijin, me pimiibule ne ânebuhen, ke e toii da pie: «lésu, pa *Naî Padué na nihe e daaité! Ade aceli nimem me go pwo tong? É ilehi kojako pie: Go nemwo pwo tong aceli ta.»

³⁰Ke e tahimwoeng wo lésu pie: «He pii e woté ace niim?» Ke e hegi ne ten pie: «Bwehi duéé!» Be nihe hiwon ni duéé na élé kon.

³¹Ke lé wâgo ko lésu, me pii ten pie: «Go nemwo tahikeme ne ha a pwon na tice anebwén kon!»

³²Ke he pwo a pubu puwokwo na nihe hiwon jélé na lé ko um gaale hamwo a juwole, ke lé pii ten ne li duéé pie: «Kehe go nekeme me geme taa he ni puwokwo ne.» Ke e te pwo ne telé ana lé ilehi wo lésu.

³³Ke lé wie mu ko pali apulie, ke lé gaale he li puwokwo. Ke lé te téte kuti li puwokwo mu pwo juwole, ke lé téele ne he tabe, ke lé mwiiê.

Piân ali jepule

³⁴Me lé alih ana e tuie wo l épwo awéhi puwokwo, ke lé te téte kuti, beme lé â uti a jepule naa, ne he ni mwopopwaalé ke é na ati ha amu.

³⁵Ke lé âbé ni apulie, beme lé alih ana e tuie. Ke me lé âbé mwonu lésu, ke lé ali pali apulie li e pawiehi li duéé mu kon, he e caa ko tebwo ânebuhe lésu. Ke e caa cuwohe ni epwén, be caa ju wâé nang. Ke te junihe emegéi nalé.

³⁶Ke wo l épwona lé alih ana e tuie, ke lé piuti te l épwo béén ali jepule ko a bwo wâé nang mwo.

³⁷Ke te junihe mwoti ati ni apulie ha amu naa, é Gadara. Ke lé pii te lésu pie me e engen kojalé. Ke e taa pwo ong.

³⁸[Me e pwo me e engen] ke e âbé ileeng wo pali apulie li lé wie mu kon li duéé pie, me e âcéin. Kehe icehi ana e hegi ne ten pie:

³⁹«Go mwojuia ngemwo pelem, ke go uti ati ni naado na e pwo ne kom wo Padué!» Ke e mwojuia mwo wo paje. Ke e â uti ne ha a mwopopwaalé ati ni naado na e pwo ne kon wo lésu.

E pwo me wâé lu alo toomwo

Mataio 9.18–26; Maréko 5.21–43

⁴⁰E tuie gaapé wo lésu mu ko a céiu duaan ko a jié. Ke lé hegieng ne ni apulie lang, be lé tee ko ucéieng.

⁴¹Ke e tuiybé wo pa céiu apulie na a niin pie Jaïrus, pa céiu caa te *mwotapitih. Ke e tidihi jilin ne ânebuhe lésu, ke e wâgo kon pie, me e âcéin die ha a pomwa ten.

⁴²Be pwo ê naîn na te céiu nang na caa ¹² ni jo hen, na e caa pwo me e mele. Ke e âcéin wo lésu.

Ê toomwo na 12 ni jo ko a cunu kon

[É he e mwo ko â he pwaaden] ke hiwon ni apulie na lé aujenieng, ke lé picemelé.

⁴³Ke e mu ha awieme ni apulie naa ê céiu toomwo na caa ¹² ni jo na cunu nang hen, be e mu tuie ni benaamwon na e mu téte kon a cewéle. Ke e caa te ju patieden ni mwani ten ne ko ni dotéén, kehe icehi ana time uce jan me lé pwo me tieden a cunu kon.

⁴⁴Ke e piâbé alecehe lésu, ke e ti ko a baaé epwénen. Ke e te cuwo kuti a bwo téte na ali cewéle.

⁴⁵Ke e pii wo lésu pie: «Wooélé na e ti ko a epwénung?» Ke lé tai hegi ne ten pie: «Time uce wogeme!» Ke e pii ten wo Pétérú pie: «Pa apwopune, é mu ko ade na go pii anaa? Be go alihí, te nihe hiwon ni apulie éni na lé aujenikenye, ke lé picemeko!»

⁴⁶Kehe icehi ana e pii mwo wo lésu pie: «Pwo pace céiu apulie celi e ti ko a epwénung, be é téne pie e engen mu kong a céiu duaa niihung.»

⁴⁷Ke te ju éjén êgi toomwo ko a bwo mwotieng. Be e alihí pie e temehi ana e ko tuie wo lésu. Ke e tidihi jilin me pimiibule ne ânebuhen. Ke e pii ten, ne ânebuhe ati ni apulie, a watihen me e ti kon, ke a bwo tieden na a cunu kon.

⁴⁸Ke e pii ten wo lésu pie: «Adéiko go êje! Caa wâé go mwo ko a céihi tem! Ke go engen, ke me e mu pelem a péém.»

Ê naî Jaïrus

⁴⁹He e mwo ko pii anaa wo lésu, ke e tehenebé wo pa céiu apulie mu pele Jaïrus, pali eapwihi mwotapitih. Ke e pii ten pie: «Au! E caa mele wo êgi naîm. Kehe go nemwo pahauli pa apipune.»

50Ke e téne ni pwocihe naa wo lésu. Kehe icehi ana e pii ten pie: «Go nemwo pwo me mwotiko! Kehe go céhi, be bo wâé nang mwo!»

51É heme lé tuie nge ha a pomwa ten, ke e paciitihi ko ni apulie me lé nemwo taa huâ, te icehi Pétér, me loane, me Cang, me lu nyaa me caa te êgi cuwo nahi toomwo.

52Be lé tai é ke pihemun ko êgi nahi toomwo. Ke e pii telé wo lésu pie: «Geé nemwo é! Geé ko pii pie e caa mele; kehe woéo, ke é pii pie e teko ju puluta!»

53Ke lé pihoonieng, be lé temehi pie e caa te mele.

54[Ke e taa ha ali mwa.] Ke e pétaa ko a in, ke e toii da pie: «Ê naîng, go cuwoda!»

55Ke e caa mulie mwo, ke e te caamada kuti. Ke e pii wo lésu [te lu nyaa me caa ten] pie: «Geu ne celi e wii.»

56Lu te nihe téetih, kehe icehi ana e pii telu wo lésu pie: «Geu nemwo pii te ce béé apulie ana tuie ne éni.»

Luka 9

E ne ngen ni 12 apostolo ten

Mataio 10.5–15; Maréko 6.7–13

1-2E todebé ni 12 *apostolo ten wo lésu, ke e nelé ngen beme lé â patemehi a *Mwametau te Padué. Ke e ne telé a pihuô me a junuun, beme lé pawiehi ni duéé, ke me lé pwo me tieden ni cunu ko ni apulie.

3Ke e pii telé pie: «Geé nemwo pé ce naado hemepie geé engen: mepie ace bwaja, me ace éele, me ace pwoloa, me ce mwani. Ke geé te cuwohe cehi ace epwén celi te céiu.

4«Ke mepie lé hegikewé ne ha ace céiu pwomwo, ke wâé heme geé mu lang, dieli geé bo engemwo mu ha a duaan naa.

5Ke mepie time uce nime ni apulie me lé hegikewé ne ha ace céiu duaan, ke geé engen mulang. Ke geé tagiliihi ni muu pule ko ni awé, beme geé habwii pie time uce wâé ni huô telé [be muhi telé ko a pwooti te Padué].»

6Ke lé engen wo lèpwo apostolo nge he ni mwopopwaalé, ke lé patemehi a Pwooti Wâé, ke lé pwo me tieden ni cunu ko ni apulie.

E téne a jepule kon wo Érode

Mataio 14.1–12; Maréko 6.14–29

7-9 E téne ni jepule ko lésu wo *Érode Antipas, gupéno ne Galilé. [Be e téne pie e pwo ni *pipwojunuun.] Ke e pii pie: «É pwo me tahagéi hene *loane pa apipuu apulie. Ke he wooélé pa apulie ce?» Ke e hane me e alieng. Ke tabuhi pinekepé ten, be lé pii ne ni béé apulie pie: «Weeng, ke wo loane pa apipuu apulie, he e caa mulie cemwo mu ha amele!» Ke lé pii ne ni béén pie, wo péroféta Élia, ai pace céiu péroféta ânebun na e caa mulie cemwo.

Lé wiinaado ne ni apulie na 5000 jélé

Mataio 14.13–21; Maréko 6.30–44; Ioane 6.1–15

10Lé mwojuia mwo wo lépwo apostolo [mu he ni mwopopwaalé, ke lé pitapitilé] ne pele lésu. Ke lé uti ten ati ni naado na lé pwo. Ke e péélé nge ha a céu duaan na te piticie hen, mwonuhi a mwopopwaalé Betsaïda.

11Kehe icehi ana hiwon ni apulie na lé téne pie lé â lang, ke lé âcéilé. Ke e hegillé wo lésu, ke e pacémunilé ko a Mwametau te Padué, ke e pwo me tieden ni cunu kolé.

12Ke é he babwén, ke lé âbé céiieng wo lépwo acémun den, ke lé pii ten pie: «Go ne ngemwo ni apulie ce, nge he ni mwopopwaalé, me ni pwomwo na e mwonu, beme lé pé ce wiinaado telé, ke me lé pule ngelang. Be apiticie éni.»

13Ke e hegi ne telé wo lésu pie: «Ûhu! Geé ne ce wiinaado telé!» Ke lé pii ten pie: «Te ju nim ni pwoloa, ke alo ni ikua na e peleme! Kona nimem me geme â pwocuhi ce wiinaado me delé ati?!»

14Be élé nge ha a 5000 ni apulie aiu. Ke e pii te ni acémun den pie: «Geé pii te ni apulie pie, me lé pwo ce pubuulé, me pi 50. Ke me lé tebwo.»

15Ke lé ténedehi, ke lé pwo me lé tai tebwo ne li apulie.

16Ke e pé li pwoloa li nim me lupwoli ikua wo lésu. Ke e alehede da he miiden, ke e pwo-olé te Padué. Ke e ebii li pwoloa, ke e ne te lépwo acémun den, me lé pwopatihi ne ha a pubu apulie.

17Ke lé tai wiinaado ati, ke caa pwoluu jélé. Ke lé taineibuhi mwo ni nehi mepwoloa, ke lé paobaanihi ni éelele na 12 kon.

Wo lésu ke pa Mesia

Mataio 16.13–28; Maréko 8.27—9.1

18É ha a céu tan, ke e te pwoiitihi wo lésu ne ha a céu duaan na apiticie, weeng me ni acémun den. Ke e tahimwolé pie: «Kona lé pii pie woté ne kong ne ni apulie? Lé pii pie woéo, ke woo?»

19Ke lé hegi ne ten pie: «Lé pii ne ni béen pie, wogo, ke wo loane pa apipuu apulie. Ke lé pii ne ni béen pie, wo pérféta Élia. Ke lé pii mwo wo lépwo béen pie, pa céu bée lépwo pérféta ânebun na e caa mulie cemwo.»

20Ke e tahimwolé wo lésu pie: «Ke kona wogewé ke?» Ke e hegi ne ten wo Pétéru pie: «Wogo, ke pa *Mesia, na go âbé mu pele Padué!»

21Kehe icehi ana e te junihe paciitihi kolé me lé nemwo pii anaa te ni apulie.

E bo mele ke mulie cemwo

22E pii telé pie: «O bo tuie ni benaamwon na é bo nihe mu he ni picani hen, woéo, pa Nahi Apulie. Be wo lépwo apihuô, me lépwo caa te lépwo *apwoâpwailo, me ni *dotéén ko patén, ke o te muhi telé kong. Ke lé bo pwo me é mele. Kehe icehi ana é ha a béciéhe ni tan alecehen, ke é bo mulie cemwo.»

A bwo âcéin

23 E pii te ati ni apulie wo lésu pie: «Wo paceli nimen me e âbé céing [beme pa acémun dong] ke me e nemwo bo uce piniumieng mwo. Kehe wâé heme e canihi téteda he ni tan a *kuricé ten, ke me e âbé céing.

24 Be wo pana nimen me e celuimi a mulihen, ke e o patieden. Kehe wo pana e patieden a mulihen mu kong, ke o celuimieng.

25 He ade ne te pa apulie, hemepie e hegí ati ni naamuu a bwohemwo, ke me e patieden a mulihen?

26 «Wo lépwo béén, ke tanim jélé kong me a pwooti tong, ne ânebuhe ni apulie. Ke heme wonaa, ke woéo pa Nahi Apulie, ke o bo tanim jo kolé, hemepie é bo âmwobé. É ha a tan naa, ke o bo habwii a bwo ubwo na a wâé teme, woéo me Caa tong, me ni *âcélo iitihi.

27 Ke é pii tewé a juuju pie: E bo ne éni a Mwametau ten wo Padué, ati ne ha a junuun. Ke pwo lépwo béén na élé éni jenaa na lé o mwo te alihiaan, ânebuhe ce bwo mele telé.»

Habwii a bwo ubwo na a wâé ten

Mataio 17.1–8; Maréko 9.2–8

28 É he na 8 ni tan alechehe a bwopiine ni pwooti naa te lésu, ke e pé Pétérus, me Ioane, me Cang. Ke lé taa pwo juwole beme lé pwoitihi.

29 Ke é he e mwo ko pwoitihi wo lésu, ke pitaatééhi a bwo alihiaan a pwahamiin. Ke â pwojo ni epwénen, pwohewii a pwéélang ko a ilehi.

30 Ke [lé te ali kuti] lupwo apulie na lé piche me weeng: wo *Moosé, me Élia, [lupwo alo péroféta ânebun na piubwo julu].

31 Ke lu âbeetieng ne ha a bwo ubwo na a wâé te Padué. Ke lé piche ko a bwo â mele ten ne *lérusaléma.

32 Ke me lé mwo ko wonaa, ke wo Pétérus me lupwo acémun béén, he lé mwo ko pule ko a bwo mwaale jélé. Ke me lé ûmiê, ke lé alihia *a wâé te lésu, ke lé ali lupwoli apulie, li lu mu pelen.

33 Ke me lu engen koja lésu wo Moosé me Élia, ke e pii ten wo Pétérus pie: «Éé! Pa apipune, te nihe wâé heme genye ko mu éni. Wâé heme gême pacuuli ce mwa mwaanu celi cié, beme a dem a céiu, ke me a de Moosé a céiu, ke me a de Élia a céiu.» E pii anaa, be time e uce temehi aceli e ko pii [ko a bwo emegéi nan].

34 É he e mwo tee ko cihe, ke e te âbé kuti a menii, ke e taluilé ko a démen. Ke te nihe mwoti lépwo acémun den.

35 Ke lé téne a pwocihe bé mu ha ali menii, na e pii pie: «Wo paje, ke pa Naîng [na te céiu nang] na é caa pipégalieng. Ke geé piténedeeng!»

³⁶Ke é alechen, ke lé alihí pie, caa te piwoélé cehí me lésu. Ke lé te cile me delé ha a benaamwon naa, ke time lé uce piuti te ni apulie.

E pwo me wâé pa céiu ewa @ na pwo duéé kon

Mataio 17.14–18; Maréko 9.14–27

³⁷É ha acaama hen, ke lé homwobé mu pwo juwole wo lésu me lèpwo acémun den na cié jélé. Ke lé âbé céii lésu ne ni apulie na nihe hiwon jélé.

³⁸Pwo pa céiu bélén, na e toii da pie: «Pa apipune, é ileko pie, go picani te pa naîng, na te ju céiu nang.

³⁹Be e mu pééeng a duéé, ke e mu pwo me e wiikau, ke e mu pegilieng, ke e mu tahieng ole pwo bwohemwo, ke e pwo me téte ni tabepwon. Ke e mu te nihe pwotahinaado ne kon, ânebuhe a bwo wie mu kon.

⁴⁰Ke é ile ni acémun dem pie, me lé peni ali duéé, kehe icehi ana time uce jan ne kolé.»

⁴¹Ke e pii telé wo lésu pie: «[É pipwoééhewé] wogewé ni apulie jenaa! Mwo te time geé uce téele céihi, be wogewé ni apwo mwoiu pun! O é dieli éniile celi é o mwo tee mu pelewé, ke me é mwo tee picani ne kowé? Pébé éni pa cuwo ewa naa!»

⁴²He lé mwo ko pééeng bé, ke e tahieng ole pwo bwohemwo na ali duéé, ke e pegilieng. Ke e te penieng kuti wo lésu. Ke e pwo me tieden ali cunu ko pali ewa aiu, ke e neeng de caa ten.

⁴³Ke lé te nihe téetihí ati ne ni apulie na lé alihí a inenaado naa ko a junuu Padué.

Ni bée pwooti te lésu

Mataio 17.22—18.6; Maréko 9.30–41

Lé o pwo me taunuéo

Ni bée apulie, ke lé picedihi ati nina e pwo wo lésu. Ke e pii te ni acémun den pie:

⁴⁴«Ke wogewé, ke geé téne ehi ani: O bo icuéo te ni apulie, woéo pa Nahi Apulie. Ke lé bo imwiéo, [ke lé bo pwo me é mele].»

⁴⁵Kehe icehi ana time lé uce temehi ana e pii. Be time uce pwaale ne telé a bwopiinen. Kehe mwotilé me lé tahimwoeng kon.

Woo pana piubwo nang?

⁴⁶É alechen, ke lé tabuhi picihí wo lèpwo acémun den, ke lé pitahimwolé pie: «Kona woo paceli piubwo nang ne ha awiemenye?»

⁴⁷Kehe icehi ana e te temehi ni pwonimelé wo lésu. Ke e pé pa cuwo nahi ewa, ke e neeng cebwon.

48Ke e pii telé pie: «Wo pana e hegi ne he niing pace cuwo nahi ewa pwohewii paje, ke e hegíeo. Ke wo pana e hegíeo, ke e hegi mwo pana e neéo bé. Be wo pana nihe piwahin nang mu hadeniiwé ati, ke weeng pana piubwo nang.»

Pana time e uce âbédékenye

49E pii wo loane te lésu pie: «Pa apwopune, geme ali pa céiu apulie na e peni ni duéé ne he niim. Ke geme pii ten pie me e nemwo pwo, be time uce pa bénée.»

50Ke e hegi ne telé pie: «Geé nemwo tanyuueng! Be wo pana time e uce âbédékenye, ke pa bénée.»

Muhi telé kon ne Samari

51E o caa tuie a benaamwon na me ece a bwohemwo ce wo lésu. Ke e te nihe pipamwoiueng, beme e â lérusaléma.

52Ke e ne ngen l épwo apipépwooti ten, me lé â ha a céiu mwopopwaalé ne ha amu ne *Samari, beme lé bo piwâam ko ace bwo tuie ngen den.

53Kehe icehi ana wo l épwo apulie lang, ke muhi telé me lé hegieng, be e engen me e â lérusaléma [a pwomwo ubwo na e ha amu *Judé].

54É heme lu téne anaa wo lupwo acémun den, wo Cang me loane, ke lu pii ten pie: «Padaame, hemepie nimem, ke gemu o ilehi a miû me e opé mu he miiden, beme e bo cinilé!»

55Ke e biteeng wo lésu, ke e henilu {pie: «Time geu uce temehi pie he ade jenenaado na e cihe kou.

56Be woéo pa Nahi Apulie, ke time é uce âbé beme lé mele wo l épwo apulie, kehe é âbé beme é celuimilé.»} Ke lé â ha a céiu mwopopwaalé.

Lépwona nimelé me lé âcéi lésu

Mataio 8.19–22

57É he lé ko â he pwaaden, ke e âbé céii lésu wo pa céiu apulie, ke e pii ten pie: «[Nimung me] é âcéim na ati he ce piduaan celi go bo â hen.»

58Ke e hegi ne ten wo lésu pie: «Ni wota apiaba, ke pwo ni amwaale telé; ke ni meni, ke pwo ni mwonahilé. Kehe woéo, pa Nahi Apulie, ke te tice duaan celi me é mwaale hen.»

59Ke e pii te pa céiu apulie wo lésu pie: «Go âbé céing.» Kehe icehi ana e pii pie: «Mwo cuwo lang, beme é mwo â pineduwo caa tong.»

60Ke e hegi ne ten wo lésu pie: «Go necu ni amele me lé te pineduwolé! Kehe wogo, ke go pipatemehi a Mwametau te Padué.»

61E pii te lésu wo pa céiu apulie pie: «Padaame, é bo te âdé céim. Kehe icehi ana go mwo neéo beme é mwo â pine a pwomwoiu tong.»

62Ke e hegi ne ten wo lésu pie: «Wo pana e ne a in ko a béum, ke me e niê ocemwo, ke time uce jan ne kon, me e taa ha a Mwametau te Padué.»

Luka 10

E pahede lépwo apulie na 70 jélé

Mataio 11.20–24, 13.16–17

1E pipégali ni apulie na 70 jélé wo Padaame lésu. Ke e nelé ngen he pialo ânebuhen, nge he ni mwopopwaalé me ni duaan na e niimihi pie me e â lang.

2Ke e pii telé pie: «Nihe ubwo a pitii âdaanu na me pwo, kehe icehi ana time uce hiwon ni apenem. Geé pwoiitihi, me illehi koja pa eapwihi apwoamu, me e ne mwobé ce bée apenem, beme lé pitii âdaanu.

3Geé engen [ke geé pipwocile]! Be é pahedekewé pwohewii ni nahi muto nge ha awieme ni wota apiwii.

4Ke heme geé ân, ke geé nemwo pé ce mwani, me ce éele, me ce dihibwaawé. Ke geé nemwo tee pwojepule me ni bée apulie nge he pwaaden.

5«Ke me geé taa ha ace céiu pwomwo, ke geé mi pii pie: “Me e mu ha a pwomwo ce a péém!”

6Ke mepie pwo pace apulie celi e mu lang, celi e mu kon a péém, ke e bo mu pelen a péém. Ke me time uce wonaa, ke e o te mwojuia ne mwo kowé.

7Me geé mu ha ace pwomwo, ke geé wii ke ûdu celi lé bo ne tewé. Be wo pa apenem, ke o wâé heme e hegi a cuhieng. Ke geé nemwo piâdé ke âbé nge he ni pwomwo; geé mu ha ace pwomwo celi céiu [dieli geé bo engen mu ha a duaan naa].

8«Ke é heme geé taa ha ace céiu mwopopwaalé, ke mepie lé hegikewé, ke geé wii celi lé bo ne tewé.

9Ke geé pwo me tieden ni cunu ko ni apulie lang, ke geé pii telé pie: “E caa âbé mwonukewé a *Mwametau te Padué!”»

Lépwona muhi telé ko a pwoooti

10«É hemepie time lé uce hegikewé ne ha ace mwopopwaalé, ke geé â ha apimu ubwo te ni apulie, ke geé pipatemehi telé pie:

11“Geme tagilihi ni muu pule ko amu tewé, mu ko ni ame [beme ine a pitautinaado te Padué]! Ke geé pipwocile, be caa é mwonu a Mwametau ten!”

12«Ke é pii tewé a juuju pie: É ha ace Tan celi e bo tauti ni apulie hen wo Padué, ke o te junihe ubwo ace cuhinaado telé koja lépwo *Sodome [li te junihe ta ni huô telé].

13«Geé pipwocile, wogewé ni apulie Korazin me Betsaïda! Be o bo ne cuhinaado tewé! Be é caa pwo ni naado na nihe ubwo ne pelewé [ke time geé uce céiji]! Geé cuwoteeke niimihi lupwo pwomwo ubwo Tir me Sidon ânebun

[be te nihe ta ni huô te ni apulie lang]. Kehe icehi ana hemepie lé alahi ana é pwo ne pelewé, ke wiel i caa te é bwolihi celi lé taatééhi ni mulihelé. Ke me lé o habwii ko ace bwo cuwohe cang delé, me pitimilé he dep.

¹⁴Ke o te nihe ubwo ce cuhinaado tewé koja lépwo Tir me Sidon.

¹⁵«Ke te piwien ne kowé, wogewé lépwo apulie Kapernaüm. Be geé niimihi pie pwonaado ne kowé, ke geé pwohewii Padué. Úhu! E bo nekewé ole céii lépwo amele!»

¹⁶Ke e pii mwo wo lésu te lépwo apulie ten pie: «Hemepie e piténedekewé wo pace céiu apulie, ke woéo na e piténedeéo. Ke mepie time e uce hegikewé wo pace céiu apulie, ke woéo na time e uce hegiéo, ke time e uce hegi mwo pana e neéo bé.»

[Ke lé engen wo lépwo apulie te lésu na 70 jélé.]

Lé mwojuia mwobé

¹⁷He lé mwojuia mwobé, ke lé te junihe pipwodéén, ke lé pii pie: «Padaame, lé piténedekeme ni duéé [heme geme pii telé pie me lé wie] ne he niim!»

¹⁸Ke e hegi ne telé wo lésu pie: «Geé téne! É ali *Caatana, he e tupwo mu he miiden pwohewii a ilehi!

¹⁹Ke é caa ne tewé a pihuô me geé engen pwo ni bwien, me ni atinip, ke me geé â ati pwo a junuu Caatana. Ke o te tice celi e tatéékewé.

²⁰Kehe icehi ana geé nemwo pipwodéén cehi mu ko ana lé piténedekewé ne ni duéé! Kehe wâé heme geé pipwodéén ne ko ana e caa tii ni niiwé wo Padué ne ha a tii ten ne he miiden.»

E pwo-olé te Padué wo lésu

²¹Ke é ha a cuwo benaamwon naa, ke e te nihe pipwodéén wo lésu, mu ko a *Jenen litih. Ke e pii te Padué pie: «É pwo-olé tem, go Caa, Padaame he a miiden me a bwohemwo, be go neduwohi ni naado naa koja lépwo atemehinaado me lépwo apitemang, ke go habwii te lépwona time lé uce cémun. Be te âcehi ana te nimem kon.»

²²[Ke e pii te lépwona lé téneeng pie]: «Ati nina e pele Caa tong, ke e caa ne tong. [E caa te pihabwieng dong, beme é temehieng ehi.] Te weeng cehi na e temehiéo, woéo pa Naîn. Ke te woéo cehi na é temehieng, ke é habwieng te ni béén, beme lé temehieng mwo.»

²³Ke e biteeng nge céii ni acémun den wo lésu, ke e pii telé pie: «Nihe piwâénimewé heme geé alahi ni naado na geé alahi.

²⁴Be é pii tewé pie: Hiwon ni péroféta me ni daame na te nihe nimelé me lé alahi nina geé alahi, kehe time lé uce alahi. Ke nimelé me lé téne nina geé téne, kehe time lé uce téne.»

A patén na piwéden

²⁵ [Ha a céiu tan] ke e âmwobé céii lésu wo pa céiu *dotéén ko patén. Be nimen me e tacebwénieng, ke e tahimwoeng pie: «Pa apipune, he ade aceli me é pwo, beme é hegi a *mulie dieli mwo ne pele Padué?»

²⁶ Ke e hegi ne ten wo lésu pie: «He ade aceli tii ne he ni patén? Ke go woté ko ace bwo temehi nen dem?»

²⁷ Ke e pii ten wo pali apulie pie: «*Go pwo me eânimem de Padaame Padué hem, ati ne ha a ju pwonimem, me a mulihem, me a niihem, me a bwo niimihinaado tem.* Deutéronome 6.5 Ke go pwo me eânimem de ni béen , pwohewii a bwo pieânimem dem.» Lévitique 19.18

²⁸ Ke e hegi ne ten wo lésu pie: «Go te ju hegi ehi; ke me go wonaa ace bwomu tem, ke go o taa ha *a ju mulip.»

²⁹ Kehe icehi ana nime pali me e habwii pie e juuju. Ke e tahimwo lésu mwo pie: «Ke kona woo pace apulie celi me eânimung den?»

³⁰ [Ke e pwo a ocine wo lésu beme e hegi ne ten.]

A ocine ko pa Samari

E pii pie: «Pwo pa apulie [pa âjiénenye, wogenye lépwo *Juif. Ke é ha a céiu tan] ke e ole mu *lérusaléma me e â lériko. Ke me e â he pwaaden, ke lé ahieng wo lépwo abune, ke lé pé ati ni mwani ten me ni epwénen. Ke lé bwo neeng, he e caa pwo me e mele.

³¹ «Ke nebwén, ke e âbé ha a pwaaden naa wo pa *apwoâpwailo, [pa âjiénenye]. Ke heme e ali pali apulie, ke e te padep kon, ke e te ân.

³² Ke e tuiebé mwo wo pa apipenem ko a *mwaiitihi, [pa âjiénenye] ke e te pwohewii pana e ânebun, ke e te uti a pwaadeniin.

³³ «Ke heme e âbé wo pa céiu bée lépwo *Samari, [lépwona geé pitéétilé] ke e ali pali apulie, ke nihe ubwo a bwo eânimen den.

³⁴ Ke e âmwonueng, ke e céhi a *huile* me a tabe megele beme e ciie ni ahinaado kon, ke e tawii. Ke e temeeng da pwo a buriko ten. Ke e pééeng nge ha a mwa te ni aâdé ke âbé, ke e cileeng nelang.

³⁵ «É ha acaama hen, ke e ne ni mwani te pali eapwihi pwomwo, ke e pii ten pie: “Go cile ehi paje. Ke mepie time uce jan ni mwani ce, ke go bo pwocuhi ni nehin, ke é bo wodehi ne tem hemepie é bo mwojuia mwobé.” «[Ke nebwén, ke e engen.]»

³⁶ Ke e tahimwo [pali dotéén ko patén] wo lésu pie: «É mu ko lépwo apulie na cié jélé naa, ke woo paceli eânimen de pali apulie li tanahieng? Ade ace âniimihinaado tem?»

³⁷ Ke e hegi ne ten wo pali dotéén ko patén pie: «Wo pana e pwopweehi ne kon, ke e picani ten.» Ke e pii ten wo lésu pie: «Go engen, ke go pipwohewieng.»

Lu hegi lésu wo Maria me Marte

³⁸Lé â pwo pwaaden wo lésu me ni acémun den. Ke lé tuie nge ha a céiu mwopopwaalé na e mu hen ê céiu toomwo na pii kon pie Marte. Ke e hegile ne ha a pomwa ten.

³⁹Ke pwo ê ciéén na pii kon pie Maria, na e tebwo ânebuhe lésu, beme e tabemi ati ni pwooti ten.

⁴⁰Ke wo Marte, ke pipééeng a pwoila, ke e âbé pii te lésu pie: «Padaame, e te neéo ê ciééng me é te pipenem cehi! Kona te piticenaado ne kon ne tem? Go pii ten pie, me e âbé picani tong!»

⁴¹Ke e pii ten wo Padaame pie: «Au êje, Marte, go te junihe gia ko ni naado na nihe hiwon [na piticenaado ne kon].

⁴²Kehe go téne, te ju céiu cehi a naado na pwonaado ne kon. Ke e caa tooli wo Maria. Ke o time bo uce pé kojaeng mwo.»

Luka 11

A bwo pwoiitihi

Mataio 6.9–13, 7.7–11

¹É ha a céiu tan, ke e pwoiitihi ne ha a céiu duaan wo lésu. Ke é he e caa nebwén, ke e pii ten wo pa céiu acémun den pie: «Padaame, go pacémunikeme ko a bwo pwoiitihi, be e wonaa wo *loane pa apipuu apulie te lédwo acémun den.»

Pa caa teme...

²Ke e hegi ne ten pie: «Weengi a bwo pwoiitihi tewé: “Caa teme jedá he miiden, wâé heme paciitihi a niim. Wâé heme e âbé a Mwametau tem.

³Go ne teme ce wiinaado celi jan ne kome, ati he ni tan.

⁴Go pineuhi ni ta pwo teme, pwohewiin he geme pineuhi ni ta na lé pwo teme. Go nemwo nekeme he ni tacebwén.”»

Ocine ko a bwo pwoiitihi

⁵⁻⁶[E pacémuni mwo lédwo acémun den wo lésu] ke e pii telé a ocine ce ko a bwo pwoiitihi: «Geé cuwoteeke niimihi ani: E tuiebé wo pa céiu apulie ne pelem ha awieme bwén, kehe te tice wiinaado ha a pomwa tem. Ke go téte nge pele pa béém, ke go ilehi kojaeng ce pwoloa celi cié.

⁷«Kehe icehi ana e caa pule wo paje, ke time e uce wie ne kom, ke e te ju pii ole pie: “Neéo! Be é caa pule me ni naîng, ke é caa kiléhi a pomwa. Pwocoon me é cuwoda me é ne tem ce pwoloa!”»

⁸[Ke e pii wo lésu pie]: «Wieli time e uce picani tem be te pa béém, kehe icehi ana hemepie go te mwoiu ko ilehi, ke e o te picani tem, ke e bo ne tem ana nimem kon.»

Geé ilehi taaci koja Padué

⁹«É mu ko anaa, na é pii tewé pie: Wâé heme geé tee ilehi taaci [koja Padué] be e bo ne tewé. Ke geé tee hane taaci, be geé bo tooli. Ke geé tee cii taaci a pomwa, be e o bo tehi ne tewé.

¹⁰Éa, be wo pana e ilehi, ke o bo ne ten. Ke wo pana e hane, ke e o tooli. Ke wo pana e cii a pomwa, ke o tehi ne ten.

¹¹«{He woo mu hadeniiwé celi e o ne ace péi te pa naîn, hemepie e ilehi kojaeng ace pwoloa? Ke} he woo celi e o ne ten ace bwien, hemepie e ilehi ace ikua?

¹²Ke woo paceli e o ne ace atinip te pace naîn, hemepie e ilehi ace pihija?

¹³Be wogewé lépwo apulie na ta gewé, kehe geé temehi ne nina wâé te ni naîwé. Ke me wonaa, ke wo Padué Caa jeda he miiden [na te junihe wâé nang] ke e bo ne a *Jenen litihi ne te lépwona lé ilehi kojaeng.»

E cibéé ni duéé wo lésu

Mataio 12.22–30,43–45; Maréko 3.22–27

¹⁴É ha a céiu tan, ke e cibéé a duéé wo lésu mu ko pa apulie na huuhu nang. Ke me e wie mu kon ali duéé, ke e te cihe kuti wo pali apulie. Ke lé téetihí ne ni apulie na lé mu lang.

¹⁵Kehe lé pii ne ni béén pie: «E peni ni duéé ko a junuu Caatana, pa daame he ni duéé!»

¹⁶Ke lé pwo me lé pipwohuô te lésu wo lépwo béén, ke lé pii ten pie: «Go habwii teme ace *pipwojunuun de Padué celi e kom.» [Be nimelé me lé habwii pie, time e uce penem ko a junuu Padué.]

É penem ko a junuu Padué

¹⁷Ke e te temehi ni bwo niimihinaado telé wo lésu. Ke e pii telé pie: «Hemepie e pipwopa ne mwo kon ace céiu mwametau, ke a mwametau naa, ke o tanahi. Ke mepie e te pipwopa ne kon mwo ace céiu pwomwoiu, ke a pwomwoiu naa, ke o tanahi.

¹⁸Ke é hemepie e pipwopa ne mwo kon wo Caatana, ke kona e o woté ko ace bwopwonen me e cumang a mwametau ten? Geé ko pii pie, é cibéé ni duéé ko a junuu Caatana:

¹⁹Ke hemepie wonaa, ke kona woo celi e ne te ni béewé ce junuun me lé peni ni duéé?! Be lé habwii pie geé getiéo!

²⁰Ûhu! É peni ni duéé ko a junuu Padué. Ke [é hemepie nimewé kon, ke te jan me geé alahi temehi pie] e caa tuiebé pelewé na a *Mwametau te Padué!

²¹«Wo pa apulie na pwo niihen, ke pwo ni pihe pa ten, ke o jan ne kon me e wéhi a pomwa ten me ni naamuun. Ke time uce mwotieng,

²²be e céihi ne ko ni pihe pa ten. Kehe icehi ana hemepie e tuiybé wo pa apulie na junihe pwo niihen kojaeng, ke me lu pipwopa, ke e piwéden wo pana junihe

pwo niihen. Ke e pé kojaeng ni pihe pa ten me ni wâé ten, ke e patihi ne ko lépwo béén.

²³ «Ke wo pana time uce pa béoing, ke e cubwoniéo. Ke wo pana time e uce picani tong me gemu taineibuhi, ke e papiidenihi.»

A bwo engen ke mwojuia te ni duéé

²⁴ «[Geé cuwoteeke téne ani]: Hemepie pwo duéé ko pace céiu apulie; ke me e wie mu kon, ke e â wé? E âdé ke âbé he ni duaan na ticie hen. Be e hane ace duaan celi me e mu hen, kehe icehi ana time e uce tooli. Ke e niimihi pie, me e mwojuia ngemwo ha ali mwa li e wie mu hen.

²⁵ «Ke e mwojuia, ke e tooli ali mwa he te ju balé hen ehi, ke pwoipihi ehi.

²⁶ Ke e â hane ni duéé béén na 7 jélé, na te junihe ta jélé kojaeng. Ke lé taa pimu ha ali mwa. Ke wo pa apulie naa, ke bwo junihe ta nang mwo kojan ânebun!»

Ni bée bwo hegí nen de lésu

Mataio 12.38-42

²⁷ Hiwon ni apulie na lé ko tabemi lésu. He e mwo tee ko pacihelé, ke e te cihe da ko miiden kuti ê céiu toomwo mu hadenilé, ke e pii pie: «*Adéi ê toomwo na go âbeele mu kon, ke e paditiko!»

²⁸ Ke e hegí wo lésu pie: «Nihe ubwo a adéihi te nina lé téne a pwooti te Padué, ke lé piténedehi!»

Nemwo hane ace céiu inenaado

²⁹ Caa â junihe hiwon ni apulie na lé tabemi lésu, ke lé te ju â pititéélé ne kon. Ke e pii telé pie: «Te junihe ta ni apulie jenaa, [be time lé uce piténede Padué]. Ke lé te cuwo ko ilehi kojaeng ce inenaado, ke ce pipwojunuun. Kehe o te tice inenaado celi lé bo uce alahi mwo koja ali e too péroféta Jonas ânebun.

³⁰ Be weengaa a inenaado ne te ni apulie Ninive [beme habwii pie, te wo Padué na e ne Jonas nge céilé, beme e mi pii telé pie e o bo pwocuhinaado telé]. Ke wonaa [ana e o tooéo] woéo pa Nahi Apulie, ke o a inenaado te ni apulie jenaa.

³¹ «[Ke geé te temehi mwo a jepule ko] ê toomwo daame ha amu Saba bwolihi. Be li e âbé mu ha amu ten na te junihe e ité, beme e téne pa daame *Solomona na oba nang ko a pitemang. Kehe te e éni pelewé pa céiu apulie na e te junihe piwéden koja Solomona! Ke é ha a Tan na e bo tauti ni apulie hen wo Padué, ke e bo cuwoda ânebuhewé ê toomwo daame naa, ke e bo pipé ne kowé, wogewé ni apulie jenaa. [Be muhi tewé me geé téne.]

³² «Ke é ne ko ni apulie Ninive na lé téne a pune te péroféta Jonas, ke lé pininim, ke lé pitaatééhi ni mulihelé. Kehe te e éni pelewé wo pa céiu apulie na e te nihe piwéden koja Jonas! Ke é ha a Tan na e bo tauti ni apulie hen wo Padué, ke wo lépwo Ninive, ke lé o cuwoda ânebuhewé, wogewé ni apulie jenaa, ke lé o pipé ne kowé. [Be muhi tewé me geé pininim, ke me geé bitekewé!]»

Geé mulie ne ha a pwéélang

Mataio 5.15, 6.22–23

33 «Time nye uce ne miû ko a mwomiû, me nye talui ko ace cio! Kehe genye ne da ko miiden, beme lé o alihî ehi ne nina lé â taabé huâ.

34 Geé téne! Ni naamiinye, ke a pwéélang ko ni éénye. Ke me te wâé ni naamiinye, ke e mu ha a pwéélang ati a éénye. Kehe me ta ni naamiinye, ke a éénye, ke e mu ha a melepiing.

35 Geé pipwocile a pwéélang na e kowé, be koli e â melepiing.

36 Mepie e mu kom a pwéélang, ke o te tice ace céiu duaan mu kom celi e o mu ha a melepiing. Be e pwohewii a miû na e pwéélang kom.»

E paténe l épwo Farasaio wo l ésu

Mataio 23.1–36; Maréko 12.38–40

37 É he e mwo ko panebwénihi a pune naa wo l ésu, ke e âbé céieng wo pa céiu *Farasaio, ke e toteeng bé ne pelen, beme lé piwiinaado [me ni bée Farasaio béen]. Ke lé tehene nge pwomwo, ke lé tebwo pwo taap.

38 Ke wo l ésu, ke time e uce puu lupwo in ânebuhe a wiinaado [pwohewii ana te a bwomu te l épwo *Juif]. Ke e téetihi wo pa Farasaio, [ke time uce wâé ten].

39 Ke e pii ten wo Padaame l ésu pie: «Wogewé l épwo Farasaio, ke geé te ju puu ehi pwo mwojéi ni mwoûdu me ni tam. Kehe icehi ana te ju oba kuti ni pwonimewé ko nina ta. Be geé te junihe tapi, ke geé tee cuwo ko hane nina wâé me dewé, ke geé bune ni apulie!

40 Geé pipatieden! Be kona time geé uce temehi pie, wo Padué na e pwo a mwojéi a tam, ke te weeng mwo pana e pwo a ne a tam?

41 Wâé heme geé ne te l épwona tice delé nina e mu he ni tamewé. Be me wonaa, ke geé puu ni iwé ke ni pwonimewé mwo!

42 «Te ni bwomu tewé na geé ne te Padué ana te ju céiu mu ko a 10, é mu ko ni pétaapwo âdaanu. [Ke te wâé.] Kehe geé pipwocile! Be time geé uce âcehi [ni junaado ne he ni patén]: a bwo pipwoiipi ni apulie, me a bwo eânimewé te Padué. Wâé heme geé pacuwohi ati nina ubwo, me ati ni nahi patén.

43 «O te junihe ubwo a cuhinaado tewé, wogewé l épwo Farasaio! Be geé te hane ni atebwo na e mu ânebun ne he ni *mwotapitihi. Be te junihe wâé tewé heme lé te pwobwocu tewé, me pipaunkewé ne he pwahamii ni apulie ati.

44 «Geé pwohewii ni bwomu na time uce pwopweehi. Be, me genye engen pwon, ke time genye uce temehi pie genye ko engen pwo ce bwomu!»

E paténe l épwo dotéén ko patén

45 Wo pa céiu *dotéén ko patén, [ke e téne a pwootti te l ésu naa, ne ko l épwo Farasaio] ke e pii ten pie: «Padaame, me go pii anaa, ke go pii me ta geme mwo, wogeme l épwo dotéén ko patén!»

46Ke e hegi ne ten pie: «Te piwien ne mwo kowé! Geé pipwocilekewé, wogewé lépwo dotéén ko patén! Be ni pihuô tewé, ke pwohewii ni âneule na te junihe téé, na geé pwo me lé taawon ne ni apulie. Be muhi tewé me geé pétaa kon ko a mwodéiwé na te ju céiu!

47-48«Éa! O te junihe ubwo a cuhinaado tewé. Be lé taunu lépwo péroféta [te Padué] wo lépwo watihewé. Ke é jenaa ni, ke é he geé bahi ni bwomuhelé, ke geé habwii pie, wogewé mwo ko a bwo taunulé!

49Be weengi ana e pii ne kowé wo Padué, pana e temehi ati: “É bo ne lé céikewé lépwo péroféta tong, me ni *apostolo tong. Ke geé o pwotahi ne kolé, dieli geé o taunu ce béén.”

50«Ke e bo tautikewé wo Padué ko a bwo taunu ati lépwo péroféta ten, mu ha atabuhi ko a bwohemwo,

51tabuhi mu ko Abel, die ko Zakari, li lé taunueng ne ha awieme *apwoâpwailo me a duaan na junihe iitihi! Ke é pii tewé pie: Wogewé lépwo apulie jenaa na e bo tautikewé kon!

52«Wogewé lépwo dotéén ko patén, ke a panewé me geé tehi ne te ni apulie ni bwo temehinaado mu he ni tii iitihi. Kehe icehi ana geé neduwohi kolé! Muhi tewé me geé taa ha a Mwametau te Padué, ke geé pacuwo ni béén na nimelé me lé taa hen. Ke é pii tewé pie: O te junihe ubwo ace cuhinaado tewé!»

53[E panebwénihi ana e pii wo lésu, ke] e wie mu ha a mwa [te pali Farasaio]. Ke lé te junihe okéé kuti wo lépwo Farasaio me lépwo dotéén ko patén. Ke tabuhi mu ha a benaamwon naa, ke lé te cuwo ko tacebwénieng, beme lé téne celi e pii.

54Be lé hane pwaaden beme lé pipé ne kon mu ko ace bwo hegi nen den.

Luka 12

E pamwoiu ni acémun den

Mataio 10.19-33

1É ha a benaamwon na e ko pacihe lépwo *Farasaio wo lésu, ke caa pihwon ni apulie na lé âbé tabemieng. Ke lé tabuhi pititéélé. É ânebuhe a bwo pacihelé ten, ke e mi pacémuni ni acémun den.

Nina neduwohi ke o bo habwii

Ke e pii telé pie: «Geé pipwocile a ‘nyaa te pwoloa’ te lépwo Farasaio, be lé habwii a duaan na wâé, kehe lé neduwohi ni ta pwo telé.

2Ati ni naado na neduwohi, ke o bo habwii ne ha a pwéélang, beme nye alihi ehi.

3Ke ni naado na geé pii neduwohi ne ha a melepiing, ke o pii pwaatihi ne ha a pwéélang. Ke ni naado na geé pihu ko pii ne ha a nemwa, ke o bo toii da ne ha a pubu apulie.»

Nihe pipwonaado ne kowé

⁴«Geé nemwo pwo me mwotikewé ko ni apulie, wogewé ni béléng. Be hemepie lé taunuhi ni éewé, ke o te tice ace céiu naado celi lé o pwo te a jenewé.

⁵Kehe geé pipwocilekewé, ke wâé heme geé pwo me mwotikewé ko Padué! Be weeng na jan ne kon me e taunuhi a éewé, ke me e tahikewé ne ha a miû.

⁶«Geé cuwoteeke alihî ni meni na wahin jélé: Nye icuhi ni meni na nim ne ko nina alo mwani, kehe icehi ana te tice mu kolé celi e pineulé wo Padué.

⁷Ke wogewé, ke e te tai temehi ati ni jéhi ni apuniwé. Ke é pii tewé pie: Geé nemwo pwo me mwotikewé! Be te junihe pwonaado ne kowé ne he pwahamii Padué koja ni meni na nihe hiwon jélé!»

Geé mwoiu ke geé pipatemehiéo

⁸«É pii tewé pie: Wo pa apulie na e pii ne he pwahamii ni apulie pie, weeng pa apulie tong, ke woéo mwo, ke é o pii mwo pie weeng ke pa apulie tong, ne he pwahamii ni *âcélo te Padué.

⁹Kehe wo pana e pii, ne he pwahamii ni apulie, pie time e uce temehiéo, ke woéo mwo, ke é o te pii, ne he pwahamii ni âcélo te Padué, pie time é uce temehieng.

¹⁰Ke o pineu ati lèpwona lé cihe me ta ne kong, pa Nahi Apulie. Kehe icehi ana wo pa apulie na e cihe me ta ne ko a *Jenen litihî, ke o time uce jan me pineuhî ni ta pwo ten.»

E picani tewé a Jenen litihî

¹¹«Geé téne, lé o bo imwikewé beme lé pitautikewé ne he ni *mwotapitihi, ke é ne he pwahamii ni daame me lèpwo gupéno. Ke é ati he ni benaamwon naa, ke geé nemwo pwo me gia gewé ko ce bwopiinen telé.

¹²Be a Jenen litihî, ke e o bo te patemehi tewé celi me geé bo pii, hemepie geé bo cuwo he pwahamiilé.»

A mwani me ni naamuunye

Mataio 6.19–34

¹³Pwo pa céiu mu ha a pubu apulie na e pii te lésu pie: «Pa apipune, e caa mele wo caa tong koja ni naamuun. Go pii te pa âjiénung pie, me gemu pipwopatihi ne komu!»

¹⁴Ke e hegi ne ten wo lésu pie: «Aje, time é uce âbé me é tauti ni naado na wonaal!»

¹⁵Ke e pii te ni apulie pie: «Geé pipwocilekewé me geé nemwo tee hane me pihiwon dewé ni naado! Be a ju mulihe pa apulie, ke time uce é mu ko ni naado na eten.»

A ocine ko ni naamuunye

¹⁶Ke e uti telé a ocine ce: «E bwo mu wo pa apulie na junihe pwo den, ke pwo ni pule ten na e ne ni âdaanu na junihe wâé.

¹⁷Ke e bwo pitahimwoeng pie: “É bo pwo de? Be caa pitice ahi ni âpenem dong ne ha ali pié tong.”

¹⁸«Ke e bwo pipii ten pie: “Weengi ana me é bo pwo: É o tatii ni pié tong, ke é bo pwo celi piubwo, ke é bo ne ehi hen ni âpenem dong, ke ni naamuung.

¹⁹Ke é alecehen ke é o pipii tong pie: ‘Nihe hiwon ni naamuung he ni jo na hiwon. Ke é o mwaale, ke é o wiinaado, ke é o ûdu, ke é o pipwodéén!’”

²⁰«Kehe icehi ana e pii ten wo Padué pie: “Wogo, ke pa apiole! É jenaa he bwén, ke é o pé mwo kojako a mulihem. Ke bo ni dee ati ni naamuum na go tapihi?”»

²¹E pii mwo wo lésu pie: «Weengaa ana e o bo tuie ne ko pana e hane ni naamuun ne éni pwo bwohemwo. Be o time uce pwo den ne pele Padué!»

Ana junaado koja ni naamuunye

²²E biteeng wo lésu ne ko lépwo acémun den, ke e pii telé pie: «Weengaa a watihen me é pii tewé pie: Geé nemwo gia ko ni mulihewé, me ni éewé. Geé nemwo tee pitahimwokewé pie: “Genye o bo wii de?” ke “Genye o bo cuwohe ce de?”

²³Be a mulihewé, ke junihe pwonaado ne kon koja a wiinaado. Ke a éewé, ke junihe pwonaado ne kon koja ni epwénewé.

²⁴Geé omehi ni meni, be time lé uce picemi âdaanu, ke time lé uce pitii âdaanu, ke te tice bée awéa telé he ni tan. Be wo Padué, ke e te ne ni wiinaado telé. Kona wogewé, ke time geé uce piwéden koja ni meni? Uhuu!

²⁵Time uce é mu ko a bwo gia celi geé o mwo ne mwo aceli céiu tan ne he ni mulihewé!

²⁶Ke hemepie time uce jan me geé pwo me bwali a mulihewé, é mu ko ade na geé pwo me pinekepé tewé ne ko ni nehin?

²⁷«Geé cuwoteeke alahi ni muun he meté, be lé cim, ke time lé uce péi ke wolinaado. Ke é pii tewé pie: Wo pa daame *Solomona ati ha *a wâé ten ke ni epwénen, ke time uce junihe wâé koja a muun na te ju céiu.

²⁸Geé cuwoteeke alahi ni meté: E cim jenaa, ke o cini meé ne pwo miû. Kehe wo Padué, ke e te ne ni epwénelé. Ke kona time e o uce ne ce epwénewé celi piwéden? Te junihe wahin kuti ni céihi tewé!

²⁹«[Éa kuti, é pii tewé pie]: Geé nemwo pwo me pinekepé tewé, ke geé nemwo gia ko celi me geé wii me ûdu.

³⁰Be wo lépwona time lé uce temehi Padué, ke time lé uce mwaale ko a bwo hane ninaa. Kehe wogewé, ke wo Padué Caa tewé, ke e te temehi nina nimewé kon.

31Geé hane ânebun a Mwametau ten. Ke e o bo ne tewé ati nina tice tewé.»

A ju wâé ne he miiden

32«Geé nemwo pwo me mwotikewé, wogewé lèpwo ju béeing, wogewé a pubu apulie tong. Be wâé te Caa tewé me e bo ne tewé a Mwametau ten.

33Geé icuhi nina etewé, ke geé ne ni cuhin ne te lèpwona tice delé. Be me wonaa, ke o pwo ce naamuuwé ne pele Padué celi time uce bumédén, ke o time uce ta nelang. Be o pwocoon me lé pé wo lèpwo abune. Ke te tice dale celi me lé wii, ke te tice ôbe celi me lé ili.

34Be é he na e lang ni naamuum, ke e lang a pwonimem.»

A pwooti ko a bwo ûmiê me piténedehi

Mataio 24.45–51; Maréko 13.33–37

35[E pii mwo wo lésu pie]: «Geé ûmiê, ke geé ne ni epwénewé he penem, ke geé cile ehi ni mwomiû hewé me te pwéélang.

36Geé pwohewii ni apenem na lé ucéi pa caa telé heme e mwojuia mwo mu ha a piaten. Ke me e tehenebé, ke me e cii pomwa, ke lé o bo tehi ne ten.

37Be o nihe wâé ne ko lèpwona e toolé heme lé tee ko ûmiê, ke lé ucéieng. «Ke é pii tewé a juuju pie: E bo cuwohe a epwén ko penem wo pa daame. Ke e pwo me lé tebwo pwo taap, ke e bo ne ce wiinaado telé!

38[É he li lé tee ko ucéieng, ke time lé uce temehi pie, e bo tuie ha ace benaamwon celi woté] é ha awieme bwén ai é pwopwometan. Ke o adéilé, hemepie e tuiebé, ke me e toolé heme lé teko ûmiê!

39«Geé cuwoteeke niimihi ani: Wo pa eapwihi pwomwo, ke time e uce temehi ace inetéale celi e o âbé hen wo pa abune me e taa ha a mwa ten. Be hemepie e te temehi, ke wiel i e o te pacuwoeng.

40Wogewé mwo, ke geé te piwâam. Be é o bo âbé, woéo pa Nahi Apulie, kehe time geé uce temehi ace benaamwon.»

Pa apenem na e piténedehi

41E tahimwo lésu wo Pétérue pie: «Padaame, kona a ocine na go pii, ke te a deme cehi, [wogeme lèpwo acémun dem] ai a de ati ni apulie?»

42Ke e hegi ne ten wo Padaame pie: «He wooélé pa apenem na e piténedehi ke e pipwoipieng? Wo pana e pii ten wo pa daame hen pie: “É ne tem a penem na pwonaado ne kon: Go ne ce wiinaado te lèpwo apenem dong he ce benaamwon celi wâé.”

43«Ke o te nihe wâé ne ko pa apenem naa, hemepie e tuiebé wo pa daame, hemepie e teko penem ehi!

44É pii tewé a juuju pie: E o ne ten a pihuô ati ne ko ni den.

45Kehe icehi ana wiel i piniimihi wo pa apenem naa pie, ‘O bwoli pa caa tong me e âmwobé.’ Ke e ahi ni bén ko penem, ke e te nihe wiinaado me ûdu, ke e piolo.

46Ke e o bo âmwobé wo pa caa ten, ha a tan na time e uce ucéieng, ke é ha a inetéale na time e uce temehi. Ke e bo ne a cuhinaado na junihe ubwo te pa apenem naa, woélé me lépwo bén ko penem na time lé uce piténeudehi.

47 «O junihe ubwo a cuhinaado ten, é mu ko ana e te temehi ana nime pa daame hen kon, ke time e uce pwo, ke tice aceli e pipwopweehi me den.

48Kehe time uce nihe ubwo ace cuhinaado te lépwona time lé uce temehi pie, ta nina lé pwo. Be wo pana e hegi nina hiwon, ke o ilehi kojaeng nina hiwon.»

Lé pipiiden ni apulie mu ko lésu

49 «É âbé, beme é pébé a miû ne pwo a bwohemwo; ke nihe nimung me caa ko élé.

50Be o puuéo ko a puu apulie [ko ni picani na nihe ubwo]. Be é teko ucéihi ne he ni téé beme panebwénihi.

51Geé nemwo niimihi pie é âbé beme é pébé a péém ne pwo a bwohemwo. Ûhu! É pii tewé pie, woéo pa watihen me time lé uce piténelé ne ni apulie.

52Tabuhi jenaa, heme nim ni apulie na lé mulie ha a pwomwo na céiu, ke o time lé uce piténelé. Be o bo cié celi lé âbé céing, ke o bo alo lupwona lu piâdeéo, ai o cié celi lé piâdeéo, ke o alo lupwoceli lu âbé céing.

53Be o time lu uce piténelu wo pa caa me pa naîn, ke ê nyaa ma ê naîn; ke o time lu uce piténelu lu amwaan.»

Geé alahi ana mwomwon, ke geé pwo!

54 E pii mwo wo lésu te ni apulie na hiwon pie: «É hemepie geé alahi ni nii na e âbé mu ha ale amu, ke geé pii pie e o ute. Ke e o tuie.

55Ke hemepie e tahieng a dan mu paaéémwa, ke geé pii pie: “O te nihe élé”. Ke o te wonaa.

56-57Wogewé lépwo bwi! Geé te ju gahe pwo! Geé te nihe temehi me geé pii pie, wâé a amu, ai ta a amu. Ke é mu ko ade na time geé uce alahi temehi a juuju ne he ni naado na e ko tuie jenaa? [Be hemepie geé ko alahi ehi] ke geé temehi ehi ana mwomwon me geé pwo.

58 «[Weengi ana mwomwon]: É hemepie e pitéteiminaado ne kom wo pace céiu, ke geu mi pipwopweehi heme mwo ko wogeu nge he pwaaden nge ha a mwotautinaado. Be koli e bo neko te pa atautinaado; ke wo panaa, ke e o bo neko te ni pwoli, ke lé bo neko nge he karépu.

59Ke é pii tem a juuju pie: O time go uce wie mu he karépu, hemepie mwo time go uce téele pwocuhi ati ni cuhinaado tem.»

Luka 13

Geé taatééhi ni mulihewé!

¹Ha a benaamwon naa, ke lé âbé céii lésu ne ni bée apulie, ke lé pii ten pie: «Wo pa daame *Pilate, ke e pwo me taunu ni bée apulie mu Galilé, he lé *pwoâpwailo te Padué [ne *huâ iitihi ne lérusaléma].»

²Ke e hegi ne telé wo lésu pie: «Kona geé niimihi pie lé mele be te junihe ta jélé koja ni bée?

³Ûhu! Ke é pii tewé pie: Geé pipwocilekewé, ke geé pitaatééhi ni mulihewé wogewé ati, be koli geé o tai mele pwohewii ni apulie naa!

⁴Ke geé cuwoteeke niimi lépwoli 18 apulie li e tupwo ne huîlé ali aba ne Siloé, ke taitelé. Kona te junihe ta jélé koja ni bée apulie *lérusaléma?

⁵Ûhu! É pii tewé mwo pie: Wâé heme geé pininim, ke me geé bitekewé. Be koli geé o tai epin ko mele pwohewii ni apulie naa!»

A majing na te tice acehin

⁶E pii telé a ocine ce wo lésu: «E bwo mu wo pa céiu apulie, ke e bwo cemi a acuwo *majing ha apwoamu ten. Kehe icehi ana me e mu â omehi ce acehin, ke mu te tice.

⁷«Ke e te pwo me pii te pa apenem den pie: “Go alih! Be caa cié ni jo na é âbé hane ce acehin, ke te tice. Tahagéieng taabwon! Be time uce wâé heme cepwotee picim heme tee ko tice acehin!”

⁸«Ke e hegi ne ten wo pali apenem den pie: “Padaame, mwo te ju neme neeng, beme é mwo pwopweehi kon. É o mwo ini aujenieng, ke me é ne pule kon. Ke genyu bo alih ha a jo naa.

⁹Ke mepie pwo ce acehin, ke wâé; ke mepie te tice, ke go bo tahagéi taabwon.”»

E pwo me tieden a cunu @ ko ê toomwo ha a tan iitihi

¹⁰É ha a céiu *tan iitihi, ke e mu ha a *mwotapithi wo lésu, ke e pacémuni ni apulie.

¹¹Ke e mu mwo lang ê céiu toomwo na caa 18 ni jo na cunu nang hen. Be e mu kon a duéé, ke cii a duun, ke pwocoon me e pamwieng.

¹²Ke e alieng wo lésu, ke e toteeng, ke e pii ten pie: «Êje, caa tieden a cunu kom!»

¹³Ke e ne ni in huîin, ke e caa te pamwieng kuti, ke e te junihe pipaunu Padué!

¹⁴Kehe icehi ana e te junihe okéé wo pa apihuô ne ha a mwotapithi, be e pwo me wâé nang wo lésu ha a tan iitihi. Ke e pééle ni apulie wo panaa, ke e pii telé pie: «Lépwoje, 6 ni tan na nye penem hen. Ke heme nimewé me tieden ni cunu kowé, ke geé âbé ha a naadenitan! Ke geé necu a tan iitihi!»

¹⁵ Ke e hegi ne ten wo Padaame lésu pie: «Wogo pa apulie ta! Tai wogewé ati, ke kona time geé mu uce tuwo ni wota tewé me paûdulé he ni tan iitihi? Uhuu!

¹⁶ Mepwo é ne ko ê toomwo ce, ke ê piebehi *Abérama, pa watihenye. Ke e cieeng wo *Caatana he na 18 ni jo. Ke woté, o te tice mwomwon dong me é tuwo a cunu kon ha a tan iitihi?»

¹⁷ Ke tanim ati nina lé piâde lésu. Kehe icehi hiwon ni apulie na lé te junihe pipwodéén ko nina wâé na e pwo.

Alo lupwo ocine ko a Mwametau

Mataio 13.31–33; Maréko 4.30–32

¹⁸ E pii mwo wo lésu pie: «Mepwo a *Mwametau te Padué, ke he pwohewii ace de? Weengi a ocine me pwo me geé temehi:

A pide moutarde

¹⁹ «A Mwametau te Padué, ke pwohewii a pide *moutarde* na e cemi wo pa céiu apulie ha a cereda ten. [Te junihe wahin] kehe me e cim, ke te junihe ubwo nang, ke lé âbé ne ni meni, ke lé pwo ni mwonahilé ne he ni dihen.»

A nyaa te pwoloa

²⁰ E pii mwo wo lésu pie: «Ade aceli é o pipwohewii ne kon, a Mwametau te Padué?

²¹ A Mwametau te Padué, ke pwohewii a nyaa te pwoloa na e pé ê céiu toomwo, ke e iluuhi neibu me a 25 *kilo* ko *farine*, dieli e â cibu da ali pwoloa!»

A pomwa na picu

Mataio 7.13–14,21–23

²² E pacémuni ni apulie wo lésu ne he ni mwopopwaalé me ni amu, he e ko â lérusaléma.

²³ Ke e tahimwoeng wo pa céiu apulie pie: «Padaame, kona te ju mehin celi e o te celuimilé wo Padué?» Ke e pii te ni apulie wo lésu pie:

²⁴ «Te junihe picu kuti a pomwa [da ha *a ju mulip]. Kehe geé hane ace bwopwonen me geé taa hen. Be hiwon nina nimelé me lé taa, kehe icehi ana pwocoon ne kolé.

²⁵ Be, me e capuhi ke kiléhi a pomwa wo pa eapwihi pwomwo, ke time o uce jan me geé taa. Geé o te cuwo âoté pwomwo, ke geé o te cii taaci a pomwa, me pii ten pie: “Padaame, Padaame, go tehi ne teme!” «Kehe icehi ana e o hegi ne tewé pie: “Ûhu, time é uce temehikewé.”

²⁶ «Ke geé o bo pii ten pie: “Te wogeme kuti li genye mu piwiinaado me ûdu me wogo. Ke go pwocémun nge he ni pwaaden ne he ni pwomwo ubwo teme!”

²⁷ «Ke e bo te ju pii tewé gaale, pie: “Ûhu, time é uce temehikewé! Geé engen kojaéo, wogewé nina ta ni huô tewé!”

²⁸ «Ke o bo tahikewé ole pwomwo. Ke geé bo é me piyii pecuwo. Be geé bo ali [lépwo watihewé]: wo Abérama, me Isaaka, me Iakobo, me ati ni péroféta, na tai élé ha a Mwametau te Padué.

²⁹ Ke o bo hiwon ce béen celi lé o bo âbé ha a Mwametau, mu pwo a bwohemwo ati. Ke o pwo ce atebwo telé ne ha a piyiinaado ubwo.

³⁰ Be hiwon nina lé alece jenaa na lé bo ânebun ha a benaamwon naa. Ke hiwon nina lé ânebun jenaa na lé o bo alece [ne jedha a Mwametau te Padué].»

A pipwoééhe te lésu @ ne ko lépwo Iérusaléma

Mataio 23.37-39

³¹ É he e mwo ko pii anaa wo lésu, ke lé te tuiebé kuti ne ni bée *Farasaio, ke lé pii ten pie: «Aje, geme téne pie, e pwo me e taunuko wo pa daame *Érode Antipas! Kehe wâé heme go engen mu éni!»

³²⁻³³ Ke e hegi ne telé pie: «Geé pii te pa wota apiaba naa pie, é jenaa ke é meé, ke [é o mwo te mi pwo ni penem dong, be] é o mwo peni ni dueé, ke é o mwo cile ni cunu. Ke é ha a béciehe ni tan alechen, ke é bo panebwénihi ati. Kehe é o mwo te mi cuwo ha a pwobenele ko a pwaadeniing [nge Iérusaléma]. Be time o uce wâé hemepie taunu pace céiu péroféta [te Padué] ne pwomwo koja Iérusaléma [a pwomwo ubwo iitihi ten]!»

³⁴ «Au, mwolikewé wogewé lépwo Iérusaléma! Geé taunu lépwo péroféta na e nelé bé céiikewé wo Padué, be geé ahi ni béen ko péi, ke geé taunu ce béen ko ce bée bwopwon. Mu te cuwo ko nimung me é taineibukewé, pwohewii a nyaa te ja heme e taineibuhi ni naîn haahi ni puuin. Kehe icehi ana te muhi tewé.

³⁵ Ke geé téne, [é o mwo engen kojakewé, ke] e o pwo me ticie ha a *mwaiitihi tewé wo Padué! Ke é pii tewé pie: O caa time geé bo uce aliéo mwo, dieli ha ace tan celi geé o bo pii pie: *Adéi pa apulie na e âbé ne he nii Padaame!» Psaume 118.26

Luka 14

E paténe lépwo Farasaio wo lésu

Mataio 22.1-14

¹⁻² É ha a céiu *tan iitihi, ke e mu ha a pomwa te pa céiu *Farasaio wo lésu, ke lé piyiinaado. Ke e mu lang mwo wo pa céiu apulie na cunu nang, be cibu ni miin. Ke lé wéa ko lésu ati wo lépwo apulie [beme lé alih heme e pwo me tieden a cunu kon].

³ Ke e tahimwo lépwo *dotéén ko patén me lépwo Farasaio pie: «Kona te pwo mwomwon denye me nye pwo me tieden a cunu ko pace céiu apulie ha a tan iitihi, ai iitihi?»

⁴ Ke time lé uce hegi ne ten. Ke e biteeng nge céii pali cunu, ke e pwo me wâé nang, ke e pii ten pie, me e mwojuia ngemwo pelein.

⁵ Ke e tahimwo ati ni apulie pie: «É hemepie e tupwo ne ha ace pwomiidu wo pace naîm ai ace wota tem, ha a tan iitihi, ke kona go o pwo de? Geé â céieng da mu ha a pwon!»

⁶ Ke time uce jan me lé hegi ne ten.

Go nemwo pipaunuko

⁷ E ome nina todelé ne ha ali piwiinaado wo lésu, ke e alihí pie lé pipégali ni atebwo na e mu ânebun. Ke e pii telé pie:

⁸ «Go pipwocile! Be é hemepie todeko ne ko ace piwiinaado ko piaten, ke go nemwo â tebwo pwo a atebwo te lèpwo apulie na piubwo jélè. Be koli e bo tote pace céiu apulie celi nihe pieda kojako

⁹ wo pali eapwihi ali piwiinaado! Ke koli e bo pii tem pie: “[Go cuwoda, ke] go engen mu ha atebwo naa.” Ke o bo tanim go me go â hane ace atebwo tem.

¹⁰ «Wâé heme go â tebwo âuté ha a bénèbwéne atebwo. Ke e o bo pii tem wo pana e todeko pie: “Pa béléng, go âbé, me go tebwo pwo a atebwo te lèpwona piubwo jélè.” Ke lé bo alihí nelang a bwo pipaunuko te pa eapwihi a piwiinaado.

¹¹ Be wo pana e pwo me piubwo nang, ke o neeng ole, ke wo pana e pwo me piwahin nang, ke bo neeng da.»

Go tote lèpwona tice naamuulé

¹² É nelang, ke e pii wo lésu te pana e toteeng pie: «É hemepie go piwâam ko ace piwiinaado [celi woni] ke go nemwo tote cehi lèpwona lé o wodehi ne mwo tem nina go pwo: é hemepie wo lèpwo bém, me lèpwo âjiénem, me lèpwona pwo ni naamuulé.

¹³ «Be wâé heme go tote lèpwona tice naamuulé, ke wo lèpwona cunu jélè, ke wo lèpwona tebwa jélè, ke wo lèpwona bwi jélè.

¹⁴ Ke o adéiko, be time uce jan me lé wodehi ne tem, kehe wo Padué, ke e o bo ne tem a ceme ni penem dem, ha a tan na lé bo mulie cemwo mu ha amele wo lèpwona lé pwo nina wâé.»

Muhi telé ko a piwiinaado te Padaame

¹⁵ Pwo pa céiu apulie na lu mu pwo taap me lésu. Ke me e téne a bwo pipune ten, ke e pii ten pie: «Padaame, te junihe *adéi lèpwona lé mu ha a piwiinaado ubwo ne ha a *Mwametau te Padué!»

¹⁶ Ke e pwo-ocine wo lésu, beme e hegi ne ten. Ke e pii pie: «E bwo mu wo pa céiu apulie, ke e pipwopweehi a piwiinaado na nihe ubwo. Ke e tote lèpwona nihe hiwon jélè beme lé piwiinaado.

¹⁷ Ke nebwén, ke cuwo ali tan ko piwiinaado. Ke e pahede pa céiu apenem den, me â tote lèpwona me lé piwiinaado me weeng.

¹⁸ «[Ke e ân, ke e too pa céiu bélélé] kehe icehi ana e hegi ne ten wo paje pie: “Au, go â pii te pa daame pie, me e pineuéo, be time uce jan me é âdé wiinaado, be é âbé mu ha apwocuhi a apwoamu, ke wâé heme é â cedi.”

¹⁹ «Ke nebwén, ke e ali pa bálohen mu ko lépwona todelé. Ke e hegi ne ten wo paje pie: “Au, go â pii te pa daame pie, me e pineuéo, be time uce jan ne kong me é âbé. Be é âbé mu ha apwocuhi ni paaci na 10, beme lé um. Ke wâé heme é mwo â picaalé.”

²⁰ «Ke e ân, ke e too pa bécien, ke e hegi ne ten wo paje pie: “É mwo ko ju piaten, kehe time uce jan me é âbé.” «Be te tai pipéélé, ke te tai muhi telé me lé âbé, be lé tai pii pie, pwo ni penem delé.»

E tode lépwo béen

²¹ «Ke e mwojuia mwo wo pali apenem, ke e piuti te pali daame hen a bwo hegi nen de lépwo apulie naa. «Ke e te junihe okéé kuti wo pali daame, ke e pii ten pie: “Go epin nge ha ati ni amu, ke go todebé nina tice naamuulé, me ni tebwa, me ni tebwomwa, me ni bwi.”

²² «[Ke e an wo pa apenem.] Me e mwojuia cemwo, ke e pii te pali apihuô pie: “Pa apihuô, geme caa pwo ali go pii, kehe mwo te pwo ni nehi atebwo.”

²³ «Ke e hegi ne ten pie: “Go â ati pwo ni pwaaden, ke é mwonuhi ni ninaado. Ke go tode celi pitapitikewé, beme oba a mwa tong!”

²⁴ Ke mepwo é ne ko lépwoli é mi todelé, ke o te tice celi lé wii mu ko a piwiinaado tong!”»

A bwo âcéi lésu

Mataio 10.37–38

²⁵ É alechen, ke e engen wo lésu, ke hiwon ni apulie na lé âcén. Ke e biteeng nge céilé, ke e pii pie:

²⁶ «Wo paceli e âbé céing, ke wâé heme nihe eânimén dong koja pa caa ten me nyaa ten, me ê mwoden, me ni nañ, me ni âjiénen, me ni iitieng, die mwo ko a mulihen. Be wo pana te junihe eânimén de ati ninaa kojaéo, ke time uce jan me pa acémun dong.

²⁷ Wo paceli time e uce canihi a *kuricé ten, me e âbé céing, ke time uce jan me pa acémun dong.»

Geé mi pininim ehi

²⁸ «Hemepie nime pace céiu apulie me e pacuuli ace mwa, ke e o tabuhi tebwo, ke e o pihane pie, ‘He o niile ace cuhin? He o te jan ce mwani tong beme panebwénihi?’

²⁹ «Be hemepie e te ju pwo cehi a paamwa, ke me time e uce panebwénihi a mwa, ke lé o te nihe pihoonieng ati ne ni apulie.

³⁰ Be lé o pii pie: “Pa apulie ce, ke e tabuhi pacuuli, ke time e uce panebwénihi!”

31«Ke wo pace céiu daame, ke heme e â pwopa ne ko pace céiu daame, ke wâé heme e mi pitahimwoeng pie: ‘Pwo ni coda tong na 10000. He o te jan me é â pwopa ne ko pana e âbé pwopa ne kong ko ni coda ten na 20000 jélé?’

32«Ke me time uce jan ne kon, ke e o ne ngen ce apitéteimipwooti nge céii pa céiu daame heme e mwo ko e ité, ke e o ileeng me lu pwo a péém.»

33Ke e pii mwo wo lésu pie: «O wonaa mu hadeniiwé hemepie pwo paceli time e uce necu ati ni den. Be wo pa apulie naa, ke time uce jan ne kon me pa eabwé tong.»

A jié ke tieden a nemen

34 «Éa, a jié ke a naado na wâé, kehe mepie e patieden a nemen, ke he nye o woté ace bwopwonan me genye ne mwo ace nemen?

35Caa time uce jan me genye penem kon, ke genye tahi ole pwomwo. Wo paceli pwo ce pwojéen me e téne, ke wâé heme e ténel!»

Luka 15

E pipwoééhe ni apulie na ta jélé

Mataio 18.12-14

1Lé âbé céii lésu ni apulie na ta ni mulihelé: wo lédwo *atai mwani cuhi puni apulie me lédwo bén mwo. Be nimelé me lé téne a bwo pipune ten.

2Ke junihe time uce wâé te lédwo *Farasaio, me lédwo *dotéen ko patén. Ke lé pipii telé pie: «Kee! Wo paje, ke lé pimu ibu me lédwona ta ni mulihelé, ke lé piwiinaado me weeng!»

A ocine ko a muto na e pipatieden

3Ke e pii telé wo lésu a ocine ce:

4 «[Geé cuwoteeke téne ani]: Pace céiu béeuwé, ke 100 ni muto ten. Ke mepie tieden aceli te ju céiu nang, ke e o pwo de? E o necu nelang li 99 muto, ke e o â hane ali muto li e pipatieden, dieli e bo tooeng.

5Ke me e tooeng, ke e te nihe pipwodéen, ke e caniheng ne pwo lupwo pieaan.

6«Ke é he e tuiybé pwomwo, ke e tote lédwo bén, ke nina lé mu ko jijen, ke e pii telé pie: “Geé âbé beme nye pipwodéen ibu! Be é caa tooli mwo ali muto tong li tieden!”

7«É pii tewé pie, te piwien ne jedi he miiden, be wo Padué, ke e te junihe pipwodéen kuti ko pace apulie ta celi te ju céiu nang celi e pitaatééhi a mulihen, koja lédwona 99 na wâé ni mulihelé, ke time lé uce niimihi pie me lé mwo pininim mwo.»

Ocine ko a mwani na tooli mwo

8[E pwo a céiu ocine wo lésu, ke e pii pie]: «E bwo mu ê toomwo na 10 ni mwani péi ten na nihe ubwo a cuhin. Ke é ha a céiu tan, ke e patieden ana céiu. E bwo

ne miû ko a mwomiû, ke e bwo balé ehi ha ali mwa ten. Ke e hane ali mwani ten, dieli e bwo te â tooli!

⁹«Ke me e tooli ali mwani ten, ke e tote lépwo béén, me nina lé mu ko jijen, ke e pii telé pie: “Geé âbé me nye pipwodéén, be é caa tooli mwo ali mwani péi tong!”

¹⁰«Kehe é pii tewé pie: O nihe ubwo a pipwodéén de lépwo *âcélo te Padué ko pace apulie celi te ju céiu nang na ta nang celi e pitaatééhi a mulihen.»

A ocine ko pa ewa aiu na e mwojuia mwo ne pele caa ten

¹¹E uti telé mwo [a céiu ocine] wo lésu: «Lé bwo mu lupwo ewa aiu me caa telu.

¹²Ke e pii te caa telu wo pa béalohen pie: “Go ne tong ni dong mu ko ni naamuum.” «Ke e te ne ten wo pali caa telu.

¹³«Ke nebwén, ke wo paje, ke e pé ati li den, ke e icuhi. Ke e pé li mwani, ke e â ha amu na nihe éité. Ke e hane a mulie na wâé ten, ke e pipwohaulí ko li mwani ten.

¹⁴[Âdé li wole, ke âdé, ke âdé, ke âdé...] Ke e â patieden ati li mwani ten. Ke e tuie a menele na nihe ubwo ne ha amu naa. Ke te junihe menen kuti.

¹⁵Ke e hane ace penem den, beme e wiinaado. Ke e picile puwokwo te pa céiu apulie ne ha amu naa.

¹⁶Kehe icehi ana caa junihe menen, ke caa nimen me e eni mu ko li e puwokwo. Be te tice apulie celi me lé ne celi me e wii.»

E piniihihi pie me e mwojuia mwo

¹⁷«Ke e tuie nge ha a céiu benaamwon, ke e pininim, ke e niimihi pie, ‘É ne pele caa tong, ke nihe hiwon ni wiinaado me de ati ni apulie, die ko lépwo apenem den. Ke te nihe hiwon mwo kojalé! Ke woéo ne éni, ke é ko metihi menele!’

¹⁸Caa jan! É o mwojuia ngemwo céii caa, ke é o pii ten pie: Caa, go pineuéo, be é pitalupe ne he pwahamii Padué, ke é ne he pwahamiim.

¹⁹Caa time uce jan me woéo pa naîm. Kehe go pwo me pa céiu apenem dem.’

²⁰Ke e cuwoda, ke e engen me e mwojuia ne mwo pele caa ten.»

E te nihe niimieng wo caa ten

«É he e mwo ko âbé he pwaaden, ke e temehieng wo caa ten, ke e te nihe pipwoééhen. Ke e téte benieng, ke e haaïeng, ke e mwomwaaaueng.

²¹Ke wo pa naîn, ke e pii ten pie: “Caa, go pineuéo, be é pitalupe ne he pwahamii Padué, ke é ne he pwahamiim, ke caa time uce jan me go pii kong pie pa naîm...”

²²«[He e mwo tee ko cihe] ke e caa pii te ni apenem den wo caa ten pie: “Geé epin! Geé pébé ace epwén celi nihe wâé, beme e cuwo hen wo pali naîng. Ke geé ne ce tai ko in, ke ce dihibwaan.

²³Geé pébé ali nahi paaci li nihe wâé a bwo ubwo nang, ke geé taunueng. Be é jenaa, ke genye o piwiinaado ibu, ke genye pipwodéén!

²⁴Geé alih, wo pa naîng ce, ke e caa mele, kehe e caa mulie mwo! Ke tieeng, ke é caa tooeng mwo!” «Ke lé tabuhi pipwodéén.»

E okéé wo pa cuwon

²⁵«He lé ko wonaa, ke he e tee ko penem he ni apwoamu wo pa cuwon. Ke me e mwojuia ne mwo pwomwo, ke e téne ni pwopwonyebi, ke ni tihi bweje.

²⁶Ke e tote pa céiu apipenem, ke e tahimwoeng pie: “Woté? É mu ko ade [na geé ko junihe pipwodéén]?”

²⁷«Ke e hegi ne ten pie: “E caa mwojuia mwobé wo pali ciéém. Ke te junihe piwâénime caa teu. Ke e pii pie me taunuhi ali nahi paaci, [beme nye piwiinaado, me pipwodéén] be e caa too mwo pa naîn he tekô wâé nang!”

²⁸«Kehe icehi ana e okéé wo pali cuwon, ke muhi ten me e taa pwomwo. Ke e â wie wo caa ten, ke e wâgo kon me e taa céilé.

²⁹«Kehe icehi ana e hegi ne ten pie: “Go téne go caa, caa nihe hiwon ni jo na é ko penem dem, ke time é uce téele pwoemaan, ke me muhi tong me é piténedeko. Ke time go uce téele ne tong ace cuwo nahi nani me gême piwiinaado me lèpwo bééng!

³⁰Ke wo pane, ke e caa patieden ati ni mwani tem ne ko ni toomwo pwopwaaden, ke me e mwojuia, ke go pwo me lé taunuhi ali paaci li nihe wâé a bwo ubwo nang, beme a den!”»

Nye pipwodéén be nye caa tooeng mwo

³¹«Ke e hegi ne ten wo caa ten pie: “Go téne go pali naîng, go tekô mu pelong, ke tai ati ni dong, ke ni dem.

³²Kehe icehi ana wâé heme nye pwo a piwiinaado jenaa me pipwodéén. Be pa ciéém ce, ke e caa mele, ke e caa mulie mwo! Pana caa tieeng, ke nye caa tooeng mwo!”»

Luka 16

A ocine ko pa apenem na e te pipwocileeng

¹E pacémuni lèpwo acémun den wo lésu, [ke e pii telé a ocine ce]: «E bwo mu wo pa céiu apenem de pa céiu apulie na pwo den. Be pa apiwéhi ne ni mwani ten. «Ke é ha a céiu tan, ke lé âbé pitéteiminaado te pali daame hen ne ni bée apulie, ke lé pii ten pie: “E te nihe pihoonihi li mwani tem wo pali apenem dem.”

²«Ke e toteeng wo pali daame, ke e pii ten pie: “Aje! Lé pitéteiminaado ne tong kom! Go pii pwaatihi tong aceli go pwo ko li mwani tong. Be o time go uce tee wéhi!”

³«Ke e te pitautinaado wo pali apenem, ke e pipii ten pie: ‘[É te ju nebwén kuti!] Ke é bo pwo de? Caa tice niihung me é penem he pule. Ke te nihe tanim jo me é ile.’

⁴«Ke e te niimihi kuti ana me e pwo, beme pwo ce béén celi me lé picani ten, hemepie caa tice penem den.

⁵«Ke e tote he picéiu lépwona pwo ni kérédi telé ne pele pali daame hen. Ke e tahimwo pa bécéiuhen pie: “Niile ce kérédi tem?”

⁶«Ke e hegi ne ten pie: “100 piibwi ko géréén.” «Ke e pii ten wo pali apenem pie: “Ûhu! Go te ju wodehi cehi celi 50, go pali béléng. Neko a metii bélajuujuhi nen pie caa nebwén ati li kérédi tem.”

⁷«Ke e tote mwo pa céiu, ke e tahimwoeng pie: “Wogo paje, ke niile ce kérédi tem?” «Ke e hegi ne ten pie: “100 ni cang ko blé.” «Ke e pii ten wo pali apenem pie: “Ûhu! Neko a metii tem, ke go te ju tii cehi pie 80, [ke nebwén ati a kérédi tem].”

⁸«Ke [é he e téne anaa] wo pali daame, ke e te nihe téele, ke e picedi pali apulie ko a bwo pipwocileeng, ke te piwien hemepie pa apipwohuô.»

[Ke e panebwénihi nelang a ocine naa wo lésu, ke e pii pie]: «Geé alahi, wo lépwo apulie éni pwo bwohemwo, ke lé te nihe temehi me lé pipwocilelé, koja ni apulie te Padué na mwomwon ke juuju ni huô telé.

⁹Ke é o pii tewé pie: A mwani, ke pa apipaupakenye! Wâé heme go pé ni mwani tem, beme go picani te lépwo apulie kon ne éni pwo bwohemwo, beme o pwo ce bém. Be é alechen, hemepie go caa mele koja ni mwani tem, ke wo Padué, ke e o te hegiko ehi ne ha a pomwa ten ne jeda [he miiden] dieli mwo.»

Ni bée pwooti ne ko a mwani

¹⁰[E pacihelé mwo wo lésu ko a mwani, ke e pii pie]: «Hemepie go temehi pwoipihi ace cuwo nahi naado, ke go te temehi mwo me go pwoipihi ni naado na ubwo. Ke é hemepie time go uce temehi me go pwoipihi ni naado na wahin, ke o time go bo uce temehi me go pwoipihi ni naado na ubwo.

¹¹⁻¹²Ke é hemepie time go uce temehi me go pwoipihi ni naado na te ju wahin ne éni pwo bwohemwo, pwohewii a mwani, ke é mu ko ade na go niimihi pie [wo Padué, ke e] o bo ne tem, me go papenemihi nina wâé na ni junaado [ne he miiden]?

¹³«Te tice pace apulie celi jan ne kon me pa apipenem de lupwoce daame celi alo julu, ati ha a pwonimen. Be e o pipenem ehi te pace céiu, ke e o téeti pa céiu. Kehe time uce jan me geé tai apipenem de Padué me a mwani!»

¹⁴Ke he lé téne a pwooti naa wo lépwo bée *Farasaio, ke lé pihoonieng, be wâé telé a mwani.

15 Ke e pii telé pie: «Geé pipwocile, be geé te nihe pihabwiikewé ne he pwahamii ni apulie, kehe icehi ana e te temehi ni pwonimewé wo Padué. Ke nina pwonaado ne kon ne te pa apulie, ke te junihe ta ne he pwahamii Padué.»

Ni pwootti ko ni patén me a Mwametau

16 [E pacémuni ni apulie wo lésu ko ni béé pwootti, ke e pii telé pie]: «[Lé pihuôkenye] ne ni *patén de Moosé, me ni pwootti te lépwo péroféta, die ha a benaamwon na e pipune wo *loane pa apipuu apulie. Kehe icehi ana é jenaa, ke é ko patemehi a Pwootti Wâé ko a *Mwametau te Padué. Ke te nihe hiwon ni apulie na lé ko pipwopa hane beme lé taa hen.

17 Kehe icehi ana hemepie e mwo tekó mu a miiden me a bwohemwo, ke o te tice ace céiu atii celi e o pétaabwon mu ko ni patén.

18 «É mu ko anaa, na é pii pie: Hemepie go cibéé ê mwodem, beme go piaten mwo, ke pa apibune be go engen koja égi mwodem ânebun. Ke piwien mwo heme go piaten me êce céiu toomwo celi e caa tahagéi piaten.»

Pana nihe pwo ni den me Lazare

19 E pii wo lésu a ocine ce: «[Lu bwo mu wo lupwo apulie na alo julu.] Wo pa céiu, ke pa apulie na nihe pwo den. Ke e mu cuwohe ni epwén na te nihe wâé ne kon, ke te nihe ubwo ni cuhin. Ati he ni tan, ke e te pwo nina te wâé ten, ke e mu pwo ni piwiinaado na ubwo.

20-21 «Ke wo Lazare, ke tice den, ke tome ahinaado kon, be e pwo katia, ke lé mu tami ni ahinaado kon ne ni wotaahen. Ke e tee pule ha a pomwa ko a babé ko ali mwa te pali pwo den. Ke te nihe nimen me e eni ni mewiinaado na e mu tupwo mu pwo a taap te pali pwo den.

22 «Ke nebwén, ke lu mele wo lupwoli apulie, ke lé âbé wo lépwo *âcélo, ke lé pé Lazare nge pele *Abérama [ne he miiden].

23 Kehe é ne ko pali pwo den, ke lé pééeng ole céii lépwo amele. Ke te nihe cunu nang, ke e te nihe mu he ni picani nelang. «Ke me e alehede, ke e ali Lazare me Abérama, ke he nihe woilu ité kojaeng.

24 Ke e toii da céii Abérama pie: “Au, caa, go pipwoééhung! Ke go neopé Lazare, beme e te ju neole ha a tabe a mwodéin, ke me e ne pwo a upehung. Be é te nihe mu he ni picani ne ha a miû ce.”

25 «Ke e hegi ne ten wo Abérama pie: “Pa naîng, go tekó niimihi he li go mwo mulie [pwo bwohemwo]. Ke te tice celi tieden pelem, ke go mulie ha a pipwodéén. Kehe wo Lazare, ke e mu he ni cunu me ni picani. Ke go alihí, jenaa, ke e pipwodéén, ke wogo, ke go mu he ni cunu me ni picani.

26 Ke a céiu mwo, ke pwo a pwon na nihe ubwo ne ha awiemenye. Ke pwocoon me geme oté céikewé, ke pwocoon me geé taabé céikeme.”

27 «Ke e hegi ne ten wo pali pwo naamuun pie: “Ke me wonaa, go caa, ke é ileko pie, go pahede Lazare nge ha a pomwa te caa tong, ne pwo bwohemwo.

²⁸Be mwo élé lang wo lépwo âjiénung na nim jélé; be wâé heme e pacihelé ko a duaan ce é ko mu hen. Be koli lé bo opé ne éni, he ni cunu me ni picani [hemepie lé bo mele].”

²⁹«Ke e hegí ne ten wo Abérama pie: “Ûhu! Be caa te e pelelé wo Moosé me lépwo péroféta. Kehe wâé heme lé piténedehi!”

³⁰«Ke e pii ten wo pali pie: “Ûhu go caa. Be te nihe wâé heme e mwojuia mu ha amele wo pace céiu apulie me e pacihelé, beme lé pininim, ke me lé bitelé.”

³¹«Kehe icehi ana e hegí ne ten wo Abérama pie: “Mepie time lé uce piténede Moosé me lépwo péroféta, ke time lé o uce piténede pace apulie celi e mulie cemwo mu ha amele!”»

Luka 17

Ni pune te lésu ne te lépwo acémun den

Mataio 18.6–7, 21–22; Maréko 9.42

¹E pii te lépwo acémun den wo lésu pie: «O te cuwo ko pwo ni bwomunen me nye tupwo ne ha a ta. Kehe o te junihe ubwo a cuhinaado te pana e pwo me lé tupwo ne ha a ta wo lépwo béén!»

Go nemwo tanahi a céihi ten!

²«Geé pipwocile! Go nemwo pwotahi a céihi te pa apulie na e céihi ne kong pwohewii a cuwo nahi ewa, be o te junihe ubwo a cuhinaado tem. Ke wâé heme cie ace pilehe péi ne ko a henem, ke me tahiko ole he jié!

³Hemepie e pwo aceli ta {ne kom} wo pa céiu acéihi béis, ke go paciheeng ehi. Ke mepie e pininim, ke me e biteeng, ke go pineuhi ni ta pwo ten.

⁴Ke mepie e tee pwo celi ta ne kom, ke mepie e te âmwobé pii tem pie e pininim, ke go pineueng.»

Jan ne ko a céihi na junihe wahin

⁵[É ha a céiu tan, ke] lé pii te Padaame lésu wo lépwo *apostolo pie: «Ne teme a céihi celi nihe ubwo!»

⁶Ke e pii telé pie: «Hemepie a céihi tewé, ke me te ju wahin pwohewii a pide moutarde, ke o te jan me geé pii te a acuwo ce pie: “Go tawii ni waam mu éni, ke go ole cuwo he jié!”, ke e o te pitabemikewé.»

Geé penem ha a pimiibule

⁷[E pacémunilé mwo wo lésu, ke e pii telé pie]: «Geé cuwoteeke niimihi a bwomunen ce: Pwo pa apenem de pa daame, na e umi ni apwoamu, ke e wéihi muto. Ke me e âmwobé mu he ni apwoamu, ke time e uce pii ten wo pa daame pie: “Go â wiinaado.”

⁸Kehe e pii ten pie: “Go piwâam ko a wiinaado tong! Ke é alechen, ke go taatééhi ni epwénem, ke go âbé penem dong, beme é wiinaado ke me é ûdu. Ke é alecehe anaa, ke go bwobe wiinaado ke ûdu.”

⁹Time e uce olééhi ne te pa apenem den wo pa daame be e pwo nina e ilehi!

¹⁰«Te piwien ne mwo kowé jenaa, heme geé pwo ati nina e pii wo Padué, be wâé heme geé pii pie: “Wogeme l épwo apenem na piticenaado ne kome. Ke geme te ju pwo cehi nina me geme pwo.”»

E pwo me wâé l épwo katia na 10 jélé

¹¹E mwo ko â he pwaaden nge *lérusaléma mu Galilé wo lésu. Ke e tuie nge ha a céiu duaan na e mwonuhi a amu *Samari.

¹²Ke e â taa ha a céiu mwopopwaalé. Ke me e tehene ngen, ke lé âbé beniieng l épwo katia na 10 jélé.

¹³Ke lé te pimu ité koja lésu, ke lé cihe da ko miiden ko pii pie: «lésu, Padaame, go pipwoééheme!»

¹⁴Ke e alilé wo lésu, ke e pii telé pie: «Geé ân, ke geé pihabwiikewé ne te l épwo *apwoâpwailo.» Ke me lé mwo ko ân, ke caa te wâé jélé kuti.

¹⁵Ke heme e alihi wo pa céiu bélé pie caa wâé nang, ke e mwojuia, ke e cihe da ko miiden, ke e pii pie: «Wâé Padué!»

¹⁶Ke e tidih jilin ne ânebuhe lésu, ke e ti pwo bwohemwo a bwaaden, ke e pwoolé ten. Pa apulie naa, ke pa apulie mu Samari.

¹⁷Ke e pii ten wo lésu pie: «Tai wogewé l épwona 10 gewé, ke time uce tai wâé gewé? Ke kona élé wé l épwona 9 jélé?»

¹⁸É mu hadeniilé ati, ke te tice paceli e mwojuia cemwo beme e pipaunu Padué, kehe te icehi wogo pa aâbé!

¹⁹Go cuwoda, ke go engen, be e caa pwo me wâé go na a céhi tem.»

A bwo tuie te pa Nahi Apulie

Mataio 24.23–28,37–41

²⁰[É ha a céiu tan] ke lé tahimwo lésu ni béé *Farasaio pie: «He éniile celi e o bo âbé a *Mwametau te Padué?»

A Mwametau ke caa e éni

Ke e pii telé pie: «A Mwametau te Padué, ke o time e uce âbé pwohewii ace céiu naado celi genye alihi.

²¹Ke o time uce jan me geé pii pie: “E éni” ai “E lang”. Be a Mwametau te Padué, ke caa e ha awiemewé.»

Lé o bo tai alihi a bwo mwojuia tong

²²É alechen, ke e pii te l épwo acémun den wo lésu pie: «E o âbé a benaamwon na o nimewé me geé aliéo, woéo pa Nahi Apulie, ha ace tan celi ju céiu, kehe o time geé uce aliéo.

²³Pwo ni apulie na lé o pii tewé pie: “E jeoté” ai “E éni”, kehe geé nemwo ân; geé nemwo téte ngen.

²⁴Be a bwo âmwobé tong, woéo pa Nahi Apulie, ke o pwohewii a ilehi heme e pwéélang ati ha a miiden, mu ha a céiu baaéén die ha a céiu baaéén.

²⁵Kehe, é ânebuhe ninaa, ke wâé heme é mu he ni picani, ke me lé téétiéo ne ni apulie jenaa.»

Lé o téetih a bwo tuie opé tong

²⁶«A tan na é bo âbé hen, woéo pa Nahi Apulie, ke o pwohewii a benaamwon de Noé.

²⁷Be lé teko wiinaado me ûdu ne ni apulie, ke lé piaten, ke lé ne ni naîlé toomwo me lé aten. [Ke te tice aceli lé temehi] dieli ha a tan na e taa ha ali ong wo Noé. Ke e te âbé kuti ali tilihi amu, ke lé tai mele ati ni apulie naa.

²⁸«Ai o pwohewii a benaamwon de Lota. Be lé teko wiinaado me ûdu ne ni apulie, ke lé icuhinaado me pwocuhinaado, ke lé cemi, ke lé pacuuli ni mwa.

²⁹Ke é ha a tan na e wie mu *Sodome wo Lota, ke wo Padué, ke e pwo me tupwo mu he miiden a miû, ke a muu pule na éle. Ke lé tai mele ne ni apulie naa.

³⁰Ke [é pii tewé pie, o piwie a bwo téetih a nen de ni apulie] ha a tan na é o pihabwiéo, woéo pa Nahi Apulie.»

O bo pé pace céiu

³¹«É ha a tan naa, ke wo pana e âoté pwomwo, ke e nemwo taamwo hane ni naamuun ne ha a mwa ten. Ke wo pana e mu ha apwoamu, ke e nemwo mwojuia ngemwo pelen.

³²Geé te piniimi êgi mwode Lota [li e niê ocemwo. Be lé mele ibu me l épwo Sodome].

³³«Be wo paceli e hane me e cile a mulihen, ke e o patieden. Kehe wo paceli e patieden a mulihen, ke e o cile dieli mwo.

³⁴Éa, é pii tewé pie: É ha a bwén naa, ke alo ni apulie ne pwo ace apule, ke o pé pace céiu, ke o ne pa céiu.

³⁵Ke alo lu toomwo na lu ko cemeii blé ibu, ke o pé ê céiu, ke o ne ê céiu.

{³⁶«Ke wo lupwo apulie na lu mu ha apwoamu, ke o pé pa céiu, ke o ne pa céiu.»}

³⁷[Ke me lé téne anaa] wo l épwo acémun den, ke lé tahimwo lésu pie: «Padaame, e o bo tuie ne wé anaa?» Ke e pii telé pie: «[Geé ûmiê, me geé alihni béhabwiinen. Be pwohewii ana nye mu pii pie]: “É he na e lang a déhi wota, ke lé taineibulé nelang ne ni bwaaoléé.”»

Luka 18

Êgi depwele na e tee ile taaci

¹ E pii a ocine ce wo lésu te lépwo acémun den, beme e habwii telé pie, wâé heme nye cuwo ko pwoiitihi, kehe me nye nemwo pwo me mwaale genye.

²⁻³ Ke e pii telé pie: «E bwo mu wo ê céiu depwele [na te tice den]. Ke é ha a céiu tan, ke e â céii pa céiu atautinaado, [pa apulie na nihe ubwo nang] beme e ilehi kojaeng pie, me e cuwoko pa céiu apulie [me e uje ne mwo ten ana te a den]. Ke e pii ten wo êje pie: “Pa daame, go picani tong, ke go pwo ana mwomwon me dong!” «Kehe icehi ana wo pa atautinaado, ke time uce pa apaciiti Padué, ke time e uce paciiti lépwo apulie mwo.

⁴⁻⁵ Ke muhi ten, ke e pamwojuia êgi depwele. Kehe e te cuwo ko âbé céiieng wo êje ati he ni tan, dieli e o bo te â téneeng. «Ke nebwén, ke e pii ten wo pa atautinaado pie: “Te tice aceli é alihî ne ko Padué. Ke te tice aceli é alihî ne ko lépwo apulie [na lé pwohewii ê depwele ce]. Kehe icehi ana te junihé mwaale jo kon! Ke é o caa ne ten a mwomwon, beme o time e uce tee âbé iliéo!”»

⁶ Ke e pii mwo wo Padaame lésu pie: «Geé cuwoteeke alihî ana e tuie!

⁷ E picani ten wo pa atautinaado naa, na ta nang. Ke kona wo Padué, ke o time e uce téne ni apulie ten, ke me e picani telé, heme lé toteeng heme bwén ke pwang?

⁸ Uhuu! E o te ju piepin ko ténelé. Kehe icehi ana me é o mwojuia cemwo [ne éni pwo bwohemwo] woéo pa Nahi Apulie, ke he é o mwo te too ce apulie celi lé céihi?»

Pa Farasaio me pa atai mwani

⁹ Pwo ni apulie na lé niimihi pie lé *mwomwon ne he pwahamii Padué, ke lé tééti ni béen. Ke e pii a ocine ce wo lésu ne kolé pie:

¹⁰ «Lu bwo mu wo lupwo apulie na alo julu: Pa *Farasaio pa céiu, [pa apulie na ubwo nang ne ha a pwoiitihi]. Ke pa *atai mwani cuhi puni apulie pa céiu, [pana e mu bune he ni mwani naa]. Ke é ha a céiu tan, ke lu â pwoiitihi ne *huâ iitihi.

¹¹ «Ke e cuwoda wo pa Farasaio, ke e pwoiitihi pii pie: “Padué hung, é pipwo-olé tem, be time é uce pwohewii nina ta ni mulihelé. Be time lé uce juuju, ke lé bune, ke lé pibune. Ke time é uce wonaa! Ke é pipwo-olé tem, be time é uce pwohewii pa atai mwani naa.

¹² Be [é te piténedehi ati ni patén ko a pwoiitihi. Be] é mu patupwo wiinaado, beme é pwoiitihi tem, é he na alo tan ha a naadenitan. Ke é mu ne tem a âpipati ko ni âpenem dong.”

¹³ «Ke mepwo é ne ko pa atai mwani cuhi puni apulie, ke te time uce jan ne kon me e alehede da he miiden he e pwoiitihi. Ke e picii a bwaangen, be piwahin nang. Ke e pii te Padué pie: “Padué, go pipwoééhung. Be woéo ke pa apulie na ta jo!”»

¹⁴ Ke e pii wo lésu pie: «Wooélé mu ko lupwonaa, na e pwo me wâé a pwonimen wo Padué? Wooélé pana e mwomwon ne he pwahamiin? Te wo pa atai mwani

cehi, kehe time uce wo pa Farasaio. Be wo pana e pwo me piubwo nang, ke o neeng ole, ke wo pana e pwo me piwahin nang, ke bo neeng da.»

E adéi ni cuwo nahi ewa wo lésu

Mataio 19.13–15; Maréko 10.13–16

15Lé âbé céii lésu wo l épwo b é apulie, ke l é péb é céiieng ni cuwo nahi ewa, beme e ti kolé [ke me adéilé]. Kehe icehi ana he l é alih i anaa wo l épwo acémun den, ke l é cihe me ubwo ne kolé, ke l é pacuwolé.

16Kehe e pii telé wo lésu pie: «Geé ne ni cuwo nahi ewa me l é âbé céiiéo. Geé nemwo pacuwolé, be a *Mwametau te Padu é, ke a de ni apulie na l é pwohewii ni cuwo nahi ewa.

17Éa, é pii tewé a juuju pie: Wo pa apulie na time e uce heg i a Mwametau te Padu é pwohewii ni cuwo nahi ewa, ke wo panaa, ke o pwocoon ne kon me e taa hen.»

Pa apulie na nihe pwo den

Mataio 19.16–30; Maréko 10.17–31

18E âbé céii lésu wo pa céiu apihu ô [ko pwoiitihi] te l épwo *Juif, ke e tahimwoeng pie: «Pa apipune, wogo pa apulie na te junihe wâé go kuti. He ade aceli me é pwo, beme é heg i a *mulie dieli mwo ne pele Padu é?»

19Ke e heg i ne ten wo lésu pie: «Kona é mu ko ade na go pii kong pie, woéo ke pa apulie na wâé jo? Be te tice pace apulie celi wâé nang, kehe te icehi Padu é.

20[Ke hemepwo é ne ko a bwo tahimwohi nen dem] ke go temehi ehi ni patén: Go nemwo pibune; Go nemwo taunuhi apulie; Go nemwo bune; Go nemwo pii ce pwootti celi ni gele ne ko ce b é apulie ; Go paciiti lu nyaa me caa tem.» Exode 20.12–16

21Ke e heg i ne ten wo pali apulie pie: «É caa te téne dehi kuti ninaa, ha a bwo mwo wahin jo.»

22Ke e pii ten wo lésu pie: «Go téne, te ju céiu ceh i a naado na mwo tieden kojako: Go engen, ke go â icuhi ati ni dem, ke go pé ni cuhin, ke go ne te nina tice delé. Be me wonaa, ke o pwo ce dem ne pele Padu é. Ke neb wén, ke go âbé céing.»

23Kehe me e téne anaa wo paje, ke te junihe piwahin nang, be te junihe pwo den.

24Ke e piniê céin wo lésu, ke e pii [te l épwo acémun den] pie: «Geé alih i, wo l épwona te junihe pwo delé, ke te junihe pwocoon ne kolé me l é taa ha a Mwametau te Padu é!»

25«Kona a chameau, ke o te jan ne kon, me e taa ha a pwon ko a diti? Ke é pii tewé pie: Wo pa apulie na pwo den, ke mwo te junihe pwocoon ne kon, me e taa ha a Mwametau te Padu é.»

²⁶Lé te junihe téele kuti wo lépwona lé téne anaa, ke lé te pipii telé pie: «Ke kona woo paceli jan me e piceluimieng?»

²⁷Ke e pii telé pie: «Ana time uce jan ne ko pa apulie me e pwo, ke te tai jan ne ko Padué.»

²⁸Ke e pii ten wo Pétérue pie: «Wogeme, ke geme caa patupwo ati ni deme, beme geme âcéim!»

²⁹Ke e pii telé wo lésu pie: «É pii tewé a juuju pie: Wo paceli e patupwo a pomwa ten, ai ê mwoden, ai ni âjiénen, ai lu acileeng, ai ni naîn, watihen a Mwametau te Padué,

³⁰ke o tabuhi jenaa, ke e bo hegí ce naado celi piwéden, celi te junihe ubwo ke hiwon. Ke é alechen, ke e bo hegí a mulie dieli mwo ne pele Padué.»

E pii a béociéhe a bwo mele ten

Mataio 20.17-19; Maréko 10.32-34

³¹E pé itéhi lépwo ¹² acémun den wo lésu, ke e pii telé pie: «Geé téne, genye o caa taa *lérusaléma, ke é nelang he na o caa pajuujuhi ati nina lé tii wo lépwo péproféta ne kong, woéo pa Nahi Apulie.

³²«Be o neéo te nina te tice céhi telé. Ke lé bo pihooniéo, ke lé bo pwotahi ne kong, ke lé bo cumi ne kong,

³³ke lé o ahiéo ko a bwaliiwota. Ke lé o pwo me é mele. Kehe icehi ana é ha a béciéhe ni tan alechen, ke é o mulie cemwo mu ha amele.»

³⁴Kehe time lé uce temehi ana e pii wo lépwo acémun den. Be neduwohi kojalé a bwopiinen.

E pwo me e niê pa bwi

Mataio 20.29-34; Maréko 10.46-52

³⁵[Lé mwo teko â lérusaléma wo lésu me lépwo acémun den.] É he lé ko piâmwonuhi lériko, ke pwo pa bwi na e tebwo ko a jije pwaaden, ke e ile [be pana te tice den].

³⁶É he e téne a pubu apulie he ko âbé, ke e tahimwohi pie, he ade.

³⁷Ke lé pii ten pie, wo lésu mu Nazaret na e ko âdé.

³⁸Ke e cihe da ko miiden ko pii pie: «lésu, pa *Naî Davita, go pipwoééhung!»

³⁹Ke wo lépwona lé engen ânebuhe lésu, ke lé pihaaeng, beme e nemwo cihe. Kehe icehi ana e bwo junihe cihe da ko miiden kuti, ke e pii pie: «Pa Naî Davita, go pipwoééhung, ke go picani tong!»

⁴⁰Ke e â cuwo wo lésu, ke e pii pie, me lé pééeng bé céiieng. Ke me e âbé mwonueng wo pali bwi, ke e tahimwoeng wo lésu pie:

⁴¹«Ade aceli nimem me é pwo me dem?» Ke e hegí ne ten pie: «Padaame, me é niê mwo!»

⁴²Ke e pii ten wo lésu pie: «Niê mwo! Be caa wâé go mwo mu ko a céhi tem!»

⁴³Ke e te niê kuti, pwohewiin ânebun. Ke e âcéi lésu, ke e pipaunu Padué. Ke lé tai pipwoun de Padué ati ni apulie na lé alahi anaa.

Luka 19

lésu me Zaché

¹E â taa lériko wo lésu, ke e pitahagéi a pwomwo ubwo,

²he e ko mu lang wo pa apulie na pii kon pie Zaché, pa caa te lépwo *atai mwani cuhi puni apulie. Pa apulie na [piubwo nang, ke] junihe pwo den.

³E hane me e ali lésu. Kehe pwocoon, wonaa mu ko a pubu apulie, be ju bahin nang.

⁴Ke e téte nge ânebuhe ni apulie, ke e â taa pwo a acuwo *sycomore*, beme e ali lésu, heme e âbé lang.

É mu ha a mwa tem jenaa!

⁵Me e tehenebé wo lésu ha a duaan naa, ke e eti da ni naamiin, ke e pii ten pie: «Pa daame Zaché, go epin ko ole, beme é mu ha a mwa tem jenaa!»

⁶Ke e te epin kuti ko a bwo ole ten wo Zaché, ke e hegi lésu ne pelen ne ha a pipwodéén.

⁷He lé alahi anaa wo lépwo apulie, ke lé pihuu, ke lé pii pie: «E â mu pele pa apulie na ta nang.»

⁸Ke e cuwo ânebuhe Padaame lésu wo Zaché, ke e pii ten pie: «Go alahi, go Padaame, é o bo ne te lépwona tice delé a céiu duaa ni dong. Ke mepie é pwotahinaado ne ko pace céiu, ke é o bo ne ten me opaa mu ko ana me é ne.»

⁹Ke e hegi ne ten wo lésu [ne he pwahamii ni apulie] pie: «E celuimikewé wo Padué, wogo me a mwa tem! Be [go habwii pie] pa ju piebehi *Abérama!

¹⁰Be woéo, pa Nahi Apulie, ke é âbé hane ke *celuimi lépwona lé pipatieden.»

Ocine ko lépwo eabwé na cié jélé

Mataio 25.14-30

¹¹Hiwon ni apulie na lé ko téne a pwooti te lésu. Ke e piuti telé a céiu ocine [beme lé temehi a ju bwomunen ne ha a *Mwametau te Padué]. Be caa e mwonu *lérusaléma, ke lé niimihi pie, wieli e o caa pacuwohi a Mwametau he e â taa ha a pwomwo ubwo.

¹²Ke e pii pie: «E bwo mu wo pa céiu apulie na e mu ha a pwomwoiu na nihe pwonaado ne kon. [Ke lé bwo todeeng beme pa daame ha amu ten.] Ke e bwo pipwopweehi a bwo engen den nge ha a céiu amu na été, beme e [ali pa daame ubwo nelang, me] hegi a pihuô ten.

¹³Ke e tote lépwona 10 jélé mu ko lépwo eabwé ten, ke e muko pétaapwo ne telé ni mwani megele na hiwon, ke e pii telé pie: “Geé penem kon dieli é bo âmwobé.” [Ke nebwén, ke e engen, beme e hegi a pihuô ten.]

¹⁴«Kehe lé téétieng ni béé apulie ha amu ten, ke lé ne ni apulie nge ha amu na e â hen, beme lé pii [te pa daame ubwo] pie: “Te muhi teme me pa apulie ce, ke me e pihuô teme.”»

Wogo pa eabwé na wâé go!

¹⁵«E caa te pwo me e daame. Ke nebwén, ke e mwojuia mwo. Ke e todebé ne pelen lépwo eabwé ten li e ne telé li mwani, beme e temehi pie, he niile celi e taa ne mwo pwon.

¹⁶Ke e âbé wo pa bécéiuhen, ke e pii pie: “Pa daame, go ne tong ana *1 million*, ke e taa ne pwon nina *10 million*.”

¹⁷«Ke e pii ten wo pa daame pie: “Wâé! Wogo pa eabwé na wâé go; be go piténédehi ne he ni naado na wahin. Ke go pé a pihuô ne ko nina 10 ni pwomwo ubwo.”

¹⁸«Ke e âbé wo pa béalohen, ke e pii pie: “Pa daame, go ne tong ana *1 million*, ke e taa ne mwo pwon nina *5 million*.”

¹⁹«Ke e pii ten wo pa daame pie: “Wâé! Wogo mwo, go pihuô ne pwo nina nim ni pwomwo ubwo.”»

Wogo pa eabwé na ta go!

²⁰«E âbé wo pa céiu, ke e pii ten pie: “Pa daame, go ne tong ana *1 million* ke é cile ne ha a mwaanu.

²¹Be mwotiéo kom, be pa apulie na go okéé [ne ko lépwona time lé uce penem ehi]. Ke go taineibuhi nina time go uce penem kon, ke go tii ni âdaanu na time go uce cemi.”

²²«Ke e pii ten wo pa daame pie: “É tautiko mu ko nina go pii, pa eabwé na ta go! Be go te temehi pie woéo, ke pa a-okéé, ke é taineibuhi nina time é uce penem kon, ke é tii ni âdaanu na time é uce cemi.

²³É mu ko ade na time go uce ne ha a mwomwani a mwani tong?! Be hemepie go ko wonaa, ke wieli é o te céi ne pehi celi e taa ne pwon!”

²⁴«Ke e pii te lépwona lé mu lang wo pa daame pie: “Geé pé kojaeng a *1 million* na eten, ke geé ne te pana eten nina *10 million*.”»

O bo ne te pa apenem ehi

²⁵«Kehe lé pii ten pie: “Pa daame, caa eten ni mwani na te junihe hiwon wéden!”

²⁶«E hegi ne telé wo pa daame pie: “Wo pana caa pwo ne ten, ke o ne mwo pwon ce béén. Kehe wo pana te tice ten, ke o pétaabwon kojaeng a nehinaado na mwo e pelen.

27 É ne ko lépwona ta jélé ne kong, ke lépwona te muhi telé me é pihuô ne kolé, geé péélé bé ne éni, ke geé taunulé ne ânebuhung!”»

E taa lérusaléma wo lésu

Mataio 21.1-17; Maréko 11.1-19; Ioane 12.12-19

28 É alecehe a bwo piuti nen den a ocine naa, ke e engen wo lésu beme e taa lérusaléma. [Ke lé alecehen wo lépwo 12 acémun den.]

29 Ke lé piâmwonuhi lupwo mwopopwaalé, Betfagé me Bétani, die pwo a juwole ko ni Olivier. Ke e mi ne ngen lupwo alo acémun den wo lésu,

30 ke e pii telu pie: «Geu â ha a mwopopwaalé na e ânebuheny. Ke me geu â taa hen, ke geu bo tooli a nahi buriko na lé taaaeng, na mwo te tice apulie celi lé mu tebwo huîn. Ke geu tuwoeng, ke geu pééeng bé.

31 Ke mepie lé tahimwokeu pie: “É mu ko ade na geu tuwoeng?”, ke geu hegi ne telé pie: “Nime Padaame kon.”»

32 Ke lu ân, ke lu tooli ali nahi buriko, pwohewii nina e pii telu wo lésu.

33 É he lé mwo ko tuwoeng, ke lé tuiybé wo lépwo eapwihin, ke lé pii telu pie: «É mu ko ade na geu tuwo a nahi buriko naa?»

34 Ke lu hegi pie: «Nime Padaame kon.»

35 Ke lu pébé céii lésu ali buriko. Ke lé tai ne ni epwén huîn wo lépwo acémun den, ke lé pwo me e taa tebwo huîn wo lésu.

Lé pipaunueng ne ni apulie

36 É heme e ko piân, ke ni apulie, ke lé talihi ni mwaanu telé nge pwo a pwaaden ânebuhe lésu [beme lé pipaunueng].

37 Ke lé piâmwonuhi a duaan he na e mu lang a ole ko a pwaaden mu ko a juwole ko ni Olivier ke e â lérusaléma. Ke lé tai pipwodéén wo lépwo apulie, ke lé cihe da ko miiden, beme lé pipaunu Padué mu ko ni *pipwojunuun na lé alih.

38 Ke lé toii da pie: *Adéi Padaame ce! E âbé ne he nii Paduél! A péém ne he miiden! Wâé ne he ni duaan na daaité!

39 Kehe icehi ana wo lépwo bée *Farasaio na lé mu lang, ke lé pii te lésu pie: «Aje, go pacihe lépwo acémun dem!»

40 Ke e hegi ne telé pie: «É pii tewé pie, mepie time lé cihe, ke ni péi ce, ke lé bo pipaunu Padué!»

E é pai lérusaléma

41 E ko piâmwonuhi lérusaléma wo lésu, ke me e alih a pwomwo ubwo, ke e é pain.

42 Ke e pii pie: «Au, mwolihi! lérusaléma, nihe nimung me wogo mwo, ke me go tooli a péém jenaa. Kehe icehi ana te muhi tem, ke é jenaa, ke caa pwocoon me go alih.

⁴³Be o caa time uce bwolihi, ke lé o âbé céiiko wo lépwona muhi telé kom. Ke lé o cubwoniko na ati he ni piduaan. Ke lé bo pwopa ne kom. [Ke o time uce jan me go taunulé] be hiwon ni babé ataduwo telé na lé pwo aujeniko.

⁴⁴Ke [lé bo tanahi ni goomwa babé bwonihi a amu tem. Ke] time e bo uce mu mwo ace céiu péi pwo ace céiu. Ke lé bo caaitekewé, me ati ni apulie tem. Wonaa be time go uce alih temehi ali benaamwon li e âbé céiiko hen wo Padué beme e celuimiko.]

E peni ni api-icu mu huâ iitihi

⁴⁵[Lé tuie nge Iérusaléma] ke e taa *huâ iitihi wo lésu. Ke e peni wie lépwona lé pwojenep nelang.

⁴⁶Ke e pii telé pie: «Geé caa te temehi ali e pii wo Padué ne he ni tii iitihi pie: A mwa tong, ke bo toii kon pie a mwo ko pwoiitihi. Ésaïe 56.7 Kehe wogewé, ke geé ko pwo me ataduwo te lépwo abune!» Jérémie 7.11

⁴⁷Ke é alechen, ke e pacémuni ni apulie ne huâ iitihi wo lésu, ati he ni tan. Ke é ne ko lépwo caa te lépwo *apwoâpwailo, me lépwo *dotéén ko patén me lépwo apihuô, ke lé tabuhi hane ace bwopwonen beme lé taunueng.

⁴⁸Kehe icehi ana time lé uce tooli, be nihe hiwon ni apulie na lé cedihi ni pwooti na e pacémunilé kon.

Luka 20

Woo na e ne te lésu a pihuô?

Mataio 21.23–27; Maréko 11.27–33

¹E mu pacémuni lépwo apulie ne *huâ iitihi wo lésu, ke e patemehi telé a Pwooti Wâé. Ke é ha a céiu tan he e mwo teko wonaa, ke lé âbé céieng wo lépwo bée caa te lépwo *apwoâpwailo, me lépwo bée *dotéén ko patén, me lépwo bée apihuô.

²Ke lé tahimwoeng pie: «Aje, wooélé na e ne a pihuô tem me go pwo nina go ko pwo? Wooélé na e pahedeko?»

³Ke e hegi ne telé pie: «Woéo mwo, ke é o mwo tahimwokewé ko a céiu naado. Weengi:

⁴Wooélé na e ne a pihuô te loane me e *pipuu apulie? Wo Padué, ai ni apulie?»

⁵Ke lé te nihe picihe kon, ke lé pipii telé pie: «Mepie genye hegi ne ten pie: “É mu ko Padué”, ke e o pii tenye pie: “Ke é mu ko ade na time geé uce céihi ne ko nina e pii tewé wo loane?”

⁶Ke mepie genye hegi ne ten pie: “É mu ko ni apulie”, ke wielí lé bo ahikenye ko péi ne ni apulie. Be lé tai céihi me ubwo pie, wo loane, ke pa péroféta [te Padué].»

⁷Ke é mu ko anaa, ke lé hegi ne te lésu pie: «Meniing, time geme uce temehi.»

⁸Ke e pii telé pie: «Ke woéo mwo, ke time é o uce pii tewé pie, he wooélé na e ne tong a pihuô me é pwo nina é ko pwo.»

Lépwo awéihi na a ni tabe megele

Mataio 21.33–46; Maréko 12.1–12

⁹Wo lésu, ke e piuti te lépwo apulie a ocine ce: «E bwo mu wo pa eapwihi a ni tabe megele. Ke e bwo cemi apwoamu ten. Ke nebwén, ke [e niimihi pie me] e mwo â pitabée ha ace céiu amu, ke e pwocuhi ni bée apulie, beme lé wéihi ali ni tabe megele ten. Ke e engen, ke te nihe bwolihi a bwo mu ten ha amu naa.

¹⁰[Pwo ni wole alechen] ke tuie nge ha a benaamwon ko tabwo ace tabe megele. Ke e ne ngen pa céiu apenem den, beme e hegi koja lépwoli awéa ko ali ni tabe megele, ace den mu ko a pitii âdaanu. Kehe icehi ana lé ahieng, ke lé neeng ngemwo, he te tice celi lé ne ten.

¹¹«Ke é mulang, ke e ne mwobé pa céiu apenem den. Ke lé piciheta ne kon, ke lé ahieng mwo. Ke lé pamwojuieeng mwo, he te tice celi lé ne ten.

¹²Ke nebwén, ke e ne ngemwo pa béciéhe ni apenem den, ke lé piahieng, ke lé picibééeng.

¹³«Ke nebwén, ke e pipii ten wo pali eapwihi ali ni tabe megele pie: “He ade aceli me é bo pwo? É bo ne ngen pali ju naîng na nihe eânimung den. Be wielí lé bo paciitieng”.

¹⁴«Kehe icehi ana me lé alieng he e tehene ngen, ke lé pipii telé pie: “Geé téne, te weengaa kuti pana e bo eapwihi ali ni tabe megele ha ace céiu tan. Wâé heme nye taunueng, beme bo a denye ali ni tabe megele!”

¹⁵«Ke lé teuueng wie koja a apwoamu, ke lé taunueng.»

[Ke wo lésu, ke e tahimwo lépwna lé ko tabemieng pie]: «Ke e bo pwo de wo pali eapwihi ali ni tabe megele?

¹⁶E bo âbé, ke e bo taunu li apulie na ta jélé. Ke e bo uce ne te ce béén ali ni tabe megele, beme lé bo uce wéa kon!» Kehe icehi ana wo lépwna lé tabemi ali ocine, ke lé téetihi, ke lé pii pie: «Ûhu! Pwocoon! Time o uce wonaa!»

¹⁷Ke e omelé wo lésu, ke e hegi ne telé pie: «Geé cuwoteeke niimihi ali caa tii ne he ni tii iitihi, pie: *Ali péi li lé tahi taabwon wo lépwo abahi mwa, ke te anaa kuti a ju paamwa.*» *Psaume 118.22*

¹⁸«Hemepie e tupwo wo pace céiu apulie ne pwo a péi naa, ke o tatubwi ati a één. Ke mepie e tupwo ali péi ne huîi pace céiu apulie, ke e o ju tagetieng.»

A cuhi puni apulie te lépwo Roma

Mataio 22.15–22; Maréko 12.13–17

¹⁹⁻²⁰ Lé temehi wo lépwo dotéén ko patén me lépwo caa te lépwo apwoâpwailo, pie e ko pwo-ocine ne kolé wo lésu. Ke nimelé me lé imwieng, beme lé icueng ne te pa gupéno te lépwo Roma. Kehe icehi ana mwotilé, be hiwon ni apulie [na wâé telé nang]. Ke lé neeng, kehe lé te piwéa kon.

[Ke é ha a céiu tan] ke lé ne nge céiieng ni bée apulie, beme lé tahimwoeng ko ce naado. Ke woélé, ke lé pii ten pie, nimelé me lé temehi a juuju. Kehe icehi ana lé hane me lé pipé ne kon ko aceli e bo hegi ne telé kon.

²¹Weengi ana lé pipii me weeng: «Pa apipune, geme temehi pie, go pii a juuju, ke time go uce pipwoinen ne ko ni apulie. Be go te patemehi ati ni naado na nime Padué kon me genye pwo.

²²Be anaa kuti ana nimeme me geme tahimwoko pie: He wâé heme nye pwocuhi puni apulie te pa daame he lépwo Roma? Ai time uce wâé?»

²³Kehe e te temehi a pipwohuô telé wo lésu, ke e pii telé pie:

²⁴«Geé cuwoteeke habwii tong ace céiu mwani péi. A démee, ke a nii-î ana e pwo a mwani ce?» Ke lé hegi ne ten pie: «A de pa daame he lépwo Roma.»

²⁵Ke e pii telé wo lésu pie: «Ke caa wâé, ke geé ne mwo te pa daame nina te ni den, ke geé ne te Padué nina te ni de Padué.»

²⁶Ke lé te nihe téetih a bwo hegi nen den, be time uce jan me lé pipé ne kon ne he pwahamii ni apulie. Ke te tice aceli me lé bo uce pii mwo.

A bwo mulie cemwo te ni amele

Mataio 22.23–33; Maréko 12.18–27

²⁷Lé âmwobé céii lésu wo lépwo bée *Saducéen. [Woélé, ke te a céiu dihe pwooitihi te lépwo *Juif] na time lé uce céihi pie, lé o mulie cemwo wo lépwo amele. Lé âbé too lésu, [ke lé pwo me lé habwii pie lé juuju] ke lé tahimwoeng pie:

²⁸«Pa apipune, e caa tii me denye wo *Moosé ne he ni patén pie: *Hemepie e mele wo pace céiu apulie celi te tice naîn, ke wâé heme e pé ê depwele ten wo pa ciéen me lu piaten. Deutéronome 25.5* Be me wonaa, ke me bo pwo ce piebehi pa amele.

²⁹«[Ke te wâé. Kehe go cuwoteeke niimihi ani]: Pwo lépwo pwénaâjién na 7 jélé, ke e piaten wo pa cuwolé, kehe icehi ana e mele he mwo te tice naîn.

³⁰Ke wo pa béalohen, ke lu piaten me êgi depwele, kehe icehi ana he e mele mwo wo paje, ke te tice naîlu.

³¹Ke te piwien ne ko pa béciéhen, ke te wonaa mwo ne ko lépwoli 7 jélé. Be lé te tai mele, ke he te tice naîlé.

³²Ke é alecehelé ati, ke e bwobe mele wo êgi toomwo.

³³Ke [go ko pii pie] lé bo mulie cemwo ne ni amele ha ace céiu tan. Ke hemepie wonaa, ke o bo wooélé mu hadenilé celi bo pa aiu he ê toomwo naa, ha a benaamwon naa? Be caa te tai lépwo aiu hen ati! [Ke go cuwoteeke hegi!]»

A bwo hegi nen de lésu

³⁴Ke e hegi ne telé wo lésu pie: «[Geé pitalupe!] Be nye mwo te piaten cehi ha a benaamwon na nye mwo tee ko mu éni pwo bwohemwo.

³⁵⁻³⁶Ke o time uce wonaa, he ce benaamwon celi e lang. Be e bo pitaigali ni naîn wo Padué, ke caa te woélé kuti lépwona e piniihi pie wâé me lé pimu ibu me weeng. Ke e bo pwo me lé mulie cemwo mu ha amele, ke lé bo pwohewii ni *âcélo ten. Be time lé bo uce mele mwo, ke time lé bo uce piaten mwo.

³⁷«[Geé ko tahimwoéo] ko a bwo mulie cemwo mu ha amele. He time geé uce temehi ali e pii wo Moosé, he e pwojepule ko ali nahi acuwo li e éle kon ali miû? Be e pii ko Padué pie, *Padué he *Abérama, ke Padué he Isaaka, ke Padué he Iakobo. Exode 3.6*

³⁸[A bwopiinen pie] lé tekoi mulie pele Padué! Be time uce Padué he ni amele, kehe Padué he nina lé mulie.»

A bwo hegí nen den @ ne te lépwo dotéén ko patén

Mataio 22.41—23.12; Maréko 12.35–40

³⁹Wo lépwo dotéén ko patén, ke me lé téne ana e pii wo lésu te lépwo Saducéen, ke lé pii ten pie: «Nihe wâé kuti ali bwo hegí nen dem, go pa apipune!»

⁴⁰Be te nihe pipwocoon delé, me lé tahimwo lésu ko ce béé naado.

⁴¹Kehe icehi ana e pii telé pie: «É mu ko ade na lé pii wo lépwo apulie pie, wo pa *Mesia, ke pa apulie na wahin nang koja *Davita?»

Nihe pwonaado ne ko pa Mesia

⁴²⁻⁴³ «Time uce wonaa. Be te wo Davita na e pii ne ha a tii *Psaumes, pie: Pwooti te Padaame Padué, na e pacihe pa daame hung: “Go âbé tebwo éni pwo a juing.

[É ne tem a pihuô, ke o pipaunuko dieli mwo.] É pwo me go caaite nina lé pipwopa ne kom.”Psaume 110.1

⁴⁴«Be, me e ko pii wo Davita pie: *Padaame hung*, ke a bwopiinen pie, wo pa Mesia. Ke me wonaa, ke ade ace watihen me geé niimihi pie, wo pa Mesia, ke time uce pace apulie celi piubwo nang koja Davita?»

Geé nemwo pipwohewii ni dotéén naa

⁴⁵Hiwon ni apulie na lé ko tabemi nina e ko pii wo lésu, ke é ne he pwahamiilé ati, ke e pii te lépwo acémun den pie:

⁴⁶«Geé pipwocile! Geé nemwo pipwohewii lépwo béé dotéén ko patén! Be te junihe wâé telé me lé engen he ni epwén na bwali. Ke wâé telé heme nye tee pwobwocu telé, me pipaunulé ne he pwahamii ni apulie ati. Ke lé te hane ni atebwo ânebun ne he ni *mwotapitihi, ke é ne mwo he ni apiwiinaado na ubwo.

⁴⁷«Ke lé te nihe pwo ni jame pwoiitihi, beme nye o niimihi pie ni apulie na wâé jélé. Kehe icehi ana me lé ko wonaa, ke lé pé ati koja ni depwele ni delé! Ke te é mu ko anaa kuti, na o bo ne telé a cuhinaado na te junihe ubwo koja a cuhinaado te ni béén.»

Luka 21

Iésu ne huâ iitihi

Mataio 24.1–2; Maréko 12.41—13.2

Ê depwele na tice den

1E mu *huâ iitihi wo lésu. Ke e ome ni apulie na te nihe pwo delé na lé ko ne mwani, ne ko a *mwaiitihi.

2Ke e alihî mwo ê depwele na tice den na e ne lupwo cuwo nahi mwani péi.

3Ke e pii wo lésu [te lèpwo acémun den] pie: «É pii tewé a juuju pie: Ê depwele ce tice naamuun, ke e ne nina te junihe piwéden koja ni béen.

4Be lé ne ni mwani na piwéden mu ko ni âpenem delé. Kehe wo ênaa, ke te ju tice den, ke e te ne ati ni mwani na jan me e mulie kon.»

O bo tanahi a mwaiitihi

5Ke é alechen, ke lé cihe ko ali mwaiitihi ne ni apulie, ke lé pii pie: «Junihe wâé kuti ko ni péi na e gaale kon, ke ni naado na lé ne te Padué mwo!»

6Ke e hegi ne telé wo lésu pie: «Geé te alihî ati ninaa: Be o bo âbé ace tan, celi o bo tanahi taabwon ati ninaa. Ke o time bo uce mu mwo ace céiu péi pwo ace céiu mwo.»

Ana e o tuie

Mataio 24.3–35; Maréko 13.3–31

7Lé tahimwo lésu wo lèpwo acémun den pie: «Pa apipune, he éniile celi e o bo tuie ana go ko pii? Ke o ade ace inenaado kon, me geme o temehi pie, caa é mwonu ni naado naa, ke o bo tuie?»

8Ke e hegi ne telé wo lésu pie: «Geé pipwocile, beme geé nemwo pipweéo! Be o hiwon nina lé o âbé heme lé pé a niing. Ke lé o bo pii tewé pie: “Woéo pa *Mesia. Be e caa tuie a benaamwon.” Kehe geé nemwo âcéilé.

9Me geé téne heme lé cihe ko ce pa, ke ce naado na ta ne pwo a bwohemwo, ke geé nemwo pwo me mwotikewé. Be e o mi tuie ninaa, kehe icehi ana time uce téele a pwonehi a bwohemwo.»

10Ke e pii telé mwo wo lésu pie: «A céiu amu, ke e bo pipwopa me a céiu amu. Ke a céiu mwametau, ke e bo pipwopa me a céiu mwametau.

11Ke o bo pwo ni penem bwohemwo ne he ni pétaapwo piduaan, ke ni menele, ke ni cunu na nihe ubwo, ke ni naado na te junihe ité ne jedâ he miiden. Ke o bo nihe mwoti ni apulie.»

O pwotahi ne ko ni acéihi

12«Ke ânebuhe ninaa, ke lé bo pwo me geé mu he ni picani. Be lé bo imwikewé, ke lé bo péékewé nge he ni *mwotapitihi beme tautikewé. Ke lé bo tahikewé nge he karépu. Ke lé bo teuukewé nge he pwahamii ni daame me ni gupéno, beme lé tautikewé, watihen a niing.

¹³Ha a benaamwon naa, ke o ne tewé me wogewé lépwo apajuujuéo.

¹⁴Geé te ju niimihi ehi pie geé nemwo mi pipwopweehi celi me geé bo pii hemepie lé bo tautikewé.

¹⁵Be é bo te ne tewé ce pwooti, ke ce bwo temehinaado. Ke wo lépwona lé pii me ta gewé, ke o bo pwocoon ne kolé me lé hegi ne tewé.

¹⁶⁻¹⁷ «Ke lé o bo icukewé mwo ni ukéiu tewé ke ni âjiénewé ke ni béeuwé. Ke lé o téétikewé mu kong ati ne ni apulie. Ke lé o bo taunu ni béeén mu kowé.

¹⁸⁻¹⁹Kehe wo pana e cumang, ke e bo celuimieng wo Padué. Ke o te tice celi lé o pwo me tatééhi *a ju mulip na e kowé.»

O te junihe pwoééhe lépwo Iérusaléma

²⁰«Me geé alahi ni mwocoda na lé mu aujenihi *Iérusaléma, ke geé o caa temehi pie, o caa tanahi taabwon a aba.

²¹Wo lépwona élé pwomwo koja a pwomwo ubwo, ke lé nemwo taa hen! Ke me lé cela epin! Ke ati lépwona lé mu ha amu *Judé, ke wâé heme lé tai cela da pwo ni juwole!

²²⁻²³Au, mwolihi! Be é he ni tan naa, ke o te junihe pwoééhe ni toomwo na pigiaa jélé, me nina lé paditihi ewa. Be lé o te junihe mu he ni picani. Be weengaa a benaamwon na wo Padué, ke e o pwo me lé pwocuhinaado na a bele ten, [lépwo *Juif]. Ke o wonaa ace bwo pacuwohi ati ne ni pwooti te lépwo péroféta ne he ni tii iitihi. «Ke o te junihe ubwo a pwo-okéé ten, ke lé o te junihe picani ne ni apulie lang, ha a benaamwon naa.

²⁴Ke o te junihe hiwon nina o taunulé ko teua. Ke o hiwon mwo nina lé o cielé me péélé nge he ni amu na hiwon, [beme ni *apenem tice ja kon de ni apulie lang]. Be a benaamwon naa, ke a benaamwon de nina time uce ni Juif. Ke lé o tanahi taabwon ati Iérusaléma. Ke lé o caaite a pule ten me a bele ten, dieli ha a tan na e bo pacuwohi anaa [wo Padué].»

A bwo âmwobé te Iésu

²⁵⁻²⁶ «[É alechehe anaa] ke o pwo ni inenaado na ité ne ha a téale, me a wole, me ni ceni. Be lé o penem ni junuunaado he miiden. Ke [o te ité mwo a jié, be] o bo â ni pilehe pihijié, ke o te junihe ubwo a één. Ke lé o téetihí ati ninaa ne ni apulie pwo bwohemwo. Ke o te junihe mwotilé, ke o cenim jélé, be lé o alahi pie, o caa tuie a benaamwon na caa junihe ta a bwohemwo.

²⁷Ke nebwén, ke lé o bobé aliéo, woéo pa Nahi Apulie, heme é âbé he ni nii, ne ha ati a junuung me a bwo ubwo jo.

²⁸[Anaa kuti na é pii tewé pie]: Heme geé alahi pie, e caa tabuhi cuwo ni naado naa, ke geé mwoiu me pipwodéén! Be o caa time uce bwolihi, ke e o caa celuimikewé wo Padué!»

A inenaado ko a éé majing

²⁹[E pacihelé mwo wo lésu ko ana e o tuie.] Ke e pii telé a ocine ce: «Geé cuwoteeke alihia majing, be te a céiu acuwo.

³⁰Be, me e tile, ke geé caa temehi pie, caa é mwonus a cim naado.

³¹Wonaa mwo, heme geé alihia pie e caa ko tuie li é caa pii, ke geé o temehi pie, e o ju téele ne a Mwametau ten wo Padué.

³²Ke é pii tewé a juuju pie: [Time o uce bwolihi.] Be lé o mwo te alihia anaa ne ni béé apulie jenaa, ânebuhe ace bwo mele telé.

³³Be o tieden a miiden me a bwohemwo, kehe time o uce tieden a pwooti tong.»

Geé tee ûmiê!

³⁴«Geé pipwocile! Geé nemwo mulie ha a mulie hauli, ke geé nemwo junihe ûdu me wiinaado! Ke geé nemwo gia ko ni naado ne éni pwo bwohemwo. Be, mepie geé te mu ko ni naado naa, ke wieli geé o bo téele, ke pitice bwopemikewé heme é âmwobé,

³⁵pwohewii ati ni béé apulie pwo bwohemwo. Be é o bo tai péélé ati, pwohewii [pa apwotau, heme e tahil] a pua ten ne ko a bwehi ikua.

³⁶Geé ûmiê! Ke wâé heme geé pwoitihi te Padué, me ilehi kojaeng pie, me e wéikewé koja ati ni naado na ta na o bo tuie. Ke [é bo pipwodéén kowé] woéo pa Nahi Apulie, na geé cuwo ânebuhung.»

³⁷⁻³⁸[É ha a benaamwon na e mu lérusaléma hen wo lésu] ke e mu taa huâ iitihi he ni tan ati, beme e pacémuni ni apulie. Be lé mu pitapitilé nelang ati he ni acaama, beme lé téneeng. Ke me babwén, ke e mu mwojuia ngemwo pwo a juwole ko ni Olivier, ke e mu lang heme bwén.

Luka 22

E icu lésu wo Judas

Mataio 26.1–16; Maréko 14.1–2; Ioane 11.45–53

¹Caa é mwonus a tan ubwo te lépwo *Juif, na pii kon pie a tan ko *Pacika, a tan na lé eni a pwoloa na te tice nyaa ten.

²Ke wo lépwo caa te lépwo *apwoâpwailo, me lépwo *dotéén ko patén, ke lé pihane ace bwopwonan beme lé taunu lésu. Kehe icehi ana mwotilé ko ni apulie. [Be te junihe hiwon nina lé mu ko lésu.]

³Ke é ha a benaamwon naa, ke wo *Caatana, ke e te taa kuti ko Judas Iscariot, pa céiu béé lépwo ¹² *apostolo te lésu.

⁴Ke e engen, ke e â too lépwo caa te lépwo apwoâpwailo, me lépwo caa te lépwo awéihi *mwaiitihi. Ke e pii telé pie, me e bo patupwo lésu ne telé.

⁵Ke lé te junihe pipwodéén kuti, ke lé pii ten pie, me lé bo ne ten ce mwani.

⁶Ke é alechen, ke e pihane pwaaden, ité koja a pubu apulie, beme e icu lésu telé.

A piwiinaado te Padaame

Mataio 26.17–30; Maréko 14.12–26; 1 Korénit 11.23–25

7 E caa tuie a bécéiuhe tan ko ‘pieni pwoloa tice nyaa ten’, a tan na lé mu taunuhi a nahi muto me de a Pacika.

8 Ke wo lésu, ke e patupwo nge *lérusaléma Pétérú me loane, ke e pii telu pie: «Geu mi â ha a pwomwo ubwo, ke geu piwâam ko a wiinaado tenye ko Pacika.»

9 Ke lu tahimwoeng pie: «É wé he celi nimem me genye piwiinaado nelang?»

10 Ke e hegi ne telu pie: «Mepie geu â taa ha a pwomwo ubwo, ke o pitapitikewé me pa apulie na e pé a mwotabe, ke geu âcéin. Ke me e â taa ha a mwa,

11 ke geu pii te pa eapwihin lang pie: “E tahimwohibé wo pa apipune teme pie, e wé ace nemwa, celi me geme o pieni ibuhi ne hen a wiinaado ko a Pacika?”

12 «Ke e o habwii teu a céiu nemwa na e ko miiden, a nemwa ubwo na caa pipwopweehi. Ke geu piwâamihi a wiinaado tenye nelang.»

13 Ke nebwén, ke lu engen wo loane me Pétérú, ke lu te tai tooli pwohewii ana e pii telu wo lésu. Ke lu piwâamihi a wiinaado ko Pacika.

A pwoloa me a tabe megele

14 É he babwén, ha a benaamwon na lé piwiinaado hen, ke lé tebwo pwo taap wo lésu me lépwo 12 apostolo ten.

15 Ke e pii telé pie: «Caa bwolihi na é ucéihi a benaamwon ce, me nye piyii ibuhi a wiinaado ko Pacika, ânebuhe a bwo mu he ni picani tong.

16 Be é pii tewé pie: O time é bo uce wii mwo a wiinaado ce me wogewé [ne éni pwo bwohemwo]. É bo wiinaado mwo ne ha a *Mwametau te Padué, hemepie é bo panebwénihi a penem [ko a ju Pacika].»

17 Ke e pé a mwoûdu ko tabe megele. Ke e pwo-olé te Padué, ke e pii telé pie: «Geé pé, ke geé piûdu hadeniiwé.

18 Be é pii tewé a juju pie: O caa time é bo uce ûdu mwo ace tabe megele [ne éni pwo bwohemwo] dieli ha ace tan celi e bobe ne a Mwametau ten wo Padué.»

19 Ke e pé a pwoloa, ke e pipwo-olé te Padué. Ke e ebii, ke e pwopatihi ne kolé, ke e pii telé pie: «Ani, ke a ééng na é patupwo me dewé. Geé pwo ani beme geé pipaniimiéo.»

20 É alecehe a piwiinaado, ke e pé ali mwoûdu ko tabe megele, ke e pii telé pie: «A mwoûdu ce, ke a inenaado ko a *piapwo na mwo coho, na e pwo wo Padué ko a cewéhung na o caa téé. [Be o wonaa a bwo ne a péém ne ha awiemewé me weeng.]»

E pacihelé mwo he lé piwiinaado

Mataio 26.20–35; Maréko 14.17–31; Ioane 13.21–38

²¹⁻²² [E pii telé mwo pie]: «Wâé heme é mele, woéo pa Nahi Apulie, beme pacuwohi a bwo niimihinaado te Padué ha atabuhi kon. Kehe wo pa apulie na e pi-icuéo, ke o te junihe pwoééhen! Ke geé alih, wogewé lépwo bééng, be teko e pelenyne ne éni, be nye teko wiinaado me weeng.»

²³ Ke [lé téethi a pwooti naa] wo lépwo acémun den, ke lé caa tabuhi pitahimwolé pie: «He woo celi e bo pwo anaa?»

Geé pwo me piwahin gewé pwohewiiéo

²⁴ É alechen, ke lé tabuhi pipééle, be lé pihane pace apulie celi piubwo nang ne pelelé.

²⁵ Ke e pii wo lésu pie: «É ne pele ni béisna time uce ni apulie te Padué, ke lé caaite ni apulie wo lépwo daame me lépwo apihuô. Ke lé pipwo me ubwo jélé. Ke nimelé me nye tee pipaunulé, me pipwo-olé telé taaci.

²⁶ Kehe wogewé, ke geé nemwo pwohewiié! Be wo pana piubwo nang ne hadeniiwé, ke wâé heme e pwohewii pa cuwo nahi ewa. Ke wo pa apihuô, ke wâé heme pwohewii pa eabwé.

²⁷ «Be [é ne pele ni apulie pwo bwohemwo, ke] wo pa daame pana piubwo nang, ke e te tebwo pwo taap, ke lé ne me e wiinaado wo lépwo eabwé ten. Kehe geé téne, time uce wonaa ne ha awiemenye. Be é caa â eabwé tewé.

²⁸ «Ke wogewé na geé mu pelong he é mu he ni picani me ni téé.

²⁹ Ke é bo ne tewé a Mwametau na e caa ne tong wo Caa tong.

³⁰ Ke genye bo piwiinaado ibu me woéo. Ke geé bo tebwo pwo ni atebwo te lépwo daame, beme geé o pihuô te ni ¹² pwomwoiu *Isaraéla.»

Go bo piwotétaa kong, go Pétérú

³¹ E biteeng wo lésu ne ko Simon Pétérú, ke e pii pie: «Go téne! E ilehi wo Caatana pie, me e tai tacebwénikewé, [wogo me lépwo béis] ke me e pwo me pinekepé ni pwonimewé ha ace céiu benaamwon.

³² Kehe woéo, ke é caa pwoitihi me dem, ke é ilehi pie, me time go uce patieden a céhi tem. Ke mepie go mwojuia mwobé céiiéo, ke go pamwoiu lépwo ju béis ce.»

³³ Ke e hegi ne ten wo Pétérú pie: «Ûhu go Padaame! Te jan ne kong mwo me é mu he ni picani pwohewiiko, heme é ne he karépu, ai heme nyu tai mele!»

³⁴ Ke e pii ten wo lésu pie: «Uhuu, go Pétérú, be é pii tem pie: É jenaa, ânebuhe a bwo to te a ja, ke o caa ocié go ko piwotétaa kong pie, time go uce temehiéo.»

Geé pipwopweekewé ne ko pa!

³⁵ E pii mwo wo lésu te lépwo acémun den pie: «É he li é pahedekewé [beme geé â patemehi a Pwooti Wâé] ke te tice mwani, me éele, me dihibwaawé celi geé pé céiwé, ke kona pwo ce naado celi tice tewé?» Ke lé hegi ne ten pie: «Ûhu.»

³⁶Ke e pii telé pie: «Kehe icehi ana é jenaa ni, ke é pii tewé pie, wâé heme geé pé ce mwani me ce éelele tewé! Ke me pie tice teua tewé, ke wâé heme geé icuhi ni epwénewé, beme o pwocuhin kon.

³⁷[Be lé o caa pwotahi ne kong, pwohewiin hemepie woéo, ke pace apulie ta.] Be pwo a céiu pwooti kong na tii ne he ni tii iitihi, pie: *Lé pwo me e pwocuhinaado; be lé pii pie, pa apwotahinaado.* Ésaïe 53.12 Ke e o caa te cuwo a pwooti naa.»

³⁸Ke lé pii ten wo lèpwo acémun den pie: «Weengi lupwo alo teua, go Padaame!» Ke e hegi ne telé pie: «Caa te jan!»

E pwoiitihi ne pwo a juwole

Mataio 26.36–46; Maréko 14.32–42

³⁹Lé wie mu huâ wo lésu me lèpwo acémun den, ke lé â pwo a juwole ko ni Olivier. Be mu te cemang me lé â lang.

⁴⁰Ke me lé tehene ngen, ke e pii telé pie: «Geé pwoiitihi, beme o te pwo niihewé hemepie tacebwénikewé.»

⁴¹Ke e te ju piâdé kojalé, ke e tidihi jilin, ke e pwoiitihi da céii Padué.

⁴²Ke e pii pie: «Caa, hemepie nimem, ke go pé kojaéo ni picani me ni téé ce! Kehe icehi ana go nemwo pwo ana nimung kon, kehe ana nimem kon.»

{⁴³Ke e pihabwieng den wo pa céiu *âcélo bé mu he miiden, ke e pamwoiueng.

⁴⁴Ke e pwoiitihi mwo wo lésu, be e caa junihe mu he ni picani. Ke a tii kon, ke e caa â pwohewii ni pihicewéle na tupwo ne pwo bwohemwo.}

⁴⁵Ke nebwén, ke e cuwoda, ke e mwojuia mwobé céii lèpwo acémun den. Kehe icehi ana e alihí pie lé teko pule. Be te junihe emaan jélé ko a bwo piwahin jélé.

⁴⁶Ke e pii telé pie: «He geé tee ko pule kona woté? Geé ûmiê, ke geé pwoiitihi, beme o te pwo niihewé hemepie tacebwénikewé.»

Lé imwi lésu

Mataio 26.47–56; Maréko 14.43–52; Ioane 18.3–12

⁴⁷É he e mwo ko pii anaa wo lésu, ke e te ju tehenebé wo Judas, pali céiu bée lèpwoli 12 apostolo ten. Ke lé âbé céin ni apulie na hiwon jélé. Ke e te âde lésu kuti, ke e mwomwaaueng.

⁴⁸Ke e pii ten wo lésu pie: «Judas, kona é mu ko a bwo mwomwaauéo na go icuéo, woéo pa Nahi Apulie?»

⁴⁹Ke me lé alihí ana o pwo wo lèpwo *acémun de lésu, ke lé tahimwoeng pie: «Padaame, he me geme tahi ni teua?»

⁵⁰Ke e pé a teua ten wo pa céiu bélélé, ke e te tahi kuti ole pwo puni pa apenem de pa *daame he lèpwo apwoâpwailo. Kehe icehi ana e te ju tahagéi a jéénen ne pwo jui.

51Ke e pii telé wo lésu pie: «Ûhu! Caa jan! Geé nemwo pwobwonilé!» Ke e pétaa ko ali jééne pali eabwé. Ke caa te ju wâé mwo.

52Ke e pacihe lépwo apihuô te lépwona lé âbé imwieng, lépwo caa te lépwo apwoâpwailo, me lépwo caa te lépwo awéhi mwaiitihi. Ke e pii telé pie: «Woté? Geé âbé pééo ko teua me beba-acuwo, pwohewiin heme woéo pace ataunuhi apulie?!

53Ati ni tan, ke é te mu hadeniiwé ne *huâ iitihi, kehe icehi ana time geé uce imwiéo! Kehe wâé me wonaa! Be ani, ke caa te a benaamwon dewé, a benaamwon na e pihuô na a junuu a melepiing.»

54Ke lé imwi lésu.

E piwotétaa ko lésu wo Pétérú

Mataio 26.69–75; Maréko 14.66–72; Ioane 18.16–27

Lé pé ngen lésu ha a pomwa te pa daame he lépwo apwoâpwailo. Ke e pi- ilipupoeng ngen wo Pétérú.

55E too ni bée awéa pwo napwomwo. Be lé patéi miû, ke lé cadéu. Ke e cuwo ko cadéu pelelé wo Pétérú.

56Ke e alieng ê céiu eabwé he e ko tebwo ko ali miû. Ke e te ju omeeng ehi, ke e pii pie: «Éé, wo paje, ke pa céiu bée lésu mu Nazaret!»

57Kehe icehi ana e piwotétaa wo Pétérú, ke e pii ten pie: «Ûhu! Time é uce temehieng!»

58Ke te ju é alecehe a cuwo benaamwon naa, ke pwo mwo pa céiu apulie na e temehieng mwo, ke e pii ten pie: «Aje, kona time uce wogo pa céiu bée lésu?» Ke e hegi ne ten wo Pétérú pie: «Ûhu!»

59Ke te ju céiu inetéale alechen, ke pwo pa céiu apulie na e caa te ju pii mwoiuhi te lépwo béén pie: «Uhuu! Te a juuju, be pa céiu béén! Be weeng mwo, ke pa aâbé mu Galilé!»

60Ke e hegi ne ten wo Pétérú pie: «Time é uce temehi aceli nimem me go pii!» Ke me e mwo ko pii anaa, ke e to ali ja.

61Ke e biteeng wo lésu, ke e ome Pétérú. Ke e bwo niimihi wo Pétérú ali e caa mi pii ten wo lésu pie: «Ânebuhe a bwo to te a ja, ke o ocié go ko piwotétaa pie, time go uce temehiéo.»

62Ke e te wie kuti mu pwo napwomwo wo Pétérú, ke e te junihe é kuti.

Lé pwotahi ne ko lésu ke lé tautieng

Mataio 26.63—27.2; Maréko 14.53—15.1; Ioane 18.13—14,19—24

63Lé pihooni lésu wo lépwo awéa, ke lé ahieng.

64Ke lé tawii a pwahamiin, ke lé tahimwoeng pie: «He woo na e ahiko? Go cuwoteeke pihane, hemepie wogo ke pace péroféta [celi go temehi ati ce naado]!»

65Ke lé pijeta kon, ke lé pii ten ni naado na te junihe ta.

A mwohuô te lèpwo Juif

66É pwopwometan, ke lé pitapitilé neibu ati ne ni *mwohuô te lèpwo Juif: lèpwo caa te lèpwo apwoâpwailo, me lèpwo apihuô, me lèpwo dotéén ko patén. Ke lé pii [te lèpwo awéa] pie me lé pébé lésu he pwahamiilé.

67Ke lé pii ten pie: «Hemepie wogo ke pa *Mesia, ke go pii teme!» Ke e hegi ne telé wo lésu pie: «Mepie é pii tewé a juuju, ke o time geé uce céhi ne kon.

68«Ke mepie é tahimwokewé ko ace céiu naado, ke o time geé uce hegi ne tong.

69Kehe icehi ana e o caa tuie a benaamwon na woéo pa Nahi Apulie, ke é o bo tebwo *pwo a jui Padué na te junihe pwojunuun [beme é pihuôhi ati ni naado].»

70[Ke me lé téne anaa, ke lé te junihe okéé kuti] ke lé pii pie: «Aje, he wogo ke pa *Naî Padué?» Ke e hegi ne telé wo lésu pie: «Geé mwo teko ju pii!»

71Ke lé pipii pie: «Caa jan! Be geé caa teko téne ana e ko pii. Necu ce bée bwo pipé ne kon. [Be e caa teko pipé ne kon mwo]!»

Luka 23

Wo lésu ne ânebuhe Pilate

Mataio 27.11–26; Maréko 15.2–15; Ioane 18.28—19.16

1Lé tai cuwoda ati ni *mwohuô te lèpwo *Juif, ke lé pé lésu nge céii *Pilate [pa gupéno te lèpwo Roma].

2Ke lé pipé ne ko lésu, ke lé pii pie: «Wo pa apulie ce, ke e pine ânepuni a bele teme, beme lé pwobwoni César, pa daame. Be e pii telé pie, me lé nemwo pwocuhi puni apulie ne ten. Ke e pii pie, weeng, ke pa *Mesia, pa céiu daame ubwo.»

3Ke e tahimwoeng wo Pilate pie: «Kona te wogo kuti pa daame he lèpwo Juif?» Ke e hegi ne ten wo lésu pie: «A juuju a bwopiinen dem.»

Te tice aceli e pwo celi ta

4E biteeng wo Pilate ne ko lèpwo caa te lèpwo *apwoâpwailo, me ni bée apulie na lé mu lang. Ke e pii telé pie: «Time é uce tooli ace watihen me e pwocuhinaado.»

5Kehe icehi ana lé te junihe pii mwoiuhi ten pie: «Uhuu, go te alih, be e pahauli pitih a amu ko ni bwo pipune ten, tabuhi mu Galilé, die éni *lérusaléma!»

6Ke e pii telé wo Pilate pie: «Woté? Geé pii pie, pa apulie Galilé?»

7Ke me lé pii ten pie: «Éa», ke e pawie lésu nge pele *Érode Antipas. Be weeng pana e gupéno ne Galilé, ke, é ha a benaamwon naa, ke e ko pimu lérusaléma.

E cuwo ânebuhe Érode Antipas

⁸E te junihe pipwodéén kuti wo Érode he e ali lésu, be caa te junihe bwolihi a bwo téne nen den a jepule kon. Ke te junihe nimen me e alihí ace *pipwojunuun celi e pwo.

⁹Ke e tahimwoeng mwo ko ni naado na hiwon. Kehe icehi ana time e uce hegi ne ten wo lésu.

¹⁰É he ko wonaa, ke lé tee ko mu lang wo lédwo caa te lédwo apwoâpwailo, me lédwo *dotéén ko patén, ke lé te junihe cihe da me ubwo me pipé ne kon.

¹¹[Caa â emaan Érode kon] ke e pijeta kon, ke e pihoonieng, weeng me ni coda ten. Ke lé pwo me e cuwohe a epwén he daame. Ke lé pawieeng ngemwo céii Pilate.

¹²Tabuhi ha a tan naa, ke lu piténelu wo Érode me Pilate. Be é ânebun, ke lupwona te pita julu.

E cuwo mwo ânebuhe Pilate

¹³Wo Pilate ke e taineibu ni apulie, me ni apihuô telé, me ni caa te lédwo apwoâpwailo.

¹⁴Ke e pii telé pie: «Geé caa pébé pa apulie ce, ke geé pii pie: "E pine ânepuni ni apulie, beme hauli a amu." Ke é ko tahimwoeng kon ne he pwahamiiwé. Kehe icehi ana time é uce tooli aceli ta ne kon, celi jan me é pwocuhinaado ten kon.

¹⁵«Ke wo pa daame Érode Antipas mwo, ke time e uce tooli ace ta celi e pwo, ke e neeng mwobé éni. Be te tice watihen me e mele.

¹⁶Heme wonaa, ke é o te ju pwo me tatieng cehi, ke é o te neeng ngemwo.»

{¹⁷Be te a pane Pilate me e pawie pace céiu apulie mu he karépu, ati he ni jo, ha a tan ko *Pacika.}

Nimelé ko Barabas

¹⁸Ke lé te tai toii da ko miiden ne ni apulie pie: «Pwo me e mele wo pa apulie naa! Ke go pawie Barabas!»

¹⁹Be e mu he karépu wo Barabas, be pa ataunuhi apulie. Ke wo pa céiu bée mwo lédwona lé pwo me lé pwobwoni lédwo Roma ne lérusaléma.

Cemeiteeng ne ko a kuricé!

²⁰Te nime Pilate me e pawie lésu, ke e pwo me e cihe ne ko ni apulie [beme e pacuwolé].

²¹Kehe icehi ana lé bwo te junihe cihe me toii da pie: «Cemeiteeng! Cemeiteeng ne ko a *kuricé!»

²²E mwo ocié ko tahimwolé wo Pilate pie: «Ade ace watihen me e mele? Te tice ace ta celi é tooli ne kon. É o te ju pwo me tatieng cehi, ke é o caa te pawieeng mwo.»

²³Kehe icehi ana lé bwo te junihe pwole, ke lé toii da pie: «Cemeiteeng!»

²⁴Ke e te pihuôhi wo Pilate pie, me e pwo ana nimelé kon.

²⁵Ke e pawie Barabas, pali pwéréca, ke e ne lésu te ni coda ten beme lé taunueng.

Lé pé lésu me lé pwo me e mele

Mataio 27.32–34; Maréko 15.21–24; Ioane 19.17

²⁶É he lé pé ngen lésu wo lèpwo coda roma, ke pitapitilé me pa apulie mu ha a pwomwo ubwo Cirène, na pii kon pie Simon, he e ko mwojuia mwobé mu ha apwoamu. Ke lé wâgo kon, beme e canihi ali kuricé céi lésu.

²⁷Te junihe hiwon ni apulie na lé âcéi lésu. Ke lé é me pihemun ni toomwo.

²⁸Ke e biteeng ne kolé wo lésu, ke e pii telé pie: «Léli ewa lérusaléma, geé nemwo é niimiéo, kehe geé pié niimikewé me ni naîwé!

²⁹Be e o caa tuie a benaamwon na geé bo pii pie: “Nihe wâé ne ko ni toomwo na time uce jan me pwo naîlé, me nina time lé uce téele piâbeeble ewa, me nina time lé uce paditihi ewa!”

³⁰«Be [o te junihe ubwo ace bwo mu he ni picani te ni apulie]. Ke o bo nimelé me tupwo ne huîlé ni juwole, beme neduwolé [koja ni téé naa]!

³¹«Be “Me lé cini a acuwo na mwo wamin, ke lé o bo woté ko a acuwo na caa meiu?” [Be lé pwotahi ne kong jenaa, ke lé bo nihe pwotahi ne kowé alece.]»

³²Ke ni coda, ke lé tai pé lésu me lupwo apwotahinaado, beme o tai taunulé.

Lé cemeite lésu ne ko a kuricé

Mataio 27.35–44; Maréko 15.25–32; Ioane 19.18–27

³³Lé pé lésu ngen, ke lé tuie nge ha a duaan na pii kon pie ‘Piipuni Apulie’. Ke lé cemeiteeng ne ko ali kuricé. Ke lé cemeite mwo lupwoli apwotahinaado: wo pa céiu ne pwo juin, ke wo pa céiu ne pwo eaamun.

³⁴Ke e pii te Padué wo lésu pie: «Caa, go pineulé, be time lé uce temehi ana lé pwo.» Ke wo lèpwo coda, ke lé picéi metii ne ko ni epwénen.

³⁵Hiwon ni apulie na lé cuwo lang, ke lé tee tai alihî ati nina e tuie. Ke wo lèpwo apihuô te lèpwo Juif, ke lé pihooni lésu, ke lé pii pie: «E pipii kon pie, pa Mesia! Ke e temehi me e celuimi ni béén, kehe icehi ana time e uce temehi me e piceluimieng mwo!»

³⁶Ke lé te pihoonieng mwo wo lèpwo coda, ke lé pébé céieng a tabe megele na maga,

³⁷ke lé pii ten pie: «Aje, hemepie wogo pa daame he lèpwo Juif, ke go piceluimiko mwo!»

³⁸[Ke lé cemeite ne] pwo punin a eaa acuwo na tii ne kon pie: PA APULIE CE, KE PA DAAME HE LÉPWO JUIF.

³⁹Ke mepwo wo pali céiu apwotahinaado li cemeiteeng ne ha a céiu duaa lésu, ke e te junihe pitaahieng, ke e pii ten pie: «Woté go paje? Go pii pie, wogo pa Mesia. Ke go piceluimiko mwo, ke go celuimikemu mwo!»

⁴⁰Kehe icehi ana e hegi ne ten wo pali béén li e mu ha ali céiu duaa lésu, ke e pii ten pie: «Wogo, ke go pwocuhinaado pwohewii pa apulie naa. Ke he time uce mwotiko ko Padué?»

⁴¹Go te téne, be te mwomwon ne konyu a bwo pwocuhinaado tenyu, be lupwo apwotahinaado. Ke hemepwo é ne kon, ke te tice aceli e pwotahi!»

⁴²Ke e pii te lésu pie: «Au, lésu, go bo niimiéo heme go caa tebwo ha a Mwametau tem.»

⁴³Ke e hegi ne ten wo lésu pie: «É pii tem a juuju pie: É jenaa ni, ke wogo pelong ne ha amu tong na e hen a péém.»

E mele wo lésu

Mataio 27.45–56; Maréko 15.33–41; Ioane 19.28–30

⁴⁴⁻⁴⁵É he te ju goahen ehi, ke te ju melepiing ati ha amu, die ko cié inetéale alecehe a goahen. Ke te tie kuti a mwaanu [na capuhi bwonihi a duaan na junihe iitihi] ne *huâ iitihi.

⁴⁶Ke e cihe da me ubwo wo lésu pie: «Caa, é ne mwo a mulihung he naatiim!» Psaume 31.6 Ke ele a nenehen.

⁴⁷Ke me e alahi a bwo mele ten wo pa caa te coda roma, ke e pipaunu Padué, ke e pii pie: «Te a juuju pie, wo pa apulie ce, ke te tice ta celi e pwo!»

⁴⁸Ke tai ni apulie na lé mu lang, ke lé alahi ni naado na tuie, ke lé mwojuia mwo he nihe téé ni pwonimelé.

⁴⁹Lé mu lang mwo ati nina lé temehi lésu, ke ni toomwo na lé âbé céin mu Galilé. Ke lé tee cuwo ité, ke lé omehi a bwomune ni naado.

Neeng he iitihi

Mataio 27.57–61; Maréko 15.42–47; Ioane 19.38–42

⁵⁰⁻⁵¹Pwo pa céiu apulie na pii kon pie Josef, pa apulie mu Arimaté ne *Judé. Pa apulie na wâé me mwomwon nang. E teko mwoiu ko ucéihi ace bwo tuiebé na a *Mwametau te Padué. Pa apulie ha a mwopitautinaado te lèpwo Juif, kehe icehi ana time e uce mu he nina lé pwo te lésu wo lèpwo béén.

⁵²Ke e â pele Pilate, ke e ilehi a éé lésu.

⁵³Ke e neeng ole mu ko a kuricé, ke e tawiieng ko a mwaanu. Ke e neeng ha a pwon na lé ini ne ha a péi, é he na mwo te tice celi lé nelé lang.

⁵⁴Ati ni naado naa, ke pacuwohi he paciile, ha a tan ânebuhe a *tan iitihi te lèpwo Juif. A paciile, ke lé pipwopweehi a piwiinaado ko a tan iitihi. Be o caa tabuhi a tan iitihi.

55Lé toomwo na lé âbé mu Galilé me lésu, ke lé âcéi Josef, ke lé alihí he na neduwo lésu nelang.

56Ke lé mwojuia ngemwo, ke lé pwopweehi ni tabe ûde me de a éé lésu. Ke lé mwaale ha a tan iitihi, pwohewii ana pii ne he ni patén.

Luka 24

E mulie cemwo wo lésu

Mataio 28.1–10; Maréko 16.1–8; Ioane 20.1–10

1É he pwoiitihi, he mwo te ju acaama, ke lé â he iitihi wo léli toomwo. Ke lé pé ngen ni *huile* me ni tabe ûde na lé caa pipwopweehi.

2Ke lé tooli ali péi he caa papitibehi mu ânebuhe ali mwa péi.

3Ke lé taa hen, kehe icehi ana time lé uce tooli a éé Padaame lésu.

4É he lé mwo ko pitahimwolé ko aceli e tuie, ke lu te âbeetilé kuti wo lupwo apulie na alo julu, na pwomelaa ni epwénelu.

5Ke te junihe mwotilé, ke lé miibule [be time uce jan me lé omelu]. Kehe icehi ana lu pii telé pie: «É mu ko ade na geé hane hadenii nina lé mele pana e caa mulie cemwo?»

6{Caa time uce e éni, be e caa mulie cemwo!} He geé te piniiimihi a bwo cihten ne kowé he e mwo mu Galilé?

7Be li e pii pie, weeng pa Nahi Apulie, ke o neeng te lépwo apulie na ta jélé, beme lé cemeiteeng ne ko a *kuricé, ke e bo mulie mwo ha a bécéhe ni tan alechen.»

8Ke wo léli toomwo, ke lé bwo piniiimihi ana e caa pii telé wo lésu.

9Ke lé mwojuia cemwo mu ko a bwomu, ke lé patemehi ati ninaa ne te lépwo 11 *apostolo, ke ati ni béé apulie te lésu.

10Lé toomwo naa, ke wo Maria mu Magdala, ke wo Jeanne, me Maria ê nyaa te Cang, ke ni béé toomwo na lé mu pelelé. Kehe icehi ana he lé piuti a jepule naa ne te lépwo apostolo,

11ke time lé uce mwomwolé, be lé niimihi pie lé pihaamilé.

12Kehe e cuwoda wo Pétérú, ke e téte nge ko a bwomuhe lésu. Ke e pioole da, ke e te ju alihí ni mwaanu neole pwo bwohemwo. Ke e mwojuia ngemwo pelen, ne ha a bwo emegéi nan ne ko ana e tuie.

E pihabwieng ne pwo pwaaden Émaüs

Maréko 16.12–13

13Mwo te é ha a tan naa, ke lu ko â he pwaaden wo lupwo alo béé lésu, beme lu â ha a mwopopwaalé Émaüs, alo ni inetéale mulang die *lérusaléma.

¹⁴⁻¹⁵É he lu ko â he pwaaden, ke lu tee ko picihe ko nina e tuie [ne ko lésu]. É he lu mwo ko wonaa, ke e piâbé mwonulu wo pa céiu apulie, ke lé tai piengen ibu. Te wo lésu kuti,

¹⁶kehe time lu uce ali temehieng.

¹⁷E pii telu pie: «He ace de celi geu ko picihe kon bé he pwaaden?» Ke lu â cuwo ha a bwo piwahin julu.

¹⁸Ke wo pa céiu na pii kon pie Kléopas, ke e hegi ne ten pie: «Kona time go uce temehi ana tuie he ni tan ce? Ati ni apulie lérusaléma, ke lé te temehi, ke he te wogo cehi?»

¹⁹Ke e tahimwolu pie: «Kona ade celi e tuie?» Ke lu hegi ne ten pie: «Ana e tehenebé ne ko lésu mu Nazaret, pana pa péroféta na e piwéden. Be te junihe pwojunuun ne he ni penem den, ke é ne he ni pwooti ten ne ânebuhe Padué, ke é ne ânebuhe ni apulie.

²⁰⁻²¹Ke geme céhi pie me weeng pa *Mesia, pana e bo celuimi a bele *Isaraéla. Kehe icehi ana wo l épwo apihuô tenye, ke wo l épwo caa te l épwo *apwoâpwailo, ke lé neeng beme cemeiteeng ne ko a kuricé. Ke caa cié ni tan alecehe a bwo mele ten jenaa.

²²⁻²³«Ke é jenaa, ke lé âbé ni bée toomwo mu hadeniime, ke lé [piuti a jepule na e] pwo me geme téetih. Be lé pii pie, lé â die ko a bwomuhe lésu he mwo ju acaama, ke time lé uce tooli a één. Ke pwo lupwo *âcélo na lu âbeetilé, ke lu pii telé pie, e caa mulie mwo wo lésu!

²⁴Ke wo l épwo bén mu kome, ke lé â ko a bwomuhen, ke lé tooli ni naado pwohewii nina lé pii ne ni toomwo; be te a juuju pie, tieden a éé lésu!»

E hegi ne telu

²⁵Ke e pii telu wo lésu pie: «[Au, mwolikewé!] Be te tice aceli geé temehi! Junihe bwolihi me geé céhi ne ko nina lé pii wo l épwo péroféta ânebun!

²⁶Be lé pii pie, o wâé heme e mu he ni picani wo pa Mesia, ânebuhe a bwo habwii na a bwo ubwo na a wâé ten.»

²⁷[Ke é he lé ko â he pwaaden] ke e patemehi telu ati nina tii ne kon ne he ni tii iitihi. Be e tabuhi mu ko ni tii te *Moosé, die ko ni tii te l épwo péroféta.

²⁸Nebwén, ke lé piâmwonuhi a mwopopwaalé na me lu â hen. Ke wo paje, ke e pwo me e engen kojalu.

²⁹Kehe icehi ana lu cuwokon, ke lu pii ten pie: «Ûhu, go mwo mu pelemu, be caa bwén.» Ke lé taa pwomwo, ke lé mu lang.

Lu temehieng he e ebii a pwoloa

³⁰É he lé ko mu pwo taap, ke e pé a pwoloa wo paje, ke e pwoiitihi ne kon. Nebwén, ke e ebii, ke e ne telu.

31Ke te tehi kuti ni naamiilu, ke lu temehieng; kehe icehi ana te ju pwo é tieeng ne ânebuhelu.

32Ke lu pipii telu pie: «Wii! Te junihe ité kuti a pipwodéén na e mu he ni pwonimenu, he e patemehi tenyu bé lang he pwaaden ni tii iithi!»

33Ke lu te cuwoda kuti, ke lu epin ko mwojuia ngemwo lérusaléma. Ke lu too lépwo **11** apostolo me lépwo bélélé he lé teko pimu ibu.

34Kehe icehi ana woélé, ke lé mi pii telu pie: «Éé! E caa mulie mwo wo Padaame! Be e alieng wo Simon Pétérus!»

35Ke wo lupwoli apulie mwo, ke lu uti telé ana toolu nge he pwaaden. Ke lu pii mwo pie: «Gemu te temehieng kuti he e ebii a pwoloa!»

E pihabwieng de ni acémun den

Mataio 28.16–20; Maréko 16.14–18; Apostolo 1.6–8

36É he lu ko wonaa a bwo uti nen, ke e te pihabwieng kuti ne ha awiemelé wo lésu, ke e pii telé pie: «Bwocu tewé! Ke adéikewé!»

37Ke te junihe mwotilé kuti, be lé niimihi pie lé alahi ace duéé.

38Kehe e pii telé pie: «É mu ko ade na mwotikewé ke pihauli ni pwonimewé? É mu ko ade na time geé uce céhi pie woéo?»

39-40Ke e habwii telé ni in me ni an, ke e pii telé pie: «Geé alahi ni ing ke ni ang, ke geé ti kong, be te ju woéo kuti! Be a jenenaado ke te tice mehieng, ke te tice duun!»

41Ke lé te junihe téethi ninaa, ke piwâénimelé, kehe icehi ana time lé uce téele mwomwohi ehi, be mwo te junihe emegéi nalé. Ke e pii telé wo lésu pie: «Te pwo celi me nye wii ne éni?»

42Ke lé ne ten a me-ikua na cini.

43Ke e wii ne he pwahamiilé.

E tehi a bwo temehi nen delé ni tii iitihi

44Ke e pii telé pie: «Geé te niimihi ali é pii tewé he li é mwo tee mu pelewé, pie: Wâé heme panebwénihi ati nina lé tii ne kong wo Moosé ke wo lépwo péroféta, ke é ne ha a tii *Psaumes.»

45Ke e tehi ni bwo temehi ne ni tii iitihi telé.

46Ke e pii telé pie: «Caa te tii ne he ni tii iitihi pie, e o mu he ni picani wo pa Mesia, [ke e o mele]. Kehe e o mwojuia cemwo mu hadenii ni amele ha a béciéhe ni tan alechen.

47«Ke [é pahedekewé, beme geé] pipatemehi te ati ni bele, tabuhi mu lérusaléma, a pwooti ko a bwo pininim. [Ke geé pii telé] ne he niing pie: “Geé bitekewé, ke geé pitaatééhi ni mulihewé, ke e bo pineuhi ni ta pwo tewé wo Padué!”

⁴⁸ «Be te wogewé ni *apajuujuhi na ati ninaa.

⁴⁹ Kehe geé mwo te ju mu éni ha a pwomwo ubwo, ucéihi a junuu Padué. Be é bo nebé ne huîiwé a [*Jenen litih] be weengaa ana e caa mi pii wo Caa tong.»

E taa he miiden kojalé

Maréko 16.19–20; Apostolo 1.9–11

⁵⁰ E pé lépwo acémun den wo lésu nge ha a céiu duaan ko a Bétani, ke e pwii ni in, ke e adéilé.

⁵¹ He e ko adéilé, ke e engen kojalé, ke e céieng da he miiden [wo Padué].

⁵² Ke lé pipaunueng. Ke é alecehen, ke lé mwojuia ngemwo lérusaléma he lé te junihe pipwodéén.

⁵³ Ke lé tee mu *huâ iitihi téteda, ke lé tee pipaunu ke *adéi Padué.

Ioane

Ioane 1

A pwooti na e pé a éé apulie

¹ Ha atabuhi kon, ke a Pwooti. Ke a Pwooti, ke e pele Padué. Ke a Pwooti, ke Padué.

² E te mu pele Padué ha atabuhi kon.

³ Tai ni naado ati, ke lé tabuhi mu kon. Te tice celi e tabuhi heme tieeng.

⁴ É mu kon, ke pwo a mulip, a pwéélang te ni apulie.

⁵ E pwéélang ha a melepiing. Ke time e uce hegieng na a melepiing.

A bwo pajuujuhi na a pwéélang

⁶ Wo Padué, ke e pahede pa apulip na pii kon pie loane.

⁷ E âbé beme e *pajuujuhi a pwéélang, beme lé céhi ne kon ne ni apulie ati.

⁸ Time e uce âbé mu kon a pwéélang, kehe e tuie beme e pajuujuhi a pwéélang.

⁹ A pwéélang naa, ke a ju pwéélang na e tuie ne pwo a bwohemwo, beme e pwéélang ko ni apulie ati.

¹⁰ Ke a Pwooti, ke e caa mu pwo a bwohemwo. Ke e tabuhi a bwohemwo wo Padué ko a Pwooti. Ke time lé uce temehieng ne pwo a bwohemwo.

¹¹ E tuie ne pele ni béén, ke time lé uce hegieng.

¹² Nina lé hegieng, ke lé céhi ne ko a niin, ke e ne telé a pihuô beme lé naî Padué.

¹³ Time lé uce âbeele mu ko ana nime pa apulie kon, kehe lé âbeele mu ko Padué.

E pé a éé apulie a Pwooti

¹⁴ Ke e pé a éé apulie a Pwooti, ke e mu hadeniinye, ke ubwo a pwonimen konye. Ke genye caa alihi a bwo ubwo na a wâé ten, a wâé te pa Naîn na te céiu nang, na e âbé mu ko Caa.

¹⁵ E pajuujueng wo Ioane, ke e pii me ubwo pie: «Weeng pana é piieng pie, e bo âbé céing wo pa apulie na te nihe pwonaado ne kon kojaéo, be e caa te mi mu ânebuhung.»

¹⁶ Nye caa tai hegi ati a *adéihi, ko a bwo eânimén denye.

¹⁷ Mepwo é ne ko ni patén, ke e ne tenye mu ko *Moosé. Kehe wo lésu *Kériso, ke a pwaaden ko a *pipwoééhe tice ja kon, ke a *JUUJU.

¹⁸ Te tice pace apulie celi e ali Padué, kehe te pa Naîn na te céiu nang, be e mu ko Caa, ke weeng na e pipatemehieng denye.

Ioane pa apipuu apulie

Mataio 3.1–12; Maréko 1.1–8; Luka 3.1–18

¹⁹Wo lépwo apihuô juif ne *lérusaléma, ke lé pahede lépwo bée *apwoâpwailo me lépwo bée apipenem ko a *mwaiitihi me lé â tahimwo loane pie: «Wogo, ke he woo?»

²⁰Ke time e uce waaneduwahi kolé, kehe e te pii telé pie: «Woéo, ke time uce pa Mesia.»

²¹Ke lé tahimwoeng mwo pie: «Wogo ke he woo? He wogo ke wo péroféta *Élia [na me e mi ânebuhen]?» Ke e pii telé pie: «Ûhu!» Ke lé tahimwoeng mwo pie: «Kona wogo ke he pa Péroféta [na e piieng wo Moosé]?» Ke e pii telé pie: «Ûhu!»

²²Ke lé pii ten pie: «Kona wogo, ke he woo? Go pii teme, beme geme â pii te lépwona lé pahedekeme bé. Kona wogo, ke he go pii pie woté ne kom?»

²³Ke e hegi ne telé pie: «Woéo, ke wo pali e piieng wo péroféta Isaia: Pwo pa apulie ha a da na e toii da pie: “E âbé wo Padaame! Pwopweehi a pwaadeniin!”» Ésaïe 40.3

²⁴Mepwo é ne ko ni apulie na pahedelé ngen, ke lé mu hadeniilé ne ni Farasaio. [Woélé, ke a céiu dihe pwoiitihi te lépwo *Juif.]

²⁵Ke lé tahimwoeng mwo pie: «É mu ko ade na go puu ni apulie, hemepie time uce wogo wo Kériso, ke time uce wogo wo Élia, ke time uce wogo pa Péroféta?»

²⁶Ke e hegi ne telé wo loane pie: «É puu ni apulie ko a tabe, kehe e ha awiemewé wo pa apulie na time geé uce temehieng.

²⁷Weeng na e âbé alechung. Ke time uce jan ne kong me e tuwo ni tai ko ni dihibwaan.»

²⁸Tai ninaa, ke tuie ne Bétani, ko a céiu goon ne Ioridano, he na e pipuu apulie nelang wo *loane pa apipuu apulie.

Pa Nâi Padué wo lésu

²⁹É ha acaama hen, ke e ali lésu wo loane, he e âbé céiieng. Ke e pii pie: «Weengi pa *Nahi Muto te Padué. Weeng na e pétaabwon ni ta pwo te ni apulie pwo bwohemwo.

³⁰Weeng na é caa mi piieng, pie: Pwo pana e bo âbé alechung, na te nihe pwonaado ne kon kojaéo, be e caa te mi mu lang ânebuhung.

³¹«Time é uce mi temehieng ânebun, ke é âbé puu ni apulie ne ha a tabe, beme e patemehieng te lépwo *Isaraéla.»

³²Weengi ana e uti wo loane: «É alihî a *Jenen litihî he e opé mu he miiden pwohewii a meni pwojo, ke e ole huîn.

³³Time é uce mi temehieng. Kehe pana e pahedeéo me é puu ni apulie ko a tabe, ke e pii tong pie: "Pana go bo alih i heme e ole huïn a Jenen litihi, ke weeng pana e bo puu ni apulie ko a Jenen litihi."

³⁴ «É alih i, ke é pajuujuhi pie: Weeng pa *Naî Padué.»

E tode ni acémun den

³⁵ É ha acaama hen, ke e mwo te mu lang wo loane me lupwo acémun den.

³⁶ Ke e ali lésu, ke e pii pie: «Neko ali Nahi Muto te Padué!»

³⁷ Lu caa téne wo lupwo acémun den a bwopiinen naa, ke lu âcéi lésu.

³⁸ E biteeng wo lésu, ke e alilu he lu ko âcéin, ke e pii telu pie: «Geu hanee?» Ke lu pii ten pie: «Rabi (pa apipune), é wé he celi go mu lang?»

³⁹ Ke e hegi ne telu wo lésu pie: «Geu âbé me geu alih i.» Ke lé tai miân, beme lé alih i he celi e mu lang. He babwén ko paa inetéale ko alecehe goahen, ke lé mu lang ha a tan naa.

⁴⁰⁻⁴¹ Wo André, pa céiu bél, ke e â too Simon Pétér, pa âjiénen, ke e pii ten pie: «Gemu caa too pa Mesia [pana pipégalieng].» A bwopiinen pie 'Kériso' [he pwo *grek].

⁴² Ke e pééeng nge céii lésu. Ke e alieng wo lésu, ke e pii ten pie: «Wogo Simon, pa naî Jonas. Bo a niim pie Céfas.» Ai Pétér: a bwopiinen pie 'a péi'.

E tode Filip me Natanaël

⁴³ É ha acaama hen, ke e â Galilé wo lésu. Ke e too Filip, ke e pii ten pie: «Go âbé céing!»

⁴⁴ Wo Filip, ke pa apulie Betsaïda, a mwopopwaalé te André me Pétér.

⁴⁵ E ân wo Filip, ke e too Natanaël, ke e pii ten pie: «Geme caa too pali e piieng wo Moosé ne he ni patén, ke lé cihe mwo kon ne ni péroféta! Wo lésu mu Nazaret, pa naî Josef.»

⁴⁶ Ke e pii ten wo Natanaël pie: «He te jan me e âbé mu Nazaret aceli wâé?» Ke e hegi ne ten wo Filip pie: «Âbé me go alih i!»

⁴⁷ E ali Natanaël wo lésu, he e âbé beniieng, ke e pii ne kon pie: «Weengi pa ju Isaraéla, na te tice pipwohuô kon.»

⁴⁸ E pii ten wo Natanaël pie: «Go temehiéo mu wé?» Ke e hegi ne ten wo lésu pie: «Ânebuhe a bwo todeko te Filip, he go ko mu haahi a majing, ke é caa te aliko.»

⁴⁹ E hegi ne ten wo Natanaël, ke e pii ten pie: «Pa apipune, wogo pa Naî Padué, pa daame Isaraéla!»

⁵⁰ E hegi ne ten wo lésu pie: «Go céihi be he é pii tem pie, é aliko ne haahi a majing? Go bo alih i ce naado celi nihe ubwo koja anaa!»

⁵¹ E pii mwo pie: «É pii tewé a juuju pie: Geé bo alahi a miiden heme tehi, ke lé bo taa ke ole ne ni *âcélo te Padué, huïi pa *Nahi Apulie.»

Ioane 2

A bécéiuhe inenaado ne Kana

¹Alo ni tan alechen, ke lé pwo a piaten ne Kana, a mwopopwaalé ne Galilé. E mu lang wo nyaa te lésu.

²Ke lé te tote mwo lésu me ni acémun den, ne ko a piaten.

³Ke me caa tice tabe megele, ke e pii te lésu wo nyaa ten pie: «Caa tice tabe megele telé!»

⁴Ke e hegi ne ten wo lésu pie: «Nyaa, time uce wogo na me go pii tong aceli me é pwo. Be time uce téele tuie a benaamwon dong.»

⁵E pii te lédwo apenem wo nyaa ten pie: «Geé pwo ati nina e pii tewé.»

⁶E mu lang ni mwotabe péi na 6, beme ni bépiwon de lédwo *Juif, be te a bwomu telé. É he ni pétaapwo mwotabe, ke jan me nye neole hen celi 100 litre.

⁷E pii te lédwo apenem wo lésu pie: «Geé pa ko tabe ni mwotabe ce.» Ke lé pa ke oba.

⁸Ke e pii telé mwo wo lésu pie: «Geé tai, ke geé pé nge céii pa eapwihi piwiinaado.» Ke lé pé ngen.

⁹Ke e nemi a tabe wo paje, ke [e téele, be] caa taatééhi me a tabe megele. Ke time e uce temehi pie, he lé pé mu wé. Kehe lé te temehi cehi ne ni apenem. Ke e tote pa apiaten,

¹⁰ke e pii ten pie: «Tai ni apulie, ke lé mi pipatihi a ju tabe megele, ke ana time uce ju wâé, ke lé bo ne heme lé caa nihe ûdu wo lédwo ajelu. Kehe wogo, ke go patihi a ju tabe megele, die ha a benaamwon ce!»

¹¹Weengaa a bécéiuhe *inenaado na pwojunuun na e pwo wo lésu. Anaa, ke e tuie ne Kana ne Galilé. Be e habwii a bwo ubwo na a wâé ten, ke lé céihi ne kon ne ni acémun den.

¹²Alechen, ke lé ole Kapernaüm me nyaa ten me ni ciéén, ke ni acémun den. Time uce ju hiwon ni tan na lé mu lang hen.

E peni lédwo api-icu mu ha a mwaiitihi

{Mataio 21.12; Maréko 11.15; Luka 19.45}

¹³Caa e mwonu a Pacika te lédwo Juif: [a *pipwodéén ko a bwo celuimilé mu *Aigupito]. Ke wo lésu, ke e taa *lérusaléma.

¹⁴E taa ha a *mwaiitihi, ke e too lédwo a-icuhi paaci, me muto, me meni, ke lédwo ataatééhi mwani, he lé ko tebwo pwo ni taap telé.

¹⁵Ke e pwo a bwaliwota, ke e cibéélé mu ha a mwaiitihi me ni muto ke paaci. Ke e tahi taabwon ni mwani te lépwo ataatééhi mwani, ke e puwo ni taap.

¹⁶Ke e pii te ni a-icuhi meni pie: «Geé pétaabwon ninaa mu éni! Geé nemwo pé a mwa te Caa tong me a mwopi-icu tewé!»

¹⁷ Ke lé niimihi ne ni acémun den a pwooti na caa te tii ne he ni *tii iitihi pie: *Nihe ubwo a pwonimung ko a mwaiitihi tem. Psaume 69.10*

A ocine ko a bwo mulie cemwo ten

¹⁸Ke lé pii ten wo lépwo apihuô juif pie: «Ade ace inenaado celi go pwo, beme habwii teme pie te pwo mwomwon dem me go pwo anaa?»

¹⁹ E hegi ne telé wo lésu pie: «Geé tatii taabwon a mwaiitihi ce, be é he na cié ni tan, ke é bo pacuuli mwo.»

²⁰Lé pii ten wo lépwo Juif pie: «Lé pacuuli a mwaiitihi ce he na 46 ni jo, ke he wogo, ke é he na cié ni tan, ke go bo pacuuli?»

²¹Kehe a mwaiitihi na e cihe kon, ke a één.

²²Ke é he e caa mulie cemwo mu ha amele, ke lé niimihi mwo nina e caa pii telé ne ni acémun den. Ke lé céhi ne ko nina e pii ne ni tii iitihi, ke é ne ko a pwooti te lésu.

E te temehi ni pwonime apulie

²³ É he ni tan na e mu lérusaléma wo lésu ne ko a Pacika, ke hiwon nina lé céhi ne kon, he lé alihî ni inenaado na pwojunuun na e pwo.

²⁴Kehe time e uce mwomwolé, be e te tai temehilé ati.

²⁵Ke time uce a junado ne ten heme lé piuti ten ni bwomu te ni apulie, be e te temehi ati ni pwonime apulie.

Ioane 3

Iésu me Nikodème

¹ Pwo pa apulie na a niin pie Nikodème, pace bée ni *Farasaio, ke pa apihuô te ni *Juif.

²Ke e âbé too lésu he bwén, ke e pii ten pie: «Pa apipune, geme caa temehi pie wogo, ke pa apipune na e neko bé wo Padué. Te tice pace apulie celi e pwo ce inenaado celi pwojunuun pwohewiiko, heme time e uce mu pelen wo Padué.»

Wâé heme geé âbeele mwo

³ Ke e hegi ne ten wo lésu pie: «É pii tem a juuju pie: Te tice pace apulie celi e alihî a *Mwametau te Padué, heme time e uce âbeele mwo.»

⁴Ke e pii ten wo Nikodème pie: «He e o woté ko ace bwomunen me e âbeeble mwo, heme caa ukéiu nang? Te jan me e mwojuia ne mwo tina nyaa ten, ke me e bo âbeeble mwo?»

⁵Ke e hegi ne ten wo lésu pie: «É pii tem a juuju pie: Te tice pace apulie celi e taa ha a Mwametau te Padué, heme time e uce âbeeble mu ko a tabe me a *Jenen litih.

⁶Nina lé âbeeble mu ko pa apulie, ke e te mu kolé a mulie pwo bwohemwo; ke nina lé âbeeble mu ko a Jenen litih, ke e te mu kolé a Jenen litih.

⁷Go nemwo téetih ana é pii tem: Wâé heme geé âbeeble mwo.

⁸«A dan, ke e cuu nge he na te nimen me e cuu ngelang, ke go téne a tihin. Kehe time go uce temehi he celi e âbé mulang, ke é he celi me e â lang. Wonaa ni apulie na lé âbeeble mu ko a Jenen litih.»

O pieti da pa Nahi Apulie

⁹Ke e tahimwoeng wo Nikodème pie: «Woté ace bwopwon?

¹⁰Ke e hegi ne ten wo lésu pie: «Wogo pa apipune na lé nihe pipaunuko ne ha amu *Isaraéla, ke time go uce temehi ninaa?

¹¹É pii tem a juuju pie: Geme pii ni naado na geme te temehi. Geme uti ni naado na geme alih. Ke time geé uce hegi nina geme uti.

¹²Me é pii tewé ni naado na e pwo bwohemwo, ke time geé uce céhi ne ko nina é pii. Kona hemepie é bo cihe tewé ko ni naado na e he *miiden, ke geé bo woté ko ace bwo céhi ne kon?

¹³Te tice pace apulie celi e taa he miiden, kehe te icehi pa Nahi Apulie na e opé mu he miiden.

¹⁴«Wo *Moosé, ke e eti da a bwien toki ko a ba-acuwo, ne ha a da. Ke wâé heme wonaa a bwo eti da pa Nahi Apulie,

¹⁵be me wonaa, ke ni apulie na lé céhi ne kon, ke me etelé a mulie na tice anebwén kon.»

Te junihe eâname Padué tenye

¹⁶«Te nihe eâname Padué ko a bwohemwo, ke e ne pa Naîn na te ju céiu nang, be mepie lé céhi ne kon, ke me time lé uce mele, kehe o etelé a *mulie dieli mwo.

¹⁷Be time e uce neopé pa Naîn beme e tauti a bwohemwo, kehe me e *celuimi a bwohemwo.

¹⁸Pana e céhi ne kon, ke time uce tautieng, kehe pana time e uce céhi ne kon, ke caa tautieng, be time e céhi ne ko a nii pa *Naî Padué na te céiu nang.

¹⁹«A tautinaado naa, ke weengi: Caa tuie a pwéélang ne pwo bwohemwo, kehe nime ni apulie ko a melepiing koja a pwéélang. Be ni penem delé, ke ta.

²⁰Wo pa apulie na e pwo nina ta, ke muhi ten ko a pwéélang. Ke time e uce âbé ne ha a pwéélang, be koli genye bo alihî nina e pwo na ta.

²¹Kehe wo pana e penem ha a juuju, ke e âbé ha a pwéélang, beme nye alihî ni penem den na e pwo mu ko Padué. »

E pii beeti lésu wo loane

²²É alecehe ni pwooti naa, ke lé tai â ha amu *Judé wo lésu me ni acémun den. Ke e mu pelelé, ke e *puu apulie.

²³Wo loane mwo, ke e puu ni apulie ne Aïnon, cebwo Salim, be nihe ubwo a tabe lang. Ke lé âbé me puulé nelang.

²⁴É ha a benaamwon naa, ke mwo time uce ne loane he karépu.

²⁵Ke lé pipééle wo lépwo acémun de loane me pa Juif, mu ko a bwo puu ne ni éélé pwohewii a patén de ni Juif.

²⁶Ke lé â too loane, ke lé pii ten pie: «Pa apipune, e ko puu apulie wo pali e mu pipabéém ne ko a céiu goo a éémwa Ioridano, wo pali go mu pipajuujueng, ke caa hiwon nina lé âcéin.»

²⁷Ke e pii telé wo loane pie: «Pwocoon me e pwo ace céiu naado wo pa apulie, heme time uce ne ten mu he miiden.

²⁸Geé caa te téne he é pii pie, time uce woéo pa *Mesia, kehe woéo pana neéo bé ânebuhen.

²⁹«Wo pana eten ê apiaten, ke pa apiaten. Ke wo pa bée pa apiaten, ke e mu pelen, ke e tabemieng, ke piwâénimen heme e téne a patin. Pwohewii ne kong, be piwâénimung. Ke é jenaa, ke hején a bwo piwâénimung.

³⁰Wâé heme piubwo nang da, ke me piwahin jo ole.»

Wo Pana e opé mu he miiden

³¹Wo pa apulie na e âbé mu he miiden, ke te nihe e daaité koja ni apulie ati. Ke pana e âbé mu pwo bwohemwo, ke te pa apulie pwo bwohemwo. Ke e te pwo a bwo cihe pwo bwohemwo. Kehe wo pana e âbé mu he miiden, ke te nihe e daaité koja ni apulie ati.

³²Ke e te uti nina e alihî ke téne. Ke te tice paceli e hegi nina e uti.

³³Be wo pa apulie na e hegi nina e uti, ke e *pajuujuhi pie wo Padué, ke e pii a juuju.

³⁴Be wo pa apulie na e pahedeeng wo Padué, ke e pii ni pwooti te Padué. Be time e uce ne jahi a Jenen litihî wo Padué.

³⁵Ke eânlime Padué Caa te pa Naîn, ke e ne ten ni pihuô ne ko ni naado ati.

³⁶Pana e céhi ne ko pa Naîn, ke eten a mulie na tice anebwén kon. Paceli time uce nimen me e céhi ne ko pa Naîn, ke time o uce eten a mulie na tice anebwén kon. Kehe o mu huîn a okéé te Padué.

Ioane 4

Iésu me ê toomwo Samari

¹⁻² Lé téne wo lèpwo *Farasaio pie, caa hiwon ni *acémun de lésu, ke e puu ni apulie na hiwon koja Ioane. (Kehe icehi ana time uce wo lésu na e puu ni apulie, kehe te ni acémun den.) É he e téne anaa wo lésu,

³ke e engen mu *Judé, ke e mwojuia ne mwo Galilé.

⁴Ke wâé heme e pitahagéi a amu *Samari.

⁵Ke e tuie nge ha amu Samari, ha a céiu duaan na pii kon pie Sichar, cebwo a apwoamu na e ne wo lakobo te Josef, pa naîn [ha a céiu benaamwon].

⁶E lang a pwomiidu te lakobo. Caa mwaale lésu ko a engen, ke e tebwo ko a jije a pwomiidu. Be caa goahen.

A pwomiidu ko a mulip

⁷⁻⁸Lé â ha a mwopopwaalé wo lèpwo acémun den, beme lé â pwocuhi ce wiinaado telé. Ke e âbé ê toomwo Samari, beme e tai tabe, ke e pii ten wo lésu pie: «He te jan me go ne me é ûdu?»

⁹Ke e pii ten wo êje pie: «É mu ko ade, na wogo pa *Juif, ke go ileéo me é ne ace ûdem, woéo ê toomwo Samari?» Be time uce pibéé ni Juif me ni apulie Samari.

¹⁰Ke e hegi ne ten wo lésu pie: «Hemepie go te temehi a âpipati te Padué, ke wo pana e pii tem pie: “Nebé ace ûdong”, ke é nelang, ke me go ileeng me e ne ace ûdem, ke e o ne tem a tabe mulip.»

¹¹E pii ten êgi toomwo pie: «Pa daame, te tice mwotai tabe tem, kehe a pwomiidu, ke te junihe tebwolu. He é mu wé he celi go o pé mulang a tabe mulie na go ko pii?»

¹²He piubwo go koja pa caa teme lakobo, na e ne teme a pwomiidu ce? E caa ûdu mu kon me lèpwo naîn, me ni wota ten.»

¹³Ke e hegi ne ten wo lésu pie: «Mepie go ûdu mu ko a tabe ce, ke o mwo te nimem me go ûdu mwo.

¹⁴Kehe wo paceli e ûdu a tabe na é ne ten, ke o caa time uce nimen me e ûdu, be a tabe na é ne ten, ke pwohewii acaamatabe na e taawie, ke e tee téte dieli mwo.»

¹⁵Ke e pii mwo ten êgi toomwo pie: «Pa daame, go ne tong a tabe naa, beme time bo uce nimung mwo me é ûdu, ke me time é bo uce âmwobé tai éni.»

Woéo pa Mesia na é paciheko

¹⁶Ke e pii ten wo lésu pie: «Go â tote pa aiu hem, ke geu âbé ne éni.»

¹⁷Ke e pii ten êgi toomwo pie: «Te tice aiu hung.» Ke e pii ten wo lésu pie: «Te a juuju ana go pii pie te tice aiu hem.

¹⁸Be nim ni aiu hem, ke wo pana geu mu jenaa, ke time uce pa aiu hem. É ko anaa, ke go pii a juuju.»

¹⁹Ke e pii êgi toomwo pie: «Pa daame, é alihí pie wogo, ke pa *péroféta.

²⁰Ni caa teme, ke lé pipaunu Padué ne pwo a juwole ce, ke geé pii wogewé l épwo Juif pie, a duaan na me genye pipaunu Padué ne hen, ke é *lérusaléma.»

²¹E hegi ne ten wo lésu pie: «Êje, go céihi ne ko ana é pii, be o caa tuie a benaamwon na caa time o uce é pwo a juwole ce, ai é ne lérusaléma, na geé pipaunu Caa.

²²Be wogewé ni Samari, ke geé pipaunu pana time geé uce temehieng. Kehe wogeme ni Juif, ke geme pipaunu pana geme temehieng, be a bwo *celuimi ne ni apulie, ke e âbé mu ko ni Juif.

²³Kehe o caa tuie a benaamwon, ke caa éni, he na lé o pipaunu Caa ne ni apulie, ha a *Jenen litihí ke a juuju. Be anaa kuti a pipwoun na nime Caa kon.

²⁴Be wo Padué, ke te a Jenen. Ke wâé heme nina lé pipaunueng, ke lé pipaunueng ne ha a Jenen litihí ke a *JUUJU.»

²⁵Ke e pii ten êgi toomwo pie: «É te temehi pie e o tuie pa *Mesia na pii kon pie Kériso. Hemepie e bo tuie, ke e bo patemehi tenye ati ni naado.»

²⁶E pii ten wo lésu pie: «Woéo kuti pana é ko cihe tem.»

E piieng te ni béén ê toomwo

²⁷É he lu mwo ko picihe, ke lé tuiebé ne ni acémun den. Ke lé te nihe téele ko ana e pacihe ê toomwo. Ke te tice paceli e tahimwoeng pie: «Ade aceli go tahimwoeng kon?» ai «Ade aceli geu pipii?»

²⁸Ke e necu lang a mwotabe ten êgi toomwo. Ke e â ha a mwopopwaalé ten, ke e pii te ni apulie pie:

²⁹«Geé âbé ali pa apulie na e pii tong ati ni naado na é pwo. Wieli wo pa Mesia?»

³⁰Lé tai wie mu ha a mwopopwaalé telé, ke lé âbé céii lésu.

A ju wiinaado ke a bwo piténede Caa

³¹É ha a benaamwon naa, ke ni acémun den, ke lé wâgo kon, ke lé pii ten pie: «Pa apipune, go wiinaado!»

³²Ke e pii telé pie: «A wiinaado na é wii, ke time geé uce temehi.»

³³Ke lé pitahimwolé ne ni acémun den pie: «He wo paceli e pébé céiieng ce wiinaado?»

³⁴Ke e pii telé wo lésu pie: «A wiinaado tong, ke me é pwo ana nime Padué kon, pana e pahedeéo, ke me é pwo ni penem na e ne tong.

³⁵«Geé mu pii pie: "O mwo paa ni wole, ke o caa a pitii âdaanu." Kehe é pii tewé pie: Geé eti ni naamiiwé, me geé alihí ni apwoamu, be caa a benaamwon ko pitii âdaanu.

³⁶«Wo pana e pitii âdaanu, ke pwo a cemen, ke e taineibuhi ni acehin ne ko a mulie na tice anebwén kon. Be lu tai pipwodéén ibu wo pana e cemi me pana e tii.

³⁷É ko anaa, ke a juuju: "E cemi wo pa céiu, ke e tii wo pa céiu."

³⁸«É pahedekewé me geé â tii âdaanu he na time geé uce penem lang. Lé penem ne ni béén, ke wogewé, ke geé bo uce pitii âdaanu.»

Hiwon ni béén na lé céihi ne kon

³⁹Hiwon ni apulie Samari mu ha a mwopopwaalé naa, na lé céihi ne ko lésu, wonaa mu ko ana e pii wo êgi toomwo pie: «E pii tong ati ni naado na é pwo.»

⁴⁰Lé âbé tooeng ni apulie Samari, ke lé cuwokon me e mwo mu pelelé. Ke e mu pelelé he na alo ni tan.

⁴¹Te nihe hiwon mwo ni apulie na lé céihi mu ko a pwooti ten.

⁴²Ke lé pii te êgi toomwo pie: «Time uce é mu ko nina go pii teme cehi na geme céihi. Be geme caa téne temehi pie te ju weeng kuti pa apulie na e celuimi a bwohemwo!»

E pwo me wâé pa naî pa apihuô

⁴³Alecehe lupwo tan naa, ke e engen mulang wo lésu beme e â Galilé.

⁴⁴Be e caa pii pie: «Wo pa péroféta, ke time lé uce paciitieng ne ha amu ten.»

⁴⁵Ke e âbé ne Galilé, ke lé hegieng ehi nelang. Be lé alihí ati ni naado li e pwo ne lérusaléma ha a tan ko *Pacika, be lé mu lang ha a tan naa.

⁴⁶E mwojuia ne mwo Kana é Galilé, he li e taatééhi nelang a tabe beme a tabe megele. E mu lang wo pace céiu apulie na piubwo nang, pa apihuô te pa daame *Érode. Ke cunu pa naîn ne ha a mwopopwaalé Kapernaüm.

⁴⁷E téne pie wo lésu ke e âbé mu Judé ke e tuiebé Galilé. Ke e âbé beniieng ke e ileeng me e ole, ke me e pwo me wâé pa naîn, be ubwo a cunu kon.

⁴⁸Ke e pii ten wo lésu pie: «Me time geé uce alihí ni *inenaado na pwojunuun, ke time geé o uce céihi!»

⁴⁹Pa apihuô, ke e pii te lésu pie: «Padaame, go ole pelong ânebuhe a bwo mele te pa naîng!»

⁵⁰Ke e hegi ne ten wo lésu pie: «Go âmwo pelem, be caa wâé pa naîm.» E céihi ne ko a pwooti te lésu, ke e ân.

Caa wâé mwo pa naîn

⁵¹É he e mwo ko â he pwaaden, ke lé âbé beniieng ne ni apenem den me lé pii ten pie: «Pa naîm, ke caa wâé nang.»

⁵²Ke e tahimwolé pie: «He ade inetéale celi wâé nang hen?» Ke lé hegi ne ten pie: «É haabwén, ko céiu inetéale ko alecehe goahen, na tieden kojaeng ali pilijing.»

⁵³Ke e temehi wo caa ten pie ha a inetéale naa, na e pii ten wo lésu pie: «Pa naîm, ke caa wâé nang.» Ke lé tai céihi ne ko lésu, weeng me a pomwa ten.

⁵⁴Weengaa a báalohe inenaado na pwojunuun na e pwo wo lésu, he e mwojuia mu Judé ne Galilé.

Ioane 5

E pwo me wâé pa tebwomwa

¹Alecehe a tan naa, ke a *tan ko pipwodéén de ni *Juif. Ke e taa *lérusaléma wo lésu.

²É lérusaléma mwonuhi a Pomwa te ni Muto, ke pwo a mwopiwon, a niin he pwo *ébérus pie Bétesda, na nim ni pomwa kon.

³Ke é he ni mwa naa, ke te nihe hiwon ni cunu na lé pule hen: ni bwi, nina tebwa, ke ni tebwomwa. {Be lé ucéihi a bwo penem na a tabe.

⁴Be e opé wo pa *âcélo, beme e pwo me penem a tabe, he ni bée benaamwon. Ke wo pa bécéiuhe apulie na e ole, heme mwo ko penem a tabe, ke caa te tieden a cunu kon.}

⁵E mu hadenii l épwo apulie naa, wo pana cunu nang he na 38 ni jo.

⁶Ke e alieng wo lésu he e ko pule, ke e te temehi pie caa nihe bwolihi a bwo cunu nang. Ke e pii ten pie: «Nimem me wâé go?»

⁷Ke e hegi ne ten wo pali cunu pie: «Pa daame, te tice celi me lé neéo ole ha a tabe, ha a benaamwon na e ko pipenem a tabe. Ke me é pwo me é ole, ke e caa mi ole wo pace céiu ânebuhung.»

⁸Ke e pii ten wo lésu pie: «Go cuwoda, ke go pé a talihi tem, ke go engen!»

⁹Ke te wâé nang kuti. Ke e pé a talihi ten, ke e engen.

Time uce wâé te l épwo apihuô

A tan naa, ke a *tan iitihi te l épwo Juif.

¹⁰Ke lé pii wo l épwo apihuô juif te pali cunu pie: «É jenaa, ke a tan iitihi, ke iitihi me go pé a talihi tem!»

¹¹⁻¹²Ke e pii telé pie: «Wo pana e pwo me wâé jo, ke e pii tong pie: «Go pé a talihi tem, ke go engen!»» Ke lé tahimwoeng pie: «Wooélé pa apulie na e pii anaa?»

¹³Ke time e uce temehi pie he wooélé. Be wo lésu, ke caa te tieeng hadenii ni apulie na élé lang.

¹⁴Ke é alechen, ke e too pali cunu wo lésu ne ha a *mwaiitihi, ke e pii ten pie: «Go téne, caa wâé go. Kehe go nemwo pwo ce naado celi ta, be koli e bo tooko aceli nihe ta.»

¹⁵Ke e engen wo pali, ke e â uti te ni apihuô juif pie: «Wo lésu na e pwo me wâé jo.»

¹⁶É mu ko anaa, na lé hane lésu ne ni apihuô juif, beme lé pwotahinaado ne kon, be e pwo ninaa ha a tan iitihi.

Piwie lésu me Padué Caa

¹⁷Ke e pii telé wo lésu pie: «Wo Caa, ke e pwo ni naado dieli jenaa. Ke woéo mwo.»

¹⁸É mu ko anaa, ke ni apihuô juif, ke lé hane ace bwopwonen beme lé taunueng; time uce é mu ko ana e pwo ha a tan iitihi cehi, kehe é mu ko ana e pii mwo pie wo Padué, ke pa ju Caa ten, ke e pii mwo pie, piwielu me Padué.

E hegi ne te lépwona lé tautieng Wo Padué na e ne ten a mwomwon

¹⁹E pii mwo telé wo lésu pie: «É pii tewé a juuju pie: Wo pa Naîn, ke pwocoon me e pwo ace céiu naado mu kon. E te pwo ni naado na e alihî heme e pwo wo Caa ten. Ke tai ni naado na e pwo wo Caa ten, ke e te pwo mwo wo pa Naîn.

²⁰Be eââime Caa te pa Naîn, ke e habwii ten ati nina e pwo, ke e o habwii ten ni naado na te nihe ubwo koja ninaa, beme geé téele kon.

²¹Be mepwo wo Caa, ke e pwo me lé mulie cemwo ni amele, ke e ne a mulip. Piwien mwo ne ko pa Naîn, be e ne a mulip ne te lépwona e pipégalilé.

²²«Time e uce tauti apulie wo Caa, kehe e ne a pitautinaado ne te pa Naîn,

²³beme lé tai pipaunueng, pwohewii a bwo pipaunu Caa. Wo paceli time e uce pipaunu pa *Naî Padué, ke time e uce pipaunu Caa na e pahedeeng bé.

²⁴«É pii tewé a juuju pie: Wo paceli e ténedehi a pwootti tong, ke e céihi ne ko pana e pahedeéo bé, ke o eten a mulie na tice anebwén kon. Ke o caa time uce pwocuhinaado ten, be e caa engen koja a mele me e â ha a mulie.»

Lé o piténedeéo wo lépwo amele

²⁵«É pii tewé a juuju pie: E bo tuie a céiu tan, ke caa e éni, ke ni amele, ke lé téne a pwocihe te pa Naî Padué. Ke nina lé ténedehi, ke lé o mulie.

²⁶Be wo Caa, ke eten a mulie, ke pa Naîn, ke te eten mwo a mulie. Te wo Caa ten na e ne ten anaa.»

²⁷«E ne ten mwo a pihuô beme e tautinaado, mu ko ana weeng pa Nahi Apulie.

²⁸Geé nemwo téetihí, be o tuie a benaamwon na tai nina lé caa mele, ke lé o téne a patin, ke lé o mulie cemwo.

²⁹Nina lé pwo ni penem na wâé, ke lé o mulie cemwo ne ko a mulie. Kehe nina lé pwo nina ta, ke lé o mulie cemwo ne ko a pwocuhinaado.»

Lépwo apajuuju pa Nahi Apulie

³⁰[E pii telé mwo wo lésu pie]: «Pwocoon me é pwo ace naado mu kong. É tauti mu ko ana e pii wo Padué. Ke a juuju a tautinaado tong, be time é uce hane ana nimung kon, kehe ana nime pana e neéo bé kon.

³¹«Hemepie te woéo na é piutiéo, ke o te ju piticenaado ne ko nina é pii.

³²Te pwo pa céiu na e pajuujuéo, ke é te temehi pie ana e pii ne kong, ke a juuju.»

Ioane pa apipuu apulie

³³«Geé pahede ni apulie nge céii loane, ke a jepule na e piuti tewé ne kong, ke a juuju.

³⁴«É ne kong, ke time uce a junado ne tong me e pajuujuéo wo pace apulie. Kehe é pii anaa beme celuimikewé.

³⁵Wo loane, ke e pwohewii a mwomiû na nye patéi, ke e pwéélang. Ke nimewé me geé pipwodéén ha a cuwo benaamwon naa, ne ko a pwéélang kon.»

A penem de lésu

³⁶«Pwo ni bépajuujuéo na junihe ubwo koja loane: ni penem na e ne tong wo Caa beme é pacuwoshi. Be lé habwii pie wo Caa na e neéo bé.»

Padué Caa

³⁷«E pajuujuéo wo Caa, be weeng na é pahedeéo bé. Time geé mu uce téne a patin, ke time geé mu uce alahi a pwahamiin.

³⁸Ke time uce e kowé a pwooti ten, be time geé uce céihi ne ko pana e neeng bé.»

Ni tii iithi

³⁹«Geé hane bwoluhi ne he ni tii iithi, be geé niimihi pie geé o tooli ne hen a mulie na tice anebwén kon. Kehe woélé na lé cihe kong!

⁴⁰Ke time uce nimewé me geé âbé céiiéo beme etewé *a ju mulip.

⁴¹«Time é uce hane me lé pipaunuéo ne ni apulie.

⁴²Be é te temehi pie time uce e kowé a pwonime ko Padué.

⁴³É âbé ne he nii Caa tong, ke time geé uce hegiéo. Hemepie e âbé wo pace céiu celi e te piâché mu kon, ke geé o hegieng.

⁴⁴Woté ace bwo céihi tewé, wogewé na geé hegi *a wâé mu ko ni bêewé? Ke time uce nimewé me geé hane a wâé na e âbé mu ko Padué na te céiu nang.

⁴⁵Geé nemwo niimihi pie é o pipé ne kowé ne he pwahamii Caa; kehe wo *Moosé pana e o pipé ne kowé, be geé ne kon a céhi tewé!

⁴⁶ «Be mepie geé céhi ne ko Moosé, ke wielí geé o te céhi ne mwo kong, be e caa cihe kong ne he ni tii ten.

⁴⁷Ke hemepie time geé uce céhi ne ko nina e tii, ke o woté ace bwo céhi tewé ne ko ni pwooti tong?»

Ioane 6

Lé wiinaado ne ni apulie na 5000 jélé

Mataio 14.13-21; Maréko 6.30-44; Luka 9.10-17

¹É alechen, ke e engen wo lésu, ke e hagéi a céiu duaa *jié Galilé, na te pii kon mwo pie a jié Tibériade.

²Ke lé âcéin ne ni apulie na hiwon jélé, be lé alahi ni *inenaado na pwojunuun, he e pwo me wâé ni cunu.

³Ke e taa pwo juwole, ke e tebwo me ni acémun den.

⁴Te ju piéânebuhe a *Pacika, a *pipwodéén de lépwo *Juif.

⁵Ke me e eti ni naamiin wo lésu, ke e ali ni apulie na hiwon jélé na lé âbé céiieng. Ke e pii te Filip pie: «He genye bo pwocuhin mu wé ce pwoloa, beme lé wiinaado ne ni apulie ce?»

⁶E pii anaa, beme e téne aceli me e o pii wo Filip, kehe e caa te temehi ana me e bo pwo.

⁷Ke e hegi ne ten wo Filip pie: «Hemepie genye pwocuhin ce pwoloa ko ni *million*, ke time uce jan me nye ne telé ce cuwo nahi mepwoloa!»

⁸Ke [e â céii lésu] wo pa céiu acémun na pii kon pie André, pa âjiéne Simon Pétérú, ke e pii ten pie:

⁹«E éni pa cuwo nahi ewa aiu, na nim ni pwoloa ten, ke alo lupwo ikua. Kona he o te jan ne ko ni apulie na nihe hiwon jélé? Ûhu!»

E pwo me lé wiinaado

¹⁰E pii wo lésu pie: «Pwo me lé tebwo ati ne ni apulie.» Ha a duaan naa, ke hiwon ni meté, ke lé tebwo ni apulie. Ke âmwonuhi a 5000 ni apulie aiu.

¹¹Ke e pé li pwolua wo lésu, ke e olééhi ne te Padué. Ke e patihí ne ko ni apulie na élé lang. Ke e patihí mwo li ikua ne telé. Ke lé wiinaado dieli â pwoluu jélé.

¹²Caa pwoluu jélé, ke e pii te ni acémun den pie: «Geé tai ni nehi wiinaado, beme te tice celi genye patieden.»

¹³Lé tai ni nehi li pwolua li nim, ke lé paobaanihi ni élele na 12, aleche a bwo wiinaado telé.

¹⁴Ke ni apulie, ke lé alihia inenaado na pwojunuun na e pwo wo lésu, ke lé pii pie: «Pa apulie ce, ke te pa ju Péroféta na me e âbé ne pwo bwohemwo!»

¹⁵Ke e temehi wo lésu pie lé o âbé pééeng beme lé etieng me pa daame helé. Ke e piâ ité kojalé, ke e â taa pwo juwole, he te piweeng cehi.

E engen pwo bwotabe wo lésu

Mataio 14.22–33; Maréko 6.45–52

¹⁶He caa babwén, ke lé ole ko a bajié wo l épwo *acémun de lésu.

¹⁷Caa bwén, kehe time e uce téele â toolé. Ke lé taa pwo ong, beme lé â Kapernaüm.

¹⁸Ke e te nihe tahieng a dan, ke ubwo ni pihijié.

¹⁹Ke lé caa kaatihi a ong he na nim *kilomètre*. Ke lé ali lésu he e engen pwo bwotabe, ke e âbé mwonuhi a ong. Ke te junihe mwotilé.

²⁰Ke e pii telé wo lésu pie: «Geé nemwo pwo me mwotikewé! Be *WoÉO!»

²¹Ke nimelé me lé pééeng pwo ong, kehe lé caa tuie nge he na me lé â lang.

A pwoloa na e ne a mulip

²²⁻²⁴É ha acaama hen, ke lé mwo te mu ko a céiu goon ne li apulie li lé eni ali pwoloa. Ke lé alihia pie te tie lésu. Ke lé te temehi pie time e uce taa pwo ong, be lé caa te piengen cehi ni acémun den. Ke te céiu a ong na e engen.

[É he lé mwo ko haneeng] ke lé tuie ne ni ong bé mu ha a pwomwo ubwo Tibériade. Ke lé taa pwo li ong ne ni apulie, ke lé â Kapernaüm, me lé â haneeng lang.

Hane a pwoloa na e mu dieli mwo

²⁵Ke lé too lésu ne ko a céiu goon. Ke lé pii ten pie: «Pa apipune, he éniile celi go âbé éni?»

²⁶Ke e pii telé wo lésu pie: «É pii tewé a juuju pie: Geé haneéo, time uce é mu ko a bwo alihia nen dewé ni inenaado na pwojunuun na é pwo, kehe é mu ko ana geé eni ni pwoloa, ke pwoluu gewé.

²⁷Geé nemwo penem ne ko a wiinaado na o tieden, kehe geé penem ne ko a wiinaado na e o mu, na e ne a mulip ne pele Padué dieli mwo. A wiinaado naa, ke wo pa Nahi Apulie na e bo ne tewé. Be wo Padué Caa na e ne a pihuô te pa Naîn.»

²⁸Ke lé pii ten pie: «He ade aceli me gême pwo, beme gême pwo ni penem de Padué?»

²⁹Ke e pii telé wo lésu pie: «A penem de Padué, ke me geé céihi ne ko pana e neeng bé.»

A ju pwoloa mu he miiden

³⁰ Ke lé pii ten mwo pie: «Ade ace inenaado celi go pwo me geme alahi, ke me geme céhi ne ko nina go pii? Go pwo de?

³¹ Lé eni a pwoloa ne ha a melé ne ni wathenyé, pwohewii ana caa tii ne he ni tii iitihi pie: *E ne telé a pwoloa mu he miiden me lé eni.* » Psaume 78.24

³² Ke e hegi ne telé wo lésu pie: «É pii tewé a juuju pie: Time uce wo *Moosé na e ne tewé a pwoloa na e âbé mu he miiden. Kehe wo Caa tong. Ke é jenaa ni, ke e ne tewé a ju pwoloa mu he miiden.

³³ Éa, a pwoloa te Padué, ke wo pana e opé mu he miiden, ke e ne a mulie ne pwo bwohemwo.»

³⁴ Ke lé pii ten pie: «Pa apipune, go te cuwo ko ne teme a pwoloa naa!»

Woéo ke pa pwoloa

³⁵ Ke e hegi ne telé wo lésu pie: «Woéo, ke pa pwoloa na é ne a mulip. Wo paceli e âbé céiiéo, ke time o uce menen, ke wo paceli e céhi ne kong, ke time o uce nimen me e ûdu.

³⁶ É caa mi pii tewé pie: Geé aliéo, kehe time geé uce céhi ne kong.

³⁷ Ati ni apulie na e ne tong wo Caa, ke lé âbé céiiéo. Ke time é o uce ne pwomwo paceli e âbé céiiéo.

³⁸ «Ke time é uce opé mu he miiden me é pwo ana nimung kon, kehe me é pwo ana nime Padué, na e neéo opé.

³⁹ Neko ana nime Padué kon, ke me time é uce patieden paceli te ju céiu nang, mu ko ni apulie na e ne tong; kehe me é pwo me lé mulie cemwo ha a Tan Alece.

⁴⁰ Ana nime Caa tong kon: Ke wo paceli e ali pa Naîn, ke me céhi ne kon, ke o ne ten a mulie na tice anebwén kon. Ke é bo pwo me e mulie cemwo ha a Tan Alece.»

Time uce wâé te lépwo apihuô juif

⁴¹ Lé pipii lésu wo lépwo Juif, mu ko ana e pii pie: «Woéo, ke pa pwoloa na é opé mu he miiden.»

⁴² Ke lé pipii mwo pie: «He time uce wo lésu pali naî Josef, li genye te temehi lu nyaa me caa ten? É mu ko ade na e pii pie: “É opé mu he miiden”?»

⁴³ Ke e pii telé wo lésu pie: «Geé nemwo tee pipii apulie!

⁴⁴ Te tice paceli e âbé céiiéo, heme time uce neeng bé wo Caa, pana e neéo bé. Ke me é bo pwo me e mulie cemwo ha a Tan Alece.

⁴⁵ Neko ana e tii wo pa céiu péroféta: *Lé o te tai picaa mu ko Padué. Ésaïe 54.13* É mu ko anaa, na wo paceli e téne Caa, ke e hegi ni pune ten, ke e o âbé céiiéo.

⁴⁶ Te tice paceli e ali Caa, te icehi pana e âbé mu ko Padué.»

Wo pana e céhi ke eten a mulie

47 «É pii tewé a juuju pie: Wo paceli e céhi [ne kong] ke o eten a mulie na tice anebwén kon.

48 A pwoloa na e ne a mulie, ke woéo.

49 Lé eni a *manne* ne ha a melé ne ni caa tewé, ke lé tai mele.

50 Weengi a pwoloa na e opé mu he miiden. Wo paceli e o eni, ke time e o uce mele.

51 Woéo, ke pa pwoloa ko a mulip, na é opé mu he miiden. Mepie pwo paceli e eni mu ko a pwoloa naa, ke e o *mulie dieli mwo. A pwoloa na é ne ten, ke a ééng, na é bo ne, me a mulie ne pwo bwohemwo.»

A ééng ke te a ju wiinaado

52 É mu ko ana e pii wo lésu, ke lé pidaataa kon ne ni Juif, ke lé pii pie: «E o woté ko ace bwopwonon me e ne tenye a één beme a wiinaado?»

53 Ke e pii telé wo lésu pie: «É pii tewé a juuju pie: Mepie time geé uce wii a éé pa Nahi Apulie, ke me time geé uce ûdu a cewéhen, ke o time uce e kowé a mulie.

54 Wo paceli e wii a ééng, ke e ûdu a cewéhung, ke eten a mulie na tice anebwén kon. Ke é bo pwo me e mulie cemwo ha a Tan Alece.

55 Be a ééng, ke te a ju wiinaado; ke a cewéhung, ke te a ju tabe.

56 Wo paceli e wii a ééng ke e ûdu a cewéhung, ke e o mu kong, ke é o mu kon.

57 «E mulie wo Caa na e neéo bé. Ke woéo, ke é mulie ko Caa. Ke wo paceli e wii a ééng, ke e o mulie mu kong.

58 Weengi a pwoloa na e opé mu he miiden. Time uce pwohewii ni wathewé na lé eni a *manne*, ke lé tai mele. Be wo paceli e eni a pwoloa ce, ke e o mulie dieli mwo.»

59 E pii telé ninaa wo lésu ne ha a *mwotapitihi te ni Juif ne Kapernaüm.

Lé ece lésu ni béé acémun den

60 Ke me lé téne ana e pii wo lésu, ke hiwon ni acémun den na lé pii pie: «Te nihe binyi ni pwootti ten. He woo paceli me e tee tabemieng?»

61 Kehe e te temehi pie lé pipieng ko nina e pii, ke e tahimwolé pie: «Woté? Ni pwootti naa, ke te nihe téé ne tewé?»

62 Ke mepie geé ali pa Nahi Apulie heme e taamwo he na e mu lang ânebun, ke geé bo pii pie woté?

63 A *Jenen litih, ke e ne a mulie. Kehe wo pa apulie, ke te tice aceli jan me e pwo. Ni pwootti na é pii tewé, ke e âbé mu ko a Jenen litih, ke e ne a mulip.

⁶⁴Pwo ni béén mu hadeniiwé na time lé uce céhi.» Be e te temehilé wo lésu ha atabuhi kon. Ke e te temehi mwo pana e bo icueng.

⁶⁵Ke e pii ne mwo pwon pie: «É mu ko anaa, na é pii tewé pie: Te tice paceli e o âbé céiiéo, hemepie time e uce neeng bé wo Caa.»

⁶⁶Ke é ha a benaamwon naa, ke hiwon ni acémun den na lé engen kojaeng.

Lé te cumang wo lépwo apostolo

⁶⁷Ke e pii wo lésu te lépwo ¹² *apostolo ten pie: «Ke wogewé, ke time uce nimewé mwo me geé âcéilé?»

⁶⁸Ke e hegi ne ten wo Pétérū pie: «Padaame, he me geme â céii-i? Be te e pelem [cehi] ni pwooti ko a mulie na tice anebwén kon.

⁶⁹Ke geme caa céhi, ke geme caa temehi pie wogo ke wo Kériso, pa *Naî Padué.»

⁷⁰Ke e hegi ne telé wo lésu pie: «Woéo na é pipégalikewé, wogewé ni ¹². Ke pwo pa duéé hadeniiwé!»

⁷¹E cihe ko Judas Iscariot, pa naî Simon, pa béeé lépwo ¹² apostolo. Be weeng pana e o bo icueng.

Ioane 7

E taa lérusaléma ne ko a pipwodéén

¹Alecehe anaa, ke e engen ati ha amu Galilé wo lésu, be time uce nimen me e â *Judé, be lé hane me lé taunueng ne ni apihuô juif.

²Ke caa e mwonus a *tan ko pipwodéén de ni *Juif ko Mwa mwaanu.

³Ke lé pii te lésu ne ni âjiénen pie: «Go engen mu éni, ke go â Judé, beme lé alihi ne ni apulie tem ni naado na go pwo.

⁴Te tice paceli e penem ha aduwo, heme nimen me lé temehieng. Go pwo ni naado na ubwo, ke go pihabwiiko ne te ni apulie!»

⁵Be ni âjiénen mwo, ke time lé uce ju téele céhi ne kon.

Time uce téele a benaamwon dong

⁶Ke e pii telé wo lésu pie: «Time e uce téele tuie a benaamwon dong. Kehe wogewé, ke te é ati he ni benaamwon.

⁷Te tice watihen me lé téétikewé ne ni apulie, kehe woéo, ke lé téétiéo, be é te cuwo ko pii beetihí ni naado na ta na lé pwo.

⁸Geé taa wogewé, ne ko a *pipwodéén naa. Kehe woéo, ke time é o uce téele taa, be time e uce téele tuie a benaamwon dong.»

⁹Ke me e pii telé anaa, ke e mwo te mu Galilé.

¹⁰Kehe icehi ana me lé caa taa wo lèpwo âjiénen ne ko a pipwodéén, ke e bwo te pitaa céilé wo lésu, kehe icehi ana time e uce pihabwieng.

Lé haneeng ni apihuô juif

¹¹Ni apihuô juif, ke lé haneeng ha a benaamwon ko a pipwodéén, ke lé tahimwohi pie: «He e wé naa?»

¹²Lé te nihe piche kon ne ni apulie. Ke lé pii ne ni béén pie: «Pa apulie na wâé nang.» Ke ni béén, ke lé pii pie: «Ûhu! E pwo me lé pipatieden ne ni apulie.»

¹³Ke te tice paceli e cihe pwaatihi ne kon, be mwotilé ko lèpwo apihuô juif.

E pihabwieng ke e pipune

¹⁴Ha awieme a pipwodéén, ke e taa ha a *mwaiitihi wo lésu. Ke e pacémunilé.

¹⁵Lé te nihe téele ne ni apihuô juif, ke lé pii pie: «He e woté ace bwo temehi nen den ni patén, he time e uce cémun?»

E pahedeéo wo Padué

¹⁶Ke e hegi ne telé wo lésu pie: «Ni pune, ke time uce é mu kong, kehe é mu ko pana e neéo bé.

¹⁷Hemepie nime pace apulie me e pwo nina nime Padué kon, ke e o te temehi pie ni pune naa, ke e âbé mu ko Padué, ai e âbé mu kong.

¹⁸Wo pana e te piche mu kon, ke e hane me lé pipaunueng. Ke wo pana e hane me lé pipaunu pana e neeng bé, ke e mwomwon, ke te tice gele kon.»

Wâé heme geé tauti ne ha a mwomwon

¹⁹«Kona time e uce ne tewé ni patén wo *Moosé? Ke te tice paceli e âcehi ni patén mu kowé. Ade ace watihen me nimewé me geé taunuéo?»

²⁰Ke lé hegi ne ten pie: «E kom a iténaado! He woo paceli e hane me e taunuko?»

²¹Ke e hegi ne telé wo lésu pie: «É pwo a penem na te ju céiu [ha a *tan iitihi] ke geé tai téetihi.

²²Ke wogewé mwo, [ke geé te penem mwo] ha a tan iitihi, be geé *pwotegoop te pa ewa aiu, âcehi ni *patén de Moosé. Kehe time e uce âbé mu ko Moosé na a tegoop, be e te âbé mu ko ni watihenye ânebuhen.

²³É ha a tan iitihi, ke geé pwotegoop te pa ewa aiu, beme time geé uce caada ni patén. Woéo, ke é ha a tan iitihi, ke é pwo me wâé pa apulie. Ke geé okéé ne kong kona woté?

²⁴Geé nemwo tauti ni naado ne ha a bwo alihi nen. Kehe geé tauti ne ha a mwomwon.»

Wieli pa Mesia wo lésu?

²⁵Lé pii ne ni bée apulie mu *lérusaléma pie: «He time uce wo pali lé hane me lé taunueng?

²⁶Geé alih! Be e cihe ânebuhe ni apulie! Te tice paceli e cihe ten. Wieli ni apihuô tenye, ke lé caa temehi pie weeng pa *Mesia?

²⁷Kehe wo pa apulie ce, ke genye te temehi he na e âbé mulang. Kehe wo Kériso, ke mepie e tuie, ke te tice paceli e temehi he celi e âbé mulang.»

²⁸É ha a benaamwon naa, he e mwo ko pipune ne *huâ iitihi wo lésu, ke e cihe me ubwo, ke e pii telé pie: «Geé te temehiéo. Ke geé te temehi he na é âbé mulang. Time é uce piâbé mu kong, kehe a juuju [a pwooti te] pana e neéo bé. Ke time geé uce temehieng.

²⁹Woéo, ke é te temehieng, be é âbé mu kon, ke weeng na e neéo bé.»

³⁰Lé hane beme lé imwieng, kehe te tice bwopwon, be time e uce téele tuie a benaamwon den.

³¹Hiwon ni apulie na lé céhi ne kon, ke lé pii pie: «Hemepie e tuie wo pa Mesia, ke he o te hiwon ce inenaado celi pwojunuun celi e pwo koja pa apulie ce?»

Lé hane ace bwopwon me lé imwi lésu

³²Ni *Farasaio, ke lé téne ni apulie he lé ko pii éwaan kon. Ke lé piténelé me ni caa te lépwo *apwoâpwailo, beme lé pahede ni awéhi mwaiitihi me lé imwieng.

³³Ke e pii telé wo lésu pie: «É o mwo mu pelewé ha a benaamwon ce, ke é alechen, ke é o caa âmwo too pana e neéo bé.

³⁴Geé bo haneéo, ke time geé o uce tooéo, be pwocoon me geé â he na é â lang.»

³⁵Ke lé pitahimwolé ne ni Juif pie: «He e o â wé? Ha ace céiu duaan celi me time genye o uce tooeng hen? Pele ni Juif na lé mulie hadenii lépwona time uce lépwo Juif? He e o picaalé?

³⁶E pii tenye pie: “Geé bo haneéo, ke time geé o uce tooéo, be pwocoon me geé â he na é â lang.” Ke he a bwopiinen pie woté ni pwooti naa?»

É ne tewé a tabe ko a mulip

³⁷Caa tuie a bénebwéne tan ko a pipwodéén, a tan na nihe pipwonaado ne kon. Ke e cuwoda wo lésu, ke e toii pie: «Mepie pwo paceli nimen me e ûdu, ke jan me e âbé céiiéo, ke me e ûdu.

³⁸Ke wo paceli e céhi ne kong, ke o bo téte he pwonimen a éémwa. Ke a tabe naa, ke e ne a mulip. Genye pine anaa ne he ni tii iitihi.»

³⁹E pii anaa ne ko a *Jenen litih, na me lé bo hegí ne nina lé céhi ne kon. É ha a benaamwon naa, ke mwo time e uce téele âbé na a Jenen litih, be mwo time e uce téele hegí *a wâé ten wo lésu.

Time lé uce piténelé ne ni apulie mu ko lésu

⁴⁰ É he lé téne ni pwooti te lésu, ke lé pii ne ni béén pie: «A juuju pie te weeng kuti pa Péroféta!»

⁴¹ Ke lé pii mwo ne ni béén pie: «Weeng pali Mesia!» Kehe pwo ni béén na lé pii pie: «He te é mu Galilé he celi me e âbé mulang wo pa Mesia? Ûhu!

⁴² Be nye pine ne he ni tii iitihi pie, wo pali Mesia, ke e wie mu ko a pwomwoiu te *Davita. Ke e o âbé mu Bétéléma, a mwopopwaalé te Davita.»

⁴³ É mu ko lésu, ke time lé uce piténelé ne ni apulie.

⁴⁴ Ke nime ni béén me lé imwieng, kehe te tice bwopwonen.

Time lé uce céihi wo lépwo apihuô

⁴⁵ É he lé âmwobé ne ni awéihi mwaiitihi, ke lé tahimwolé wo lépwo caa te ni apwoâpwailo me ni Farasaio pie: «He time geé uce pébé lésu be woté?»

⁴⁶ Ke lé hegi ne ni awéihi mwaiitihi pie: «Te tice pace apulie celi e cihe pwohewii pa apulie ce!»

⁴⁷ Ke lé pii telé ne ni Farasaio pie: «Wogewé mwo, ke e te pahaulikewé mwo!

⁴⁸ Be te tice pace apihuô, ke te tice pace Farasaio celi e céihi ne kon!

⁴⁹ Kehe ni apulie ce [ke te tice aceli lé temehi]! Ke lé ko céihi ne kon, be time lé uce temehi ni patén de Moosé. Ke e nelé nge ité wo Padué!»

⁵⁰ Kehe icehi ana e cuwoda wo Nikodème, pali e âbé too lésu [he bwén]. Ke e pii te ni Farasaio béén pie:

⁵¹ «Ne he ni patén denye, ke pwocoon me nye pwo me e pwocuhinaado wo paceli time nye uce téele téne ke temehi aceli e pwo.»

⁵² Ke lé hegi ne ten wo lépwo béén pie: «He wogo mwo, ke pa aâbé mu Galilé? Pine ehi ni tii iitihi, ke go bo temehi pie, te tice péroféta celi lé âbé mu Galilé!»

{⁵³ É nelang, ke lé pétaapwo âmwo he ni pomwa telé.}

Ioane 8

Ê toomwo na e bune aiu

¹ E engen wo lésu, ke e taa pwo a juwole ko ni Olivier.

² É ha acaama hen, he mwo te ju acaama, ke e mwojuia ngemwo ha a *mwaiitihi. Ke lé âbé ne kon ne ni apulie na hiwon jélé. Ke e tebwo wo lésu, ke e punelé.

³ Ke lé âbé céiieng ni *dotéén ko patén me ni *Farasaio, ke lé pébé céiieng ê toomwo na lé tooeng he lu pibune me pa aiu na time uce pa aiu hen. Ke lé pwo me e cuwo ânebuhelé ati.

⁴ Ke lé pii ten pie: «Pa apipune, gême mwo te ju téetedo ê toomwo ce, he e ko bune aiu.

⁵Ne he ni *patén de Moosé, ke e pii pie me taunuhi ko péi ni toomwo na lé pwo anaa. Ke kona wogo, ke ade aceli go pii ne kon?»

⁶Lé pii ten anaa beme lé tacebwénieng, be pwo aceli me lé pipé ne kon kon. Kehe e ciieng wo lésu, ke e pwotii ko a mwodéin, neole pwo bwohemwo.

Woo paceli tice ta pwo ten?

⁷Ke lé teko cuwo ko tahimwoeng. Ke e etieng wo lésu, ke e pii telé pie: «Wo pace béewé celi mwo te tice ta pwo ten, ke me e tabuhi tahi kon ace bécéiuhe péi.»

⁸Ke e te ciieng mwo wo lésu, ke e te pwotii ne mwo pwo bwohemwo.

⁹Ke me lé téne ni pwooti naa, ke lé engen he picéiuhi, tabuhi mu ko pana piukéiu nang. Ke lu te pimu cehi wo lésu me êgi toomwo, he e mwo teko cuwo ânebuhen.

¹⁰Ke e etieng wo lésu, ke e pii ten pie: «He élé wé wo lépwoli lé tautiko? Te tice paceli e pwocuhinaado tem?»

¹¹Ke e hegi ne ten wo êgi toomwo pie: «Pa apipune, caa tielé.» Ke e pii ten wo lésu pie: «Woéo mwo, ke time é uce pwocuhinaado tem. Kehe go engen, ke tabuhi ni, ke time go bo uce pwo mwo ce naado celi ta.»

E pwéélang ne pwo a bwohemwo

¹²E pii mwo telé wo lésu pie: «Woéo, ke é pwéélang pwo a bwohemwo. Wo paceli e âbé céing, ke time e bo uce engemwo ha a melepiing, kehe o eten a pwéélang ko a mulip.»

¹³Ke lé pii ten ne ni Farasaio pie: «Go te pipajuujuko, be ana go pii, ke time uce pwonaado ne kon!»

¹⁴Ke e hegi ne telé wo lésu pie: «Éa, é te pipajuujuéo, kehe nina é pii ne kong, ke te ni juuju. É te temehi he na é âbé mulang, ke é te temehi he na me é â lang. Kehe wogewé, ke time geé uce temehi he na é âbé mulang, ai é he celi é â lang.

¹⁵Geé tauti pwohewii a bwohemwo. Kehe woéo, ke time é uce tauti pace apulie.

¹⁶Heme é tauti, ke é tauti ne ha a mwomwon, be time uce woéo cehi na é tauti; kehe te tai wogemu me Caa, na e neéo bé.

¹⁷Ne he ni patén dewé, ke genye pine pie: “Mepie lu pii aceli céiu wo lupwoce apulie, ke genye céihi ne ko ana lu pii.”

¹⁸É te pipajuujuéo, ke e te pajuujuéo mwo wo Caa na e neéo bé.»

¹⁹Lé tahimwoeng ne ni Farasaio pie: «He e wé wo caa tem?» Ke e hegi ne telé wo lésu pie: «Time geé uce temehiéo, ke time geé uce temehi mwo pa Caa tong. Hemepie geé temehiéo, ke me geé o te temehi mwo pa Caa tong.»

²⁰ Ke e pii telé ni pwootti naa wo lésu, ha a benaamwon na e pacémunilé ne ha a mwaiitihi, é he na e lang ni âpipati ni mwani. Te tice paceli me e imwieng, be mwo time uce téele a benaamwon den.

E patemehi a bwo engen den @ ne pele Caa

²¹ E pii telé mwo wo lésu pie: «É o engen, ke geé bo haneéo, kehe geé bo mele ne he ni ta pwo tewé. Be o pwocoon me geé â he na me é â lang.»

²² Ke lé pii ne ni *Juif pie: «He e o â pitaunueng? Be e ko pii pie: "Time geé uce â he na me é â lang."»

²³ Ke e pii telé wo lésu pie: «Wogewé, ke geé âbé mu pwo bwohemwo, kehe woéo, ke é opé mu he miiden. Ke wogewé, ke l épwo apulie pwo bwohemwo, kehe woéo, ke time uce pa apulie éni pwo bwohemwo.

²⁴ É mu ko anaa, ke é pii tewé pie, geé bo mele ne he ni ta pwo tewé. Éa, geé o bo mele ne he ni ta pwo tewé, hemepie time geé uce céihi pie, '*WoÉO [ânebun, ke é jenaa, ke é dieli mwo]'.»

²⁵ Ke lé tahimwoeng pie: «Wogo, ke he woo?» Ke e hegi ne telé wo lésu pie: «É caa te cuwo ko pii tewé mu ha atabuhi kon.

²⁶ Hiwon ni naado na me é pii ne kowé, ke me é tauti ne kowé. Kehe é te pii pwaatihi cehi ana é téne mu ko pana e neéo bé, be pana e pii a juuju.»

²⁷ Time lé uce temehi pie e ko cihe telé ko [Padué] Caa.

²⁸ Ke e pii telé wo lésu pie: «Hemepie geé pieti da pa Nahi Apulie, ke geé o temehi pie woéo, ke te 'WoÉO [ânebun, ke é jenaa, ke é dieli mwo]'. Ke geé o temehi pie time é uce pipwo ni naado mu kong, kehe é pii ni naado na é picaa mu ko Caa.

²⁹ Wo pana e neéo bé, ke te e pelong. Time e uce pineéo cehi, be é te cuwo ko pwo nina wâé ten.»

³⁰ É ha a benaamwon na e pii anaa wo lésu, ke hiwon ni apulie na lé céihi ne kon.

A JUUJU ke e âbé mu ko Padué

³¹ Ke e pii te ni Juif na lé céihi ne kon wo lésu pie: «Hemepie geé cumang ne ko ni pwootti na é pii tewé, ke a juuju pie wogewé, ke ni acémun dong.

³² Geé o temehi a *JUUJU. Ke a juuju, ke e bo tuwokewé.»

³³ Ke lé pii ten pie: «Wogeme ne ha a pwomwoiu te *Abérama, ke time geme mu uce téele â penem tice ja kon de pace apulie. Ke go o woté ko ace bwopiinen deme pie, o bo tuwokeme?»

³⁴⁻³⁵ Ke e hegi ne telé wo lésu pie: «Éa, é pii tewé a juuju pie: Wo pana e pwo nina ta, ke pa *apenem tice ja kon de ni ta pwo ten. Ke wo pa apenem tice ja

kon, ke time e uce mu taaci ha a pwomwoiu te pa caa ten. Be te pa naîn cehi na e mu ha a pwomwoiu dieli mwo.

³⁶Hemepie e tuwokewé wo pa Naî [Padué] ke o caa te tice aceli o mwo toole gewé kon.

³⁷É te temehi pie wogewé ha a pwomwoiu te Abérama. Kehe geé hane me geé taunuéo, be time geé uce hegi ni pwootitong.

³⁸Woéo, ke é pii ni naado na é alihne pele Caa tong. Kehe wogewé, ke geé te pwo nina geé picaa mu ko pa caa tewé.»

³⁹Ke lé hegi ne ten pie: «Wo Abérama pa caa teme!» Ke e pii telé wo lésu pie: «Hemepie wogewé ni ju naî Abérama, ke geé o pwo ni penem na e pwo.

⁴⁰Woéo, ke é pii tewé a juuju na é téne mu pele Caa. Ke é jenaa, ke geé hane beme é mele. Abérama, ke time e uce pwo anaa!

⁴¹Wogewé, ke geé te pwohewii pa caa tewé.» Ke lé hegi ne ten pie: «Wogeme, ke time uce ni ewa mu ko pace céiu apulie. Te céiu pa caa teme, ke wo Padué.»

Time geé uce naî Padué

⁴²Ke e pii telé wo lésu pie: «Hemepie wo Padué, ke pa Caa tewé, ke o eânimewé tong. Be woéo, ke é âbé mu ko Padué. Ke woéo éni mu kon. Time é uce piâbé mu kong, kehe wo Padué na e neéo bé.

⁴³É mu ko ade na time geé uce téne temehi nina é pii tewé? Be time geé uce tabemi ni pwootitong.

⁴⁴«Be te wo *Caatana pa caa tewé! Ke nimewé me geé pwo nina nimen kon. Weeng, ke pa ataunuhi apulie mu ha atabuhi kon. Time e uce mu ha a JUUJU, be te tice JUUJU kon. E te pii ni gele, be te pa agele. Be weeng, ke pa caa te a gele.

⁴⁵«Ke woéo, ke é pii a juuju. Ke é mu ko anaa, na time geé uce céihi ne ko ana é pii.

⁴⁶Hadeniiwé, ke te tice paceli jan me e pii pie pwo ni ta pwo tong. É pii a juuju, ke time geé uce céihi ne ko ana é pii kona woté?

⁴⁷Pa apulie te Padué, ke e tabemi ni pwootit te Padué. Kehe wogewé, ke time geé uce tabemi, be time geé uce apulie te Padué.»

lésu me Abérama

⁴⁸Ke lé pii te lésu ne ni Juif pie: «Te a juuju pie wogo, ke pa apulie *Samari, be e kom a jenenaado!»

⁴⁹E hegi ne telé wo lésu pie: «Ûhu, te tice jenenaado kong, be é pipaunu Caa tong. Kehe wogewé, ke time geé uce pipaunuéo.

⁵⁰Time é uce hane *a wâé tong, kehe pwo pana e hane a wâé tong, ke e tauti.

⁵¹Éa, é pii tewé a juuju pie: Hemepie pwo paceli e ténedehi ni pwooti tong, ke time e o uce mele.»

⁵²Ke lé pii te lésu ne ni Juif pie: «É jenaa, ke geme caa temehi pie, e kom a jenenaado. E caa mele wo Abérama me ni péroféta, ke go pii wogo pie: "Hemepie pwo paceli e ténedehi ni pwooti tong, ke time e o uce mele."»

⁵³«He te junihe piubwo go koja Abérama, pa caa teme, na e caa mele me ni péroféta? He go pipééko me pa de?»

É te mi mu ânebuhe Abérama

⁵⁴Ke e hegi ne telé wo lésu pie: «Time é uce pwo me é pipaunuéo, be mepie é pipaunuéo, ke o te piticenaado ne kon. Te wo Caa tong na e te ne tong a wâé. Weeng na geé pii kon pie Padué hewé!»

⁵⁵Kehe time geé uce temehieng. Kehe woéo, ke é te temehieng. Hemepie é pii pie time é uce temehieng, ke é o gele pwohewiikewé. Kehe é te temehieng, ke é te ténedehi ni pwooti ten.

⁵⁶Abérama, pa caa tewé, ke e pipwodéén, be e niimihi pie e o alihia tan na é tuie hen. Ke e caa alihia, ke te nihe ubwo a bwo piwâénimen.»

⁵⁷Ke lé pii te lésu ne ni Juif pie: «Mwo time uce 50 ni jo hem, ke he go caa ali Abérama?»

⁵⁸Ke e hegi ne telé wo lésu pie: «Éa, é pii tewé pie ânebuhe a bwo tuie te Abérama, ke caa te woéo lang.»

⁵⁹Ke lé pé ni péi beme lé tahi ko lésu, kehe e taduwo kolé, ke e wie mu ha a mwaiithihi.

Ioane 9

E pwo me e niê wo pa bwi

¹He e ko â pwo pwaaden wo lésu, ke e ali pa apulie na bwi nang, tabuhi ha a bwo âbeeble ten.

²Ke lé tahimwo lésu wo lépwo acémun den pie: «Pa apipune, he é mu ko ade na wo pa apulie ce, ke e âbeeble he bwi nang? Wonaa mu ko ni ta pwo ten, ai ni ta pwo te lu nyaa me caa ten?»

³Ke e hegi ne telé wo lésu pie: «Time uce weeng, ke time uce wo lu nyaa me caa ten. A bwo bwi nang, ke pwo beme e habwii a junuun wo Padué ne kon.

⁴He mwo pwang, ke wâé heme genye pwo ni penem de pana e neéo bé. Be, me e tuie a bwén, ke te tice paceli jan me e penem.

⁵He mwo woéo pwo bwohemwo, ke woéo pa pwéélang pwo bwohemwo.»

⁶E caa pii anaa wo lésu, ke e cumi ole pwo bwohemwo, ke é ko a cumihen, ke e pwo me titi a pule, ke e pé ke e ne ko ni naamii pali bwi.

⁷Ke e pii ten pie: «Go â puuko ne he tabe ne Siloé.» Siloé, a bwopiinen pie ‘pahedeeng’. Ke wo pali bwi, ke e â puu a pwahamiin. Ke me e mwojuia mwobé, ke e caa niê ehi.

Lé téele kon wo lépwo apulie

⁸Pa apulie naa, ke pa a-ile. Ke lé pitahimwolé ne ni apulie na lé alieng ânebun me ni béén pie: «He woo paje? He time uce wo pali bwi li e mu tee tebwo, ke e ile?»

⁹Ke lé pii wo lépwo béén pie: «Éa, weeng.» Kehe lé pii ne ni béén pie: «Ûhu! Time uce weeng. Kehe pana te ju pwohewiieng.» É nelang, ke e pii telé pie: «Te woéo.»

¹⁰Ke lé tahimwoeng ne ni apulie pie: «Go woté ko ace bwopwonen me go niê?»

¹¹Ke e hegi ne telé pie: «Wo pa apulie na pii kon pie lésu, ke e pé a hepule, ke e ne ko ni naamiing, ke e pii tong pie me é â puuéo ne he tabe ne Siloé. Ke é ân ke é puuéo, ke é caa niê!»

¹²Ke lé tahimwoeng pie: «He e wé naa wo pa apulie naa?» Ke e hegi ne telé pie: «Time é uce temehi.»

Lé tahimwo pali bwi ni Farasaio

¹³Lé pé pali bwi nge céii ni *Farasaio.

¹⁴A tan na e pé a hepule hen wo lésu ke e pwo me e niê wo pali bwi, ke é ha a tan iitihi.

¹⁵Ke lé uce tahimwo pali apulie ne ni Farasaio pie: «Go caa niê jenaa? He ade aceli e pwo tem?» Ke e pii telé pie: «E ne ko lupwo naamiing ni hepule, ke é â puuéo, ke é jenaa, ke é caa niê.»

¹⁶Ke lé pii ne ni bélélé pie: «Time e uce âbé mu ko Padué wo pana e pwo anaa, be time e uce paciitihi a tan iitihi!» Kehe lé pii ne ni béén pie: «Wo pace apulie celi pwo ce ta pwo ten, ke pwocoon me e pwo ace inenaado celi pwojunuun celi wonaa.» Ke time lé uce piténelé wo lépwo Farasaio.

¹⁷Ke lé tahimwo mwo pali bwi pie: «Wogo, ke he ade aceli go pii ne ko pana e pwo me go niê?» Ke e hegi ne telé pie: «Pa péroféta.»

Lé tote lu nyaa me caa ten

¹⁸Kehe time uce nimelé me lé céihi pie bwi nang ânebun, ke é jenaa ke e caa niê ehi. Ke lé tote lu nyaa me caa ten,

¹⁹ke lé tahimwolu pie: «Wo paje, ke he te pa naîu? Ke geu pii pie bwi nang, he e mwo âbeeble? É jenaa, ke e caa niê. He ade aceli e tuie ne kon?»

²⁰Lu nyaa me caa ten, ke lu hegi pie: «Gemu temehi pie te pa naîmu, ke e âbeeble he te bwi nang.

²¹Ke é jenaa, ke e caa niê. Kehe time gemu uce temehi aceli e tuie ne kon. Ke time gemu uce temehi pie he woo paceli e pwo me e niê. Geé te tahimwoeng, be caa te ubwo nang! Ke e o te hegi ne tewé!»

²²Lu pii pie wonaa wo lu nyaa me caa ten, be mwotilu ko ni apihuô juif. Be lé caa mi pii pie, hemepie lé pii pie wo lésu, ke pa *Mesia, ke lé o pawielé mu ha a *mwotapitihi.

²³É mu ko anaa, ke lu pii wo lu nyaa me caa ten pie: «Caa te ubwo nang! Ke geé te tahimwoeng!»

Lé tahimwo mwo pali bwi

²⁴Ke lé tote mwo pali bwi ne ni Farasaio a béokelohen, ke lé pii ten pie: «Go pii a juuju ne he pwahamii Padué! Geme te temehi pie, pana e pwo me go niê, ke pa apulie na ta nang.»

²⁵Ke e hegi ne telé pie: «Time é uce temehi pie pace apulie celi ta nang. Te céiu ana é temehi pie, bwi jo, ke é jenaa, ke é caa niê.»

²⁶Ke lé tahimwoeng mwo pie: «He ade aceli e pwo tem? He e woté ko ace bwopwonen me go niê?»

²⁷Ke e hegi ne telé pie: «É caa pii tewé, ke time geé uce tabemiéo. Kona nimewé me geé téne mwo kona woté? Me geé pipwoeabwé te lésu mwo, wogewé?»

²⁸Ke lé pipiitaeng, ke lé pii ten pie: «Te wogo pa eabwé te pa apulie naa! Wogeme, ke ni eabwé te *Moosé!

²⁹Wogeme, ke geme temehi pie e cihe ne ko Moosé wo Padué, kehe wo panaa, ke time geme uce temehi pie e âbé mu wé!»

E pajuujuhi ne telé a junuu lésu

³⁰Ke e pii telé wo pali bwi pie: «Te ité! Be e pwo me é niê, kehe icehi ana wogewé, ke time geé uce temehi he celi e âbé mulang!»

³¹Genye te temehi pie wo Padué, ke time e uce pitabemi nina ta jélé, kehe e te pitabemi pana e ténedeeeng, ke e pwo nina e pii.

³²Time genye uce téele téne pie, pwo pace apulie celi e pwo me e niê wo paceli bwi nang tabuhi ha a bwo âbeeble ten.

³³Hemepie time e uce âbé mu ko Padué, ke o time uce jan ne kon me e pwo aceli wonaa.»

³⁴Ke lé hegi ne ten pie: «Wogo, na go âbeeble ne ha a ta, ke nimem me go pacémunikeme?» Ke lé neeng wie.

Ni ju bwi

³⁵Ke e téne wo lésu pie lé pawie pali bwi. Ke e â tooeng, ke e pii ten pie: «He go te céhi ne ko pa Nahi Apulie?»

³⁶Ke e hegi ne ten wo pali apulie pie: «Pa apipune, he woo panaa, beme é céhi ne kon?»

³⁷Ke e pii ten wo lésu pie: «Go caa alieng jenaa, be weeng na e ko cihe tem.»

³⁸Ke e pii ten wo pali apulie pie: «Padaame, é céhi.» Ke e tidihi jilin he pwahamii lésu.

Lépwona muhi telé me lé alihî

³⁹Ke e pii wo lésu pie: «É tuie ne pwo bwohemwo beme lé niê ne ni bwi, ke me bwi nina lé niê. Weengaa a tautinaado.»

⁴⁰É he lé téne anaa ne ni béé Farasaio na lé mu lang, ke lé tahimwoeng pie: «He bwi geme mwo?»

⁴¹Ke e hegi ne telé wo lésu pie: «Hemepie bwi gewé, ke o te tice ta pwo tewé. É jenaa, ke geé pii pie: "Geme caa niê." É mu ko anaa, ke geé o te mu he ni ta pwo tewé.»

Ioane 10

lésu ke pa awéhihi muto

¹[E pii mwo wo lésu pie]: «É pii tewé a juuju pie: Wo pana e taa pwo a goomwa babé te ni muto, ke me time e uce taa ha a pomwa kon, ke wo panaa, ke pa abune, ke pa apulie ta.

²Kehe wo pana e taa ha a pomwa, ke pa ju awéhihi muto.

³Ke e tehi ne ten a pomwa wo pa awéhihi nen. Ke lé téne temehi a patin ne ni muto, he e toii ni niilé, ke e péélé wie.

⁴Ke me e caa tai pawielé, ke e engen ânebuhelé. Ke lé âcéin, be lé téne temehi a patin.

⁵Time lé uce âcéi pace céiu apulie, kehe lé o cela kon, be time lé uce téne temehi ni pati ni béé apulie.»

⁶Ke wo lépwona lé téne a ocine naa, ke time lé uce temehi aceli nimen me e pii telé.

Woéo pa pomwa

⁷Ke e pii mwo telé wo lésu pie: «Éa, é pii tewé a juuju pie: *WOÉO pa pomwa te ni muto.

⁸Wo lépwona lé âbé ânebuhung, ke ni abune, ke ni apulie ta. Ke ni muto, ke time lé uce ténedelé.

⁹WOÉO pa pomwa. Wo paceli e taabé kong, ke o celuimieng. Ke e o taa ke e o wie, ke e o te tooli ce wiinaado ten.

¹⁰«Wo pa abune, ke e te ju âbé beme e bune, ke me e taunuhi, ke pwotahi. Kehe woéo, ke é âbé me é pamulipi ni apulip, ke me hején a mulihelé.»

Woéo pa ju awéihi muto

¹¹ «WoÉO pa ju awéihi muto. Ke pa ju awéihi muto, ke e patupwo a mulihen me delé.

¹² Wo pana e cile muto me pwocuhieng, ke time uce pa ju awéihi muto, be time uce ni muto ten. Ke me e alahi a wota apiwii, ke e necu ni muto, ke e cela. Ke ali wota apiwii, ke e pé ni muto, ke e pwo me lé pipiiden ne ni béén.

¹³ Ke e cela wo pana e penem me pwocuhieng, be time e uce cile ehi ni muto.»

É patupwo a mulihung me delé

¹⁴ «WoÉO, ke pa ju awéihi muto, ke é te temehi ni muto tong, ke lé te temehiéo.

¹⁵ Pwohewii a bwo temehiéo te Caa, ke a bwo temehi Caa tong. Ke é patupwo a mulihung me delé.

¹⁶ Mwo te pwo ni béé muto tong na mwo tielé ha a babé. Woélémwo, ke me é péélé bé. Ke lé o téne a pating, ke o te céiu a pubuulé, ke o te céiu pa awéilé.

¹⁷ «Eâname Caa tong, be é patupwo a mulihung, beme é bo hegi mwo.

¹⁸ Te tice paceli e o pé a mulihung, kehe é te ne mu kong. Etong me é ne, ke etong me é pé mwo. A pihuô naa, ke é hegi mu ko Caa.»

Lé pipiilé mwo mu kon

¹⁹ Ke time lé uce piténelé mwo ne ni Juif mu ko ni pwooti te lésu.

²⁰ Be hiwon ni béén mu kolé na lé pii pie: «Pwo ace jenenaado kon! Pihauli nang! É mu ko ade na geé tabemieng?»

²¹ Kehe lé pii ne ni béén pie: «Mepie e kon ace jenenaado, ke time e o uce wonaa ko ace bwo cihe ten. Kona a duéé, ke o te jan me e tehi ni naamii ni bwi?»

Muhi telé me lé céihi ne ko lésu

²² É ha a benaamwon ko ta-amu, é ne *lérusaléma, ke a *pipwodéén ko a bwo tehi ne mwo a *mwaiitihi.

²³ Ke e mu lang wo lésu, ke e âdé ke âbé ha a mwaiitihi, ne ha a ‘Mwa te Solomon’.

²⁴ Ke lé pitaineibulé ne ko lésu ne ni Juif, ke lé pii ten pie: «He go pwo me gemicéiko dieli éniile? Mepie wogo pa *Mesia, ke go pii ehi teme!»

²⁵ Ke e hegi ne telé wo lésu pie: «É caa pii tewé, kehe time geé uce céihi ne ko ana é pii. Ke lé pajuujuéo mwo ni penem na é pwo mu ko Caa.

²⁶ Ke time geé uce céihi, be time uce wogewé ni muto tong.»

Lé temehiéo ne ni muto tong

²⁷ «Lé téne temehi a pating ne ni muto tong. Ke é temehilé, ke lé âbé céing.

²⁸Ke é ne telé a mulip ne pele Padué dieli mwo. Time lé uce mele, ke te tice paceli e bo péélé mu ha a naatiing.

²⁹Be wo Caa na e nelé tong, ke e daaité koja ati ni naado. Ke o te tice paceli e o péélé mu ha a naatii Caa.

³⁰Wogemu me Caa, ke te céiu gemu.»

Lé pwo me lé ahieng

³¹Ke lé pé mwo ni péi ne ni Juif, beme lé taunueng.

³²Ke e pii telé pie: «Hiwon ni naado na wâé na é pwo mu ko Caa, ne he pwahamiiwé. Ke he ade mu he nina é pwo, celi nimewé me geé taunuéo kon?»

³³Ke lé hegi ne ten pie: «Time uce é mu ko ace naado celi wâé celi go pwo, na nimeme me geme taunuko, kehe é mu ko ana go cihe me ta ne ko Padué. Kehe wogo, ke pa apulie, ke nimem me go pwo me wogo Padué!»

Woéo ko Caa ke e kong

³⁴Ke e pii telé wo lésu pie: «Caa tii ne he ni patén dewé pie, e pii wo Padué pie: *Wogewé, ke ni naî Padué!* Psaume 82.6

³⁵Ke pwocoon me tili taabwon ana tii ne he ni tii iitihi. Hemepie e toii ko ni apulie pie naî Padué,

³⁶ke é ko ade na geé pii pie é picihe hauli ne ko Padué me é pii pie, woéo pa Naîn? Be wo Caa na e pipégaliéo, ke e pahedeéo bé ne pwo bwohemwo.

³⁷«Mepie time é uce pwo ni penem na e ne tong wo Caa, ke geé nemwo céihi ne kong!

³⁸Kehe icehi ana mepie é pwo, ke wâé heme geé céihi. Be mepie pwocoon ne kowé me geé céihi ne kong, ke geé céihi ne kong mu ko ni naado na é pwo. Beme geé téne temehi pie e kong wo Caa, ke woéo, ke é mu ko Caa.»

³⁹Ke lé hane mwo me lé imwi lésu, kehe pwocoon ne kolé.

⁴⁰Ke e engen wo lésu, ke e mwojuia ngemwo ko a céiu goo a éémwa Ioridano, he na e mi *puu apulie nelang wo loane. Ke e mu lang.

⁴¹Hiwon ni apulie na lé âbé tooeng, ke lé pipii telé pie: «Te tice inenaado celi pwojunuun celi e pwo wo loane, kehe te ni juuju ati nina e pii ne ko lésu.»

⁴²É nelang, ke hiwon ni apulie na lé céihi ne kon.

Ioane 11

A bwo mele te Lazare

¹Pwo pa céiu apulie na cunu nang, na pii kon pie Lazare. E mu Bétani, a mwopopwaalé te Maria me ê béén Marte.

²Wo Maria, ke êgi toomwo li e céhi ne pwo ni a Padaame a tabe ûde, ke e tahi ko ni apunin. Ke ê iiti Lazare, pali cunu nang.

³Lu ténaâjién, ke lu pahede pa céiu apulie, me e â pii te lésu pie: «Padaame, pali eânimem den, ke cunu nang.»

Time e uce piepin ko engen

⁴Me e téne anaa wo lésu, ke e pii pie: «A cunu na e ko Lazare, ke time e o uce metihi, kehe a bwopwonen me e habwii a junuun wo Padué. Be é mu ko anaa, ke lé o alihia junuu pa Naîn.»

⁵Junihe eânimen de Marte me ê béis, ke wo Lazare.

⁶He e téne pie cunu Lazare, ke e mwo mu lang he na alo ni tan.

⁷Ke é alechen, ke e pii te ni acémun den pie: «Genye âmwo *Judé.»

⁸Ke lé pii ten ne ni acémun den pie: «Pa apipune, ha ali céiu tan, ke lé haneko ne ni *Juif na lé mu lang, beme lé ahiko ko péi me lé taunuko. Ke nimem me go mwojuia ngemwo lang?»

⁹Ke e hegi ne telé wo lésu pie: «Ha a tan, ke ¹² ni inetéale. Hemepie genye engen heme pwang, ke time genye uce tupwo, be te pwéélang he na genye â lang.

¹⁰Kehe mepie genye engen he bwén, ke genye o tupwo, be time uce e konye a pwéélang.»

E mele wo Lazare

¹¹Ke e pii mwo wo lésu pie: «E caa puluta wo pa béis Lazare, kehe é o â paumiêeng.»

¹²Lé pii ten ne ni acémun den pie: «Padaame, mepie e puluta, ke o wâé nang!»

¹³Nime lésu me e pii pie, e caa mele, kehe lé niimihi ne ni acémun den pie, e teko ju pule.

¹⁴Ke e pii telé ehi pie: «E caa mele.

¹⁵Time é uce mu lang, kehe é pipwodéen. Wonaa mu kowé, beme geé céhi ne kong. Kehe genye â pele Lazare!»

¹⁶Ke wo Toma, pana pii kon mwo pie ‘pa Péidu’, ke e pii te ni béis acémun pie: «Genye tai ân, beme genye tai mele me lésu!»

Te junihe téé lu pwaadeniin

¹⁷Ke é he e tehene ngen wo lésu, ke e téne pie caa paa ni tan na lé ne Lazare ha a mwa péi.

¹⁸Bétani, ke é mwonuhi *lérusaléma, he na cié ni kilomètre ngelang.

¹⁹É mu ko anaa, ke hiwon ni Juif na lé âbé too Marte me Maria, beme lé tuie ne kolu ko a bwo mele te Lazare.

²⁰E téne wo Marte pie e tuie wo lésu, ke e âbé beniieng. Kehe wo Maria, ke e te mu pwomwo.

²¹Ke e pii wo Marte te lésu pie: «Hemepie tekó wogo éni, ke me time e o uce mele wo pa iitiéo.

²²Kehe é ha a benaamwon ce, ke é te temehi pie tai ni naado na go ilehi koja Padué, ke e o te tai ne tem ati.»

Woéo pana é ne a mulip

²³Ke e pii ten wo lésu pie: «Pa iitiko, ke e o mulie cemwo mu ha amele.»

²⁴E hegi ne ten wo Marte pie: «É te temehi pie e o mulie cemwo hemepie lé o mulie cemwo ne ni amele ha a *Tan Alece.»

²⁵Ke e pii ten wo lésu pie: «*WOÉO pa mulie cemwo ke pa mulip. Wo pana e céhi ne kong, ke eten a mulie, te piwien hemepie e caa mele.

²⁶Ke tai nina lé mulie heme lé céhi ne kong, ke time lé o uce mele. Go te céhi ne ko anaa?»

²⁷Ke e pii ten wo Marte pie: «Éa, go Padaame! É céhi pie wogo, ke pa *Mesia, pa *Naî Padué na me e âbé ne pwo a bwohemwo.»

Lu picihe me Maria

²⁸He e caa pii anaa wo Marte, ke e âtode ê ciéén, Maria, ke e pii ten pie: «E éni wo Padaame, kehe e todeko.»

²⁹He e téne anaa wo Maria, ke e te caama kuti ke e âtoo lésu.

³⁰Be time e uce téele taa ha a mwopopwaalé, kehe mwo te é he na e tooeng lang wo Marte.

³¹Ni Juif na lé âbé tuie ne ko Maria ne ha a pomwa ten, ke lé alieng he e te caama kuti ke e âwie. Ke lé âcéin, be lé niimihi pie e âé, he iitihi.

³²Me e tehene nge ha a duaan na e mu hen wo lésu, ke e tidih jilin ko an, ke e pii ten pie: «Padaame, mepie te wogo éni, ke me time e o uce mele wo pa iitiéo!»

E é pai pa béén

³³Ke me e alieng wo lésu he e é me ni Juif na lé âbé céin, ke te nihe penem a pwonimen, ke piwahin nang.

³⁴Ke e tahimwolé pie: «He geé neduwoeng wé?» Ke lé pii ten pie: «Padaame, go âbé ke go bo alihi.»

³⁵Ke e é wo lésu.

³⁶Ke lé pii ne ni Juif pie: «Geé alihi, be te junihe eânimén den!»

³⁷Ke lé pii ne ni béén pie: «Weeng pana e tehi ni naamii pa bwi. Kona pwocoon me e pwo me time e uce mele wo Lazare?»

E mulie cemwo wo Lazare

38Ke te nihe penem a pwonime lésu. Ke e â ko a bwomu, a mwa péi na capuhi ko a pilehe péi.

39Ke e pii pie: «Geé pétaabwon a péi!» Kehe wo Marte, ê iiti pali e caa mele, ke e pii ten pie: «Padaame, caa ûde nang, be caa paa ni tan na e lang.»

40Ke e pii ten wo lésu pie: «É caa pii tem pie, mepie go céihi, ke go o alihia bwo ubwo na a wâé te Padué.»

41Ke lé pétaabwon ali péi. Ke e eti ni naamiin wo lésu, ke e pii pie: «Caa, é olééhi ne tem, be go téneéo.

42Ke woéo, ke é te temehi pie go te téneéo. Kehe é cihe, beme lé céihi ne ni apulie na élé aujeniéo pie, wogo na go pahedeéo bé.»

43Ke é alecehe anaa, ke e cihe da ko miiden, ke e pii pie: «Lazare, go wie mulang!»

44Ke e wie wo pali amele! Ni an me ni in, ke cie ko ni mwaanu. Ke a pwahamiin, ke tawii mwo ko a mwaanu. Ke e pii telé wo lésu pie: «Geé tuwo mu kon nina lé cieeng kon, ke neeng me e engen.»

Lé piténelé me lé taunu lésu

45Hiwon ni Juif na lé â pele Maria, ke lé alihia nina e pwo wo lésu, ke lé céihi ne kon.

46Kehe ni béén, ke lé â too ni *Farasaio, ke lé uti telé nina e pwo wo lésu.

47Ke lé taineibuhi a *mwohuô wo l épwo caa te l épwo *apwoâpwailo me ni Farasaio, ke lé pii pie: «He ade aceli genye o pwo? Be hiwon ni *inenaado na pwojunuun na e pwo wo pa apulie ce.

48«Hemepie genye te neeng me e pwo, ke lé o tai céihi ne kon ne ni apulie ati. Ke lé o âbé ni coda roma, ke lé o tanahi a *mwaiitihi tenye ke a bele tenye!»

Wâé heme e mele wo pana céiu nang

49Ha a jo naa, ke wo pa *daame he l épwo apwoâpwailo, na pii kon pie Kaïfe. Ke e pii telé pie: «Te tice aceli geé temehi?

50Wâé hemepie e mele wo pana céiu nang me de a puapulie, beme time uce tanahi a amu ati. Ai, kona te time geé uce temehi anaa?»

51Time e uce âbé mu kon ni pwootti naa, be weeng, ke pa daame he l épwo apwoâpwailo ha a jo naa, ke e mi pii pie, e bo mele me de a bele juif wo lésu.

52Kehe time e uce pwo cehi me de a bele juif, kehe me e taineibuhi me céiu ni naî Padué na élé ati he ni piduaan ne pwo a bwohemwo.

53Ke tabuhi ha a tan naa, ke lé pitaineibulé ne ni apihuô juif, beme lé pwo me e mele wo lésu.

⁵⁴É mu ko anaa, ke caa time e uce âdé ke âbé he pwahamiilé wo lésu. Kehe e engen mulang, ke e â ha a céiu duaan ko a melé, ne ha a céiu mwopopwaalé na pii kon pie Éfraïm. Ke e mu lang me ni acémun den.

Lé ucéieng ne lérusaléma

⁵⁵Caa e mwonu a tan ko *Pacika, a *pipwodéén de ni Juif, ke hiwon ni apulie na lé engen mu he ni amu telé, beme lé taa lérusaléma ânebuhe a Pacika, beme lé pwo a *pwoitihi ko a bwo wâé genye ne pele Padué, pwohewii a patén de ni Juif.

⁵⁶Lé hane lésu, ke lé pipii telé ne ha a mwaiitihi pie: «Geé niimihi pie woté? E o te âbé ne ko a pipwodéén?»

⁵⁷Ke ni caa te l épwo apwoâpwailo me ni Farasaio, ke lé huôhi pie, hemepie pwo pace apulie celi e temehi he celi e lang wo lésu, ke me e âbé pii telé, beme lé imwieng.

Ioane 12

E puu lupwo a lésu wo Maria

Mataio 26.6–13; Maréko 14.3–9; {Luka 7.36–50}

¹Mwo 6 ni tan ânebuhe a *Pacika, a *pipwodéén de l épwo *Juif, ke e tehene nge Bétani wo lésu. Ke e mu pele Lazare, pali e pwo me e mulie cemwo wo lésu.

²Ke lé tebwo pwo taap me ni b één, ko a wiinaado na lé caa mi piwâam kon. Ke wo Marte, ke e âdé ke âbé, beme e wéihi a taap.

³Mepwo é ne ko Maria, ke e pé a mwotabe na oba† ko tabe ûde na te junihe ubwo a cuhin. Ke e céihi ne pwo ni a lésu, ke e tahi ni an ko ni apunin. Ke te ju ûde wâé ha ali mwa.

⁴[Kehe time uce wâé te] Judas Iscariot, pa céiu *acémun de lésu, pali e bwo icueng. Ke e pii pie:

⁵«Woté? É ko ade na time e uce icuhi a tabe ûde ce, ke me nye ne a mwani te nina tice delé? Be pwo *million* ko a cuhin!»

⁶Time e uce pii anaa hemepie eânimén de nina tice delé, kehe e wonaa be pa abune. Ke weeng na e cile a mwomwani telé, ke e mu pé mu kon.

⁷Ke e pii wo lésu pie: «Go neeng! Be e caa mi pwo anaa ne ko a tan na lé o bo neduwoéo hen.

⁸Be o tee élé pelewé wo l épwona tice delé, kehe woéo, ke time é o uce tee mu pelewé.»

Lé picihe me lé taunu Lazare

⁹Hiwon ni Juif na lé téne pie e mu Bétani wo lésu, ke lé âbé nelang. Time uce é mu kon cehi, kehe nimelé me lé ali mwo Lazare, pana e pwo me e mulie cemwo.

¹⁰Kehe lé picihe wo lépwo caa te lépwo *apwoâpwailo, me lé taunu mwo Lazare.

¹¹Be wonaa mu ko Lazare, me hiwon ni Juif na lé wie mu pelelé, ke lé céihi ne ko lésu.

Lé pipaunu lésu he e taa lérusaléma

Mataio 21.4–9; Maréko 11.7–10; Luka 19.36–38

¹²Ha acaama hen, ke hiwon ni apulie na lé âbé ne ko a pipwodéén ko a tan ko Pacika, be lé téne pie e taa *lérusaléma wo lésu.

¹³Ke lé pé ni madi alica, ke lé â beniieng, ke lé toii me ubwo pie: «*Osana! Pipwoun de Padué! *Adéi pa apulie na e âbé ne he nii Padaame!Psaume 118.26* *Adéi Padaame he ni *Isaraéla!»

¹⁴Ke e pé a nahi buriko wo lésu, ke e tebwo huïin, pwohewii ana caa te tii ne he ni tii iitihi pie:

¹⁵ *Wogo ê nahi toomwo Sion , go nemwo pwo me mwotiko! Be e âbé wo Padaame hem, he e tebwo huïi a nahi buriko .Zakari 9.9*

¹⁶ É ha a benaamwon naa, ke time lé uce téele temehi ne ni acémun den celi e o tuie. Ke é he e caa mu ha *a wâé ten wo lésu, ke lé bo piniimihi mwo pie ninaa, ke caa mi tii ne kon, ke lé bwo *pajuujuhi ne kon ana caa pii.

¹⁷ Tai nina lé mu pele lésu he e tote Lazare me e wie mu ha a bwomuhen, ke e pwo me e mulie cemwo, ke lé â uti nina e pwo.

¹⁸ É mu ko anaa, na e âbé beniieng a pubu apulie, be lé téne pie e pwo a *pipwojunuun naa.

¹⁹ Lé pipii telé ne ni *Farasaio pie: «Geé te alih, te tice aceli jan me genye pwo. Be tai ni apulie, ke lé tai âcéin!»

Pa ju eabwé te lésu

²⁰ Pwo ni apulie na time uce ni Juif na lé taa lérusaléma ha a pipwodéén, beme lé pipaunu Padué.

²¹ Ke lé âbé too Filip, pa aâbé Betsaïda ne Galilé, ke lé pii ten pie: «Nimeme me geme ali lésu.»

²² Ke e ân wo Filip, ke e pii te André, ke lu â pii te lésu.

²³ Ke e hegi ne telu wo lésu, pie: «Caa tuie a benaamwon me pipaunu pa Nahi Apulie.

²⁴ É pii tewé a juuju pie: Hemepie time e uce tupwo ne he pule a pide *blé*, ke me time e uce mele, ke e te mu cehi. Ke hemepie e mele, ke o hiwon ce acehin.

²⁵ «Wo paceli eânimen ko a mulihen, ke e o patieden. Kehe wo paceli te nihe eânimen de Padué koja a mulihen ne éni pwo bwohemwo, ke eten a mulie na tice anebwén kon.

²⁶ «Wo paceli nimen me e pipwoeabwé tong, ke e âbé céing. Ke é he na woéo lang, ke o e lang mwo wo pa eabwé tong. Ke wo Caa, ke e o bo ne a ceme ni penem den.»

E pii a bwo mele ten

²⁷ «É jenaa, ke téé a pwonimung, ke me é pii pie woté: "Caa, go neéo nge ité koja ni picani na e o tuie ne kong ha a benaamwon ce"? Kehe é mu ko anaa, na é âbé.

²⁸⁻²⁹ Caa, go habwii pie wogo Padué na ubwo go!» Ke ni apulie na lé mu lang, ke lé téne a pwocihe mu he miiden: «É caa te habwii a wâé tong, ke é o mwo te habwii mwo.» Ke lé niimihi ne ni béén pie a tikekele. Ke lé pii ne ni béén pie a *âcélo na e cihe ten.

³⁰ Ke e pii telé wo lésu pie: «Time e uce âbé a pwocihe naa me dong, kehe me dewé.

³¹ É jenaa, ke o pwo a tautinaado ne pwo a bwohemwo ce. É jenaa, ke e o tahi wie pa daame he a ta ne pwo a bwohemwo.

³² Ke woéo, hemepie pineéo da mu pwo bwohemwo, ke é bo céibé ni apulie ati.»

³³ É mu ko ni pwooti ten, ke e caa mi pii a bwo mele ten.

Hegi a pwéélang

³⁴ Ke lé hegi ne ten ne ni apulie pie: «Geme picaa ne he ni tii ko patén pie, pa *Mesia, ke e o *mulie dieli mwo. Kehe woté ace bwomunen me go pii pie, wâé heme ne da pa Nahi Apulie? He woo pa Nahi Apulie naa?»

³⁵ Ke e pii telé wo lésu pie: «A pwéélang, ke time uce bwolieng hadeniiwé. Geé engen he mwo e pelewé a pwéélang, beme time e cetéékewé na a melepiing. Be wo paceli e engen ha a melepiing, ke time e uce temehi he na e â lang.

³⁶ He mwo ko wogewé ha a pwéélang, ke geé hegi a pwéélang, beme wogewé ni nahi a pwéélang.» Ke me e caa pii anaa wo lésu, ke e â taduwo ité kojalé.

Ni Juif ke time lé céihi ne ko lésu

³⁷ Hiwon ni inenaado na e pwo ne he pwahamiilé, kehe time lé uce céihi ne kon.

³⁸ Caa pacuwohi a pwooti na e pii wo pérféta Isaia: *Padaame, he woo paceli e céihi ne ko ni pwooti teme?* He go habwii ne tee a junuum? Ésaïe 53.1

³⁹ Ke e pii wo Isaia a watihen me time lé uce céihi:

⁴⁰ [E pii wo Padué pie]: É pwo me mwoiu ni punilé , beme time uce nimelé me lé alahi ko ni naamiilé, ke me lé temehi ko ni pwonimelé. Te muhi telé me lé bitelé bé céiéo, ke me é o uce pwo me wâé jélé. Ésaïe 6.10

⁴¹ E pii anaa wo Isaia be e caa mi alahi a junuu a wâé te lésu, ke e cihe kon.

⁴² Ke é hadenii ni apihuô juif, ke hiwon nina lé céhi ne kon. Ke time lé uce pii pwaatihi, be mwotilé ko ni Farasaio. Be koli lé bo pawielé mu ha a *mwotapitih.

⁴³ Be wâé telé a bwo pipaunulé te ni apulie, koja a bwo pipaunulé te Padué.

E tauti ni apulie a pwootti te lésu

⁴⁴ Ke e pii da me ubwo wo lésu pie: «Wo pana e céhi ne kong, ke time e uce céhi ne kong cehi, kehe é ne mwo ko pana e neéo bé.

⁴⁵ Ke wo pana e aliéo, ke e ali mwo pana e neéo bé.

⁴⁶ Woéo, ke pa pwéélang, na é âbé ne pwo bwohemwo, beme wo paceli e céhi ne kong, ke me time e o uce mu ha a melepiing.

⁴⁷ «Hemepie pwo paceli e téne ni pwootti tong ke me time e uce pitenedehi, ke time uce woéo na é tautieng. Be time é uce âbé me é tauti a bwohemwo, kehe me é *celuimi a bwohemwo.

⁴⁸ «Wo pana muhi ten kong, ke me time e uce hegi ni pwootti tong, ke o bo tautieng. A pwootti na é toii, ke e bo te tautieng ha a *Tan Alece.

⁴⁹ Be time é uce cihe mu ko ace bwo niimihi nen dong, kehe wo Caa na e neéo bé, ke e pii tong ati nina me é pii ke me é patemehi.

⁵⁰ Ke é temehi pie, a pihuô ten, ke a mulie dieli mwo. Nina é toii, ke é patemehi pwohewii ana e pii tong wo Caa.»

Ioane 13

E puu ni a lèpwo acémun den

¹ Ânebuhe a *pipwodéén ko a *Pacika, ke e temehi wo lésu pie, e caa tuie a benaamwon den: Me e engen mu pwo a bwohemwo me e taa too Caa. Ke te nihe ubwo a pwonimen ko ni ju béeñ, mu ha atabuhi kon die ha a pwonehin.

² É he babwén, he lé wiinaado me ni acémun den, ke wo Caatana, ke e caa ne ha a pwonime Judas Iscariot, pa naî Simon, a bwo niimihinaado pie, me e icu lésu.

³ Wo lésu, ke e te temehi pie, e caa ne ten me e pihuôhi ati ni naado wo Caa, e âbé mu ko Padué, ke e o te mwojuia ngemwo céii Padué.

⁴ Ke e caama mu pwo taap, ke e céi a céiu epwénen, ke e pé a mwaanu, ke e cieeng kon.

⁵ Ke e tapulicéihi a tabe ne ha a tam ubwo, ke e puu ni a ni acémun den. Ke e tahi ko a mwaanu na e cieeng kon.

É puu ni a pana pwo den mu kong

⁶ Me e tuie nge ko Simon Pétérú, ke e pii ten wo Pétérú pie: «He wogo Padaame, na me go puu ni ang?»

⁷Ke e hegi ne ten wo lésu pie: «Ana é pwo jenaa, ke time go uce téele temehi. Kehe go bo te temehi.»

⁸Ke e pii ten wo Pétérū pie: «Ûhu! Time go o uce puu ni ang!» Ke e hegi ne ten wo lésu pie: «Hemepie time é uce puu ni am, ke o te tice dem mu kong.»

⁹Ke e pii ten wo Simon Pétérū pie: «Time uce ni ang cehi, go Padaame, kehe ni ing mwo me a puning!»

¹⁰Ke e pii ten wo lésu pie: «Wo pana e caa puu ati a één, ke caa tice tooli kon. Ke te ju puu cehi ni an. Caa tice tooli kowé, kehe time uce tai wogewé ati.»

¹¹Be e caa te temehi pana e bo icueng. Weengaa a watihen me e pii pie: «Time uce tai wogewé ati.»

Geé pipwoebawé tewé

¹²Alecehe a bwo puu ne ni alé, ke e cuwo mwo ha a epwénen, ke e âmwo tebwo pwo taap, ke e pii telé pie: «Geé te temehi ana é pwo tewé?»

¹³Geé toii kong pie pa apipune tewé ke pa daame hewé. Éa, geé te ju pii ehi, be woéo.

¹⁴É puu ni awé, woéo pa apipune tewé ke pa daame hewé. Wogewé mwo, ke geé pipuu ni awé.

¹⁵Be é caa habwii tewé beme geé bo pwo, pwohewii ana é pwo tewé.

¹⁶É pii tewé a juuju pie: Wo pa apenem, ke time uce ubwo nang koja pa daame hen. Ke pa *apostolo, ke time uce ubwo nang koja pana e pahedeeng bé.

¹⁷«Hemepie geé temehi ninaa, ke o adéikewé, hemepie geé pwo.»

Time uce tai wogewé ati

¹⁸«Time é uce pii anaa ne kowé ati. É te temehi nina é pipégalilé. Kehe wâé heme e cuwo nina caa tii: *Wo pana gemu piwiinaado ibu me weeng, ke weeng pana e o icuéo. Psalme 41.10*

¹⁹«É mi pii tewé anaa jenaa, ânebuhe ace bwo tuie nen, be mepie e bo tuie, ke geé céihi pie, ‘WOÉO [ânebun, ke é jenaa, ke é dieli mwo]’.

²⁰É pii tewé a juuju pie: Wo paceli e hegi pana é neeng lé, ke e hegiéo. Ke wo pana e hegiéo, ke e hegi mwo pana e neéo bé.»

E pii beetihī a bwo icueng de Judas

Mataio 26.20–25; Maréko 14.17–21; Luka 22.14–23

²¹He e caa pii ni pwooti naa wo lésu, ke e téne he abwobwo a pwonimen, ke e pii telé pie: «É pii tewé a juuju pie: E bo pi-icuéo wo pa céiu béléwé.»

²²Ke lé piomelé wo l épwo acémun den, be time lé uce temehi pie he e pii ne koo.

²³Wo pa acémun den, na nihe eâname lésu ten, ke e tebwo pwo taap, cebwo lésu.

²⁴Ke e pwo inenaado ten wo Simon Pétérue me e tahimwohi pie he e ko cihe koo wo lésu.

²⁵Pa acémun den naa, ke e pioole nge céii lésu, ke e tahimwoeng pie: «Padaame, he wooélé?»

²⁶Ke e hegi ne ten wo lésu pie: «Wo pana é o bo ne ten a mepwoloa na é pate.» Ke e pate a mepwoloa, ke e ne te Judas, pa naî Simon Iscariot.

²⁷Ke me e te pé kuti ali mepwoloa wo Judas me e eni, ke e te taa he pwonimen kuti wo Caatana. Ke e pii ten wo lésu pie: «Go epin ko pwo aceli me go pwo!»

²⁸Te tice pace bélén ne pwo taap celi e temehi pie he e pii ten anaa be woté.

²⁹Be lé niimihi pie e pii ten, me e pwocuhi nina nimelé kon ne ko a pipwodéén, ai me e pati nina tice delé. Be pa acile mwani telé.

³⁰He e caa pé a mepwoloa wo Judas, ke e te â wie kuti, he caa melepiing.

**ni pwoooti bépamwoiou ni acémun den
(Pwahamii tii: 14—16)**

³¹⁻³²É he e wie wo Judas, ke e pii telé wo lésu pie: «É jenaa, ke o caa habwii a wâé te pa Nahi Apulie. Ke o paunu Padué, mu ko pa Naîn. Ke heme wonaa, ke wo Padué, ke e o paunu pa Naîn. Ke e o te ju téele pihabwii ne kon a bwo ubwo na a wâé ten.»

Geé pwo me pieânimewé tewé

³³«Ni naîng, é mwo te mu pelewé ha ace cuwo nahi benaamwon. Geé bo haneéo, kehe é pii tewé jenaa nina é caa pii te ni apihuô juif pie: “Pwocoon me geé â he na é â lang.”

³⁴É ne tewé a patén na mwo coho: Geé pwo me pieânimewé tewé. Pwohewii a bwo eânimung dewé, ke wogewé mwo, ke geé pwo me pieânimewé tewé.

³⁵Be me wonaa, ke lé bo temehi pie, wogewé, ke ni acémun dong, hemepie pieânimewé tewé.»

Go bo piwotéetaa kong, go Pétérue

³⁶Ke e pii ten wo Simon Pétérue pie: «Padaame, he go â wé?» Ke e hegi ne ten wo lésu pie: «He na é â lang, ke pwocoon me go âbé céing jenaa. Kehe go bo âbé céing ha ace céiu tan.»

³⁷Ke e pii ten wo Pétérue pie: «Padaame, he ade aceli pwocoon ne kong me é âdé céim jenaa? Te jan me é mele me dem jenaa!»

³⁸Ke e hegi ne ten wo lésu pie: «He o te jan me go mele me dong? É pii tem a juuju pie: Ânebuhe a bwo to te a ja, ke o caa ocié go ko piwotéetaa kong pie, time go uce temehiéo.»

Ioane 14

É pwopweehi ce atebwo tewé

¹ «Geé nemwo pwo me pinekepé ni pwonimewé. Geé céhi ne ko Padué, ke geé céhi ne mwo kong.

² Hiwon ni pwomwo ne pele Caa. Hemepie time uce wonaa, ke time é o uce pii tewé pie, é â pwopweehi he celi geé bo mu lang.

³ «Ke mepie é caa pwopweehi he celi me geé bo mu lang, ke é bo âmwobé, ke é bo péékewé, beme geé mu pelong, ne he na é mu lang.

⁴ Geé te temehi he na é â lang, be geé te temehi a pwaaden.»

Woéo na é pwaaden ke é juuju, ke é mulip

⁵ Ke e pii ten wo Toma pie: «Padaame, time geme uce temehi he celi go â lang. Geme o woté ko ace bwo temehi na a pwaaden?»

⁶ Ke e pii ten wo lésu pie: «Woéo, ke é pwaaden, ke é juuju, ke é mulip. Te tice paceli e â too Caa, hemepie time e uce mi âbé tooéo.

⁷ Hemepie geé temehiéo, ke geé o te temehi mwo Caa tong. Ke é jenaa, ke geé caa temehieng, ke geé caa alieng.»

Wo pana e aliéo ke e ali Caa

⁸ Ke e pii ten wo Filip pie: «Padaame, mepie go habwii teme Caa, ke caa te jan.»

⁹ Ke e pii ten wo lésu pie: «Caa bwolihi na é mu pelewé, ke time go uce téele temehiéo, go Filip? Wo pana e aliéo, ke e ali Caa. É mu ko ade na go pii mwo tong, pie me é habwii Caa?»

¹⁰ He time go uce céhi pie woéo ko Caa, ke wo Caa ke e kong? Ni pwooti na é pii tewé, ke time é uce pii mu kong. Te wo Caa na e mulie kong, ke e pwo ni penem.

¹¹ Geé céhi ne ko ana é pii pie: Woéo ko Caa, ke wo Caa, ke e kong. Ai geé céhi mu ko nina é pwo.»

O te junihe ubwo ni penem dewé

¹² «É pii tewé a juuju pie: Paceli e céhi ne kong, ke e o pwo mwo ni penem na é pwo. Ke e o bo pwo mwo celi nihe ubwo koja nina é pwo, be é caa âmwo pele Caa.

¹³ Tai nina geé bo ilehi ne he niing, ke é o bo pwo, beme a bwo pipaunu Caa, ke me habwii ne ko pa Naîn.

¹⁴ Hemepie geé ilehi ace céiu naado ne he niing, ke é o bo pwo ne tewé.»

O ne tewé a Jenen litihi

¹⁵ «Hemepie eânimewé tong, ke geé o téne dehi ni patén dong.

¹⁶Ke woéo, ke é bo ile Caa, beme e bo ne tewé paceli e wéikewé, ke me e mu pelewé dieli mwo:

¹⁷a *Jenen lithi na e *JUUJU. Pwocoon me lé hegieng ne pwo bwohemwo, be time lé alieng, ke time lé temehieng. Kehe wogewé, ke geé te temehieng be e pelewé, ke e kowé.»

Pana eânimén dong

¹⁸«Time é uce nekewé me tice nyaa me caa tewé, kehe é bo âmwobé.

¹⁹Caa time uce bwolihi, ke ni apulie, ke o caa time lé uce aliéo. Kehe wogewé, ke geé bo te aliéo mwo, be é mulie, ke geé bo te mulie mwo.

²⁰É ha a tan naa, ke geé bo temehi pie woéo ko Caa, ke wogewé kong, ke woéo kowé.

²¹Wo pana e kon ni patén dong ke me e ténedehi, ke weeng pana eânimén dong. Wo pana eânimén dong, ke o eâname Caa ten. Ke woéo mwo, ke o eânimung den, ke é o bo pihabwié ten.»

²²Ke e pii ten wo Jude (time uce Judas† Iscariot, kehe pa céiu) pie: «Padaame, go woté ko ace bwopwonen me go bo pipatemehiko ne teme, koja ni apulie pwo bwohemwo?»

²³Ke e hegi ne ten wo Iésu pie: «Hemepie eâname pace apulie tong, ke e o ténedehi a pwootti tong. Ke o eâname Caa ten, ke gemu bo âbé ne kon, ke gemu bo mu pelen.

²⁴Ke wo paceli time uce eânimén dong, ke me time e uce ténedehi a pwootti tong. Ke ni pwootti na é pii tewé, ke time e uce âbé mu kong, kehe e âbé mu ko Caa, na e neéo bé.»

É ne tewé a péém

²⁵«É pii tewé ninaa, he é mwo teko mu pelewé.

²⁶Pana e bo picani tewé, ke a Jenen lithi, na e neeng bé wo Padué ne he niing, ke e o pacémunikewé ko ni naado ati, ke e bo paniimihi tewé ati nina é caa pii.

²⁷«É ne pelewé a péém, ke é ne tewé mwo a péém dong. Time é uce ne tewé pwohewii a bwo ne nen de a bwohemwo. Beme time uce pinekepé ni pwonimewé, ke me time uce mwotikewé.

²⁸Geé caa téne ana é pii tewé pie: É o caa engen, kehe é bo mwojuia mwobé céikewé. «Hemepie eânimewé tong, ke geé bo pipwodéén, be é â céii Caa! Be wo Caa tong, ke te nihe ubwo nang kojaéo.

²⁹É pii tewé ninaa jenaa, ânebuhe ace bwo tuie ne ni naado naa, be mepie lé bo tuie, ke me geé céihi ne kon.

³⁰Caa time é bo uce nihe cihe tewé mwo, be e o caa tuie wo pa daame he a ta ne pwo a bwohemwo. Kehe o te tice aceli jan me e pwo ne kong.

³¹Ke ni apulie pwo bwohemwo, ke lé o bo temehi pie eânimung de Caa, ke é o pwo nina e patupwo ne tong me é pwo. «Geé caama, me genye engen mu éni!»

Ioane 15

Woéo pa ju éé tabe megele

¹«Woéo, ke pa ju éé tabe megele, ke wo Caa tong, ke pa awéihi na a ni tabe megele.

²Tai ni dihen na lé mu kong na tice acehin, ke e pétaabwon. Ke ni dihen na pwo acehin, ke e pwopweehi kon, beme nihe aca.

³«É jenaa, ke caa tice tooli kowé, wonaa mu ko a pwooti na é pii tewé.

⁴Geé mu kong, ke é o bo mu kowé. Be pwocoon me e aca na a dihe tabe megele, hemepie time uce paati ko a watihen. Ke o te wonaa ne mwo kowé, hemepie time geé uce mu kong.

⁵«Woéo, ke pa watihen, ke wogewé ni dihen. Wo paceli e mu kong, ke é o mu kon, ke o hiwon ni acehi ni penem den. Pwocoon me geé pwo ace céiu naado hemepie tieéo kowé.

⁶Hemepie pwo paceli time e uce mu kong, ke o tahieng wie, pwohewii ni dihe tabe megele na caa meiu. Ke genye tai, ke genye tahi ne pwo miû, beme éle.»

Wâé heme geé mu kong

⁷«Hemepie geé mu kong, ke me e mu kowé ni pwooti tong, ke celi geé o ilehi, ke é bo ne tewé.

⁸Ke weengaa a bwo pipaunu Caa, hemepie hiwon ni acehi ni penem dewé. Ke me wonaa, ke geé habwii pie wogewé, ke ni acémun dong.

⁹«Pwohewii a bwo eâname Caa tong, woéo mwo, ke te eânimung mwo tewé. Geé mu ha a pipwoééhe tong.

¹⁰Hemepie geé ténedehi ni patén dong, ke geé mu ha a pipwoééhe tong, pwohewii a bwo piténedehi nen dong ni patén de Caa, ke é mu ha a pipwoééhe ten.

¹¹«É caa mi pii tewé ninaa, beme e mu kowé a pipwodéén dong, ke me hején a pipwodéén dewé.»

Wâé heme pieânimewé tewé

¹²«Weengi a patén dong: Wâé heme pieânimewé tewé, pwohewii a bwo eânimung dewé.

¹³Mepie e patieden a mulihen wo pace céiu apulie me de ni ju béén, ke a inen pie junihe ubwo a bwo eânimen delé.

¹⁴Wogewé, ke ni bééng, hemepie geé pwo nina é pii tewé.

¹⁵Caa time é uce toii kowé pie ni apenem dong, be time e uce temehi wo pa apenem aceli e pwo wo pa daame hen. Kehe é caa toii kowé pie ni béeing, be é caa patemehi tewé nina é picaa mu ko Caa.

¹⁶Time uce wogewé na geé pipégaliéo, kehe woéo na é pipégalikewé. Ke é nekewé beme geé ân, ke me pwo ce acehi ni penem dewé. Ni acehi ni penem dewé naa, ke me o mu dieli mwo. Ke nina geé bo ilehi koja Caa ne he niing, ke e bo ne tewé.

¹⁷Ana é pii tewé me geé pwo: Wâé heme pieânimewé tewé.»

Lé o bo téétikewé mu kong

¹⁸«Hemepie e téétikewé na a bwohemwo, ke wâé heme geé temehi pie e mi téétiéo ânebuhewé.

¹⁹Hemepie wogewé ni bée a bwohemwo, ke o eâname a bwohemwo tewé, ke o wogewé mwo ni apulie ten. Kehe time geé uce bée a bwohemwo, be é caa pipégalikewé mu pwo a bwohemwo. Ke é mu ko anaa, na e téétikewé na a bwohemwo.

²⁰Geé niimihi a pwooti na é caa pii tewé: Wo pa apenem, ke time uce ubwo nang koja pa daame hen. «Lé pwo nina ta ne kong, ke lé o te pwo tewé mwo. Me time lé uce ténedehi a pwooti tong, ke time lé o uce ténedehi mwo ni pwooti tewé.

²¹«Ke lé o bo tai pwo tewé ati ninaa mu kong, be time lé uce temehi pana e neéo bé.

²²Hemepie time é uce âbé, ke me time é uce cihe telé, ke o te tice ta pwo telé. Kehe é jenaa, ke caa te tice aceli me lé pii beme pineulé ko ni ta pwo telé.

²³«Pana e téétiéo, ke e te tééti mwo Caa tong.

²⁴Mepie time é uce pwo ne hadenilé ni penem na te tice paceli jan me e pwo, ke me o te tice ta pwo telé. Kehe é jenaa, ke lé caa alihi, ke lé téétikemu me Caa,

²⁵beme e tuie ana tii ne he ni tii iitihi telé pie: *Lé téétiéo he te tice watihen.*» *Psaume 35.19*

É nebé pa apicani tewé

²⁶«Hemepie e bo tuie a *Jenen litih, pana e bo picani tewé ne he nii Caa, a Jenen litih na e juuju, na e bo âbé mu ko Caa, ke e bo âbé patemehiéo ne tewé.

²⁷Ke wogewé mwo, ke geé o bo patemehiéo, be geé caa mu pelong ha atabuhi kon.»

Ioane 16

É pii tewé beme geé cumang

- ¹«É pii tewé ninaa be me wonaa, ke me time geé uce patieden ni céhi tewé.
- ²Lé bo pawiekewé mu he ni *mwotapitihi. Ke o tuie a benaamwon na ni apulie, ke lé bo taunikewé, ke lé niimihi pie lé pipwoeabwé te Padué.
- ³Wonaa ni bwopemilé, be time lé uce temehi Caa, ke time lé uce temehiéo.
- ⁴É pii tewé ni pwooti naa, beme geé bo piniihi nina é pii tewé, hemepie e bo tuie a tan naa.»

Wâé heme é engen

«Time é uce mi pii tewé ni pwooti naa, he é mwo mu pelewé.

⁵É jenaa, ke é caa âmwo pele pana e neéo bé, ke te tice paceli e tahimwoéo mu hadeniiwé pie: “Go â wé?”

⁶«Ke piwahin ni pwonimewé ko ni pwooti na é pii tewé.

⁷Kehe é pii tewé a juju pie: Wâé ne kowé hemepie é engen, be mepie time é uce engen, ke time e o uce tuie wo pana me e bo picani tewé. Kehe é engen, ke é bo neeng bé céikewé.»

A penem de a Jenen litihi

⁸«Ke hemepie e bo âbé, ke e o patemehi ne te ni apulie pwo bwohemwo, a ta, ke a mwomwon, ke a tautinaado.

⁹Be lé pitalupe ne ha a ta, be time lé uce céhi ne kong.

¹⁰Ke lé pitalupe ne ha a mwomwon, be é â pele Caa tong, ke time geé o bo uce aliéo mwo.

¹¹Ke lé pitalupe mwo ne ha a tautinaado, be caa tauti pa daame he a ta ne pwo a bwohemwo.

¹² «Hiwon nina me é pii tewé mwo, kehe o mwo nihe pwocoon ne kowé jenaa.

¹³Ke hemepie e bo tuie wo pa bépican tewé, a *Jenen litihi na e *JUUJU, ke e o bo péékewé ne ha a JUUJU. Be time e o bo uce piche mu kon, kehe e o bo pii nina e téne. Ke e o bo mi pii tewé nina o bo tuie.

¹⁴E o bo habwii *a wâé tong, be e bo pé mu ko ni dong, ke e bo patemehi tewé.

¹⁵Tai ni de Caa, ke te ni dong mwo. É mu ko anaa, na é pii pie: E pé mu ko ni dong, ke e bo patemehi tewé.»

A piwahin ke o â a pipwodéén

¹⁶ «Mwo pwo a cuwo benaamwon na o caa time geé uce aliéo. Ke bo pwo mwo a benaamwon na geé bo aliéo mwo.»

¹⁷Ke lé pipii telé ni béé acémun den pie: «Ade aceli nimen me e pii tenye? É mu ko ade na e pii pie: “Mwo pwo a cuwo benaamwon na o caa time geé uce aliéo, ke bo pwo mwo a benaamwon na geé bo aliéo mwo”, ke “É â pele Caa”?

¹⁸Ke he a bwopiinen pie woté: “Mwo pwo a cuwo benaamwon”? Time nye uce temehi pie e cihe ko ace de.»

¹⁹Ke e temehi wo lésu pie nimelé me lé tahimwoeng, ke e pii telé pie: «Geé pitahimwokewé ko ana é pii pie: “Mwo pwo a cuwo benaamwon na o caa time geé bo uce aliéo, ke bo pwo mwo a benaamwon na geé bo aliéo mwo.”

²⁰É pii tewé a juuju pie: Geé bo é, ke geé bo mu ha a piwahin. Ke lé o bo pipwodéén ni apulie pwo bwohemwo. Geé bo mu ha a piwahin, kehe a piwahin naa, ke o bo taatééhi me a pipwodéén.

²¹«Hemepie e picile ewa ê toomwo, ke e mu he ni picani, be caa a benaamwon na cunu nang hen. Ke hemepie e caa tuie a cuwo nahi ewa, ke e caa pineuhi a bwo cunu nang, é mu ko a pipwodéén ko a ewa na e âbeele.

²²Wogewé mwo jenaa, ke mwo wogewé ha a piwahin, kehe é o bo tookewé mwo, ke o bo pipwodéén mwo ni pwonimewé. Te tice paceli jan me e pé kojakewé a pipwodéén naa.»

Geé ilehi be geé o hegí

²³«É ha a tan naa, ke caa time geé uce tahimwoéo ko a céiu naado. É pii tewé a juuju pie: Tai nina geé bo ilehi koja Caa ne he niing, ke e bo ne tewé.

²⁴Dieli jenaa, ke mwo te tice aceli geé ilehi ne he niing. Geé ilehi, beme geé o bo hegí, ke me hején a pipwodéén dewé.»

É o caa taamwo pele Caa

²⁵«É cihe tewé ko ninaa ne he ocine. E âbé a benaamwon na time é bo uce cihe ne mwo kowé he ocine, kehe é o caa cihe pwaatihi tewé ko Caa.

²⁶É ha a tan naa, ke geé o ilehi ne he niing. «Ke time é uce pii tewé pie, é o bo pwoiitihi te Caa me dewé.

²⁷Be eânlime Caa tewé, be eânlime tong, ke geé céihi pie é âbé mu ko Padué.

²⁸É wie mu ko Caa, ke é âbé ne pwo a bwohemwo. É jenaa, ke é ece a bwohemwo, ke é mwojuia ne mwo pele Caa.»

É caa piwéden koja a bwohemwo

²⁹Ke lé pii ten ne ni acémun den pie: «Go te alihí, é jenaa, ke go cihe pwaatihi, ke time go uce cihe he ocine!

³⁰É jenaa, ke geme temehi pie go temehi ati ni naado, ke time uce junado me geme tahimwoko [be go te temehi ni âniimihinaado teme]. É mu ko anaa, ke geme céihi pie, go âbé mu ko Padué.»

³¹Ke e hegí ne telé wo lésu pie: «He é jenaa na geé bwobe céihi?

³²Weengi a benaamwon, ke e caa tuie. Geé o bo pipiiden ne he ni piduaan, ke geé o bo neéo cehi. Kehe time uce woéo cehi, be te e pelong wo Caa.

³³É caa pii tewé anaa, beme e kowé a péém mu kong. Geé o bo mu he ni picani ne pwo a bwohemwo. Kehe geé mwoiu, be woéo, ke é caa piwéden koja a bwohemwo!»

Ioane 17

A pwopwoiitihi te lésu

¹Alechehe ni pwooti naa, ke e eti ni naamiin wo lésu, ke e pii pie: «Caa, a benaamwon, ke caa tuie. Go habwii *a wâé te pa Naîm, beme e habwii a wâé tem wo pa Naîm.

²Go caa ne ten a pihuô ne ko ni apulie ati, beme e ne a mulie na tice anebwén kon ne te nina go nelé ten.

³Be a mulie na tice anebwén kon, ke me lé temehiko, wogo Padué na go juuju, ke pana go nebé, lésu Kériso.

⁴«É habwii a wâé tem ne pwo a bwohemwo, ke é panebwénihi ana go ne tong me é pwo.

⁵Caa, é jenaa, ke go habwii a wâé tong ne pelem: a wâé na go caa ne tong, he mwo te tieden a bwohemwo.»

E pwoiitihi me de ni acémun den

⁶«É patemehiko ne te ni apulie na go nelé tong ne pwo bwohemwo: te ni apulie tem, ke he go caa nelé tong. Lé caa te ténedehi ni pwooti tem.

⁷Ke é jenaa, ke lé caa te temehi pie, tai ni naado na go ne tong, ke e te tai âbé mu kom.

⁸Be é caa ne telé ni pwooti na go ne tong, ke lé caa hegi. Be lé caa te temehi pie é âbé mu kom, ke lé caa céihi pie wogo na go neéo bé.

⁹«É ne kolé na é pwoiitihi. Kehe time é uce pwoiitihi ne ko a bwohemwo, kehe é ne ko nina go nelé tong, be ni apulie tem.

¹⁰Tai nina etong, ke etem; ke nina etem, ke etong. Ke a wâé tong, ke e kolé.

¹¹«É jenaa, ke caa time uce woéo pwo bwohemwo, kehe woélé, ke te élé pwo bwohemwo. Ke é caa âmwo lé céiiko. Caa, go cilelé ne ha a niim na iitihi, a niim na go ne tong, beme céiu jélé pwohewiikenyu.

¹²He mwo woéo pelelé ne pwo bwohemwo, ke é cilelé ne he niim. É wéi ni apulie na go nelé tong, ke te tice paceli tieeng, te icehi pa nahi apipatieden, beme *pajuujuhi a pwooti na caa tii.»

Go wéi nina lé mu pwo bwohemwo

¹³«É jenaa, ke é caa âdé céiiko, ke é pii ni pwooti naa ne pwo bwohemwo, beme e mu kolé a pipwodéén dong, a pipwodéén na hején.

¹⁴É ne telé a pwooti tem. «Ke e téétilé na a bwohemwo, be time uce ni apulie pwo bwohemwo, pwohewiiéo, be time é uce âbé mu pwo bwohemwo.

¹⁵Time é uce ileko me go péélé mu pwo a bwohemwo, kehe me go wéilé ne ko [*Caatana] pana ta nang.

¹⁶Time uce ni apulie pwo bwohemwo, pwohewiiéo, be time é uce âbé mu pwo a bwohemwo.

¹⁷«Pacémunilé ko a *JUUJU, be a pwooti tem, ke a JUUJU.

¹⁸«Pwohewii a bwo neéo bé ne pwo bwohemwo, ke é nelé ngemwo pwo bwohemwo.

¹⁹É pineéo tem me delé, beme woélé mwo, ke me lé pinelé tem ha a juuju.»

E pi-ile me de ati lépwona lé o céihi

²⁰«Time é uce pwoitihi ne kolé cehi, kehe é ne mwo ko nina lé bo céihi ne kong mu ko ni pwooti telé.

²¹É ilehi me céiu jélé pwohewii a bwo céiu genyu, go Caa, be wogo kong, ke woéo kom, ke me céiu jélé ne konyu. Ke me e céihi na a bwohemwo pie, wogo na go neéo bé.

²²«É ne telé a wâé na go ne tong, beme céiu jélé pwohewii a bwo céiu genyu:

²³woéo kolé, ke wogo kong, beme te ju céiu jélé. Ke me e temehi na a bwohemwo pie, wogo na go neéo bé, ke me eânimem delé pwohewii a bwo eânimem dong.

²⁴«Caa, nimung me nina go nelé tong, ke me lé mu mwo pelong ne he na é mu lang, beme lé alahi a wâé tong, a wâé na go ne tong. Be eânimem dong ânebuhe atabuhi ko a bwohemwo.

²⁵Caa, wogo na go mwomwon. Time e uce temehiko na a bwohemwo, kehe woéo, ke é te temehiko. Ke ni apulie tong, ke lé temehi pie wogo na go neéo bé.

²⁶É pwo me lé temehi a niim. Ke é bo pwo mwo me lé temehi, beme a pwonimem kong, ke me e kolé, ke me é mu kolé.»

Ioane 18

Lé imwi lésu

Mataio 26.47–56; Maréko 14.43–52; Luka 22.47–53

¹Aleche a bwopiine ni pwooti naa, ke lé tahagéi a dihen Cédrone wo lésu me ni acémun den. Ke lé â taa ha a duaan na cemi acuwo hen.

²Wo Judas, pali e bwo pipwohuô ten, ke e te temehi mwo a duaan naa, be wo lésu me ni acémun den, ke lé mu âbé nelang.

³E pébé ni coda roma wo Judas me ni awéihi *mwaiitihi. Be lé pahedelé ngen ne ni caa te ni *apwoâpwailo me ni *Farasaio. Lé ân imi ni ei helé, me ni teua.

Woéo lésu mu Nazaret

⁴E caa te temehi wo lésu ati nina me lé pwo ne kon. Ke e â benilé, ke e pii telé pie: «He geé hanee?»

⁵⁻⁶Ke lé hegi ne ten pie: «Wo lésu mu Nazaret.» Ke e pii telé pie: «*WoÉO.» Ke lé te pitidicemwo kuti, ke lé tai tupwo ne pwo bwohemwo, woélé me Judas, pali e icueng.

⁷Ke e tahimwolé mwo wo lésu pie: «He geé hanee?» Ke lé pii mwo pie: «Wo lésu mu Nazaret.»

⁸Ke e hegi ne telé pie: «É caa ko pii tewé pie WoÉO. Hemepie geé ko haneéo, ke geé ne lépwoje me lé engen!»

⁹E pii anaa, beme e cuwo a pwooti na e pii pie: «Te tice pace apulie celi tieeng mu ko nina go nelé tong.»

¹⁰Ke e te céi kuti a teua ten wo Simon Pétérū mu ha a mwon, ke e tahi ko Malkus, pa apenem de pa *daame he lépwo apwoâpwailo, ke e tahagéi a jéénen ne pwo jui.

¹¹Ke e pii wo lésu te Pétérū pie: «Go ne homwo a teua tem ha a mwon! Woté, pwocoon me é ûdu a tabe ha a mwotabe ko picani na e ne tong wo Caa?»

Ne pele pa daame @ he lépwo apwoâpwailo

Mataio 26.57-75; Maréko 14.55-72; Luka 22.54-71

¹²Lé imwi lésu ne ni coda, me pa caa telé, me ni awéihi mwaiitihi, ke lé cieeng.

¹³Lé mi pééeng nge céii Hanne, be pa mwaa Kaïfe, pa daame he lépwo apwoâpwailo ha a jo naa.

¹⁴Kehe wo Kaïfe li e ne ali pihuô, ne te ni *Juif pie: «Wâé hemepie e mele wo pana céiu nang me de a puapulie ati.»

Lu piâcéin wo lupwo acémun den

¹⁵Lu âcéi lésu wo Simon Pétérū me pa céiu acémun den. Wo panaa, ke e te temehieng wo pali daame he lépwo apwoâpwailo. Ke e â taa pwo napwomwo pele pa daame he lépwo apwoâpwailo.

E piwotétaa ko lésu wo Pétérū

¹⁶E cuwo pwomwo cebwo a pomwa wo Pétérū, ke wo pali acémun béén, ke e cihe ne ko ê toomwo awéihi pomwa, beme e pwo me e taa wo Pétérū.

¹⁷Ke e pii te Pétérū wo êje pie: «He time uce wogo pa céiu *acémun de lésu?» Ke e hegi ne ten pie: «Ûhu!»

¹⁸Ke e â pwocadéu pele ni apenem me ni awéa na lé caa patéi miû, be ubwo a bwala.

E tahimwo lésu wo Hanne

¹⁹Wo [Hanne] pali daame he lédwo apwoâpwailo [ânebun] ke e tahimwo lésu ko lédwo acémun den, ke é ko ni cémun na e ne telé.

²⁰Ke e hegi ne ten wo lésu pie: «É mu te cihe pwaatihi ne tewé. É mu te pacémuni ni apulie ne he ni *mwotapitihi, ke é ne *huâ iitihi, he na lé mu te pipitilé nelang ne ni Juif. Ke te tice celi é pipii neduwohi.

²¹É mu ko ade na go tahimwoéo ko nina é pii? Go tahimwo lédwona lé téneéo, be lé te temehi nina é pii.»

²²He e ko pii anaa wo lésu, ke e tahi kon a in wo pa céu awéihi mwaiitihi, ke e pii ten pie: «Go wonaa a bwo hegi ne te pa daame he lédwo apwoâpwailo?»

²³Ke e pii ten wo lésu pie: «Hemepie ta ace bwo hegi nen, ke go pii tong aceli ta celi é pii. Ke hemepie wâé ace bwo hegi nen dong ne ten, ke é mu ko ade na go ahiéo?»

²⁴Ke wo Hanne, ke e ne lésu, he teko cieeng, nge céii Kaïfe, pa daame he lédwo apwoâpwailo [ha a benaamwon naa].

E piwotétaa mwo wo Pétérú

²⁵Mepwo wo Simon Pétérú, ke e mwo ko pwocadéu. Ke lé pii ten pie: «Wogo, ke he time uce pace céu acémun den?» Ke e hegi ne telé pie: «Ûhu, time é uce bélélé.»

²⁶E mu hadeniilé wo pa céu apenem de pa daame he lédwo apwoâpwailo, pa bélélé pali e tahagéi ali jéénen wo Pétérú. Ke e pii mwo ten pie: «He time uce wogo pana é alikeu me lésu, ne ha ali duaan li cemi acuwo hen?»

²⁷Ke e piwotétaa mwo wo Pétérú, ke e pii pie: «Ûhu!» Ke e te to kuti ali ja.

Wo lésu ne ânebuhe Pilate

Mataio 27.11–31; Maréko 15.2–20; Luka 23.1–25

²⁸He mwo ju acaama, ke lé pé lésu mu pele Kaïfe, nge he pomwa te *Pilate, pa gupéno te lédwo Roma. Time lé uce taa ha a mwa wo lédwo apihuô juif [be time uce pa Juif wo Pilate] beme time e uce mu kolé a ta, hemepie lé pé a wiinaado ko *Pacika.

²⁹Ke e wie benilé wo Pilate, ke e pii pie: «Ade aceli ta celi e pwo pa apulie ce, beme geé pipé ne kon?»

³⁰Ke lé hegi ne ten pie: «Hemepie paceli te tice ta pwo ten, ke me time geme o uce neeng dem.»

³¹É mu ko anaa, ke e pii telé wo Pilate pie: «Geé pééeng, ke geé tautieng âcehi ni patén dewé.» Ke lé pii wo lédwo Juif pie: «Te tice mwomwon deme me geme taunu pace céu apulie.»

³²E tuiebé ninaa, beme cuwo ni pwooti na e caa pii wo lésu. Be e caa mi pii telé a bwomune ace bwo mele ten.

Time uce e éni a Mwametau tong

³³E taa ha a mwa wo Pilate, ke e tote lésu ke e pii ten pie: «He wogo pa daame he ni Juif?»

³⁴Ke e hegi ne ten wo lésu pie: «He go te pipii a pwooti na mu kom, ai lé pii tem ne ce béén?»

³⁵Ke e hegi ne ten wo Pilate pie: «Kona woéo, ke he pa Juif? Be lé neko tong na a puapulie tem me ni caa te lépwo apwoâpwailo. Ke he ade aceli go pwo?»

³⁶Ke e hegi wo lésu pie: «Time uce e éni pwo bwohemwo a Mwametau tong. Be hemepie wonaa, ke wieli lé o pwopaing ne ni eabwé tong, beme time uce neéo te ni apihuô juif. Be a Mwametau tong, ke time uce e éni pwo bwohemwo.»

³⁷Ke e tahimwoeng wo Pilate pie: «Wogo, ke he pa daame?» Ke e hegi ne ten wo lésu pie: «A *JUUJU a bwopiinen dem. Woéo, ke é âbeeble ke é âbé ne éni pwo bwohemwo, beme é patemehi a JUUJU. Ke lé téne a pating ati ne ni apulie na e kolé a JUUJU.»

³⁸Ke e hegi ne ten wo Pilate pie: «A JUUJU, ke he ade?»

Nimelé ko Barabas

He e caa pii ni pwooti naa, ke e wie mwo, ke e â beni lépwo Juif. Ke e pii telé pie: «É ne kong, ke te tice aceli ta celi jan me e pwocuhinaado kon wo pa apulie ce.

³⁹Caa te cemang ne kowé, me é pwo me e wie mu he karépu wo pace céiu apulie, ha a tan ko Pacika. Ke woté? Nimewé me é patupwo ne tewé mwo pa daame he ni Juif?»

⁴⁰Ke lé tai toii da ko miiden ko pii pie: «Ûhu! Time uce weeng, kehe wo Barabas.» Wo panaa, ke pa apulie na te junihe ta nang.

Ioane 19

Lé pwotahinaado ne ko lésu

¹Ke e pahede ni coda wo *Pilate me lé pé lésu, ke me lé ahieng ko bwaliwota.

²Ke lé pihoonieng ne ni coda: Lé péi a kuron ko ni mii acuwo na pwo dan, ke lé neole pwo punin. Ke lé pwo me e cuwohe a epwén na te junihe megele [pwohewii a epwéne pa apulie na piubwo nang].

³Ke lé âbé mwonueng, ke lé pii pie: «Bwocu, go pa daame he ni *Juif! Adéiko!» Ke lé ahi a pwahamiin.

Cemeiteeng ne ko a kuricé!

⁴E wie mwo wo Pilate, ke e pii te ni Juif pie: «Geé téne, é pééeng wie, beme geé temehi pie te tice aceli é tooli ne kon celi ta ke me e pwocuhinaado.»

⁵Ke e wie wo lésu, he e pwo punin ali kuron li pwo dan, imi a epwén na megele. Ke e pii telé wo Pilate pie: «Weengi pali apulie!»

⁶He lé alien ne ni caa te ni *apwoâpwailo me ni awéihi *mwaiitihi, ke lé toii da pie: «Cemeiteeng! Cemeiteeng ne ko a *kuricé!» Ke e pii telé wo Pilate pie: «Geé te pééeng me geé cemeiteeng, be é ne tong, ke te tice ace ta celi é tooli ne kon beme e pwocuhinaado.»

⁷Ke lé hegi ne ten ne ni Juif pie: «Pwo a patén deme, ke é ne ha a patén naa, ke tii pie wâé heme e mele, be e pii pie weeng, ke pa *Naî Padué.»

E tahimwoeng mwo wo Pilate

⁸He e téne a pwooti naa wo Pilate, ke te nihe mwotieng.

⁹Ke e taa huâ, ke e pii te lésu pie: «Wogo, ke he pa apulie mu wé?» Ke time e uce hegi ne ten wo lésu.

¹⁰Ke e pii ten wo Pilate pie: «He woéo na muhi tem me go cihe tong? He time go uce temehi pie jan ne kong me é patupwoko, ke jan ne kong me é cemeiteko?»

¹¹Ke e hegi ne ten wo lésu pie: «Te tice aceli jan ne kom me go pwo tong, hemepie time uce ne tem mu he miiden ace pihuô ne kong. É mu ko anaa, ke te nihe ubwo a ta pwo te pana e icuéo ne tem.»

Nimen me e pawieeng mwo

¹²Ke e hane wo Pilate me e patupwoeng. Kehe lé wiikau ne ni Juif, ke lé pii pie: «Hemepie go patupwoeng, ke time uce wogo pa bée pa daame ubwo César. Be wo pana e pii pie weeng pa daame, ke pa apwobwoni César!»

¹³He e caa téne ni pwooti naa, ke e pé wie lésu wo Pilate, ke e tebwo pwo atebwo te pa atautinaado, ne he na pii kon lang pie ‘Cour pavée’; he pwo *ébérû, ke lé pii pie Gabata.

¹⁴A tan naa, ke a tan na lé piwâam ne ko a *Pacika hen. Ke caa goahen. Ke e pii wo Pilate te ni Juif pie: «Neko pa daame hewé!»

¹⁵Ke lé wiikau ke lé pii pie: «Me taunueng! Me taunueng! Cemeiteeng ne ko a kuricé!» Ke e pii telé wo Pilate pie: «Me é cemeite pa daame hewé ne ko a kuricé?» Ke lé hegi ne ni caa te ni apwoâpwailo pie: «Te tice pace céiu daame heme koja pa daame ubwo César!»

¹⁶Ke e neeng delé beme lé cemeiteeng ne ko a kuricé. Ke lé pé lésu ngen wo lépwo coda.

Lé cemeite lésu ne ko a kuricé

Mataio 27.33–50; Maréko 15.22–37; Luka 23.33–46

¹⁷E pé a kuricé ten wo lésu, ke e wie mu ha a pwomwo ubwo, beme e â ha a céiu duaan na pii kon pie Golgota he pwo ébérû, a bwopiinen pie ‘pwo a piipuni apulie’.

¹⁸É nelang he na lé o cemeiteeng ne ko a kuricé, me lupwo alo apulie, woilu he lupwo piduaan, ke wo lésu ha awiemelu.

¹⁹Ke e pwo me lé tii ne ko a ba-acuwo a céiu atii wo Pilate, pie: IÉSU MU NAZARET, PA DAAME HE LÉPWO JUIF, ke lé cemeite ne ko a kuricé.

²⁰Lé tii he pwo ébéru, *grek, ke *latin*, be a duaan na lé cemeite lésu ne ko a kuricé ne hen, ke é mwonuhi a pwomwo ubwo. Ke hiwon ni Juif na lé pine.

²¹Kehe lé pii te Pilate ne ni caa te ni apwoâpwailo, pie: «Go nemwo tii pie “Pa daame he ni Juif”, kehe go tii pie “**E pii pie woéo pa daame he ni Juif.**”»

²²Ke e hegi ne telé wo Pilate pie: «Ana é tii, ke é caa te tii.»

Lé pipwopii ni epwénen

²³He lé caa cemeite lésu ne ko a kuricé, ke lé pé ni epwénen ne ni coda, ke lé pipii me paa ni mwoto kon, me pipétaalé. Ke lé pé mwo a epwénen na te tice awoli kon, a mwaanu na hején,

²⁴ke lé pipii telé pie: «Genye nemwo tie, kehe genye céi metii ne kon, beme genye temehi pie woo paceli e bo pé.» Beme pacuwohi a pwooti na caa tii ne he ni tii iitihi pie: *Lé pipatihi ne kolé ni epwénung*, ke *lé picéi metii ne kon*. Psaume 22.19 Weengaa ana lé pwo ne ni coda.

Lé alieng ne ni apulie ten

²⁵Lé cuwo mwonuhi a kuricé te lésu wo nyaa ten, ke ê ciéé nyaa ten, ke wo Maria mwode Klopas, ke wo Maria mu Magdala.

²⁶Ke e ali nyaa ten wo lésu ne cebwo pa acémun den na te nihe eânimén den, ke e pii te nyaa ten pie: «Nyaa, neko pa naîm.»

²⁷Ke e pii te pali acémun den pie: «Neko nyaa tem.» Ke tabuhi ha a tan naa, ke e pé nyaa ten wo pali acémun den ne he pomwa ten.

E mele wo lésu

²⁸Alechehe anaa, ke e temehi wo lésu pie caa cuwo ati ni penem na e ne ten wo Caa. Ke e pii pie: «Nimung me é ûdu», beme e pajuujuhi ana caa te tii ne he ni tii iitihi.

²⁹E mu lang a mwotabe na oba ko a tabe megele na maga. Ke lé pate hen a mwaanu ne ni coda, ke lé cie ne ko a dihe *hysope*, ke lé ne mwonuhi a pwon.

³⁰Ke me e ûdu a tabe maga wo lésu, ke e pii pie: «É caa tai pacuwohi.» Ke e miibule, ke e ne a jenen.

E woli a céiu duaan wo pa céiu coda

³¹[He paciile] a tan na lé piwâam ko a *tan iitihi telé wo lèpwo Juif. Ke te time uce wâé te ni apihuô, hemepie lé mwo te mu ko a kuricé ni éé lésu me lupwo alo béen, ha a tan iitihi. Be a tan iitihi naa, ke te nihe pwonaado ne kon. Ke lé ile Pilate me e tatubwi ni alé [beme lé epin ko mele] ke me lé pé ni éélélé mulang.

³²Ke lé âbé ne ni coda beme lé tatubwi ni a pa bécéuhens, ke lé tatubwi mwo ni a pa béalohen, lupwo apwocuhinaado na cemeitelu ne ko ni piduaa lésu.

³³Ke me lé âbé mwonu lésu, ke lé alih i pie e caa mele, ke time lé uce tatubwi ni an.

³⁴Kehe pwo pa coda na e woli a céiu duaan ko a da, ke e te wie kuti a cewéle me a tabe.

³⁵Wo pana e alih i ninaa, ke e uti, ke ana e uti, ke a juuju. E te temehi pie e pii a juuju. E pajuujuhi beme geé céihi mwo wogewé.

³⁶E tui anaa, beme pajuujuhi nina tii ne he ni tii iitihi, pie: *Te tice ace duun celi tatubwi. Exode 12.46*

³⁷Ke: *Lé o bo alieng wo lépwona lé wolieng. Zakari 12.10*

Neeng he iitihi

Mataio 27.57–61; Maréko 15.42–47; Luka 23.50–56

³⁸Pwo pa céiu apulie mu Arimaté na pii kon pie Josef. Pa céiu *acémun de lésu, na e te pineduwoeng, be mwotieng ko ni apihuô juif. Ke e â ilehi a éé lésu koja Pilate. Ke e te neeng wo Pilate, me e â pé a éé lésu.

³⁹Ke e âbé céin wo Nikodème, pali e caa mi too lésu he bwén. E pébé lupwo tabe ûde na e pineibuhi, na *30 kilo*, a *myrrhe* ke a aloès.

⁴⁰Ke lu pé a éé lésu, ke lu tawii ko ni mwaanu, ke lu céihi a tabe ûde, be te a bwomu te ni Juif heme lé pineduwohi apulie.

⁴¹⁻⁴²Ke lu pééeng nge ha ali duaan li cemi acuwo hen, be e mwonuhi a duaan na lé taunu lésu ne hen, ke e lang mwo a bwomu na mwo te tice apulie hen. [Lu piepin ko neduwoeng lang] be o caa tabuhi a tan iitihi [he babwén, ke iitihi me lé neduwo ni amele ha a tan iitihi].

Ioane 20

E mulie cemwo wo lésu

Mataio 28.1–7; Maréko 16.1–8; Luka 24.1–12

¹He pwouihi pwopwometan, ke e â he iitihi wo Maria mu Magdala. Ke e alih i pie caa titiéhi ali péi mu ânebuhe a bwomuhe lésu.

²Ke e téte hane Simon Pétér, ke pa céiu acémun den na eâname lésu ten. Ke e pii telu pie: «Lé caa pé Padaame mu ha ali mwa péi, ke time geme uce temehi he celi lé neeng lang!»

³Lu wie wo Pétér me pa céiu acémun den, ke lu â ha ali mwa péi.

⁴Lu tai téte, kehe e piepin wo pa céiu acémun den koja Pétér, ke e mi tuiengen.

⁵E â pioole da, ke e alih i ni mwaanu na lé mu pwo bwohemwo, kehe time e uce taa.

⁶Ke e tehenebé wo Simon Pétér, ke e taa ha ali mwa péi he li lé ne lésu lang. Ke e alih i ni mwaanu na lé mu pwo bwohemwo.

⁷Kehe a mwaanu na lé tawii a puni lésu kon, ke time e uce mu he ni béé mwaanu. Be te capipihi, ke ne ha a céiu duaan.

⁸E bwo uce alecehe Pétéru wo pali béén, ke e taa ha ali mwa péi, ke e alih [pie te tie lésu lang] ke e céihi [pie e mulie cemwo mu ha amele].

⁹Kehe time lu uce téele temehi pie, caa mi tii ne he ni tii iitihi pie, e o bo mulie cemwo.

¹⁰Ke lu mwojuia ne mwo pelelu.

E pihabwieng ne te ni apulie ten

Mataio 28.9–10; Maréko 16.9–11; Luka 24.35–49

—Maria mu Magdala

¹¹Mepwo é ne ko Maria, ke e teko cuwo ko é pwomwo, cebwo ali mwa péi. He e ko é, ke e pioole da,

¹²ke e ali lupwo *âcélo na lu cuwohe ni epwén na pwojo, na lu ko tebwo he li e mu lang a éé lésu. Pa céiu, ke e tebwo he na e lang a punin, ke wo pa céiu, ke e tebwo he na e mu lang ni an.

¹³Ke lu pii ten pie: «Êje, he go é kona woté?» Ke e hegi ne telu pie: «É é niimi Padaame hung, be time é uce temehi he celi lé neeng lang.»

¹⁴He e ko pii anaa, ke e biteeng, ke e ali lésu he e ko cuwo, kehe time e uce temehi pie weeng.

¹⁵Ke e pii ten wo lésu pie: «Êje, he go é kona woté? He go hanee?» E niimihi pie pana e cihe ten, ke pa apenem he ni ni acuwo. Ke e pii ten pie: «Hemepie wogo na go pééeng, ke go pii tong he celi go neeng lang, beme é bo â pééeng.»

¹⁶Ke e pii ten wo lésu pie: «Maria!» Ke e niê ocemwo, ke e pii ten he pwo *ébérue pie: «Rabouni!», a bwopiinen pie ‘pa apipune’.

¹⁷Ke e pii ten wo lésu pie: «Go nemwo ti kong, be mwo time é uce téele taa pele Caa. Kehe go â too ni bééng, ke go pii telé pie, é o caa taa pele Caa tong, pa Caa tewé mwo; céii Padué hung, Padué hewé mwo.»

¹⁸Ke e te engen kuti wo Maria, ke e â patemehi te ni *acémun de lésu pie: «É ali Padaame!» Ke e uti telé a bwo picihe telu.

—Ni acémun den

¹⁹Ha a babwén naa, ke lé pimu ibu ne ni acémun den, ke lé capuhi ni pomwa, be mwotilé ko ni apihuô juif. Ke e te pihabwieng kuti ne ha awiemelé wo lésu, ke e pii telé pie: «Me e mu pelewé a péém!»

²⁰He e caa pii telé ninaa, ke e habwii ni naatiin, ke a duaan. Ke te nihe piwâénime ni acémun den, he lé ali Padaame.

²¹Ke e pii telé mwo wo lésu pie: «Me e mu pelewé a péém! Pwohewii a bwo neéo bé te Caa, woéo mwo, ke é nekewé ngen.»

²²Alecehe ni pwooti naa, ke e cuulé, ke e pii telé pie: «Geé hegi a *Jenen litih!

²³Ni apulie na geé pineuhi ni ta pwo telé, ke o te pineuhi, kehe nina time geé uce pineuhi ni ta pwo telé, ke e o te mu kolé.»

—Toma

²⁴Toma, na pii kon pie ‘pa Péidu’, pa céiu béé ni 12 acémun den, ke tieeng hadenilé he e âbé wo lésu.

²⁵Ni béé acémun de lésu, ke lé pii te Toma pie: «Geme ali Padaame!» Kehe e pii telé pie: «Hemepie time é uce alahi ne he naatiin a ahi toki, ke me time é uce ne kon a mwodéing, ke me time é uce ne ko a duaan a ing, ke time é uce céih!»

²⁶Alecehe a naadenitan na céiu, ke lé pitoolé mwo ne ha a mwa wo lèpwo acémun de lésu, ke e mu pelelé wo Toma. Ke lé tai capuhi ni pomwa ko kilé. Ke e âbé wo lésu, ke e cuwo hadenilé. Ke e pii pie: «Me e mu pelewé a péém!»

²⁷Ke e pii te Toma pie: «Nebé éni a mwodéim, ke go alahi ni ing. Ne mwobé a im, ke go ne ko a duaang. Nemwo pwo me pinekepé a pwonimem, kehe go céih!»

²⁸Ke e hegi ne ten wo Toma pie: «Padaame hung ke Padué hung!»

²⁹Ke e pii ten wo lésu pie: «Go céih be go aliéo. *Adéi lèpwona time lé uce alahi, kehe lé céih!»

É ko ade na tii a tii ce?

³⁰Hiwon ni béé *inenaado na pwojunuun na e pwo wo lésu, ne he pwahamii ni acémun den, kehe time uce tii ati ne ha a tii ce.

³¹Kehe nina tii ne éni, ke e ne beme geé céih pie wo lésu, ke pa *Mesia, pa *Naî Padué. Ke mepie geé céih, ke etewé a mulie ne he niin.

Ioane 21

É ticepwon ne Galilé

¹Alecehe anaa, ke e pihabwieng wo lésu ne te ni acémun den, ne ko jije a *jié Galilé. Woni a bwo pihabwieng ne telé:

²Simon Pétérú, Toma na pii kon pie ‘pa Péidu’, Natanaël na e âbé mu Kana ne Galilé, lupwo naî Zébédé, me lupwo alo *acémun de lésu, ke lé pitoolé nelang.

³Ke e pii telé wo Simon Pétérú pie: «É mwo â pwotau.» Ke lé hegi ne ten pie: «Geme âdé céim.» Ke lé wie, ke lé taa pwo ong. Ke é ha a bwén naa, ke te tice âpéhelé.

⁴He mwo ju acaama, ke e mu ticepwon wo lésu. Kehe time lé uce temehi ne ni acémun den pie weeng.

⁵Ke e pii telé pie: «Lépwoje, te tice ikua tewé?» Ke lé hegi ne ten pie: «Ûhu.»

Lé temehi lésu

⁶Ke e pii telé pie: «Geé tahi a pua nge pwo jui ne ko a ong, ke geé bo tooli.» Ke lé tahi a pua, ke te nihe pwocoon me lé céida mwobé, be te junihe hiwon ni ikua.

⁷Ke e pii te Pétérū wo pa acémun na eâname lésu ten, pie: «Wo Padaame!» Ke me e te téne anaa wo Pétérū, ke e epin ko apilihi kon ni epwénen, ke e téele ole he tabe.

⁸Ke lé âbé pwo ong ni béé acémun den, he lé ko céi a pua, be te nihe oba ko ikua. Be time uce élé ité kojan ticepwon.

⁹He lé caa ole mu pwo ong, ke lé alihī ni daapi na éle, na e pwon ni ikua, ke pwo ni pwoloa cebwon.

¹⁰Ke e pii telé wo lésu pie: «Geé pébé ce béé ikua mu ko ni âpéhewé.»

¹¹Ke e taa pwo ong wo Simon Pétérū, ke e céi ali pua, ke te ju oba ko ni pilehe ikua na 153. Kehe time uce tie a pua.

¹²Ke e pii telé wo lésu pie: «Geé âbé pé celi me geé wii!» Ke te tice pace acémun den celi e tahimwoeng pie: «Wogo, ke he woo?» Be lé te tai temehi pie wo Padaame.

¹³Ke e âbé mwonulé wo lésu, ke e pé a pwoloa ke e patihī ne kolé, ke e pé mwo a ikua, ke e ne telé.

¹⁴Caa a béciehe ni bwo pihabwieng ne te ni acémun den, tabuhi he e mulie cemwo mu ha amele.

Lu picihe wo lésu me Pétérū

¹⁵Alechehe a bwo wiinaado telé, ke e tahimwo Simon Pétérū wo lésu pie: «Simon, pa naî Jonas, te eânimem dong koja lépwoje?» Ke e hegi ne ten pie: «Éa, go Padaame, go te temehi pie eânimung dem.» Ke e pii ten wo lésu pie: «Go ne ce wiinaado te ni nahi muto tong.»

¹⁶Ke e pii ten mwo a béokelohen pie: «Simon, pa naî Jonas, te eânimem dong?» Ke e hegi wo Pétérū pie: «Éa, go Padaame, go te temehi pie eânimung dem.» Ke e pii ten wo lésu pie: «Go wéhi ehi ni muto tong.»

¹⁷Ke e pii ten mwo a béciehen pie: «Simon, pa naî Jonas, te eânimem dong?» Ke ju piwahin a pwonime Pétérū ko ana e caa ocié ko pii ten pie: «Te eânimem kong?» Ke e hegi ne ten pie: «Padaame, go te temehi ati ni naado, ke go te temehi pie eânimung dem!» Ke e pii ten wo lésu pie: «Go ne ce wiinaado te ni muto tong.

¹⁸É pii tem a juuju pie: He mwo ewa go, ke go te pine cehi a taihenam, ke go â he na nimem me go â lang. Ke hemepie bo caa ukéiu go, ke go bo eti ni im, beme e cie a taihenam wo pace céiu apulie. Ke e o bo pééko nge he na time uce nimem me go â lang.»

¹⁹ E pii anaa, beme e patemehi te Pétérú ace bwo mele ten, beme e habwii *a wâé te Padué. Ke e pii ten pie: «Go âbé céing!»

Wo pana eâname lésu ten

²⁰ Ke e niê ocemwo wo Pétérú, ke e ali pa céiu acémun den he e âbé céilé, pali te nihe eâname lésu ten, pali e pioole nge céii lésu he li lé wiinaado, ke e pii ten pie: «Padaame, he woo paceli e bo icuko?»

²¹ He e alieng, ke e pii te lésu wo Pétérú pie: «Padaame, wo paje, ke ade aceli e bo tuie ne kon?»

²² Ke e pii ten wo lésu pie: «Hemepie nimung me e mulie dieli hemepie é bo âmwobé, ke te tice aceli me go pii ne kon. Kehe wogo, ke go âbé céing!»

²³ É mulang, ke a bwopiinen naa, ke lé caa pii ne ni acéihi pie, pa acémun naa, ke time e o uce mele. Kehe time e uce pii wo lésu te Pétérú, pie: «Time e o uce mele.» Kehe e pii pie: «Hemepie nimung me e mulie dieli hemepie é bo âmwobé, ke te tice aceli me go pii ne kon.»

²⁴ Te wo pa acémun naa, na e uti ni pwooti ce, ke e tii mwo. Ke geme temehi pie nina e uti, ke ni juuju.

²⁵ Nihe hiwon ni béé naado na é pwo wo lésu. Kehe mepie lé tii ati nina e pwo, ke é niimihi pie time uce jan ne ko a bwohemwo ati me e mu hen ni tii na lé tii ne kon!

Apostolo

Apostolo 1

É alecehe a bwo mulie cemwo te lésu

¹Téofile, é pii ne ha a bécéiuhe tii tong, ati nina e pwo wo lésu, ke pacémunihi mu ha atabuhi kon,

²die ha a tan na céieng da he *miiden. Ânebuhe anaa, ke e mi ne ni pihuô ten, mu ko a *Jenen litih, ne te lépwo *apostolo na e caa pipégalilé.

E pii a bwo opé te a Jenen litih

³Alecehe a bwo mele ten, ke e pihabwieng delé pie e caa mulie cemwo. Ke e ne telé ni béé alih, ke e pihabwieng delé, he na 40 ni tan, ke e cihe ko a *Mwametau te Padué.

⁴É he lé ko pimu ibu, ke e pii telé pie: «Geé nemwo engen mu *lérusaléma, kehe geé ucéihi ana e caa mi pii wo Caa, ke ali é caa pii tewé mwo.

⁵Be e *pipuu apulie ko a tabe wo loane, kehe ju lupwoce tan, ke o puukewé ko a Jenen litih.»

E taa he miiden wo lésu

⁶Lé pimu ibu wo lésu me lépwo apostolo, ke lé tahimwoeng pie: «Pa daame, caa é ha a benaamwon ce, na go pacuuli mwo a mwametau te *Isaraéla?»

⁷E hegi ne telé wo lésu pie: «Time uce wogewé na me geé temehi ce tan, ai ce benaamwon celi e ne wo Caa, ne he ni âpihuô ten.

⁸Kehe geé bo hegi a junuu a Jenen litih na e bo opé ne huîwé. Ke bo wogewé lépwo apajuujuéo ne lérusaléma, ati ha a *Judé ke é *Samari die pwo a bwohemwo ati.»

⁹É alecehe a bwopiine ninaa telé, ke e céieng da kojalé ne he miiden [wo Padué]. Ke é he lé mwo ko omeeng, ke tieeng ne ha a menii.

¹⁰Ke é he lé mwo ko niê da he miiden he e ko taa, ke pwo lupwo apulie na pwomelaa ni epwénelu, na lu âbeetilé.

¹¹Ke lu pii telé pie: «Lépwo apulie Galilé, é mu ko ade na geé ko cuwo ko niê da he miiden? Wo lésu na e céieng da he miiden mu ha awiemewé, ke e bo âmwobé, pwohewii a bwo alieng he e ko taa he miiden.»

Wo Matias ke e wodehi Judas

¹²Ke lé mwojuia mwo mu pwo a juwole ko ni Olivier wo lépwo apostolo, beme lé âmwo lérusaléma, he na céiu *kilomètre*.

¹³É he lé tuie ngen, ke lé taa ha a nemwa na e mu ko miiden ne ha a pwomwo na lé mu te cuwo ko mu hen. Wo lépwonaa, ke wo Pétér, Ioane, Cang, André,

Filip, Toma, Bartélemy, Mataio, Cang pali naî Alfé, Simon pali Zélote, ke wo Jude pali naî Cang.

¹⁴Lé pitaineibulé, ke lé tee pwoiitihi taaci, woélé me ni toomwo, me Maria nyaa te lésu me lépwo ciéé lésu.

E pacihe lépwo acéhi wo Pétérú

¹⁵É ha a céiu tan, ke piâmwonuhi a 120 lépwo acéhi na lé pimu ibu. Ke e cuwoda mu hadenilé wo Pétérú, ke e pii telé pie:

¹⁶«Lépwo âjiénung, wâé heme e cuwo a pwoooti, na e caa pii na a Jenen litihí na e cihe ko *Davita. Be e caa mi pii ânebun ana e pwo wo Judas, be e bo pwaaden beme lé imwi lésu.

¹⁷Kehe wo Judas, ke te pa céiu béeéme, ne he ni penem de lépwo apostolo.»

¹⁸(E pwocuhi a pule ko a cuhi a bwo icu lésu, é nelang na e tupwo, ke tehi a nan, ke â wie ni oohen.

¹⁹Ke lé tai temehi a jepule naa ati ne ni apulie ha a pwomwo ubwo lérusaléma, ke lé ne me nii a duaan naa pie, Akeldama, a bwopiinen he pwo patilé pie ‘a ninaado na pwo cewéle hen’.)

²⁰[E pii mwo wo Pétérú pie]: «Be caa tii ne ha a tii *Psaumes te Davita pie: Wâé heme tice apulie ha a pomwa ten. Me time lé bo uce mu mwo lang ne ce apulie.Psaume 69.26 «Ke e tii mwo pie: Wâé heme e wodehieng ne ha a penem den wo pace céiu.Psaume 109.8

²¹⁻²²«Wâé heme pwo pace céiu béeéme, beme pa céiu *apajuujuhi na a bwo mulie cemwo te lésu. Wâé heme pa apulie naa, ke pa céiu béeé lèpwona lé mu cuwo ko âbé céinye, he ni benaamwon na e mwo mu pelenye wo Padaame henye, tabuhi he li e pipuu apulie wo loane, die ha a benaamwon li e taamwo he miiden wo lésu.»

Lé pipégali Matias

²³Ke lé pipégali lupwo apulie na alo julu: Wo Josef na pii kon pie Barsabas, ke Justus, ke pa céiu na pii kon pie Matias.

²⁴Ke lé tai pwoiitihi, ke lé pii pie: «Padaame, wogo pana go temehi ni pwonime ati ni apulie, go habwii teme pace apulie celi go caa pipégalieng mu hadenii lupwo apulie ce,

²⁵me pa apostolo béeéme, beme e pé ni penem de Judas. Be e caa necu ni penem den wo Judas, ke e caa â ha a duaan den [be e caa hegi a cuhi a penem den na ta.]»

²⁶Ke lé céi metii ne kolu, ke hiwon ni metii te Matias. Ke lé pééeng me pa béeé lépwo 11 apostolo.

Apostolo 2

E opé a Jenen litihi

¹ É ha a tan ko Pentekote [a tan ubwo ko pitii âdaanu] ke lé pimu ibu ha a céiu duaan ne ni acéihi.

² Ke lé te téne kuti, ana e opé mu he miiden, na pwo huu hen, pwohewii a huu he a dan na junihe ubwo. Ke e te paai kuti a mwa na lé mu hen.

³ Ke lé alihni naado na e âbé, na pwohewii ni duwele miû, ke lé muko pétaapwo â ti kolé.

⁴ Ke e te ole huîlé kuti a *Jenen litihi. Ke lé cihe he ni muko pétaapwo pwooti, na e ne telé na a Jenen litihi.

Hiwon nina lé muko téne ni patilé

⁵ É ne *lérusaléma ha a benaamwon naa, ke lé mulie nelang wo lèpwo *Juif na te junihe eânimelé ko a pwoiitihi, na lé âbé mu he ni amu pitihia bwohemwo.

⁶ Ke lé tai téte, ke lé tai â mu, he na lé téne nelang ali huu he naado. Ke te junihe emegéi nalé, be lé téne nina lé céihi he lé cihe he ni pétaapwo pwooti.

⁷ Lé tai téetihi ati, ke te junihe emegéi nalé, ke lé pitahimwolé pie: «Kona ni apulie ce, na lé ko cihe, ke time uce tai ni apulie Galilé?»

⁸ Ke é mu ko ade na nye ténelé, he lé ko cihe he ni patinye?»

⁹ Be hadenilé, ke pwo ni apulie na lé âbé mu he ni amu: é Parte, ke é Médi, ke é Élam, ke é Mésopotami, ke é *Judé. Ke pwo ni béén na lé âbé mu he ni bée province roma: Kapados†, ke é Pont, ke é Asia,

¹⁰ ke é Frigi, ke é Pamfili. Ke ni béén, ke lé âbé mu *Aigupito, ke é he ni nahi amu ko a Libi, cebwo Cirène. Ke ni béén mwo, ke lé âbé mu *Rome,

¹¹ ke é mu Krète, ke é mu ha amu Arabi. Ke tai woélé ati, ke lé tai âbé ati mu he ni bée amu naa. Ke pwo ni béén mu pelelé na te ni ju Juif; ke ni béén na lé céihi ne ko a pwoiitihi te lèpwo Juif. Ke lé pitahimwolé pie: «Kona ade ace watihen me nye téne ni apulie Galilé naa, na lé ko pii ne he ni bée patinye ni naado na ubwo na e pwo wo Padué?»

¹² Ke lé te junihe téetihi ati, kehe time lé uce temehi aceli lé ko pii, ke lé pipii telé pie: «De ace bwopiine ani?»

¹³ Kehe icehi ana pwo ni béén na lé pihooni nina lé céihi, ke lé pii pie: «Lé te junihe piolo kuti ko tabe megele!»

E pacihe a bele wo Pétérú

¹⁴ Ke e cuwoda wo Pétérú me lèpwo ¹¹ *apostolo béén, ke e toii da, beme lé temehi ehi pie: «Wogenye lèpwo Juif, me wogewé ati na wogewé éni lérusaléma, geé tabemi heme é pii ehi tewé ana e ko tuie.

¹⁵ Ke time lé uce piolo ni apulie ce, pwohewii a bwo niimihi nen dewé, be mwo tekó ju 9 inetéale ko acaama, ha a benaamwon ce.

¹⁶Ûhu! Weengi kuti ali e caa pii wo *péroféta Joël pie:

¹⁷ E pii wo Padué pie: “É he *ni bénébwéne tan, ke é bo neoté a Jenung ne ko ati ni niide apulip. Ni ewa aiu me ewa toomwo tewé, ke lé bo patemehi a pwootitong. Ke é bo habwii ni naado ne he ni jene ni nahi ewa tewé. Ke mepwo é ne ko ni ukéiu tewé, ke é bo pacihelé ne he ni niûlé.

¹⁸ É he ni tan naa, ke é bo neole a Jenung ne ko ni eabwé tong, aiu me toomwo. Ke lé bo patemehi a pwootitong.”

¹⁹ “É bo pwo me tuie ni naado ne he miiden me pwo bwohemwo na te junihe ité ke time geé mu uce téele alihia: a cewéle, ke a miû, ke ahu.

²⁰ O biteeng na a téale me bwén; ke o megele a wole me pwohewii a cewéle, ânebuhe a tan de Padaame, a tan na ubwo, ke pwojunuun.

²¹ Ke é o *celuimi nina lé tote Padaame.”»Joël 3.1-5

E mulie cemwo wo lésu

²²[E pii mwo wo Pétérue pie]: «Lépwo apulie *Isaraéla, geé tabemi a pwooti na me é pii tewé: Wo lésu, pa apulie Nazaret, ke pa apulie na e caa te mi pipégalieng wo Padué. Ke wo Padué, ke e caa pihabwieng dewé. Geé te temehi ehi pie e ne me e pwo ni naado na te junihe ité, me ni *pipwojunuun, ne ha awiemewé.

²³Wo panaa, ke pa apulie na e pineeng dewé, pali geé pwo me e mele, ke geé neeng me lé cemeiteeng ne ko a *kuricé wo lépwo apulie na ta jélé, âcehi ana e mi temehi wo Padué, ke ana nimen kon.

²⁴Kehe icehi ana wo Padué, ke e celuimieng mwo, ke e pééeng koja ni picani ko a mele, ke e pamulipieng mwo, be te tice mwomwon de a mele ne kon.

²⁵Be e caa te mi piuti wo *Davita, he e pii pie: É te cuwo ko te ali taaci Padaame ânebuhung. Be e tebwo pwo a juing, ke time é uce pipenem.

²⁶ É te junihe pipwodéén me pietieng be é temehi pie, é hemepie é mele, ke o te wâé ne kong.

²⁷ Be wogo Padué, ke time go uce patupwo a jenung ne ha amele, ke time o uce nyaale a ééng, be go caa pipégaliéo me é eabwé tem.

²⁸ Go caa habwii tong a pwaaden nge ha a mulip, ke é o te junihe pipwodéén be go o tee mu pelong.”Psaume 16.8-11

²⁹[E pii mwo wo Pétérue pie]: «Lépwo âjiénung, time uce piwâ jo me é pii pwaatihi tewé pie, pa watihenye Davita, ke e mele, ke neduwoeng. Ke nye mwo tekohi a bwomuhen dieli jenaa.

³⁰Kehe icehi ana wo Davita, ke te pa péroféta, ke e te temehi nina e pii wo Padué ânebun, he e pii ten pie: É bo pipégali pace apulie mu ko ni piebehiko, ke é bo pwo me e tebwo pwo a atebwo tem.Psaume 132.11

³¹ «Ke e caa te temehi ânebun wo Davita ana e bo tuie, ke e caa te mi pii a bwo mulie cemwo te pa *Mesia. Ke a bwopiinen ce, na pii ne ko lésu: O time e uce patupwo a jenen ne ha amele, ke time o uce nyaale a één.

³² E caa pamulipi mwo pa lésu naa wo Padué, ke wogeme kuti l épwo *apajuujuhi nen.

³³ «Ke e neeng da wo Padué Caa ne *pwo a juin [beme e pihuôhi ati ni naado] ke e ne ten a Jenen litih na e caa nebwén ko pii ânebun. Ke é mulang, na e neopé kome a Jenen litih, pwohewii ana geé ko alahi ke téne jenaa.

³⁴ Be time e uce taa he miiden wo Davita, kehe icehi ana e pii pie: *Pwooti te Padaame Padué, na e pacihe pa daame hung: "Go âbé tebwo éni pwo a juing. [É ne tem a pihuô, ke o pipaunuko dieli mwo.]*

³⁵ É pwo me go caaite nina lé pwopa ne kom." *Psaume 110.1*

³⁶ «Wogewé a bele Isaraéla, wâé heme geé temehi pie, wo pali lésu li geé cemeiteeng ne ko a kuricé, ke e neeng wo Padué me pa Mesia ke me Padaame.»

Hiwon mwo nina lé céihi

³⁷ É alecehe a bwo téne nen delé a pwooti naa, ke tai tatééhi ke gini ni pwonimelé, ke lé pii te Pétérū me ni bée apostolo pie: «Lépwo âjiéneme, me geme pwo de?»

³⁸ Ke e pii telé wo Pétérū pie: «Geé pininim, ke geé bitekewé, ke me puukewé ne he nii lésu *Kériso, beme o pineuhi ni ta pwo tewé, ke me geé hegi a Jenen litih.

³⁹ Be a *piapwo ânebun naa, ke a dewé me ni naîwé, me ati ni apulie na junihe élé mwo ité, na e bo todelé wo Padué, Padaame henye.»

⁴⁰ Ke te junihe hiwon ni pwooti na e pajuujuhi ne telé, ke e pamwoiulé kon wo Pétérū. Ke e pii telé mwo pie: «Geé cela ko ni apulie na ta ni huô telé, beme geé o mulie.»

⁴¹ Hiwon ni apulie mu pelelé na lé hegi a pwooti te Pétérū. Ke lé céihi ne ko lésu, ke puulé. É ha a tan naa, ke lé caa âmwonuhi a 3000. Ke bo ni bée nina lé caa mi céihi ânebun.

A bwo mulie te nina lé céihi

⁴² Ati nina lé céihi, ke lé te cuwo ko pimu ibu me l épwo apostolo, ke lé téne ehi ni naado na lé pii. Ke lé ebii ibuhi a pwoloa, ke lé pipwoiitihi ibu.

⁴³ Ke mepwo ni apulie, ke lé téetihi, ke mwotilé, be wo Padué, ke e habwii ne ko l épwo apostolo ni pipwojunuun na junihe hiwon.

⁴⁴ Ati nina lé céihi, ke te céiu a pwonimelé, ke lé pwo me ni naamuulé, ke me tai ni delé.

⁴⁵Lé icuhi ni pule telé, me ni wâé telé, ke lé pipwopii ne kolé ni cuhin, beme cuhi nina tice telé.

⁴⁶Ati he ni tan, ke lé te tai pipwoitihi ibu *huâ iitihi, ke lé piwiinaado ibu ne he ni pomwa telé, ha a pipwodéén, ke a piwâénime.

⁴⁷Ke lé pipaunu Padué. Ke ati ni apulie, ke lé pipwodéén kolé. Ke wo Padaame, ke é ati he ni tan, ke e ne me pihiwon da nina e celuimilé.

Apostolo 3

Caa wâé mwo pa tebwomwa

¹É ha a benaamwon ko pwoitihi, ko cié inetéale alecehe a wiinaado, ke lu taa ha a *mwaiitihi te lépwo *Juif wo Pétérus me loane.

²É ko jije a pomwa ko a mwaiitihi, ke pwo pana tebwomwa nang ha a bwo piâbeeble ten. É ati he ni tan, ke lé pééeng bé, ke lé âbé neeng ha a pomwa na pii kon pie a Pomwa Wâé, beme e ilehi mwani koja ni apulie na lé taa *huâ iitihi.

³Ke me e ali Pétérus me loane, he lu pwo me lu â taa huâ iitihi, ke e ilelu ko mwani.

⁴Ke lu te ju omeeng ehi, ke e pii ten wo Pétérus pie: «Go omekemu!»

⁵Ke e te ju omelu ehi, ucéihi aceli me lu ne ten.

Go cuwoda ne he nii lésu!

⁶Kehe icehi ana e pii ten mwo wo Pétérus pie: «Te tice mwani tong, kehe icehi ana etong, ke é o ne tem: É ne he nii lésu Kériso mu Nazaret, ke go cuwoda ke go engen!»

⁷Ke e pétaa ole ko a in ne pwo juin wo Pétérus, ke e pwiieng. Ke caa te ju wâé mwo lupwo an.

⁸Ke e te cuwoda kuti, ke e engen. Ke lé taa me weeng ha ali mwaiitihi. Ke e te junihe pipwodéén, ke e téele, ke e pipaunu Padué.

⁹Ati ni apulie na lé alieng he e engen, ke lé pipaunu Padué.

¹⁰Be lé ali temehieng, pie pali e mu tee tebwo ha a Pomwa Wâé, beme e ilehi mwani. Lé téetihis ati ne ni apulie, ke lé wéhaahi, ana e tuie ne kon.

A pwooti te Pétérus ne te ni Isaraéla

¹¹Time e uce engen koja Pétérus me loane wo pali tebwomwa. Ke lé téetihis ati ne ni apulie, ke lé tétebé céilé ne ha a mwa na tice goomwa kon, na pii kon pie ‘Mwa te Solomona’.

¹²Ke me e alihis anaa wo Pétérus, ke e pii te a bele pie: «Lépwoli *Isaraéla, é ko ade na geé téetihis a bwo wâé paje? É ko ade na geé omekemu, pwohewin heme wogemu na gemu pwo me e engen wo pa apulie ce, ko ace junuumu, me ace âpipwoiipihinaado temu?»

¹³ «Wo Padué he *Abérama, me Isaaka, me lakobo, wo Padué he lépwo watihenye, ke e habwii pie te junihe ubwo lésu, pa eabwé ten. Ke wogewé kuti, ke geé icueng te ni daame hewé, ke geé téétieng ne ânebuhe gupéno *Pilate, he e caa te niimihi pie me e pawieeng mwo.

¹⁴ Muhi tewé me pawie pa apulie na e pipégalieng wo Padué, pa apulie na mwomwon nang, ke geé bo pawie pa ataunuhi apulie.

¹⁵ «Ke geé pwo me e mele wo pa Caa te a mulip. Kehe icehi ana wo Padué, ke e pwo me e mulie cemwo mu ha amele. Ke wogeme ni *apajuujuhi nen.

¹⁶ «Geé caa ko alahi temehi pa apulie ce. Be caa wâé nang ko a nii lésu, be gemu céhi ne kon. Ke a céhi ten ne ko lésu na e ne me wâé nang ne ânebuhewé ati.»

Geé bitekewé bé céii Padué

¹⁷ «Kehe icehi wogewé lépwo béeing, na é temehi pie ana geé pwo me lépwo daame hewé, ke time geé uce temehi.

¹⁸ Kehe icehi ana wo Padué na e pacuwohi ana lé caa patemehi ânebun ati ne ni péroféta ten. Ke lé caa pii pie, e bo mu he ni picani wo pa Mesia.

¹⁹ «Geé pininim, ke geé bitekewé bé céii Padué, beme e bo ciitili ni ta pwo tewé,

²⁰ ke me e bo ne tewé a pippowâé ten, ke e bo pawiebé céikewé pa Mesia ten, wo lésu, na e caa pipégalieng ânebun me dewé.

²¹ «Kehe icehi ana ha a benaamwon ce, ke e mwo te mu he miiden dieli ha ace tan celi e bo pine ehi ati ni naado wo Padué. Ke e caa mi pahede lépwo péroféta beme lé â pii beetihia anaa.

²² E pii wo *Moosé pie: *Wo Padué Padaame hewé, ke e bo pwo me e cuwoda mu hadeniiwé pace péroféta celi pwohewiiéo. Wâé heme geé bo piténédehi ati nina e bo pii tewé. Deutéronome 18.15*

²³ *Pana time e uce pitabemi pa péroféta naa, ke e bo pawieeng mu hadenii a bele. Deutéronome 18.19*

²⁴ «Ke ati lépwo péroféta, na tabuhi mu ko Samuel, ke lé tai pii beetihia ni tan ce.

²⁵ «Wogewé lépwo naî lépwo péroféta, a bwopiinen ce, ke te a dewé mwo. Be wo Padué, ke e caa pwo a *piapwo ten, ne te lépwo caa tenye. Ke e pii te Abérama pie: *É mu ko l'épwo piebehiko, ke é bo *adéi ati ni pwomwoiu ne pwo a bwohemwo. Genèse 22.18*

²⁶ «Be te mi é ne tewé ânebun, na e nebé lésu, pa apenem den, wo Padué, beme e ne tewé a adéihi, me geé bitekewé he picéiu, mu he ni ta pwo tewé.»

Apostolo 4

Pétéru me loane ne ânebuhe a mwohuô te lépwo Juif

¹É he lu mwo ko cihe te a puapulie wo Pétérū me loane, ke lé pwome tehenebé wo lépwo *apwoâpwailo, me pa apihuô te lépwo awéhi *mwaiitihi, me lépwo *Saducéen.

²Ke lé te nihe okéé ne kolu, he lu pacémunihi a puapulie, be lu cihe telé ko a bwo mulie cemwo te lésu mu ha amele. [Be time lé uce céihi pie pwo ace mulie cemwo wo lépwo Saducéen.]

³Ke lé imwilu, ke lé nelu he karépu die ko acaama, be he caa babwén.

⁴Ke hiwon nina lé téne a pwoott, ke lé céihi ne kon. Ke caa e mwonuhi 5000 a jéhi ni acéihi.

⁵É ha acaama hen, ke wo lépwo apihuô, me lépwo ukéiu, me lépwo *dotéén ko patén, ke lé pitaineibulé ne *lérusaléma,

⁶me Hanne† pa *daame he lépwo apwoâpwailo, me ati ni pwomwoiu ten: wo Kaïfe, me Jean, me Alexandre, me ni béén mwo.

⁷Lé ne Pétérū me loane ne ha awiemelé, ke lé tahimwolu pie: «É mu ko a junuu-û, ai é ne he nii-î na geu pwo me tieden a cunu?»

⁸Ke caa ju tili Pétérū na a *Jenen litihi, ke e pii telé pie: «Lépwo apihuô, me lépwo ukéiu te lépwo *Isaraéla,

⁹geé tahimwokemu jenaa, beme gemu pii tewé ace watihen me tieden a cunu ko pa apulie ce.

¹⁰Wâé heme geé temehi ati wogewé a puapulie Isaraéla, pie, é mu ko a nii lésu Kériso mu Nazaret, pana geé cemeiteeng ne ko a *kuricé, ke wo Padué, ke e pwo me e mulie cemwo mu ha amele. É mu kon, na wo pa apulie ce, ke e éni ânebuhewé he caa ju wâé nang.

¹¹Caa te tii ne he ni *tii iitihi pie: *Ali péi li geé tahi taabwon, wogewé lépwo abahi mwa, ke te anaa kuti a ju paamwa!* Psaume 118.22 «A péi naa, ke wo lésu.

¹²Be te tice ne haahi a miiden ace céiu nii apulie celi ne te lépwo apulie, me e celuimikenye, kehe te céiu cehi a nii lésu na e celuimikenye.»

Te tice aceli me lé mwo pii mwo

¹³Ni *mwohuô, ke lé alihia bwo cumang de Pétérū me loane, ke lé téetih, be lé temehi pie lupwo apulie mu hadenii ni apulie, na time lu uce nihe temehinaado, ke lé temehi pie lupwona lu mu âcéi lésu.

¹⁴Ke me lé ali pali apulie, he caa ju wâé nang ne pelelu, ke te tice aceli me lé mwo pii mwo.

¹⁵Lé pawielu mu ha ali mwohuô, beme lé mwo picihe hadeniilé.

¹⁶Ke lé pitahimwolé pie: «Genye bo woté te lupwo apulie ce? Be lé caa tai temehi ati ne ni apulie lérusaléma a *pipwojunuun na lu pwo, ke pwocoon me genye waaneduwohi.

¹⁷Kehe me time lé uce pipii ngen a jepule naa hadenii ni apulie. Genye pa-abwobwolu, ke paciitihi kolu me lu nemwo cihe ko a nii lésu, ne te ni apulie.»

¹⁸Ke lé tote Pétérū me loane mwo, ke lé paciitihi kolu, me lu nemwo cihe mwo, ke pwocémun ne he nii lésu.

¹⁹Kehe lu hegi ne telé pie: «Geé cuwoteeke pitauti pie, he te mwomwon ne ânebuhe Padué me gemu ténedekewé, ai wo Padué.

²⁰Be wogemu, ke time uce jan me time gemu pii ni naado na gemu alihī, me ni naado na gemu téne.»

²¹Ke é alecehe a bwo pa-abwobwolu, ke lé pawielu, be time lé uce temehi ace bwopwonen celi me lé pwo, beme lu pwocuhinaado. Wonaa mu ko ni apulie, be lé tai pipwoun de Padué ko ni naado na e pwo.

²²Be e caa wédenihi a 40 ni jo he pali apulie li wâé nang.

A pwoiitihi te lépwo acéihi

²³Alecehe a bwo pawie Pétérū, me loane, ke lu â too lépwo béélu, ke lu piuti telé ati ni naado na lé pii telu wo lépwo caa te lépwo apwoâpwailo me lépwo apihuô.

²⁴Ke heme lé téne ati ninaa, ke lé tai pwoun de Padué ne he ni pwonimelé na te céiu. Ke lé pii pie: «Padaame, wogo na go tabuhi a miiden me a bwohemwo, a jié me ati ni naado na e hen.

²⁵Wogo na go nebé a Jenen litihī me e cihe ko pa caa teme, pa apipenem dem *Davita, pie: É mu ko ade na lé tee okéé ne ni bele, ke lé pwo ni bwo niimihinaado na te piticenaado ne kon?

²⁶Wo lépwo daame ubwo ne pwo bwohemwo, ke lé pwo me lé pwopa ne ko Padaame Padué. Ke wo lépwo apihuô, ke lé pineibulé bwoni Padué me pa Mesia ten. Psaume 2.1–2

²⁷«Te a juuju, be wo pa daame Érode Antipas me gupéno Ponce *Pilate, ke lé picuwo ibu me lépwo apulie, me ni pwomwoiu Isaraéla ne ha a pwomwo ubwo ce. Ke lé pipwobwoni pa apipenem iitihi tem, wo lésu, na go pipégalieng me pa Mesia.

²⁸Kehe icehi ana me lé wonaa, ke lé pwo me cuwo ati nina go caa ne ânebun, âcehi nina nimem kon, me a junuum.

²⁹«Kehe é jenaa, go Padaame, ke go alihī a bwo pwohuu telé. Geme ilehi kojako pie go pwo me geme mwoiu, wogeme lépwo apipenem dem, beme time uce piwâ geme, me geme pii a pwooti tem.

³⁰Wâé heme go nebé a junuum beme wâé lépwona cunu jélē, me pwo ce inen, ke ce junuum ne he nii lésu, pa apipenem iitihi tem.»

³¹Ke me lé pwoiitihi ati, ke te éjén kuti ali duaan li lé mu hen. Ke e ole huîlé ati a Jenen litihī, ke caa time uce piwâ jélē me lé pii beetihī a pwooti te Padué.

A pipwoééhe te l épwo acéhi

³²Te tai ati kuti l épwo acéhi, ke te céiu a pwonimelé, ke céiu ni bwo niimihinaado telé. Te tice pace céiu béélé celi e pii pie: «Ni wâé tong, ke te ni dong cehi», kehe caa te tai ni delé.

³³Ke lé cihe mwoiuhi wo l épwo *apostolo, ke lé *pajuujuhi a bwo mulie cemwo te Padaame l ésu. Ke e neopé ne huîlé ati a pippowâé ten wo Padué.

³⁴Te tice pace céiu mu ha awiemelé celi pwo celi tieden kojaeng. Be te ati l épwona pwo ni apwoamu telé, ke ni mwa telé, ke lé icuhi, ke lé pébé ni cuhin,

³⁵ke lé ne te l épwo apostolo. Ke lé bo pipatihi ne kolé, âcehi nina tice telé.

³⁶Pwohewii ne ko Josef, pa apulie mu ha a pwomwoiu te Lévi, na e piâbeele ne pwo a één Chipre. Wo panaa, ke lé pitoii niin wo l épwo apostolo pie Barnabas, a bwopiinen pie ‘pa apipamwoiukenyé’.

³⁷Be e icuhi a apwoamu ten, ke e pébé ni cuhin, ke e ne te l épwo apostolo.

Apostolo 5

Lu gele wo Ananias me Safira

¹Pwo pa aiu na pii kon pie Ananias, me ê mwoden na pii kon pie Safira, ke lu icuhi a mepule telu.

²Lu piténelu me mwoden, ke e pébé a mwani céii l épwo apostolo wo Ananias, kehe icehi ana lu neduwoshi a céiu duaan, ke time lu uce ne telé ati.

³Ke e pii ten wo Pétérue pie: «Ananias, é mu ko ade me go pitabemi *Caatana, me e ganye a pwonimem, me go pigeti a *Jenen litih, beme go imwi a céiu duaan cuhi a céiu mepule.

⁴É ânebuhe a bwo icuhi nen, ke te a dem ali pule! Ke é alechehe a bwo icuhi nen, ke te a dem mwo ali mwani kon! Wonaa a bwo niimihinaado tem kona woté? Be time uce ni apulie na go getilé, kehe go geti Padué!»

⁵Ke me e téne ni pwootti naa wo Ananias, ke ele a nenehen, ke e tupwo ole. Ke nihe mwoti l épwona lé téne a jepule naa.

⁶Ke lé âbé ni ewa aiu, ke lé pwoipieng, ke pééeng wie, me lé â pineeng he iitihi.

Te piwien mwo ne ko mwoden

⁷É he ko cié inetéale ha a pwocehin, ke e tuiebé wo mwode Ananias. Mwo te tice aceli e temehi mu ko ali e mi tuie nelang.

⁸Ke e tahimwoeng wo Pétérue pie: «Te a cuhi ali mepule li geu icuhi?» Ke e hegine ten pie: «Éa, te a cuhin anaa kuti!»

⁹Ke e pii ten wo Pétérue pie: «Geu woté ko ace bwopwonan me geu piténekeu, me geu tacebwénihi a Jenen litih te Padaame? Go alihi, be wo l épwona lé mwo

te ju âbé mu ha a pineduwo pali aiu hem, ke nekolé nelang he pomwa. Ke lé o bo caa pééko mwo.»

¹⁰Ke ele a nenehen, ke e tupwo ole ko ni a Pétér. Ke lé taabé li apulie ewa, ke lé alieng he e caa mele, ke lé pééeng, ke lé â neduwoeng cebwo pali aiu hen.

¹¹Ke nihe mwoti ati lèpwo acéhi die ko ati nina lé téne ni bwomunen naa.

Ubwo a junuu Padué @ ne ko lèpwo apostolo

¹²Hiwon ni inenaado na pwo ne ha awieme a pubu apulie, mu ko lèpwo apostolo. Ke wo lèpwo acéhi, ke lé tai pimu ibu ne ha a 'Mwa te Solomona'.

¹³Ke piwâ ni béén me lé âbé céilé, kehe ni apulie, ke lé te junihe picedilé.

¹⁴E taa a jéhi ni aiu me ni toomwo na lé céhi ne ko Padaame, ke nihe hiwon jélé.

¹⁵Pwo ni cunu na lé péélé bé ne pwo pwaaden, ke lé nelé pwo ni apule, ke e pwo ni talihi, be lé niimihi pie, me e âbé wo Pétér, ke me e ti ko ce béén a démen.

¹⁶Hiwon ni apulie na lé âbé ne *lérusaléma, ni apulie na lé âbé mu he ni bée duaan ko jijen. Lé pébé nina cunu jélé, me nina pwo duéé kolé, ke te tai wâé jélé ati.

Lé imwi lèpwo apostolo

¹⁷É he ko wonaa, ke lé te tai cuwoda wo pa *daame he lèpwo apwoâpwailo me lèpwo *Saducéen, be lé te nihe pitaaba ne ko lèpwo *apostolo.

¹⁸Ke lé te imwilé kuti, ke lé nelé da he karépu.

¹⁹Ke é he bwén, ke pwo pa *âcélo te Padaame, na e tehi ati ni pomwa ko a karépu, ke e pawielé. Ke e pii telé pie:

²⁰«Geé â mu *huâ iitihi, ke geé patemehi te ni puapulie ati ni pwoooti ko a mulie na mwo coho.»

²¹⁻²²Ke me lé te téne kuti anaa, ke lé taa huâ iitihi he mwo te ju acaama, ke lé pacémuni ni apulie.

Tielé he karépu

É ha a benaamwon naa, ke wo pa daame he lèpwo apwoâpwailo me ni béén, ke lé tote ati lèpwo apihuô, wo lèpwo ukéiu te a bele *Isaraéla, beme lé pipitilé. Ke lé ne me lé â pébé lèpwo apostolo, mu he karépu. Kehe icehi ana me lé tuie nge he karépu wo lèpwo awéihî *mwaiitihi, ke time lé toolé. Ke lé mwojuia mwo, ke lé pwojepule te lèpwona lé pahedelé, ke lé pii te a *mwohuô pie:

²³«Geme tuie nge ha ali karépu, ke he te ju capuhi ehi ni pomwa kon, ke wo lèpwo awéihî nen, ke he lé teko cuwo he ni awéa telé. Kehe icehi ana me geme tehi ni pomwa, ke he caa te tice apulie hen!»

²⁴Ke lé téne ni pwootti naa wo pa apihuô te lépwo awéhi mawaiithi, me lépwo caa te lépwo apwoâpwailo. Ke time lé temehi aceli me lé pii ne ko a bwo tie lépwo apostolo, me aceli e bo tuie.

²⁵É he mwo ko wonaa, ke e tehenebé wo pa céiu apulie, ke e pii telé pie: «Lépwoli apulie li geé nelé he karépu, ke élé huâ iitihi ni, ke lé ko pacémuni ni apulie!»

²⁶Ke lé engen wo lépwo awéhi mawaiithi me pa apihuô telé, ke lé te ju â péélé bé ehi, be mwotilé ko a bele, be koli lé bo ahilé ko péi.

Ne ânebuhe a mwohuô te lépwo Juif

²⁷É alecehe a bwo pébé lépwo apostolo, ke lé péélé nge céii a mwohuô, ke e tahimwolé wo pa daame he lépwo apwoâpwailo pie:

²⁸«Kona he li time geme uce paciithi kowé me time geé uce pwocémun ne he nii pa apulie naa? Ke é jenaa ni, ke geé patemehi pitihî lérusaléma ko ni cémun dewé! Ke mwo te nimewé mwo me geme watihe a bwo mele ten?»

Nye piténede Padué cehi

²⁹Ke e hegi ne telé wo Pétérû, he woélé me lépwo apostolo béis pie: «Wâé heme nye piténede Padué koja ni apulie.

³⁰Wogewé kuti na geé taunu lésu, be geé ne me cemeiteeng ne ko a *kuricé. Kehe icehi ana e te pamulipieng mwo wo Padué he ni caa tenye.

³¹Ke e ne da lésu ne *pwo a juin [beme e pihuôhi ati ni naado]. Ke e neeng me Padaame, ke me pa aceluimi, beme e temehi na a bele Isaraéla pie, jan me e pininim beme e o neuhi ni ta pwo ten.

³²Ke wogeme kuti lépwo *apajuujuhi ati ni naado naa, wogeme me a Jenen litihî, na e ne wo Padué ne te nina lé piténedeeng.»

³³Ke me lé téne ni pwootti naa na a mwohuô, ke lé te junihe okéé, ke lé pwo me lé taunu lépwo apostolo.

E paténe lépwo béis wo Gamaliel

³⁴Kehe icehi ana e cuwoda mu hadeniilé wo pa *Farasaio na pii kon pie Gamaliel, pa *dotéén ko patén, na lé te junihe picedieng ati na a bele. Ke e ilehi pie me lé mwo te ju neme pawie lépwo apostolo.

³⁵Ke e pii te a mwohuô pie: «Lépwo bêéng Isaraéla, geé pipwocilekewé ko celi geé ko niimihi pie me geé pwo te ni apulie naa.

³⁶Time uce téele bwolihi a benaamwon na e tuie hen wo Teudas, pa apulie na e te piniiimihi pie te junihe pwonaado ne kon. Ke e nge pwo 400 ni apulie na lé âcéin. Kehe icehi ana me lé taunueng, ke lé caa te pipiiden ati, ke caa te tice patilé.

³⁷«É alechen, ha a benaamwon na pine a jéhi ni apulie hen, ke e cuwoda wo Judas, pa apulie Galilé, ke hiwon ni apulie na lé âcéin. Kehe icehi ana e te mele mwo, ke ni apulie naa, ke lé caa te pipiiden mwo.

³⁸«Ke é jenaa ni, ke é pii tewé pie, me geé nemwo ili lèpwonaa. Kehe wâé heme geé nelé me lé engen, be mepie nina lé pwo, ke mepie e te âbé mu ko ni apulie, ke o tieden.

³⁹Ke hemepie e te âbé mu ko Padué, ke o time uce jan me geé pacuwoshi. Geé nemwo pwoabwobwo me geé pipwobwoni Padué!» Ke wo lèpwo apihuô, ke lé engen ne ko nina e pii wo Gamaliel.

⁴⁰Ke lé tote mwo lèpwo apostolo, ke lé nelé me ahilé. Ke lé pawielé, ke lé paciitihi kolé me lé nemwo bo uce cihe mwo ko a nii lésu.

⁴¹Ke lé wie koja a mwohuô wo lèpwo apostolo, ke lé te junihe pipwodéén, be wo Padué ne ha a tautinaado ten, ke te jan me ahilé ne ko a nii lésu.

⁴²Ke é he ni tan ati, ne huâ iitihi, ke é ne he ni pwomwo, ke lé te cuwo ko pacémuni ni apulie. Ke lé patemehi a *Pwooti Wâé ko lésu, pa *Mesia.

Apostolo 6

Lèpwo apicani te lèpwo apostolo

¹É ha a benaamwon naa, ke e taa a jéhi lèpwo acéihi. Lèpwona lé cihe he pwo *grek, ke lé pihuu ne ko lèpwona lé cihe he pwo *ébér, be nihe time uce wâé a bwo patihi wiinaado na lé pwo he ni tan, ne ko ni depwele telé.

²Lé tote ati lèpwo acéihi wo lèpwo ¹² *apostolo, ke lé pii telé pie: «Time uce wâé heme geme cuwo koja a bwo patemehi na a pwooti te Padué, ke me geme uce patihi a wiinaado ne pwo ni taap.

³É mu ko anaa, ke wogewé lèpwo béeome ko a céihi, geé pipégali lèpwoce apulie celi ⁷ mu hadeniiwé, celi wâé ni huô telé me ni bwopemilé, na tililé na a *Jenen litih, ke a pitemang, beme o a penem delé.

⁴Be wogeme, ke geme o caa ju mu ne ko a pwoitihi, ke é ne ha a cihe ko a pwooti te Padué.»

⁵É ne ha a bwopiinen naa, ke tai wâé ne ko lèpwo acéihi. Lé pine ni apulie ce: Étienne, pa apulie na nihe ubwo a céihi ten, ke tilieng na a Jenen litih; Filip; Prokore; Nikanor; Timon; Parménas; Nikola, pa apulie mu Antioche; pana e céihi ne ko a pwoitihi te lèpwo *Juif.

⁶Lé péélé bé céii lèpwo apostolo, ke lé pwoitihi telé, ke lé ne ni ilé huîlé.

⁷Ke e piubwo ngen a pwooti te Padué. Ke e taa me ubwo a jéhi lèpwo acéihi ne *lérusaléma. Ke hiwon lèpwo *apwoâpwailo na lé céihi.

Lé imwi Étienne

⁸Wo Étienne, ke pa apulie na nihe ubwo a *adéihi te Padué ne kon. Ke e pwo ne ha awieme ni bele ni *inenaado na pwojunuun, be nihe ubwo a junuu Padué ne kon.

⁹Ke pwo ni béé apulie na lé pwobwonieng: l épwo béé Juif mu Cirène, mu Alexandri, na lé âbé mu ha a *mwotapitihi te l épwo *affranchi*, a bwopiinen pie l épwo apenem na tuwolé. Ke pwo mwo l épwo béé Juif mu he lupwo province é Silisi ke é Asia, ke lé picihe me Étienne.

¹⁰Kehe icehi ana te tice aceli me lé pwo ten, be e cihe ha a bwo temehi nen na e ne ten a Jenen litih.

¹¹Ke lé pwocuhi ni apulie, beme lé pii pie: «Geme téne he e pii ni pwooti na ta ne ko *Moosé me Padué.»

¹²Ke lé pwo me okéé ni pwonime ali bele, ke wo l épwo apihuô, me l épwo *dotéén ko patén. Ke lé pwome gaaté, ke lé imwi Étienne, ke lé pééeng nge céii a *mwohuô.

¹³Ke lé ne mwo l épwo apulie na lé gele, me lé pii pie: «Pa apulie ce, ke time uce mwaale nang me e tee cihe me ta ne ko a *mwaiitihi ke ni patén.

¹⁴Geme téne he e pii wo Étienne pie wo l ésu mu Nazaret naa, na me e bo paniihi a mwaiitihi ce, ke e o bo taatééhi ni huô li e ne tenye wo Moosé!»

¹⁵Ke lé ome Étienne ati ni mwohuô, be e pwéélang a pwahamiin pwohewii a pwahamii *âcélo.

Apostolo 7

E pwopune wo Étienne

¹Ke e tahimwo Étienne wo pa *daame he l épwo apwoâpwailo pie: «Te a juuju kuti ana lé ko pii ne kom?»

E piuti jepule ko l épwo Isaraéla @ —Abérama

²Ke e hegi ne ten pie: «L épwo âjiénung me l épwo caa, geé téne, wo Padué na ubwo nang ne ha *a wâé ten, ke e pihabwiieng de pa caa tenye *Abérama, he e mwo te mu ha amu Mésopotami, ânebuhe a bwo engen den me e â mu Aran.

³Ke e pii ten wo Padué pie: *Go engen koja a pwomwoiu tem me a amu tem, ke go â ha amu na é bo habwii tem. Genèse 12.1*

⁴«Ke e engen wo Abérama mu ha amu te l épwo Babulona, ke e â mu Aran. Ke é alechen, ke e mele wo caa ten. Ke wo Padué, ke e pééeng bé ne ha amu ce, na geé caa tee ko mu hen jenaa.

⁵«Kehe te tice ace céiu duaan celi e ne ten. Kehe icehi ana e caa te mi pii ten pie: *É bo ne tem me ni piebehiko a amu ce. Genèse 17.8* Ke é ha a benaamwon naa, ke he mwo te tice naî Abérama.

⁶ «Ke e pii ten wo Padué pie: *Ni naî ni naîm, ke lé o bo mulie ne ha amu na mwo coho, ke lé bo penem tice ja kon ne ha amu naa, ke o bo pwotahinaado ne kolé he na 400 ni jo.*

⁷ Kehe icehi ana e pii mwo wo Padué pie: *É bo pwocuhinaado te a bele naa, na lé pwo me lé penem tice ja kon. Ke é alecehen, ke lé bo wie, ke lé bo pipaunuéo, ne ha a duaan ce.*» Genèse 15.13–14

Isaaka me lakobo

⁸ «É alecehen, ke wo Padué, ke e pacuwohi a *piapwo telu me Abérama. Ke a ine a piapwo, ke a *tegoop. Ke wo Abérama, ke e pwotegoop te Isaaka, pa naîn, ha a bécéiuhe naadenitan den. Ke wo Isaaka, ke e pwotegoop te lakobo pa naîn, ke wo lakobo, ke e pwo te ni naîn na ¹² jélé: wo lépwona lé bo watihe ni ¹² pwomwoiou te a bele tenye *Isaraéla.»

Josef

⁹ «Ke lé pitaaba ne ko Josef wo lépwo âjiénen naa. Ke lé icueng, ke e caa â *apenem tice ja kon ne ha amu *Aigupito. Kehe icehi ana e te mu pelen wo Padué.

¹⁰ Ke e te celuimieng koja ni picani me ni téé. Ke e ne ten a bwo temehinaado. Ke e ne me e piwâé Josef wo Faraô, pa daame ne Aigupito. Wo Faraô, ke e ne me e gupéno ne ha amu Aigupito, ke me e pihuôhi ni den ne ha a pomwa ten.

¹¹ «Ke e tuiybé a menele na ubwo, na ati ha amu Aigupito, ke é Kanana. Ke te junihe pwoééhe ni apulie. Ke caa tice wiinaado te lépwo caa tenye.

¹² Ke me e temehi pie pwo wiinaado Aigupito wo lakobo, ke e tabuhi pawie ole [ni naîn], lépwo caa tenye.

¹³ «É ha a béalohe bwo ole telé, ke e pipatemehieng de lépwo âjiénen wo Josef. É mulang, ke e bwobe temehi a pwomwoiou ten wo Faraô.

¹⁴ Ke wo Josef, ke e todebé caa ten lakobo, me ati a pwomwoiou ten, ke pwo ⁷⁵ jélé ati.

¹⁵ Ke e ole Aigupito wo lakobo, ke e bwo mele nelang, woélé me lépwo caa tenye.

¹⁶ Ke lé te pédaamwo ni duulé ne ha amu Sichem, ke nelé ha a iitihi na e pwocuhin ko mwani wo Abérama koja ni piebehi Amor, pa apulie ha amu Sichem.

¹⁷ «Ke caa é mwonus a benaamwon na o caa cuwo a piapwo ânebun na e pii wo Padué te Abérama. Ke mepwo ali bele Isaraéla, ke piubwo ke pihiwon jélé ne Aigupito.

¹⁸ Kehe icehi ana e â cuwoda wo pa céiu daame ne Aigupito, na e pwo me piticenaado ne ko ni penem de Josef.

¹⁹Ke e pipwohuô te ali bele tenye, ke e pwo me ta ne kolé, ke e pwohuu telé, me lé engen koja ni naîlé, beme lé mele.»

Moosé

²⁰ «É ha a benaamwon naa, ke e pituie wo *Moosé, pa cuwo ewa na te junihe wâé nang ne hamii Padué. Ke lu picileeng he na cié ni wole wo lu nyaa ten me caa ten.

²¹[Ke caa time uce jan me lu pineduwoeng] ke lu pééeng, ke lu neeng ole he éémwa. Ke e tooeng ê naî pa daame Faraô, ke e pééeng me pa naîn.

²²Ke lé pacémunieng ne ha ati ni pitemang de lépwo Aigupito, ke pa acihe ehi, ke e penem ehi.

²³«É he ko 40 ni jo hen, ke e âbé ne he pwonimen pie me e â caniê lépwo âjiénen, a bele Isaraéla.

²⁴Ke e too pa céiu Aigupito, he e ko ahi pa céiu apulie Isaraéla. Ke e pwopain ko pali e ko ahieng, ke e taunu pali Aigupito.

²⁵E te niimihi pie wo lépwo âjiénen, ke lé o te temehi pie wo Padué ke nimen me e celuimilé. Kehe icehi ana time lé uce temehi.

²⁶«Ke é ha a tan alechen, ke e ali lupwo apulie Isaraéla na lu ko piokéé, ke e picuwo hadeniilu, ke e pii telu pie: “Lupwo béléng, wogeu, ke lupwo âjién. É ko ade na pita geu?”

²⁷Kehe icehi ana wo pa apulie na e ahi pa béléng, ke e pitité Moosé, ke e pii ten pie: *Woo paceli e etiko me go daame heme, ke me go pa atautikeme?*

²⁸Woté? Go pwo me go taunuéo, pwohewii ali bwo taunu pali Aigupito haabwén? Exode 2.14

²⁹«Ke me e téne anaa wo Moosé, ke e te cela kuti, ke e â coho ne ha amu Madian. Ke lu pituie nelang wo lupwo naîn.

³⁰«É alechehe nina 40 ni jo, ke e pihabwieng de Moosé wo pa céiu *âcélo ne ha a melé e mwonuhi a juwole Sinaï. E âbé ha a duwele miû ko a nahi acuwo na éle.

³¹Ke me e alihia anaa wo Moosé, ke e te junihe téetihî kuti, ke e âbé mwonuhi, beme e alihia ehi. Ke e téne a pwocîhe te Padaame na e pii ten pie:

³²Woéo Padué he lépwo watihem: Padué he Abérama, ke Padué he Isaaka, ke Padué he Iakobo. Exode 3.6 Ke te éjén kuti Moosé ko a bwo mwotieng, ke pwocoon den me e omehi.

³³«Ke e pii ten wo Padaame pie: Go céi ni dihibwaam, be mepwo a duaan na go ko cuwo hen, ke a duaan na iitihî.

³⁴É caa alihia picani me a téé te a bele tong Isaraéla, ne Aigupito, ke é téne a pwocewé ten. Ke é opé beme é pawielé. Ke é jenaa, ke go engen, be é bo neko nge Aigupito. Exode 3.5-10

³⁵«[E ne te Moosé a mwomwon naa wo Padué] kehe icehi ana time lé uce temehieng, ke lé pii pie: *Woo paceli e etiko me go daame heme, ke me go pa atautikeme?* Exode 2.14 Weeng kuti na e neeng wo Padué me e pihuô, ke me e pipéélé, be weeng pana e pipégalieng wo pa âcélo te Padué, li e pihabwieng ne ha ali nahi acuwo.

³⁶«Ke wo Moosé, ke e pwo me e wie a bele ten mu Aigupito. Ke e pwo ni *inenaado na pwojunuun, ne ha amu Aigupito, ke é ne ha a jié Megele, ke é ne ha a melé he na 40 ni jo.

³⁷Wo pa Moosé naa kuti, na e pii te a bele Isaraéla pie: *Wo Padué, ke e bo pwo me e cuwoda mu hadeniiwé wo pace péroféta celi e pwohewiiéo.* Deutéronome 18.15

³⁸Mwo te wo Moosé mwo, na e mu pele lépwo caa tenye, ke lé tai mu ha a melé. Ke te weeng mwo na e mu pele pali âcélo, he li e paciheeng ne pwo a juwole Sinaï. Ke e ne ten wo pali âcélo ni pwooti mulip, beme e bo ne tenye.»

Muhi telé ko Moosé

³⁹«Kehe icehi ana wo lépwo caa tenye, ke muhi telé me lé piténedeeng, be muhi telé kon, be nimelé me lé mwojuia ngemwo Aigupito.

⁴⁰Ke lé pii te *Aarona [pa cuwo Moosé] pie: *Go pwo ce *déme duéé henye celi me lé ânebuheny. Be mepwo wo pa Moosé naa, pali e pawiekenye mu ha amu Aigupito, ke time genye uce temehi celi e ko tooeng.* Exode 32.1

⁴¹É he ni tan naa, ke lé pwo a nahi paaci me a déme duéé helé, ke lé pwo a tan ubwo, ke lé pwoâpwailo ten. Ke lé te junihe pipwodéén ko ana lé pwo.

⁴²Ke e biteeng wo Padué kojalé, ke e patupwolé me lé pwoitihi te [a téale, me a wole, me] ni ceni. Genye pine anaa ne he ni tii te lépwo péroféta pie: *Bele Isaraéla, kona geé mu te pwoâpwailo tong he na 40 ni jo ne ha a melé? Úhu!*

⁴³*Be li geé pé ali mwa mwaanu te ali duéé Molok † , ne pehi ali ceni te ali duéé Réfan , ni démenaado na geé pwo, me geé pipaunuhi. Watihen kuti ninaa, na é pwo me péékewé nge ité koja Babulona.» Amos 5.25-27*

A mwa mwaanu

⁴⁴«Ne ha a melé, ke wo lépwo caa tenye, ke lé pwo a mwa mwaanu na e mu hen ni patén de Padué. Lé pacuuli a mwa mwaanu naa, pwohewii a bwomunen na e pii te Moosé wo Padué, he e habwii ten.

⁴⁵É alechen, ke uce ni naîlé na lé pé céilé, he lé âcéi losua, ke lé pipwoeapwihi a amu [Kanana] ke lé mu lang. Be wo Padué, ke e caa peni ni bele na lé te mi mu lang ânebuhelé. Ke mepwo a mwa mwaanu naa, ke e mu lang dieli ha a benaamwon de pa daame *Davita.

⁴⁶Ke mepwo wo Davita, ke te junihe wâé nang ne he pwahamii Padué. Ke e ilehi kojaeng, pie me e pacuuli ace *mwaiitihi te a bele Isaraéla.

⁴⁷Ke wo *Solomona na e bo bahi a mwaiitihi te Padué.

⁴⁸«Kehe icehi ana wo Padué na nihe e daaité, ke time e uce mu he ni mwa na lé pwo ne ni apulie. Be e pii wo pa céiu péroféta pie:

⁴⁹ *E pii wo Padué pie: "A miiden, ke atebwo tong, ke a bwohemwo, ke aca tong. Ke he ace mwa celi woté celi me geé bahi me dong? É wé ace duaan celi o jan me é mu hen?"*

⁵⁰ *He time uce a ing na e pwo ati ni naado naa?"»Ésaïe 66.1-2*

Wogewé lépwo apipwobwoni Padué

⁵¹ E pii mwo wo Étienne te lépwo apihuô pie: «Te junihe mwoiu ni puniwé! Be muhi tewé me geé téne a pwooti te Padué! Úhu! Geé te cuwo ko pipwobwonihi a *Jenen litih, pwohewii lépwo caa tewé.

⁵²Be lé pwotahi ne ko ni péroféta ati. Ke lé taunu ni béen na lé te mi piuti ânebun a bwo tuie te pana mwomwon nang, na e pipégalieng wo Padué. Ke te wogewé mwo na geé icueng, ke geé taunueng.

⁵³Wogewé lépwona geé hegi ni patén de Padué na lé pipwaadeniin bé ne pelewé ne ni âcélo, ke time geé uce âcehin.»

A bwo mele te Étienne

⁵⁴Ke me lé téne ni pwooti naa wo lépwo apihuô, ke lé te junihe okéé kuti, ke lé piwii pecuwo ne ko Étienne.

⁵⁵Ke e ole kon a Jenen litih, ke e niê da he miiden, ke e alihia wâé te Padué, ke e ali lésu [na e pihuô] ne *pwo a jui Padué.

⁵⁶Ke e pii pie: «Geé téne! É alihia a miiden he tehi. Ke e cuwo pwo a jui Padué wo pa *Nahi Apulie!»

⁵⁷Ke lé te cihe kuti me ubwo, ke lé capuhi ni pwojéénelé, ke lé te tai tétebé ne kon.

⁵⁸Ke lé céieng wie koja a pwomwo ubwo, ke lé ahieng ko péi, beme lé taunueng. Ke lé ne ni epwénelé ko ni a pa ewa aiu na pii kon pie Saulo.

⁵⁹Me lé ko ahieng ko péi, ke e pwoiitihi pii pie: «Padaame lésu, go hegi a jenung.»

⁶⁰Ke e tidihi jilin, ke e toii da pie: «Padaame, go pineulé ko a ta na lé pwo tong!» Ke é alechehe ni pwooti naa, ke e mele.

Apostolo 8

¹Wo Saulo, ke e mu lang, ke te céiu jélé ko a bwo taunu Étienne.

Saulo ke e pwotahinaado ne ko lépwo acéihi

Ke é ha a tan naa, ke te nihe ubwo ngen a bwo pwotahinaado ne ko lépwo acéihi na lé mu *lérusaléma. Ke lé muko pipiiden ati, ne he ni piduaan, ne ha a *Judé me ha a *Samari. Te icehi lépwo *apostolo na lé mu lérusaléma.

²Pwo lépwo apulie na lé nihe pipwoiipilé ne ko Padué, ke lé pineduwo Étienne, ke lé te nihe é niimieng me ubwo.

³Wo Saulo, ke e te nihe pwotahinaado ne ko lépwo acéihi. E taa he ni mwa, ke e céi wie ni aiu me ni toomwo, ke e nelé he karépu.

A penem de Filip ne Samari

⁴Lépwoli acéihi li lé pipiiden, ke lé pétaapwo â he ni piduaan, ke lé cihe ko a Pwooti Wâé.

⁵E ole wo Filip ne ha a pwomwo ubwo mu ko a *Samari, ke e cihe telé ko pa *Mesia.

⁶Lé tabemi ehi nina e pii telé ati ne ni apulie na lé mu lang. Ke lé alihni ni *inenaado na pwojunuun na e pwo.

⁷Be ni duéé, ke lé wie mu ko ni apulie na cunu jélé, ke lé cihe me ubwo, ke hiwon ni tebwomwa me ni tebwa na wâé jélé.

⁸Ke nihe ubwo a pipwodéén ne ha amu naa.

Simon, pana e pwo pwoduéé

⁹E te mi mu ha amu naa, pa apulie na pii kon pie Simon, pana e pwo pwoduéé. Ke e pipééeng me nihe pwonaado ne kon. Ke lé te nihe téele ko nina e pwo wo lépwo apulie ne ha amu Samari.

¹⁰Woélé ati, tabuhi mu ko lépwo cuwo nahi ewa die ko lépwo ukéiu, ke lé te nihe tabemieng ehi, ke lé tai pii ati pie: «Wo paje, ke e mu huïin a Junuu Padué na nye pii pie a Junuun Ubwo.»

¹¹Ke lé te nihe tabemieng kuti, be caa te nihe bwali a benaamwon, na e pwo me lé téele ko a bwo pwo pwoduéé ten.

¹²Ke é he lé céihi ne ko Filip, na e pii telé a Pwooti Wâé ko a *Mwametau te Padué ke a nii lésu Kériso, ke ni aiu me ni toomwo, ke puulé.

¹³Ke e céihi mwo wo Simon, ke é alecehe a bwo puueng, ke caa time e uce engen koja Filip. E alihni nina pwojunuun me ni inenaado na ubwo na e pwo, ke te nihe emegéi nan mwo.

¹⁴Lépwo apostolo na lé mu lérusaléma, ke lé téne pie, lé caa hegi a pwootti te Padué wo lépwo apulie Samari. Ke lé ne nge céilé Pétérue me loane.

¹⁵Ke me lu tehene nge pelelé, ke lu pwoiithi telé me lé hegi a *Jenen litih.

¹⁶Be time e uce téele ole ko pace pibéél. Mwo te ju puulé cehi ne he nii Padaame lésu.

¹⁷Ke lu ne ni ilu huïlé wo Pétérue me loane, ke lé hegi a Jenen litih.

¹⁸É he e alih wo Simon pie e ole huïi lëpwo acéhi a Jenen litih, he lu ne ni ilu huïlé wo lupwo apostolo, ke nimen me e ne telu ni mwani.

¹⁹Ke e pii telu pie: «Geu ne tong a junuun naa, be mepie pwo pace céiu apulie celi me é ne a ing huïin, ke me e hegi a Jenen litih.»

²⁰Kehe e pii ten wo Pétérú pie: «Wâé heme tiekeu me a mwani tem, be go niimihi pie, a âpipati te Padué, ke ace naado celi nye pwocuhin ko mwani!

²¹Ke o te tice dem mu ko ni penem demu! Be é ne te Padué, ke te nihe ta a pwonimem.

²²Go biteko koja ni âniimihinaado tem na ta, ke go pwoiitihi te Padué, beme e pineuhi ni bwo niimihi nen dem.

²³Be é alih pie e he pwonimem a pitaaba ke a pipwokon, ke e caa tiliko a ta.»

²⁴Ke e hegi ne telu wo Simon pie: «Lupwoje, geu pwoiitihi me dong, beme time uce tooéo ni naado na geu ko pii!»

²⁵Ke lu pii beetihi a pwooti te Padué wo Pétérú me loane. Ke é alechen, ke lu mwojuia ne Iérusaléma. Ke é nge he pwaaden, ke lu pii beetihi a Pwooti Wâé ne he ni cuwo nahi amu na hiwon ne Samari.

E céihi wo pa apulie Étiopi

²⁶Ke é ne ko Filip, ke e paciheeng a *âcélo te Padaame, ke e pii ten pie: «Go caamada, ke go â ha a pwaaden na e ole mu Iérusaléma ne Gaza, a pwaaden na time lé mu uce cuwo ko engen hen.»

²⁷Ke e te cuwoda kuti wo Filip, ke e engen, ke é he e mwo ko â he pwaaden, ke pitapitilu me pa céiu apulie Étiopi. Wo panaa, ke pa apulie na piubwo nang ne he ni pihuô ko ni mwani te Kandace, ê toomwo daame ne Étiopi. Be e mwojuia mu ha a pipwoun de Padué ne Iérusaléma.

²⁸Ke e ko pine, ne ha a otuun den, a tii na e tii wo péroféta Isaia.

²⁹Ke e pii te Filip a Jenen litih pie: «Piâmwonuhi a otuun na e ko âbé!»

E paciheeng ko lésu

³⁰Ke e téte ngen wo Filip, ke e téne pali Étiopi he e ko pine a tii te péroféta Isaia. Ke e tahimwoeng wo Filip pie: «Go teko temehi ana go ko pine?»

³¹Ke e hegi ne ten pie: «He me é woté ko ace bwo temehi nen, he te tice paceli me e patemehi tong?» Ke e ile Filip me e taa tebwo pelen.

³²Ke a niide a tii na e ko pine, ke e pii pie: *Pwohewii a muto na lé teuueng ngen ne ha a mwotaunuhi wota. E pwohewii ne ko a nahi muto na e te ju mu me nye tali ni pumiin, be time e uce cihe.*

³³Ke lé pwo me piwahin nang, ke lé pwo me ta ne kon. Ke de e bo pwojepule ko ni piebehieng? Te tice. Be caa tieden a mulihen mu éni pwo bwohemwo. *Ésaïe 53.7–8*

³⁴Ke e tahimwo Filip wo pali apihuô pie: «He woo paceli e ko cihe kon wo pa péroféta ce? Ai e teko piche kon mwo, ai e ko pii pace céiu mwo? É ileko pie, go pii tong.»

³⁵Ke e tabuhi pii pwaatihi ten wo Filip mu ko a bwopiinen naa, ke e pii beetihi ten a Pwooti Wâé ko lésu.

E céihi ke puueng

³⁶Ke é he lu ko â he pwaaden, ke lu alahi a pihitabe, ke e pii te Filip wo pali apihuô pie: «Ade aceli e pacuwohi me puuéo, he caa neko a tabe?»

³⁷Ke e hegi ne ten wo Filip pie: «Hemepie go céihi ati ne he pwonimem, ke jan me puuko.» Ke e hegi ne ten wo pali apihuô pie: «É céihi pie wo lésu Kériso, ke pa *Naî Padué.»}

³⁸Ke e pacuwohi ali otuun, ke lu ole me Filip ne ha ali pihitabe, ke e puueng wo Filip.

³⁹Ke é he lu taamwo mu ha a tabe, ke e pé Filip a Jenen litihi, ke caa time e bo uce alienig mwo wo pali apihuô. Kehe icehi ana nihe piwâénimen, ke e te uti a pwaadeniin.

⁴⁰Ke e bwo ne Filip ne Azot ali Jenen litihi. Ke é mulang, ke e â Césaré wo Filip, ke é nge he pwaaden, ke e patemehi a Pwooti Wâé na ati he ni cuwo nahi amu.

Apostolo 9

E tote Saulo wo Padaame lésu

¹É ha a benaamwon naa, ke e te junihe okéé wo Saulo. Ke nimen me e taunu nina lé céihi ne ko Padaame [lésu] ke e hane ace bwopwonen. Ke e â too pa *daame he lépwo apwoâpwailo.

²Ke e ileeng pie me e tii ace tii te lépwo apihuô te ni *mwotapitihi te ni *Juif ne Damas. A tii naa, ke e ne a mwomwon den me e imwi nina lé céihi na e toolé, ni aiu me ni toomwo na lé âcéi lésu, beme e péélé bé ne *lérusaléma.

³Ke é he e ko â ha a pwaaden nge Damas, ke me e âmwonuhi lang, ke e te opé kuti mu he miiden a pwéélang, ke e pwéélang aujenieng.

⁴Ke e te tupwo kuti ne pwo bwohemwo, ke e téne a pwocihe na e pii ten pie: «Saulo, Saulo, é ko ade na go pwotahi ne kong?»

⁵[Te junihe mwoti Saulo kuti] ke e tahimwohi pie: «Wogo ke woo, go pa daame?» Ke e hegi ne ten wo Padaame pie: «Woéo lésu, pana go ko pwotahi ne kong.

⁶Go cuwoda, ke go taa ha a pwomwo ubwo [Damas] be o bo pii tem nelang aceli me go pwo.»

⁷Ke lé cuwo ne ni apulie na lé âcéin, ke te junihe emegéi nalé, ke time lé temehi aceli me lé pii. Be lé te téne a pwocihe, kehe icehi ana te tice apulie celi lé alih.

⁸Ke me e cuwoda mu pwo bwohemwo wo Saulo, ke he e teko niê, kehe icehi ana caa time e uce alikenye. Ke lé bwo te ju pétaa ko in, ke lé pééeng nge Damas.

⁹Ke cié ni tan na e mu hen, ke time e uce alikenye, ke time e uce wiinaado, me ûdu.

E pahede Ananias nge céii Saulo

¹⁰E mu Damas wo pa céiu acéihi na pii kon pie Ananias. Ke e pihabwieng den wo Padaame, ke e pii ten pie: «Ananias!» Ke e hegi ne ten pie: «Padaame, woéo-ni!»

¹¹Ke e pii ten wo Padaame pie: «Go cuwoda, ke go â ha a pwaaden na pii kon pie ‘Mwomwon ko pwaaden’. Ke go hane ha a pomwa te Judas, pa apulie mu Tarse na pii kon pie Saulo. Be e ko pwoitihi, ke é ne me e alih ne ha a jenen

¹²pa apulie na a niin pie Ananias na e ko taabé, ke e ne ni in huîn, beme e niê mwo.»

¹³Ke e hegi ne ten wo Ananias pie: «Padaame, hiwon ni apulie na lé pii tong ati ni naado na ta na e pwo wo pa apulie naa, te ni naîm na lé céihi ne ko lésu ne lérusaléma.

¹⁴Ke e éni, imi a mwomwon na lé ne ten wo lèpwo caa te lèpwo apwoâpwailo, beme e imwi ati ni apulie na lé pipaunuko.»

¹⁵Kehe icehi ana e hegi ne ten wo Padaame pie: «Go ân, be é caa pipégali pa apulie naa, beme pa bépenem dong. E bo pipatemehi a niing ne he pwahamii ni bele me ni daame helé, ke é ne mwo he pwahamii a bele *Isaraéla.

¹⁶Ke é bo habwii ten ati ni picani ke ni téé na e bo mu hen, watihen a niing.»

¹⁷Ke e te wie kuti wo Ananias, ke e engen.

E pwoitihi me den wo Ananias

Ke e â taa ha a mwa na e mu hen wo Saulo, ke e ne lupwo in huîn. Ke e pii ten pie: «Saulo, pa béoeng: E pahedeéo wo Padaame lésu, wo Padaame li e pihabwieng dem ne pwo pwaaden. Ke e neéo bé, beme go niê mwo, ke me tiliko na a *Jenen litih.»

¹⁸Ke e te tupwo kuti mu hamii Saulo nina pwohewii ni ude-ikua, ke e caa niê mwo. Ke é alechen, ke e cuwoda, ke puueng.

¹⁹Ke e wiinaado, ke pwo niihen mwo.

E pii beetihi a Pwooti Wâé wo Saulo

Mwo te pwo mwo ni tan de Saulo ne Damas pele ni acéihi.

20Ke e te pwome patemehi kuti a pwooti nge he ni mwotapitihi. Ke e pii beetih telé pie, te wo lésu kuti pa *Naî Padué.

21Ati nina lé tabemieng, ke lé te junihe téele. Ke lé pii pie: «He time uce weeng kuti, pali te junihe pwo niihen me e pwotahi ne ko nina lé pwoitihi ne he nii lésu ne lérusaléma? Ke li e pwo me e âmwobé imwilé ne mwo éni, ke me e péélé nge céii ni caa te lépwo apwoâpwailo!»

22Kehe icehi ana te piubwo da a junuu Padué ne ko ni bwo cihe te Saulo. Ke e patemehi te lépwo Juif mu Damas, pie wo lésu, ke pa *Mesia. Ke time lé temehi ace bwo hegi nen den.

E cela ko lépwona lé téétieng

23Caa pwo a benaamwon de Saulo pelelé, ke lé pipitilé wo lépwo Juif, ke lé piténelé beme lé taunueng.

24Ke é ati he ni bwén, ke pwang, ke lé wéa kon ne he ni pomwa ko a pwomwo ubwo, beme lé taunueng. Kehe icehi ana e caa â temehi anaa wo Saulo.

25Ke é he bwén, ke lé pwo me e cela wo lépwo acémun den; ke lé neeng ole ha a éelele tai, ke lé neeng ole ko a goomwa babé ko a pwomwo ubwo.

E picani ten wo Barnabas

26Ke é he e â lérusaléma wo Saulo, ke e hane ace bwopwonen beme e â too lépwo acéihi. Kehe icehi ana tai mwotilé kon, be time lé uce mwomwohi pie caa pa céiu acéihi.

27Ke e picani ten wo Barnabas, ke e pééeng nge céii lépwo apostolo, ke e piuti telé pie: «Wo Saulo, ke e ali Padaame ne pwo pwaaden, ke e paciheeng wo Padaame. Ke time uce piwâ nang me e patemehi a Pwooti Wâé ne he nii lésu ne Damas.»

28Tabuhi mulang, ke e caa mu pele lépwo *apostolo wo Saulo. Ke e âdé ke âbé me lépwo apostolo ne lérusaléma, ke e patemehi mwoiuhi nelang a Pwooti Wâé ne he nii Padaame.

29Ke e pacihe mwo lépwo Juif na lé cihe he pwo *grek. Kehe icehi ana lé pééleeng ko ana e pii telé, ke lé hane ace bwopwonen beme lé taunueng.

30Ke me lé temehi anaa wo lépwo acéihi, ke lé pééeng nge Césaré. É mulang, ke lé pwo me e â Tarse.

31É ha a benaamwon naa, ke lé mulie ne ha a péém wo lépwo acéihi ati he ni amu *Judé, Galilé, ke *Samari. Lé pipamwoiulé, ke paciiti Padué. Ke e pitaa a jéhilé, be e picani telé na a Jenen litih.

A penem de Pétérú ne Lida me Jopé E caa engemwo wo Éné

32Wo Pétérú, ke e caniê ngemwo ni acéihi ati he ni amu, ke e ole die pele lépwona lé mu Lida.

33Ke é nelang, ke e too pa céiu apulie na pii kon pie Éné, na e caa pwo 8 ni jo ko a pule pwo apule ten, be tebwomwa nang.

34Ke e pii ten wo Pétérue pie: «Éné, e pwo me wâé go ni wo lésu Kériso! Go cuwoda, ke go capipihi apule tem!» Ke e te cuwoda kuti.

35Ke me lé alahi anaa, ke lé céihi ne ko Padaame ati ne ni apulie Lida me Saron.

E pwo me e mulie mwo wo Tabita

36É ne pele lépwo acéihi ne Jopé, ke pwo ê toomwo na pii kon pie Tabita [he pwo *ébéru] ke Dorkas he pwo grek. Ke ênaa, ke te a penem den me e pwo nina wâé. Ke e picani te nina pwoééhelé.

37Ke é ha a benaamwon naa, ke cunu nang, ke e mele. É alecehe a bwo papiwonieng, ke lé pééeng da ha a nemwa na e da ko miiden.

38Ke me lé temehi ne ni acéihi na élé Jopé pie, wo Pétérue ke e Lida, ke lé pahede ngen lupwo alo bélélé me lu â pii ten pie, me e piepin bé pelelé. Be time uce e ité Lida me â Jopé.

39Ke e te âcéilu kuti wo Pétérue. Ke me e tehene ngen, ke lé pééeng da ha a nemwa na e ko miiden. Ke ati ni toomwo depwele, ke lé é bé beniieng, ke lé habwii ten ni epwén na e pwo wo Dorkas, he e mwo mulie.

40Ke e pawielé ati wo Pétérue, ke e tidihi jilin, ke e pwoiitihi, ke e biteeng ne ko ali éé apulip, ke e pii ten pie: «Tabita, go cuwoda!» Ke e te niê kuti wo Tabita, ke me e ali Pétérue, ke e te caama tebwo kuti.

41Ke e pétaa ngen wo Pétérue, ke e pwiieng. Ke é alechen, ke e tote ati ni acéihi, ni toomwo depwele me ni bée apulie, ke e habwii Tabita telé, pie e caa mulie mwo.

42Ke lé téne a jepule naa, ati ne ni apulie Jopé, ke te junihe hiwon nina lé céihi ne ko Padaame.

43Caa pibwoli Pétérue Jopé, ke e pimu pele pa apulie na pii kon pie Simon, pa apenem ko iiwota.

Apostolo 10

Pétérue me Korneï

1Pwo pa apulie na e mu Césaré na pii kon pie Korneï. Pa Roma, pa céiu caa te ni 100 coda ne ha a mwocoda te lépwo Itali.

2Pa apulie naa, ke e céihi ne ko a pwoiitihi te lépwo *Juif, weeng me ni apulie na lé mu ha a pomwa ten. E te nihe pati lépwo Juif na tice delé, ke e te pwoiitihi te Padué.

E pacihe Korneï wo pa âcélo

³É ha a céiu tan, he ko cié inetéale ko alecehe a goahen, ke e pwoitihi, ke e te ju ali ehi pa *âcélo te Padué, he e ko â taadeeng ne huâ, ke e pii ten pie: «Korneï!»

⁴Ke e te ju omeeng ehi wo Korneï, ke te nihe mwotieng, ke e pii pie: «Ade, go Padaame?» Ke e pii wo pali âcélo pie: «E caa hegi a pwopwoitihi tem wo Padué. Ke e alihati ni âpipati tem ne pele nina pwoéhelé, ke time e uce pineuko.

⁵Wâé heme go ne nge Jopé ce apulie, beme lé â todebé Simon, pana te pii kon mwo pie Pétérue.

⁶E pimu pele Simon, pa apenem ko iiwota, na e mu pejié.»

⁷Ke e caa te engemwo wo pali âcélo li e paciheeng. Ke wo Korneï, ke e tode lupwo apulie na alo julu, mu pele lèpwo apenem den. Ke e tode mwo pa céiu coda ten, mu hadenii ni coda na e pihuô telé, pa coda na caa nihe bwolieng pelen; pana e te pipwoipieng ne ha a pwoitihi.

⁸Alecehe a bwo uti telé ati nina e tuie ne kon wo Korneï, ke e nelé nge Jopé.

E pacihe Pétérue a Jenen litih

⁹A tan alechen, he e teko ju goahen ehi, ke lé piâmwonuhi a pwomwo ubwo Jopé. É ha a benaamwon naa, ke e taa pwo mwa he na belece lang wo Pétérue, beme pwoitihi.

¹⁰Ke menen, ke nimen me e wiinaado. Ke é he lé mwo ko piwâam ko a wiinaado ten, ke e habwii ni naado wo Padué te Pétérue ne ha a jenen.

¹¹Ke e alihia miiden he tehi, ke e opé mulang ana pwohewii a cehibaap na nihe ubwo, na cie ni uhin na paa. Ke e opé die pwo bwohemwo.

¹²Ke e mu hen ati ni pétaapwo wota na pipaa ni alé, ke ni paile me ni âmutaa me ni bwien, me ni meni mwo.

¹³Ke e pii ten a pwocihe pie: «Go cuwoda, go Pétérue, ke go taunuhi, ke go wii!»

¹⁴Kehe icehi ana e pii wo Pétérue pie: «Ûhu! Te muhi tong, go Padaame, be time é mu uce wii ni naado na iitihi ne he ni patén.»

¹⁵Ke e téne mwo ali pwocihe, he e pii ten pie: «Go nemwo pii me ta, nina e pii wo Padué pie te wâé.»

¹⁶Ke ocié ko tuie ni naado naa, ke e caa te taamwo he miiden ali cehibaap.

¹⁷Ke é ha a benaamwon naa, ke wo lèpwoli apulie li e nelé bé wo Korneï, ke lé pitahimwohi he celi e lang ace pomwa te Simon. Ke lé piân, ke lé tuie nge ha ali pomwa, ha a benaamwon na wo Pétérue he e mwo ko pihane ace bwopiine ali e ko habwii ten wo Padué.

¹⁸Ke lé to, ke lé tahimwohi pie: «Be he te éni kuti, he celi e pimu lang wo Simon, na pii kon pie Pétérue?»

Lé tooeng wo lépwo apulie te Korneï

¹⁹E mwo tee ko pitautinaado wo Pétérū ne ko ali e alihi, ke e pii ten na a *Jenen litihi pie: «Élé éni wo lépwo apulie na cié jélé na lé haneko.

²⁰Go cuwoda me go ole, ke go nemwo uce pwo me piwâ go me go âcéilé, be woéo na é nelé bé.»

²¹Ke e ole wo Pétérū, ke e pii te lépwo apulie naa pie: «Woéo-ni pali apulie li geé ko haneéo. Ade ace watihen me geé âbé?»

²²Ke lé hegi ne ten pie: «E pahedekeme wo Korneï, pa caa te coda, pa apulie na mwomwon nang, ke e céihi ne ko a pwoiitihi te lépwo Juif. Ke ati lépwo Juif, ke lé pipii me wâé nang. E pihabwieng den wo pa âcélo te Padué, ke e pii ten pie me e pwo me go âbé ne ha a pomwa te Korneï, beme e téne celi go pii ten.»

²³Ke e tanyuulé wo Pétérū me lé mwo pule.

E âcéilé ne pele Korneï wo Pétérū

É ha acaama hen, ke e caa te âcéi lépwo apulie na cié jélé naa wo Pétérū. Ke lé âcéilé mwo wo lépwo bée acéihi na lé mu Jopé.

²⁴É ha a tan alechen, ke lé tuie nge Césaré. Ke e teko ucéilé lang wo Korneï me lépwo apulie ha a pwomwoiu ten, me lépwo ju béen na e te todelé bé.

²⁵Me e taa wo Pétérū, ke e â beniieng wo Korneï, ke e tidihi jilin, ke e miibule ne ko ni a Pétérū.

²⁶Kehe icehi ana e pwiieng da wo Pétérū, ke e pii ten pie: «Go cuwoda, be woéo, ke te pa apulie pwohewiiko!»

²⁷E tee ko cihe ko taa huâ wo Pétérū. Ke e too ni apulie na hiwon jélé, na lé caa teko mu lang.

²⁸Ke e pii telé pie: «Geé caa te tai temehi pie wo pa Juif, ke iitihi me pibéélu me pa coho. Ke e paciitihi kon mwo me e taa pelen. Kehe icehi ana wo Padué, ke e habwii tong pie, me é nemwo niimihi pie me ta pa apulie, ke me é nemwo pwo me muhi tong kon.

²⁹Ke me geé todeéo bé, ke te tice aceli me mwo pitoole jo kon. Ke é tahimwokewé pie: De ace watihen me geé pwo me é âbé?»

³⁰Ke e pii ten wo Korneï pie: «Caa cié ni tan jenaa, na é pwoiitihi ne éni, ke é ko cié inetéale ko aleche a goahen. Ke e te piâbeetiéo kuti wo pa apulie na pwomelaa a epwénen.

³¹Ke e pii tong pie: “Korneï, e caa hegi a pwopwoiitihi tem wo Padué. Ke e caa alihi ati ni âpipati tem ne pele nina pwoééhelé, ke time e uce pineuko.

³²Wâé heme go ne nge Jopé ce apulie, beme lé â todebé Simon, pana te pii kon mwo pie Pétérū. E pimu pele Simon, pa apenem ko iiwota, na e mu pejié.”

³³Ke anaa, na é pawie epin lé ni apulie, beme lé todeko, ke te junihe wâé kuti na go âbé. Be é jenaa, ke caa tai wogeme éni ati he pwahamii Padué, beme geme téne ati ce naado celi e caa ne tem wo Padaame beme go pii teme.»

E pacihe ni béén na time uce ni Juif

³⁴E pii beetihi telé wo Pétérû pie: «É bwo tekò temehi kuti pie, mepwo wo Padué, ke time e uce pipwoinen ne ko ni apulie.

³⁵Be é ati he ni amu, ke wo pa apulie na e paciiti Padué, me e pwo nina wâé, me pipati, ke e piwâéeng wo Padué.

³⁶E caa pawie a pwooti, me de a bele *Isaraéla: a Pwooti Wâé ko a péém, na e pwaadeniin bé wo lésu Kériso, Padaame he ati ni apulie.

³⁷«Geé caa te temehi ana e tuie ânebun ne Galilé, ke é mulang, die ati he ni piduaan ko a *Judé, ne alechehe a bwo patemehi na a pipuu apulip te loane.

³⁸Geé caa temehi pie wo Padué, ke e neole a junuu a Jenen litihî ne ko lésu, pa apulie mu Nazaret. E engen ati he ni piduaan me e pwo nina wâé. Ke e pwo me wâé [nina cunu jélé me] ati ni béén na e kolé a junuu *Caatana, be e pelen wo Padué.

³⁹«Wogeme kuti lépwo *apajuujuhi na ati nina e pwo, ne *lérusaléma, die ha ati a amu te lépwo Juif. Lé cemeiteeng ne ko a *kuricé, ke e mele.

⁴⁰«Kehe icehi ana wo Padué, ke e pwo me e mulie mwo, ha a béciéhe ni tan. Ke e pwo me e piâbeetikeme.

⁴¹Wogeme ni béén na e caa pipégalikeme ânebun, beme geme bo lépwo apé na a juuju te lésu. Wogeme ni béén na geme tai piwiinaado me ûdu me weeng, alechehe a bwo mulie cemwo ten koja ni amele. Time e uce pwo me e pihabwiieng de ati a bele.

⁴²Ke e caa pahedekeme, beme geme â patemehi te a bele a Pwooti Wâé, me pii beetihi pie caa te weeng kuti, pana e caa neeng wo Padué me pa atauti nina lé mulie, me nina lé mele.

⁴³«Ke, ati ni péroféta, ke lé caa mi pii pie, paceli e céhi ne kon, ke o pineuhi ni ta pwo ten ne he niin.»

E ole huîlé a Jenen litihî

⁴⁴É he e mwo ko cihe wo Pétérû, ke e ole a Jenen litihî ne huî ati nina lé tabemi a pwooti te Padué.

⁴⁵Wo lépwo Juif na lé céhi, li lé âbé céi Pétérû, ke lé téele, he e homwo mwo a Jenen litihî ne huî ni béén na time uce ni Juif.

⁴⁶Be lé ténelé he lé ko cihe he ni pwooti na te pi-ité, me pipaunu Padué. Ke e pii wo Pétérû pie:

⁴⁷«Woté, o te jan me time nye uce puu lépwona lé caa hegi a Jenen litih, pwohewiikenye?»

⁴⁸Ke e ne a mwomwon wo Pétérú, beme puulé ne he nii Padaame lésu. Ke lé ileeng pie me e mwo pwo mwo lupwoce tan pelelé.

Apostolo 11

E uti te ni apostolo wo Pétérú

¹Lépwo *apostolo me lépwo acéihi na lé mu *Judé, ke lé téne pie lépwo béén na time uce lépwo *Juif, ke lé caa hegi a pwoooti te Padué.

²Ke é he e taa *lérusaléma wo Pétérú, ke wo lépwo acéihi juif, ke lé taapwii ten nina e pwo,

³ke lé pii ten pie: «É ko ade na go â taa pele lépwona mwo time uce *tegoop jélé, me geé piwiinaado ibu?»

E paciheéo wo Padué

⁴Ke wo Pétérú ke e piuti telé ehi ni naado na e tuie ne kon, ha atabuhi ko a jepule naa. Ke e pii telé pie:

⁵«É mu ha a pwomwo ubwo Jopé, ke é ha a benaamwon na é ko pwoiitihi hen, ke é alihia céiu naado na pwohewii a cechitaap na nihe ubwo na cie ni uhin na paa, he e ko opé mu he miiden die pelong.

⁶Ke me é omehi a cechitaap naa, ke é alihia ne hen ni wota na pipaa ni alé, me ni wota apiaba, ke ni paile me ni âmutaa me ni bwien, me ni meni mwo.

⁷Ke é téne a pwocihe na e pii tong pie: “Go cuwoda go Pétérú, ke go taunuhi, ke go wii.”

⁸«Kehe é pii pie: “Ùhu, go Padaame, be time é mu uce wii ni naado na iitihi ne he ni patén.”

⁹«Ke é téne mwo ali pwocihe mu he miiden, na e pii pie: “Go nemwo pii me ta nina e pii wo Padué pie te wâé.”

¹⁰Ke ocié ko tuie ni naado naa, ke é alechen, ke tai céilé daamwo he miiden.»

É âcéilé ne Césaré

¹¹«Ke lé te pwome tehenebé wo lépwo apulie na cié jélé, na nelé bé céiiéo mu Césaré. Ke lé âbé cuwo he pomwa ko a mwa na é mu hen.

¹²Ke e pii tong a *Jenen litih pie, me é nemwo pwo me piwâ jo me é âcéilé. Ke lé âbé céing lépwo acéihi na 6 jélé na élé éni, ke geme taa ha a mwa te Korneï.

¹³«Ke e piuti teme wo Korneï a bwo alihia nen den ne ha a mwa ten, pa *âcélo na e âbeetieng, ke e pii pie: “Ne ngen lépwoce ne Jopé, beme lé pwo me e âbé wo Simon, pana lé pii mwo kon pie Pétérú.

¹⁴Pana e bo pii tem ni pwooti te Padué, na e bo celuimiko, wogo, ke tai ati a pwomwoiou tem.”»

E ole kolé a Jenen litihi

¹⁵ «Ke me é tabuhi cihe te Korneï me lépwo béis, ke e ole kolé a Jenen litihi, pwohewii ne konye ha atabuhi kon.

¹⁶Ke é niimihi ali pwooti te Padaame: “E *puu apulie ko a tabe wo loane, kehe bo puukewé ko a Jenen litihi.”

¹⁷ «Wo Padué, ke e ne telé a âpipati na pwohewii ana ne tenye, wogenye na nye caa céhi ne ko Padaame lésu Kériso. Woéo ke he woo, me é cubwoni Padué?»

¹⁸ Alecehe a bwo téne na anaa, ke caa nebwen na lé okéé. Ke lé pipwoun de Padué, ke lé pii pie: «Wo Padué, ke e caa ne mwo a pininim ne pele lépwona time uce lépwo Juif, beme lé mulie. »

Lépwo acéhi mu Antioche ne Siri

¹⁹ Alecehe a bwo mele te Étienne, ke lé tabuhi pwo me lé mu he ni picani wo lépwo acéhi, ke lé pipiiden nge he ni amu, é Fénisi, ke é Antioche, ke é pwo a één Chipre. Ke lé te â cihe te lépwo Juif cehi, ko a Pwooti Wâé.

²⁰ Kehe icehi ana wo lépwo béis mu pelelé, lépwo apulie mu Chipre, ke é Cirène, ke lé âbé ne Antioche, ke lé cihe ko a Pwooti Wâé te Padaame lésu te lépwona time uce lépwo Juif.

²¹ Ke e mu huîlé a junuu Padué, ke hiwon mwo ni apulie na lé bitelé ne ko Padaame, ke lé céhi.

²² Ke lé téne anaa wo lépwo acéhi ne lérusaléma. Ke lé ne Barnabas nge Antioche.

²³ Ke me e tehene ngen, ke e alahi a *adéhi te Padué ne huî a bele, ke e te junihe pipwodéén. Ke e pamwoiulé ati, beme lé cumang ati he ni pwonimelé, ne ko Padaame.

²⁴ Be wo Barnabas, ke pa apulie na te nihe wâé nang, ke tilieng na a Jenen litihi, ke te nihe ubwo a céhi ten. Ke a hiwon ko apulie, ke lé céhi ne ko Padaame.

²⁵ Ke é mulang, ke e â Tarse wo Barnabas, beme e â hane Saulo.

²⁶ Ke me e tooeng, ke e pééeng bé ne Antioche [ne Siri]. É he na céiu jo, ke lu mu he ni pitih ko pwoiitihi, ke lu pacémunihi a hiwon ko apulie. Ke é mu Antioche he na lé tabuhi pii ko lépwo acéhi pie, lépwo *chrétien* [a bwopiinen pie ‘lépwo acéhi ne ko Kériso’].

Lé picani te lépwo acéhi ne Judé

²⁷ É ha a benaamwon naa, ke lé opé mu lérusaléma ne Antioche wo lépwo péroféta.

²⁸Pa céiu béélé, ke a niin pie Agabus. Ke e mu kon a junuu a Jenen litihi. Ke e cuwoda, ke e pii telé pie: «O bo pwo ace menele celi nihe ubwo ati ne pwo a bwohemwo.» Ke o cuwo a bwopiinen naa, ha a benaamwon de Klaude, pa daame ubwo te lépwo Roma.

²⁹Ke é ne ko lépwo acéihi, ke lé piténelé beme lé ne ngen ce bépicani te lépwo acéihi na lé mu Judé. Ke lé te muko ne, na te jan me lé ne [âcehi nina lé pé mu ko ni penem delé].

³⁰Ke lu pé ngen ni âpipati naa wo Barnabas me Saulo, nge céii lépwo apihuô te ni acéihi.

Apostolo 12

Lé taunu Cang ke imwi Pétérú

¹É ha a benaamwon naa, ke e pwotahi ne ko ni bée acéihi wo pa daame *Érode Agripa Ier.

²Ke e ne a mwomwon beme lé taunu Cang, pa âjiéne loane, ko teua.

³Ke me e alihí pie wâé te lépwo Juif, ke e ne me imwi mwo Pétérú, ha a céiu tan ubwo telé, a tan ko pieni pwoloa na tice nyaa ten.

⁴Ke e pwo me tahieng da he karépu, ke e ne me lé wéieng nina paa ni bele na pipaa ni coda ne hen. Be nimen me e tauti Pétérú ne he pwahamii ni apulie ati, alechehe a tan ubwo ko *Pacika.

⁵Ke lé wéi Pétérú ne he karépu. Ke mepwo ni acéihi, ke lé te mwoiu ko pwoiitihi me den.

E pawie Pétérú wo pa âcélo

⁶É ha a bwén ânebuhe a bwo tautieng, ke wo Pétérú, ke e pule ha awieme lupwo alo coda. Ke cieeng ko ni itihe toki ne ko lupwoli coda. Ke pwo mwo ni coda na lé cuwo he pomwa ko a karépu, beme lé wéieng.

⁷Kehe icehi ana e te tuie kuti wo pa céiu *âcélo te Padaame, ke te ju pwéélang kuti ha ali karépu. Ke wo pali âcélo, ke e ti ko a céiu duaa Pétérú, ke e paumiéeng. Ke e pii ten pie: «Go cuwoda epin!» Ke e te tupwo kuti mu ko lupwo i Pétérú li itihe toki.

⁸Ke e pii ten wo pali âcélo pie: «Go cieko ko a taihenam, ke go cuwohe lupwo dihibwaam.» Ke e te piténedeeeng wo Pétérú. Ke e pii ten mwo wo pali âcélo pie: «Go cuwohe a palito tem, ke go âbé céing.»

⁹Ke e âcéin mu he karépu wo Pétérú. Kehe icehi ana time e uce temehi pie, nina e pwo ten wo pali âcélo, ke te ni juuju. Be e niimihi pie a niûn.

¹⁰Lu wédeni ni coda na lé wéa ânebun, ke lu wédeni mwo nina lé cuwo lang. Ke lu tehene nge ko a pomwa toki: a babé ko a pwomwo ubwo. Ke e te pitehi cehi ne ânebuhelu, ke lu wie, ke lu â ha a céiu pwaaden. É mulang, ke te tie kuti pali âcélo.

¹¹Ke e bwo mwojuia mwo a pwonime Pétérū, ke e pii pie: «Te a juuju kuti! É jenaa ni, ke é bwobe temehi pie, e pawiebé pa âcélo ten wo Padaame, beme e celuimiéo mu ha a pihuô te Érode! Ke e celuimiéo koja ni ta na lé pwo me lé pwo tong na a bele te lépwo *Juif [na lé pipwobwonikeme].»

E â pele ni bée acéhi béén

¹²É alecehe anaa, ke e â ha a pomwa te Maria, nyaa te loane na pii kon mwo pie Maréko. Lé teko mu lang a céiu a hiwon ko ni acéhi, be lé teko pwoitihi.

¹³Ke e cii a pomwa wo Pétérū, ke e âbé wo Roda me e tehi. Wo êje, ke ê eabwé ha a pwomwo naa.

¹⁴Ke e téne temehi a pati Pétérū, ke te junihe piwâénimen. Ke e téte ngen, ke e pii pie: «Éé, wo Pétérū na e âoté pwomwo!» Ke e pineuhi me e tehi ali pomwa!

¹⁵Ke lé pii ten pie: «Go piolo, go êje!» Ke e hegi ne telé pie: «Uhuu! É te juuju.» Ke lé pii ten mwo pie: «Ûhu! Wieli a jenen.»

¹⁶É he lé mwo ko picihe, ke e tee mwoiu ko cii ali pomwa wo Pétérū! Ke me lé tehi ali pomwa, ke lé te junihe téetieng kuti.

¹⁷Ke e pwo inenaado telé ko a in, pie me lé nemwo cihe. Ke e piuti telé a bwo pawieeng mu he karépu. Ke e pii telé mwo pie: «Wâé heme geé bo pii te Cang, me ni bée acéhi bénnye.» Ke e wie kojalé, ke e â ha a céiu duaan.

¹⁸Ke me pwang daabé, ke lé âdé ke âbé wo lépwo coda. Ke lé te junihe gia, be time lé uce temehi he celi e lang wo Pétérū, ke te junihe mwotilé.

¹⁹Ke e pwo me lé haneeng wo Érode, kehe icehi ana time lé uce tooeng. Ke e pwo me tahimwo lépwo awéa, ke e ne a mwomwon beme taunulé. É alechen, ke e ole wo Érode mu *Judé ne Césaré, beme e pimu lang.

E mele wo Érode Agripa ler

²⁰E te nihe okéé wo pa daame naa, wo Érode, ne ko lépwo apulie Tir me lépwo apulie Sidon. Ke lé piténelé wo lépwonaa, ke lé âbé alieng beme lé ilehi kojaeng a péém. Be lupwo amu naa, ke lé mulie mu ko a amu te Érode. Ke lé ne me pa pwaadeniilé wo Blaste, pa apenem de pa daame, ke pa caa te penem he mwodaame.

²¹Ke é ha a tan na e caa pipégali wo Érode, ke e cuwohe ni epwénen he daame, ke e taa tebwo pwo atebwo he daame, ke e cihe te ni apulie naa.

²²Ke lé te nihe picedieng, ke lé pii pie: «Éé! Time uce wo pa apulie na e cihe, kehe caa te wo padué!»

²³Ke é ha a benaamwon naa, ke e ahi Érode wo pa âcélo te Padaame, be time uce nime Érode me e pipwoun de Padaame, kehe te nimen me e te pipwoun den. Ke lé wiieng ne ni bélé, ke e mele.

²⁴Ke a pwooti te Padué, ke caa nihe piân.

²⁵Wo Barnabas me Saulo, ke lu caa panebwénihi ni penem delu ne ko lépwo acéihi ne *lérusaléma. Ke lu engemwo, woélé me loane na pii kon mwo pie Maréko.

Apostolo 13

a bécéiuhe bwo engen de paulo (*Pwahamii tii: 13.1—14.28*) Lé pipégali Barnabas me Saulo

¹É ne pele ni acéihi ne Antioche ha a province Siri, ke caa pwo ni péroféta me ni béén na lé pacémuni ni acéihi: wo Barnabas, Siméon, pana lé pii kon pie ‘pa Apulie Bwiile’; Lucius mu Cirène; Manaën, pana lé picilelu ibu me gupéno *Erode Antipas; ke wo Saulo.

²Ke pwo a benaamwon na lé patupwo wiinaado me ûdu, beme lé pwoiitihi te Padaame. Ke e pii telé na a *Jenen litihi pie: «Geé pineité Barnabas me Saulo ne ko a penem na é todelu ne kon.»

³É alecehe a bwo time wiinaado telé me pwoiitihi telé, ke lé ne ni ilé ne huïlu [beme adéilu] ke lé nelu me lu engen.

Lu â pwo a één Chipre

⁴E pahede Barnabas me Saulo na a Jenen litihi. Ke lu ole Sélusi, ke é mulang, ke lu engen pwo ong, nge pwo a één Chipre.

⁵Ke me lu tehene nge Salamine, ke lu patemehi a pwootti te Padué ne he ni *mwotapitihi te lépwo *Juif. Ke e âcéilu wo loane-Maréko, beme e picani telu.

E cubwonilu wo Élimas

⁶Ke me lu caa â engen pitihia één, die ha a pwomwo ubwo Pafos, ke lu too pa céiu Juif na pii kon pie Bar-lésu. Wo pa apulie naa, ke pa apwotuté, ke e pii pie weeng, ke pa péroféta te Padué.

⁷Wo panaa, ke pa béé Sergius Paulus, pa gupéno pwo a één naa, pa apulie na e pitemang. Ke e tote Barnabas me Saulo wo pa gupéno, be te junihe nimen me e téne a pwootti te Padué.

⁸Kehe icehi ana wo pali apwotuté, na pii kon mwo he pwo *grek pie Élimas, ke e hane beme e bitehi a bwo temehi nen de gupéno, beme e nemwo céihi ne ko a pwootti.

⁹Ke wo Saulo, pana lé mu pii kon mwo pie Paulo, ke caa ju tilieng na a Jenen litihi, ke e te ju ome Élimas, ke e pii ten pie:

¹⁰«Pa naî *Caatana! Wogo ke pa apipwobwonih ne nina mwomwon! Te junihe ubwo kuti a pipwohuô ne kom! Woté? Mwo te time go uce nebwén kuti a bwo bitehi ne ni pwaadeni Padaame na mwomwon?

¹¹Go téne: É jenaa [ke a okéé te Padaame, ke e kom] ke o bwi go, ke o pwo a benaamwon na time go uce alikenye.» Ke e te âbé kuti huîn a bwén, ke e pingaulieng hane ce apulie me lé pipééeng.

¹²Ke wo gupéno, ke e téetih ana e ko tuie, me [a junuu] a pwooti te Padué. Ke e te céihi kuti.

Antioche ne Pisidi

¹³É alechen, ke wo Paulo me lépwo béén, ke lé taa pwo ong mu Pafos nge Perge ha a province Pamfili. Ke e engen kojalu mulang wo Ioane-Maréko, ke e mwojuia ngemwo *Iérusaléma.

¹⁴Ke é mu Perge, ke lu engen, ke lu uti a pwaaden nge Antioche, ha a céiu duaa Pisidi. Ke me lu tehene ngelang, ke lu taa ha a mwotapitihi ha a *tan iitih, ke lu tebwo.

¹⁵Ke mepwo ni apulie na lé ko pwoiitihi lang, ke lé ko pine a tii ko *patén de Moosé, me ni tii te lépwo péroféta. Ke é alechen, ke lé pii telu wo lépwo apihuô ne ha a mwotapitihi pie: «Lupwo âjiéneme, mepie pwo ce pwooti teu me běpamwoiu a bele, ke geu cihe.»

E pacihe lépwo âjiénen wo Paulo

¹⁶Ke e cuwoda wo Paulo, ke e pwo inenaado beme lé nemwo cihe, ke e pii pie: «Geé téne, ati wogewé lépwo *Isaraéla, me wogewé mwo na geé ko pipwoiithi ibu.

¹⁷E pipégali lépwo caa tenye wo Padué he a bele Isaraéla. Ke e pwo me piubwo da a bele, ha a benaamwon na lé mwo apulie coho ne *Aigupito. Ke e pwo me lé wie ko a niihen me junuun.

¹⁸Ke e wéilé, he na e mwonuhi na 40 ni jo ne ha a melé.

¹⁹«Ke me e pwo me lé mele ne ni 7 mwametau mu ha amu *Kanana, ke e patupwo ne telé amu beme lépwo ju eapwihin.

²⁰A benaamwon naa, ke é mwonu na 450 ni jo. Ke [é aleche a bwo pipégalilé ten ne Aigupito, ke] e ne ni apihuô te ni watihenye, die ha a benaamwon de péroféta Samuel.

²¹«Ke mepwo ni watihenye, ke lé ilehi koja Padué pace daame helé. Ke e ne telé Saül, pa naî Kis mu ha a pwomwoiu te *Benjamin. Ke e daame helé he na 40 ni jo.»

Wo lésu pa aceluimikenye

²²«É alechen, ke e pé kojaeng a pihuô wo Padué, ke e ne te *Davita beme pa daame he lépwo caa tenye. E pii ne kon wo Padué pie: *É caa too Davita, pa naî Jessé, pa apulie na te junihe eânimung den, na e bo pacuwohi ati nina nimung kon. 1 Samuel 13.14*

²³ «Ke é ne he ni pihuô te Padué, ke e bo wie mu ha a pwomwoiu te Davita wo lésu, beme pa apiceluimi *Isaraéla.

²⁴ «Ânebuhe a bwo tuie te lésu, ke e âbé wo *loane pa apipuu apulie, ke e pipatemehi ati te a bele Isaraéla. Ke e pii telé pie: “Geé pininim, ke geé bitekewé, ke me puukewé!”

²⁵ Ke me e panebwénihi ni penem den, ke e pii telé wo loane pie: “Kona geé ko niimihi pie, woéo ke woo? Be time uce woéo pa *Mesia. Be e bo âbé alecehung wo pana o te junihe time uce jan ne kong me é tuwo ni tai ko ni dihibwaan.”»

Time lé uce temehi lésu

²⁶[Ke e pii mwo wo Paulo pie]: «Geé tabemiéo, wogewé lépwo âjiénung, lépwo piebehi *Abérama, me wogewé mwo na gé paciiti Padué. E caa patupwobé céiikenye ati a pwooti ce, beme celuimikenye.

²⁷ Kehe icehi ana ni apulie lérusaléma, me ni daame helé, ke time lé uce temehi lésu, pana e âbé beme e celuimikenye. Time lé uce temehi a pwooti na lé mu caa pii ânebun wo lépwo péroféta, na lé mu pine ati he ni tan iitihi. Kehe icehi ana lé pacuwohi a pwooti naa, be lé pwo beme e mele wo lésu.

²⁸ «Be lé te temehi pie, te tice aceli e pwo wo lésu celi jan me taunueng kon, kehe icehi ana lé te ilehi koja *Pilate pie, wâé heme e mele [ne ko a *kuricé].

²⁹ Be lé pacuwohi ati ni naado na pii ne kon ne ni tii iitihi. Ke é alechen, ke lé neeng ole mu ko a kuricé, ke lé neeng he iitihi.»

E pamulipieng mwo wo Padué

³⁰ «Kehe icehi ana wo Padué, ke e te pamulipieng mwo, mu ha awieme ni amele.

³¹ Ke é he ni tan na junihe hiwon, ke e pihabwieng wo lésu te ni apulie na lé tai taa me weeng mu Galilé, me lé taa lérusaléma. Ke é jenaa ni, ke caa lépwo apajuujueng ne ha awieme a bele Isaraéla.

³² «Ke wogeme, ke geme pipatemehi tewé a Pwooti Wâé naa. Be e caa mi pii ânebun wo Padué te ni watihenye.

³³ Ke, é jenaa ni, ke e pwo me denye ni naîlé [me ni béén mwo]. Be e pwo me e mulie cemwo wo lésu. «Be nye pine ne ha a béalohe psaume te Davita pie: É jenaa, ke é pii beetih: Wogo pa naîng, ke woéo pa caa tem.Psaume 2.7

³⁴ «Éa, wo Padué ke e pamulipieng mwo, mu ha amele, beme time e uce mwojuia mwo ne he iitihi, beme time uce nyaale pule nang. E caa mi pii wo Padué pie: É bo ne tewé a *adéihi na é caa mi pii te Davita. Ésaïe 55.3

³⁵ «Ke a juuju, be nye pine ne mwo ha a céiu duaa tii te *Psaumes pie: Ke time go uce neeng me nyaale pule pa apipenem iitihi tem na go caa pipégalieng.Psaume 16.10

³⁶«Ke e pipenem de Padué wo Davita, die ha a mele ten, beme e pacuwohi nina nime Padué kon. Ke me e mele, ke neduwoeng pwohewii lépwo caa ten, ke nyaale pule nang, ne he iitihi.

³⁷Kehe icehi ana wo pana e caa pamulipieng wo Padué, ke time uce nyaale pule nang.»

E pineuhi ni ta pwo tenye

³⁸⁻³⁹ «Wâé heme geé temehi ehi ni, wogewé lépwo âjiénung, pie é ko a nii lésu, na geme patemehi tewé jenaa, a bwo pineuhi na a ta. Be time uce jan ni patén de Moosé me pineuhi ni ta. Kehe icehi ana wo pana e céhi ne ko lésu, ke caa mwomwon nang, be caa piticenaado ne ko ni ta na e pwo.

⁴⁰Ke geé pipwocile, be koli e bo tuie ne kowé ana lé caa pii wo lépwo péroféta:

⁴¹ *Geé pipwocilekewé, wogewé lépwo apipaunukewé! Wâé heme geé téetihí, ke me geé pipiiden!* Be é o caa pwo ne pelewé ce naado celi junihe ubwo. Ke mepie lé piuti tewé, ke o time geé uce céhi ne kon.»*Habakuk 1.5*

⁴²⁻⁴³Ke é alechehe a pitihí, ke lu pwo me lu wie mu ha a mwotapitihí wo Paulo me Barnabas. Ke lé ilehi kojalu ne ni apulie pie me lu mwo ne ce behi ni pwooti telu, ha a tan iitihi alechen. Ke hiwon ni apulie na lé âcéi Paulo me Barnabas: wo lépwo Juif, me ni béen na lé céhi ne ko a pwoitihi te lépwo Juif. Ke lé pipwojepule ibu, ke lu pamwoiulé, beme lé imwi mangihi ni *pipwoééhe tice ja kon de Padué.

Lu â céii nina time uce ni Juif

⁴⁴É ha a tan iitihi alechen, ke lé pipitilé a hiwon ko ni apulie Antioche ne Pisidi, beme lé téne a pwooti te Padaame.

⁴⁵Ke lé teko ali ni apulie naa wo [lépwo apihuô te] lépwo Juif, ke lé pipwokon ne ko Paulo, ke lé pigetieng, ke lé pipiitaeng.

⁴⁶Kehe icehi ana lu pii mwoiuhi telé wo Paulo me Barnabas pie: «Gemu mi âbé céikewé, be wogewé ninaa, na me geé mi téne a pwooti te Padué. Kehe geé téétihi, ke é mulang, na gemu bitekemu nge céii nina time uce ni Juif. Be wiel time uce a dewé a *mulie dieli mwo ne pele Padué!

⁴⁷Be weengi ana e caa pii teme wo Padaame: É neko bé, me go pwéélang de ni béé bele, beme go pii te a bwohemwo ati pie, e caa âbé celuimikewé wo Padué!»*Ésaïe 49.6*

Hiwon nina lé céhi

⁴⁸Ke me lé téne anaa wo lépwona time uce lépwo Juif, ke lé te junihe pipwodéén. Ke lé pii pie: «Te junihe wâé kuti a pwooti te Padaame!» Ke lé céhi ne nina e caa pipégalilé wo Padué, beme e mu kolé a mulie na tice pwonehin.

⁴⁹Ke e â pitihí a amu a pwooti te Padaame.

50Pwo ni toomwo na piubwo jélé ne ha amu naa, na wâé telé a pwoitihi te lépwo Juif. Ke wo lépwo Juif, ke lé pine ânepuni ni toomwo naa, me ni apihuô ha amu, beme lé pwotahi ne ko Paulo me Barnabas. Ke lé pawielu mu ha amu telé.

51Ke lu tagilihi ni muu pule ko alu [beme lu habwii pie time uce wâé ni huô telé] ke lu engen kojalé, ke lu â Ikone.

52Ke ni acéihi na lé mu Antioche, ke caa ju tililé na a Jenen litih, ke lé te junihe pipwodéén.

Apostolo 14

Paulo me Barnabas ne Ikone

1Pwie nina tuie ne Ikone me Antioche. Be lu taa wo Paulo me Barnabas ha a *mwotapitihi te lépwo *Juif, ke lu patemehi a pwooti te Padué; ke hiwon ni apulie na lé céihi: wo lépwo Juif, me lépwona time uce lépwo Juif.

2Kehe icehi ana wo lépwo bée Juif, ke te muhi telé me lé céihi ne ko a pwooti na lu pipatemehi. Ke lé pine da puni lépwona time uce lépwo Juif na lé mu lang, beme lé okéé ne ko Paulo me Barnabas.

3Kehe icehi ana time lu uce engen, ke lu mwo te mu lang. Ke time uce piabwobwo julu me lu pii mwoiuhi a pwooti te Padaame, be lupwona lu céihi ne kon. Ke e *pajuujuhi ni pwooti na lu pii wo Padué, ke e ne me lu pwo ni *pipwojunuun me ni inenaado na piwéden.

4Ke lé pipiiden wo lépwo apulie ha amu naa. Be a céiu duaan, ke lé mu ko [lépwo apihuô te] lépwo Juif; ke a céiu duaan, ke lé âcéi lépwo *apostolo.

5Ke lé piténelé wo lépwo Juif me lépwona time uce lépwo Juif, me lépwo apihuô telé, beme lé pwotahinaado ne ko Paulo me Barnabas, ke me lé taunulu ko péi.

6Kehe icehi ana me lu temehi anaa, ke lu cela nge he ni pwomwo ubwo Listre me Derbe ne Likaoni, me ni bée duaan ko jijen.

7Ke lu patemehi nelang a Pwooti Wâé.

Ne Listre me Derbe

8É ha a benaamwon naa, ke e mu ha a pwomwo ubwo Listre wo pa apulie na tebwomwa nang he mwo wahin nang. Ke time uce jan me e cuwoda me engen.

9Ke é ha a céiu tan, ke e tabemi Paulo he e ko cihe ko a Pwooti Wâé. Ke e te ju omeeng wo Paulo, be e alihî pie e céihi wo paje beme wâé nang.

10Ke e te nihe cihe da ko miiden wo Paulo, ke e pii ten pie: «Go caama, me go cuwo!» Ke e te cuwoda kuti, ke e engen.

11Ke hiwon ni apulie mu ha amu Likaoni na lé alihî ana e pwo wo Paulo. Ke lé cihe da ko miiden he patilé pie: «Éé! Ni duéé henye, ke lé caa pé ni éé apulie, ke lé opé céiikenye!»

¹²Ke lé ne telu ni nii ni duéé helé; lé pii ko Barnabas pie Zeus [a nii pa daame he ni duéé helé]; ke wo Paulo pie Ermès, be te weeng, pa apébé na a pwooti.

¹³Ke pwo a *mwaiitihi te Zeus, na e mu ha ata ne ha a pwomwo ubwo. Ke wo pa apwoâpwailo te Zeus, ke e pébé ni caa te paaci na pwo itihe muun kolé, ke lé ne he ni pomwa. Be nimen me woélé ati me a pubu apulie, ke me lé *pwoâpwailo te lupwo apostolo.

Te céiu pa ju Dué

¹⁴Kehe icehi ana me lu téne anaa, ke te junihe time uce wâé telu, ke lu tie ni epwénelu. Ke lu tête nge ha awieme ni apulie, ke lu toïi da pie:

¹⁵«Ûhu! Lépwo béému, é mu ko ade na geé pwo anaa? Wogemu, ke te lupwo apulie pwohewiikewé! Ke gemu âbé patemehi tewé a Pwooti Wâé! Wâé heme geé necu ni duéé hewé, na piticenaado ne kolé! Ke geé bitekewé ne ko Padué na e mulip. Be weeng na e pwo a miiden me a bwohemwo me a jié, me ati ni naado na e hen.

¹⁶«Ke é he ni benaamwon na e caa âdé, ke e mwo te ne ni puapulie me lé mwo te pwo nina te wâé telé.

¹⁷Kehe icehi ana e mu te habwii tenye a pipwoééhe ten, ke e pwo ni naado na wâé, me denye. Be e ne tenye a ute, bé mu he miiden, me ni benaamwon ko a pitii âdaanu. Ke weeng na e ne tenye ni wiinaado na nihe hiwon, ke e ne mwo me nye nihe pipwodéén.»

¹⁸Ke lu caa te patemehi telé ni pwooti naa wo Paulo me Barnabas, kehe icehi ana lu mwo te pwobwonilé beme time lé uce pwoâpwailo telu.

Lé ahi Paulo ko péi

¹⁹É ha a benaamwon naa, ke lé âbé mu Antioche ne Pisidi, ke é mu Ikone, wo lépwo bée Juif. Ke lé taa pine puni lépwo bée apulie, beme lé taunu Paulo. Ke lé te junihe ahieng ko péi, ke lé céieng wie koja a pwomwo ubwo, be lé piniumihi pie e caa mele.

²⁰Kehe icehi ana me lé mu aujenieng wo lépwo acéihi, ke e cuwoda, ke e taa ha a pwomwo ubwo. Ke é ha a tan alechen, ke lu â Derbe wo Paulo me Barnabas.

Lu mwojuia mwo ne Antioche ne Siri

²¹É mulang, ke lu pipatemehi a Pwooti Wâé ne Derbe wo Paulo me Barnabas. Ke hiwon ni apulie na lé céihi. Ke lu mwojuia mwobé ne Listre, ne Ikone me Antioche ne Pisidi.

²²Lu pamwoiu lépwo acéihi beme lé cumang ne he ni céihi telé ne ko Padaame. Ke lé pii telé pie: «Nye mulie ne he ni picani, me genye â ha a pwaaden nge ha a *Mwametau te Padué.»

²³Ke lu pipégali lépwo bée apulie, beme lépwo apihuô te ni bée acéhi ne he ni bée duaan. Ke pwo a céiu benaamwon na lu pipatupwo wiinaado me ûdu, ke lu pwoiitihi, beme lu nelé te Padaame na lé céhi ne kon.

²⁴Ke nebwén, [ke lu pinelé] ke lu pitahagéi ole Pisidi, ke lu tuie nge ha a province Pamfili.

²⁵Ke é nelang, ke lu pipatemehi a Pwootí Wâé ne Perge. Ke é mulang, ke lu ole ne Atali.

²⁶Ke lu taa pwo ong me lu mwojuia ngemwo Antioche ha a province Siri. Be wo lépwo acéhi ne ha a duaan naa, ke li lé caa nebwén ko nelu te Padué ha a pipwoééhe, ne ko a penem na lu ko pwo.

²⁷Ke me lu tuie ngemwo lang, ke lu neibu lépwo acéhi. Ke lu uti telé ati ni jéhinaado na e ne telu me lu pwo wo Padué. Ke lu uti mwo a bwo tehi na a pomwa ko a céhi te lépwona time uce lépwo Juif, me lé céhi.

²⁸Ke lu mwo mu me bwolihi pelelé.

Apostolo 15

A picihe ko ni patén

¹Pwo ni bée apulie, na lé âbé mu *Judé me lé â Antioche. Ke lé mwo pacémuni ni acéhi, ke lé pii telé pie: «Mepie time uce pipwotegoop tewé, pwohewii ana pii ne he ni *patén de Moosé, ke o time uce celuimikewé.»

²Kehe icehi ana wo Paulo me Barnabas, ke te junihe time lé uce piténelé me woélé, ke lé te nihe picihe ko a bwo niimihinaado naa. Ke lé pihuô ibu pie wâé hemepie lé taa *lérusaléma, woilu me ni béen mu kolé, beme lé o picihe wo lépwo *apostolo, me lépwo apihuô te ni acéhi, ko ace bwopiine a pwooti naa.

³Ke é mu ko anaa, na lé pawielé ngen wo lépwo acéhi Antioche. Ke lé engen wo lépwoje, ke lé tahagéi Fénisi me *Samari. Ke lé piuti a bwo pininim de lépwona time uce lépwo *Juif. Ke lé te junihe pipwodéén kon wo lépwo acéhi na lé mu lang.

A pitihi ne lérusaléma

⁴Ke me lé tuie nge lérusaléma, ke lé hegile ati ne ni acéhi, me ni apostolo, me ni apihuô telé. Ke lé piuti telé ati ni naado na lé pwo me Padué.

⁵Kehe icehi ana pwo ni bée *Farasaio na lé caa céhi ne ko lésu, ke lé cuwoda, ke lé pii telé pie: «Wâé heme lé *pwotegoop te ni acéhi na time uce ni Juif, ke wâé heme lé âcehin ehi ni patén de Moosé.»

⁶Lé pipitilé wo lépwo apostolo me lépwo apihuô, beme lé picihe ko a pwooti naa.

E pacihelé wo Pétérú

⁷ Lé te junihe picihe kon, ke é ha a céiu benaamwon, ke e cuwoda wo Pétérū, ke e pii telé pie: «Lépwo acéihi béléng, geé temehi pie caa bwolihi na e pipégaliéo wo Padué mu ha awiemewé, beme é patemehi a pwootti te nina time uce ni Juif. Be nimen me lé téne a pwootti ko a mulip, ke me lé céihi ne kon.

⁸ Wo Padué, ke e te temehi ni pwonime ni apulie. Ke e ne telé mwo a *Jenen litihī, pwohewii ne konye. E tee ko habwii tenye pie, e te hegilé mwo.

⁹ Time e uce pipwoinen ne konye me woélē. E pwo me wâé ni pwonimelé, be lé céihi.

¹⁰ «Ke é jenaa ni, ke é mu ko ade na geé mwo tekō tacebwéni Padué? É ko ade na geé ne huîi ni acéihi a âneule, na time uce jan me lé canihi wo lèpwo watihenye, ke wogenye mwo?

¹¹ Genye céihi pie caa celuimikenye, ko a *pipwoééhe tice ja kon te Padaame lésu. Tai wogenye me woélē.»

¹² Ke te ju tice pwocihe ha ali tapithihi, ke lé tabemi Barnabas me Paulo. Ke lu piuti telé ni *pipwojunuun me ni inenaado na e ne me lu pwo wo Padué, ne ha awieme nina time uce ni Juif.

Ni âniimihinaado te Cang

¹³ Ke me lu caa cihe ati, ke e uce cihe wo Cang, ke e pii pie: «Lépwo acéihi béléng, geé tabemiéo.

¹⁴ E piuti wo Simon [Pétérū] a bwo tabuhi pipégali nen de Padué ace bele ten, mu hadenii ni bén na time uce ni Juif, beme a bele ten.

¹⁵ Be caa pwohewii a bwopiinen de ni péroféta, na nye pine ne he ni tii iitihī pie:

¹⁶ *E pii wo Padaame pie: “É alecehe anaa, ke é bo âmwobé, ke é bo bahi mwo a mwa te *Davita na e caa tupwo. É bo pwo me e cuwo mwo,*

¹⁷ *beme lé o bo haneéo ati ne ni apulie pwo bwohemwo. Éa, beme lé o bo haneéo ati ne ni bele na é todelé beme lé bele tong.*

¹⁸ *Woéo Padaame, na é pii ni pwootti naa. É caa te mi pii beetihî ânebun.”» Amos 9.11–12*

¹⁹ E pii mwo wo Cang pie: «É niimihi pie, me time uce ne mwo ace céiu âneule huîi nina time uce ni Juif, na lé caa céihi ne ko Padué.

²⁰ Wâé heme nye pwotii nge céiilé, me nye pii telé pie: “Geé nemwo wii ni mewota na *pwoâpwailo kon ne te ni *dème duéé. Geé nemwo pibune, ke geé nemwo pipule hauli. Geé nemwo wii ni mewota na mwo cewéle, me ni wota na ebunuhi [be time e uce wie a cewéhelé].”

²¹ Be tabuhi bwolihi, ke pwo ni apulie na lé patemehi ni patén de Moosé ne he ni pwomwo ubwo. Ke lé pine ni patén ne he ni *mwotapitihi, ati he ni *tan iitihī.»

A tii nge céii ni acéihi Antioche

²²Ke wo lépwo apostolo, me lépwo apihuô, me ati ni acéhi, ke lé piténelé beme lé tii a tii nge céii ni acéhi ne Antioche. Ke lé pipégali Silas me Jude, na pii kon mwo pie Barsabas, lupwo apulie na lé céhi ne kolu, beme lu âcéi Paulo me Barnabas [beme lé pé ngen ali tii].

²³Ke lé ne telé ali tii na pii ne hen pie: Bwocu tewé, wogewé ni acéhi ne Antioche, ke Siri, ke Silisi! Wogeme lépwo apostolo, me lépwo apihuô, na geme tii a tii ce. Time geé uce Juif, kehe icehi ana geé céhi ne ko Kériso, ke é mu ko anaa, na wogewé, ke caa lépwo âjiéneme ne he niin.

²⁴Geme téne pie, pwo ce béen celi lé engen mu peleme, ke lé âdé pahaulikewé ko ni pwooti telé, ke lé pwo me penem ni pwonimewé. Kehe icehi ana time uce wogeme celi geme ne a mwomwon delé.

²⁵Ke é mu ko anaa, na geme pitapitikeme, ke me niimihi pie wâé hemepie geme pipégali lupwoce apulie mu peleme, me geme nelu lé céiikewé, beme lu âdé céi lupwo acéhi béeome, lupwona te junihe eânimeme telu: wo Paulo me Barnabas,

²⁶lupwo apulie na time uce piwâ julu me lu patupwo ni mulihelu ne he nii Padaame lésu Kériso.

²⁷Geme ne lé Jude me Silas, beme lu mwo ju pii pwaatihi tewé, nina tii ne ha a tii ce.

²⁸Be geme piténekeme, wogeme me a Jenen litih, pie time uce wâé heme geme ne mwo huîiwé ace âneule. Kehe icehi ana weengi a junado:

²⁹Geé nemwo wii ni mewota na pwoâpwailo kon ne te ni déme duéé; Geé nemwo wii ni mewota na mwo cewéle, me ni wota na ebunuhi [be time e uce wie a cewéhelé]; Geé nemwo pibune, ke geé nemwo pipule hauli. Wâé heme geé nebwén koja ni naado naa. Adéikewé!

Nihe pamwoiu lépwo acéhi

³⁰Ke lé patupwo ngen Paulo, Barnabas, Jude me Silas. Ke lé â Antioche ne Siri, ke lé tapiti ati ni acéhi, beme lé ne telé ali tii.

³¹Ke me lé pine ali tii wo lépwo acéhi, ke te junihe piwâénimelé kuti.

³²Mepwo é ne ko Jude me Silas, lupwo péroféta, ke lu mwo te junihe pacihelé ke pamwoiulé.

³³Lu mwo mu lang ha a céiu benaamwon, ke lé pinelu wo lépwo acéhi mu Antioche, me lu mwojuia ngemwo pele lépwona lé nelu bé.

{³⁴Kehe icehi ana e niimihi wo Silas pie wâé hemepie e mwo mu.}

³⁵Ke wo Paulo me Barnabas, ke lu tee mu Antioche. Ke lu pacémunihi me pii beetihi a pwooti te Padaame, woilu me ni apulie na hiwon jélé.

**a báalohe bwo engen de paulo
(Pwahamii tii: 15.36—18.22)**

Lu pipiiden wo Paulo me Barnabas

³⁶É alecehe a céiu benaamwon, ke e pii wo Paulo te Barnabas pie: «Genyu mwojuia ngemwo, he li pwomwo ubwo li genyu patemehi nge hen a pwooti te Padaame. Wâé heme genyu caniê ni acéihi na ko élé hen, beme genyu alihî pie he ko woté jélé.»

³⁷Ke nime Barnabas me e pé mwo loane, na pii kon mwo pie Maréko.

³⁸Kehe icehi ana muhi te Paulo, be e te pipwoité engen kojalu wo panaa. Be tabuhi mu ha a province Pamfili, ke time e uce picani telu, die ha anebwén ko ni penem delu.

³⁹Lu te junihe picihe, ke lu te junihe piokéé, dieli lu â pipiiden. Ke e pé loane-Maréko wo Barnabas, ke lu engen pwo ong nge Chipre.

⁴⁰Ke e pé Silas wo Paulo, ke lé nelu wo lèpwo acéihi, ne ha a pipwoééhe te Padaame. Ke lu engen.

⁴¹Ke lu tahagéi lupwo province Siri me Silisi, ke lu pamwoiu ngen ni acéihi.

Apostolo 16

Wo Timoté ke e âcéi Paulo

¹E engen wo Paulo mulang nge he ni pwomwo ubwo Derbe me Listre. E pimu Listre wo pa acéihi na pii kon pie Timoté, pa naî ê toomwo *Juif, na e caa céihi ne ko lésu. Ke hemepwo pa caa ten, ke time uce pa Juif.

²Ke lé pii wo lèpwo acéihi mu Listre ke é mu Ikone pie, te junihe pa apulie wâé wo Timoté.

³Nime Paulo me e pééeng. Ke e *pwotegoop ten, mu ko lèpwo Juif na lé mu ha a duaan naa. Be lé te temehi ati pie, wo caa ten, ke time uce pa Juif.

⁴É he ni pwomwo ubwo na lé â hen, ke lu pii te ni acéihi wo Paulo me Silas pie, me lé ténedehi ni pihuô te lèpwo apostolo me lèpwo apihuô te ni acéihi ne *lérusaléma.

⁵Ni acéihi, ke piubwo jélé da ne ha a céihi, ke e pitaamwo a jéhilé téteda he ni tan.

Tode Paulo ne Macédoine

⁶Ke e pwobwoni Paulo me Silas a *Jenen litihi, beme lu nemwo patemehi a pwooti te Padué ne ha a province Asia. Ke lé pitahagéi a Frigi, me a province Galat [me lèpwo béélu].

⁷Ke me lé tehene nge mwonuhi a duaan Misi, ke lé pwo me lé taa ha a province Bitini, kehe icehi ana time e uce tehi ne telé na a Jene lésu.

⁸Ke é mulang, ke lé uce tahagéi Misi, ke lé tuie ole Troas ha atii ne ong.

⁹Ke é he bwén, ke wo Paulo, ke e alahi ne he niûn pa apulie mu ha a province Macédoine, na e ko cuwo, ke e wâgo kon ke e pii ten pie: «Go âbé ne Macédoine, me go picani teme!»

¹⁰É ne alechehe ana e habwii ten, ke geme hane me geme piepin nge Macédoine, be geme caa temehi pie, wo Padaame na e todekeme, me geme patemehi a Pwooti Wâé nelang.

Ne Filipi

¹¹Geme taa pwo ong ne Troas, ke geme caa te â ko a één Samotrace. Ke é ha acaama hen, ke geme tuie ne Néapolis.

¹²Ke é mulang, ke geme â Filipi, a pwomwo ubwo ne ha a céiu duaan ko a province Macédoine. Filipi, ke a colonie te lépwo Roma. Mwo te pwo ni tan deme nelang.

E céihi wo Lidi

¹³É ha a *tan iitihi, ke geme wie koja a pwomwo ubwo, ke geme âmwonuhi a éémwa, be geme niimihi pie e lang ace duaan celi lé mu pwoiitihi ne hen wo lépwo Juif. Geme tebwo, ke geme cihe ne ko ni toomwo na lé ko pitapitilé nelang.

¹⁴Wo ê céiu, ke a niin pie Lidi, ê apulie mu Tiatire, ê a-icuhi mwaanu megele, na te junihe ubwo a cuhin. Time uce ê Juif, kehe icehi ana e céihi ne ko a pwoiitihi te lépwo Juif. Ke e te ju tabemi ehi ni pwooti te Paulo. Ke e tehi a pwonimen wo Padaame beme e hegi a pwooti.

¹⁵Ke puueng me ni apulie na lé mu ha a pomwa ten. Ke é alechen, ke e pii teme pie: «Mepie geé *pipajuujuhi pie, é céihi me mang ne ko Padaame, ke geé âbé céing ne ha a pomwa tong!» Ke e cuwokome beme geme âcéin.

E pawiehi a duéé mu ko ê toomwo

¹⁶É ha a céiu tan, he geme â ha a duaan na lé mu pwoiitihi ne hen, ke e âbé benikeme ê toomwo na pwo duéé kon. A duéé naa, ke e patemehi ten me e pii te ni apulie nina e bo tuie. Ke te junihe hiwon ni mwani na lé hegi mu ko nina e pii, wo lépwona e penem delé.

¹⁷Ke e âbé céime, wogeme me Paulo, ke e toii pie: «Wo lépwo apulie ce, ke lépwo eabwé te Padué na nihe e daaité, ke lé patemehi tewé a pwaaden nge ha a mulip.»

¹⁸E te wonaa ati he ni tan, ke e caa â okéé wo Paulo. Ke e te biteeng kuti, ke e pii te ali duéé pie: «Go wie mu ko ê toomwo naa, ne he nii lésu Kériso!» Ke e te wie kuti mu kon.

Imwi Paulo me Silas

¹⁹Ke me lé alahi wo lépwo apihuô ten pie, caa tieden ali apé mwani telé, ke lé te imwi kuti Paulo me Silas, ke lé teuulu nge ha apimu ibu te ni apulie ne he pwahamii ni apihuô ha amu.

²⁰Lé habwiilu te lépwo atautinaado te lépwo Roma, ke lé pii telé pie: «Wo lupwo apulie ce, ke lu pahauli a pwomwo ubwo. Be lupwo Juif,

²¹ke lu ko patemehi ni huô na mwo coho, na tice mwomwon denye me nye hegi, ke me genye mulie hen, wogenye lépwo Roma.»

²²Ke lé te okéé kuti ne kolu ne ni apulie. Ke wo lépwo atautinaado, ke lé céi tie ni epwénelu, ke lé pwo me ahilu ko beba-acuwo.

²³Ke lé nihe ahilu, ke lé tahilu da he karépu, ke lé pii te pa awéa kolu pie me e wéa ehi kolu.

²⁴É mulang, ke e nelu ha a bénebwéne nemwa ne ha a karépu wo pa awéa kolu, ke e cie mwo ni alu ne ko ni ba-acuwo.

Penem bwohemwo

²⁵É ha awieme bwén, ke lu teko pwoiitihi, me pwonyebi, me pipaunu Padué wo Paulo me Silas. Ke lé teko tabemilu wo lépwo béélù ko pwokarépu.

²⁶Ke e te tuie kuti a penem bwohemwo, na te junihe ubwo. Ke e papenemehi ni goomwa ko a karépu. Ke te tai tehi kuti ati ni pomwa, ke tupwo mwo ni itihe toki, na lé cie lépwo a-mu he karépu kon.

²⁷Ke me e ûmiê wo pali awéa, ke [te junihe emegéi nan kuti. Be] e alihî ni pomwa ubwo ko ali karépu he tehi, ke e te céi kuti a teua ten, beme e piwolieng hen, be e niimihi pie lé caa cela wo lépwo a-mu he karépu.

²⁸Kehe icehi ana e henieng wo Paulo, ke e pii ten pie: «Go nemwo pipwotako, be te tai wogeme éni ati!»

²⁹Ke e te ilehi kuti ace miû wo pali awéa, ke e taa epin ha ali karépu, ke e tidihî jilin ko ni a Paulo me Silas, ke éjén nang ko a bwo mwotieng.

E céhi pa awéa

³⁰Ke e pawielu, ke e pii telu pie: «Lupwo daame, ade aceli me é pwo, beme o celuimiéo?»

³¹Ke lu hegi ne ten pie: «Go céhi ne ko Padaame lésu, ke o celuimiko, wogo me ni apulie na lé mu ha a pomwa tem.»

³²⁻³⁴Ke e pé Paulo me Silas nge ha a pomwa ten, he mwo bwén, ke e puu ni ahinaado kolu, ke e pwo me lu wiinaado. Ke lu patemehi te paje me ni apulie na lé mu ha a pomwa ten, a pwooti te Padaame. Ke lé céhi ne kon, ke puulé. Ke lé nihe pipwodéén.

Lé patupwo Paulo me Silas

³⁵É he pwang, ke lé pahede lépwo apipépwooti wo lépwo atautinaado te lépwo Roma, beme lé pii te pa awéa ko a karépu pie me e patupwolu.

³⁶Ke e pii te Paulo wo pa awéa pie: «Lé piibé céliéo a pwooti wo lépwo atautinaado, pie me é patupwokéu. Geu wie, ke geu engen ha a péém.»

³⁷Ke e pii wo Paulo te lépwo apipépwooti pie: «Lépwoje, wogemu ke lupwo Roma, kehe icehi ana lé pijeta komu, ke lé ahikemu ne he pwahamii ni apulie ati, ke lé tahikemu ne he karépu! Ke é jenaa ni, ke lé pwo me lé pipwoneduwohi a bwo pawiekemu? Úhu! Time uce wonaa! Wâé heme lé te âbé woélé, me lé pawiekemu.»

³⁸Ke lé engen wo lépwo apipépwooti, ke lé pémwojuiéhi nge céii lépwo atautinaado te lépwo Roma a bwopiinen de Paulo. Ke te junihe mwoti lépwo atautinaado he lé téne pie lupwo Roma.

³⁹Ke lé âbé pimiibule ne telu. Ke lé pawielu, ke lé cuwokolu pie me lu engen mu ha a pwomwo ubwo.

⁴⁰Ke lu engen wo Paulo me Silas, ke lu taa too Lidi. É alecehe a bwo ali ni acéihi, ke lu pamwoiulé, ke lu engen.

Apostolo 17

Paulo me Silas ne Tésalonik

¹Lu â Amfipolis me Apoloni wo Paulo me Silas, ke lu tehene nge Tésalonik, he na e mu lang a céiu *mwotapitihi te lépwo *Juif.

²Ke e taa ha a mwotapitihi wo Paulo, pwohewii ana e mu te pwo. Ke é he na cié ni *tan iitihi, ke e pwopune ko a pwooti mu he ni tii iitihi.

³E pii pwaatihi ke habwii telé pie, wo pa *Mesia, ke e o bo mu he ni picani ke e bo mele. Kehe icehi ana e o bo mulie cemwo. Ke e pii telé mwo wo Paulo pie: «Wo pa lésu na é patemehieng dewé, ke weeng kuti pa Mesia.»

⁴Wo lépwo béén mu kolé, ke e ti kolé ni pwooti naa, ke lé âcéi Paulo me Silas. Ke hiwon ni béén mu ko lépwo *Grek na lé âcéilu: nina wâé telé a pwoitihi te lépwo Juif, wonaa mwo mu pele ni toomwo na piubwo jélé.

⁵Kehe icehi ana lé te junihe pipwokon wo lépwo Juif, ke lé tote ni apulie na te tice aceli wâé ne kolé, ke lé pine ânepuni ni apulie ha a pwomwo ubwo, beme lé okéé. Ke lé â hanelu ha a pomwa te pa apulie na pii kon pie Jason, beme lé péélu ole pwo pwaaden, ne he pwahamii ati ni apulie [beme tautilu].

⁶⁻⁷Kehe icehi ana time lé toolu, ke lé uce teuu ngen Jason me lépwo bée acéihi pele lépwo apihuô ne ha a pwomwo ubwo, ke lé toii pie: «Wo paje, ke e hegi lupwo apulie ta, wo Paulo me Silas, lupwoli lu pahaulihi a bwohemwo ati, ke é jenaa ni, ke lu tuie ne éni! Wo lépwoje me lépwo bélén, ke lé cubwonihni patén de César, pa daame ubwo te lépwo Roma. Be lé pii pie, te céiu pa daame ubwo, ke wo panaa, ke wo lésu.»

⁸Ke me lé téne anaa ne ni apulie me lépwo apihuô, ke te junihe pahaulilé kuti.

⁹Ke lé bwo pawie Jason me lépwo béén, na lé pwocuhi ni cuhinaado telé.

Ne Béré

¹⁰É he babwén, ke wo lépwo acéihi, ke lé te pwome pwo me lu engen kuti [mu Tésalonik] wo Paulo me Silas, me lu â ha a pwomwo ubwo Béré. Ke me lu tehene ngen, ke lu taa ha a mwotapitihi te lépwo Juif.

¹¹Wo lépwo Juif na lé mu Béré, ke te junihe wâé jélé koja lépwo Juif na lé mu Tésalonik: Be lé hegi a pwootti ha a pipwodéén. Ke ati he ni tan, ke lé te omehi ehi ni tii iitihi, beme lé alahi pie, teko ni juuju kuti ni pwootti na e ko pii telé wo Paulo.

¹²Hiwon nina lé céihi mu kolé, ke é mu pele lépwo Grek, ke hiwon mwo ni toomwo na piubwo jélé, ke pwo mwo ni aiu.

¹³Kehe icehi ana lé téne wo lépwo Juif mu Tésalonik pie wo Paulo, ke e ko patemehi a pwootti te Padué ne Béré. Ke lé âbé pine ânepuni ni apulie lang, ke lé pwo me lé okéé ne kolu.

¹⁴Ke lé te pwome téele kuti wo lépwo acéihi, ke lé pé Paulo, ke lé pééeng nge ha atii ne ong. Ke mepwo wo Silas me Timoté, ke lu mwo tee mu Béré.

¹⁵Lé pé Paulo die Atène wo lépwo acéihi. Ke e pahedelé mwo pie me lé mwojuia ngemwo Béré, me lé â pii te Silas me Timoté pie me lu piepin ko âbé tooeng.

Paulo ne Atène

¹⁶Wo Paulo, ke e mwo te ju pwome piucéi Silas me Timoté ne Atène. Ke e alahi pie, te junihe hiwon ni *déme duéé na lé mwo te pipaunuhi ne ni apulie ha a pwomwo ubwo naa. Ke te junihe téé kuti a pwonimen.

¹⁷Ke é ne ha a mwotapitihi, ke e pacihe ni Juif, me ni béén na wâé telé a pwoiitihi te lépwo Juif. Ke ati he ni tan, ke e pacihe mwo ni béén na e toolé ne ha apwojenep.

¹⁸Ke lé picihe mwo me weeng ni béé caa te lépwo *épicurien* me lépwo *stoïcien*. Wo lépwo béén, ke lé pii pie: «He ade ana e teko cihe ko pii tenye wo pane?» Ke wo lépwo béén mwo, ke lé pii pie: «Pwohewiin heme e pipatemehi ce duéé celi te pi-ité.» Be lé téne Paulo he e ko pipatemehi lésu me a mulie cemwo.

¹⁹Ke lé pééeng céilé, ke lé pééeng nge ha a mwohuô ha a pwomwo ubwo na a niin pie *Aréopage*, ke lé pii te Paulo pie: «Nimeme me geme temehi ehi ni naado naa, na mwo coho, na go ko pii teme.

²⁰Be go pwo me geme téne ni naado na te ité, ke nimeme me geme temehi ce bwopiinen.»

²¹Be ati ni apulie éni Atène, me ni béén na ni aâbé na lé mulie ne éni, ke lé te uti ke tabemi ni jepule na mwo coho.

²²Ke e cuwoda wo Paulo, ke e pii pie: «Lépwo Atène, é alahi pie geé te junihe pwoiitihi te ni duéé.

²³Be me é ko engen ha a pwomwo ubwo tewé, ke é alahi ni démenaado na geé bahi me geé pipaunuhi, me pwoiitihi ne kon. Ke é te tooli mwo a *apwoâpwailo

na tii ne kon pie: *A de Padué na time nye uce temehieng.* «Geé téne, wo Pana geé pipaunueng na time geé uce temehieng, ke weeng kuti na é âbé pipatemehieng dewé.

²⁴Wo Padué na e pwo a bwohemwo, me ati ni naado na e pwon, ke weeng Padaame he a miiden me a bwohemwo. Ke time e uce mu he ni *mwaiitihi na lé bahi wo lédwo apulie.

²⁵Ke time uce jan me nye picani ten me e mulie, be tai pwo ne ten ati. Be weeng Pana e ne tenye a mulie, me a nenehenye, me ati ni naado.

²⁶Ke e pwo me ni apulie ati, ke me lé wie mu ko pa apulie na te céiu nang, beme lé mulie pitih a bwohemwo. Ke e caa nebwén ko ne telé ni picé ko a amu telé, ke e caa nebwén ko ne telé ni benaamwon ne ha a jo.

²⁷«E wonaa a bwo ne nen den wo Padué beme lé o haneeng ne ni apulie. Be time uce e ité kojakenye. Piwien hemepie binyi me lé haneeng wo lédwo apulie, kehe lé o te tooeng.

²⁸Be caa nebwén ko pii pie: “Nye mulie mu kon, nye piâdé ke âbé, ke genye apulie mu kon.” Pwohewii ana lé pii mwo wo lédwo bée apwotii tewé pie: “Wogenye mwo ni naîn.”

²⁹«É mu ko anaa, ke wogenye ni naîn, ke genye nemwo niimihi pie wo Padué, ke e pwohewii ni duéé na pwo ko péi, ai nina pwo ko mwani megele, me mwani pwojo! Time e uce pwohewii ni naado na lé pwo wo lédwo apulie, pwohewii ni bwo niimihinaado telé, be time lé uce temehieng!

³⁰Ke wo Padué, ke caa time e uce ne me pwonaado ne ko ni benaamwon na time lé uce temehieng. «Kehe icehi ana é jenaa ni, ke e cuwoko ati ni apulie pwo bwohemwo beme lé pininim, beme o taatééhi ni mulihelé.

³¹Be e caa nebwén ko ne a Tan na e bo tauti ati ni apulie pwo bwohemwo ha a juuju. E bo pipwaadeniin bé wo pa apulie, na e caa nebwén ko pipégalieng ne ko a Tan naa. Ke e pamulipieng mwo mu ha amele, beme e habwii tenye ati pie, weengaa kuti, pa atautinaado na caa pipégalieng.»

E pineitéélé na a pwooti

³²Me lé téneeng wo lédwo Grek he e ko cihe ko a mulie cemwo mu ha amele, ke [lé pipiilé. Ke] lé pihoonieng wo lédwo bén, kehe lé pii ne ni bén pie: «Geme bo tabemiko mwo ko anaa ha ace céiu tan.»

³³Ke e engen kojalé wo Paulo.

³⁴Kehe icehi ana ni bén na lé âcéi Paulo, ke caa ni acéhi. Wonaa ne ko Denys, pa céiu âne a mwohuô te lédwo Atène, me ê céiu toomwo na pii kon pie Damaris, me ni bée apulie mwo.

Apostolo 18

Ne Korénit

¹E engen wo Paulo mu Atène, ke e â Korénit.

²Ke e too pa céiu *Juif nelang na pii kon pie Akilas, pa apulie mu ha a province Pont, he lu mwo ko tehenebé mu Itali me Priscile, ê mwoden. Be lé piténédehi a âpihuô te Klaude, pa daame ubwo te lépwo Roma, be e caa te pii ati te lépwo Juif pie me lé wie mu *Rome. Ke e â caniêlu wo Paulo.

³Ke e â pimu pelelu beme lé pipenem ibu. Be piwie ni penem delé, be ni apwo mwa mwaanu.

⁴Ke é he ni *tan iitihi, ke e patemehi a pwooti ne te lépwo Juif me lépwo *Grek wo Paulo ne ha a *mwotapitihi. Ke e hane me lé céihi ne ko ni pwooti na e pii.

E â céii nina time uce ni Juif

⁵Me lu tehenebé mu ha a province Macédoine wo Silas me Timoté, ke é ati he ni tan, ke e tee pipatemehi a pwooti wo Paulo. Ke e pii te lépwo Juif pie: «Wo lésu, ke te weeng kuti pa *Mesia.»

⁶Kehe icehi ana lé piâdeeng, ke lé pipiitaeng. Ke e tagiliihi taabwon ni muu pule ko ni epwénen wo Paulo, ke e pii telé pie: «Hemepie tiekewé koja a mulihe Padué, ke bo te é mu kowé, kehe time uce woéo pa watihen. É jenaa ni, ke é o â céii ni béen na time uce ni Juif.»

⁷Ke e engen kojalé, ke e â pele pa céiu na pii kon pie Titius Justus, pa apulie na e céihi ne ko a pwoitihi te lépwo Juif. A pomwa ten, ke e te ju mu mwonuhi a mwotapitihi.

⁸Ke wo Krispus, pa daame he a mwotapitihi, ke e céihi ne ko Padaame, tai woélé ati me a pomwa ten. Ke hiwon ni Korénit na lé téne Paulo, ke lé céihi, ke puulé.

⁹É ha a céiu bwén, ke e pihabwieng ha a jenen wo Padaame ne te Paulo, ke e pii ten pie: «Go nemwo pwo me mwotiko, kehe go patemehi a pwooti, ke go nemwo pwo me tice patim!»

¹⁰Be é teko mu pelem, ke o te tice pace céiu apulie celi e o imwiko, me e pwo tem celi ta, be hiwon ni apulie tong ne ha a pwomwo ubwo naa.»

¹¹Ke e mu lang wo Paulo he na céiu jo, ke 6 ni wole. Ke e pacémuni ni Korénit ko a pwooti te Padué.

Teuueng nge ânebuhe pa gupéno roma

¹²É ha a benaamwon na e gupéno ne ha a province Akaï wo Galion, ke lé tai piâde Paulo wo lépwo Juif, ke lé imwieng, ke lé pééeng nge he mwotautinaado [ânebuhe pa gupéno].

¹³Ke lé pii pie: «Wo pa apulie ce, ke e te cuwoko ni apulie beme lé pipaunu Padué, ne he ni bwopwonan na te ité koja ni patén de a pwoitihi teme.»

¹⁴Ke é he e mwo ko pwo me e cihe wo Paulo, ke e pii wo Galion te lépwo Juif pie: «Lépwoje, hemepie [e taunuhi apulie wo pajé, ai hemepie] e pwo aceli te junihe ta, ke é o te tabemikewé.

¹⁵Kehe icehi ana wogewé, ke geé picihe ko ni pwooti, me ni nii apulie me ni patén dewé. Ke anaa, ke te piwogewé. Time uce nimung me pa apitauti ne ni naado naa.»

¹⁶Ke e pamwojuílé mu he mwotautinaado.

¹⁷Ke tai woélé ati, ke lé uce imwi Sostène, pa daame he a mwotapitihi, ke lé piahieng ne he pwahamii a mwopitautinaado. Kehe icehi ana te tice aceli e alihne kon wo Galion.

A bwo mwojuia mwo nge Antioche

¹⁸Mwo te neme bwolihi a bwo mu te Paulo ne Korénit. Ke é mulang, ke e pine ni acéhi. Ke e engen kojalé ne Cenkré na e mwonu. É he e mu lang, ke e tali me tice apunin, pwohewii a patén de lépwo Juif, beme e habwii pie e caa panebwénihi a *piapwo li e pwo. Nebwén, ke lé taa pwo ong nge ha a province Siri, woélé me Priscile me Akilas.

¹⁹Ke me lé tehene nge Éféso, ke e engen kojalu wo Paulo, ke e taa ha a mwotapitihi, ke lé picihe me lépwo Juif.

²⁰Ke lé ileeng pie me e mwo neme mu pelelé.

²¹Kehe icehi ana e pii telé pie: «Hemepie mwo te nime Padué, ke é o bo mwojuia mwobé céiikewé.» Ke e engen kojalé pwo ong mu Éféso.

²²Ke me e tehene nge Césaré, ke e taa [*lérusaléma] wo Paulo, ke e pwobwocu te ni acéhi. Ke nebwen, ke e ole Antioche ha a province Siri [he li e tabuhi a bwo engen den mulang].

a bécéhé bwo engen de paulo (Pwahamii tii: 18.23—21.16)

²³Mwo te pwome bwolihi a bwo mu ten Antioche. Ke é alechen, ke e engemwo. Ke e â pitahagéi Galat me Frigi, ke e pamwoiu ni acéhi.

A penem de Apolos ne Éféso

²⁴É ha a benaamwon naa, ke e âbé ne Éféso wo pa céiu Juif na pii kon pie Apolos, pa apulie Alexandri. Wo panaa, ke pa apulie na e cihe ehi, ke e temehi ehi ni tii iitihi.

²⁵Ke caa pacémunieng ne ko *a bwo âcéi Padaame. Ke e patemehi a Pwooti Wâé te Kériso ha a ju pwonimen, kehe icehi ana e te ju temehi cehi a *pipuu apulie te loane.

²⁶Ke e te cihe ne ha a mwotapitihi, ke te tice aceli mwotieng kon. Ke me lu téneeng wo Priscile me Akilas, ke lu pééeng nge pelelu, ke lu pacémunieng ko a pwaadeni Padué.

²⁷Ke nime Apolos me e â Akaï, ke lé pamwoiueng wo lépwo acéhi, ke lé pwotii nge céii ni acéhi na élé lang, beme lé hegieng ehi. Ke me e tehene ngen, ke e caa picani ko ni huô na ubwo, me de nina lé caa céhi, mu ko a pipwoééhe te Padué.

²⁸Ke lé picihe me lépwo Juif ne he pwahamii ni apulie ati. Ke te tice aceli me lé pwo ten, be e *pajuujuhi ne telé ko ni tii iitihi pie wo lésu, ke te weeng kuti pa Mesia.

Apostolo 19

Paulo ne Éféso

¹É ha a benaamwon na e mwo tekó mu Korénit wo Apolos, ke wo Paulo, ke e pitahagéi ni piduaan ne pwo juwole, ke e â ole Éféso. Ke e too ni béé acéhi lang, ke e tahimwolé pie:

²«Kona é he li geé céhi, ke e te opé kowé a *Jenen litihi?» Ke lé hegi ne ten pie: «Time geme uce temehi pie pwo ace Jenen litihi!»

³Ke e pii telé pie: «He ace de *pipuu apulie celi puukewé kon?» Ke lé hegi ne ten pie: «Ko a pipuu apulie te loane.»

⁴Ke e pii telé wo Paulo pie: «Wo loane, ke e puu nina lé pininim, ke lé bitelé ne ko Padué. Ke e pii te lépwo *Juif pie me lé céhi ne ko pa apulie na e bo âbé céin: wo lésu.»

Lé hegi a Jenen litihi

⁵Ke me lé téne anaa ne ni acéhi, ke lé pwo me puulé ne he nii Padaame lésu.

⁶Ke me e ne lupwo in huîlé wo Paulo, ke e ole kolé a Jenen litihi, ke lé cihe he ni pwooti na te pétaa ko pi-ité, ke lé pii beetihni pwooti na e ne telé wo Padué.

⁷Piâmwonuhi a ¹² a jéhi lépwo apulie naa.

E patemehi a pwootti nelang

⁸Ke é mulang, ke e taa ha a *mwotapitihi wo Paulo he ni wole na cié. Ke time uce piwâ nang me e patemehi a pwootti nelang. Ke e patemehi, te ni béén na lé ko tabemieng, a *Mwametau te Padué, ke e hane me lé céhi ne ko nina e pii telé.

⁹Kehe icehi ana hiwon ni béén na lé pwo me mwoiu ni punilé, ke muhi telé me lé céhi. Ke lé pihoonieng ko *a bwo âcéi Padaame, ne he pwahamii ati ni apulie. Ke e engen kojalé wo Paulo, ke e pé ni acéhi, ke e pacémunilé ati he ni tan, ne ha a céiu mwotapitihi te Tiranus.

¹⁰E wonaa a bwo penem den wo Paulo he na alo ni jo. Ke ati nina lé mu ha a province Asia, ni Juif me nina time uce ni Juif, ke lé téne a pwootti te Padaame.

Lépwo naî Séva

¹¹Ke wo Padué, ke e pwo me e pipwaadeniin bé wo Paulo ni *pipwojunuun na te junihe ité kuti.

¹²Ke lé pé ni epwén me ni memwaanu na e ti kon wo Paulo, ke lé pé nge céii ni cunu, ke caa te wâé jélé kuti! Ke ni duéé na lé mu ko ni béen, ke lé wie, ke lé engen.

¹³Ke te pwo mwo a céiu duaajuf na lé te piengen he ni amu. Ke lé pihane me lé pawiehi ni duéé mu ko ni apulie, ne he nii Padaame lésu. Ke lé pii telé pie: «É ne he nii Padaame lésu na e pipatemehieng wo Paulo, ke geé wie!»

¹⁴Lépwonaa, ke lépwo 7 naî Séva, pana e te pineeng me pa céiu caa te lépwo *apwoâpwailo.

É te temehi lésu. Wogewé ke woo?

¹⁵Kehe icehi ana e hegi ne telé ali duéé pie: «É te temehi lésu, ke é te temehi mwo Paulo. Ke kona wogewé, ke woo?»

¹⁶Ke wo pa apulie na e mu kon ali duéé, ke e téele gaale, ke e imwilé, ke e te junihe ahilé kuti. Ke lé cela imi ni ahinaado kolé mu ha a pomwa ten, he caa tice naamuulé!

¹⁷Ke lé téne a jepule naa wo lépwo Éfeso: wo lépwo Juif, me ni béen na time uce ni Juif mwo. Ke te junihe abwobwo jélé, ke lé tai paciiti Padaame lésu. Ke lé pii pie: «Nihe ubwo a nii Padaame lésu!»

¹⁸Ke hiwon mu ko ni béen na lé caa céihi, na lé âbé pii beetihi ne he pwahamii ati ni apulie ni naado na lé pwo.

¹⁹Ke a hiwon ko ni apulie na lé mu pacihe ni duéé, ke lé pébé ni tii telé, ke lé cini ne he pwahamii ni apulie. Ke te junihe ubwo a cuhi ati ni tii naa: E taa pwo *50 million*.

²⁰Ke é mu ko a niihe Padaame, ke a pwooti ten, ke e piân, ke pipamwoiulé ngen.

Lé pwobwoni Paulo wo lépwo Éfeso

²¹Ke é alecehe ni naado naa, ke e niimihi wo Paulo pie me e pitahagéi ngen lupwo province Macédoine me Akaï, beme e â *lérusaléma. Ke e pii mwo pie: «Hemepie é tehene ngen, ke wâé mwo hemepie é â *Rome.»

²²Ke e ne nge Macédoine lupwo alo apulie mu ko lépwo apicani ten, wo Timoté me Éraste. Ke weeng, ke e mwo tee mu ha a province Asia.

E pigeti Paulo wo Démétrius

²³É ha a benaamwon naa, ke e penem a amu ko a bwo âcéi Padaame [na e pacémunihi wo Paulo].

²⁴Be pwo pa céiu apulie na pii kon pie Démétrius, pa apenem ko ni mwani pwojo. Ke e pwo ko mwani pwojo ni cuwo nahi *mwaiitihi te Artémis, ê céiu

duéé. É mu ko a penem naa, ke te junihe ubwo a mwani na lé hegi me lépwo béén.

²⁵Ke e taineibu ni apenem den me ni bée apulie na piwie ni penem delé, ke e pii telé pie: «Lépwoli wé, geé temehi pie, ni wâé tenye, ke e âbé mu ko a penem denye ce.

²⁶Kehe e pii wo Paulo pie, ni duéé na lé pwo ne ni apulie, ke time uce ni duéé. Ke caa hiwon ni apulie na lé mwomwohi ana e pii, éni pelenye, ke é ati ha a province Asia. Geé caa tekó téne he e ko pii, ke geé alihí ninaa.

²⁷Be koli o pwotahi ni penem denye. Ke o tieden a bwo pipaunuhi na a mwaiithi te ê duéé henye, Artémis! Ke o caa time nye uce pii pie wo Artémis, ke ê duéé henye ubwo! Kehe lé pipaunueng ati ni apulie ne éni Asia, ke é pwo a bwohemwo ati.»

E pahauli ni apulie

²⁸Ke me lé téne ni pwooti naa, ke lé te junihe okéé kuti, ke lé toii da pie: «Junihe ubwo Artémis tenye ni Éféso!»

²⁹Ke me e téne anaa na a pwomwo ubwo, ke hauli jélé. Tai ati ni apulie, ke lé piepin nge ha a mwotapitihí. Ke lé pé Gaïus me Aristarke, lupwo apulie ha a province Macédoine, lupwo bée Paulo ko pipatemehi a pwooti.

³⁰Ke nime Paulo me e â beni ni apulie, beme lé picihe, kehe icehi ana lé pacuwoeng wo lépwo acéihi.

³¹Ke te pwo lépwo bée Paulo, lépwo apulie na piubwo jélé bé mu Asia. Ke lé pahede pa apulie me e â pii ten pie: «Go nemwo pihabwiiko te ni apulie ne ha a mwotapitihí!»

³²É ne ko ni apulie Éféso, ke caa time lé uce piténelé. Be lé pii ne ni béeón pie woni, ke lé pii ne ni béeón pie wonaa. Ke mepwo a ubwo kolé, ke time lé uce temehi pie, é mu ko ade na lé ko pipitilé.

³³Ke mepwo ni bée Juif, ke lé pé pa céiu apulie na pii kon pie Alexandre, ke lé piuti ten a watihe a pitapitihí te ni apulie naa. Ke lé cineeng beme pa apicihe telé ne he pwahamii a bele. Ke e eti da a in wo Alexandre, beme e ilehi koja ni apulie pie me e cihe.

³⁴Kehe icehi ana me lé temehi pie pa Juif, ke lé toii da he na alo inetéale pie: «Junihe ubwo Artémis tenye ni Éféso!»

E pacuwolé wo pa céiu apihuô

³⁵Ke e bwo pacuwolé wo pa apwotii te a mwohuô ha a pwomwo ubwo, ke e pii telé pie: «Lépwoli mu Éféso, nye tai temehi ati pie a pwomwo ubwo ce, ke pa apiwéihi mwaiithi te Artémis, me a démen na iithi na pwo ko péi, na e tupwo opé mu he miiden!»

³⁶Te tice pace céiu celi me e piwotéeta ko anaa. Wâé heme bwala gewé, kehe geé nemwo wele hauli.

³⁷Be geé pébé éni ni apulie ce. Kehe icehi ana te tice aceli lé pwotahi ne ko a mwaiithihi, ke te tice aceli ta celi lé pii ne ko Artémis, ê duéé toomwo tenye.

³⁸«Wo Démétrius me ni apenem den, ke wieli nimelé me lé hane a ta ne ko pace céiu. Wâé, kehe icehi ana te pwo ni atautinaado, ke te pwo mwo ni tan ko pitautinaado. Geé â ânebuhe l épwo atautinaado!

³⁹Ke me mwo te pwo ce naado celi nimewé me geé tahimwohi, ke genye bo picihe ibu, ko ace bwopwonan celi wâé, ha ace tan ko mwohuô.

⁴⁰Be ni apihuô te ni Roma, ke wieli lé o tahimwokenye pie: “É ko ade na geé pitapitikewé?” Ke o tice aceli genye hegi ne telé kon.»

⁴¹Ke é alecehe a bwo cihe ten, ke e pii telé pie me lé pipiiden.

Apostolo 20

Paulo ne Macédoine ke é ne Grèce

¹Me caa nebwén nina e he pipuwohelé, ke e tapiti ni acéhi wo Paulo, ke e pamwoiulé. É alechen, ke e pinelé, ke e â ha a province Macédoine.

²Ke e pitahagéi a Macédoine, ke e te junihe pamwoiu ni acéhi na lé mu lang, ko ni pwooti na hiwon. Ke é mulang, ke e â Grèce.

³Ke e mwo mu lang he na cié wole. Ke é ha a benaamwon na me e taa pwo ong nge ha a province Siri, ke e téne pie lé pwo me lé pipwohuô ten wo l épwo *Juif. Ke e niimihi pie me e mwojuia ngemwo Macédoine.

⁴Hiwon ni apulie na lé âcéin: wo Sopater mu Béré, pa naï Pirus, ke wo Aristarke me Sekond mu Tésalonik, ke wo Gaïus mu Derbe. Ke pwo Timoté; ke wo Tichike, me Trofime, mu ha a province Asia.

⁵Ke lé piânebuhe, ke lé bwo ucéikeme ne Troas.

⁶Ke mepwo é ne kome, ke geme taa pwo ong mu Filipi, alecehe a tan ubwo te ni Juif, a *Pacika. Ke é alecehe ni tan na nim, ke geme bwo toolé ne Troas. Ke geme mwo mu lang he na céiu naadenitan.

Paulo ne Troas

⁷É he capéto ko a babwén, ke geme pimu ibu me geme pé wiinaado, ke geme ebii a pwoloa. Ke e pacihe ni acéhi wo Paulo, die ko awieme bwén, be e o caa engen ko acaama.

⁸Geme tai mu ha a nemwa ko miiden. Ke te junihe hiwon ni miû lang na pwéélang.

E pwo me e mulie wo Eutike

⁹Pwo pa ewa aiu, na pii kon pie Eutike, na e tebwo ha a pomwa-he-puwo. Ke e te pwo jame cihe wo Paulo, ke e pawie pule wo paje, ke e tupwo mu ha a béciéhe ni nemwa da ko miiden. Ke me lé pwiieng, ke he e caa mele.

¹⁰Ke e ole wo Paulo, ke e ciieng, ke e haaing, ke e pii pie: «Geé nemwo pwo me mwotikewé, be e mwo teko mulie!»

¹¹Ke me e taamwo wo Paulo, ke e ebii a pwoloa, ke lé eni. Ke e mwo te cihe die pwopwometan. Ke é alechen, ke e engen kojalé.

¹²Ke wo lèpwo acéhi, ke lé pipé ngemwo pali ewa aiu [nge pelen]. Ke te junihe wâé ne kolé.

E tabuhi mwo a bwo mwojuia

¹³Geme ânebuhe Paulo pwo ong, be weeng ke nimen me e engen pwo amu die Assos, ke geme bo pééeng mulang.

¹⁴Ke me e âbé tookeme, ke e taabé céikeme ne pwo ong, ke geme â Mitilène.

¹⁵É mulang, ke geme caa engen pwo ong, ke geme tuie nge Kio, ha acaama. É ha a tan alechen, ke geme tuie nge Samos, ke é ha a tan alechen mwo, ke é Milet.

¹⁶Be e caa te pihuôhi wo Paulo pie time e o uce cuwo Éfeso, be time uce nimen me e patieden tan ne Asia. Be e piwele, beme e tehene nge *lérusaléma, hemepie te jan, ha a tan ko Pentekote.

E pine lèpwo acéhi ne Éfeso

¹⁷Ke me geme tehene nge Milet, ke e patupwo pwootti wo Paulo nge céii ni apihuô te lèpwo acéhi ne Éfeso, beme lé âbé beniieng ne Milet.

¹⁸Ke me lé pimu ibu, ke e pii telé pie: «Geé caa te alihia mulie na é mu hen ne ha awiemewé, tabuhi ha a tan na é tuiebé pelewé ne ha a province Asia.

¹⁹Ke é penem de Padué, ke time é uce pipii dong. Ke é he ni béé tan, ke é mu é, be é te junihe picani ko ni huô na ta na lé pwo tong wo lèpwo Juif.

²⁰Geé caa temehi, be é caa te pii tewé ati nina wâé me dewé, ke te tice aceli é neduwohi kowé. Be é patemehi me pacémunikewé, ne ânebuhe ati ni apulie, ke é ne mwo he ni pomwa tewé.

²¹É pii mwoiuhi te ni Juif, me nina time uce ni Juif mwo, pie me lé pininim, me bitelé ne ko Padué, ke me lé céhi ne ko Padaame henye, Iésu Kériso.»

O time nye bo uce pialikenye mwo

²²«Ke é jenaa, ke é o mwo â lérusaléma, be e teko cuwokong a *Jenen litihia, kehe time é uce temehi aceli e o tuie ne kong.

²³Kehe icehi ana e mu te paténeéo ne he ni amu, na a Jenen litihia pie, a karépu me a picani, ke lu teko ucéiéo.

²⁴Kehe icehi ana te piticenaado ne kon, heme é mele, ai heme é mulie. Be weengi ana te junihe pwonaado ne kon: Me é panebwénihi a penem na e ne tong wo Padaame Iésu, pie me é pipatemehi a Pwootti Wâé, ko a pipwoééhe te Padué.

²⁵«É patemehi nge pelewé a *Mwametau te Padué. Ke é jenaa ni, ke é temehi pie, o caa time nye bo uce pialikenye mwo.

²⁶É mu ko anaa, na é pii mwoiuhi tewé jenaa ni pie, mepie pwo pace céiu pibéewé celi o tieeng pele Padué, ke time uce woéo pa watihen.

²⁷Be é caa patemehi tewé, ati nina nime Padué me e pwo. Ke te tice celi é neduwohi kowé.»

Pwoipihi ehi ni acéihi

²⁸«Geé pipwocilekewé, ke geé pwoipihi ehi mwo ni naî Padué, na e caa nebwén ko nelé tewé na a Jenen litihi. Ke geé wéi ni acéihi, woélé na e caa pwocuhilé wo Padué, ko a bwo mele te pa Naîn.

²⁹Be é te temehi pie, é alecehe a bwo engen dong, ke lé o tuiebé ni apulie na ni agele. Ke lé o pwohewii ni wota apiwii, ke lé o papiidenihi a pubuuwé.

³⁰Ke te é mu hadeniiwé mwo, na lé o cuwoda nina lé pacémunihi a gele, beme lé teuu ni acéihi céilé.»

Geé pipwohewiiéo

³¹«Geé te ûmiê, ke geé te niimihi pie, caa cié ni jo na é mu pelewé: Ke pwo ni béé benaamwon, na é mu â é, heme é mu pamwoiukewé, heme bwén ke pwang.

³²Ke é jenaa ni, ke é nekewé te Padué, me a pwooti he a pipwoééhe ten. Be weeng na eten a junuun me e pamwoiukewé, me ne tewé ni pippowâé na e caa nebwén ko pipwopweehi me de ni apulie ten.

³³«É he é mwo ko mu pelewé, ke time uce nimung ko ce mwani pwojo, me ce mwani megele, me ce epwéne ce béé apulie.

³⁴Be geé caa te temehi pie, te lupwo naatiing ce na é penem kon, be me deme, me ni bééng.

³⁵Ke é caa habwii tewé ati a bwo penem, me nye picani te nina cunu jélé me nina tice delé. Ke genye penem niimihi ni pwooti te Padaame lésu na e pii pie: “Te junihe ubwo a pipwodéén de pana e ne, koja pana e hegi.”»

³⁶Ke é alecehe a bwo cihe ten naa, ke e tidihi jilin wo Paulo, ke lé tai pwoitihi ibu.

³⁷Ke lé mwomwaaaueng beme lé pineeng, ke lé te ju tai é ati.

³⁸Be te junihe piwahin ni pwonimelé ko ana e pii telé pie, o caa time lé bo uce pialilé mwo. Ke é mulang, ke lé pipééeng ole die pwo ong.

Apostolo 21

E â Iérusaléma wo Paulo

¹Geme pinekeme me ni apihuô te ni acéhi ne Éféso, ke geme taa pwo ong, ke geme téte mwomwon nge Kost. Ke é ha acaama, ke geme â taa Rode, ke é mulang, ke geme â Patara.

²É nelang, ke geme tooli a ong nge Fénisi, ke geme taa pwon, ke geme engen.

³Ke geme alahi a één Chipre, ke geme neeng pwo eaamu. Ke geme â ha a province Siri, ke geme ti ha a céiu pwomwo ubwo nelang, na pii kon pie Tir, é lang he na me eaatihi nelang ni âicu.

⁴Ke me geme too ni acéhi lang, ke geme mu pelelé he na céiu naadenitan. Ke e cinelé na a *Jenen litihi, pie me lé pii te Paulo pie me e nemwo taa lérusaléma.

⁵Kehe icehi ana é alechehe a naadenitan na céiu, ke geme cuwo ha a pwobenele ko a engen deme. Ke lé pipékeme ne ni a-mu lang, woélé me ni mwodelé, me ni naîlé. Lé pipékeme die ticepwon. Ke me geme tehene ole, ke geme tidihi jilime, ke geme pwoiitihi.

⁶Nebwén, ke geme taa pwo ong, ke lé mwojuia ngemwo pelelé.

Paténe Paulo pie o imwieng

⁷Ke geme engen mu Tir, ke geme â Tolémaïs, atii ne ong. É mulang, ke geme â pwobwocu te ni acéhi, ke geme mwo te ju ne me mu pelelé he na céiu tan.

⁸Geme â Césaré ha acaama. Ke me geme tehene ngelang, ke geme pimu pele Filip, pa apipatemehi na a Pwooti Wâé, pa céiu bée ni 7 dikone li pipégalilé ne lérusaléma.

⁹Wo panaa, ke paa ni naîn toomwo na ni péroféta, na lé pébé a pwooti mu pele Padué.

¹⁰Ke caa junihe hiwon ni tan deme ha a duaan naa. Ke, é ha a benaamwon naa, ke e tuie opé mu *Judé wo pa céiu péroféta, na pii kon pie Agabus.

¹¹Ke me e tookeme, ke e pé a taihena Paulo, ke e cie lupwo an ke lupwo in kon, ke e pii pie: «Weengi ana e pii na a Jenen litihi: "Wo pa apulie na den a taihena ce, ke lé o woni ko ace bwo cieeng wo lépwo *Juif ne lérusaléma. Ke lé o bo neeng de nina time uce ni Juif."»

¹²Me geme téne anaa, wogeme me ni a-mu lang, ke geme cuwoko Paulo pie me e nemwo taa lérusaléma.

¹³Kehe icehi ana e hegi ne teme pie: «É ko ade na geé é, me pwo me piwhin a pwonimung? Hemepie cieéo me taunuéo ne ko a nii lésu ne lérusaléma, ke é caa te pipwopweeéo.»

¹⁴Ke he time uce jan me geme taatééhi a bwo niimihinaado ten, ke geme nebwén a bwo cuwokon, ke geme pii pie: «Wâé hemepie e cuwo ana nime Padaame kon.»

¹⁵É alechehe ni tan naa, ke geme pipwopweekeme, ke geme taa lérusaléma.

¹⁶Ke lé âbé céime ne ni bée acéihi mu Césaré, ke lé péékeme nge céii pa apulie na pii kon pie Mnason, beme geme pimu pelen. Wo panaa, ke pa apulie pwo a één Chipre, pana caa bwolieng ha a céihi.

Lé pitapitilé wo Paulo @ me ni apihuô ne Iérusaléma

¹⁷Ke me geme tehene nge Iérusaléma, ke lé hegikeme ha a pipwodéen ne ni acéihi.

¹⁸A tan alechen, ke e ole pele Cang wo Paulo, ke geme ole céin. Ke lé tai pitapitilé nelang wo l épwo apihuô te ni acéihi.

¹⁹Ke me e pwobwocu telé ati wo Paulo, ke e piuti telé ati ni naado na e pwo wo Padué, ne ha awieme ni béeen na time uce ni Juif, ha a benaamwon na e pipatemehi telé a pwooti.

²⁰Ke me lé téne anaa, ke lé te junihe pipaunu Padué.

L épwo Juif na lé céihi

Ke é alechen, ke lé pii te Paulo pie: «Go téne, go pa acéihi béeeme, caa te junihe hiwon ni Juif na lé caa céihi [ne ko l ésu] na lé mwo tekó ácehi ni *patén de Moosé.

²¹Ke lé téne pie wogo na go picaa te ni Juif pie, he lé pimulie ibu me ni bée apulie, ke me lé bitelé koja ni patén de Moosé. Ke lé téne mwo pie, go pii pie, me lé nemwo *pwotegoop te ni naîlé, ke me lé nemwo ácehi a bwomu te ni Juif.

²²Nye o bo pwo de? Be {lé o pitaineibulé ne ni apulie be} lé o caa temehi pie wogo éni.

²³«É mu ko anaa, ke wâé heme go pwo ana geme pii tem: Be élé éni hadeniime l épwo apulie na paa jélé na lé pwo ni *piapwo te Padué.

²⁴Wâé heme go péélé céim, beme geé pwo a pwoitihi tenye† na e pwo me wâé genye ne pele Padué. Ke go pwocuhi nina tice telé ko a penem naa, beme lé o pwo me tice iwo ni punilé. Ke lé o temehi ne ni apulie pie ana lé téne ne kom, ke a gele. Ke o te wogo mwo, ke go o habwii pie, pana go te pipwoiipiko mwo, ne ko ni patén.»

A tii nge céii nina time uce ni Juif

²⁵«Ke mepwo é ne ko nina time uce ni Juif na lé caa céihi, ke geme caa pwotii nge céilé. Ke geme pii telé a huô teme: “Geé nemwo wii ni mewota na *pwoâpwailo kon ne te ni *dème duéé. Geé nemwo wii ni mewota na mwo cewéle, me ni wota na ebunuhi, [be time e uce wie a cewéhelé]. Ke geé nemwo pibune, ke geé nemwo pipule hauli.”»

²⁶Ke [e ko a bwo niimihinaado telé, ke] é ha a tan alechen, ke e pé ni apulie na paa wo Paulo. Ke lé tabuhi me weeng a *pwoitihi ko a bwo wâé genye ne pele Padué, pwohewii a patén de ni Juif. Ke é alechen, ke e taa *huâ iitihi wo Paulo, ke e pii beetihi a tan na lé o bo muko pétaapwo pwoâpwailo hen, beme lé habwii pie lé caa panebwénihi a piapwo telé.

Imwi Paulo ne huâ iitihi

27Ke é ha a bé7 he ni tan naa, he lé o caa panebwénihi a piapwo telé, ke ni Juif mu ha a province Asia, ke me lé ali Paulo ne ha a *mwaitihi, ke lé pine ânepuni ni apulie beme lé imwieng.

28Ke lé pii pie: «Lépwo *Isaraéla, geé âbé picani teme! Weengi pa apulie na e piuti pitihî ati pie me pihoonihi a bele tenye, me ni patén de Moosé me a mwaiithi ce! Ke é jenaa, ke e caa pwo me tice junuu mwo a duaan ce iitihi, be e caa ne da lang nina time uce ni Juif!»

29Lé pii anaa be lé alilu neibu me Trofime, pa apulie mu Éfeso, ne lérusaléma, ke lé niimihi pie, e pééeng da huâ iitihi wo Paulo.

30Ke ati a pwomwo ubwo naa, ke iluuhi, ke lé téelebé ati ne ni apulie, ke lé imwi Paulo. Ke lé teuueng wie mu huâ iitihi, ke lé te pwome capuhi kuti ni pomwa.

31Ke lé caa pihane beme lé taunueng.

Lé pacuwolé wo lépwo coda roma

Kehe icehi ana e téne wo pa apihuô te ni coda roma pie, lé ko iluulé ati wo lépwo lérusaléma.

32Ke e te pwome pé kuti ni coda, me ni caa telé, ke lé téte nge céilé. Ke me lé alilé ne ni apulie, ke lé te nebwén kuti na lé ahi Paulo.

33E te ân kuti wo pali apihuô te ni coda, ke e te imwi kuti Paulo, ke e cieeng ko lupwo itihe toki. Ke e tahimwo ni apulie pie: «He woo paje? Ke ade aceli e pwo?»

34Ke lé pii ne ni béén pie woni, ke lé pii ne ni béén pie wonaa. Ke time e uce temehi wo pali pie woo celi e juuju, be lé te junihe iluulé, ke e pii pie me pé Paulo da ha a mwocoda.

35Ke me lé tuie nge ko a aca, ke lé caa te ju pitemeeng, be lé te junihe okéé ne ni apulie, ke nimelé me lé ahieng.

36Be lé tai âcéin ati, ke lé toii pie: «Neeng, beme geme taunueng!»

E pacihe ni Juif wo Paulo

37Ke é ha a benaamwon na ko ne da Paulo he mwocoda, ke e pii te pa apihuô te ni coda [he pwo *grek] pie: «He o te jan me é pii tem a céiu naado?» Ke e hegi ne ten pie: «Kona go te temehi pwo grek?

38Kona time uce wogo pa *Aigupito, pali e pwo me e penem a amu? Pana e pé nge jengedé ha a melé li 4000 pwéréca?»

39Ke e pii ten wo Paulo pie: «[Ûhu!] Woéo ke pa Juif, pana é tuie ne Tarse, a pwomwo ubwo ko a province Silisi, a pwomwo na te junihe ubwo. Ke é ilehi kojako pie, he time uce jan me é pacihe ni apulie ce?»

40Ke e pii wo paje pie: «Îgo!» Ke e cuwo pwo ali aca wo Paulo, ke e pwo inenaado te ni apulie ko a in. Ke me te ju tice pwocihe kuti, ke e pacihelé wo Paulo, ha a pati ni Juif.

Apostolo 22

1Ke e pii wo Paulo pie: «Lépwo âjiénung me lépwo caa, geé téne ana me é pii tewé ni, beme é pipwopaing.»

2Ke me lé téne he e pacihelé he pwo patilé, ke bwo te junihe tice patilé kuti.

Woéo ke pa ju Juif

Ke e pii wo Paulo pie:

3«Woéo ke pa *Juif. É pituie ne Tarse ha a province Silisi, kehe icehi ana picileéo ne éni *lérusaléma. Ke wo Gamaliel na e pacémuniéo. Ke e picaa tong ehi ni patén de ni watihenye. Pana é ûmiê me de Padué pwohewiikewé ati jenaa.

4É pwotahi, me pwo me taunu ni béen na lé âcéi Padaame lésu. Ke é pwo me imwi ni aiu me ni toomwo mwo, ke é tahilé ne he karépu.

5«Jan me lé pajuujuéo wo pa *daame he lépwo apwoâpwailo me ni *mwohuô. Be é hegi kojalé ni tii, beme é ne te ni âjiéneny, ni Juif na lé mu Damas. Ni tii naa, ke lé ne mwomwon dong, me é â lang, me é â imwi nina lé céhi ne ko lésu, ke me é péélé bé ne lérusaléma beme lé pwocuhinaado.»

E piuti a pwoto te Padaame

6«Kehe icehi ana me é ko â he pwaaden, he teko ju goahen ehi, he é ko âmwonuhi Damas, ke e te âbé kuti mu jedi he miiden a pwéélang na te junihe ubwo, ke e pwoeihiéo.

7Ke é te tupwo kuti ne pwo bwohemwo. Ke é téne a pwocihe na e pii pie: “Saulo, Saulo, é ko ade na go pwotahi ne kong?”

8«Ke é hegi ne ten pie: “Wogo, ke woo, go pa daame?” «Ke e hegi ne tong pie: “Woéo lésu mu Nazaret, pana go ko pwotahi ne kong.”

9«Lé te alihia pwéélang wo lépwona lé âcéing, kehe icehi ana time lé uce téne a pwocihe te pana e paciheéo.

10«Ke é pii pie: “Padaame, ade aceli me é pwo?” Ke e hegi ne tong wo Padaame pie: “Go cuwoda, ke go â Damas, be o bo pii tem nelang aceli me go pwo.”

11«Ke me é niê, ke caa time é alikenye. Ke lé bwo te ju pétaa ko ing ne ni bééng, ke lé péeo nge Damas.

12«Ke pwo pa céiu apulie lang, na pii kon pie Ananias. Wo panaa, ke pa apulie na e te junihe pipwoiipieng me âcehi ni *patén de Moosé. Ke lé te junihe piwâéeng ati ne ni Juif na lé mu Damas.

¹³Ke e âbé beniéo wo panaa, ke e pii tong pie: "Saulo, pa acéhi béléng, go niê mwo!" «Ke é caa te ju niê ehi mwo, ke é alieng.

¹⁴Ke e pii tong pie: "E caa pipégaliko wo Padué he ni watihenye, beme go temehi ana nimen kon, beme go ali Pana e mwomwon, wo lésu, ke me go téne a patin heme e cihe tem.

¹⁵Be go bo pa apé na a juuju ten, ne pele ni apulie ati, ko ni naado na go alahi me téne.

¹⁶Ke é jenaa, ke he ade aceli go ucéhi? Go cuwoda me puuko. Ke go pwoiitihi te Padaame, beme e pineuhi ni ta pwo tem."»

Â céii lépwona time uce lépwo Juif

¹⁷«Ke é alechen, ke é caa mwojuia mwo ne lérusaléma. Ke é ha a céiu tan, he é mwo ko pwoiitihi ne *huâ iitihi, ke e pihabwieng dong ne ha a jenung wo Padaame, ke é alieng.

¹⁸Ke e pii tong pie: "Go piepin, ke go wie epin mu lérusaléma, be o time lé uce hegi a bwo pajuujuéo tem ne ni apulie éni."

¹⁹«Ke é hegi ne ten pie: "Padaame, lé te temehi pie é â he ni *mwotapitihi, ke é pwo me imwi nina lé céhi ne kom. Ke é pwo me ahilé, ke é nelé da he karépu.

²⁰Ke é he taunu Étienne, pa eabwé tem, ke é te mu lang mwo. Be woéo pa céiu na é te picani telé ne ko a bwo niimihinaado telé, ke é wéihi mwo ni epwéne lépwona lé taunueng."

²¹«Kehe icehi ana e pii tong wo Padaame pie: "Go wie [mu lérusaléma] be é bo neko nge, he na e éité lang, pele nina time uce ni Juif."»

Pwo me lé ahieng lépwo coda

²²Lé tabemi Paulo die lang ne ni Juif, kehe icehi ana me e pii pie e â céii nina time uce ni Juif, [ke lé te okéé kuti] ke lé toii da pie: «Taunueng! Be time uce jan me e mulie!»

²³Ke lé te wiikau kuti, ke lé céi taabwon ni epwénélé, ke lé pwo muu pule.

²⁴Wo pa apihuô te ni coda roma, ke e pwo me lé pé da Paulo he mwocoda, beme tatieng ko bwaliwota, beme e pii telé ace watihen me lé uu [ke me lé okéé ne kon] ne ni Juif.

Woéo pa Roma

²⁵Kehe icehi ana me lé cieeng beme lé tatieng, ke e pii wo Paulo te pa céiu caa te coda na e mu lang pie: «Kona te pwo mwomwon dewé me geé tati pana e mu ha a tii tewé, ni Roma, na mwo time uce tatieng?»

²⁶Ke [e téetihî] wo pali caa te coda he e téne anaa, ke e â paténe pa apihuô telé, pie: «Go pipwocile aceli me go pwo te pa apulie ce, be pa Roma!»

²⁷Ke e âbé too Paulo wo pali apihuô, ke e tahimwoeng pie: «Go paje, te wogo kuti ha a tii tenye ni Roma?» «Éa.»

²⁸Ke e pii wo pali apihuô te ni coda pie: «Te junihe hiwon ni mwani na é ne beme é Roma!» Ke e pii wo Paulo pie: «Woéo ke é he é pituie, ke é caa te Roma.»

²⁹Ke me e téne anaa, ke te junihe mwotieng kuti. [Be iitihi] me lé cie pana e ha a tii telé. Ke lé te neeng kuti ne ni coda na lé pwo me lé tatieng, ke lé engen.

Paulo ne ânebuhe a mwohuô

³⁰Nime pa apihuô te ni coda me e temehi ace watihen me lé tééti Paulo ne ni Juif. Ke é ha acaama, ke e piuhôhi ne te ni *apwoâpwailo, me ati a mwohuô te ni Juif, pie me lé pipitilé. Ke me lé pipitilé, ke e te pwo me tuwo ni itihe toki ko Paulo, ke lé pééeng bé, ke lé neeng ha awiemelé.

Apostolo 23

¹Ke e te ju ome ni *mwohuô wo Paulo, ke e pii telé pie: «Lépwo âjiénung, time uce pipenem a pwonimung ne he pwahamii Padué, ko a mulihung dieli jenaa.»

²Ke me e téne anaa wo Ananias, pa *daame he lépwo apwoâpwailo, ke [e okéé. Ke] e pahede nina lé mu mwonu Paulo pie me lé ahi a pwon.

³Ke e pii ten wo Paulo pie: «E bo pwocuhin ne tem wo Padué! Be nimem me go tautiéo ko ni patén, kehe icehi ana go piâ ité koja ni patén, be go pwo me lé ahiéo! Wogo, ke te ju wâé a pwom, kehe icehi ana a pwonimem, ke te junihe melepiing hen!»

⁴Ke ni béén na lé mu cebwo Paulo, ke lé pii ten pie: «Éé! Go ko pii me ta pa daame he lépwo apwoâpwailo te Padué!»

⁵Ke e hegi ne telé wo Paulo pie: «[Pineuéo] wogewé lépwo bééng, be time é uce temehi pie, weeng pa daame he lépwo apwoâpwailo! A juuju pie caa te tii ne he ni tii iitihi pie: *Go nemwo cihe me ta ne ko pa apihuô te a bele tem.*» Exode 22.27

Lé pipiiden wo lépwo apihuô

⁶E te temehi wo Paulo pie, nina lé mu ha a mwohuô, ke pwo ni *Farasaio, me ni *Saducéen. Ke e pii telé pie: «Lépwo âjiénung! Woéo ke pa Farasaio, ke wo caa tong ke pa Farasaio, ke é céihi ne ko a bwo mulie cemwo te ni amele. Ke é ko anaa na lé tautiéo.»

⁷Ke me e pii anaa, ke ni Farasaio me ni Saducéen, [ke lé te piokéé kuti] ke lé pipiiden.

⁸Be lé pii ne ni Saducéen pie, te tice mulie cemwo te ni amele, te tice *âcélo, ke te tice duéé. Ke mepwo é ne ko ni Farasaio, ke lé céihi ne ko ati ninaa.

⁹Ke me lé caa ko junihe picihe da, ke lé te cuwoda kuti ni bée *dotéén ko patén mu ha awieme ni Farasaio. Ke lé pii pie: «Te tice aceli geme alihî celi ta, celi e pwo wo pa apulie ce. Wieli e cihe ne kon na ace âcélo?»

¹⁰Ke me caa â piubwo da ali bwo piokéé telé, ke e niimihi wo pa apihuô te ni coda pie, lé o pitahai Paulo, ke e pii te ni coda ten pie me lé ole pééeng daamwo he mwocoda.

¹¹É he bwén, ke e piâbeeti Paulo wo Padaame, ke e pii ten pie: «Go mwoiu! Be go caa pajuujuéo ne *lérusaléma, ke wâé mwo heme go pajuujuéo ne *Rome.»

Lé pipwohuô beme lé taunueng

¹²É ha acaama hen, ke lé pine huô ne ni bée *Juif, ke lé *piapwo pie, o time lé uce wiinaado me ûdu ânebuhe ace bwo taunu Paulo.

¹³Ni apulie naa, ke eda koja a 40 jélé.

¹⁴Ke lé â too ni caa te ni apwoâpwailo me ni apihuô, ke lé pii telé pie: «Geme caa piapwo pie, time geme o uce wiinaado, dieli heme geme bo taunu Paulo.

¹⁵Ke anaa, wâé heme geé neme ilehi koja pa apihuô te ni coda pie, me e pébé céïkewé Paulo, wogewé me ati ni mwohuô. Ke geé pii ten pie, nimewé me geé temehi ehi aceli e pwo. Ke wogeme, ke geme pipwopweekeme, beme geme taunueng ânebuhe ace bwo tuiebé ten ne éni.»

E paténe Paulo wo pa acim kon

¹⁶Kehe icehi ana wo pa acim ko Paulo, ke e téne pie lé pwo me lé pipwohuô te Paulo. Ke e taa paténeeng ne he mwocoda.

¹⁷Ke me e téne a pwooti naa wo Paulo, ke e tote pa céiu caa te coda, ke e pii ten pie: «Go pé ngen pa ewa aiu ce pele pa apihuô tewé, be pwo a céiu naado na nimen me e pii ten.»

¹⁸Ke e pé paje, ke e pééeng nge céii pa apihuô ten, ke e pii ten pie: «E toteéo wo Paulo, pa apwokarépu, ke e pahedeéo me é pébé céïiko pa ewa aiu ce, be pwo ace naado celi nimen me e pii tem.»

¹⁹Ke e pétaa ko i pali nahi aiu wo pali apihuô, ke lu tabuhi gaaté cuwo, ke e tahimwoeng pie: «Ade aceli nimem me go pii tong?»

²⁰Ke e hegi ne ten pie: «Lé mi piténédelé wo lèpwo Juif beme lé ilehi kojako pie, me go bo pwo me e âbé meé wo Paulo ne ânebuhe a mwohuô telé. Be wieli lé o pii tem pie, nimelé me lé temehi ehi aceli e pwo.

²¹Kehe icehi ana go nemwo piténédelé! Be lé o pipwohuô ten. Be piwoélé da koja 40 lèpwona lé caa piapwo pie, o time lé o uce wiinaado ke ûdu, die ko ace bwo taunueng. Ke é ha a benaamwon ce, ke lé caa nebwén ko pipwopweelé, ke lé ju ucéihi aceli me go pii.»

²²Ke e hegi ne ten wo pa apihuô pie: «Go nemwo uti a bwo picihe tenyu!» Ke e neeng me e engen.

Lé pé Paulo nge céii gupéno

²³E tode lupwo caa te coda ten wo pa apihuô, ke e pii telu pie: «Geu pipwopweehi celi 200 coda celi lé pé teua, ke 70 coda celi lé tebwo pwo haricaan, ke 200 coda celi lé nuô da, beme lé â Césaré heme 9 inetéale ko a babwén.

²⁴Geé pwopweehi mwo ce haricaan, beme lé pé Paulo nge pele pa gupéno Félix. Ke geé wéieng ehi, beme time uce tuie ne kon celi ta.»

²⁵Ke nebwén, ke e tii a tii ce:

²⁶Klaude Lisias ne te gupéno Félix, bwocu!

²⁷Pa apulie ce, na lé imwieng wo lépwo Juif beme lé o bo taunueng. Ke é âbé me ni coda, beme é pééeng kojalé, be é temehi pie pa Roma.

²⁸Nimung me é temehi ace watihen celi lé imwieng kon, ke é pwo me e tautieng a mwohuô telé.

²⁹Ke é alihí pie heme lé pipé ne kon, ke te é mu ko ni patén delé, kehe te tice aceli me pipé ne kon kon, celi jan me taunueng kon, ai me e pwokarépu kon.

³⁰É he patemehi tong ana me lé pwo ne ko pa apulie ce, ke é te pwome neeng lé céiiko, me lépwona lé pipé ne kon. Ke é pwo ko pii telé pie, me lé patemehi tem celi lé pipé ne kon kon.

³¹É he bwén, ke wo lépwo coda, ke lé pwo ana e pii telé wo pa apihuô telé, ke lé pé Paulo nge ha a pwomwo ubwo Antipatris.

³²É ha acaama, ke lé mwojuia mwobé ne he mwocoda wo lépwo bée coda, ke lé te ne lépwo atebwo pwo haricaan me lé ân me weeng.

³³É he lé tehene nge Césaré, ke lé ne te gupéno ali tii, ke lé ne Paulo ten.

³⁴E pine a tii wo pali gupéno, ke e tahimwo Paulo pie: «He go âbé mu ha ace duaan celi woté?» Ke e hegi ne ten wo Paulo pie: «É âbé mu Silisi.»

³⁵Ke e pii pie: «É bo tautiko hemepie lé bo âbé pipatemehilé wo lépwona lé pipé ne kom.» Ke e huôhi pie me lé ne Paulo ha a karépu ne ha a mwodaame na e pwo wo *Érode pa Bécéiuhen.

Apostolo 24

Paulo ne he pwahamii gupéno Félix

¹Ke nim ni tan alechen, ke lé tuie ole Césaré wo Ananias, pa *daame he lépwo apwoâpwailo, me ni bée ukéiu te ni *Juif, me pa avoka na pii kon pie Tertule. Ke lé too gupéno Félix, ke lé pitéteiminaado ten ne ko Paulo.

²Ke e todebé Paulo wo pali gupéno [beme e cuwo ânebuhen].

E pipé ne ko Paulo wo Tertule

Ke e pipé ne ko Paulo wo Tertule [ne he pwahamii pali gupéno] ke e pii pie: «Gupéno Félix, é hemepie geme mulie ha a péém, ke wonaa mu kom, ke é mu ko ni bwo huô tem, me a bwo pé ehi nen dem a amu teme.

³Geme pwo-olé tem, he ni ju pwonimeme, ko ni naado naa.

⁴Time uce nimung me é pé kojako ce benaamwon celi bwali, é mu ko anaa, na é ileko pie go te ju picani, beme go tabemi ehi celi é o pii tem.

⁵«Geme alihí pie wo pa apulie ce, ke te junihe pa apulie ta kuti, be e hane pwo-okéé ko lépwo Juif ati pwo a bwohemwo, be pa caa te a céiu pubu apulie Nazaréen.

⁶Weeng mwo, ke e te hane me e pwo ni naado beme e habwii pie time e uce pipaunuhi a *mwaiitihi. Ke é mu ko anaa, na geme imwieng {be nimeme me geme tautieng âcehi ni patén deme.

⁷«Kehe icehi ana wo pa apihuô te ni coda, Lisias, ke e âbé, ke e te pwome pééeng kojakeme.

⁸Ke e pii te lépwona lé tauti Paulo pie me lé âbé céïiko, beme lé pii tem ni naado na ni watihe a bwo tautieng.} Tahimwo pa apulie ce, be go bo alihí pie ati nina geme pipé ne kon, ke te ni juuju.»

⁹Lé piténelé wo lépwo Juif, ke lé pii pie ana e pii wo avoka Tertule, ke te a juuju.

E pipwopain wo Paulo

¹⁰Wo gupéno, ke e pwo inenaado te Paulo pie me e cihe. Ke e pii wo Paulo pie: «É te temehi pie, wogo pa apihuô, ke go tauti a amu teme lépwo Juif, he ni jo na hiwon. Ke time uce pinekepé ne tong me é pipwopaing ne he pwahamii.

¹¹«Go tahimwohi lé, be time uce téele wédenihi celi ¹² ni tan na é tuiebé ne *lérusaléma, me é pipaunu Padué.

¹²Ke time é uce pine puni ke cine ni apulie ne *huâ iitihi, ke é ne he ni *mwotapitihi, ke é ne ha a pwomwo ubwo lérusaléma. Ke te tice apulie celi lé pii pie lé aliéo, he celi é ko pwo ninaa.

¹³Ke é jenaa, ke ni apulie ce, ke time uce jan me lé *pajuujuhi ne tem, nina lé tautiéo kon.

¹⁴«A juuju pie pana é âcéi Padaame nge ha a pwaaden [na mwo coho] he é pipwoeabwé te Padué he ni watihenye. Kehe é ne telé, ke a pwaaden naa, ke a gele. Kehe icehi ana woéo, ke é céihi ne ko ati ni *patén de Moosé, me ati ni tii te lépwo péroféta.

¹⁵Be geme céihi, woéo me ni apulie ce, pie lé o bo mulie mwo na ati nina lé mele ne ha a wâé me a ta.

¹⁶Ke é mulang na é te pihane me te tice celi me e pipé ne kong a pwonimung, ne he pwahamii Padué me ni apulie.»

Te tice ta celi é pwo!

17 «É ne alecehe ni jo na hiwon na tieéo mu lérusaléma, ke é mwojuia mwobé, beme é pébé ni mwani bépican te a bele tong, ke me é pwoâpwailo te Padué.

18 Anaa kuti ana é mu ne kon, ne huâ iitihi, ke lé tooéo he é ko panebwénihi a *pwoiitihi ko a bwo wâé genye ne pele Padué. Te tice apulie bééng, ke time é uce cine ni apulie me lé pipwohauli.

19 «Kehe icehi ana lé mu lang ne ni béé Juif mu ha a province Asia. Ke hemepie é pwo aceli ta ha a tan naa, ke é mu ko ade na time lé uce mu éni jenaa, beme lé pipé ne kong?

20 Mwo te wo lépwo apulie ce mwo, na lé pééo nge ânebuhe a *mwohuô, he ade aceli ta celi lé te alihé ne kong?

21 Ai he nimelé me lé tautiéo, ko ali pwooti li é pii ne ha awiemelé, pie: “É céihi pie, lé o mulie mwo ne ni amele”? Ke é mu ko anaa, na é ko mu éni jenaa ne ânebuhewé.»

Pine ngemwo a bwo tauti Paulo

22 Ke mepwo é ne ko gupéno Félix, ke e te junihe téne ni pwooti ko *a bwo âcéi Padaame. Ke e picéi ngemwo a bwo tauti Paulo. Ke e pii te lépwo Juif pie: «O bo tauti cawi Paulo, hemepie e tuiebé wo Lisiás, pa apihuô te ni coda.»

23 Ke e pii te pa céiu caa te coda pie me e wéi Paulo ne he karépu, ke me time e uce cieeng me pwohauli ten, ke me e te patupwo ne te ni béén me lé âbé caniéeng. [Ke e engen wo Félix.]

24 Pwo ni tan he pwocehin, ke lu tuiebé wo Félix me Drusile, ê mwoden, ê toomwo Juif. Ke lu pwo me e âbé wo Paulo, ke lu tabemieng he e cihe ko a céihi ne ko lésu Kériso.

25 Kehe icehi ana me e cihe ko a mulie ha a *mwomwon ne he pwahamii Padaame, me a bwo pipwoipikenye, me a tautinaado te Padué na e bo âbé, ke mwoti Félix, ke e pii te Paulo pie: «É jenaa ni, ke genye o mwo pacuwohi ali pitihé tenye. Ke wâé heme go mwo engen kojaéo, ke hemepie pwo ace benaamwon dong, ke é bo todeko mwo.»

26 Be e te niimihi wo gupéno Félix pie, me e bo ne ten ce mwani wo Paulo. É mu ko anaa, na e pwo me lé te cuwo ko pébé céieng Paulo, beme lu picihe.

Paulo ne ânebuhe gupéno Festus

27 Caa âdé na alo jo, ke e taatéé gupéno Félix wo Porcius Festus. Kehe icehi ana wo Félix, ke e te pwo me e te mu he karépu wo Paulo, beme lé te piwâéeng wo lépwo Juif.

Apostolo 25

1 E tuie ne ha a province *Judé wo gupéno Festus, ke cié ni tan alechen, ke e taa mu Césaré ne *lérusaléma.

Lé pipé mwo ne ko Paulo

²Ke lé pitéteiminaado ten ne ko Paulo wo lèpwo caa te lèpwo *apwoâpwailo, me ni apulie na piubwo jélè mu pele lèpwo *Juif.

³Lé cuwokon me ileeng pie me e pwo me e âbé ne lérusaléma wo Paulo. Be wo lèpwoje, ke lé te pwo a céiu huô, beme lé bo taunueng ne pwo pwaaden.

⁴Ke e hegi ne telé wo Festus pie: «Ûhu, be lé wéieng ne Césaré, ke woéo, [ke time uce bwoliéo lérusaléma] ke é o caa te engemwo.

⁵Ke wâé heme lé opé céing ne Césaré wo lèpwo apihuô tewé. Ke mepie pwo ace naado celi ta celi e pwo wo pa apulie naa, ke lé bo pii nelang.»

Paulo ne he mwopitautinaado

⁶E te ju mu pelelé he na 8 ai 10 ni tan wo Festus, ke e homwo Césaré. Ke é ha acaama hen, ke e taa he mwopitautinaado, ke e pihuôhi ne telé pie me lé pébé Paulo.

⁷Ke me e tehenebé wo Paulo, ke lé aujenieng wo lèpwo Juif na lé opé mu lérusaléma. Ke hiwon ni naado na lé pipé ne kon kon na te nihe ta. Kehe icehi ana time uce jan me lé *pajuujuhi.

⁸Ke e hegi wo Paulo me pipwopain, ke e pii pie: «Te tice aceli é pwotahi ne ko ni patén de lèpwo Juif, ke é ne ko a *mwaiitihi, die ko pa daame ubwo César.»

⁹Nime Festus me lé piwâéeng wo lèpwo Juif, ke e hegi ne te Paulo pie: «Nimem me go taa lérusaléma, beme é bo tautiko nelang?»

Nime Paulo me e tautieng wo César!

¹⁰Ke e pii ten wo Paulo pie: «É cuwo ânebuhe a mwotautinaado te César, ke o bo te tautiéo nelang. Be go caa te temehi ehi pie, te tice aceli é pwo celi ta ne ko lèpwo Juif.

¹¹Ke mepie é pwo aceli time uce mwomwon, celi jan me taunuéo kon, ke time uce piwâ jo hemepie taunuéo. Ke mepie nina lé pii ne kong, ke me ni gele, ke te tice pace apulie celi pwo mwomwon den me e péeo nge céilé. Ûhu! Nimung me e tautiéo wo César!»

¹²Ke é ne alecehe a bwo picihe te Festus me lèpwo apwopitihi, ke e pii te Paulo pie: «Mepie te nimem me e tautiko wo César, ke go bwo te ân!»

Piuti jepule ko Paulo te Agripa II

¹³É he ni tan alechen, ke lu tuie ne Césaré wo pa daame *Agripa me Bérénice, ê toomwo pwaadeniin, me lu â pwobwocu te Festus.

¹⁴Mwo te hiwon ni tan na lé mwo te mu hen, ke e piuti te pa daame wo Festus nina lé pwo te Paulo, ke e pii ten pie: «Pwo pa apulie na e neeng he karépu wo Félix.

¹⁵É he é mu lérusaléma, ke lé pitéteiminaado wo lépwo caa te lépwo apwoâpwailo, me lépwo apihuô te lépwo Juif, me ilehi pie me e pwocuhinaado.

¹⁶«Ke é hegi ne telé pie: "Wogeme lépwo Roma, ke time mu uce wonaa ni huô teme. Be time geme mu uce pwocuhinaado te pa apulie, ânebuhe a bwo tautieng. Be wâé heme e mwo te picihe me lépwona lé pipé ne kon, beme e te pii ce pwooti bépipwopain."

¹⁷Ke é mulang na lé tai tuiebé pelong. Time é mwo uce ucéihi, ke é ha acaama, ke é mu he mwotautinaado, ke é ilehi pie me pébé pa apulie naa.»

Pipééle ko a pwoitihi telé

¹⁸«Lé tehenebé wo lépwo apipé ne kon. É ko niimihi pie, junihe ubwo a ta na e pwo. Kehe icehi ana lé pipé ne kon, ke te piticenaado ne kon.

¹⁹Be lé te pipééle ko nina te é ha a pwoitihi telé, ne ko pace lésu celi e mele, pana e pii wo Paulo pie e mulie cemwo.

²⁰«Ke time é uce temehi aceli me é pwo, ne ha a bwo picihe telé. Ke é tahimwo Paulo pie, nimen me e â lérusaléma, me bo tautieng nelang ko ni naado naa.

²¹Kehe icehi ana e ilehi me e tautieng wo César. Ke é ne a mwomwon pie me wéieng dieli ha ace bwo pawieeng dong, nge céii César.»

²²Ke e pii wo *Agripa te Festus pie: «Woéo mwo, ke nimung me é téne pa apulie naa.» Ke hegi ne ten wo Festus pie: «Wâé, be é meé, ke go bo te téneeng.»

Lé taa he mwopitautinaado

²³É ha acaama hen, ke lu tuie nge he mwopitautinaado wo Agripa me Bérénice, woélé me ni apihuô te ni coda me ni apulie na piubwo jélé ne ha a pwomwo ubwo. [Ke lé te junihe pipaunulu ne ni apulie, pwohewii a bwopwonen delé.] Ke e ne a mwomwon wo Festus pie me lé pébé Paulo.

²⁴Ke e pii wo Festus pie: «Padaame Agripa me tai wogewé ati na wogewé éni peleme, geé ali pa apulie ce. Be pa watihe picihe te ati ni Juif, ne lérusaléma, ke éni, ke lé caa âbé tooéo ne kon. Ke lé tai pii tong ati pie, wâé heme taunueng.

²⁵«Ke hemepwo é ne kong, ke é tooli pie te tice aceli e pwo celi ta celi me jan me taunueng kon, kehe icehi ana te weeng mwo na e ilehi pie me e â too pa daame César. Ke é niimihi pie me é te patupwoeng ngen.

²⁶«Kehe icehi ana time é uce temehi aceli me é tii nge céii pa daame César ne kon, ke anaa a watihen me é pwo me e cuwo ânebuhewé ati. Te wogo cehi, go pa daame Agripa, na é pine ne kom. Be mepie geé tahimwoeng ati, ke o bo jan me geé pii tong, aceli me é tii nge céii pa daame César.

²⁷Be time uce mwomwon ne kong me é pawie nge céiieng pace apwocuhinaado, heme time uce ju pwéélang ehi ace watihen.»

Apostolo 26

E pipwopain wo Paulo ne he pwahamii Agripa

¹Ke e pii wo *Agripa te Paulo pie: «É pawie ne tem me go cihe, me go pipwopaim.» Ke e eti da a in wo Paulo, ke e pii pie:

²«É te junihe pipwodéén, go pa daame Agripa, me é cihe ânebuhem jenaa, me é piwotétaa ko nina lé tautiéo kon wo lépwo *Juif.

³Be go te ju temehi ehi a bwomu tenye ni Juif, me ni naado na nye mu picihe kon, ke é ileko pie go te ju picani, ke go tabemiéo.»

Lé tai temehi a mulihung

⁴«Ati ni Juif, ke lé te tai temehi a mulihung, ha atabuhi kon, he é mwo ewa aiu, ne ha awieme a bele tong [ne ha a province Silisi] die *lérusaléma.

⁵Caa bwolihi a bwo temehi nen delé pie, pana é mulie ne pele lépwo *Farasaio, a céiu duaa pwoitihi na te junihe binyi, na geme mu hen. O te jan me lé *pajuujuhi, hemepie nimelé.

⁶«Ke é jenaa ni, ke caa tautiéo, be é céihi pie, o cuwo a bwopiinen ânebun de Padué te ni caa teme.

⁷Ke lé te céihi ne mwo ko a bwopiinen naa ne ni ¹² pwomwoiu *Isaraéla, he lé penem de Padué, ne he ni ju pwonimelé, heme bwén ke pwang. «Ke é mu ko anaa, na lé tautiéo, go pa daame Agripa, wo lépwo Juif naa.

⁸Ke wogewé ni Juif jenaa ni, ke he time geé uce mwomwohi pie wo Padué, ke e pwo me lé mulie cemwo ne ni amele?»

Ânebun ke é pipwobwoni Iésu

⁹«Ânebun, ke é niimihi pie a penem dong, ke me é pwopa me ubwo ne ko a nii lésu mu Nazaret.

¹⁰Ke é hegi mu ko ni caa te lépwo *apwoâpwailo a mwomwon, beme é ne he karépu lépwo apulie ten. Ke te nihe hiwon lépwo béen na é pwo me nelé he karépu ne lérusaléma. Ke woéo pa céiu mwo, na wâé ne kong a bwo taunuhi apulie.

¹¹É te cuwo ko ahilé ne he ni *mwotapitihi, me cuwokolé me lé pii me ta a nii lésu. Be te nihe pa a-okéé, ke é pwotahi ne kolé, die he ni pwomwo ubwo na e ité.»

E piuti mwo a bwo toteeng de Padaame

¹²«Ke weengaa kuti a watihen me é â Damas, imi a mwomwon na lé ne tong wo lépwo caa te ni apwoâpwailo.

¹³É he geme mwo ko â he pwaaden, go pa daame Agripa, he te ju goahen ehi, ke é alihia pwéélang na e âbé mu he miiden ne kong me ni bééng, ne ha a pwaaden na geme uti. Ke te junihe pwéélang koja a téale.

¹⁴Geme te ju tai tupwo ati ne pwo bwohemwo, ke é téne a pwocihe na e pii tong he pwo *ébérū pie: “Saulo, Saulo, é ko ade na go pwotahi ne kong? O te junihe binyi ne kom me go cuwode Padué.”

¹⁵«Ke é tahimwohi pie: “Wogo ke woo, go pa daame?” «Ke e hegi ne tong pie: “Woéo lésu, pana go ko pwotahinaado ne kong.

¹⁶Go cuwoda, be é pihabwiiéo tem, ke é pipégaliko beme go pa bépenem dong. Ke bo wogo pa apajuujuéo, ke go bo piuti ana go alihī jenaa, ke go bo piuti mwo nina é bo habwii tem.

¹⁷É bo te wéiko mu ha awieme a bele tem, lépwo Juif, me ni bée bele mwo. Ke é neko nge céiilé.

¹⁸É pahedeko, beme go tehi ni naamiilé, beme lé o wie mu ha a melepiing, me lé â ha a pwélang: mu ha a pihuô te *Caatana, nge pele Padué. Be mepie lé céihi ne kong, ke é o pineulé, ke lé o pimu ibu me nina lé céihi ne ko Padué.”

E pii pwaati lésu pitahi

¹⁹[E pii mwo wo Paulo pie]: «Wonaa go pa daame Agripa, te junihe pwocoon ne kong me time é ténedehi nina é alihī: ni naado na e âbé mu pele Padué.

²⁰Ke é tabuhi pipatemehi a pwooti mu Damas, ke é lérusaléma, me ati he ni amu te lépwo Juif, ke é ne mwo pele nina time uce ni Juif. Ke é pii telé ati pie: “Geé pininim, ke geé bitekewé ne ko Padué. Ke geé habwii ne he ni bwomu tewé pie, geé caa pininim.”

²¹«Weengaa kuti a watihen me lé imwiéo ne *huâ iitihi wo lépwo Juif, ke lé pwo me lé taunuéo.

²²Kehe icehi ana e te wéiéo dieli ni wo Padué. Ke é ko anaa na é teko pajuujuhi ne he pwahamii ni apulie na wahin ke ubwo jélē. «Ke mepwo nina é pii, ke time uce pi-ité koja nina lé pii wo lépwo péroféta me *Moosé he ni bwopiinen delé ânebun pie:

²³Wâé heme e picani wo pa *Mesia, ke me e mele, ke me pa bécéiuhen na e mulie cemwo mu ha awieme ni amele, beme e o patemehi a pwélang te a bele juif me ni bée bele.»

Wâé heme go céihi, go pa daame!

²⁴Me e wonaa a bwo pipwopain wo Paulo, ke e toii da wo Festus pie: «Pipenem a punim, go paje! Go te junihe cémun, ke go caa piolo ko a pitemang dem!»

²⁵Ke e hegi ne ten wo Paulo, ke e pii ten pie: «Ûhu! Time uce pipenem a puning, go gupéno, be te anaa a pwooti na a juuju ke pitemang na é pii.

²⁶E caa te temehi ni naado naa wo pa daame Agripa, be time uce ce naado celi pineduwohi, ke time uce piwâ jo me é pii ten.»

²⁷[Ke e biteeng wo Paulo ne ko pa daame Agripa, ke e tahimwoeng pie]: «Ko go pa daame, go te céhi ne ko lèpwo péroféta? É te temehi pie go te céhi ne kolé...»

²⁸Ke e pii ten wo Agripa pie: «Go te niimihi kuti pie me é te pwome céhi ne ko lésu ni?!»

²⁹Ke e hegi ne ten wo Paulo pie: «Hemepie éni ai bo é, ke bo te wonaa, pwohewii ana nime Padué kon! Be nimung me geé pwohewiiéo, go pa daame Agripa, me wogewé ati na geé ko tabemiéo jenaa. Kehe icehi ana me time uce ciekewé ko itihe toki pwohewiiéo!»

Tice aceli e pwo celi ta wo Paulo

³⁰Nebwén, ke lé tai cuwoda ati wo pa daame, ke wo gupéno, ke wo Bérénice me ati ni béén na lé mu lang.

³¹Ke lé wie, ke lé pipii telé pie: «Wo pa apulie ce, ke te tice aceli e pwo celi ta, celi o jan me e pwokarépu kon, ke me taunueng.»

³²Ke e pii wo Agripa te Festus pie: «Éa kuti. Ke hemepie time e uce ilehi me tautieng ne pele pa daame ubwo, ke me o te jan me patupwoeng mwo.»

Apostolo 27

Ne Paulo nge Rome

¹É he caa pii pie, me geme â pwo ong nge Itali, ke lé ne Paulo me lèpwo bée apwocuhinaado ne te pa caa te coda na pii kon pie Julius, pa bée ni coda na lé wéa ko pa daame ubwo telé.

²Geme taa pwo ong mu Adramite na me e â he ni atii ne ong ne ha a province Asia. Geme tai engen me Aristarke, pa apulie Macédoine mu ha a pwomwo ubwo Tésalonik.

³É ha a tan alechen, ke geme tehene nge Sidon. Ke e pwopweehi ne ko Paulo wo Julius, ke e neeng me e â céii lèpwo bée, ke me e hegi mu kolé a wâé.

⁴Geme engen mulang, ke geme âmwonuhi a één Chipre, beme geme taduwo, be udan ne kome.

⁵Alechehe a bwo hagéi na a jié Silisi me Pamfili, ke geme tehene nge Mira ha a province Lisi.

⁶Ke é lang, ke wo pa caa te coda, ke e tooli a ong mu Alexandri, na e â Itali, ke e pwo me geme taa pwon.

⁷É he na hiwon ni tan, ke geme te ju piân âmimihi, be te nihe binyi. Ke geme tehene nge mwonuhi a pwomwo ubwo Cnide, ke pwocoon me geme teda lang, be ubwo a dan. Ke geme â he déme a één Krète, he bebenihe a miin Salmoné.

⁸Ke te nihe binyi me geme wédenihi, ke geme tehene nge ha a duaan na pii kon pie *Bons Ports*, mwonuhi a pwomwo ubwo Lasé.

Caa a benaamwon ko ta-amu

⁹Geme te nihe patieden ni benaamwon na hiwon, ke caa abwobwo me geme tee ân, be caa a benaamwon ko udan. Be e caa âdé a tan ko pipwodéén ko a *pipaciile. É mu ko anaa, ke e pii te lépwo béén wo Paulo pie:

¹⁰«É alihie pie a bwo engen denye, ke abwobwo. A ong ke ni ânen, ke o tanahi, ke wogenye, ke wieli genye o patieden ni mulihenye.»

¹¹Kehe icehi ana wo pa caa te coda, ke e ténedehi ana lu pii ten wo pa apihuô pwo ong, me pa eapwihi ong koja nina e pii ten wo Paulo.

¹²A atii ne ong, ke time uce wâé ne ko ni ta-amu. Ke hiwon lépwona lé mu pwo ong, na nimelé me lé engen mulang, beme lé hane me lé teda Fénix, atii ne ong ne Krète, he na picidin lang, beme lé mu lang ha a benaamwon ko ta-amu.

¹³Pwo a dan na e picuu âmimihi bé mu he *sud*, ke ni apulie ha ali ong, ke lé niimihi pie o caa wâé ne kolé. Lé céi a pehinyu, ke lé engen uti a één Krète.

A udan

¹⁴Te ju é alechen, ke e wiebé a dan mu pwo ali één, na te junihe pwo niihen.

¹⁵Ke e cuutééhi ali ong, ke pwocoon me pwo ace bwopwon, be te nihe ubwo a dan. Ke geme necu me cuutéékeme.

¹⁶Geme â he déme a cuwo nahi één na pii kon pie Kauda. Ke binyi me geme ne da a nahi ong na geme teuu.

¹⁷Alechehe a bwo céida pwo ong, ke lé cie ni piduaan ko ni tai wo lépwo apenem ne ko a pilehe ong, be abwobwo pie geme o teda pwo a bwowon Sirte [cebwo Libi]. Lé pawie a nyu me e pulaa nge he tabe, ke lé ne a dan me cuutéékeme.

¹⁸É ha acaama, ke caa junihe pwo niihe a udan, ke lé tahi ne pwo tabe ni âicu na mu ha ali ong wo lépwo apenem.

¹⁹É ha acaama, ha a béciehe ni tan, ke lé tahi ne pwo tabe a éeniê me ni niê pwo ong.

²⁰É he na hiwon ni tan, ke pwocoon me geme alihie a téale ai ni ceni. Ke mwo te nihe pwo niihe a udan, ke caa time geme mwomwohi pie geme o mulie.

²¹Caa bwolihi na time geme uce wiinaado.

E pamwoiu lépwo béén wo Paulo

Ke e cuwo ha awiemelé wo Paulo, ke e pii telé pie: «Lépwo béléng, é hemepie geé teko ténedehi ali é pii tewé pie, me time nye uce engen mu Krète, ke me time e o uce tuie ne konye aceli woni.

²²É pii tewé pie: Geé mwoiu! Be o te tice pace bélénye celi e o mele, kehe o te icehi a ong na nye o patieden.

²³«Woéo pa apulie te Padué, ke pa apenem den, ke é tibwén, ke e âbeetiéo wo pa *âcélo ten,

²⁴ke e pii tong pie: "Go nemwo pwo me mwotiko, go Paulo, be o bo tautiko ne ânebuhe César, pa daame ubwo te lèpwo Roma. Ke wonaa mu kom, ke wo Padué, ke e o pwo me lé mulie wo lèpwona lé âcéim."

²⁵«Lèpwo béeeng, geé mwoiu! Be é céhi ne ko Padué. Éa, e o te pwo ana e pii tong.

²⁶Kehe genye o teda pwo ace één.»

Lé âmwonuhi amu

²⁷Caa a bé¹⁴ he ni bwén, ke a udan, ke e teko cuutéékeme nge pwo a tabe Méditérané. Ke é ha awieme bwén, ke wo lèpwo apenem pwo ong, ke lé piténe ne kolé pie, geme caa âmwonuhi a céiu amu.

²⁸Lé tahi ne pwo tabe a béja na imwi ko tai, ke lé tooli pie 37 *mètre* a bwo numwihi na a tabe. Ke lé piân, ke lé tahi mwo ali béja, ke lé tooli pie 28 *mètre* a bwo numwihi na a tabe.

²⁹Abwobwo jélé pie o tanahi a ong ne ko ni péi. Ke lé tahi ni nyu na paa alece, ke nimelé me e epin a pwopwang.

³⁰Ke lé neole he tabe a nahi ong wo lèpwo apenem pwo ong, ke lé pii pie: «Geme mwo â tahi ni nyu ânebuhe a ong ubwo tenye ati.» Kehe time uce a juuju, kehe lé pwo me lé cela mu ha ali ong.

³¹Kehe e pii wo Paulo te ni coda me pa caa telé pie: «Mepie time lé uce mu pwo ong wo lèpwo apulie ce, ke o pwocoon me geé mulie.»

³²Ke lé tahagéi ni tai ko ali nahi ong wo lèpwo coda, ke lé pawie me e â pwo tabe.

E pamwoiulé mwo wo Paulo

³³Ânebuhe a pwopwang, ke e pii telé wo Paulo pie: «Jenaa, ke caa a bé¹⁴ he ni tan na geé uca, ke geé mu, he time geé uce wiinaado.

³⁴É pamwoiukewé me geé wiinaado, beme pwo niihewé, ke me te tice celi tookewé.»

³⁵Alechehe a bwo cihe telé, ke e pé a pwoloa, ke e pipwo-olé te Padué ne ânebuhelé ati, ke e patihi a pwoloa, ke e wiinaado.

³⁶Tai woélé ati, ke lé mwoiu, ke lé wiinaado mwo.

³⁷Pwo 276 a jéhikeme ati ne ha ali ong.

³⁸É he caa nebwén na lé wiinaado, ke lé tahi ne pwo tabe ni blé beme pwia a ong.

Lé teda pwo a bwowon

³⁹É he pwang, ke wo lèpwo apenem pwo ong, ke time lé uce temehi pie ade één, kehe lé alihia ooluun ke a nicepwon. Lé hane ace bwopwon beme lé pé die lang a ong, hemepie jan.

⁴⁰Lé tuwo ni nyu, ke lé pawie ne he tabe. Ke lé tuwo mwo ni tai ko a eaong. Ke lé ne a niê pwo ong ânebuhe a ong, beme e péékeme da ticepwon na a dan.

⁴¹Kehe lé teda pwo a bwowon, ke caa pwocoon me e pipenem na a ong. A ânebuhen, ke e wie nge he ni won, ke pwocoon me e wie. Ke lé tabuluhene a alechen ne ni jié na pwo niihen.

Lé tai mulie

⁴²Nime lépwo coda me lé taunu lépwo apwocuhinaado, beme te tice paceli e cela heme lé ko éoom.

⁴³Kehe e pacuwolé wo pa caa telé, be nimen me e celuimi Paulo. Ke e pii te lépwona lé temehi éoom pie, me woélé lépwo bécéiuhen na me lé téele ne pwo tabe beme lé taa huâiu.

⁴⁴Ke wo lépwo béén, ke lé bwo âcéilé pwo ce meacuwo ai ce pihe a ong, ke wonaa a bwo â teda telé ati ha amu. Tai wogeme ati, ke geme tai mulie.

Apostolo 28

Paulo ne pwo a één Malte

¹Alechen, ke geme temehi pie a één naa, ke a niin pie Malte.

²Ke lé hegikeme wo lépwo apulie lang, ke lé te nihe picani teme ehi. Ke he te nihe ubwo a ute me a bwala, ke lé patéi a miû na nihe ubwo, ke lé ne me geme pwocadéu.

³Ke e pé ni uluhe acuwo wo Paulo beme e tahi da pwo miû, ke pwo pa bwien na e â wie mu hen ko a élé, ke e wii a i Paulo.

⁴Ke é he lé alihia bwien he e tetelu ko a in wo lépwo apulie ha amu naa, ke lé pipii telé pie: «Éé! Geé alihia, wo pa apulie ce, ke pa ataunuhi apulie, be caa celuimieng koja a jié, kehe icehi ana e pwocuhinaado ten wo pa duéé henye, ke e pwo me e mele.»

⁵Kehe icehi ana e tagilihi a in wo Paulo, ke e tupwo ne pwo miû ali bwien, ke time uce picunu nang kon.

⁶Ke lé omeeng wo lépwoli apulie, be lé niimihi pie, o cibu nang, ai e o te ju pwome tupwo, ke me e mele. Ke caa ju bwolihi a bwo omeeng delé, ke he lé alihia pie time uce ko cunu nang, ke pitaatééhi ni bwo niimihinaado telé, ke lé pii pie: «Ôhu! A duéé!»

E pwo me tieden ni cunu

⁷É ha a duaan naa, ke pwo a duaan de Publius, pa apulie na nihe piubwo nang ne pwo a één naa. Wo paje, ke e te nihe hegikeme ehi. Ke geme pimu pelen, he na cié ni tan.

⁸Kehe te nihe cunu pa caa ten, be piéle nang, ke e pitebwohi cewéle, ke e tee pule. Ke e ân wo Paulo me e âlieng, ke e ne ni in huîin, ke e pwoiithi ten, ke caa tieden a cunu kon.

⁹Ke é alechen, ke lé âmwobé ati ni bée cunu mu ha a één naa, ke e pwo me tieden ni cunu kolé.

¹⁰Ke lé te nihe pipaunukeme. Ke é he caa nebwén a bwo mu teme lang, ke lé ne teme nina nihe pwonaado ne kon ne ko a bwo engen deme.

E tuié nge Rome wo Paulo

¹¹Caa ju cié wole ko a bwo mu teme [pwo a één Malte]. Ke nebwén, ke geme taa pwo ong mu Alexandri, na a niin pie *Kastor me Polux*, a ong na e tekó mu lang ha a benaamwon ko ta-amu.

¹²[Ke geme engen] ke geme tuié nge Sirakuse, ke geme mu lang he na cié ni tan.

¹³Ke é mulang, ke geme téte uti a amu, ke geme tuié nge Régio. Ke é ha acaama, ke e tahieng a dan na e âbé mu he *sud*. Ke alo ni tan deme, ke geme bwo tuié nge Pouzole, atii ne ong.

¹⁴Ke geme tooli nelang lèpwo acéihi, ke lé ilekeme me geme mwo te ju pwome mu pelelé he celi céiu naadenitan. Ke geme mwo ju pwome mu pelelé. Ke nebwén, ke geme bwobe â *Rome.

¹⁵Ke é he lé téne a jepule kome wo lèpwo acéihi na lé mu Rome, ke lé âbé benikeme ne ha Api-icu te Apius, ke é ne he ni Mwouiinaado na Cié. Ke, me e alilé wo Paulo, ke te nihe piwâénimen, ke e pwo-olé te Padué.

E pacihe lèpwo Juif ne Rome

¹⁶É he geme tehene nge Rome, ke lé ne te Paulo a mwomwon me e mu ha a céiu mwa, ke céiu pa coda na wéa kon.

¹⁷Cié ni tan alechen, ke e tote lèpwo caa te lèpwo *Juif ne Rome wo Paulo. Ke e pii telé pie: «Lèpwo âjiénung, te tice aceli é pwo ne ko a puapulie tenye ai a bwomu te ni caa tenye. Kehe icehi ana lé neéo he karépu ne *lérusaléma, ke é mulang, ke lé neéo te lèpwo Roma.

¹⁸Ke lé tautiéo wo lèpwo Roma, ke nimelé me lé pawieéo, be te tice watihenaado celi lé tooli ne kong, beme lé taunuéo.

¹⁹«Kehe icehi ana wo lèpwo Juif, ke te muhi telé, ke é caa ju ilehi me é taa die pele César, pa daame ubwo. Kehe icehi ana time uce nimung me é pipé ne ko a puapulie tong.

²⁰É mu ko anaa, na é ilehi me é alikewé, ke me é cihe tewé. Be wonaa mu ko pa *Mesia na genye ucéieng, ati wogenye a puapulie *Isaraéla, na cieéo ko ni tai toki ce.»

²¹Ke lé hegi ne ten pie: «Time geme uce hegi ace tii kom mu *Judé. Te tice pace béenye celi e âbé pwojepule teme kom, ai me e pii me ta ne kom.

²²Kehe icehi ana nimeme me go pii teme ehi a pwoiitihi naa, be geme téne pie, nihe piikewé me ta pitihî.»

E pipatemehi lésu telé

²³Ke lé picéi a tan. Ke hiwon nina lé âbé céiieng ne ha a mwa na e mu hen wo Paulo. Ke tabuhi ko acaama die ko a babwén, ke e cihe telé ko a *Mwametau te Padué, ke e pwo me e habwii telé ni pwooti ko lésu, ne he ni *patén de Moosé, ke é ne he ni tii te lépwo péroféta.

²⁴Wo lépwo béeén, ke lé céihi ne kon, ke wo lépwo béeén, ke te muhi telé me lé céihi.

²⁵Ke é he time lé uce piténelé hadeniilé, ke lé pwo me lé engen. Ke e pii telé a bénebwéne pwooti wo Paulo pie: «E te ju cihe ehi na a *Jenen litihî te lépwo caa tenye, mu ko Isaia pa péroféta, pie:

²⁶ Go â pii te a puapulie naa pie: “Geé tee téne taaci, kehe time geé uce temehi. Geé tee omehi taaci, kehe time geé uce alihî temehi.”

²⁷ [É pii ne kolé: Mwoiu a puni a puapulie ce.] Capuhi ni pwonimelé. Bwéjé ni pwojéénelé. Bwi ni naamiilé. Be time uce nimelé me lé alihî ko ni naamiilé, ke me lé téne ko ni pwojéénelé, ke me lé temehi ko ni pwonimelé. Te muhi telé me lé bitelé bé céiiéo, me lé taatééhi ni mulihelé, ke me é o pwo me wâé jélé.» Ésaïe 6.9–10

²⁸ E pii telé mwo wo Paulo pie: «Wâé heme geé temehi ehi a céiu naado: E nebé a Pwooti Wâé wo Padué, me de lépwona time uce lépwo Juif. Ke lé o téne.»

{²⁹Ke nebwén, ke lé engen wo lépwo Juif, ke lé te nihe picihe kon.}

E pacémuni nina lé âbé céiieng

³⁰Mepwo é ne ko Paulo, ke e mwo tee mu ha a mwa na e pwocuhin, he na alo ni jo. Ke e hegi ati nina lé âbé omeeng.

³¹Ke e cihe telé ko a Mwametau te Padué, ke e pacémunilé ati ko Padaame lésu Kériso. Ke te tice celi me lé pacuwoeng ne ha a bwo cihe ten.

Roma

Roma 1

Pipwobwocu

¹ Woéo Paulo, pa eabwé te *Kériso lésu, ke é pwotii lé [céiikewé ni acéihi roma]. E todeéo wo Padué, beme é apostolo. Ke e pipégaliéo beme é pii beetihi a *Pwooti Wâé ten

²na e caa te mi pii beetihi ânebun, be e pwo me lé pipwaadeniin bé ne ni *péroféta ten, na lé tii ne he ni *tii iitihi:

³a Pwooti Wâé ko pa Naîn, wo lésu Kériso, [Padaame henye]. Te pa apulie pwohewiikenye, be pa piebehi pa daame *Davita.

⁴Kehe e habwii wo Padué pie, wo pa Naîn, he e pwo me e mulie cemwo mu ha amele ko a junuu a *Jenen litihî.

⁵E etiéo wo Padué, beme é apostolo te Kériso. Ke a penem dong, ke me é pii beetieng, ne te ati ni bele, beme lé céihi ne kon me piténedeeng.

⁶⁻⁷ Wogewé mwo, lépwo Roma, ke geé bée lépwonaa, be te junihe eâname Padué tewé, ke e caa todekewé wo lésu Kériso beme geé mulie me den. Wâé heme e mu pelewé a *pipwoééhe tice ja kon me a péém, na e âbé mu ko Padué henye me Padaame lésu Kériso. Adéikewé!

Nime Paulo me e caniêlé

⁸É tabuhi ko a pipwo-olé te Padué hung, mu kowé ati, ne he nii lésu Kériso, be caa te ju jepule pitihî a bwôhemwo a céihi tewé.

⁹Ke e te temehi wo Padué pie, é tee niimikewé ne he ni pwopwoitihi tong. Weeng pana é pipwoeabwé ten, ati ha a pwonimung, na é pipatemehi a Pwooti Wâé ko pa Naîn.

¹⁰ É te cuwo ko ileeng pie, me é cedikewé, hemepie te nimen.

¹¹Be te junihe nimung me é alikewé, beme é ne tewé ni âpipati na e âbé mu ko a Jenen litihî, beme pwo niihewé,

¹²ke me genye bo pipamwoiikenye ko ni céihi tenye [ne ko Kériso].

¹³ Tuiebé jenaa, ke time uce jan me é âdé céiikewé. Kehe icehi ana wâé heme geé temehi, wogewé lépwo béeing ne he nii Kériso, pie, caa te junihe hiwon ni bwo niimihi nen dong pie, me é pwo. Be wâé tong me é alihî ce acehi ni penem dong ne pelewé, pwohewi a bwo alihî nen dong [ne pele lépwona time lé uce *Juif] ne he ni bée amu.

¹⁴Be é te junihe niimi ati ni apulie: lépwona lé pwohewiikenye, me lépwo béeén na te pi-ité ni bwomu tenye me woélé; ke ni apulie na lé cémun, me ni béeén na mwo time lé uce cémun.

¹⁵É mu ko anaa, na te junihe nimung me é cedikewé ne *Rome, beme é pipatemehi a Pwooti Wâé ne pelewé.

A âne a Pwooti Wâé

¹⁶Time uce tanim jo me é pipatemehi a Pwooti Wâé. Be a junuu Padué na me e *celuimi ati nina lé céhi: mi ni Juif ânebun, ke bo ni béen alece.

¹⁷Be e habwii tenye na a Pwooti Wâé pie, wo Padué, ke e pwo me lé mwomwon wo lépwona lé céhi ne kon. Ke a céhi telé naa, ke caa te jan. Be caa te tii ne he ni tii iitihi pie: *Wo pana e céhi ne ko Padué, ke mwomwon nang ne he pwahamiin, ke e kon a mulie. Habakuk 2.4*

**genye te tai pwo nina ta
(Pwahamii tii: 1.18—3.20)**

¹⁸E habwii wo Padué, mu âda he *miiden, a pwo-okéé kon ne ko ni apulie, na ta jélé. Be é mu ko ni bwomu telé na ta, ke lé pwobwonih a juuju me e penem.

¹⁹Be caa te ju pwaale ne kolé aceli genye ko temehi mu ko Padué, be weeng na e caa patemehi telé.

²⁰Be mepie time genye uce alieng ko lupwo naamiiyne, kehe e pihabwieng ehi ne he ni naado na e pwo mu ha atabuhi kon. Be e ne a miiden me a bwohemwo, me ati ni naado na e pwon. Ke jan me nye alahi pie, e te junihe piwéden, ke pwojunuun dieli mwo.

²¹[Ke caa te tice bwopwonen me lé pipwopailé] be lé caa te temehi Padué, kehe time lé uce pipaunueng, me pipwo-olé ten, kehe nina me nye pwo me den. Be lé pipatieden ne ha a melepiing, ke piticenaado ne ko ni bwo niimihinaado telé.

²²Lé niimihi pie, lé pitemang, kehe icehi ana lé piolo.

²³Be lé jéilé ne ko Padué, na e mu dieli mwo ne ha *a wâé ten, beme lé pipaunu ni *démenaado na o tieden: ni déme apulie, me ni meni me ni wota, me ni bwien.

E nelé wo Padué

²⁴É mu ko anaa, na e nelé wo Padué, me lé te pwo ni huô na ta, na nimelé kon. Ke lé pwotahi ni éélén, ke lé pipatanimilé mwo.

²⁵Ke lé ne Padué na e juuju, ke lé téte cehi ni duéé hauli. Ke lé pipaunuhi ni naado na e tabuhi. Kehe [wogenye, ke] wâé heme nye *adéi Padué dieli mwo! Amen!

²⁶É mu ko anaa, na e te nelé wo Padué, beme lé te âcehi ni pwonimelé na tanim. Be ni toomwo, ke time lé uce pule me ni aiu, kehe lé te pule imi mwo ni toomwo, kehe time nye mu uce wonaa.

²⁷Ke te piwien ne mwo ko ni aiu, be caa te time lé uce pule imi ni toomwo; be lé âcehi nina nimelé kon na mwiihi, ke lé te pule imi mwo ni aiu! É mu ko anaa, na lé te hegi mwo a cuhinaado telé ne he ni éélén, mu ko ni ta na lé pwo.

28 É he time uce nimelé me lé temehi Padué, ke e te nelé me lé te âcehi ni pitemang delé na time uce mwomwon, be lé pwo nina me time nye uce pwo.

29-31 Te ju oba jélé ati ko a ta: Lé cibehede, ke lé pipii delé; Ke nimelé ko ni de ni béén, ke lé pipwokon; Ke lé pipwohuô te ni béén; Ke lé pijeta kolé, ke lé pipééle; Ke lé cihe me ta ne kolé; Ke lé okéé die ko ana lé taunuhi apulie; Ke time lé uce piténede ni nyaa me caa telé; Ke time lé uce pajujuhi ni *piapwo telé; Ke time lé uce paciiti Padué, ke lé cubwonieng. Ke te tice pwonimelé, ke te tice pipwoééhe kolé; Ke lé tee cuwo ko tooli ati ni bwopwonan me lé pwo nina ta.

32 Ati lépwona lé wonaa, ke e pii wo Padué pie lé bo tai mele, be anaa a bwo tautinaado ten na mwomwon. Ke lé caa te temehi anaa, kehe icehi ana time lé uce pipéce ne kon. A céiu mwo, ke lé te pamwoiu mwo ni béén beme lé te pwohewiilé!

Roma 2

A tautinaado te Padué

1 Wogo na go tauti ni béén [na é mwo ko piilé] kehe go teko pipwohewiilé mwo! Me go tautilé, ke te wogo na go teko pitautiko mwo.

2 Ke genye caa te ju temehi ehi pie, e mwomwon wo Padué, heme e tauti ni apulie na lé wonaa.

3 Ke wogo, pana go teko pwohewiilé, ke go teko tautilé. Ke woté? Go ko niimihi pie, go o te cela ko a tautinaado te Padué?

4 Kona time go uce ko alahi pie, e te junihe picani ne kom wo Padué, ke te junihe wâé nang ne kom? Go teko pé me piticenaado ne ko ninaa? E wonaa wo Padué, be nimen me go pitaatééhi a mulihem.

5 Kehe time uce nimem me go temehi, be te junihe mwoiu a punim! É mu ko anaa, ke go te ucéihi a cuhinaado tem. Be é ha a Tan [na e caa pipégali wo Padué] ke e o habwii a okéé ten ne kom, ke e o tauti ni apulie ha a juuju.

6 «Ke e bo te muko pétaapwo ne ce cemelé, ne he ni muko pétaapwo bwo penem delé.»

7 Mepwo é ne ko ni béén, ke lé hane me lé pwo celi wâé, beme e piwâélé wo Padué. Ke lé hane a *adéihi ten, me a mulie na tice anebwén kon ne pelen. Ke wo Padué, ke e bo pwo me lé mulie ne pelen dieli mwo.

8 Kehe ni béén, ke lé pwobwonieng, ke time lé uce piténedehi a juuju, ke lé te cuwo ko pwo ni huô na ta. Ke wo Padué, ke e bo habwii a okéé kon na ubwo, ke e bo pwocuhinaado telé.

9 A apwohi me a mwoti, ke e bo tupwo ne ko ati nina lé pwo nina ta: ni *Juif ke ni béén mwo.

¹⁰Kehe *a wâé, ke a adéihi, ke a péém, ke bo ni de ati ni apulie na lé pwo nina wâé: ni Juif ke ni béén mwo.

¹¹Be wo Padué, ke time e uce pipwoinen ne ko ni apulie.

Piwien hemepie pwo patén, ai tice patén

¹²Wo lépwo Juif, ke etelé ni *patén de Moosé, ke hemepwo é ne ko ni bée apulie, ke te tice telé ni patén. Kehe te piwien ne kolé. Be heme lé pwo ana ta, ke e o tautilé wo Padué, ke e bo pwocuhinaado telé. Kehe a cuhinaado te lépwo Juif, ke o âcehi ni patén na etelé.

¹³Be time uce nina lé tabemi ni patén, na lé *mwomwon ne he pwahamii Padué, kehe nina lé piténédehi.

¹⁴ Nina time lé uce Juif, ke time lé uce temehi ni patén de Moosé. Kehe icehi ana heme lé mulie ne ha ana e pii ne ni patén, ke pwohewiin heme te woélé ni patén.

¹⁵Ke lé teko habwii pie, teko e he pwonimelé ni patén. Ke e te *pajuujuhi anaa na a *pwocihe na e âbé mu he ni pwonimelé. Be é he ni bée benaamwon, ke lé te pitautilé mwo, ke é he ni bée benaamwon, ke lé te pipwopailé mwo.

¹⁶Genye bo alih ihi, ha a Tan na e bo tauti ni apulie hen wo Padué. Be e ne me e tauti nina neduwohi ne he pwonime ati ni apulie wo Kériso lésu. Ke weengaa a Pwooti Wâé na é pipatemehi.

A bele Isaraéla me ni patén

¹⁷Wogo, pana go Juif, ke go mu pwo ni patén, ke go pipii dem ko Padué hem.

¹⁸Ke go pii pie, go temehi ana nimen kon; ke lé picani tem ni patén me go pwo nina wâé, ke me go temehi ace bwo engen dem.

¹⁹Ke go niimihi pie, wogo pa apipé ni bwi, ke go pwéélang de lépwona lé mu ha a melepiing.

²⁰⁻²¹Ke go picaa lépwona time lé uce temehi me lé pwo celi wâé. Ke go pacémuni lépwona mwo time uce pwo niihelé. Be go niimihi pie, etem ace bwo temehinaado, me a juuju, celi e âbé mu ko ni patén. Aje! Kona time go te pipacémunikó kona woté? Ke go pii te ni béén pie, me lé nemwo bune, kehe wogo, ke go te bune!

²²Ke go paciitihi a bune toomwo, ke go te bune toomwo! Go téétihi ni duéé hauli, ke go bune nina e he ni *mwaiitihi telé!

²³Go pipii dem be e mu kom ni patén, kehe icehi ana time go uce piténédehi! Ke go pwotahi ne ko Padué ko ni huô tem.

²⁴ Be caa te tii ne he ni tii iitihi pie: *Wonaa mu tewé, me lé pipii me ta a nii Padué ne nina time lé uce Juif. Ésaïe 52.5*

A ju tegoop

²⁵Heme go pwo ana e pii ne ni patén, ke junaado a *tegoop. Kehe icehi ana mepie time go uce piténeudehi ni patén, ke o te piticenaado ne ko a tegoop.

²⁶Wo lépwona [time uce lépwo Juif, ke] time uce tegoop jélé. Kehe icehi ana me lé te piténeudehi ni patén de Padué, ke e te alilé wo Padué, me pwohewii nina tegoop jélé.

²⁷O woélé na lé bo tautiko, wogo [pa Juif] na tegoop go. Ke go o hegi a cuhinaado [na te junihe ubwo]. Be go te temehi ni patén, kehe icehi ana time uce nimem me go piténeudehi.

²⁸Time nye uce Juif wonaa mu ko nina nye alihi ko ni naamiinye. A ju tegoop, ke time uce ana genye alihi ne ko a éé apulie.

²⁹Kehe wo pa ju Juif, ke pana e Juif mu jengedé ne kon; ke a ju tegoop, ke a pwonimen. Ke e âbé mu ko a Jene Padué, kehe time uce é mu ko ni patén na tii. Pa ju Juif, ke time e uce hegi a pipwoun mu ko pa apulie, kehe é mu ko Padué.

Roma 3

Te junihe mwomwon ana e pwo wo Padué

¹Kona ade aceli piwéden ne ko pa *Juif koja ni béis? Kona te junihe pwonaado ne ko a *tegoop?

²Éa, te junihe wâé ne kon, ne he ni naado na hiwon. Be wo Padué, ke e mi ne te lépwo Juif a pwooti ten, beme lé wéhi.

³Hemepie ce béis Juif, ke me time lé uce cile nina lé caa te mi pii ânebun, ke kona wo Padué, ke time e o uce cile nina e caa te mi pii ânebun?

⁴Uhuu! Be mepie lé gele ne ni apulie, kehe e te mwomwon wo Padué, ke e te penem ha a juuju. Be caa te tii ne he ni tii iitihi pie: Me go cihe, [go Padué] ke go cihe ha a juuju. Lé o tai temehi a pwooti tem. Mepie lé tautiko, ke go te piwéden koja nina lé tautiko. Psaume 51.6

⁵Mepwo é ne ko ni huô tenye na ta, ke lé habwii pie, te tice ta ko Padué. Ke é mu ko anaa, ke lé pii ne ni béis pie: «Time uce wâé, hemepie e pwocuhinaado tenye wo Padué, [be ni huô tenye na ta, ke e habwii a bwo wâé nang]!»

⁶Ôhu! Be hemepie time e uce mwomwon wo Padué, ke kona e o woté ko ace bwo tauti ni apulie pwo bwohemwo?

⁷[Ke wieli go niimihi pie]: 'É mu ko a gele tong, ke me e tuiebeeble a juuju te Padué, ke me e habwii *a wâé ten, ke é ko ade na e mwo tee pwocuhinaado tong?'

⁸[Ôhu. Go nemwo pii anaa. Be te pwohewiin] heme nye pii pie «Genye pwo ana ta, beme e wie a wâé.» Kehe pwo ni béis na lé pipé ne kome pie, geme pii anaa. Ke lé te ju hane me lé pwocuhinaado.

Te tice pace céiu apulie celi e mwomwon

⁹ Genye o pii pie woté, ne ko wogeme lépwo Juif? Kona geme piwéden koja ni béén [he he pwahamii Padué]? Ûhu! É caa habwii tewé pie: wo lépwo Juif me lépwona time lé uce Juif, ke lé tai mu ha a pihuô te a ta.

¹⁰ Be caa te tii ne he ni tii iitihi pie: Te *tice pace céiu apulie celi e mwomwon ne he pwahamii Padué*. Te *tice paceli te ju céiu nang!*

¹¹ *Te tice pace céiu apulie celi e hane a juuju. Te tice paceli e hane Padué!*

¹² *Lé te tai jéilé ne ko Padué, be tai ni apulie na ta jélé. Te tice paceli e pwo aceli wâé. Te tice paceli te ju céiu nang! Psaume 14.1–3*

¹³ *Me lé cihe, ke te junihe ta; be piapwong ni upehelé. Ke lé pipwohuô te ni béén. Psaume 5.10 Ni pwooti na lé pii, ke mucenihî ni apulie. Be e pwolé a tabepwo ni bwien. Psaume 140.4*

¹⁴ *Ubwo a apwohi ne pwolé, ke cunu genye ko ni bwo cihe telé. Psaume 10.7*

¹⁵ *Lé te ju téte, me lé â taunuhi apulie.*

¹⁶ *É he na lé â lang, ke lé pwotahinaado.*

¹⁷ *Time lé uce temehi a pwaadeni a péém. Ésaïe 59.7–8*

¹⁸ *Be time lé uce paciiti Padué. Psaume 36.2*

¹⁹ Mepwo é ne ko ni patén, me ni pwooti na e hen, ke e mi ti ko lépwona e ne me delé ni patén, [wo lépwo Juif]. E habwii ati ni huô te ni apulie, na time uce *mwomwon ne he pwahamii Padué, ke e bo tautilé kon. Ke o te tice pace céiu apulie pwo bwohemwo celi jan me e pipwopain.

²⁰ Be te tice pace céiu apulie celi me e pii pie, mwomwon nang ne he pwahamii Padué, ko ace bwo piténedehi nen den ni patén. Be a ju penem de ni patén, ke me lé temehi ne ni apulie pie, woélé ke ta jélé.

**genye mwomwon mu ko a céihi tenye
(Pwahamii tii: 3.21—5.21)**

²¹ É jenaa ni, ke e caa habwii wo Padué a bwopwonen, me genye mwomwon ne he pwahamiin. É he e te pwo, ke te tice patén. Be ni *patén de Moosé, me ni pwooti te lépwo péroféta, ke lé te ju *pajuujuhi cehi nina e pwo wo Padué.

²² Be wo Padué, ke e pwo me lé mwomwon ne ni apulie mu ko a céihi telé ne ko lésu Kériso. Ke e te pwo te ati ni apulie na lé céihi ne ko Kériso, be te tice pipwoinen hadeniilé.

²³ Be nye tai pwo nina ta, ke tai wogenye ité koja a wâé te Padué.

²⁴ Ke wo Padué, ke é mu ko a *pipwoééhe tice ja kon den, ke e ne tenye a âpipati na wonaa: [a péém na e ne ha awiemenye me weeng. Ke e ne me pwohewiin heme time nye mu uce pwo celi ta] beme wogenye ni apulie na nye mwomwon ne he pwahamiin. Anaa, ke a âpipati ten ne tenye, na e pwaadeniin bé wo Kériso lésu, pana e tuwokenye koja nina ta.

²⁵⁻²⁶Ke e ne Kériso, beme e *âpwailo me denye. É mu ko a cewéhe Kériso, ke e pineuhi ni ta pwo tenye, wogenye nina nye céhi ne kon. Ke weengaa a béhabwiinen pie, mwomwon nina e pwo wo Padué, ânebun ke é jenaa. Be é ânebun, ke e te picani ne konye, ke time e uce pwocuhinaado tenye ko ni ta pwo tenye. Ke é jenaa, ke e pwo me nye mwomwon ne he pwahamiin, wogenye nina genye céhi ne ko Kériso.

E pajuujuhi ni patén na a céhi tenye

²⁷É mulang, ke o te tice watihen me nye pipii denye, ke o te piticenaado ne ko a bwo piténédehi ne ni patén. Be ana a junaado, ke a céhi.

²⁸Be é pii tewé pie: Wo Padué, ke e pwo me nye mwomwon ne he pwahamiin, mu ko a céhi tenye. Kehe time uce é mu ko a bwo pacuwohi nen denye ni patén.

²⁹Woté, [go niimihi pie] wo Padué, ke te Padué he lépwo Juif cehi? Ke kona time uce Padué he ce béén mwo? Uhuu, be Padué he a bwohemwo ati!

³⁰Be te céiu cehi Padué. Ke weeng pana e bo pwo me lé mwomwon ne he pwahamiin wo lépwo Juif, mu ko a céhi telé. Ke weeng mwo, na e bo pwo me lé mwomwon ni béé puapulie, mu ko a céhi telé mwo.

³¹Kehe icehi ana nye nemwo niimihi pie, piticenaado ne ko ni patén, wonaa mu ko a céhi tenye. Úhu! Time uce wonaa! Be a céhi tenye, ke e *pajuujuhi ni patén.

Roma 4

Pa acéhi wo Abérama

¹Nye o pii pie woté ne ko *Abérama, pa watihenye? De ace cemen ko ni penem na e pwo?

²[Te tice.] Be time uce é mu ko nina e pwo, celi me caa pace apulie celi e *mwomwon ne he pwahamii Padué. Ke time uce jan me e pipii den.

³Be caa te tii ne he ni tii iitihi pie: *E céhi ne ko Padué wo Abérama, ke é mu ko a céhi ten, ke wo Padué, ke e pwo me pa apulie na e mwomwon ne he pwahamiin.* Genèse 15.6

⁴Mepie e penem wo pace céiu apulie, ke a mwani na e hegi, ke time uce a âpipati, kehe te a cuhieng ne ha a penem den.

⁵⁻⁶Kehe icehi ana time uce piwien ne ko pa apulie na nimen me wâé nang ne he pwahamii Padué, be te tice penem celi jan me e pwo. Kehe te ju a céhi ten cehi ne ko Padué. É mu ko a céhi ten, ke wo Padué, ke e pwo me e mwomwon ne he pwahamiin. Wo pa daame *Davita, ke e pwonyebi ha a pipwodéén de ni apulie na lé wonaa, ke e pii pie:

⁷ *Adéi ni apulie na e pétaabwon ni ta pwo telé wo Padué, ke e pineuhi ni huô telé na ta.

8 Adéi nina time e uce piniimihi ni ta pwo telé wo Padaame.Psaume 32.1–2

Time uce a tegoop @ ana e pwo me wâé genye

9A pipwodéén [na e pii wo Davita] ke he te a de ni *Juif cehi? Ûhu! Te a de ati ni bele. Be li e caa mi pii pie: *E céihi ne ko Padué wo Abérama, ke é mu ko a céihi ten, ke wo Padué, ke e pwo me pa apulie na e mwomwon ne he pwahamiin.* Genèse 15.6

10Kona he éniile celi wo Padué, ke e pwo me e mwomwon wo Abérama, ne he pwahamiin? Wieli é alecehe a *tegoop ten? Ûhu, time uce é alechen, kehe te é ânebun.

11Be wo Padué, ke e te pwo me e mwomwon ne he pwahamiin, he mwo te time uce pwo a tegoop ten, mu ko a céihi ten. Ke é alechen, ke e hegi a inen ko a tegoop ten. Ke me wonaa, ke e â pa caa te ati nina lé céihi ne ko Padué, na time uce tegoop jélé. Ke wo lépwonaa ati, ke wo Padué, ke e caa pwo me ni apulie na lé mwomwon ne he pwahamiin.

12Ke te pa caa mwo te lépwona tegoop jélé [wo lépwo Juif] hemepie lé céihi pwohewieng. Be weeng, ke e céihi ne ko Padué, ânebuhe a tegoop ten.

A piapwo te Padué ne te ni acéihi

13E pii te Abérama me ni piebehieng wo Padué pie: «É bo ne tewé a bwohemwo ati.» Time uce é mu ko ana e piténedehi ni patén wo Abérama. Kehe e wonaa ten wo Padué, be e caa pwo me e mwomwon ko a céihi ten.

14Be hemepie a adéihi naa, ke me a de nina lé piténedehi ni *patén de Moosé, ke wieli o te piticenaado ne ko a céihi, me ali e pii wo Padué.

15Ûhu! Ni patén, ke e te ju pébé cehi a cuhinaado [te lépwona lé mulie ne he ni patén. Be pwocoon me lé âcehin ati]. Be hemepie te tice patén, ke wieli o te tice bwopwon me nye caada ni patén.

16A adéihi na e pii [wo Padué] ke e âbé mu ko a *pipwoééhe tice ja kon den, wonaa mu ko a céihi te Abérama. Ke lé â mu hen ne ni piebehieng. Ke time uce a de lépwonaa cehi na lé âcehi ni patén; kehe te a de ati nina lé céihi ne ko Padué, pwohewii Abérama. Ke e â caa tenye ati,

17pwohewii ana e pii ten [wo Padué] ne he ni tii iitihi pie: *É pwo me wogo pa caa te ni bele na hiwon.* Genèse 17.5 E caa tenye wo Abérama, be e céihi ne ko Padué. [Be e temehi pie, e bo pacuwohi a *piapwo ten ânebun.] Be weeng na e pamulipi mwo nina lé caa mele, ke weeng mwo, na e ne ana mwo coho na mwo time genye uce téele tooli ne éni pwo bwohemwo.

18Éa, e te mu ucéihi wo Abérama ali e pii ten wo Padué, ke e te uca. Be e te céihi ne ko Padué, he li e pii ten pie: *O te junihe hiwon ni piebehiko.* Genèse 15.5 É mu ko anaa, na e â caa te ni bele na hiwon. Genèse 17.5

¹⁹Ke mang a céhi ten. Kehe icehi ana a naado na pwocoon, be e o caa pwo 100 ko ni jo hen, ke caa e mwonus me e mele. Ke wo Sara, è mwoden, ke caa time uce jan me pwo naîn.

²⁰Kehe icehi ana time uce pinekepé ne ten ko a piapwo te Padué. Ke e te pipamwoiueng ko a céhi ten, ke e te pipaunu Padué.

²¹Be e te temehi pie, te junihe pwojunuu Padué, me e pacuwoshi ali e caa mi pii ten.

²²Ke weengaa kuti, na wo Padué, ke e pwo me pa apulie na e mwomwon ne he pwahamiin. Genèse 15.6

A pwooti me denye mwo

²³Ni pwooti naa, ke time uce ni de Abérama cehi.

²⁴⁻²⁵Kehe te ni pwooti me denye mwo. Be e te muko alihni céhi tenye wo Padué, ke e bo hegikenye. Weeng na e ne Iésu, Padaame henye, beme e mele ne ko ni ta pwo tenye. Ke e pwo me e mulie cemwo mu ha amele, beme e pwo me wogenye ni apulie na nye mwomwon ne he pwahamiin.

Roma 5

A péém ha awiemenye me Padué

¹Wo Padué, ke e pwo me wogenye ni apulie na mwomwon genye ko ni céhi tenye. Ke é jenaa, ke genye mu ha a péém me Padué, na e pwaadeniin bé wo Padaame henye, Iésu Kériso.

²É mu ko a céhi tenye ne kon, ke caa jan me nye too Padué, be e pwaadeniinye wo Iésu. Ke genye caa hegi a *pipwoééhe tice ja kon den, ke genye caa mulie hen jenaa. Ke genye caa pipwodéén, be genye caa *cumang ne ha a céhi tenye, pie, genye o hegi a cemenye: a bwo mu tenye pele Padué, ne ha a bwo ubwo na a wâé ten.

³A céiu mwo, ke genye pipwodéén ne he ni picani tenye, be genye temehi pie, e pwo beme nye *ucéhi ne ha a céhi.

⁴Ke heme nye wonaa a bwo ucéhi nen, ke genye cumang ne he ni tacebwén. Ke me genye cumang, ke o piubwo da a céhi tenye, heme genye ucéhi [a bwopiinen ânebun de Padué].

⁵Ke mang a céhi tenye ne kon, be time e bo uce patupwokenye mwo wo Padué. Be caa tidi ni pwonimenye a pipwoééhe ten na te junihe ubwo, na e pipwaadeniin bé na a *Jenen litihna e caa ne tenye.

E mele me denye he mwo ta genye

⁶He mwo te tice niihenye, ke wo Kériso, ke e caa mele me denye, wogenye ni apulie na ta genye, ha a benaamwon na e caa te pacuwoshi wo Padué.

⁷Caa te junihe pwocoon me nye mele me de pa apulie na mwomwon a mulihen. Ke meniing pie, o pwo ace niihenye, me nye mele me de pace apulie celi te junihe wâé nang.

⁸Kehe icehi ana e mele me denye wo Kériso, he mwo ni apulie na ta genye. É mu ko anaa, na wo Padué, ke e habwii a bwo eânimén denye.

⁹Ke é jenaa ni, ke e caa pwo me nye *mwomwon ne he pwahamiin, ko a cewéhé Kériso. Ke me e pwo a naado na ubwo na wonaa, ke e bo celuimikenye koja a cuhinaado [ha a Tan na e bo tauti ni apulie hen wo Padué].

¹⁰Be é he mwo pita genye me Padué, ke e ne a péém ne hadeniinye me weeng, ko a mele te pa Naîn. Ke me e wonaa tenye he mwo ta genye, ke é jenaa ni, [he genye caa béén] ke [nye temehi pie] e bo te celuimikenye ko a bwo mulie cemwo te pa Naîn.

¹¹Ke genye pipwodéén, me pipaunueng ko Padaame henye lésu Kériso, na e caa ne a péém naa.

Adamu me lésu Kériso

¹²[Weengi ana e tuie]: E caa tuie ne pwo bwohemwo a Ta, watihen wo pa apulie na te céiu nang, na wo *Adamu. Ke a Ta, ke e pwo me nye mele, wogenye ati ni apulie. Be é mu kon na nye tai pwo nina ta, ke genye o tai mele.

¹³Be caa e éni pwo bwohemwo a Ta, ânebuhe a bwo ne te *Moosé ni patén de Padué. Kehe icehi ana he mwo te tice patén, ke time genye uce pinenimenye ne ko ni ta na nye pwo.

¹⁴Be wo Adamu, ke e pwo ana e paciitih kon wo Padué. Ke tabuhi ha a benaamwon de Adamu, tehene nge ko Moosé, ke te junihe pwo niihe a mele ne ko ni apulie. Ke te piwien ne kolé, heme time lé uce pwo celi ta, pwohewii ana e pwo wo Adamu. Ke wo Adamu, ke e déme pana e bo tuie, [wo lésu Kériso].

¹⁵⁻¹⁶Kehe icehi ana time uce piwielu. Be a ta na e pwo wo Adamu, ke te junihe ité koja a âpipati na e ne wo Padué, na e pwaadeniin bé wo lésu Kériso. Be é mu ko a ta pwo te Adamu, ke lé tai mele ati ne ni apulie. Kehe é mu ko ana e pwo wo Kériso, ke lé tai hegi a *adéhi na e ne wo Padué, ne ha a pipwoéhé tice ja kon den. Be a ta na e pwo wo Adamu, ke e pébé a tautinaado, me a cuhinaado. Ke a âpipati na e ne wo Padué, ke e pébé a bwo tuwokenye mu ha a ta, wogenye ni apulie na hiwon genye. Te piwien, heme te junihe hiwon ni ta pwo tenye. Be te junihe pwojunuu ni pipwoéhé tice ja kon de Padué koja a ta na e pwo wo Adamu.

¹⁷Be é mu ko a ta na e pwo wo pa apulie na te céiu nang, wo Adamu, ke e piwéden koja ati ni apulie na a mele. Kehe icehi ana wo Padué, ke e ne tenye a *adéhi ten, na e pwaadeniin bé wo pa apulie na te céiu nang, wo lésu Kériso. Ke e pwo me [pwohewiin heme time nye mu uce téele pwo celi ta, beme]

wogenye ni apulie, na nye mwomwon ne he pwahamiin. Ke e pwo me nye piwéden, ne ha *a ju mulip.

18 [É pii mwo pie]: É mu ko a huô na ta na e pwo wo pa apulie na te céiu nang, ke tai tauti ati ni apulie, ke pwocuhinaado telé. Kehe é mu ko a huô na wâé na e pwo wo pa apulie na te céiu nang, ke wo Padué, ke e tuwo ati ni apulie mu ha a ta, beme lé mulie. Ke e pwo me ni apulie na lé mwomwon ne he pwahamiin.

19 Be wo pa apulie na te céiu nang, wo Adamu, ke time e uce piténede Padué. Ke é mu ko anaa kuti, ke lé caa pwo nina ta ati ne ni apulie. Kehe wo pa apulie na te céiu nang, wo lésu Kériso, ke e te piténede Padué. Ke é mu ko anaa, na wo Padué, ke e pwo me ni apulie na lé mwomwon ne he pwahamiin.

Piwéden a pipwoééhe te Padué

20 É he e tehenebé ni patén, ke piubwo da a Ta. Kehe icehi ana te junihe ubwo kaaole a adéihi te Padué.

21 É he ni benaamwon ânebun, ke e piwéden a Ta, ke e pébé a mele. Ke é jenaa ni, ke e piwéden a pipwoééhe tice ja kon de Padué. Ke e pébé céiikenye a péém, me a mwomwon, na e pwaadeniin bé wo lésu Kériso, Padaame henye. Ke etenyé a *mulie dieli mwo ne pele Padué.

Roma 6

a mulihenye na mwo coho

(*Pwahamii tii: 6—9*)

Me puukenye, ke nye mulie cemwo me Kériso

1 Ade aceli genye o pii? Kona genye o mwo tee cuwo ko pwo nina ta, beme wo Padué, ke me e bo habwii tenye a *pipwoééhe tice ja kon den?

2 Úhu! Genye nemwo pwo nina wonaa! Be caa te tice junuu a Ta ne konye. Ke é ko ade na nye mwo te cuwo ko pwo ana ta?

3-4 Be geé caa te temehi ehi pie, é mu ko a bwo puukenye ko a tabe, ke caa céiu genye me Kériso lésu. A bwopiinen pie, he li puukenye, ke pwohewiin heme nye mele, ke neduwokenye me weeng. Kehe icehi ana ubwo *a wâé te Padué Caa, me a junuun. Be e pamulipi Kériso mu ha amele, ke o wogenye mwo, ke nye o mulie ha a mulie na mwo coho.

A mulihenye me de Padué

5 Be caa céiu genye me weeng ko a bwo mele tenye. Ke o te céiu genye mwo me weeng ne ha a mulie cemwo tenye mu ha amele.

6 Wâé heme geé temehi ehi jenaa pie: A mulihenye ânebun, ke e caa mele ne ko a *kuricé me Kériso. Ke e caa pwo me tieden a junuu a Ta, na e mu he ni pwonimenye. Ke caa time genye uce ni *apenem tice ja kon de a Ta.

7 Be wo pana e mele, ke caa tuwoeng koja a junuu a Ta.

⁸Heme nye mele me Kériso, ke genye céhi mwo pie, nye o mulie cemwo me weeng.

⁹Be nye caa temehi pie, é he e mulie cemwo mu ha amele wo Kériso, ke time e bo uce mele mwo. Be a mele, ke caa tice niihen ne kon.

¹⁰Be é he e mele wo Kériso, ke e caa pé a junuu a Ta, dieli mwo. Ke é jenaa, ke e mulie ha a mulihen me de Padué.

¹¹Ke wogewé mwo, ke wâé heme geé temehi pie, pwohewiin heme geé caa mele, ke caa tice junuu a mele ne kowé. Ke geé mulie me de Padué, be caa céiu gewé me Kériso lésu.

¹²Ke wâé heme geé mulie pwohewiin heme te tice junuu a Ta ne he ni éewé na e bo mele ha ace céiu tan. Ke geé nemwo piténedehi nina te nimewé kon na ta.

¹³Geé nemwo ne ce bée duaan ne ko ni éewé me bépwo na a Ta. Kehe geé pinekewé te Padué, beme geé pipwoeabwé ten, be wogewé ni apulie na geé caa mulie cemwo mu ha amele.

¹⁴Be caa time uce ni patén nina lé pihuôkewé, kehe caa te a pipwoééhe tice ja kon de Padué. É mu ko anaa, ke geé nemwo pwo me e pihuôkewé na a Ta.

Wogenye ni eabwé te Padué

¹⁵Genye nemwo pii pie: «Genye pwo ana ta, be e pihuôkenye na a pipwoééhe tice ja kon de Padué, kehe caa time uce ni patén!»

¹⁶Ôhu! Kona time geé uce temehi pie, hemepie geé pinekewé te pace céiu apulie, beme geé apenem tice ja kon den, ke te weeng na geé piténedeeng. Hemepie geé pipwoeabwé te a Ta, ai hemepie geé pipwoeabwé te Padué. Mepie geé piténedehi a Ta, ke geé o mele, ke me geé piténede Padué, ke e o pwo me wogewé ni apulie na geé *mwomwon ne he pwahamiin.

¹⁷Nye tai pipwo-olé te Padué henye. Be é ânebun, ke geé pipwoeabwé te a Ta. Ke é jenaa ni, ke geé caa piténedehi ni pwootí na geé hegi he ni ju pwonimewé.

¹⁸Ke é jenaa ni, ke caa tuwokewé koja a Ta. Ke geé caa pipwoeabwé te [Padué, beme geé pwo] ana mwomwon, ke wâé.

¹⁹É te temehi pie, te junihe pwocoon ne kowé, me geé temehi ehi. A watihen me é pwo-ocine ko a mulihenye ati he ni tan. Ânebun, ke pwohewiin heme wogewé ni apenem tice ja kon de a Ta. Ke geé patupwo ati ni éewé, beme geé mulie ha a mulie na ta, ke mwiihi. Ke é jenaa ni, ke geé caa penem [de Padué]. Ke wâé heme geé patupwo ati ni éewé, beme geé pipwoeabwé ten, ke me geé pwo ana wâé. Ke geé pipwocilekewé, [beme wâé ten gewé].

²⁰É he geé pipwoeabwé te a Ta, ke time geé uce picuwokowé me geé âcehi ni pihuô te Padué.

²¹He ade ace utehe a penem dewé? Tanim gewé heme geé niimihi jenaa ni! Be ni naado naa, ke e pébé a mele.

²²É jenaa ni, ke caa tuwokewé koja a Ta, ke geé caa â pipwoeabwé te Padué. Ke a utehe a penem dewé, ke me wâé te Padué a mulihewé. Ke é mu ko anaa, ke e mu kowé a *mulie dieli mwo, ne pele Padué.

²³Be a cuhi a Ta, ke a mele. Kehe wo Padué, ke e te ju ne tenye me tice ja ko a mulie dieli mwo, na e pwaadeniin bé wo Kériso Iésu, Padaame henye.

Roma 7

Tuwokenye koja ni patén

¹Lépwo bééng ne he nii Kériso, é niimihi pie, me geé temehi a bwomune ni patén. Be e pihuôkenye ne ni patén, heme nye mwo te mulie.

²Pwohewii ê toomwo na e caa piaten, be caa cieeng ne ko pa aiu hen, heme e mwo te mulie wo panaa. Kehe mepie e caa mele, ke caa te jan me e piaten mwo.

³Ke hemepie e â mwode pace céiu aiu, heme e mwo tekó mulie wo pa aiu hen, ke genye pii pie e bune aiu [be time e uce piténedehi ni patén]. Kehe icehi ana hemepie e mu pele pace céiu aiu, alechehe a bwo mele te pa aiu hen, ke caa time e uce bune aiu, ke caa time e uce caada ni patén.

⁴Ke wogewé mwo, wogewé ni acéhi bééng, ke te piwien ne mwo konye. Be caa time e uce ciekenye mwo ne ni patén. Be caa wogenye ni apulie te Kériso, pana e caa mele me denye, ke e mulie cemwo mu ha amele. Ke é mu ko anaa, ke wâé heme a mulihenye, ke me e ne ce acehin celi wâé, me de Padué.

⁵Be é ânebun, he genye mwo te mulie cehi nina nimenye kon na ta, ke ni patén, ke e pwo me piubwo da ni bwo niimihinaado na ta ne he ni éénye. Ke é mu ko anaa, na genye o mele.

⁶Kehe icehi ana é jenaa, [ke wo Padué] ke e caa tuwokenye koja ni patén na e pwocuhinaado tenye. Ke genye caa pipwoeabwé te Padué, ne ha a bwomunen na mwo coho. Be genye piténede a *Jenen litihi, kehe time uce ni *patén de Moosé.

Nye âde a ta na e konye

⁷Kona nye pii pie, ni patén, ke ta? Ûhu! Be te é mu ko ni patén, na é temehi ana ta. Be mepie tice patén, ke time uce jan me é temehi pie, ni bwo niimihinaado tong, ke ta.

⁸[É o cihe ko a Ta, pwohewiin heme pace céiu apulie]: A Ta, ke e hane kong ace bwopwonen, ne ko ni patén, beme e pamulipihati ni muko pétaapwo naado na ta, na nimung kon. Ke e ne ha a pwonimung, ni bwo niimihinaado na ta. Be mepie tice patén, ke te tice junuu a Ta.

⁹É he mwo te tice patén, ke é te mulie. Kehe me e âbé ni patén, ke a Ta na e mulie kong,

¹⁰ke e pébé a mele. [Geé alihí pie] e ne a patén den [wo Padué] beme é mulie kon, kehe icehi ana a patén naa, ke e pwo me é mele.

¹¹Be a Ta, ke e pé a patén, beme e patiedeniéo, ke e pwo me é mele.

¹²Mepwo é ne ko ni patén, ke a naado na iitihi, [be e âbé mu ko Padué]. Ke ni cuwo nahi huô, na e mu he ni patén, ke mwomwon, ke wâé me denye.

¹³Kona a naado na wâé, ke e o pwo me é mele? Úhu, time uce wonaa. Be e pé ana wâé na a Ta, beme e pwo me é mele. Ke, me e pwo anaa, ke e habwii pie, te junihe ta nang. [Mepwo é ne ko a huô, ke e paciitihí konye, me nye nemwo pwo ana ta.] Ke a Ta, ke e pé a huô, beme nye junihe pwo ana ta, kojan ânebun!

A pa na junihe pwo niihen

¹⁴Genye caa te temehi ehi pie, e âbé mu ko Padué ne ni patén. Kehe icehi ana woéo, ke pa apulie na tice niihung. Ke é caa â *apenem tice ja kon de a Ta.

¹⁵⁻¹⁶Ke time é uce temehi ehi aceli é pwo. Be time é uce pwo ana nimung kon, kehe é pwo ana time uce nimung me é pwo. Ke é mulang, he na é bwo temehi pie, ni patén, ke a naado na wâé.

¹⁷Be time uce woéo na é pwo anaa, kehe a Ta na e kong.

¹⁸É te temehi pie, time e uce mu kong a wâé, mu ko ana woéo, ke pa apulie na tice niihung. Be é heme nimung me é pwo ana wâé, ke pwocoon.

¹⁹⁻²⁰Éa, time é uce pwo ana wâé na nimung kon. Kehe é pwo ana ta, na time uce nimung kon. Ke me wonaa, ke [pwohewiin heme] time uce woéo na é pwo anaa, kehe a Ta na e kong.

Woo na e celuimiéo?

²¹É te temehi pie, pwo a 'patén' [na e kong]. Weengi: Me nimung me é pwo ana wâé, ke time uce jan. Ke é te cuwo ko pwo ana ta.

²²Geé alihí pie, é ne ha a ju pwonimung, ke wâé tong a patén de Padué.

²³Kehe icehi ana pwo a céiu 'patén' na e ha a ééng: a patén ko a Ta. Ke lu pipwopa me ana nimung kon. Ke a patén naa, ke pwohewiin heme e péeo, me e neéo he karépu.

²⁴Au, mwolihi! O woo celi e o celuimiéo koja a pwonimung na ta, na e o péeo nge ha amele?

²⁵Te icehi Padué na e pwaadeniin bé wo Padaame Iésu Kériso! Wâé heme nye picedieng!

[Weengi a bwopiine ana é pii]: Nimung me é piténedehi a patén de Padué, kehe icehi ana tice niihung, ke é tee piténedehi a patén ko a Ta.

Roma 8

E tuwokenye koja a ta wo Padué

¹Nina lé mu ko Kériso lésu, ke te tice tautinaado, ke cuhinaado telé.

²Be, me woéo ko Kériso lésu, ke e ne tong a mulip na a *Jenen litih. Ke e caa â patén dong na mwo coho, ke e tuwoéo koja a patén na e péeo nge ha a Ta, ke a mele.

³Mepwo ni *patén de Moosé, ke pwocoon me e tuwokenye, be tice niihen [me e pitaatééhi ni pwonimenye na ta]. Kehe icehi ana e caa tuwokenye wo Padué. Be e caa nebé pa Naîn beme pa apulie pwohewiikenye, wogenye nina ta genye, beme e tuwokenye koja a Ta. Ke e caa pwo me tieden a Ta naa, na e pihuôhi a éé apulie,

⁴beme nye mulie cehi a patén den na mwomwon. Be caa time nye uce mulie cehi nina nimenye kon na ta, kehe genye mulie ko a Jenen litih.

⁵⁻⁶Be wo lépwona lé âcehi nina nimelé kon na ta, ke lé te piténedehi ni naado naa. Ke lé â benihi a mele. Kehe wo lépwona lé âcehi a Jenen litih, ke lé te piténedeeng. Ke pwo ne telé *a ju mulip me a péém.

⁷⁻⁸Heme nye âcehi nina nimenye kon na ta, ke o te pwocoon me nye piténedehi ni patén de Padué, ke pwocoon me wâé genye ne he pwahamiin. Ke genye âdeeng, me lépwona lé téétieng.

Nye âcehi a Jenen litih

⁹Kehe icehi ana wogewé, ke caa time geé uce âcehi ni bwo niimihinaado tewé naa. Be geé caa piténedehi a Jenen litih te Padué, na caa e kowé. Wo pa apulie na time uce e kon a Jenen litih te Kériso, ke time uce pa apulie te Kériso.

¹⁰Kehe icehi ana wogewé, ke e kowé wo Kériso. Ke me e bo mele a éewé watihen a Ta, ke a juuju mwo pie, [wo Padué, ke e pwo me pwohewiin heme time geé mu uce pwo celi ta, beme] wogewé ni apulie na mwomwon gewé ne he pwahamiin. Ke e pwo me geé mulie na a Jenen litih ten.

¹¹Éa, e bo mele a éewé, kehe icehi ana heme e kowé a Jenen litih, ke e bo pamulipikewé wo Padué, pwohewii a bwo pamulipi Kériso lésu mu ha amele.

E pwo me wogenye ni naî Padué

¹²É mu ko anaa, wogewé lépwo békéng ne he nii Kériso, be pwohewiin heme pwo kérédi tenye. Be [heme nye mulie ha a Jenen litih] ke time genye uce mulie cehi nina nimenye kon na ta.

¹³Be, me geé mulie cehi ninaa, ke geé o mele [dieli mwo]. Kehe icehi ana hemepie geé pwo me e mele ni bwo niimihinaado naa, mu ko a Jenen litih, ke e o mu kowé a ju mulip.

¹⁴Be wo lépwona lé mulie cehi a Jenen litih te Padué, ke lépwo naî Padué.

¹⁵ Ke, me nye hegi a Jenen litihi, ke time e uce ciekenye me e pwo me mwotikenye. Kehe e pwo me wogenye ni naî Padué. Ke e picani tenye me nye toii da céii Padué, me pii ten pie: «Pa Caa tong!»

¹⁶ Ke e *pajuujuhi ne te a jenenye na a Jenen litihi pie, wogenye ni naî Padué.

¹⁷ Ke me genye naî Padué, ke genye o hegi a *adéihi na e caa pii ânebun pie, e bo ne te a bele ten. Ke genye bo tai hegi me Kériso. Be, me nye mu he ni picani pwohewieng, ke genye hegi mwo *a wâé pwohewieng.

A adéihi tenye na mwo e lang

¹⁸ É niimihi pie, ni picani tenye jenaa, ke te junihe wahin koja a wâé na ubwo na e bo ne tenye wo Padué.

¹⁹ Be ati ni naado na e caa tabuhi [wo Padué] ke lé ucéihi ha a picani ace benaamwon celi e bo habwii a bwo ubwo na a wâé te ni naîn wo Padué.

²⁰⁻²¹ Be ati nina e tabuhi wo Padué, ke pwocoon me lé pwo me junihe wâé, be élé ha apwohi. Kehe lé ucéihi a tan na e bo tai tuwolé hen, mu he ni penem tice ja kon, na e pwo me nyaale ke tépu jélé. Ke lé bo tai mu ha a wâé te Padué me ni naîn.

²² Ke genye tai temehi pie, ati ni naado, ke lé cewé ko ni bwo picani telé, pwohewii ê toomwo na e piâbeeble ewa.

²³ Ke wogenye mwo, ni naî Padué, ke genye ko cewé he ni pwonimenye, ucéihi a benaamwon na e bobe tuwokenye wo Padué. Ke genye bo pimu ibu me weeng, dieli mwo. Kehe é jenaa, ke e caa ne tenye a Jenen litihi, na a bécieuhe âpipati na e caa pii ânebun wo Padué pie, me e bo ne tenye.

²⁴ Be e caa celuimikenye, beme nye o hegi ati ni adéihi naa, na nye mwo ko ucéihi. Ke é heme nye caa alihana genye mwomwohi, ke a céhi tenye, ke time uce a ju céhi. Be time genye uce *ucéihi ne ha a céhi ana caa etenye.

²⁵ Kehe me genye céhi ne ko ana time genye uce alihana, ke genye cumang ne ha a bwo piuca tenye.

E picani tenye a Jenen litihi

²⁶ A céiu mwo, ke e âbé picani tenye na a Jenen litihi, wogenye nina pitice niihenye [ke wahin ni céhi tenye]. Be time genye uce temehi ehi ace bwo pwoiitihi. Kehe e cewé ko pwoiitihi me denye na a Jenen litihi. Ke a pwopwoiitihi ten, ke piwéden ati koja ni pwooti tenye.

²⁷ Be wo Padué, ke e te alihana e he pwonime pa apulie, ke e te temehi ana nime a Jenen litihi me e ilehi. Be a Jenen litihi, ke e pwoiitihi cehi ana te nime Padué kon, me de ni apulie ten.

²⁸ Be genye temehi mwo pie: Ati ni naado ke lé tuie, beme bêwâé genye, wogenye nina eânimyenye te Padué, wogenye na e totekenye âcehi *a bwo niimihinaado ten.

²⁹Be e caa mi pipégalikenye ânebun. Ke e caa mi pihuôhi ânebun pie, me genye pwohewii pa Naîn, pa cuwo lèpwo âjienen na hiwon jélé.

³⁰Be woélé na e te mi pipégalilé ânebun wo Padué, ke e caa te todelé mwo. Ke woélé na e caa todelé, ke e pwo me lé *mwomwon ne he pwahamiin. Ke e bo pwo me lé mu pelen, ne ha a bwo ubwo na a wâé ten.

Te tice aceli e pipapiidenikenye koja a pipwoééhe te Padué

³¹He ade aceli genye o pii celi piwéden? Heme caa wogenye ibu me Padué, ke woo celi e o pwobwonikenye [me piwéden kojakenye]? Te tice!

³²Be e caa te pawie pa ju Naîn [me e *âpwailo] me denye ati, ke time e uce celuimieng koja ni picani. Ke heme wonaa, ke kona woilu me pa Naîn, ke time lu uce ne tenye me piticenaado ne kon ati ni naado? Uhuu!

³³Ke kona o woo celi e o pipé ne ko nina e caa pipégalilé wo Padué? Te tice! Be te wo Padué, na e pwo me lé mwomwon ne he pwahamiin.

³⁴Ke o woo celi e o tautilé me pwocuhinaado telé? Te tice! Be e caa mele me delé wo Kériso lésu. Ke a céiu mwo: Ke e caa mulie cemwo mu ha amele, ke caa e *pwo a jui Padué, [beme e pihuôhi ati ni naado] ke e pwoitihi me denye.

³⁵Ke o ade mwo celi e o papiidenikenye koja a pipwoééhe te Kériso? Te tice! Time uce ni picani me téé, me ni bwo pineképé tenye, me ni bwo pwotahinaado ne konye, me a menele, me ni bwo tice naamuunye, [me ni cunu] me ati nina abwobwo. Ke time uce a mele mwo, celi o jan me e pineitéékenye koja a pipwoééhe te Kériso.

³⁶Be caa te tii ne he ni tii iithi pie: *Wonaa mu kom, me lé pwohuu teme, ke lé taunikeme ati he ni tan. Lé pwo me piticenaado ne kome, pwohewii ni muto na lé péélé nge ha a mwotaunuhi wota.* Psaume 44.23

³⁷Kehe icehi ana é ati ne he nina e tuie ne kome, ke geme te junihe piwéden, watihen wo pana e caa pipwoééheme.

³⁸⁻³⁹Be é te céhi pie, te tice aceli jan me e pineitéékenye koja a pipwoééhe na e habwii tenye wo Padué, ne ko Kériso lésu, Padaame henye: Time uce a mele, time uce a mulip, time uce ni *âcélo, time uce ni duéé, heme é jenaa, heme é meé, heme ni pipwojunuun, heme é jeda, heme é jeoté, heme ati ni naado na e tabuhi, ke te tice aceli jan me e pineitéékenye koja a pipwoééhe te Padué!

Roma 9

**a bele isaraéla me ni béeé bele
(Pwahamii tii: 9—12)**
E é niimi ni béén wo Paulo

¹É pacihekewé jenaa, ha a ju pwonimung, ke a juuju ana é pii, kehe time é uce gele. Be te céiu gemu me Kériso, ke e pihuôhi a *pwonimung na a *Jenen litih. Ke weeng na e *pajuujuhi nina é pii tewé:

²É jenaa, ke te junihe piwahin jo, ke téé a pwonimung

³ko ni âjiénung juif, a bele *Isaraéla. Be hemepie jan me é picani telé [me celuimilé] ke wiel me e o piapwoéo wo Padué, ke me e neitééo koja Kériso.

⁴Be e te pipégalilé wo Padué, beme a bele ten, ke me lé naîn. Ke e caa te habwii telé a bwo ubwo na a wâé ten. Ke e *piapwo ne telé, ke e ne telé ni patén. Ke e ne telé mwo a pihuô, beme lé pwoiitihi ten [ha a juuju]. Ke e ne telé a *adéihi na e caa te mi pii telé ânebun.

⁵Be ni watihelé, ke ni apulie na pwonaado ne kolé ne he pwahamiin. Ke e wie mu kolé wo Kériso, beme pa apulie pwohewiikenye. Wâé heme nye tai pipaunu Padué dieli mwo, na e daaité koja ati ni naado!

Lépwo ju naî Padué

⁶Heme wonaa, ke kona genye o niimihi pie, time e o uce pacuwohi nina e pii ânebun wo Padué? Uhuu! E caa te pacuwohi, be a ju bele te Padué, ke te junihe ubwo koja a bele Isaraéla.

⁷A céiu mwo, ke time uce wo lépwona lé tai wie mu ko *Abérama, na tai lépwo ju naîn. Be e pii te Abérama pie: *Wo lépwo piebehiko, li é piilé, ke lé o bo pituie mu ko pa naîm Isaaka. Genèse 21.12*

⁸[Kehe te pwo mwo ni bée naî Abérama.] A bwopiinen pie, ni ju naî Padué, ke time uce nina lé tuie mu ko aceli nime pa apulie kon, kehe wo lépwona lé tuie mu ko a bwopiinen ânebun de Padué.

⁹Ke weengi ana e pii wo Padué, te Abérama [he li e piapwo ne ten]: *É heme é bo âmwobé he na céiu jo, ha a benaamwon ce, ke wo Sara, ê mwodem, ke e bo picile pa cuwo nahi aiu. Genèse 18.10*

¹⁰[Ke e te cuwo, pwohewii a bwopiinen den. Ke mepwo é ne ko pa ewa aiu naa] ke wo Isaaka, pa watihe lépwo *Juif. Ke é alechen, ke lu piaten me Rébéka, ke e picile lupwo naîn wo Rébéka.

¹¹⁻¹³Ke e pii ten wo Padué pie, wo pa cuwon Ésaü, ke e bo pipwoeabwé te pa ciéén, Iakobo. Be caa te tii ne he ni tii iitihi pie: *É piwâé Iakobo koja Ésaü. Malachie 1.2-3* E te mi pii anaa, he mwo te time lu uce tuie wo lupwo péidu. Ke mwo te tice ta me wâé celi lu pwo. Ke e wonaa ko a bwo pipégali nen den wo Padué, beme e pacuwohi a bwo niimihi nen den. Be e te pipégali ni apulie, kehe time uce é mu ko ce penem delé.

Te wo Padué cehi na e pipégali

¹⁴Kona genye pii pie, time e uce mwomwon wo Padué? Ûhu!

¹⁵Be e caa pii te *Moosé pie: *É o pipwoééhe paceli te nimung me é pipwoééhen, ke é o piwâé paceli te nimung me é piwâéeng. Exode 33.19*

¹⁶Be te wo Padué na e niimihi pie me e pwo ana wâé me denye. Kehe time uce é mu ko aceli te nimenye kon, me ce penem denye.

¹⁷Caa te tii ne he ni tii iitihi pie, e pii wo Padué te Faraô, pa daame ne *Aigupito, pie: *Woéo pana é pwo me go daame, beme é habwii a junuung ne kom, ke me lé o temehi a niing, ati pwo a bwohemwo.* Exode 9.16

¹⁸Be hemepie nime Padué, ke e o pipwoééhe ni béén, ai e o pwo me mwoiu ni puni ni béén.

E pwo ana nimen kon

¹⁹Wielo go o pii tong pie: “Hemepie wo Padué na e ne tenye me nye pwo ati ni huô tenye, ke kona é ko ade na e mwo cihe tenye mwo? Be time uce jan ne konye me genye pwo me mwoiu ni puninye ne kon!”

[Ke é hegi ne tem pie]: “Kona wogo ke woo, me go pwobwonieng?”

²⁰Ke kona a naado na pwo, ke he e te pii te pana e pwo, pie: “É ko ade na go pwo me woni jo?” Ûhu!

²¹Be wo pa apwo ila pule, ke e o te pwo aceli te nimen kon ko a pule ten. Ke mepie te nimen, ke e o te pwo ko a pule naa, ace tam celi junihe wâé, me ace tam celi penem kon ati he ni tan.

²²Wonaa ne mwo ko Padué. Be mepie nimen, ke te jan me e habwii a okéé ten, me a junuun, me e tanahi ni apulie na ta jélé. Kehe icehi ana e te junihe picani ne kolé.

²³Ke nimen mwo me e pipwoééhe ni béén, beme e patemehi telé a bwo ubwo na a wâé ten. Be e caa mi pipégalilé, beme lé hegi a wâé ten naa.

Time e uce tote lèpwo Juif cehi

²⁴Wogenye lèpwo apulie naa! Time e uce totekenye cehi mu ha awieme lèpwo Juif, be te é mu mwo ha awieme nina time uce ni Juif.

²⁵Be e pii ne kolé, ne ha a tii te péroféta Osé, pie: *A bele na time uce a bele tong, ke é o caa pii kolé jenaa ni, pie “a bele tong”.* Ke a bele na time é uce pipwoééhen, ke é o caa pipwoééhen. Osé 2.25

²⁶Ânebun, ke é pii telé pie: “*Time geé uce bele tong.*” Ke é pii kolé jenaa ni pie: “*Wogewé ni naî Padué na e mulip.*” Osé 2.1

²⁷Mepwo é ne ko lèpwo Juif, ke e toii da wo péroféta Isaia, pie: *Wo lèpwo Isaraéla, ke o bo hiwon jélé, pwohewii ni won jeoté ticepwon.* Kehe icehi ana o te ju a céiu duaan mu kolé na o *celuimi.

²⁸Be wo Padaame, ke e epin ko a bwo tauti na a bwohemwo ati. Ésaïe 10.22–23

²⁹Ke e te mi pii ânebun mwo wo Isaia, pie: *Wo Padué na te junihe pwojunuun ne ko ati ni naado, ke e te necu ni bée piebehikenye, beme lé mulie.* Be mepie time uce wonaa, ke o tai tiekenye, pwohewii lupwo pwomwo ubwo *Sodome me Gomore. Ésaïe 1.9

Time lè uce céhi wo lèpwo Juif

³⁰He ade ace bwopiine ati ninaa? Be genye alahi pie, wo lépwona time uce lépwo Juif, ke time lé uce hane Padué. Kehe icehi ana me lé caa â céhi ne kon, ke e pwo me lé *mwomwon ne he pwahamiin.

³¹Mepwo é ne ko lépwo apulie he a bele Isaraéla, ke lé hane ni patén, beme e pwo me lé mwomwon ne he pwahamii Padué. Kehe icehi ana time lé uce tooli.

³²Ke he é ko ade? Be lé hane me lé mwomwon, mu ko ni âpenem delé, kehe time uce é mu ko ace céhi telé [ne ko Padué]. Ke tacida mwodalé ne ko a péi na e pwo me nye tupwo.

³³Be caa te tii ne he ni tii iitihi a pwooti te Padué, ce: *Go téne ani, go pa puapulie!* É ne ha amu *Sion a péi na e pwo me lé tupwo ne ni apulie. Kehe wo pana e céhi ne kon ke time e o uce tupwo .Ésaïe 8.14; 28.16

Roma 10

¹Ni béeing acéhi, te junihe nimung me *celuimi lépwo *Juif, a bele tong. Weengaa a pwopwoiitihi tong ne te Padué.

²⁻³Be é temehi ehi pie, nimelé me lé âcéi Padué. Kehe icehi ana time lé uce temehi a pwaadeni Padué, beme lé *mwomwon ne he pwahamiin. Ke lé te â he ni pwaadeniilé, be lé piwâgo [beme lé piténedehi ni *patén de Moosé].

⁴Kehe icehi ana é jenaa ni, ke caa piticenaado ne ko ni patén, wonaa mu ko Kériso. Be wo lépwona lé céhi ne kon, ke wo Padué, ke e tai pwo me lé mwomwon ne he pwahamiin.

E celuimi ati lépwona lé todeeng

⁵Ânebun, ke a pwaaden me nye mwomwon ne he pwahamii Padué, ke me genye âcehi ni patén. Ke e pii ko ni patén wo Moosé, pie: *E ne a mulie te pana e piténedehi ati ni pihuô na e hen.* Lévitique 18.5

⁶Kehe icehi ana é jenaa ni, ke genye mwomwon ne he pwahamii Padué, mu ko a céhi tenye [ne ko Kériso]. Ke time genye o uce pitahimwokenye pie: “Woo celi e o taa he miiden?” beme e neopé céiikenye [paceli me e celuimikenye. Be e caa te opé] wo Kériso.

⁷Ke time genye o uce pitahimwokenye mwo pie. “O woo celi e o ole ha amele?” beme pamulipi mwo Kériso. Be e caa taamwo mu ha awieme ni amele.

⁸[Ke e pébé céiikenye a bwo celuimikenye.] Kehe wâé cehi heme nye céhi ne kon. Weengaa a pwooti na geme pipatemehi. Be e caa te pii mwo wo Moosé ne he ni tii iitihi pie: *E mu mwonuko a pwooti.* Be e mu pwom, ke e ha a pwonimem. Deutéronome 30.14

⁹Be, heme go pii beetihi ko a pwom pie, wo lésu Kériso, ke Padaame, ke heme go céhi ha a ju pwonimem pie, e pamulipieng mwo wo Padué mu ha amele, ke o celuimiko.

¹⁰Be hemepie go te junihe céhi ne kon, me pii beetieng, ke e o celuimiko wo Padué, ke e o pwo me go mwomwon ne he pwahamiin.

¹¹ Be caa te tii ne he ni tii iitihi pie: *Wo pana e céhi ne kon, ke time e o uce tupwo. Ésaïe 28.16*

¹² Ke [é ne ha a pwooti naa, ke] te tice pipuwohe lépwo Juif, me ni béén na time lé uce Juif. Be te céiu Padaame helé ati, na e ne a wâé ten, me de nina lé todeeng.

¹³ Be pwohewii ana caa tii mwo ne he ni tii iitihi pie: *O celuimi nina lé tote Padaame. Joël 3.5*

Pipatemehi a Pwooti Wâé

¹⁴ O woté ko ace bwo tote Padaame, hemepie time genye uce céhi ne kon? Ke o woté ko ace bwo céhi ne kon, hemepie time genye uce téne ce pwooti kon? Ke o woté ko ace bwo temehieng, hemepie te tice celi lé pipatemehieng?

¹⁵ Ke o woté ace bwo pipatemehieng, hemepie te tice paceli pahedeeng me e pii? Be caa te tii ne he ni tii iitihi pie: **Adéhi a bwo tuie te lépwona lé patemehi a péém, ke nina lé pipatemehi a Pwooti Wâé. Ésaïe 52.7*

¹⁶ Ke time uce woélé ati [lépwo Juif] na lé piténédehi a Pwooti Wâé. Be e pii wo péroféta Isaia, pie: *Padaame, he woo paceli e céhi ne ko ni pwooti teme? Ésaïe 53.1*

¹⁷ A céhi, ke e âbé mu ko ana genye téne; ke ana genye téne, ke e âbé mu ko a pwooti ko Kériso heme lé pipatemehi.

¹⁸ Ke mepwo é ne mwo ko lépwo Juif, ke kona time lé uce téne a pwooti naa? Uhuu. Be caa te tii ne he ni tii iitihi pie: *Caa te pipatemehi ne pwo a bwohemwo ati. E â die ha a pwonehi a bwohemwo ne ni pwooti ten. Psaume 19.5*

¹⁹ Ai, kona time lé uce temehi a pwooti? Uhuu! Be e caa te mi pii ânebun wo Padué, na e pwaadeniin bé wo Moosé, pie: *É o pwo me geé pitaaba ne ko ana time uce a ju bele. É bo pwo me geé okéé ne ko a bele na time uce pitemang. Deutéronome 32.21*

²⁰ Ke time uce piwâ Isaia me e pii a pwooti ce, na e âbé mu pele Padué, pie: *Nina time lé uce haneéo, ke lé caa tooéo. Ke nina time lé uce toteéo, ke é caa pihabwiéo telé. Ésaïe 65.1*

²¹ Ke e pii mwo ne ko lépwo *Isaraéla wo Padué pie: *É cine ngen ni ing céii a bele naa, he ni tan ati.*

[*Kehe time lé uce âbé céiiéo.*] Be te junihe mwoiu ni punilé. Ke time lé uce piténédeéo. *Ésaïe 65.2*

Roma 11

Time e uce jéin ne ko lépwo Juif

¹ Me nye pii pie woté? Kona e te jéin wo Padué ne ko a bele ten, [wo l épwo *Juif]? Úhu! Be woéo ke pa Juif, pa piebehi *Abérama, mu ha a pwomwoiu te *Benjamin.

² Úhu, time e uce jéin ne ko a bele ten wo Padué, be e caa te mi pipégalilé ânebun. Be geé caa te temehi ehi, ana e pii wo péroféta *Élia ne ko panaa. Be genye caa pine ne he ni tii iitihi pie, e pitéteiminaado te Padué wo Élia, ne ko a bele *Isaraéla.

³ Ke e pii pie: *Au, Padaame! Lé caa taunu l épwo péroféta tem. Ke lé tanahi ni *apwoâpwailo tem. Ke te woéo cehi na é mu. Ke nimelé mwo, me lé taunuéo.* 1 Rois 19.10

⁴ Ke ade aceli e hegi ne ten kon wo Padué? E pii ten pie: *Uhuu, l é mwo te mu nina 7000 apulie tong, na time lé uce tidih jililé he pwahamii pa duéé, Baal.* 1 Rois 19.18

⁵ Ke te piwien jenaa. Be te pwo a nehi a bele Isaraéla na e pipégalieng wo Padué, beme e den, ha a *pipwoééhe tice ja kon den.

⁶ Ke time e uce pipégalilé mu ko ace huô telé. Be mepie wonaa, ke wiel i a pipwoééhe ten, ke time uce a pipwoééhe na e ne me piticenaado ne kon.

⁷ A bwopiinen pie woté anaa? Wo l épwo Juif, ke lé hane [a péém delé me Padué] kehe icehi ana time lé uce tooeng na a ubwo kolé, be mwoiu ni punilé; kehe te icehi nina e pipégalilé wo Padué.

⁸ Be caa te tii ne he ni tii iitihi pie: *E pwo me l é pule wo Padué, beme tice celi l é temehi. Ke e pwo me l é bwi ke me bwéjé jélé dieli jenaa.* Deutéronome 29.3; Ésaïe 29.10

⁹ E pii mwo wo pa daame *Davita [te Padué] pie: *Go ne cuhinaado te nina ta jélé. Lé piwiinaado me údu. Ke o wâé heme bitehi ati ninaa, beme o a pwojé ne ha a pwaaden, beme l é tupwo ne hen.*

¹⁰ *Go pwo me bwi jélé, beme tice celi l é alih!*

[*Go ne telé ni picani me ni téé] celi me time o uce pé kojalé. Ke me cii ni jélé!*] Psaume 69.23-24

Tehi ne te ni béé bele

¹¹ É tahimwohi pie: He l é tupwo dieli mwo wo l épwo Juif? Úhu. [Mwo te ju wonaa ha a cuwo céiu benaamwon]. Ke é mu ko anaa, na *celuimi ni béé bele, ke e â pitaaba a bele Isaraéla.

¹² Be, me time l é piténede Padué wo l épwo Juif, ke [time l é uce hegi ati ni adéihi ten. Ke] é mu ko anaa, ke e te junihe *adéi nina time uce ni Juif éni pwo bwohemwo. Kehe icehi ana l é bo te tai cuwoda mwo wo l épwo Juif. Ke é ha a tan naa, ke o te junihe ubwo a adéihi [me denye ati].

¹³Mepwo é ne kowé, wogewé na time geé uce Juif, ke [e pahedeéo ngen wo Padué, beme] é *apostolo tewé. Ke a penem naa, ke te junihe wâé tong.

¹⁴Ke me é ko wonaa, ke lé o pitaaba wo lèpwo âjiénung, lèpwo Juif, beme o celuimi ce béen mu kolé.

¹⁵É he e jéin ne kolé wo Padué, ke e ne a péém ne ha awieme ni bée bele, éni pwo bwohemwo, me weeng. Kehe e bo te hegi mwo lèpwo Juif, ke é ha a tan naa, ke lé o pwohewii ni amele na lé mulie cemwo!

Neko gaale ko a bele ten

¹⁶[Hemepie lé apulie te Padué wo lèpwo watihe lèpwo Juif, ke te piwien ne mwo ko ni piebehilé.] Be mepie a bécieuhe mepwoloa, ke me a de Padué, ke a pwoloa ati, ke te a de Padué. Ke te pwohewii mwo a acuwo. Be mepie ni waan, ke ni de Padué, ke ni dihen, ke te ni den mwo.

¹⁷Be a bele Isaraéla, ke pwohewii a céiu acuwo, na pwopweehi kon, ne ha apwoamu te Padué. Ke e caa tahagéi ni bée dihen. Ke wogo, pana time uce pa Juif, ke go pwohewii a dihe acuwo na te ité. Ke e paatiko ne ko a acuwo na pwopweehi kon. Ke me wonaa, ke wogo mwo, ke go ûdu a duhi a acuwo naa. Ke pwo a cemem, mu ha adéihi te Padué, na e pii ânebun, he li e *piapwo ne te Abérama.

¹⁸Ke go nemwo pipii dem! Go nemwo niimihi pie, wâé go koja a dihe acuwo na tahagéi. Be time uce wogo na go pé ni waan, kehe ni waan na lé pééko!

¹⁹⁻²¹A juuju pie, e tahagéi ni bée, be time lé uce céihi. Ke wogo, ke e paatiko ne ko ali acuwo, mu ko ana go céihi. Ke wieli go bo pii pie: "E caa tahagéi ali dihen, beme woéo, ke me paatiéo ne ko ali acuwo." Kehe icehi ana go pipwocile! Be mepie e tahagéi a ju dihen, ke wieli e o pipwohewiin ne mwo kom. É mu ko anaa, na é pii pie, go nemwo pipii dem!

²²Go alih: Wo Padué ke te wâé nang ne konye. Kehe icehi ana e tauti mwoiuhi nina time lé piténedeeng. Ke wâé nang ne kom, heme go te cuwo ko pwo ana nimen kon. Ke mepie time uce wonaa, ke e o tahagéiko mu ko ali acuwo.

²³Wieli lé o bo mwojuia mwo wo lèpwo Juif, me lé céihi ne ko Padué. Ke mepie wonaa, ke pwo a junuun me e paatilé mwo ne ko a acuwo.

²⁴Be he li e paatiko, wogo pa dihe a acuwo na te ité go, ne ko a acuwo na pwopweehi kon, ke time uce a naado na me pwo. Ke mepwo é ne ko lèpwo Juif, ke te lèpwo ju dihe a acuwo. Ke te ju ticecoon ne ko Padué, me e paatilé mwo ne ko a acuwo.

E bo celuimi a bele Isaraéla

²⁵Éa, lèpwo béeing ne he nii Kériso, geé nemwo pipii dewé! Be te junihe hiwon ni naado na time geé uce temehi. Ke nimung me geé temehi nina e bo tuie ne ko lèpwo Juif, ni naado na e ha aduwo ânebun. Weengi: Hemepie muhi te ce béeen me lé céihi, kehe icehi ana o time lé uce cuwo ko wonaa. Be âcehi *a bwo

niimihinaado te Padué, ke lé o âbé céiieng ni béen na time lé uce Juif. Ke me lé tai âmwobé céii Padué, ke lé o tabuhi céihi mwo wo lépwo ju Juif.

²⁶Ke, é ha a benaamwon naa, ke o celuimi a bele Isaraéla. Be caa te tii ne he ni tii iitihi [a pwooti te Padué ce] pie: *E bo âbé mu *Sion wo pana e bo celuimikenye, beme e tuwo ni piebehi lakobo* .

²⁷ *Be é piapwo ne telé pie, é bo pétaabwon ni ta pwo telé.* Ésaïe 59.20; 27.9

²⁸A juuju pie, hiwon lépwo Juif na muhi telé ko a Pwooti Wâé. Ke é mu ko anaa, ke lé pwobwoni Padué. Ke anaa, ke o wâé me dewé, wogewé na time geé uce Juif. Kehe icehi ana e caa pipégali lépwo Juif wo Padué, beme a bele ten, ke e *piapwo ne te ni watihelé, be te junihe eânimén delé.

²⁹Ke time e o uce pé mwo ana e caa ne. Ke time e o uce jéin ne ko lépwona e caa todelé.

³⁰⁻³¹Ânebun, ke wogewé [na time geé uce Juif] ke time uce nimewé ko Padué. He muhi te lépwo Juif me lé hegi ni adéihi ten, ke e uce ne tewé. Kehe icehi ana [é ha ace céiu tan] ke e bo te ne telé mwo ni adéihi ten.

³²Ke e caa te pwo me wonaa, beme e habwii tenye ati a pipwoééhe ten.

Junihe ubwo a pipwoééhe te Padué

³³Te junihe ubwo Padué! Ke te junihe ubwo a pipwoééhe ten, me ni naado na wâé na e pwo! Te junihe e daaité kojakenye, ke e bwolu ni bwo temehinaado, me ni bwo niimihinaado ten! Woo celi e temehi ni pihuô ten? Ke woo celi e temehi ce bwo penem den?

³⁴Be caa te tii ne he ni tii iitihi pie: *Woo celi e temehi a bwo niimihinaado te Padaame? Woo paceli me e pacémunieng?* Ésaïe 40.13

³⁵ *Woo celi e ne ten ce naado, beme e ujen ne ten wo Padué?* Job 41.3

³⁶Be ati ni naado, ke e te tai âbé mu kon. Be te weeng na e pwo ati ni naado, me den. E pelen *a wâé dieli mwo. Amen!

Roma 12

a cémun ko a mulihenye

(*Pwahamii tii: 12.1—15.13*)

A âpwailo na mulip

¹Ni bééng ne he nii Kériso, e te junihe pipwoééhenye wo Padué, ke e pwo nina wâé me denye. É mu ko anaa, ke é ilekewé, ha a ju pwonimung pie, geé pinekewé ati ne ten, beme geé pwohewii a *âpwailo na mulip na te junihe wâé ten. Ke weengaa kuti a ju pwopwoiitihi, na wâé me geé ne ten.

²Geé nemwo pipwohewii ni apulie pwo bwohemwo. Kehe geé pinekewé te Padué, beme e taatééhi ni pwonimewé [me ni bwo niimihinaado tewé, me ni bwomu tewé]. Be me wonaa, ke geé o temehi, ke geé o pwo ana te nimen kon, na juuju, ke wâé, ke hején.

Pétaapwo ne tenye ni pétaapwo âpipati

³ Mepwo é ne kong, ke e te ju ne tong, me tice cuhi, ni wâé ten wo Padué [he e pipégaliéo me é *apostolo ten. É mu ko anaa, na o jan me] é pii pie: Go nemwo niimihi pie, pipwonaado ne kom. Úhu, go pwo me piwahin go, ke go pininim ehi. Ke go piomeko ehi, ne ha a céhi na e ne tem wo Padué.

⁴ Be, hiwon ni piduaan ne ha a éénye. Ke te muko pétaapwo pi-ité ni penem délé.

⁵ Ke wonaa ne konye, wogenye na hiwon genye. Be céiu a éénye, ke céiu genye me Kériso, ke te muko pétaanye [ni penem denye].

⁶ Be e te muko ne tenye ni muko pétaapwo âpipati wo Padué [beme nye pipwoeabwé ten]. Ke wonaa, he e ne tem a penem ko péroféta, ke wâé heme wogo pa apipépwooti ten, âcehi a ja ko a céhi tem.

⁷ Ke me e ne tem me go picani te ni béén, ke wâé heme go picani telé. Ke me e ne tem me go pwocémun, ke go pwocémun.

⁸ Ke me wogo pa apamwoiu ne ni béén, ke go pamwoiulé. Ke me wogo pa âpipati, ke go ne, ke go nemwo pine jahi. Ke me wogo pa apipé bele, ke go pwo ha a ju pwonimem. Ke me wogo pa apwo na wâé me de ni béén, ke me go picani telé, ke go pwo ha a pipwodéén.

A cémun ko a mulihe pa acéhi

⁹ Mepwo é ne ko a pipwoéhé tewé, ke wâé heme a ju pipwoéhé. [Geé nemwo gahe pwo.] Kehe wâé heme geé téétihi me mwiihi ati nina ta, ke geé mu ko ana wâé.

¹⁰ Ke geé pipwoéhéhewé he ni ju pwonimewé, be wogewé lépwo âjién ne he nii Kériso. Ke geé nihe pipaciitikewé.

¹¹ Geé pipwoeabwé te Padaame, ke geé nemwo pwoemaan. Kehe geé te ûmiê, ke geé penem me den, ati he ni niihewé me ni pwonimewé.

¹² Geé pipwodéén he ni céhi tewé [ne ko ni *adéihi na e bo ne tewé wo Padué]. Ke mepie e tookewé ni picani, ke geé te cumang ne ha a piuca, ke geé te cuwo ko pwoitihi.

¹³ Ke mepie ni acéhi béewé, ke me tice telé ce bée naado, ke geé ne telé. Ke geé hegi ehi nina lé âbé céikewé.

¹⁴ Mepwo é ne ko nina lé pwotahi ne kowé, ke geé ile Padué pie, me e adéilé. Éa, geé ilehi a adéihi ten, ke geé nemwo piapwolé.

¹⁵ Geé pipwodéén me nina lé pipwodéén, ke geé é me nina lé é.

¹⁶ Wâé heme céiu gewé. Geé pwo me piwahin gewé, ke geé pwo ni penem na time uce nime lépwo béén me lé pwo. Geé nemwo pwo me piubwo gewé, ke geé nemwo niimihi pie geé nihe temehinaado.

A huô tenye ne pele ni apulie ati

17-19 Hemepie jan, ke geé hane me geé mulie ha a péém, me woélé ati. Ke geé hane me geé pwo ana wâé, ne he pwahamii ni apulie ati. Lépwo ju béeng, heme lé pwo tewé celi ta, ke geé nemwo pamwojuiéhi ne telé mwo. Kehe geé ne te Padué ninaa, be weeng, na e bo tauti, me pwocuhinaado telé ne ha a okéé ten. Be e pii wo Padaame, ne he ni tii iitihi pie: *Te woéo cehi, na é bo uje [ne te nina lé pwo nina ta]. Ke te woéo cehi, na é bo te muko ne telé ce cemelé ko ni huô telé.* Deutéronome 32.35

20 Ke caa te tii mwo, ne he ni tii iitihi pie: *Hemepie mene paceli pita geu, ke go ne celi e wii. Ke mepie nimen me e ûdu, ke go ne ace ûden!* Ke a tanim kon ke o pwohewii ace daapi celi éle ne pwo punin. Proverbes 25.21-22

21 Ke geé nemwo pwo me piwéden a ta. Kehe wâé hemepie geé pwo me e piwéden koja a ta, ana wâé.

Roma 13

Piténede lépwo apihuô ha amu

1 Geé piténede lépwo apihuô ha amu. Be mepie lé pihuô, kehe te wo Padué na e nelé. Be te tice apihuô, hemepie time e uce ne ace mwomwon den wo Padué.

2 Wo pana muhi ten me e piténedehi ni apihuô, ke e pwobwonihi ana e pwo wo Padué, ke e bo hegi a cuhinaado ten.

3 Me nye pwo ana wâé, ke time o uce mwotikenye ko lépwona lé pihuô tenye. Kehe o mwotikenye kolé heme nye pwo ana ta. Anaa kuti na me go pwo ana wâé, beme wâé telé go.

4 Be wo lépwo apihuô, ke te pwohewii lépwo eabwé te Padué na me lé picani tem beme go pwo ana wâé. Kehe me go pwo ana ta, ke wâé heme mwotiko, be pwo a mwomwon delé me lé pwocuhinaado tem. Be weengaa mwo a penem na e ne telé wo Padué, beme e habwii a okéé ten ne ko lépwona lé pwo nina ta.

5 Ke é mu ko anaa, na wâé heme go piténedehi, beme time e o uce okéé ne kom wo Padué, ke me go piténedehi mwo a *pwocihe na e âbé mu ha a pwonimem.

6 Wâé mwo, heme go ne a mwani *cuhi puni apulie. Be wo lépwona lé tai mwani, ke wo Padué na e ne telé a penem naa.

7 Ke go ne te ni béen ana me go te uje ne telé. Hemepie a cuhi puni apulie, ke go pwocuhin. Ke mepie a piténedehi, ke go piténedehi. Ke mepie a pipwoiipihi, ke go pwoiipihi.

A pipwoééhe ke a patén denye

8 Hemepie pwo ce kérédi tem, ke wâé heme go piepin ko pwocuhin. Kehe icehi ana te pwo a céiu naado, na time uce jan me go pwocuhin ati, ke a pipwoééhe!

Be wâé heme go te cuwo ko pipwoééhe ni béén. Ke me go wonaa, ke go te piténédehi ehi ni patén.

⁹Hiwon ni pihuô ne he ni patén. [Woélé ni béén]: Go nemwo pibune; Go nemwo taunuhi apulie; Go nemwo bune ; Go nemwo pwo me ânenimem ko ni naamuu ni béén. Exode 20.13-17 Ke ni âne ati ni huô ce, ne pehi ni béén, ke caa e ibu ne ha a pwooti ce, pie: Go pwo me eânimem de ni béén , pwohewii a bwo pieânimem dem. Lévitique 19.18

¹⁰Be mepie genye pipwoééhe pace céiu, ke caa te junihe pwocoon me nye pwo ten aceli ta! Be, me nye pipwoééhen, ke genye piténédehi ati ni patén.

Mulie ne ha a pwéélang

¹¹Geé ûmiê [ke geé mulie ha ana é ko pii tewé]. Geé temehi ehi a benaamwon na genye ko mulie hen. Be caa e mwonuskenye a tan na e bwobe celuimikenye hen wo Padué. Ânebun, he genye mi céhi ne ko Kériso, ke mwo te e ité a tan naa. Kehe é jenaa ni, ke e teko piâbé mwonuskenye.

¹²Be e caa âdé a bwén, ke e o caa taawie a téale. Ke me wonaa, ke wâé heme nye pétaabwon ni huô na ta, na nye pwo heme bwén. Ke genye pé ni naamuu pa, me nye pwopa ha a pwéélang.

¹³Wâé heme geé mulie ha a mulie na mwomwon, ke wâé, ne ha a pwéélang. Geé nemwo junihe údu me wiinaado; ke geé nemwo pipule hauli me ni béén; ke geé nemwo pipwokon me piokéé.

¹⁴Kehe wâé heme céiu gewé me Padaame lésu Kériso, me pwohewii a epwén toki na e kowé. Ke geé nemwo âcehi nina nimewé kon na ta.

Roma 14

Nye pipwoééhe @ nina mwo wahin ni céhi telé Nemwo tautilé

¹Go hegi ati nina mwo time uce mang ehi ni céhi telé, ke go nemwo tautilé me pipiilé.

²Be wogo, ke wiel i te wâé tem ati ni wiinaado. Kehe icehi ana wo pana mwo time uce mang a céhi ten, ke wiel i time e uce wii mewota.

³Ke go nemwo pipiitaeng. Ke wo panaa mwo, ke e nemwo tautiko mwo. Be e te tai hegikeu wo Padué.

⁴He wogo ke woo, me go tauti pa eabwé te pa céiu? Be te icehi pa daame hen, na e bo te tautieng, hemepie wâé nang, ai hemepie ta nang. Ke e bo te picani ten, [beme e pwo ana wâé].

⁵Wonaa ne mwo ko lépwona lé niimihi pie, te pwo a tan na iitihi. Ke ni béén mwo, na lé niimihi pie, te piwien ati ni tan. Ke wâé heme lé te muko cile ehi ni bwo niimihi nen delé; ke me lé te muko cumang ne kon.

⁶Wo lépwona lé pwo me time uce piwie ni tan, ke lé pwo beme lé paciiti Padaame Padué. Ke wo lépwona lé wii ati ni wiinaado, ke lé te wonaa mwo, beme lé paciitieng. Ke lé pipwo-olé ten ati kon. Ke wo lépwona time lé uce wii ati ni wiinaado, ke lé te pwo mwo anaa, beme lé paciiti Padué. Ke woélé mwo, ke lé pwo-olé ten.

Nye mulie me de Padué

⁷Time nye uce mulie me denye cehi, ke time genye uce mele me denye cehi.

⁸Be, heme nye mulie, ke wâé heme nye mulie me de Padaame. Ke me genye mele, ke genye mele me den. Be é ne ha a mulie, ke é ne ha a mele, ke wogenye, ke ni eabwé te Padaame.

⁹Be e mele wo Kériso, ke e mulie cemwo mu ha amele, beme Padaame he ni amele, me nina lé mulie.

¹⁰É mu ko ade, na wo l épwo béén mu kowé, ke lé tauti ni acéhi bél? Ke ni béén [na lé niimihi pie mang a céhi telé] ke me lé nemwo tééti ni béén. Be genye bo te tai cuwo, ânebuhe Padué ne ha atautinaado ten.

¹¹Be caa te tii ne he ni tii iitihi pie: *Weengi a pwooti tong, woéo Padaame na é ne a mulie.* É *pii mwoiuhí pie:* Lé o tai âbé tidihi jililé ânebuhung, me pipaunuhi a niing, woéo Padué. *Ésaïe 45.23*

¹²Be [o bo pwo a tan, na] e bo todekenye wo Padué, beme nye muko pii ten ni huô tenye.

Nemwo pwo me lé pwo nina ta

¹³Genye nemwo tee cuwo ko pitauti me pipii ni béén. Wâé heme te tice ace céiu naado celi go pwo, celi me e tanahi a céhi te pa béém, ke me e pwo ana ta.

¹⁴Mepwo é ne kong, ke e caa te patemehi tong wo Padaame lésu, pie, te tice [wiinaado] celi e paciitihi konye. Kehe icehi ana wo pace céiu celi e niimihi pie, iitihi ace céiu wiinaado, ke te iitihi me den.

¹⁵Ke go nemwo pwo me a wiinaado tem, ke me pwotahinaado ne ko pa céiu acéhi béém. Be, me go wonaa, ke caa time go uce mulie ha a pipwoééhe. Be wo Kériso, ke e te mele me den mwo.

¹⁶Wieli go bo temehi pie ana go pwo, ke a naado na time uce iitihi. Kehe icehi ana time uce wâé heme pii me ta [a nii Kériso] mu ko ni huô tem.

¹⁷A wiinaado me ûdu, ke time uce a junado [me denye ni eabwé] ne ha a *Mwametau te Padué. Ana a junado, ke a mulie na mwomwon [ne he pwahamii Padué] ke a péém, me a pipwodéén, na e ne tenye na a *Jenen litih.

¹⁸Ke me go wonaa a bwo pipwoeabwé tem me de Kériso, ke o wâé te Padué go. Ke o wâé mwo te ni apulie go.

E pébé a péém

¹⁹ Go pwo ni naado na me e pébé a péém, ke me e pamwoiuhi ni céhi te ni béém.

²⁰ Ke go nemwo pwotahi ni penem de Padué ko ni wiinaado tem! A juuju be é teko pii pie, te wâé ne konye ati ni wiinaado. Kehe icehi ana time uce wâé heme go tanahi ni céhi te ni béén ko ni wiinaado na go wii, ai me go pwo me lé pwo nina ta.

²¹ Ana wâé, ke me go wiinaado, me ûdu jahi. Go nemwo tanahi a céhi te pa béém, ko celi go wii me ûdu, hemepie ce mewota, ai ace tabe megele.

²² Ke [go nemwo pii hauli ni bwo niimihinaado tem ne ko anaa.] Go te cile anaa, beme o te wo Padué cehi na e temehi. Mepwo wogo, ke o adéiko, heme time e uce cieko ne he ni huô tem, me ni bwo niimihinaado tem.

²³ Kehe icehi ana me piwâ go me go wii ace céiu naado, ke [wâé heme go nemwo wii. Be] mepie go wii, ke go caa wie koja a céhi tem. Ke nina time e uce âbé mu ko a céhi, ke ta.

Roma 15

Genye pipwohewii Kériso

¹ Genye nemwo mulie me denye cehi. Wogenye nina mang ni céhi tenye, kehe wâé heme genye picani ne ko ni béén na time uce téele mang ni céhi telé.

² Ke genye piwâgo me nye pwo ce naado celi wâé telé, ke me genye pamwoiulé ne he ni céhi telé.

³ Be [genye âcéi] Kériso, pana time e uce mulie me den cehi. Be caa te tii ne he ni tii iitihi pie: *Me lé pipii me ta go, ke woéo pana lé pipii me ta jo. Psaume 69.10*

⁴ Ati ni pwooti he ni tii iitihi, ke caa te mi tii, beme pacémunikenye. Be lé pamwoiukeny, beme ubwo ni céhi tenye, he genye mwo ucéhi ha a piuca [ni *adéhi na e caa te mi pii ânebun wo Padué].

⁵ Be a piuca me a pipamwoiuhi, ke e te âbé mu ko Padué. Ke weeng mwo na e ne a niihenye beme nye cumang. Ke wâé heme e pwo me céiu gewé, ke me geé piténedekewé, pwohewii a huô te Kériso lésu.

⁶ Ke é mu ko anaa, ke geé o tai pipaunu Padué, pa Caa te Padaame henye lésu Kériso.

⁷ Geé pihegikewé ehi, pwohewii a bwo hegikewé te Kériso. Ke me wonaa, ke lé o pipaunu Padué [ne ni apulie].

E âbé wo Kériso me de ati ni bele

⁸ É pii tewé pie: E âbé [ne éni pwo bwohemwo] wo Kériso, beme e eabwé te lépwo *Juif, ke me e habwii pie wo Padué, ke e caa pacuwohi nina e caa pii ânebun te ni watihenye.

⁹Ke lé o te pipaunu mwo Padué ne ni béén na time lé uce Juif, ko a bwo wâé nang ne kolé. Be caa te tii ne he ni tii iitihi pie: É o pwonyebi da; me é pipaunuhi a niim ne ha awieme ni bele.*Psaume 18.50*

¹⁰Ke caa tii ne mwo ha a céiu duaan pie: Geé tai pipwodéén, wogewé ni bele. Geé tai pwonyebi me a bele te Padué.*Deutéronome 32.43*

¹¹Ke a céiu mwo, ke: Me lé pipaunu Padaame ne ni apulie ati. Geé pwonyebi da a wâé ten, wogewé ni bele!*Psaume 117.1*

¹²Ke e pii mwo wo péroféta Isaia, pie: E bo cuwoda pa piebehi Jessé ke e bo pihuôhi ati ni bele.

[Te é mu kon, ni pipwowâé, na e âbé mu ko Padaame.] Te é mu ko weeng, me lé céihi ne kon.*Ésaïe 11.10*

¹³Be wo Padué na e ne tenye a céihi, me nye mwo ucéihi [ati ni wâé na e bo ne tenye]. Wâé heme e pwo me hején ne kowé a péém me a pipwodéén. Be me wonaa, ke o ubwo da a céihi tewé, mu ko a junuu a *Jenen litihi, ne ha a bwo ucéihi nen dewé.

E pipwoebwé te Kériso wo Paulo

¹⁴Lépwo bééng ne ko Kériso, é temehi pie, wogewé, ke ni apulie na wâé gewé. Ke geé temehi ehi [a bwo mulie ha a mulie na mwomwon]. Ke jan ne kowé me geé pipacémunikewé.

¹⁵Kehe icehi ana time uce piwâ jo, me é paniimihi tewé ne ha a tii ce, nina geé caa picaa. Be wo Padué, mu ko a *pipwoééhe tice ja kon den,

¹⁶ke e pwo me é pieabwé te Kériso Iésu me dewé, wogewé na time geé uce Juif. Ke é caa pé lé céiikewé a Pwooti Wâé ten, beme geé utepanu te Padué, na wâé me den. Be e pipégalikewé, beme geé apulie ten, ko a Jenen litihi.

¹⁷⁻¹⁸Ke é te junihe pipwodéén kuti ko a penem dong me de Padué. Time é uce pipii dong ko ce bée naado, kehe é te pii cehi ana e ne me é pwo wo Kériso, be céiu gemu me weeng. Ke e ne me lé piténede Padué wo lépwona time uce lépwo Juif, mu ko a pwocihe me a huô tong.

¹⁹[E pwo me tuie mu kong] ni inenaado ne ha a junuu a Jenen litihi; ni naado na lé téetihî ne ni apulie. Tabuhi mu *lérusaléma, die ha a duaan lliri, ke é caa pipatemehi pitahi a Pwooti Wâé ko Kériso.

²⁰Weengaa a penem dong na te junihe wâé tong: a bwo pipatemehi nen dong a Pwooti Wâé, ne he ni piduaa amu na time lé mu uce téne a pwooti ko Kériso. Be time é uce bahi ne mwo pwo a paan na e caa ne wo pace céiu.

²¹Be é âcehi ana tii ne he ni tii iitihi pie: *Time lé uce téne ce pwooti kon; Te tice apulie celi pipatemehi telé*

*[a Pwooti Wâé]. Kehe lé bo tai alieng, me temehi [Padaame].*Ésaïe 52.15**

A bwo engen de Paulo

22-23 Hiwon ni benaamwon na nimung me é âdé caniêkewé, kehe icehi ana te cuwo ko pipéo na a penem naa. Ke é jenaa ni, ke é caa panebwénihi a penem dong ne ha amu ce.

24 Ke é piniimihi pie, hemepie é o caa â Espagne, ke é o mwo âdé cuwo pelewé [ne *Rome]. Be o wâé ne kong, heme wonaa. Ke é alechen, ke geé bo picani tong, ne ha a bwo engen dong.

25-26 É jenaa ni, ke é â lérusaléma, be é pé ngen a âpipati na lé ne wo lèpwo acéihi na élé Macédoine me Akaï [na time lé uce Juif]. Be lé ileeo pie, me é pé lé a âpipati telé, ne te lèpwo [Juif] na lé céihi ne ko lésu, na élé lérusaléma. Be é pele lèpwonaa, ke mwo te hiwon nina tice delé.

27 Lé te junihe pipwodéén kuti wo lèpwo Macédoine me Akaï, na lé picani telé ko ni delé. Be lé caa te junihe hegi mu kolé ni adéihi ne he ni pwonimelé.

28 Mepie é ne telé ati [ni mwani] ke é bo âdé pelewé, hemepie é â Espagne.

29 Ke é caa temehi pie, é o pé lé céiikewé a adéihi na hején, mu ko Kériso.

Geé pwoitihi me dong

30 Lèpwo béeing mu ko Kériso, é ilekewé pie, me geé te mwoiu ko pwoitihi te Padué me dong. Be nye caa pimu ibu ne ha a céihi ne ko Padaame lésu Kériso, ne ha a pipwoééhe na e ne tenye na a Jenen litih.

31 Geé pwoitihi, beme time lé uce pwotahi ne kong wo lèpwo *Judé na muhi telé me lé céihi ne ko Kériso. Ke geé pwoitihi mwo me de lèpwo acéihi mu lérusaléma, beme lé o hegi ehi a bépicani na é pé nge céilé.

32 Ke é alechen, ke mepie nime Padué, ke é o âdé céiikewé ha a pipwodéén. Ke wieli o jan me é mwo mwaale pelewé.

33 Wâé heme e mu pelewé ati wo Padué, pana e ne a péém! Amen!

Roma 16

Adéikewé

1 [Geé hegi ehi] Fébé, ê béeanye ne he nii Kériso. È toomwo dikone ne Cenkré, ke ê toomwo na wâé nang.

2 Geé hegieng ehi ne he nii Padaame, pwohewii a bwopwonan denye, wogenye ni acéihi. Ke geé picani ten ne he ni naado ati, be weeng, ke te junihe hiwon lèpwona e picani telé, die kong mwo.

3 [Hiwon ni béeen ne pelewé, na nimung me] geé pii telé mwo a bwocu tong: Ne te [lu aadomwin] Priscile me Akilas, na geme pipenem ibu me woilu me de Kériso lésu.

4 Time uce piwâ julu me lu ne ati, die ko a bwo patupwo ne ni mulihelu, me lu picani tong. Ke te junihe eânimung delu. Ke lé te temehilu mwo ati ne ni *puco te ni acéihi na time lé uce *Juif;

⁵Me de ati ni acéhi na lé pitapitilé ne ha a pomwa telu. Me de pa béléng, Épénète, pana e mi céhi ne ko Kériso, ne ha a province Asia;

⁶Me de Maria, êna e te junihe penem me ubwo me dewé;

⁷Me de Andronikus me Junias, lupwo âjiénung juif, na gême mu ibu he karépu. Lupwo *apostolo na te junihe pwonaado ne kolu, na lu te mi céhi kojaéo;

⁸Me de Ampliatus, pa ju béléng ne he nii Padaame;

⁹Me de Urbain, na gemu pipenem ibu me de Kériso; Me de pa ju béléng Stakis;

¹⁰Me de Apelès, na e habwii ehi pie, pa apulie na e mwomwon ne ko Kériso; Me de ni bénna élé ha a pomwa te Aristobule;

¹¹Me de pa âjiénung, wo Érodion; Me nina élé ha a pomwa te Narcisse, na lé céhi ne ko Padaame;

¹²Me de lu toomwo, wo Trifène me Trifose, na lu te junihe penem me ubwo me de Padaame; Me ê ju béléng Perside, be wo ênaa mwo, ke e te junihe penem me ubwo me de Padaame;

¹³Me de Rufus, pa eabwé te Padué na pwonaado ne kon, ke me de nyaa ten, na é te pééeng mwo me ê nyaa tong;

¹⁴Me de Asinkrite, me Flégon, me Ermès, me Patrobas, me Ermas, me ni bée bénnye ne ko Kériso na élé pelelé;

¹⁵Me de Filolog me Juli; Me de Néré, me ê pwaadeniin, Olimpa, me ati ni acéhi na élé pelelu.

¹⁶Wogewé ati, ke wâé heme geé pipwobwocu tewé, pwohewii a bwopwonan de ni acéhi ne ko Kériso. Ke lé ne mwo lé ni bwocu tewé, ati ni puco te ni acéhi ne ko Kériso.

Bénebwéne pwooti

¹⁷Lépwo béléng ne he nii Kériso, [pwo a céiu naado na nimung me é pii tewé]: Geé pipwocile lépwona lé papiidenihi a puco tewé, ke lé pwobwonihi ni pwooti na geé caa hegí, ke lé tanahi ni céhi te ni bénna. Geé nemwo pimu ibu me woélé.

¹⁸Be time lé uce pieabwé te Kériso Padaame henye. Be lé te âcehi nina nimelé kon na ta [me ni patén delé]. Ke lé te ju penem de pa apulie ne ko ni nalé, ke lé pihaami ni bénna na mwo wahin ni céhi telé, ke mwo time jan me lé temehi ehi a bwomune a ta.

¹⁹Mepwo é ne kowé, ke é pipwodéén, be lé alihí ati ne ni apulie, pie geé piténede Padaame. Ke wâé heme geé ali ehi, beme geé pwo ana wâé, ke me geé cela ko a ta.

²⁰Ke wo Padué, pana e ne a péém, ke e pwo me geé caaite *Caatana. Wâé heme e adéikewé wo Padaame lésu Kériso, ha a *pipwoéhé tice ja kon den. Adéikewé!

Pwobwocu te ni béén

²¹Lé pwobwocu tewé mwo wo Timoté, pa béléng ko penem, woélé me lèpwo âjiénung juif, wo Lucius me Jason me Sosipater.

²²Ke woéo mwo, wo Tertius, na é tii a tii ce, ne he nii Paulo, ke é pwobwocu tewé, ne he nii Padaame na e neibukenye.

²³Ke e pwobwocu tewé mwo wo Gaïus, na é pimu pelen. Be lé pitapitilé nelang ati ni acéhi. Woilu mwo, ke lu pwobwocu tewé wo Éraste, pa awéhi mwani te a pwomwo ubwo, me Kartus, pa bénée ne he nii Kériso.

{²⁴Wâé heme e adéikewé ati wo Padaame Iésu Kériso, ko a pipwoééhe tice ja kon den. Amen.}

Pipaunu Padué

²⁵⁻²⁶Genye pipaunu Padué na e haabwén, ke é jenaa, ke é dieli mwo. Weeng na e bo pwo me mang a céhi tewé, ne ko a Pwooti Wâé ne ko Iésu Kériso na é patemehi. Be anaa kuti *a bwo niimihinaado ten na e ha aduwo mu ha atabuhi kon. Ke é jenaa ni, ke e pihuôhi wo Padué pie, me pii beetahi a pwooti naa te ati ni bele na time lé uce Juif, ne he ni tii te lèpwo péroféta. Ke é ko anaa, na lé o bo céhi ne kon, me piténedeeng.

²⁷Nye pipaunu Padué na te céiu nang, weeng na e temehi ati ni naado. Ke a den *a wâé mu ko Iésu Kériso dieli mwo. Amen!

1 Korénit

1 Korénit 1

Pipwobwocu

¹Woéo Paulo, na todeéo mu ko ana nime Padué me é *apostolo te *Kériso lésu, he wogemu me Sostène pa bénye.

²É pwotii lé céikewé, ni acéhi ne ko Padué ne ha a pwomwo ubwo Korénit. Wogewé lépwona caa pipégalikewé, beme geé mulie me de Kériso lésu. Wogewé ke lépwo eabwé mu ko a pwoto te Padué; a puapulie na e pipégalikewé wo Padué. Be e wonaa te lépwona élé ati he ni piduaan na lé pwoitihi ne he nii Padaame lésu Kériso, Padaame henye.

³Ke me a *pipwoééhe tice ja kon, ke a péém, ke me e mu pelewé, mu ko Padué Caa tenye, ke wo Padaame lésu Kériso.

E adéikenye wo Padué @ na e pwaadeniin bé wo Kériso

⁴É tee pipwo-olé te Padué ne kowé, mu ko ni âpipati te Padué, na e ne tewé ne he Kériso lésu.

⁵É ne he lésu, ke geé tai hegi ni âpipati ten, ke ati a pwooti, ke a bwo temehi Padué.

⁶Be a bwo patemehi Kériso, ke e mu mang pelewé.

⁷Ke wonaa, te tice celi tieden pelewé mu ko ni âpipati na e ne, wogewé lépwona geé ucéhi a benaamwon na wo Padaame henye, lésu Kériso, ke e o tuie.

⁸Weeng na e bo pwo me geé cumang die ha a pwonehin. Ke o te tice celi lé o tautikewé kon, ha a tan na e bo âmwobé wo Padaame henye, lésu Kériso.

⁹Be e te pacuwohi nina e pii wo Padué, weeng na e todekewé, me geé pimulie ibu me pa Naîn, lésu Kériso, Padaame henye.

time lé uce piténelé ni acéhi (*Pwahamii tii: 1—4*)

¹⁰É ilekewé ni béisng, ne he nii Padaame henye lésu Kériso, me geé piténekewé, beme te tice celi piehadeniawé, ke me céiu ace pwonimewé, ke ace bwo niimihinaado tewé.

¹¹Be é téne he lé cihe kowé wo lépwo apulie mu pele Kloé pie, pwo celi piehadeniawé, wogewé ni béisng.

¹²É pwo me é pii ngelang pie, muko pétaapwo wogewé, ke geé pii pie: «Woéo, ke pa béisng Paulo», ke «Woéo, ke pa béisng Apolos», ai «Woéo, ke pa béisng Pétérus», ai «Woéo, ke pa béisng Kériso.»

¹³Wo Kériso, ke he e pipii mu kon? Ai wo Paulo paceli cemeiteeng ne ko a *kuricé me dewé? Ai, puukewé ne he nii Paulo?

¹⁴ É pipwo-olé te Padué, be time é uce puu pace céiu mu hadeniiwé; te icehi Krispus, ke wo Gaïus.

¹⁵ É mu ko anaa, ke time uce jan me lé pii pie, puulé ne he niing.

¹⁶ É puu mwo a pwomwoiou te Stéfanas, ke ni nehin. Ke time é uce temehi pie é puu lépwoce béén.

¹⁷ Be time e uce neéo bé wo Kériso beme é *puu apulie, kehe me é patemehi a *Pwooti Wâé; time uce é mu ko a bwo temehinaado te pa apulie. Beme a kuricé te Kériso, ke me time uce piticenaado ne kon.

A bwo temehinaado te Padué

¹⁸ Be a pwooti ko a kuricé, ke a olo ne te lépwona élé ité koja Padué na lé patieden ni mulihelé. Kehe é ne tenye nina caa celuimikenye, ke a junuu Padué.

¹⁹ Be caa te tii ne he ni *tii iitihi pie: É bo pwo me tieden a *pitemang de lépwo apitemang*, ke a bwo temehinaado te lépwona lé temehinaado. *Ésaïe 29.14*

²⁰ E wé wo pa apitemang me pa apwocémun me pana e cihe ehi? Wo Padué, ke e pwo me a bwo temehinaado te a bwohemwo ce, ke a pihauli.

Kériso, ke a bwo temehinaado ten

²¹ Be time uce jan me e temehi Padué na a bwohemwo, ko a bwo temehinaado ten naa. Ke wâé te Padué me e *celuimi lépwo acéhi mu ko a pune na pihauli ne te ni apulie na time lé uce céhi.

²² Be wo lépwo *Juif, ke lé ilehi ce *pipwojunuun, ke wo lépwona time uce lépwo Juif, ke lé hane a bwo temehinaado.

²³ Kehe wogeme, ke geme patemehi Kériso, pana cemeiteeng ne ko a kuricé. É ne te lépwo Juif, ke te junihe time uce wâé ne kolé anaa; ke lépwona time uce lépwo Juif, ke a pihauli ne telé.

²⁴ Kehe é ne pele lépwona e todelé, heme lépwo Juif, ai lépwona time uce lépwo Juif, wo Kériso, ke pa junuu Padué, ke a bwo temehinaado te Padué.

²⁵ Be a piolo te Padué, ke te junihe pitemang koja a pitemang de ni apulie. Ke a bwo tice niihe Padué, ke te junihe pwo niihen koja a niihe ni apulie.

E pipégali pana tice niihen

²⁶ Geé omehi hadeniiwé, lépwo bérème, wogewé na e todekewé wo Padué. Be time uce hiwon ne pelewé, lépwoceli lé nihe temehinaado ne he ni bwo alihinen de ni apulie, ai lépwoceli nihe pwonaado ne kolé, ai lépwoceli nihe pwo delé.

²⁷ Kehe e pipégali ni naado na piticenaado ne kon wo Padué, beme e patanimi lépwona lé temehinaado. Ke e pipégali ni naado na tice niihen ne pwo a bwohemwo, beme e patanimi nina pwo niihelé.

²⁸Ke e pipégali nina wahin, beme pétaabwon ni naado na nihe ubwo. Ke e pipégali nina téétihi ne pwo bwohemwo, nina nihe piticenaado ne kon.

²⁹Be me wonaa, ke me te tice celi lé pipaunulé ne he pwahamii Padué.

³⁰Weeng na e pwo me céiu gewé me Kériso Iésu, ke wo Kériso pa bwo temehinaado tenye na e âbé mu ko Padué. É mu kon na e pwo me mwomwon genye wo Padué, ke e pipégalikenye me nye den, ke e tuwokenye mu ha a ta.

³¹Pwohewii ana tii pie: *Wo pana nimen me e pipii den, ke wâé heme e pipii den ne he Padaame. Jérémie 9.23*

1 Korénit 2

É patemehi a bwo mele te lésu

¹Lépwo béeng, é âdé pelewé, beme é patemehi tewé a bwo niimihinaado te Padué na neduwohi ha atabuhi kon. Ke time é uce âdé patemehi tewé ni naado na e pele Padué ko ce pwooti celi binyi, ai ha ace bwo temehinaado celi piwéden.

²Te tice aceli nimung me é temehi ne pelewé, kehe te icehi lésu Kériso, wo lésu Kériso, pana cemeiteeng ne ko a *kuricé.

³Ke é ne ânebuhewé, ke te junihe piwahin jo, ke abwobwo jo, ke cenim jo.

⁴A pwootti tong, ke a bwo pacémunihi tong a Pwootti Wâé, ke time uce piwien me a bwo cihe ha a bwo temehinaado te pa apulie. Kehe a junuu a *Jenen litih na e pwo me pwaale ko nina é pii.

⁵Beme a céhi tewé, ke me time e uce âbé mu ko a bwo temehinaado te lépwo apulie, kehe é mu ko a junuu Padué.

Time lé uce temehi ne ni apulie

⁶Geme ko cihe ko a bwo temehinaado na geme caa patemehi ne te lépwona caa ubwo jélé ne ha a céhi. Ke time uce a bwo temehinaado pwo a bwohemwo, ke time uce a bwo temehinaado te lépwo apihuôhi na a ta ne pwo a bwohemwo, na bo ciitililé taabwon.

⁷Geme cihe ko a bwo temehinaado te Padué: a bwo temehinaado na neduwohi, na e piwâam kon ânebuhe atabuhi ko a bwohemwo, beme e ne tenye a bwo ubwo na a wâé ten.

⁸Mwo te tice lépwoceli lé pihuôhi a ta ne éni pwo bwohemwo celi lé temehi anaa. Be hemepie aceli lé te temehi, ke me o time lé uce cemeite Padaame he *a wâé.

⁹Kehe, pwohewii ana tii pie: *Time e uce alihî nina wonaa na a naamii pa apulie. Time e uce téne na a pwojéénen. Time e uce temehi na a pwonimen. E pipwopweehi ninaa wo Padué, me de nina nihe eânimelé ten. Ésaïe 64.3*

Etenye a bwo niimihinaado te Kériso

¹⁰Kehe e habwii tenye anaa wo Padué, ko a Jenen litihi. Be e temehi ati ni naado na a Jenen litihi, die ko ni naado na e bwolu ne he pwonime Padué.

¹¹Be he woo, mu ko ni apulie, celi e temehi ni bwo niimihinaado na e ha aduwo ne te pa apulie? Te icehi a jene pa apulie na e kon. Ke wonaa mwo ne ko Padué: Te tice paceli e temehi ni bwo niimihinaado te Padué, hemepie time uce a Jene Padué.

¹²Kehe wogenye, ke time genye uce hegi a jene a bwohemwo, kehe a Jenen na e âbé mu ko Padué, beme genye temehi ni âpipati na e te ju ne tenye wo Padué.

¹³Ke geme cihe ko ni âpipati tice ja kon naa, time uce é ko ni pwooti na pacémunihi na a bwo temehinaado te pa apulie, kehe é ko ana e pacémunihi na a Jenen litihi. Ke geme wonaa a bwo cihe ko a Jene Padué, beme geme pii nina e te âbé mu ko Jenen naa.

¹⁴Wo paceli e te ju niimihi cehi ne ha a bwo niimihinaado te pa apulie, ke time e uce hegi nina e âbé mu ko Padué, be a olo ne ten. Ke pwocoon me e temehi ninaa, be te a Jenen litihi na e tauti ninaa.

¹⁵Pana eten a Jenen litihi, ke jan me e tauti ati, kehe weeng, ke o te tice paceli e o tautieng.

¹⁶Be caa te tii ne he ni tii iitihi pie: *Woo celi e temehi a bwo niimihinaado te Padaame? Woo paceli me e pacémunieng?* Ésaïe 40.13 Kehe wogenye, ke etenyne a bwo niimihinaado te Kériso.

1 Korénit 3

Genye âcéi Kériso cehi

¹Lépwo bééng, é he é cihe tewé, ke time é uce cihe tewé pwohewii ne ko lépwona lé céihi, kehe pwohewii ne ko lépwona time uce e kolé a *Jenen litihi, pwohewii ne ko ni cuwo ewa ne he Kériso.

²[É he li é pacémunikewé] ke é ne tewé a *lait*, beme geé ûdu, kehe time uce a mewota, be mwo te time uce jan me geé wii. Ke é jenaa mwo, be mwo tekó piwien.

³Be geé mwo te pitaaba, ke mwo te pwo ni naado na e he pipuwohewé. Ke anaa, ke geé pipuwohewii ni apulie pwo bwohemwo [na time lé temehi Kériso].

⁴Be heme e pii wo pace céiu pie: «Woéo, ke é âcéi Paulo», ke wo pa céiu, ke e pii pie: «Woéo, ke é âcéi Apolos», ni bwo cihe tewé, ke pwohewiin heme time geé uce temehi Padué.

Wogemu lupwo eabwé

⁵He wooélé wo Apolos, ke he woo wo Paulo? Wogemu, ke te ju lupwo eabwé, na é mu komu, na geé céihi. Ke gemu penem ne he ni bwomunen na e muko pétaapwo ne temu wo Padaame.

⁶É cemi, ke e puu wo Apolos, kehe te wo Padué na e pwo me cim.

⁷Ke me wonaa, ke time uce wo paceli e cemi, ai pana e puu, celi pipwonaado ne kon, kehe wo Padué na e pwo me cim.

⁸Pana e cemi, ke wo pana e puu, ke te piwielu, kehe lu bo muko pétaapwo hegi ni cemelu, ne he ni bwomune ni penem delu.

⁹Be geme penem me Padué.

Wogewé a mwa te Padué

Ke wogewé a ninaado te Padué, ke a mwa te Padué.

¹⁰É ne a paan pwohewii a bwo temehinaado te pa apwo mwa, te âcehi ni âpipati te Padué na e ne tong. Ke e penem pwon wo pa céiu. Ke wâé heme géé muko pétaapwo pipwocile a bwo bahi ne pwon.

¹¹Be te tice paceli me e ne ace céiu paan koja a paan na caa ne, na wo lésu Kériso.

¹²Hemepie pwo paceli e bahi ne pwo a paan, ke jan me e bahi ko ni mwani megele, ni mwani pwojo, ni péi na junihe pwonaado ne kon, ni ba-acuwo, ai ni bwolihe meté, ai ni meté.

¹³O habwii muko ni pétaapwo penem, ke bo patemehi ha a tan na e bo tauti ni apulie hen wo Padué. Be o habwii ne ha a miû, ke é ne ha a miû, ke o habwii a bwomune ni pétaapwo penem.

¹⁴Mepie wo pace céiu, ke me e bahi ne pwo a paan, ke me e cumang ne ko a miû a penem den, ke e o hegi ace cemen.

¹⁵Hemepie a penem den, ke mepie élé, ke e o patieden a cemen. Kehe weeng, ke o celuimieng, kehe o pwohewiin heme e hagéi ace miû beme e cela.

E mu kowé a Jene Padué

¹⁶He time geé uce temehi pie wogewé, ke a *mwaiitihi te Padué, ke a Jene Padué, ke e mu kowé?

¹⁷Hemepie pwo paceli e tanahi taabwon a mwaiitihi te Padué, ke e bo tanahieng taabwon wo Padué. Be iitihi a mwaiitihi ten, ke wogewé a mwaiitihi naa.

Geé mu ko Kériso

¹⁸Ke me te tice paceli e te pipwohuô ten mwo: Hemepie pwo pace mu hadeniawé, ke me e piniumihi pie e temehinaado ne ha a bwomu he benaamwon ce, ke me e olo beme e bo temehinaado.

¹⁹Be a bwo temehinaado ne pwo a bwohemwo, ke a olo ne pele Padué. Be tii pie: *E imwi lépwo atemehinaado he ni pipwohuô kolé. Job 5.13*

²⁰Ke caa tii mwo pie: *Wo Padaame, ke e te temehi ni bwo niimihinaado te lépwo apitemang, na te ju ticenaado ne kon. Psalme 94.11*

²¹É mu ko anaa, ke wâé heme te tice paceli me e pipaunueng mu ko pace céiu apulie, be tai ni naado, ke tai ni dewé:

²²hemepie wo Paulo, hemepie wo Apolos, hemepie wo Pétérú; a bwohemwo, a mulie, a mele, a benaamwon ce, ai ana e bo âbé. Ati, ke tai ni dewé.

²³Ke wogewé he lésu Kériso, ke wo Kériso, ke e he Padué.

1 Korénit 4

Ni apostolo ke ni eabwé te Kériso

¹Wogewé ati, ke wâé heme geé temehi pie wogemu [me Apolos] ke gemu lupwo eabwé te Kériso, ke lupwo apihuô na e ne temu me gemu patemehi nina e ha aduwo na e pele Padué.

²Ana e ilehi koja lépwona e ne telé a pihuô, ke me lé penem ehi me den, ke me lé cumang.

³Te jan me geé tautiéo, ai a mwotautinaado te pa apulie. Kehe woéo, ke time é uce pipéce ne ko anaa. Be woéo, ke time é uce pitautiéo.

⁴É pinimihi pie te tice aceli me é pipé ne kong kon, kehe anaa, ke time uce a bwopiinen pie wâé jo. Be wo Padaame na e tautiéo.

⁵Geé nemwo tauti ânebuhe a benaamwon na e o âbé wo Padaame. Weeng pana e bo pwo me pwélang ko nina neduwohi ha a melepiing. E bo habwii ni bwo niimihinaado na lé neduwohi ne ni apulie, ne he ni pwonimelé. Ke muko pétaapwo ni apulie, ke lé o hegi mu ko Padué, ni pwootti beme cemelé ko nina lé pwo.

É ko ade na geé pipii dewé?

⁶Lépwo bésteng, é ne ko ana é pii, ke é péékemu me Apolos beme lupwo béhabwiinen dewé. Nimung me é picaa tewé a bwopiine a pwootti ce: «Te tice celi piwéden da koja ana tii.» Beme o te tice paceli e o pipii den, heme e pipégali pace céiu apihuô, koja pace céiu apihuô.

⁷Be he ade aceli e pwo me go pieda koja lépwo béstén? Tai nina etem, ke nina e ne tem wo Padué. Ke é hemepie go hegi, ke é mu ko ade na go pipii dem pwohewiin heme time go uce hegi?

⁸Kona geé niimihi pie caa pwo ne tewé ati nina nimewé kon? Caa pwo dewé? Caa wogewé lépwo daame, kehe time uce wogeme? Hemepie geé caa te daame, ke nimeme me genye tai daame!

⁹Kehe é ne tong, ke wo Padué, ke pwohewiin heme e nekeme wogeme lépwo *apostolo, ha a bénebwéne atebwo, pwohewii lépwo apwocuhinaado ko a mele. Éa, lé alo kome ati ne pwo bwohemwo, ne ni *âcélo ke ni apulie, ne he ni picani teme na ubwo.

¹⁰Geme olo wonaa mu ko Kériso, kehe wogewé, ke lépwo acéhi na geé temehinaado. Tice niiheme, kehe wogewé, ke pwo niihewé. Lé te nihe éewo kowé, kehe wogeme, ke lé téétikeme.

¹¹Dieli jenaa ni, ke meneme, nimeme me geme ûdu, ta ni epwéneme. Lé pwotahinaado ne kome, ke pwocoon me geme mu he celi céiu lang.

¹²Mwaale geme me geme penem ko ni ime. Lé cihe me ta ne kome, ke geme te adéilé. Lé pwo me geme mu he ni picani, kehe geme te pé ne kome.

¹³Lé pii nina ta ne kome, kehe geme pamwoiu ni béén. Dieli jenaa, ke é ne te ni apulie, ke pwohewiin heme wogeme ni cabin de a bwohemwo, pwohewii ni naado na alili, na lé tahi taabwon.

Ni naîng ne ha a céihi

¹⁴Time é uce tii ninaa beme tanim gewé, kehe é patemehi tewé, wogewé ni naîng ne ha a céihi, na eânimung dewé.

¹⁵Be hemepie 10000 lépwoceli lé pacémunikewé me geé âcéi lésu Kériso, kehe te céiu jo pa caa tewé. Be woéo, pana é ne tewé a mulie te lésu Kériso, he é patemehi tewé a Pwooti Wâé.

¹⁶Ke é ile, ke wâgo kowé, me geé pwohewiiéo.

¹⁷É mu ko anaa, na é ne lé Timoté, pa naîng ne ha a céihi, na nihe eânimung den, pana e cumang ne he Padaame. E bo paniimihi tewé ni pwaadeniing he é âcéi lésu Kériso, na é pacémunihi ati ne he ni *puco te ni acéhi.

Pipwocile!

¹⁸Ke lé pipii delé wo lépwo béén, be lé niimihi pie, time é bo uce âmwo lé ne pelewé.

¹⁹Kehe time uce bwolihi, ke é o âdé pelewé, hemepie te nime Padaame. Ke é bo temehi a junuu aceli jan me lé pwo wo lépwo apipii delé.

²⁰Be a *Mwametau te Padué, ke time uce a pwooti cehi, kehe é ne ha a junuu Padué.

²¹Ade aceli nimewé kon? Me é âdé céikewé imi a bwaliiwota, ai a pwonime na oba ko a pipwoééhe, ke a jenen na bwala?

1 Korénit 5

ni huô na ta hadenii ni acéhi

(*Pwahamii tii: 5—6*)

Lé pipule hauli ni bée acéhi

¹Geme téne he lé ko pipii ngen pie, pwo ni béén mu pelewé na lé mulie ne ha a ta. Be e pé ê mwode pa caa ten wo pace mu hadeniiwé! Kehe time genye uce téele tooli ace naado celi wonaa pele lépwona time lé uce temehi Padué, be te junihe ta!

²Ke geé te junihe pipii dewé! Kehe, me geé ko mu ha a piwahin! Ke me geé o neeng ité mu hadeniiwé.

³Be é ne tong, ke tieéo pelewé, kehe woéo pelewé ha a jenung, ke é caa tauti pa apulie na e pwo anaa, pwohewiin heme teko woéo pelewé.

⁴Geé pimu ibu ne he nii Padaame lésu, ke é bo mu pelewé ha a jenung ke a junuu Padaame henye, lésu.

⁵Ke geé ne pa apulie naa te *Caatana! Beme ana nimen kon na ta, ke o pétaabwon, ke hemepwo a jenen, ke bo *celuimi ha a tan na e bo âbé hen wo Padaame lésu.

⁶Time uce wâé a bwo pipii dewé! He time geé uce temehi pie a cuwo nahi nyaa te pwoloa, ke e pwo me cibu ati a pwoloa?

⁷Geé pétaabwon a ta na pwohewii a ukéiu nyaa te pwoloa, beme wogewé a pwoloa na mwo coho, na te tice nyaa ten, ana geé caa ko mu hen. Be wo lésu, ke caa neeng me pa *âpwailo, pwohewiin heme pa muto ko *Pacika tenye.

⁸É mu ko anaa, ke genye pituumé ha a Pacika ko a pwoloa na tice nyaa ten, ne ha a pwonime na céiu, ke juuju. Genye nemwo eni a pwoloa na pwo ko a ukéiu nyaa te pwoloa, a nyaa te pwoloa ko a bwomu tenye na ta.

Nemwo pabéélé!

⁹Ha a céiu tii, ke é pwotii lé céikewé pie: Geé nemwo piténekewé me nina lé pipule hauli me ni béén.

¹⁰Time uce nimung me é cihe ati ko lépwona élé pwo bwohemwo na ta ni mulihelé, ai lépwo abune, lépwo atapi, ai lépwona lé pipaunuhi ni *dème duéé helé. Be hemepie wonaa, ke wâé heme geé wie mu ha a mulie na e mu pwo bwohemwo!

¹¹Ûhu! Ke é tii pie: Hemepie pwo paceli pii kon pie pa acéihi béénye, ke me e mulie ne ha a ta, ai pa atapi, ai e pipwoun de ni déme duéé, ai e piciheta, ai e tee ûdu, ai eânimén ko a mwani, ke geé nemwo piwiinaado me pa apulie naa!

¹²⁻¹³Be he a penem dong me é tauti lépwona time uce lépwo acéihi? Te wo Padué na e bo te tautilé! Wogewé, ke wâé heme geé tauti ni béewé ko a céihi. Be caa te tii ne he ni tii iitihi pie: *Geé pawie pana ta ni huô ten mu hadeniiwé. Deutéronome 17.7*

1 Korénit 6

Lé pipééle ni béé acéihi

¹Hemepie pwo pace pibéewé celi pwo aceli piehadeniilu me pace céiu, ke e o te pé nge ha a mwotautinaado te lépwona time lé uce céihi, koja lépwo acéihi. Woté?

²He time geé uce temehi pie lépwo acéhi, ke lé bo tauti a bwohemwo? Ke hemepie geé tauti a bwohemwo, ke kona time uce jan ne kowé me geé tauti ni cuwo nahi naado?

³He time geé uce temehi pie genye bo tauti mwo lépwo *âcélo? Ke hemepie wonaa, ke jan me genye tauti ni naado ha a mulie ce!

⁴Hemepie pwo celi me tauti ne ha a bwomune a mulie ce, ke geé pé me lépwo atautinaado tewé lépwona tice penem delé mu hadenii ni acéhi!

⁵É cihe beme tanim gewé. Woté? He te tice paceli e temehinaado hadeniiwé? He te tice paceli te ju céiu nang celi jan me e tauti ne hadeniiwé lépwo béén?

⁶Kehe geé â he mwotautinaado, é ne ânebuhe lépwona time uce lépwo acéhi!

Geé nemwo wonaa!

⁷Ke anaa, ke geé caa pipweéo, be time uce wâé ne pelewé, me geé piâ he mwotautinaado. É mu ko ade na time geé uce mu he ni picani ne ko lépwona lé pwo ana ta? É mu ko ade na time geé uce necu me lé bunekewé?

⁸Ke wogewé na geé pwo nina time uce wâé, ke geé bune lépwo béewé.

⁹Ke geé pipwocile! He time geé uce temehi pie wo lépwona ta jélé, ke time lé o uce taa ha a *Mwametau te Padué? Lépwona lé pwotahinaado ne ko ni éélémé lépwo béén; Lépwona lé paunuhi ni *déme duéé; Lépwo apibune; Lépwo aiu na lé te pipule mwo me ni aiu;

¹⁰Lépwo abune; Lépwo atapi; Lépwona lé tee ûdu; Lépwona lé pii me ta lépwo béén; Lépwona lé pwotahi ne ko lépwo béén.

¹¹Ke lé âbé mulang wo lépwo béén mu hadeniiwé. Ke e puukewé mu he ni ta pwo tewé wo Padué. Ke e pipégalikewé, ke e pwo me mwomwon gewé ne he nii Padaame lésu Kériso, ke é ko a Jene Padué.

Genye pipwoiipihi ni éénye

¹²Geé pii pie: «Tai ni naado, ke te tice aceli paciitihi.» Kehe time lé uce pamwoiu ni béénye. Tai ni naado, ke tice aceli paciitihi, ke te jan ne kong me é pwo, kehe te muhi tong me é *apenem tice ja kon ne ko ace céiu naado.

¹³Geé pii mwo pie: «A wiinaado, ke a bépwonen ne ko a nanye, ke a nanye, ke a bépwonen ne ko a wiinaado.» Kehe wo Padué, ke e o tai tanahi taabwon a nanye, ke a wiinaado. A éénye, ke time uce a bépwonen ne ko a ta, kehe a bépwonen ne ko Padaame, ke wo Padaame, ke é ne ko a éénye.

¹⁴Wo Padué, ke e pwo me e mwojuia mu ha amele wo Padaame lésu, ke e bo pwo me nye bo mwojuia mu ha amele, mu ko a junuun.

¹⁵He time geé uce temehi pie ni éewé, ke ni de lésu? É bo pé ace céiu duaa a éé Kériso, beme é pwo ace céiu duaa éé ê toomwo pwopwaaden? Úhu! Te junihe pwocoon me wonaa!

¹⁶He time geé uce temehi pie pana lu pipule me ê toomwo pwopwaaden, ke céiu a éelu? Be caa pii pie: *Ke caa céiu julu. Genèse 2.24*

¹⁷Kehe wo pana céiu julu me Padaame, ke céiu a jenelu.

¹⁸Geé cela ko ni ta na e pwo me mwiihi a éénye. Ni bée ta, ke te e ité koja a éénye. Kehe pana e pwo a ta na e pwo me mwiihi a één, ke e te pipwotahi ne ko a één.

¹⁹He time geé uce temehi pie a éewé, ke a mwa te a *Jenen litih na e kowé, na e ne wo Padué? Caa time geé uce pihuôhi a éewé,

²⁰be ubwo a cuhi a bwo péékewé. Geé ne te Padué *a wâé ten, ne he ni éewé!

1 Korénit 7

e hegi wo paulo ne te ni korénit

(*Pwahamii tii: 7—14*)

A pwooti ko piaten

¹Mepwo é ne ko ni naado na geé pwotii bé céiiéo ne kon, ke wâé ne ko pa aiu heme time e uce piaten.

²Ke me e pile a pibune, ke wo l épwo aiu, ke wâé heme muko pwo ce mwodelé, ke ni toomwo, ke wâé heme muko pwo ce aiu helé.

³Ke pa aiu, ke me e pwo a penem den ne ko ê mwoden, ke wonaa ne ko ê toomwo ne ko pa aiu hen.

⁴Ê toomwo, ke pwocoon me e pwo aceli nimen kon ne ko a één, be a één, ke a de pa aiu hen. Ke wonaa ne ko pa aiu; ke pwocoon me e pwo aceli nimen kon ne ko a één, be a één, ke a de ê mwoden.

⁵Geu nemwo pitapikeu kou beme céiu geu, lu aadomwin. Kehe te ju icehi, heme geu pwoitihi, ha ace céiu benaamwon. Ke é alechen, ke geu mwojuia, be koli time geu uce cile ehi a éeu, ke koli e bo tacebwénikeu wo *Caatana.

⁶Ana é ko pii, ke time uce ace huô, kehe ana jan me é ne tewé.

⁷Nimung me geé tai pwohewiiéo [na te tice mwodong]. Kehe genye te muko hegi mu ko Padué, nina e ne: Pa céiu, ke e hegi ace céiu bwomunen, ke wo pa céiu, ke uce ace céiu bwomunen.

Muko pihuô te ni muko apulie

⁸Kehe é pii te nina time lé uce piaten, ke ni depwele pie, wâé ne kolé heme lé mu pwohewiiéo.

⁹Ke hemepie time uce jan me geé cile a éewé, ke geé piaten! Wâé heme geé piaten, kojan heme tee âbé ne he pwonimewé a pibune.

¹⁰É ne pele l épwona lé caa piaten, ke woni ana é pii; time uce woéo, kehe wo Padaame: Pa apiaten, ke me time e uce cibéé ê mwoden; ke ê toomwo, ke me time e uce engen koja pa aiu hen.

¹¹Hemepie lu pimu ité me pa aiu hen, ke e mu heme time e uce piaten, ai lu pipwopweehi me pa aiu hen. Ke pa aiu, ke me time e uce ne ê mwoden.

¹²Kehe é ne ko ni béeén, ke é pii woéo, kehe time uce wo Padaame: Hemepie pa acéihi, ke mepie pwo êce mwoden celi time uce ê acéihi, ke me nime ê mwoden me e mu pelen, ke me time e uce ne ê mwoden.

¹³Ke é hemepie pwo êce toomwo celi pa aiu hen, ke time uce pa acéihi, ke me nime pa aiu hen me e mu pelen, ke me time e uce ne pa aiu hen.

¹⁴Be pa aiu na time e uce céihi, ke e mwonu Padué, wonaa mu ko ê mwoden. Ke mepwo ê toomwo na time e uce céihi, ke e mwonu Padué, wonaa mu ko pa aiu hen na e céihi. Hemepie time uce wonaa, ke ni naîwé, ke o pwohewii nina élé ité koja Padué. Kehe a ju bwomunen, ke te élé mwonu Padué.

¹⁵Ke hemepie pwo paceli time e uce céihi, ke mepie nimen me e engen, ke te jan me e pwo. Kehe é ne ha a bwomunen naa, ke pa acéihi, pa aiu, ai ê toomwo, ke caa time o uce céiu julu, be e todekewé wo Padué me geé mulie ne ha a péém.

¹⁶Wogo ê acéihi, ke é ne ha a muliheu, ke o te jan me go *celuimi pa aiu hem? Ke wogo pa acéihi, ke é ne ha a muliheu, ke o te jan me go celuimi ê mwodem?

Geé mulie ne ha a bwomunen @ na e ne tewé

¹⁷Wâé heme geé mulie ne ha a bwomunen na e ne tewé wo Padué, ânebuhe a bwo todekewé. Ke wonaa ana é pii ati te ni acéihi.

¹⁸É he e todeko wo Padué, ke he te *tegoop go? Go te mu ha a bwomunen naa. Time uce tegoop go? Go nemwo uce pwo me pwotegoop tem!

¹⁹Be te ju piticenaado ne ko a tegoop, ai me time uce tegoop. Ana pwonaado ne kon, ke me pwo ana nime Padué kon.

²⁰Nye te pétaapwo mu he ni bwomu tenye, he e todekenye wo Padué.

²¹É he e todeko wo Padué, ke he go mwo te mulie ha a penem tice ja kon? Go nemwo uce pihanenaado ne ko a bwomunen naa! Ke hemepie jan me go mulie hemepie te tice celi e imwiko, ke go âcehin, be wâé.

²²Be pa *apenem tice ja kon na e todeeng wo Padaame, ke e caa te ju pimu ngen, caa pa apulie te Padaame. Ke pa apulie na caa ju pimu ngen na e caa todeeng wo Padaame, ke caa pa apenem tice ja kon de Kériso.

²³Ke e pwocuhikewé wo Padué ko a cuhin na junihe ubwo, beme e pawiekewé mu he na geé mu lang. Geé nemwo â penem tice ja kon ne pele lépwo apulie.

²⁴Lépwo béeng, genye te pétaapwo mu he bebenihe Padué, ne ha a bwomunen na nye te mu hen he e todekenye.

Nina time lé uce piaten

²⁵Mepwo é ne ko nina time lé uce piaten, ke te tice aceli é hegi mu ko Padué. Ke é ne ha a bwo niimihinaado tong: a bwo niimihinaado na jan me mwomwohi. Be wo Padaame, ke wâé nang ne kong.

²⁶É piniimihi pie wâé ani, wonaa mu ko ni picani na genye mu hen jenaa: Wâé ne konye, heme nye te mu he ni pétaapwo bwomu tenye.

²⁷Hemepie go piaten me êce toomwo, ke go nemwo uce hane me go neeng. Mepie time go uce piaten me êce toomwo, ke go nemwo uce hane êce toomwo.

²⁸Ke hemepie go piaten, ke time go uce pwo aceli ta. Ke mepie e piaten êce ewa toomwo, ke te tice ta celi e pwo. Ke hemepie lé piaten, ke lé bo mu he ni picani ne he ni mulihelé téteda he ni tan. Kehe woéo, ke time uce nimung me wonaa.

²⁹Ke é pii ani, wogewé lépwo bééng: Caa cuwo a benaamwon ne ko ni nehi tan, ke wo lépwona pwo ni mwodelé, ke me lé mulie [me de Padaame] pwohewiin heme te tice mwodelé.

³⁰Ke nina lé é, ke me lé mulie pwohewiin heme time lé uce é. Ke nina élé ha a pipwodéén, ke me lé mulie pwohewiin heme time lé uce pipwodéén. Ke nina lé pwocuhi ni naado, ke me lé mulie pwohewiin heme time uce ni delé ni naado na lé pwocuhin.

³¹Lépwona lé ko âcehi ni naado pwo a bwohemwo, ke me lé mulie pwohewiin heme time lé uce âcehin, be time e uce mu a bwomune a bwohemwo ce jenaa, kehe e o âdé.

Hane me e wâékewé wo Padaame

³²Kehe nimung me geé nemwo gia. Wo pana time e uce piaten, ke e pwo ni naado me de Padaame, ke e hane me e piwâéeng wo Padaame.

³³Kehe wo pana e piaten, ke a pwonimen, ke e te mu ko ni naado pwo bwohemwo, ke e hane beme wâé ne ko ê mwoden.

³⁴Pihiwon ni bwo niimihinaado ten. É toomwo na time e uce piaten, ai ê nahi toomwo, ke lu pwo ni naado me de Padaame. Lu hane beme lu eabwé te Padaame, ke lu pinelu ati ten. Kehe ê toomwo apiaten, ke e te mu ko ni naado pwo bwohemwo, ke e hane beme wâé ne ko pa aiu hen.

³⁵Ke é pii anaa beme é picani tewé, kehe time uce a bwopwonan me a âneule tewé. Kehe nimung me geé pipégali ana wâé beme céiu gewé me Padaame.

Nina lé ucéihi me lé piaten

³⁶Ke mepie pwo paceli te junihe nimen ko êceli lu picihe, ke me e piniimihi pie time uce jan me e cile ehi a één, ke o wâé heme lu piaten. Time e uce pwo aceli ta heme lu piaten.

³⁷Kehe wo paceli e niimihi ne he pwonimen pie, me time e uce piaten, ke me time lu uce pipule me êna lu picihe. Mepie wonaa ace bwo niimihinaado ne ha

a pwonimen, ke me e te pihuô ne ko nina nimen kon, ke wâé hemepie time e uce piaten.

³⁸Ke wonaa, wo pana e piaten me êna lu picihe, ke wâé, kehe wo pana time e uce piaten, ke te nihe wâé.

Ni depwele

³⁹Ê toomwo, ke te céiu julu me pa aiu hen, ha a benaamwon na e mwo tekô mulie hen wo pa aiu hen. Ke hemepie e mele wo pa aiu hen, ke caa te wâé ne kon me e piaten mwo me paceli nimen kon. Kehe te icehi ne he Padaame.

⁴⁰Ke é ne tong, ke o te junihe wâé ne kon heme e te ju mu wonaa. Ke é pii pie, woéo mwo, ke etong a Jene Padué.

1 Korénit 8

Âpwailo me de ni déme duéé

¹ Mepwo é ne ko ni mewota na *pipwoâpwailo kon ne te ni déme duéé, ke genye tai temehi, be «tai etenyé a bwo temehinaado». Kehe [geé pipwocilekewé. Be] e pipii den a bwo temehinaado, kehe é ne ko a pipwoééhe, ke e pamwoiu ni béenye.

²Hemepie pwo paceli e niimihi pie e temehi ati ce naado, ke time e uce téele temehi mwo pie he me e woté ace bwo temehi nen.

³Ke mepie pwo paceli eânimén de Padué, ke wo Padué, ke e te temehieng.

⁴Mepwo é ne ko a bwo wii ne nina pwoâpwailo kon, ne te ni déme duéé, ke genye temehi pie a duéé na pipaunuhi ne pwo bwohemwo, ke te ju piticenaado ne kon. Be te tice pace céiu duéé, kehe te céiu cehi Padué.

⁵Pwo ni béen na lé pii pie, pwo ce duéé, ke pwo ce daame he miiden, ke é pwo bwohemwo. Ke te a juuju, be é ne telé, ke hiwon ni ‘duéé’, ke hiwon ni ‘daame’.

⁶Kehe é ne tenye, ke te céiu cehi Padué Caa, na é mu kon, ke tai pwo ni naado, ke genye mulie me den. Ke te céiu cehi Padaame Iésu Kériso, na é mu kon, ke tai pwo ati ni naado, ke é mu kon na genye mulie.

Niimi nina wahin ni céihi telé

⁷Kehe a bwo temehinaado, ke time uce tai etenyé. Ânebun, ke mwo te pwo ni béen na lé mwo tekô pwoitihi te ni déme duéé. Ke é jenaa mwo, ke hemepie lé wii ni mewota na lé pipwoâpwailo kon ne ni béen, ke pwohewiin heme te ne te ni déme duéé. Be time e uce mu mang a *pwocihe na e âbé mu he ni pwonimelé. Ke lé téne ne kolé pie ta jélé ko a wiinaado naa.

⁸Kehe time uce a wiinaado ana e pwo beme nye piâmwonu Padué. Hemepie time nye uce wii ace céiu wiinaado, ke te piticenaado ne kon, ke é hemepie nye wii ace céiu wiinaado, ke te piticenaado ne kon mwo.

⁹ Te jan me geé pwo celi nimewé kon, kehe geé pipwocile ni bwopemikewé, beme time geé uce patupwo ne ha a ta pana tice niihen ne ha a céhi ten.

¹⁰ Be wogo pana go temehi a juuju, ke mepie lé aliko hemepie go ko wiinaado ne pwo taap ha ace *mwaiitihi te ni duéé hauli, ke o woté ace bwomunen? Go o patupwo pana tice niihen ne ha a céhi ten, me e te wii mwo ni wiinaado na lé ne me de ni déme duéé.

¹¹ Ke wonaa, mu ko a bwo ‘temehinaado’ tem, ke e o tupwo wo pa acéhi na mwo wahin nang ne ha a céhi, weeng pana e caa mele me den wo Kériso!

¹² Me geé pwo ana ta na wonaa ne ko lépwo béis, ke me geé pwotahi ne ko a céhi telé na te ju wahin, ke geé pwo ana ta ne ko Kériso.

¹³ É mu ko anaa, ke hemepie a mewota, ke mepie e pwo me e tupwo wo pa béis ko a céhi, ke time é bo uce wii mwo ace mewota, beme time é uce pwotahi ne ko pa béis.

1 Korénit 9

E pwopain wo Paulo

¹ Time uce jan me é pwo aceli nimung kon? He time uce woéo pa apostolo? Time é uce ali lésu Padaame henye? Time uce wogewé ni acehi a penem dong ne he Padaame?

² Hemepie time é uce *apostolo ne te ni béis, kehe é apostolo ne tewé. Be wogewé ni bépajujuhi na a penem dong ne he Padaame.

Pwo mwomwon dong be pa apenem

³ É hegi ne te lépwona lé pipé ne kong pie:

⁴ He te tice mwomwon demu, me gemu wiinaado, ke ûdu?

⁵ He te tice mwomwon demu, beme gemu pé lu mwodemu acéhi, pwohewii ana lé pwo wo lépwo béis apostolo, ke wo lépwo ciéé Padaame, ke wo Pétéru?

⁶ Kona te wogemu cehi me Barnabas, na me gemu penem ne ko mwani, beme gemu mulie?

⁷ É heme e â he coda wo pace céiu, ke time e uce pwocuhin me e pwocoda. Ke wo paceli e cemi ace éé tabe megele, ke kona time e uce wii ni acehin? Ai wo paceli e cile ace bwehi wota, ke kona time e uce ûdu *lait* mu ko a bwehi wota?

⁸ He é pii ni naado naa, ne ha a bwomunen ne ko pa apulie? Ai ni patén mwo, ke he time e uce pii ni naado naa?

⁹ Be caa te tii ne he ni *patén de Moosé pie: *Go nemwo pacuwoshi a paaci me e wii ni ace blé heme e ko penem me dem. Deutéronome 25.4* He e te ju omehi cehi ni paaci wo Padué?

¹⁰Ai e cihe beme denye? Be tii ani be me denye pie, me e penem wo pana e penem he pule, heme e céhi pie e o tii celi e cemi. Ke wo pana e tati *blé*, ke e céhi pie o pwo ace den mu kon.

¹¹Gemu cemi he ni pwonimewé ni wâé te a *Jenen litih. Kona o te junihe ubwo hemepie gemu hegí aceli jan ne he ni mulihemu mu ko ni dewé ne éni pwo bwohemwo?

¹²Hemepie lé hegí wo lèpwoce béen ne he ni bwomunen naa ne pelewé, kona he time uce wogemu na me gemu o hegí?

Gemu caa cuwokowé

Kehe time gemu uce hane, kehe gemu tai pé ne komu, beme time uce cubwoni a Pwooti Wâé te Kériso.

¹³Geé temehi ehi pie lèpwona lé penem ha a *mwaiitihi, ke lé wii nina e âbé mu ha a mwaiitihi. Ke wo lèpwo *apwoâpwailo, ke te pwo ni delé mu ko a bwo pwoâpwailo.

¹⁴Te piwien mwo, be wo Padaame, ke e pii pie me lé mulie mu ko a Pwooti Wâé wo lèpwona lé patemehi a Pwooti Wâé.

¹⁵Kehe woéo, ke time é uce hane ni bwomunen naa, ke time é uce tii ani, beme é hane ce dong. Be me o wâé ne kong heme é mele, kojan heme é patieden a watihe a pipwodéén dong.

¹⁶Be é hemepie é patemehi a Pwooti Wâé, ke te tice aceli me é pipii dong ne hen, be te tice ace céiu bwopwon, be ana ne tong. O te junihe ta ne kong hemepie time é uce patemehi a Pwooti Wâé.

¹⁷Be hemepie woéo pana é pipégali a penem naa, éa, ke me o pwo ace cuhin. Kehe te tice ace céiu bwopwon, celi me é pwo, ke é te ju pwo ana me é te pwo.

¹⁸He ace cuhiéo, ke he ade? É he é patemehi a Pwooti Wâé he te tice cuhin, é patemehi a Pwooti Wâé, kehe time é uce pé mu kon ana jan me é pé.

É pipwoeabwé te ni apulie ati

¹⁹Te tice pace pibéewé celi jan me e cuwokong me é pwo ace céiu naado. Kehe nimung me é tai pipwoeabwé tewé, beme é pébé ce apulie celi hiwon.

²⁰Ke é ne pele lèpwo Juif, ke é mulie pwohewii pa Juif, beme é pébé lèpwo Juif. É ne ko lèpwona lé mu he ni patén de Moosé, ke é ténedehi ni patén, beme é pébé lèpwona lé mu he ni patén. Kehe time uce pwonaado ne kon me é ténedehi ni patén.

²¹Ke é ne ko lèpwona time lé uce temehi ni patén, ke é mulie pwohewiin heme te tice patén, beme é pébé lèpwona time lé uce temehi ni patén. Kehe te etong a patén de Padué, be é ténedehi a patén de Kériso.

22 Ke é ne ko lépwona mwo wahin jélé ne ha a céhi, ke é mulie pwohewin heme mwo wahin jo, ne ha a céhi. É pineéo ati telé, beme é pébé lépwoce béén.

23 Ke é tai pwo ati ni naado naa, wonaa mu ko a Pwootí Wâé, beme é mu he ni wâé ten.

É te téte beme é piwéden

24 He time geé uce temehi pie wo lépwo apitéte ha a pitai, ke lé te tai téte, kehe te wo pa bécéuhen pana e pé a cuhin? Geé téte, ne ha a bwomunen na me geé pé ace cuhin.

25 Tai lépwo ajele, ke lé picaa, ke lé pwo he necu ni bée naado. Woélé, ke lé pwo beme lé pé a cuhin na o tieden. Kehe wogenye, ke genye pwo beme nye pé a cuhin na e o tee mu.

26 É mu ko anaa, na é téte, kehe time é uce pitéte hauli. É pwohewii pa atahi mwoi, kehe time é uce tahi nge ha a puwo.

27 É tacebwénihi a ééng, ke é â pihuô ne kon. Be mepie time uce wonaa, ke woéo pana é patemehi a Pwootí Wâé ne te lépwo béén, ke o jan me tieéo.

1 Korénit 10

Nemwo pipaunuhi ni déme duéé

1 Wogewé lépwo béeng, geé caa temehi nina e tuie ne ko lépwo watihenye [ne ha a da] be e ne ânebuhelé a nii [wo Padué] beme e wéilé, ke lé tai hagéi a jié Megele.

2 Ke tai woélé, ke tai puulé he céiu jélé me *Moosé, ne ha a nii, ke é ne ha a jié.

3 Ke lé tai wii a wiinaado na céiu na e âbé mu he miiden.

4 Ke lé tai ûdu mu ko a tabe na céiu na e âbé mu he miiden, ana e âcéilé, be lé ûdu mu ko a péi. Be a péi, ke wo Kériso.

5 Kehe time uce wâé te Padué a ubwo kolé, ke é mu ko anaa, na e pwo me lé mele ne ha a melé.

Nemwo pipwohewii a bele Isaraéla ânebun

6 Ke ni naado naa, ke e tehenebé, beme e habwii a bwomu tenye, beme time uce wâé tenye ni naado na ta, pwohewii ne ko lépwo ukéiu tenye:

7 Genye nemwo pipaunuhi ni *dème duéé, pwohewii ne ko ana lé pwo ne ni béén mu kolé, be caa te tii ne he ni tii iitihi pie: *E tebwo a pubu apulie beme e pwowiinaado, ke e ûdu. Ke e cuwoda ke e pwolu hauli. [Ke e pipaunu a déme duéé.] Exode 32.6*

8 Genye nemwo pipule hauli me ni béén, pwohewii ana lé pwo ne ni béén mu kolé, be lé mele ha a tan na céiu nina 23000 jélé.

⁹ Genye nemwo tacebwéni Padaame, pwohewii ana lé pwo wo lépwo bélén, na lé wiilé ne ni bwien, ke lé mele.

¹⁰ Genye nemwo pihuu, pwohewii ana lé pwo wo lépwo bélén, ke li e taunulé wo pali *âcélo ko a mele.

¹¹ Tai ni naado naa, ke e tehenebé ne kolé, beme habwii tenye, ke tii beme mi pii tenye, wogenye na caa ju acunaa me nye tehene nge ha anebwén kon.

¹² É mu ko anaa, ke wo pace apulie celi e mwomwohi pie e cumang, ke e pipwocile beme e nemwo tupwo.

¹³ Tai ni tacebwén na e takenye, ke te wonaa a bwomunen, be wo Padué, ke nina e pii, ke e te pwo. Ke time e o bo uce pwo me tacebwénikenye, koja ana jan me genye pé ne konye. Kehe e mu konye beme genye cumang, ke me genye â wie mu he ni tacebwén.

¹⁴ É mu ko anaa, wogewé lépwo ju béléng, ke geé nemwo â pipaunuhi ni duéé hauli!

Céiu genye me Kériso

¹⁵ É cihe pwohewii ne ko ni apulie na lé temehinaado. Geé pitauti ana é ko pii.

¹⁶ Genye olééhi ne te Padué a mwoûdu ko a *adéihi. É heme nye ûdu, ke he time uce a bwo céiu genye ne ko a cewéhe Kériso? Heme nye eni a pwoloa na nye pipatihi, ke he time uce a bwo céiu genye me a éé Kériso?

¹⁷ Be wogenye na hiwon genye, ke te céiu a pwoloa tenye, ke te céiu a éénye, be genye tai eni a pwoloa na céiu.

Nemwo pimu ibu me ni duéé!

¹⁸ Geé ali a bwomu te lépwo *Isaraéla: Lépwona lé wii nina *pwoâpwailo kon ne te Padué, ke â céiu jélé me Padué. [Be a apwoâpwailo, ke a de Padué.]

¹⁹ Ade aceli nimung me é pii? Aceli pipwoâpwailo kon, ne te a déme duéé, ke he te pwonaado ne kon? Ai ni déme duéé, ke he te pwonaado ne kolé?

²⁰ Úhu! Kehe ni naado na lé pipwoâpwailo kon, ke lé pipwoâpwailo kon ne te ni duéé me ni iténaado, kehe time uce é ne te Padué. Kehe te muhi tong me céiu gewé me ni duéé me ni iténaado.

²¹ Pwocoon me geé ûdu ha a mwoûdu te Padaame, ke me geé ûdu ha a mwoûdu te ni iténaado. Pwocoon me geé wiinaado pwo a taap te Padaame, ke é pwo a taap te ni iténaado.

²² Ai nimenye me e pitaaba wo Padaame? Nihe pwo niihenye kojaeng?

Geé tai pwo ne ha a wâé te Padué

²³ Geé pii pie: «Tai ni naado, ke te tice aceli paciitihi.» Kehe time uce tai wâé. «Tai ni naado ke tai wâé», kehe time lé uce pamwoiu ni bénée.

²⁴ Ke me te tice paceli e pihane den, kehe me hane me de pa bénée.

²⁵Wâé heme geé wii, ne ha a *pwonime na wâé, ati nina icuhi ne he jenep, kehe me time geé uce pihanenaado ne kon.

²⁶Be a bwohemwo, ke a de Padaame, ke tai nina e pwon. Psaume 24.1

²⁷Ke hemepie e todekewé wo paceli time uce pa acéihî, ke mepie geé âcéin, ke geé wii a wiinaado na e ne tewé, ne ha a pwonime na wâé.

²⁸Ke hemepie e pii tewé wo pace céiu pie ani: «Ke a wiinaado na pwoâpwailo kon ne te ni duéé hauli», ke geé nemwo wii, wonaa mu ko pana e pii tewé, beme te wâé a pwonimen.

²⁹É cihe ko a pwonime weeng, kehe time uce wogewé. Kona he a pwonime pace céiu, ke e o te tauti ana é pwo na wâé? É mu ko ade?

³⁰Hemepie woéo, ke é pipwo-olé te Padué ne ko a wiinaado heme é pwowiinaado, ke é mu ko ade na lé pipiéo ko a wiinaado na é wii, he é pwo-olé te Padué ne kon?

³¹Hemepie geé wiinaado, ai é heme geé ûdu, ai é heme geé pwo ace céiu naado, ke geé tai pwo beme lé o pipaunu Padué ne ni apulie.

³²Geé nemwo hane ace watihen me lé tupwo wo lépwo *Juif, me lépwona time uce lépwo Juif, ai ni apulie te Padué.

³³Geé pwohewiiéo: É hane me wâé ne kolé ati ne he ni naado. Time é uce pihane dong, kehe é hane me wâé ati ne kolé, beme celuimilé.

1 Korénit 11

¹ Geé pipwohewiiéo, pwohewiin he é pipwohewii Kériso.

a huô tenye heme nye pwoitihi ibu

(Pwahamii tii: 11—14)

A bwo tawii puninye

²É pipii dewé, be geé mwo teko piniimiéo ati ne he ni naado, ke é ko a bwo âcehi ne ni cémun na é ne tewé.

³Kehe nimung me geé temehi pie, pa apihuô te ati ni apulie, ke wo Kériso; ke pa apihuô te ê toomwo, ke wo pa aiu hen; ke pa apihuô te Kériso, ke wo Padué.

⁴É heme geé pwotapitihi, ke wo pana e pwoitihi, me pana e cihe ne he nii Padué heme pwo a boon, ke time e uce pipaunu Kériso, pa apihuô ten.

⁵Ke tai ni toomwo na lé pwoitihi heme geé pwotapitihi, ai nina lé cihe ne he nii Padué, heme tice boolé, ke time lé uce pipaunu pa apihuô telé; ke piwien ne ko ê toomwo na e tali me tice iwo a punin.

⁶É hemepie ê toomwo, ke me te tice boon, ke me e tali me tice iwo a punin! Ke mepie tanim ne ko ê toomwo, me e tali me tice iwo a punin, ke wâé heme e ne ace bétawii na a punin.

⁷ Be pa aiu, ke me time e uce tawii a punin. Be weeng, ke a déme *a wâé te Padué; kehe ê toomwo, ke ê wâé te pa aiu.

⁸ Be time e uce tabuhi pa aiu wo Padué mu ko a éé ê toomwo, kehe e tabuhi ê toomwo mu ko a éé pa aiu.

⁹ Ke time e uce tabuhi pa aiu me de ê toomwo, kehe e tabuhi ê toomwo me de pa aiu.

¹⁰ É mu ko anaa, na ê toomwo, ke me tawii a punin: a ine a pihuô† na e mu haahin, mu ko ni *âcélo.

¹¹ Kehe é ne he Padaame, ke te tie ê toomwo heme te tie pa aiu; ke te tie pa aiu heme te tie ê toomwo.

¹² Be pwohewii ne ko ê toomwo, e tabuhieng mu ko pa aiu, ke wonaa ne ko pa aiu, e âbeele ne pwo bwohemwo mu ko ê toomwo. Ke tai ni naado, ke tai âbé mu ko Padué.

¹³ Geé pitauti pie, he te wâé me ê toomwo, ke me e pwoitihi te Padué heme time e uce tawii a punin.

¹⁴ He time e uce picaa na a bwomu pie, tanim heme pa aiu, ke e pwo me bwali ni apunin?

¹⁵ Ke hemepie ê toomwo, ke me bwali ni apunin, ke a pipwowâé, be ni apun, ke e ne beme a bétawii na a punin.

¹⁶ Ke hemepie pwo paceli muhi ten ko a bwomunen naa, kehe wogeme, ke te cemang ne kome, me ni acéhi ne ko Padué.

A wiinaado te Padaame

¹⁷ Hemepie é ko cihe tewé jenaa, ke time é uce piwâékewé. Be ni pitih tewé, na me wâé ne kowé, ke geé pipwotahi ne kowé.

¹⁸ Be a bécieuhen, ke é téne pie, é heme geé pwotapitihi, ke pwo celi piehadeniwé, ke é mwomwohi pie a juju.

¹⁹ Be wâé mwo hemepie pwo celi piehadeniwé, be me wonaa, ke me nye alahi mu hadeniwé, lépwona lé te pieabwé te Padué.

²⁰ É heme geé pwotapitihi, ke time uce a wiinaado te Padaame ana geé pé.

²¹ Be é heme geé pwoviinaado, ke geé wele, ke wo pa céiu, ke menen, ke wo pa céiu, ke e te junihe ûdu.

²² Te tice pomwa tewé me geé pwoviinaado me ûdu? Ai geé tééti a puapulie te Padué, ke geé pwo me tanim lépwona te tice delé? He me é pii tewé pie woté? Me é piwâékewé? Ûhu! É ne ha a bwomunen naa, ke time é uce piwâékewé.

Âne a wiinaado te Padaame

²³Be woéo, ke é hegi mu ko Padaame, ke é pacémunikewé kon pie: É ha a bwén na icueng hen, ke e pé a pwoloa wo Padaame lésu.

²⁴Ke e pipwo-olé te Padué, ke e ebii, ke e pii pie: «Ani, ke a ééng na me a dewé. Geé pwo ani beme geé pipaniimiéo.»

²⁵Ke é alecehe a wiinaado, ke e pé a mwoûdu ko tabe megele, ke e pii pie: «A mwoûdu ce, ke a inenaado ko a *piapwo na mwo coho, na e pwo wo Padué, ko a cewéhung. [Be o wonaa a bwo ne na a péém ne ha awiemewé me weeng.] É téteda heme geé ûdu, ke geé pwo beme geé pipaniimiéo.»

²⁶Be é téteda heme geé eni a pwoloa ce, ke me geé ûdu ha a mwoûdu, ke geé patemehi a bwo mele te Padaame die ko a bwo mwojuia ten.

Pininim

²⁷É mu ko anaa, ke wo pana e eni a pwoloa te Padaame, ai e ûdu ha a mwoûdu ten, heme time e uce pipwoiipieng, ke e pwotahi ne ko a éé Padaame ke a cewéhen.

²⁸Geé muko pétaapwo pininim ânebuhe a bwo wiinaado me ûdu.

²⁹Be wo pana e eni a pwoloa ke e ûdu ha a mwoûdu, heme time e uce temehi a éé Padaame, ke wo panaa, ke e te pébé a tautinaado ne kon.

³⁰É mu ko anaa, ke hiwon nina tice niihelé, ke cunu jélé mu hadeniiwé, ke hiwon nina lé mele.

³¹Ke mepie genye te pitauti ni bwomu tenye, ke time e o uce tautikenye wo Padué.

³²Ke heme e tautikenye ke e pwo me genye mwomwon wo Padaame, beme time nye uce pwocuhinaado me ni apulie pwo a bwohemwo.

³³Ke anaa, wogewé lépwo bést, é heme geé pitapitikewé beme geé pwowiinaado, ke geé piucéikewé.

³⁴Ke mepie mene pace céiu, ke e pwowiinaado ne pelen, be heme geé pitapitikewé, ke me time e uce tautikewé wo Padué. É ne ko ni bést naado, ke é bo pii hemepie é âdé pelewé.

1 Korénit 12

Ni âpipati te a Jenen litih

¹É ne ko ni âpipati te a *Jenen litih, wogewé lépwo bést, ke nimung me geé temehi ni naado naa.

²É bwolihi, ke mwo te time geé uce téele temehi Padué. Be lé pwo me geé piâ ité ne ni apulie, ke geé tee âcehi ni *dème dué na tice mulie kolé. Ke pwocoon dewé me geé nelé.

³É mu ko anaa, na nimung me é patemehi tewé a naado na céiu: Hemepie pwo paceli e cihe mu ko a Jene Padué, pwocoon me *piapwo lésu. Ke te tice paceli

jan me e pii pie: «Wo Iésu, ke Padaame!», heme time uce é mu ko a Jenen litihi.

Te céiu a Jenen litihi na e ne

⁴Muko pétaapwo pwo ni âpipati na ne, kehe te céiu a Jenen litihi na e ne.

⁵Muko pétaapwo pwo ni bwo pipwoeabwé ko ni penem, kehe te céiu Padaame na nye penem den.

⁶Muko pétaapwo pwo ni penem, kehe te céiu Padué na e pwo ni penem ne konye ati.

⁷Ke e muko pétaapwo ne ni âpipati a Jenen litihi beme wâé ne konye ati:

⁸Ke wo pa céiu, ke e hegi mu ko a Jenen litihi a bwo temehinaado; Ke wo pa céiu, ke e hegi mwo, te é mu mwo ko a Jenen litihi, a pwooti ko ana e habwii ten ne ha a jenen.

⁹Ke wo pa céiu, ke e hegi a céihi, ke te é mu mwo ko a Jenen litihi. Ke wo pa céiu, ke e hegi, ke te é mu ko a Jenen litihi beme e pwo me tieden ni cunu.

¹⁰Ke wo pa céiu, ke e pwo ni *pipwojunuun. Ke wo pa céiu, ke e cihe ne he nii Padué. Ke wo pa céiu, ke e temehi me e pineitééhi nina e âbé mu ko a Jenen litihi, ke nina time uce âbé mu kon. Ke wo pa céiu, ke e temehi cihe he ni pwooti na te pi-ité. Ke wo pa céiu, ke a bwo piocihe ne ni pwooti naa.

¹¹Kehe te a Jenen litihi na e tai pwo ninaa. Ke e muko pétaapwo patih pwohewii ana te nimen kon.

Céiu genye me Kériso

¹²Be piwien ne ko a éé apulie, be te céiu, kehe hiwon ni bée duaan mu kon, beme lé pwo ace éé apulie. Hemepie junihe hiwon jélé, kehe icehi ana lé tai mu ha a éé apulie na te céiu. Ke te piwien mwo ne mwo ko Kériso.

¹³Be wogenye mwo, ke tai puukeny ko a Jenen litihi, beme céiu genye ne ha a één, heme ni *Juif ai nina time uce ni Juif, ai ni *apenem tice ja kon, ai heme ni apulie na time uce ni apenem tice ja kon; kehe genye tai ûdu mu ko a tabe na céiu na a Jenen litihi, beme céiu genye me weeng.

¹⁴Be a éé apulie, ke time uce ace céiu duaan mu kon, kehe hiwon ni piduaan.

¹⁵Hemepie pa a apulie, ke me e pii pie: «Woéo, ke time uce pa i apulie, ke é mu ko anaa, ke pwohewiin heme time é uce mu ha a éé apulie», kehe e teko mu ha a éé apulie.

¹⁶Hemepie e pii na a pwojééne pie: «Woéo, ke time uce pa naamii apulie, ke é mu ko anaa, ke pwohewiin heme time é uce mu ha a éé apulie», kehe e teko mu ha a éé apulie!

¹⁷Hemepie ati a éé apulie, ke me tai a naamii apulie, ke genye o woté ace bwo téne nen? Hemepie ati a éé apulie, ke me tai a pwojééne, ke genye o woté ace bwo téne ne ni ûdenaado?

Te céiu a één

¹⁸Kehe e te muko ne ni piduaan ne ha a éé apulie wo Padué, ke te é ne ha ana te nimen kon.

¹⁹Hemepie te ju a céiu duaan mu ko a één, ke time uce a éé apulie na hején.

²⁰Be hiwon ni piduaan, ke te céiu a één.

²¹A naamii, ke pwocoon me e pii te a i apulie pie: «Time uce pwonaado ne kom!» Ai a puni pa apulie, ke pwocoon me e pii te ni a apulie pie: «Time uce pwonaado ne kowé!»

²²Kehe icehi ana nihe pwonaado ne ko ni piduaan ne ha a éé apulie na nye niimihi pie tice niihelé.

²³Ke genye te nihe pipwocile ni duaan na nye niimihi pie time uce ju pwonaado ne kon. Ke genye te junihe pipwopweehi ne ko nina time genye uce alahi.

²⁴Ke time genye uce wonaa ko a bwo pipwopweehi ne ko ni duaan ne ha a éénye na jan me nye alahi. Kehe e te pwo a éé apulie wo Padué me wonaa,

²⁵beme te tice aceli pineitééhi ne ha a éé apulie. Tai ni piduaan ne ha a éé apulie, ke lé muko pétaapwo picilelé.

²⁶Hemepie cunu ace céiu duaan mu ko a éé apulie, ke tai ati ni duaan ne ko a éé apulie, ke lé tai mu he ni picani me weeng. Hemepie ace céiu duaa apulie, ke me piwâéeng, ke tai ni piduaan, ke lé tai pipwodéén me weeng.

Ni béé penem na e ne wo Padué

²⁷Wogewé, ke a éé Kériso, ke muko pétaapwo wogewé, ke ni piduaan ne ha a één.

²⁸Ke wo Padué, ke e ne, pele ni acéihi me: Lépwo bécéuhen, ke wo lépwo *apostolo; Lépwo béalohen, ke wo lépwo *pérféta [na lé pébé a pwootti mu pele Padué]; Lépwo bécéhen, ke wo lépwo apwocémun. Ke é nelang, ke pwo: Lépwona lé pwo ni naado na pwojunuun; Lépwona lé pwo me wâé ni cunu; Lépwona lé picani te ni béén; Lépwona lé pipé ni béén; Lépwona lé cihe he ni pwootti na te pi-ité.

²⁹Lé te tai pwo apostolo? Lé te tai pwo pérféta? Lé te tai pwocémun? Lé te tai pwo ce pipwojunuun?

³⁰Te tai ne telé me lé pwo me wâé ni cunu? Lé te tai cihe he ni pwootti na te pi-ité? Lé te tai piocihe? Ûhu!

³¹Geé hane me etewé ni âpipati na ubwo. Ke é bo habwii tewé mwo a pwaaden na junihe wâé.

1 Korénit 13

A pipwoééhe

¹Hemepie é cihe he ni pwooti te ni apulie ke ni *âcélo, ke me tieden dong a pipwoééhe, ke é te ju pwohewii a kiloon na taii, ai a mekapwa na tanahi.

² Hemepie etong *me* é cihe ne he nii Padué, ke me é temehi nina e ha aduwo, ke me etong ati a bwo temehinaado, ke me etong ati a céhi, beme é pitaatééhi ni amu ne ni juwole, ke hemepie time uce eânimung de ni béén, ke te ju piticenaado ne kong.

³Hemepie é patihi ni dong ne te nina menelé, ke me é ne a ééng beme cini, ke hemepie time uce eânimung de ni béén, ke te ju piticenaado ne kong.

He ade a pipwoééhe?

⁴A pipwoééhe, ke e ucéhi, ke e picani te ni béén, ke time e uce pitaaba, ke time e uce pipii den, ke time uce upwonimen.

⁵A pipwoééhe, ke time e uce pwo celi tanim, ke time e uce pihane den, ke time e uce okéé, ke time e uce cile ni ta na lé pwo ne kon ne ni béén.

⁶ Time e uce pituumé ko a ta, kehe e pituumé ko a juuju.

⁷ A pipwoééhe, ke e pineuhi ati, ke e cile a céhi na ati he ni bwomunen, ke e mu ucéhi ati, ke e pé ne kon ati.

E te mu dieli mwo

⁸Ke time e uce mele a pipwoééhe. Ke o tieden ni pwooti na pii ne he nii Padué. Ke o tieden ni pwooti na te pi-ité. Ke o tieden a bwo temehinaado.

⁹Ke genye te ju temehi a céiu duaan. Ke genye te ju pii a céiu duaan ne he nii Padué.

¹⁰Ke hemepie e bo âbé ana ju wâé, ke bo tieden ana time uce hején.

¹¹He mwo woéo pa cuwo nahi ewa, ke é cihe pwohewii pa cuwo nahi ewa, ke é niimihi pwohewii pa cuwo nahi ewa, ke é pitautinaado pwohewii pa cuwo nahi ewa. Ke he é caa apulie, ke caa nebwén na é pwohewii ni bwomu te pa cuwo nahi ewa.

¹²Be é jenaa, ke time genye uce alih ihi, ke nye alih ihi pwohewiin ne ha apiocile na caa au. Kehe é alechen, ke genye bo ju alih gaale. Ke é jenaa, ke é te ju temehi a céiu duaan. Kehe é alechen, ke é bobè temehi pwohewiin he e temehiéo wo Padué.

¹³Lé mu l épwo naado ce cié: a céhi, a piuca, ke a pipwoééhe. Kehe ana junihe piubwo hadenii ninaa, ke a pipwoééhe.

1 Korénit 14

A bwopwone lupwo alo âpati

¹ Geé hane ânebun a pipwoééhe ne ha ati ni naado na geé pwo. Wâé mwo heme te junihe nimewé ko ni âpati na e ne na a *Jenen litih, ke e mu hadenii ninaa, ke a âpati ko a cihe ne he nii Padué.

²Be, me go cihe he ni pwooti na te pi-ité, ke time go uce cihe te ni apulie, kehe go cihe te Padué. Be te tice paceli e temehi nina go pii, be é mu ko a Jenen litihi na go pii nina e ha aduwo.

³Heme go cihe ne he nii Padué, ke go cihe te ni apulie: Go pamwoiulé, ke go paûmiélé, ke go pwopweehi ne kolé.

⁴Heme go cihe ha a pwooti na te pi-ité, ke go te pipamwoiuko. Kehe me go cihe ne he nii Padué, ke go pamwoiu ni acéihi.

⁵Nimung me geé tai cihe ha a pwooti na te pi-ité, kehe te junihe nimung me geé tai cihe ne he nii Padué. He go cihe ne he nii Padué, ke wâé mwo kojan heme go cihe ha a pwooti na te pi-ité, ju icehi hemepie e piocihen, beme e pamwoiu ni acéihi.

Pamwoiu ni acéihi

⁶Hemepie é tuie lé pelewé, wogewé lépwo acéihi bééng, ke me é te ju pacihewé cehi ha a pwooti na te pi-ité, ke é bo woté ko ace bwopwonen me é pamwoiukewé? Ûhu, wâé heme é pébé a pwooti na geé temehi, ne ha a bwo pwopune tong, ai é ne ha a pwooti ko a bwo temehinaado, ai é ne ha a pwooti na é pébé céiikewé ne he nii Padué, ai é ne ha a pwooti ko ana e habwii tong wo Padué ne ha a jenen. Be ati ninaa, ke ni bwopwonen me picani tewé.

⁷Hemepie ni pihenyebi, ke me pwo a patin, pwohewii ne ko a oopwé ai a gitar, hemepie time uce téne ehi ni patin celi pi-ité, ke genye o woté ko ace bwo temehi na ace maa nyebi celi e ko pwo?

⁸Ke mepie a tutu, ke me e pwo ace patin celi time uce wâé, woo na e bo pipwopweeng me e â ko pa?

⁹Te piwien ne mwo kowé, hemepie é mu ko a patiwé, ke me time geé uce ne ace pwooti celi me temehi ehi, ke genye bo woté ace bwo temehi na aceli geé ko pii? Be geé teko ju cihe nge ha a puwo.

¹⁰Te junihe hiwon ni pwooti pwo a bwohemwo, kehe te tice aceli piticenaado ne kon.

¹¹Hemepie time é uce temehi ace pwooti, ke é o coho ne pele paceli e ko cihe, ke weeng, ke pa coho ne tong.

¹²Wogewé mwo, be te junihe nimewé ko ni âpati na e ne na a Jenen litihi, geé hane me hiwon ne tewé ninaa beme pamwoiu ni acéihi heme geé pimu ibu.

Piocuhe beme lé temehi

¹³É mu ko anaa, ke wo pana e cihe ha a pwooti na te pi-ité, ke me e pwoiitihi beme ne ten me e piocihe.

¹⁴Be é hemepie é pwoiitihi ha a pwooti na te pi-ité, ke a jenung ke e pwoiitihi, kehe a bwo temehinaado tong, ke te tieden.

¹⁵Ade aceli me é pwo? É bo pwoiitihi ko a jenung, kehe é o pwoiitihi mwo ne ha a bwo temehinaado tong. É bo pwonyebi ha a jenung, kehe é o bo pwonyebi mwo ko a bwo temehinaado tong.

¹⁶Be é hemepie go pipwo-olé te Padué ne ha a jenem, ke e o woté a bwo heginnen pie «Amen» wo pana e mu pelem ne ha a pwopwoiitihi tem? Be time e uce temehi celi go ko pii.

¹⁷Go pwo ni pwopwoiitihi na junihe wâé, kehe time o uce pamwoiueng ne ha a céhi ten.

¹⁸É pipwo-olé te Padué mu ko ana é cihe ha a pwooti na te pi-ité koja wogewé ati.

¹⁹Kehe me nye pwotapitihi, ke nimung me é pii celi nim ce pwooti mu ko a bwo temehinaado tong, beme é pacémunihi mwo ni béén, kojan hemepie 10000 ce pwooti ha a pwooti na te pi-ité.

Ni pwooti na ité ke a inenaado

²⁰Lépwo bééng, geé nemwo alihí pwohewii ne ko ni nahi ewa ne ha a bwo tautinaado. Kehe é ne ko a ta, ke me wogewé ni cuwo nahi ewa, kehe é ne ko a bwo tautinaado, ke me wogewé lépwo apulie.

²¹Caa te tii ne he ni tii iitihi pie, e pii wo Padaame pie: *É bo cihe te a puapulie ce ha a céiu pwooti na te pi-ité, me ha a pati ace céiu puapulie. Kehe o te piwien be time lé o uce tabemiéo.* Ésaïe 28.11-12

²²Kehe é ne ko ni pwooti na te pi-ité, ke a inenaado, time uce é ne ko lépwo acéhi, kehe é ne ko lépwona time lé uce céhi. A bwo cihe ne he nii Padué, ke a inenaado, time uce é ne ko lépwona time lé céhi, kehe é ne ko lépwo acéhi.

²³Hemepie lé taineibulé wo lépwo acéhi, ke mepie lé tai cihe ha a pwooti na te pi-ité, ke me lé tehenebé wo lépwoce apulie celi te tice aceli lé temehi, ai lépwoceli time uce lépwo acéhi, ke lé o pii pie wogewé lépwo apiolo!

²⁴Ke hemepie lé tai cihe ne he nii Padué, ke mepie pwo paceli time uce pa acéhi ai paceli te tice celi e temehi, ke me e tehenebé, ke e téne ne kon ni pwooti telé ati, ke e temehi ni ta pwo ten.

²⁵Nina e ha aduwo ne he pwonimen, ke te ju tai mu ha a pwaale, ke e bo tidihu jilin beme e pipaunu Padué, ke e pii pie: «A juuju pie wo Padué, ke e pelewé!»

Bwomu tenye heme nye pipitikenye

²⁶He ade aceli me pwo, wogewé lépwo bééng, heme geé pitaineibukewé? E pébé ace nyebi wo pace céiu; Ke e pacémunihi wo pace céiu; Ke wo pace céiu, ke e pii ana e habwii ten wo Padué; Ke e cihe ha a pwooti na te pi-ité wo pace céiu; Ke e piocihen wo pace céiu. Kehe tai ninaa, ke a bwopwonen beme pamwoiu ni acéhi.

²⁷Hemepie pwo celi lé cihe ha a pwooti na te pi-ité, alo ai cié, kehe lé muko pétaapwo cihe, ke me pwo paceli e piocihen.

²⁸Ke hemepie te tice celi lé piocihen, ke genye nemwo cihe. Kehe me nye te picihe tenye, ke genye cihe te Padué.

²⁹É ne ko lépwo péroféta, ke alo ai cié lépwoceli lé cihe. Ke me lé tauti wo lépwo béis.

³⁰Ke hemepie e hegi ace pwooti mu ko Padué wo pace céiu, ke e nemwo cihe wo pa bécéiuhen.

³¹Te jan me geé tai cihe ne he nii Padué, muko pétaapwo wogewé, beme tai pacémunihi, ke pamwoiuhi.

³²A jene pa péroféta, ke e te ténedé pa péroféta.

³³Be wo Padué, ke time uce pihauli nang, kehe e ne a au ke belece.

Bwomu te ni toomwo

³⁴Ke ni toomwo, ke me lé nemwo cihe ne he ni *mwotapitihi, pwohewii ati ne pele ni acéihi, be time uce ne telé me lé cihe. Kehe me lé ténedehi, pwohewii ana e pii mwo ne ni *patén de Moosé.

³⁵Hemepie nimelé me lé temehi ace céiu naado, ke wâé heme lé tahimwo ni aiu helé ne he ni pomwa telé. Be é ne ko ê toomwo, ke time uce wâé heme e cihe ne he ni pitih te ni acéihi.

³⁶He é mu pelewé he na e wie mulang a pwooti te Padué? Ai te é ne tewé cehi celi e âbé beme dewé?

³⁷Hemepie pwo paceli e mwomwohi pie pa péroféta, ai me e neeng bé na a Jenen litih, ke me e temehi pie ana é ko tii me dewé, ke a pihuô te Padaame.

³⁸Ke é hemepie pwo paceli time e uce temehi ninaa, ke wonaa be time e uce temehieng wo Padué.

³⁹Wonaa, wogewé lépwo béis, ke geé hane me geé cihe ne he nii Padué, ke geé nemwo pacuwoshi a cihe ha a pwooti na te pi-ité.

⁴⁰Kehe me tai pwo ne ha au, ke é ne ha a bwomunen na me wâé.

1 Korénit 15

a bwo mulie cemwo mu ha amele

(*Pwahamii tii: 15*)

E caa mulie cemwo wo Kériso

¹É paniimihi tewé, wogewé lépwo béis, a Pwooti Wâé na é caa patemehi tewé. Ke geé caa hegi, ke geé ko mulie ne hen.

²Ke é mu ko a Pwooti Wâé naa, ke e bo celuimikewé, hemepie geé temehi ne he ni bwomunen na é patemehi tewé. Ke hemepie time uce wonaa, ke o te ju piticenaado ne ko a céhi tewé.

³É caa ne tewé a pune na é caa hegí. Weengi ana junihe pwonaado ne kon: E mele wo lésu Kériso ne ko ni ta pwo tenye, pwohewii ana tii ne he ni tii iitihi.

⁴Ke neduwoeng. Ke e mulie cemwo ha a bécíéhe ni tan, pwohewii ana tii ne he ni tii iitihi.

⁵Ke e âbeeti Pétérú, ke wo lèpwo ¹² *apostolo.

⁶Ke é alecehe anaa, ke e âbeeti lèpwona wédenihi nina 500 acéhi. A ubwo kolé, ke lé mwo teko mulie, kehe wo lèpwo bén, ke lé caa mele.

⁷É alechen, ke e âbeeti Cang, ke tai lèpwo apostolo.

E âbeeti Paulo

⁸Ke é alechelé ati, ke e âbeetiéo pwohewii pa bénebwéne ewa.

⁹Be woéo pana junihe wahin jo koja lèpwo apostolo. Ke time uce jan me toii kong pie pa apostolo, be é pwotahinaado ne ko ni acéhi ne ko Padué.

¹⁰Kehe é mu ko a *pipwoééhe tice ja kon de Padué, ke é mu ha a bwomunen naa. Ke a pipwoééhe tice ja kon den ne kong, ke time uce piticenaado ne kon, be é te junihe penem wéden kojalé ati. Time uce woéo, kehe a pipwoééhe tice ja kon de Padué na e kong.

¹¹Ke wonaa hemepie woéo ai woélé, ke weengaa kuti a Pwooti Wâé li gême pipatemehi tewé, ke li geé céhi ne kon.

E bo pwo me nye mulie cemwo

¹²Ke hemepie gême patemehi pie e mulie cemwo mu hadenii nina lé mele wo Kériso, ke woté? Be lé pii wo lèpwo bén mu kowé pie, te tice mulie cemwo te nina lé caa mele.

¹³Hemepie te tice mulie cemwo te nina lé mele, ke wieli time e uce mulie cemwo mwo wo lésu Kériso!

¹⁴Ke mepie time e uce mulie cemwo wo lésu Kériso mu hadenii ni amele, ke ana gême cihe kon, ke o te ju piticenaado ne kon, ke a céhi tewé mwo, ke o te ju piticenaado ne kon.

¹⁵Hemepie ni amele, ke time lé uce mulie cemwo, ke anaa, ke a bwopiinen pie wo Padué, ke time e uce pwo me e mulie cemwo mu ha amele wo Kériso. Ke é ha a bwomunen naa, ke wogeme lèpwo agele, he gême pii pie wo Padué, ke e pwo me e mulie cemwo mu ha amele wo Kériso.

¹⁶Be mepie time lé uce mulie cemwo nina lé mele, ke time e o uce mulie cemwo wo Kériso.

¹⁷Ke mepie time e uce mulie mu ha amele wo Kériso, ke o te ju piticenaado ne ko a céhi tewé. Ke mwo te wogewé he ni ta pwo tewé.

¹⁸Ke élé ité koja Padué ni acéhi ne ko Kériso na lé caa mele.

¹⁹Hemepie te ju a mulie ce cehi, na genye céhi ne ko Kériso, ke wogenye ni apulie na te junihe ta ne konye.

Pa bécéiuhen na e mulie cemwo

²⁰Ke weengi ana a juuju: E caa mulie cemwo mu hadenii nina lé mele wo Kériso, pa atabuhi ko a tii âdaanu: inen pie o hiwon nina lé o mulie cemwo.

²¹Be a mele, ke e âbé mu ko pa apulie na te céiu nang, wo *Adamu. Ke te é mu mwo ko pa apulie na te céiu nang, wo Kériso, na e âbé a mulie cemwo te ni amele.

²²Pwohewiin he lé tai mele be céiu jélé me Adamu, ke te piwien mwo ne he Kériso, be lé bo tai mulie be céiu jélé me weeng.

²³Ke e caa mi pamulipi Kériso mu ha amele wo Padué, be pa bécéiuhen. Ke e bo tai pamulipikenye mwo, ni apulie te Kériso, heme e mwojuia cemwo ne mwo éni pwo bwohemwo wo Kériso.

²⁴Ke é ha anebwén kon, ke e bo tanahi taabwon ati ni pihuô na ta na e konye wo Kériso. Ke e bo ne a pihuô he daame te Padué Caa.

²⁵Be wâé heme e pihuô dieli hemepie wo Padué, ke e ne ati lépwona lé pwotahi ne kon, haahi ni an.

²⁶A bénebwénen na e bo tanahi taabwon, ke a mele.

²⁷Be wo Padué, ke e *tai ne haahi ni an. Psaume 8.7* Kehe ati ninaa, ke te wo Padué na e ne te Kériso a pihuô ne ko ati ni naado.

²⁸Hemepie lé tai mu haahi ni pihuô ten, ke wo pa Naîn, ke e bo mu haahi ni pihuô te pana e ne ten a pihuô. Be me wonaa, ke bo wo Padué na e pihuôhi ati ni naado.

Geé ûmiê!

²⁹Hemepie te pwo ace céiu bwomunen, ke lé o pwo de wo lépwona puulé me de nina lé mele? Hemepie time lé uce mulie cemwo nina lé mele, ke é mu ko ade na lé pwo me puulé me delé?

³⁰Ke wogeme, ke é mu ko ade na geme teko mu he ni naado na abwobwo téteda he ni benaamwon?

³¹É téteda he ni tan, ke é tee âmwonuhi a mele. A juuju pie é te junihe pipwodéén kowé, wogewé ni béis, ne he Kériso lésu, Padaame henye.

³²Hemepie te ju icehi me de a mulie pwo a bwohemwo, na é pwopa ne ko ni ‘wota apiaba’ ne Éfeso, ke ade aceli é o pé mu kon? Hemepie nina lé mele, ke

me time lé uce mulie cemwo, *ke genye pwowiinaado, ke genye ûdu, be é meé, ke genye o mele.*

³³Geé pipwocile! Be: «Lépwo bénée na ta jélé, ke lé pwotahi ne ko ni bwomu tenye na wâé.»

³⁴Geé mwojuia mwo ne he ni bwomu tewé na wâé, ke geé nemwo pwo nina ta. Be time lé uce temehi Padué wo lépwo bénée mu kowé. É pii anaa beme tanim gewé.

Éé apulie na mwo coho

³⁵Ke wiel go o pii tong pie: «Lé woté ace bwo mulie cemwo telé, ne nina lé caa mele? Ke é he ace de éé apulie celi lé mwojuia cemwo ne hen?»

³⁶Wogo pa apulie na te tice celi go temehi! Be a pidenaado na go cemi, ke e o mi mele ânebuhe ace bwo cim nen.

³⁷Ke ana go cemi, ke time uce a acuwo, kehe te ju a pidenaado, a pide *blé* ai ace céiu pidenaado.

³⁸Ke wo Padué, ke e ne te a pidenaado naa ace één celi te nimen kon, ke muko pétaapwo ni pidenaado, ke e ne ni één na time uce piwien.

³⁹Ke time uce piwie ni éé nina lé mulie, be ni apulie ni bénée, ke ni wota ni bénée, ke ni meni ni bénée, ke ni ikua ni bénée.

⁴⁰Pwo nina élé he miiden, ke te pwo mwo nina élé pwo bwohemwo. Ke time uce piwie a bwo wâé ne nina élé he miiden, me nina élé pwo bwohemwo.

⁴¹A céiu, ke a pwéélang ko a téale, ke a céiu, ke a pwéélang ko a wole, ke ni bénée, ke ni pwéélang ko ni ceni. Ke ni ceni, ke time uce piwie ni pwéélang hen.

Ana e mulie cemwo

⁴²Ke o te piwien mwo ne ko a mulie cemwo te nina lé mele. Nina neduwohi he pule, ke lé mele. Ke nina mulie cemwo, ke time lé o bo uce mele mwo.

⁴³Ana neduwohi, ke caa piticenaado ne kon, kehe ana e mulie cemwo, ke te junihe wâé. Ana neduwohi, he te ju tice niihen, ke e mulie cemwo he pwo niihen.

⁴⁴Ana neduwohi, ke a éé apulie, ke é alecehen, ke o a éé apulie na mwo coho. Be te pwo a éé apulie, ke te pwo mwo a jenen.

Adamu me Kériso

⁴⁵Be caa te tii ne he ni tii iithi pie: *Pa bécéiuhe apulie, wo Adamu, ke e hegí a mulie. Genèse 2.7* Pa bénebwéne Adamu, wo Kériso, ke a Jenen na e ne a mulip.

⁴⁶Kehe a éé apulie na mwo coho, ke time uce a bécéiuhen, kehe a éé apulie. Ke e bo âbé alecehen a éé apulie na mwo coho.

⁴⁷Wo Adamu, pa bécéiuhe apulie na tabuhieng mu ko a pule, ke e mu pwo bwohemwo. Kehe e âbé mu he *miiden wo Kériso, ‘pa báalohe apulie’.

⁴⁸Be wo Adamu, ke tabuhieng mu ko a pule, ke lé pwohewiieng ni apulie, na lé mu pwo bwohemwo. Kehe wo Kériso, ke e âbé mu he miiden, ke lé pwohewiieng ni apulie na lé mu he miiden.

⁴⁹Genye pwohewii pa apulie na tabuhieng ko a pule. Alecehen, ke genye bo te pwohewii mwo pa apulie na e âbé mu he miiden.

Nye pieda dieli mwo

⁵⁰Weengi ana é pii tewé, wogewé ni bééng: Time lu o uce taa ha a *Mwametau te Padué a éé apulie, ke a cewéle. Be nina nyaale tieden, ke te tice delé ha a *mulie dieli mwo.

⁵¹ Geé téne ehi, be é patemehi tewé ana te junihe pwojunuun na e ha *aduwo: Time genye o uce tai mele, kehe o tai taatéékenye

⁵²ju a benaamwon, na piipwong ni naamiim, ha a bénebwéne pati a tutu. Be o cuu a tutu, ke nina lé mele, ke lé o mulie cemwo, ne ha a mulie na tice anebwén kon. Ke wogenye, ke o taatéékenye.

⁵³Be wâé heme e mele a éé apulie, ke me taatééhi, ke me e mulie.

⁵⁴Ke mepie taatééhi a éé apulie, ke me e mulie. Ke é nelang he na o bo pacuwohi a pwooti na tii pie: *E piwéden koja a mele a mulie cemwo.* Ésaïe 25.8

⁵⁵ *Wogo a mele, ke e wé a niihem? Wogo a amele, ke bo woté ko ace bwo pwotahi ne kome mwo ?Osé 13.14*

⁵⁶ A ju junuu a mele ne konye, ke ana e âbé mu ko ni ta na genye pwo. A junuu a ta, ke e âbé mu ko [ana time nye uce mulie ehi ne he] ni *patén de Moosé.

⁵⁷Genye pipwo-olé te Padué, na e ne tenye me nye piwéden dieli mwo, mu ko Padaame henye, lésu Kériso!

⁵⁸Ni ju bééng, geé cumang me te tice celi e patupwokewé. Geé penem beme wâé ngen ana nime Padué kon, heme geé ko temehi pie a penem dewé, ke time uce piticenaado ne kon ne he Padaame.

1 Korénit 16

Ni béé pihuô te Paulo Âpati me de lépwo Iérusaléma

¹ É ne ko a mwani na taineibuhi me de ni acéihi ne *Iérusaléma, pwohewii ana é pii te ni acéihi ne Galat, ke geé pwo mwo.

²Tai é he ni bécéiuhe tan ne ha a naadenitan, ke muko pétaapwo wogewé, ke geé neité ce mwani celi geé caa ko piwâam kon ne pelewé, beme time geé uce ucéihi ace bwo tehene lé tong, ke me geé bo taineibuhi ce mwani.

³Wâé heme geé pipégali ni apulie, beme lé pé ngen ce âpati tewé ne Iérusaléma. Ke é hemepie caa woéo lang, ke é bo nelé ngen ne pehi ce tii, beme *pajuujuhi pie wogenye na genye pahedelé.

⁴É hemepie wâé me é ân, ke geme bo tai miengen.

É pipwopweéeo beme é engen

⁵É bo âdé pelewé, alecehe a bwo pitahagéi na a province Macédoine tong.

⁶Wielí é o mwo mu pelewé ha ace céiu benaamwon, wielí ati a benaamwon ko ta-amu. Ke geé bo ne tong ce bépwonen ne he celi me é â lang.

⁷Be time uce nimung me é ju alikewé heme é âdé, kehe é piniimihi pie me mwo pwo ace benaamwon celi me é mwo mu pelewé, hemepie te nime Padaame.

⁸Kehe é o te mu Éfeso die ha a tan ko Pentekote,

⁹be pwo a pomwa na ubwo na tehi ne ko a penem na wâé, kehe hiwon lépwona lé cubwoniéo.

¹⁰Hemepie e tuie lé wo Timoté, ke geé hegieng ehi, beme wâé ne kon, be e penem me de Padaame pwohewiiéo.

¹¹Ke me te tice paceli e téétieng, kehe geé ne ten ce bépwonen beme e mwojuia mwobé die pelong heme wâé a pwonimen. É o ucéieng me lépwoce bénée celi lé o âbé.

¹²É ne ko pa bénée Apolos, ke é te cuwo ko pii ten pie me e âdé pelewé me lépwo bénée, kehe time uce nimen me e âdé ni. Kehe e bo âdé, hemepie e bo tooli ace bwo âdé ten.

Bénebwéne pwooti

¹³Geé ûmiê! Ke geé *cumang ne ha a céhi, ke geé mwoiu!

¹⁴Ke me tai ni naado ne pelewé, ke me tai pwo ne ha a pipwoééhe.

¹⁵Nimung me é pii tewé a céiu naado: Geé te temehi pie wo Stéfanas, ke ni apulie mu ha a pwomwoiu ten, ke ni bécéiuhen na lé céhi ne Akaï, ke lé penem me de ni acéihi.

¹⁶Ke wogewé mwo, ke geé ténedé ni apulie na pwohewilé, ke ni apulie na lé te junihe penem me woélém.

¹⁷É pituume ko a bwo âbé te Stéfanas, ke wo Fortunatus me Akaïkus, be lé wodehikewé ne pelong, ke lé pamwoiuéo.

¹⁸Be lé paûmiêhi a jenung, ke a jenewé. Geé pwo me wâé tewé ni apulie na wonaa jélé!

Bépinelé

¹⁹Ni acéihi ne province Asia, ke lé pwobwocu tewé. Akilas me Priscile, me nina lé taineibulé ne pelelu, ke lé pwobwocu tewé ne he Padaame.

²⁰Tai lépwo acéihi na élé éni, ke lé pwobwocu tewé. Geé pimwomwaaukewé heme geé pipwobwocu tewé, pwohewii nina pibéélém.

²¹Woéo Paulo pana é tii ko a ing a bwocu ce.

²²Mepie pwo paceli time uce eânimén de Padaame lésu Kériso, ke me e mu ha apwohi! Maranata: Âbé go Padaame!

²³Ke me a pipwowâé te Padaame lésu, ke me tai mu pelewé ati!

²⁴Ke tai e pelewé ati a pipwoééhe tong, ne he Kériso lésu. Adéikewé!

2 Korénit

2 Korénit 1

Pipwobwocu

¹Woéo Paulo, na é pwotii, woéo pa apostolo te lésu *Kériso, âcehi ni pihuô te Padué. [Be e pahedeéo ngen, beme é patemehi a pwooti ten.] É pwotii lé céiikekewé, wogewé a puapulie ten, na geé mu ha a pwomwo ubwo Korénit, ke me de mwo ni apulie ten ne ha a province Akaï. Wogemu me Timoté, pa céiu acéihi béénye. [Ke e pwobwocu tewé mwo.]

²Wâé heme e mu kowé a *pipwoééhe tice ja kon, me a péém na e âbé mu pele Padué henye, me Padaame lésu Kériso. Adéikewé!

E pamwoiukenyne ne he ni picani

³Nye pipaunu Padué, Caa te Padaame henye lésu Kériso. Be pa Caa tenye mwo na nihe eânimén denye, ke e te cuwo ko pwo nina wâé ne konye. Ke weeng Padué, na e mu te cuwo ko pwopweehi ni pwonimenye, ke e pamwoiukenyne.

⁴⁻⁵Be e wonaa tenye heme nye mu he ni picani mu ko Kériso. Ke hemepie te junihe ubwo ni picani tenye, ke o te junihe ubwo wéden a bwo pwopweehi ne ni pwonimenye ten ne ko Kériso. Ke wogenye mwo, ke o jan ne konye me nye uce pwopweehi ni pwonime ni béén na lé mu he ni picani.

⁶É mu ko anaa, na hemepie é mu he ni picani woéo, ke a bwopwonen me é pwopweehi ni pwonimewé, beme celuimikewé. Be e pamwoiuéo [wo Padué] beme é pamwoiukewé, heme geé mu he ni picani pwohewiiéo.

⁷Ke é temehi pie, geé cumang [ne he ni céihi tewé]. Be é he geé mu he ni picani pwohewiiéo, ke e pwopweehi ni pwonimewé wo Padué pwohewiiéo.

Lé pwotahinaado ne ko Paulo ne Asia

⁸Wâé heme geé temehi, wogewé lépwo bééng, pie lé te nihe pwotahinaado ne kong ne ha a province Asia. Ke caa pwocoon ne kong me é picani ne ko ninaa, ke é caa pwo me é mele.

⁹Pwohewiin heme tautiéo, ke pwocuhinaado tong die ha a mele. Ke heme wonaa, ke a bwopwonen, beme é nemwo picéihi ne kong, ke me é pipatupwoéo te Padué, na e pwo me lé mulie cemwo lépwo amele.

¹⁰E caa te celuimiéo koja a mele, ke e o mwo te celuimiéo mwo he ni benaamwon ce. Ke é céihi me ubwo pie, e o mwo te celuimiéo mwo he ce tan celi mwo e he pwaaden.

¹¹Ke wogewé, ke geé picani tong, ne he ni pwopwoüühi tewé, wogewé me lépwona hiwon jélé. Ke e téne wo Padué, [ke e celuimiéo] ke e adéiéo. Ke hiwon ni apulie na lé pwo-olé ten ko ninaa.

a bwo mu ten me lépwo korénit

(Pwahamii tii: 1—7)
Mwomwon ni huô tong ne tewé

12[Wâé heme geé temehi pie] ati ni naado na é pwo ne éni pwo bwohemwo, ke é pwo ne ha a juuju, ke é mu ha a ju pwonimung. Ke te piwien mwo ne ko ni penem dong ne kowé [be te tice ta hen]. Ke e pajuujuéo na a *pwocihe na e âbé mu ha a pwonimung, me é pii ninaa. Be é âcehi a pipwoééhe tice ja kon de Padué, kehe time uce é ne ha a bwo temehinaado te lépwo apulie.

13-14Be, me é mu pwotii lé céïikewé [ke te tice celi é pineduwohi kowé]. Be nina geé pine, ke te ni juuju. É mu ko anaa, [na o time uce tanim gewé kong] ha ace tan celi e o bo mwojuia mwo hen wo Padaame henye lésu. Ke geé o pipwodéén kong, pwohewii a pipwodéén dong kowé. Geé caa te temehi anaa, kehe nimung me geé temehi ehi.

Junihe nimung me é â caniékewé

15Ânebun, ke é niimihi pie, geé te temehi ehi [a pwonimung]. Ke anaa kuti ali é niimihi ânebun pie me é [okelo ko] âdé caniékewé, beme e okelo ko adéikewé wo Padué mu kong.

16Be a céiu, ke a bwo engen dong nge ha a province Macédoine. Ke a céiu mwo, ke a bwo mwojuia tong mwo ne *Judé. Ke é niimihi pie, wieli geé bo picani tong ko a bwo mwojuia tong ne mwo lang.

17Weengaa a bwo niimihinaado tong ânebun. [He é mu ko ade na time é uce mwojuia ne mwo pelewé?] Wieli geé ko niimihi pie, time é uce piniumihi ehi? Wieli é pwohewii lépwna lé pii pie «éa» heme ko «ûhu»?

18Ûhu! Time é uce wonaa, be e te pajuujuéo wo Padué. Be hemepie e te cumang, ke woéo mwo, ke é o te cumang. Ke é hemepie é pii tewé pie «éa», ke te «éa»!

19Geé téne: Wo Kériso lésu na gême patemehieng dewé, wogeme me Silas me Timoté, ke te weeng kuti pa *Naî Padué [na e juuju. Be weeng, ke pa pwooti mu pele Padué] na e pii tenye pie: «Éa!» Kehe time uce «Meniing...».

20Be e pii pie «éa», beme nye hegi ati ni *adéihi te Padué li e caa mi pii. Ke te é mu ko Kériso na nye tai pwoun de Padué, ke genye tai pii ati pie: «Éa! Amen!»

21Ke te wo Padué na e pwo me nye cumang ne he Kériso. Be weeng na e pipégalikenye [me nye apulie ten].

22Ke e caa ne tenye a *Jenen litihi he ni pwonimenye, beme a inen [pie wogenye, ke ni apulie ten]. Weengaa a bécieuhe adéihi na e ne tenye.

A watihen na time é uce âdé

23É te juuju, ke e pajuujuéo mwo wo Padué, heme é pii tewé pie: Weengi a watihen na time é uce mwojuia ne mwo pelewé ne Korénit. Be é hemepie é âdé, ke wieli [é o pii ce pwooti celi nihe] téé ne kowé. Kehe time uce nimung me é wonaa.

²⁴Be time uce nimung me é pihuô wédenikewé. Be geé caa te cumang ne he ni céhi tewé, ke nimung me nye pipenem ibu, beme nye tai pipwodéén.

2 Korénit 2

¹⁻³ Hemepie é pipwodéén, ke wogewé mwo, ke geé pipwodéén. Be te wogewé kuti na geé mu tee cuwo ko pamwoiuéo, ke wâé heme wonaa. Kehe icehi ana heme téé gewé, ke bo wooélé celi lé bo pwo me é pipwodéén? É mu ko anaa, na caa time uce nimung me é cihe me ubwo ne kowé mwo, ko aceli é tooli ne pelewé. Weengaa kuti a watihen na é pitaatééhi a bwo niimihinaado tong.

⁴Ke é caa pwotii lé céikewé. Kehe icehi ana te junihe piwahin a pwonimung, ke é te nihe é, be é temehi pie, o te nihe téé gewé ko nina é pii. Be ana te ju wâé tong cehi, ke me é habwii tewé pie, nihe ubwo a pwonimung kowé.

Geé pineu pa apulie @ na e pwotahinaado ne kowé

⁵Wo pa apulie na e pelewé, pali e pwotahinaado ne kong, ke te nihe ubwo a ta na e pwo tewé kojaéo. Weengaa a watihen me tai téé genye. Kehe icehi ana time é uce pé me ubwo [a ta na e pwo tenye].

⁶Be geé caa te tautieng, [ke geé caa te habwii ten a ta na e pwo]. Ke caa te jan.

⁷Ke é jenaa, ke wâé heme geé pineueng, ke me geé pipamwoiueng mwo. Be koli e bo patupwo [a céhi ten] be te nihe ubwo a bwo téé nang.

⁸Ke é cuwokowé [beme geé pwo me céiu a pwonimewé] beme geé habwii ten mwo a pipwoééhe tewé.

⁹Ke é he li é pwo ali tii, ke a bwopwonan me é alih [ni pwonimewé] pie, geé te piténedeéo, na ati he ni naado.

¹⁰Ke é hemepie geé pineu pa apulie naa, ke woéo mwo, ke é o te pineueng mwo. Ke te a juuju pie, é caa pineueng, me dewé, ne he nii Kériso. Ke é niimihi pie, a ta na e pwo tong, ke time uce nihe ubwo.

¹¹Be hemepie nye wonaa, ke o caa te tice pwaadeni *Caatana me e pihaamikenye. Be nye caa temehi ehi ni bwomu ten.

Nye piwéden mu ko lésu Kériso

¹²É â Troas, beme é pii beetihi a *Pwooti Wâé te Kériso. Ke me é tehene ngen, ke é tooli pie, e caa te pwopweehi a pwaadeniing wo Padué.

¹³Kehe icehi ana te nihe pinekepé ne tong ko pa bééng Tit. Be é ucéieng, ke time e uce tuiebé. Ke é caa pine l épwo a-mu Troas, ke é mwojuia mwobé ne éni Macédoine [beme é haneeng].

¹⁴Kehe icehi ana nye pipwo-olé te Padué, be e caa piwéden wo Kériso. Ke e péékenye ne he pwahamii ni apulie ati, pwohewii a mwocoda ten na e piwéden. Ke nye habwieng ati ne he ni piduaan, ke e pwo me nye patemehieng, pwohewii a ûdenaado na wâé.

15-16 Éa, nye pwohewii a tabe ûde, a âpipati na e ne te Padué wo Kériso. Ke wo lépwo béén, na e mwo ko celuimilé mwo, ke lé téne a ûden na wâé, ke e pébé céilé *a ju mulip [dieli mwo ne pelen]. Kehe é ne ko lépwo béén na lé ko pipatieden ni mulihelé ité kojaeng, ke lé te ju téne cehi a ûdenaado na ta, na e pébé céilé a mele. Ke he woo celi jan me e pwo a penem naa, [a penem de lépwo *apostolo? O te tice, kehe te icehi pa apulie na e picani ten wo Padué].

17 Junuhe hiwon lépwona lé pé a pwootí te Padué, beme lé hane mwani kon, kehe time é uce pwohewiilé. Be woéo, ke pa apenem de Kériso, ke é pii a juuju ne he pwahamii Padué. Be weeng na e pahedeéo.

2 Korénit 3

É pipatemehi a piapwo ko a mulip

1 Kona [geé niimihi pie] é pipii dong mwo? Úhu! Kona wâé heme é habwii tewé ni tii na lé cihe kong me wâé? Ai me é pwo me geé tii ni pwootí ne kong, beme é habwii te ni béé acéihi, pwohewii ana lé pwo ne ni béé apipune? Úhu! Time é uce wonaa, [be geé te temehiéo ehi]!

2 Be a tii tong, ke ana wogewé na caa te tii ne ha a pwonimung. Ke jan me lé pine ati ne ni apulie [na lé alahi ni penem dong ne pelewé].

3 Be wo Kériso, ke weeng na e caa tii a tii naa, ke woéo, ke te ju pa apitéteimpwootí. Ke a pwootí ha a tii na time uce tii ko bépwotii, kehe ana tii ko a *Jenen litihi te Padué, na e mulip. A tii na time uce tii ne pwo ace péi, kehe e tii ne he ni pwonime apulie.

4 É cumang [he é pii anaa] é mu ko ana é céihi me ubwo ne ko Padué, be é mu he Kériso.

5 Ke time é uce niimihi pie, é pipwo cehi a penem na e ne tong. Be te wo Padué na e pwo me jan ne kong me é pwo.

6 Ke weeng na e pwo me é pébé a *piapwo ten na mwo coho [na e pwo me denye, wogenye a puapulie ten]. A piapwo naa, ke time e uce âbé mu ko ni patén na tii, kehe ana e âbé mu ko a Jenen litihi. Be ni patén na tii, ke e pwo me nye mele. Kehe icehi ana a Jenen litihi, ke e pwo me nye mulie.

Junihe ubwo a wâé te Padué

7 He li e pébé li patén wo *Moosé li tii ne pwo li péi, ke lé tuiebé ne ha *a wâé te Padué. Be te junihe pwomelaa a pwahamii Moosé, ke time uce jan me lé omeeng wo lépwo *Isaraéla. Kehe icehi ana time uce bwolihi a pwéélang naa, ke ni patén, ke e pébé a mele.

8 Ke hemepwo é ne ko ali piapwo li e pébé na a Jenen litihi, [ke e pwo me nye mulie] ke te junihe ubwo wéden a wâé naa.

9 Be mepie pwo a wâé na ubwo te ni patén na lé ne cuhinaado tenye, kehe o bo junihe ubwo wéden a wâé te a piapwo na e pwo me mwomwon genye [ne he pwahamii Padué].

¹⁰Éa, a wâé [ko ni patén] ke a naado na te junihe wahin ne ko jije a wâé [ko a piapwo na mwo coho].

¹¹Be mepie caa pwo a wâé ko ana time uce bwolihi, ke o bo woté ace bwo ubwo na a wâé ko ana e mu dieli mwo?

Nye alahi a wâé te Padué

¹²E pamwoiukeny a piapwo naa, na e pwo me denye wo Padué, beme time uce piwâ genye [me nye pipwoebwé ten].

¹³Ke time nye uce pwohewii Moosé, li e talui a pwahamiin, he li e cuwo ânebuhe [a puapulie ten] lèpwo Isaraéla. Be o time uce wâé heme lè alahi a wâé na pwomelaan na e mu kon. Be a wâé naa, ke caa ko pitieden kojan ânebun.

¹⁴Ke é ne ko lèpwo Isaraéla, ke te junihe capuhi ni pwonimelé, dieli jenaa. Be heme lè pine, ai me lè téne ni tii ko patén, tii ko a piapwo ânebun, ke [time lè uce alahi temehi ni juuju na e mu hen. Be pwohewiin heme] talui ni pwahamiilé ko ace mwaanu. Ke time uce [jan me lè pwii] a mwaanu naa, kehe te icehi, hemepie lè mu ko lésu.

¹⁵Éa, a juuju pie, é dieli jenaa ni, heme lè mu pine ni tii te Moosé wo lèpwo Isaraéla, ke pwohewiin heme neduwohi kolé ni bwopiinen.

¹⁶Kehe icehi ana hemepie e biteeng nge céii Padaame wo pace céiu apulie, ke o tupwo a bétalui na a pwahamiin.

¹⁷Be wo Padaame, ke weeng a Jenen. Ke me e konye a Jene Padaame, ke e tuwokenye koja ni naado na lè ciekenye, ke caa te tice celi e imwikenye.

¹⁸Ke caa tai pwii mu he pwahamiiye a bétalui nen, beme nye pwohewii a apiocile na pwomelaan ko a wâé te Padué. Be e pitaatéékenye na a Jene Padaame, beme nye pwohewieng, ke me nye mu ha a wâé na piubwo da.

2 Korénit 4

A Pwooti Wâé ke a pwéélang @ ne ha a melepiing

¹E ne tong a penem naa wo Padué, ne ha a bwo wâé nang. Weengaa a watihen na time uce pitupwo jo [heme é mu he ni picani].

²Ke é caa mi piniumihi pie [hemepie é patemehi te ni apulie] ke time é o uce pii ace pwooti celi gele, ke time é uce neduwohi ace céiu naado. Ûhu! Time uce wâé tong ni bwomu te ni apulie na lè wonaa, be lè pwo me tanim genye. Be é penem ha a juuju. Ke time é uce pibitehi ni pwooti te Padué; kehe é habwii ehi a juuju, ne he pwahamii Padué. Ke wo lèpwo apulie, ke lè o temehi ne he ni *pwonimelé [pie time é uce pihaamilé].

³Be a Pwooti Wâé na é ko patemehi, ke pwéélang, ke jan me lè temehi ati ne ni apulie, kehe te time uce wo lèpwona élé ité koja Padué na lè patieden ni mulihelé.

⁴Be e pwo me bwi jélé [wo *Caatana] pa caa te a bwohemwo ce, beme time lé uce alihia pwéélang ko a Pwooti Wâé, ke me time lé uce céhi ne kon. A pwéélang naa, ke *a wâé te Kériso, na a déme Padué.

⁵Be, me é pipune, ke time é uce pipii dong ne tewé, kehe é patemehi Kériso lésu, Padaame. Ke é mu kon, na woéo, ke é penem dewé.

⁶ E pii wo Padué ânebun pie: *Wâé heme e tuie a pwéélang ne ha awieme a melepiing*. Genèse 1.3 Ke wo Padué naa, ke weeng kuti, na e pwo me e tuie a pwéélang den ne he ni pwonimenye, beme nye temehi pie, a wâé ten, ke e he lésu Kériso.

Mang a céhi tong ne he ni picani

⁷ [A pwéélang na e konye, ke e pwohewii] a naado na nihe ubwo a cuhin. Kehe icehi ana nye pwohewii ni mwotabe pule [na time uce mwoiu]. Ke anaa, ana me lé temehi ne ni apulie, pie time e uce âbé mu konye a junuun ce, na junihe ubwo wéden. Kehe e te âbé mu ko Padué.

⁸ É te junihe mu he ni pétaapwo picani me ni téé, kehe icehi ana time lé uce caaiteéo. Ke hiwon ni naado na ta na e mu tuie ne kong, kehe icehi ana é te cumang.

⁹ Lé te cuwo ko pwo tong nina time uce wâé, kehe icehi ana time e uce patupwoéo wo Padué. Ke lé pabetiéo ne he pule, kehe icehi ana é te cuwoda mwo.

¹⁰⁻¹¹ Ati he ni tan, ke é te pipwopweeéo ne ko a mele me de lésu. Be é teko pé ne ha a ééng a bwo mele ten: a ééng na e bo mele. Kehe icehi ana é te pé ne kong mwo a bwo mulie cemwo ten. Ke lé o alihia anaa ne ni apulie.

¹² Ke hemepie é pipwopweeéo ne ko a mele, ke a bwopwonan beme e mu kowé *a ju mulip.

¹³ Be caa te tii ne he ni *tii iitihi pie: *É céhi ne ko Padué, ke é mu ko anaa, na é cihe. Psaume 116.10* Ke woéo mwo, ke é céhi, ke é mu ko anaa, na é pii beethi a Pwooti Wâé ten.

E pwo me é mulie cemwo

¹⁴ Be é temehi pie, wo Padué, ke e pwo me e mulie cemwo wo Padaame lésu mu ha amele. Ke e bo pwo me é mulie mwo, be é mu ko lésu. Ke e bo tai péékenye ibu me wogewé, me nye cuwo he pwahamiin.

¹⁵ É ko anaa, na e adéikewé mu ko ni picani na é mu hen. Ke me wonaa, ke o hiwon ce apulie celi lé o temehi ni *adéihi ten na e âbé mu ko a *pipwoééhe tice ja kon den. Ke lé pwo-olé ten, me pipwoun den, ke lé o pipatemehi ngen a wâé ten, me a bwo ubwo nang.

Time uce bwali ni picani tenye jenaa

¹⁶ É mu ko ati [ni adéihi naa] ke o time uce pitupwo genye. Be mepie e ko mwaale ni éénye [ke me e â benihi a mele]; ke é ne ko a ju mulip na e konye, ke e o piubwo nang da.

¹⁷ Ke mepie nye mu he ni picani he ni tan ce, ke time uce ubwo, ke time uce bwali. Be ni bwopwonen me pipwopweekeny, beme e mu konye a wâé te Padué. Ke a wâé naa, ke o junihe ubwo wéden koja ni picani jenaa. Ke e o te mu pelenye dieli mwo.

¹⁸ É mu ko anaa, na nye nemwo pé me junado nina nye alihî ko ni naamiinye. Be time lé uce tee mu me bwolihi. Kehe nye hane ni naado na time nye uce alihî: ni naado na lé o mu dieli mwo.

2 Korénit 5

A éé apulie na mwo coho

¹ He nye mwo ko mulie éni pwo bwohemwo, ke a éénye, ke pwohewii a mwa mwaanu na o bo tanahi taabwon ha ace céiu tan. Kehe icehi ana nye temehi pie, pwo a mwa tenye na e jedâ he *miiden. A mwa naa, ke e te mu dieli mwo, be a mwa na e bahi wo Padué, kehe time uce aceli e bahi wo pace apulie. [A mwa naa, ke a éénye na mwo coho.]

² É jenaa, ke nye cewé, be te junihe binyi ne tenye me nye tee ucéihi a éénye na o bo ne tenye ne jedâ he miiden.

³ [A éé apulie naa, ke e o pwohewii a epwén] na mepie genye cuwohen, ke o te junihe wâé ne he pwahamii Padué. [Be e o ne te a jenenye a één na mwo coho.]

⁴ Kehe é he genye mwo ko mulie éni pwo bwohemwo, ke genye te junihe cewé kuti ko a bwo cunu genye. Be mepie time uce nimenye me nye necu a éénye, kehe icehi ana o nihe wâé tenye me nye taatééhi, beme a éénye na mwo coho ne he miiden, ke me e taatééhi ni naado na caa mele na a mulip.

⁵ Ke te wo Padué na e caa pipwopweekeny ne ko a mulie naa. Ke e ne tenye a *Jenen litihî, beme pa ânebuhe ni *adéihi na e ne, ke me e *pajuujuhi mwo pie, genye bo tai hegî mwo ce béén.

⁶ Ke wâé heme genye te pwo me piwâénimenye!

Nye mulie ha a céihi

Te a juuju pie, he genye mwo tee ko mulie ha a éénye ne éni pwo bwohemwo, ke mwo time genye uce téele pimu ibu me Padaame [ne he miiden].

⁷ Kehe icehi ana genye mulie ne ha a céihi, kehe time genye uce âcehi nina genye alihî.

⁸ Be anaa kuti a wathen me genye te pwo me piwâénimenye. Be wâé tenye heme genye engen mu ha a éé apulie ce, beme genye pimu ibu me Padaame.

⁹Ke ana junado ne tenye, ke me genye hane me wâé te Padué genye, he genye mwo ko mulie éni [pwo bwohemwo] ne ha a éé apulie ce, ai hemepie nye caa engen mu hen.

¹⁰Be genye o tai cuwo he pwahamii Iésu Kériso, beme e tautikenye. Ke e bo patihi ne konye ni pétaapwo cuhi ni penem denye na wâé, ai nina ta, he nye mwo mulie pwo bwohemwo.

É pébé a pwootti ko a péém

¹¹Nye pipwocilekenye ne ânebuhe Padué, ke genye nihe paciitieng. Ke é ne kong, ke é mu te niimihi anaa. Ke anaa kuti na é mu te pacihe ni apulie, me lé bitelé ne kon. Be e te temehi a pwonimung wo Padué. Ke é niimihi pie wogewé, ke geé te temehiéo mwo.

¹²Geé nemwo niimihi pie é te cuwo ko pipii dong. Ju nimung cehi pie me geé pwo me piwâénimewé kong. Ke é ne tewé a béhegi nen de lépwona lé mu pipii delé ne ko ni naado na nye alihî ko ni naamiinye, kehe time uce é ko nina e he ni pwonimenye.

¹³Wieli [lé o pii pie] pipenem a puning, heme é ko pii ninaa. Ke hemepie é wonaa, be é penem me de Padué. Ke mepie é penem ha a pitemang, [me a bwo temehinaado ten] ke é wonaa beme geé hegi a pwootti ten!

¹⁴[Ke é ne ko ati ni naado na é pwo] ke é te piténedehi a pipwoééhe te Kériso. Be é temehi pie, te céiu pa apulie, wo Kériso, na e mele me denye ati. É mu ko anaa, na wogenye, ke genye caa mele [mu ha a mulihenyé ânebun].

¹⁵Ke genye nemwo tee mulie me denye cehi. Be hemepie e mele wo Kériso, ke e mulie cemwo, ke me e pwo me genye mulie mwo, ke wâé heme nye mulie me den.

A péém na e pwaadeniin bé wo Kériso

¹⁶É mu ko anaa, na caa time é uce ali ni apulie pwohewii a bwo alilé te lépwona time lé uce temehi Padué. Ânebun, ke é mu wonaa a bwo ali Kériso, kehe icehi ana é jenaa ni, ke caa time é uce wonaa.

¹⁷Be mepie e mu ko Kériso wo pace céiu apulie, ke [wo Padué, ke e] ne kon a mulip na mwo coho. Ke caa tieden ni naado ânebun. Ke mwo coho ati ni naado.

¹⁸⁻¹⁹Be wo Padué, ke e caa ne a péém ne ha awiemenye me weeng, na e pwaadeniin bé wo Kériso. Ke e pineuhî ni ta pwo tenye. Be te *a bwo niimihinaado ten, he e nebé Kériso ne pelenyé lépwo apulie. Ke weengaa kuti a penem dong, beme é pébé céii ni apulie a pwootti ko a péém naa

²⁰ne he nii Kériso. Ke wogewé, ke e totekewé wo Padué, beme e mu kowé a péém naa, ne ha awiemewé me weeng. Ke é wâgo kowé, ne he nii Kériso, beme geé ténedehi a pwootti naa.

²¹Be wâé te Padué heme mwomwon genye ne he pwahamiin, mu ko Kériso. Pana te tice ta pwo ten, kehe icehi ana e ne huîn ati ni ta pwo tenye wo Padué, beme e ne konye ati a mwomwon me a wâé te Kériso!

2 Korénit 6

Hegi a pipwoééhe ten jenaa!

¹Woéo, ke gemu penem ibu me Padué. Ke é ko anaa, na é wâgo kowé pie, me geé nemwo pwohauli ko ni âpipati na e ne tewé wo Padué ne ha a *pipwoééhe tice ja kon den.

²Be e caa te pii pie: *Ha a benaamwon na é o pipégali*, ke é o téneko. Ke é o *picani tem ha a tan na é pacuwoshi*. Ke é o *celuimiko ha a tan na bo wâé tong*. *Ésaïe 49.8* Ke geé téne, be e caa tuie a tan naa! Be caa é jenaa, na e celuimikenye wo Padué!

Ni picani te Paulo mu ko Kériso

³Time uce nimung me é pwotahinaado ne ko ni apulie ko ni bwomu tong, be me wonaa, ke me time lé uce pii me ta a penem dong.

⁴⁻⁵ Úhu! É te habwii ati ne he ni naado pie woéo pa ju eabwé te Padué. Ke é mu ko anaa, na é te cumang me é te pé me dong ni naado na ta na hiwon na e tooéo: ni picani, ni mwaale, ni menele, me ni bwo mwotiéo. Be lé ahiéo, ke lé tahiéo ne he karépu. Ke é mu cela mu ha awieme ni apulie na lé okéé ne kong. Kehe é te mwoiu ko penem, dieli â tice niihung.

É picani ke é te penem

⁶⁻⁷ Ke é ati ne he ninaa, ke é te cuwo ko habwii pie woéo pa ju eabwé te Padué, ko a bwo pipwoiipi, ko a bwo temehinaado tong, ke a bwo cumang ne he ni picani tong. Ke é te cuwo ko picani te ni apulie, ke é pipwoééhelé mu ha a ju pwonimung. Ke é te cuwo ko penem ko a junuu a *Jenen litih te Padué. Be é te cuwo ko patemehi ngen a pwootti ten, a pwootti na juuju. Ke ni bwomu tong naa na mwomwon, ke pwohewii ni pihe pa me bépipwopaing, ke me é pwo me e piân a Pwootti Wâé.

⁸[He é penem me de Padaame, ke time é uce pipéce ne ko nina lé niimihi wo lépwo apulie.] Be lé pii nina wâé ne kong wo lépwo béén; ke lé pii nina ta ne kong wo lépwo béén mwo. Ke lé picediéo wo lépwo béén; ke lé pihooniéo wo lépwo béén. Ke lé pii pie, woéo ke pa agele wo lépwo béén; kehe icehi ana é pii a juuju.

⁹ Ke lé pii wo lépwo béén pie, time lé uce temehiéo. Kehe icehi ana [nihe hiwon nina lé] temehiéo ehi. Ke junihe ubwo ni cuhinaado tong, ke é caa pwo me é mele. Kehe icehi ana é mwo teko mulie.

¹⁰Éa, é te nihe mu he ni picani, kehe icehi ana é te pipwodéén. Be mepie tice wâé tong ne éni pwo bwohemwo, kehe hiwon ni wâé na é ne he ni pwonime ni apulie. Ke mepie te tice dong, kehe a juuju pie, ni naado ati, ke ni dong.

¹¹Wogewé lépwo béeング Korénit, é tehi ne tewé jenaa a pwonimung. Ke te tice celi é neduwohi kowé mu ha ati nina é pii tewé.

¹²Be junihe ubwo a pwonimung kowé. Ke [mepie pwo aceli piehadeniinye, ke wiel] time geé uce piwâéeo mu he ni ju pwonimewé.

¹³É pacihewé jenaa, pwohewiin heme te lépwo ju naîng. Ke wogewé, ke wâé heme geé pipwohewiiéo, ke me geé hegjéo ehi ne he ni ju pwonimewé!

Geé engen koja lépwona lé pwo nina ta

¹⁴Geé nemwo junihe pipabéé lépwona time lé uce céhi ne ko Padué [ke lé tee pwo nina ta]. Be time uce jan me geé mulie ha a mulihelé. Be woté? Te jan me lu pimu ibu a wâé me a ta? Te jan me lu pimu ibu a pwéélang me a melepiing?

¹⁵Te jan me lu pimu ibu wo Kériso me *Caatana? Te jan me te céiu ace bwo alahi nen de paceli e céhi ne ko Padué, me paceli time e uce céhi?

¹⁶Ade aceli piwien ne ko ni déme duéé, me a *mwaiitihi te Padué? Ûhu! Be wogenye, ke nye mwaiitihi te Padué, na e mulie. Be e caa te pii pie: É mu pele a puapulie ce, ke gemu piengen ibu. É bo Dué hen. Ke bo pa puapulie tong. Lévitique 26.12; Ezékiel 37.27

¹⁷Ke e pii mwo wo Padaame Padué pie: Geé engen kojalé. Geé nemwo mu pelelé. Geé necu ni bwomu telé na ta. Ke é o bo hegikewé. Esaïe 52.11

¹⁸É bo Caa tewé, ke geé bo naîng , aiu me toomwo. Woéo Padué na pwojunuung ne ko ati ni naado. 2 Samuel 7.14

2 Korénit 7

¹[Wo Padué, ke e] pii ni naado naa, wogewé lépwo ju béeング, be me denye [wogenye ni naîn]. É mu ko anaa, na wâé heme nye pimu ité koja ni naado na e pwo me ta a éénye me a pwonimenye. Wâé heme nye pétaabwon a ta mu he ni mulihenye, ke me nye paciitieng.

Piwâénimung kowé lépwo Korénit

²Geé ne ace ahiéo ne he ni pwonimewé. Be time é uce téele pipwohuô te pace céiu béeԝé. Ke time é uce téele pwo me e biteeng wo pace céiu mu ha a céhi ten. Ke time é mu uce getikewé, beme é bo pé ace céiu naado kojakewé.

³Hemepie é pii anaa, ke time uce a bwopwonan me é tautikewé. Be a juuju ana é caa pii pie, geé mu ha a pwonimung. Ke o te wonaa, hemepie nye mwo tek mulie, ai hemepie nye caa mele.

⁴É céhi ne kowé, be te junihe wâé tong a mulihewé, ke é te junihe pipii dewé [ko a céhi tewé]. Be geé te junihe pamwoiuéo ne ha ati ni picani na é mu hen. É mu ko anaa, na é te junihe pipwodéén.

⁵[É mwojuia ne mwo ko ali é pii.] He li é tuie ne ha a province Macédoine, ke time é uce mwaale. Be hiwon ni jié me ni dan ânebuhung. Be é pwomwo, ke é too lépwona lé cubwoniéo. Ke é ne ha a pwonimung, ke te junihe mwotiéo.

⁶Kehe icehi ana wo Padué, ke e te junihe pamwoiu pa apulie na tice niihen. Ke e te pamwoiuéo, be e nebé céiiéo Tit.

⁷Ke é te junihe pipwodéén he e tehenebé pelong, ke é he é téne pie geé te junihe pamwoiueng. Ke e pii mwo pie, te junihe nimewé me geé aliéo, [ke geé teko ucéiéo]. Ke te junihe piwahin gewé [ko ni naado na lé pii ne kong ne pelewé]. Ke e pwojepule tong ko ni pwonimewé kong, be te junihe nimewé me geé pwopaing. Anaa kuti a pipwodéén dong.

É pipwodéén be geé bitekewé

⁸Lépwo béisng, é temehi pie piwahin gewé ko ali céiu tii tong ha a cuwo benaamwon. Ke woéo mwo, ke piwahin jo, kehe icehi ana é jenaa, ke time é bo uce niimihi mwo.

⁹Kehe é pipwodéén; ke time uce é mu ko a bwo piwahin gewé, kehe é mu ko ana geé caa pininim, ke geé bitekewé mwo. Be a naado na te junihe wâé te Padué. Ke é alihí pie, time uce pwotahinaado ne kowé [ali é tii].

¹⁰Be time nye bo uce tee niimihi mwo a piwahin na e ne tenye wo Padué. Be e ne, beme nye pininim, ke me nye taatééhi ni mulihenye. Ke a piwahin naa, ke e pébé a bwo celuimikenye. Kehe icehi ana hemepie piwahin genye, ke me time nye uce bitekenye, ke a naado na ta. Be hemepie wonaa, ke nye â benihi a mele dieli mwo na e éité koja Padué.

¹¹Lépwo béisng, geé cuwoteeke alihí ana e pwo wo Padué me dewé ko a bwo piwahin gewé. Weengi: Geé habwii pie, geé cuwo ité koja pana e pii me ta jo! A céiu: Ke geé okéé ne kon! A céiu: Ke nimewé me geé pwocuhinaado ten! A céiu: Ke mwotikewé [be koli geé bo pwo ace naado celi time uce wâé]! A céiu: Ke junihe nimewé me geé aliéo [beme geé pwopweehi a pwonimung]. A céiu: Ke geé habwii pie time uce wogewé na geé pwo nina ta ha a benaamwon naa.

¹²He li é tii a tii naa, ke time uce a bwopwonen me é tauti paceli e pwo celi ta, ai me é pwopai pace céiu apulie. Kehe nimung me e bo habwii tewé wo Padué pie, é teko mu he ni pwonimewé. Be geé pipwopaing.

¹³Be anaa kuti ana e pamwoiuéo.

É pipwodéén ko Tit

A céiu mwo, wogewé lépwo béisng: É te junihe pipwodéén, be geé pwo me e pipwodéén wo Tit. Be geé [tai hegieng ehi] ke geé pwopweehi ne kon, me wâé a pwonimen.

¹⁴Be é cihe ten ehi kowé. Ke time geé uce pwo me é pitaatééhi ni bwo niimihinaado tong ne kowé. Be ana é pii ten, ke a pwooti na juuju, pwohewii ali é mu te cuwo ko pii tewé.

¹⁵É ne ko Tit, ke te junihe eânimén dewé. Be e pii pie, geé hegieng ne ha a pipwoun, ke geé te nihe piténedeeng. Weengaa a watihen me piubwo a pipwoééhe ten me dewé.

¹⁶É te junihe pipwodéén, be é céihi ne kowé ne he ni naado ati.

2 Korénit 8

a bépicani te lépwo acéihi @ ne iérusaléma

(*Pwahamii tii: 8—9*)

Lé nihe ne mwani wo lépwo Macédoine

¹Lépwo bééng ne he Kériso, wâé heme geé temehi a penem na e pwo wo Padué mu ko a *pipwoééhe tice ja kon den, ne hadenii ni acéihi ne ha a province Macédoine.

²Be lé te junihe mu he ni picani, be te tice delé, kehe icehi ana lé te mu ha a pipwodéén. Ke lé ne ni delé me ju piticenaado ne kon.

³Ke é *pajuujuhi pie, lé te ne nina e teko mu pelelé. Ke lé te ne mwo nina piwéden, kehe te tice apulie celi lé cuwokolé me lé ne.

⁴Be te woélé na lé cuwokong, beme lé ne ce bépicani me de lépwo acéihi ne *lérusaléma.

⁵Ke nina lé ne, ke te junihe wéden koja nina é ucéihi mu kolé. Be lé te pinelé ati te Padaame, ke é alecehen, ke lé pinelé tong, beme lé piténédehi ana nime Padué kon.

⁶[É ne ko li bépicani] ke te wo Tit na e tabuhi a penem naa. Ke weeng na e pamwoiukewé mwo, me geé pé ce âneule tewé kon. É mu ko anaa, na é pii ten pie, wâé heme e pamwoiukewé mwo, beme geé panebwénihi ni âniimihinaado tewé.

⁷Be [wo Padué, ke e] caa te ne tewé ni muko wâé na hiwon: a céihi, ke a bwo cihe, me a bwo temehi nen, me a niihewé, me a pipwoééhe. Ke geé te ûmiê; ke te junihe ubwo a pipwoééhe tewé ne kong. Ke wâé mwo heme geé te pati mwo lépwo béén, ke me geé ne me piticenaado ne kon.

⁸Hemepie é pii anaa, ke time é uce cuwokowé. Kehe é te ju pii tewé pie: Ni bée *puco te ni acéihi, ke te pepule jélé, me lé pipati ha a pipwodéén. Ke é ne tewé a bwomunen naa, beme habwii pie a pipwoééhe tewé, ke te a juuju.

⁹Be geé te temehi pie, e te neeng ati tewé wo Padaame henye lésu Kériso mu ko a pipwoééhe tice ja kon. Be te junihe hiwon ni wâé ten [ne jeda he miiden]. Ke e ne ati, beme dewé ni wâé na hiwon [ne pele Padué].

Geé ne âcehi nina e mu pelewé

¹⁰⁻¹¹É ha ali jo li, ke te wogewé li geé mi piniiimihi pie me geé picani [te lépwo lérusaléma]. Be wonaa a bwo niimihinaado tewé ne kon, ke geé téetihhi, ke geé pwo. Ke weengi a bwo niimihinaado tong: Wâé heme geé epin ko panebwénihi ana geé caa tabuhi, âcehi nina e pelewé.

¹²Be hemepie nye ne mu he ni ju pwonimenye, ke o wâé te Padué nina nye ne. [Te piwien, hemepie ubwo, ai wahin.] Be time e uce ilehi kojakenye aceli tekō tieden pelenye.

¹³Time é uce pii pie, me geé pwo me téé ni mulihewé, beme pwia ni mulihe lèpwo béén! Wâé heme pwo ce dewé, ke me pwo mwo ce delé.

¹⁴Be é jenaa, ke te nihe hiwon ni dewé, kehe woélér, ke te tice delé. Ke wâé heme geé picani telé, be mepie o bo tice dewé ha ace céiu tan, ke o bo woélér na lé bo picani tewé. Ke é ha a tan naa, ke o bo tai pwo dewé.

¹⁵Be caa te tii ne he ni tii iitihi pie: *Wo pana nihe pitii âdaanu, ke o te tice celi piwéden. Ke wo pana te ju mehin ni âdaanu ten, ke o time uce menen. Exode 16.18*

E cile ni âpipati wo Tit

¹⁶É pwo-olé te Padué, be e ne he pwonime Tit a pipwoééhe me dewé, pwohewii a pipwoééhe tong me dewé. Be te junihe nimen me e picani tewé.

¹⁷É he é pii ten pie me e âdé caniékewé, ke e hegi ne ha a pipwodéén, be te junihe wâé ten.

¹⁸Ke é o caa neeng lé, me pa céiu acéihi béén. Wo panaa, ke pa apulie na lé te nihe picedieng ati ne ni puco te ni acéihi mu ko a penem den ko a bwo pii beethi a Pwooti Wâé.

¹⁹Ke lé caa pipégalieng, beme e bo âcéing [ne lérusaléma] hemepie é pé ngen li âpati. Ke weengaa a bwo pipwoeabwé tong me de Padaame beme é pipwoun den. Ke weengaa mwo a bwo habwii na a ju pwonimung.

²⁰Nihe ubwo a mwani naa [be lé ne me tice ja kon]. Ke é te pipwocile, be koli lé bo pipé ne kong wo lèpwo béén, hemepie é picile tahi.

²¹Be é hane ana wâé te Padué, ke ni apulie mwo.

²²Mepwo é ne ko pa céiu béeing na é neeng lé me lupwoje, ke te junihe pa apicani tenye [ke pa apiténedehi]. Ke é te nihe céihi ne kon. Ke weeng, ke e te junihe céihi ne kowé, ke te nihe wâé ten, me e picani tenye ati.

²³Ke é ne ko Tit, ke pa béeing ko penem me dewé. Ke wo lupwo alo, ke ni puco te ni acéihi na lé nelu lé, ke lé tai penem me lé pipaunu Kériso.

²⁴Ke [geé hegilé ehi, ke] geé habwii telé a pipwoééhe tewé, be é caa cihe me wâé ne kowé te ni acéihi. Ke wâé heme lé alihi ace a juuju kon.

2 Korénit 9

É te nihe pii me wâé gewé

¹É te ju pwotii lé céiikewé ko ni âpipati me de lèpwo acéihi ne *lérusaléma,

²be é te temehi ni pwonimewé, ke é caa pipatemehi a bwo wâé gewé ne te lèpwo Macédoine. Be é pii telé pie, wogewé, lèpwo acéihi mu ha a province

Akaï, ke geé caa mi pipwopweekewé, ke geé caa tabuhi ne ni bépicani tewé ha ali jo li. Ke hiwon mu kolé na te nihe pipamwoiulé, beme lé pipwohewiikewé.

³Kehe icehi ana é ne lé céiikewé lépwo bésténg na cié jélé naa, [beme lé picani tewé, beme geé tai ati ni âpati tewé ânebuhe a bwo âdé tong pelewé]. Be é caa pii te lépwo béstén pie, geé caa pipwopweekewé. Ke time uce wâé heme piticenaado ne ko a bwo piikewé tong me wâé.

⁴Be é bo âdé ne pelewé me lépwo bésté Macédoine. Ke mepie lé alahi pie time geé uce tétele pipwopweekewé, ke o tanim jo, ke o te junihe tanim gewé mwo.

⁵Weengaa kuti, ana é mi ne lé lépwoli bésténg ko penem, [li cié jélé] beme lé mi alahi li âpipati tewé, li geé caa mi pipwopweehi. [Ke mepie geme âdé me lépwo bésté Macédoine] ke lé o alahi pie, ni âpipati tewé, ke te âbé mu he ni ju pwonimewé, kehe time uce é mu kong.

Ne, ne ha a pipwodéén

⁶Weengaa ana é ko pwo beme é pii tewé: Pana te ju wahin ni apwoamu ten, ke o time uce hiwon ni âdaanu ten. Ke wo pana nihe ubwo ni apwoamu ten, ke o nihe hiwon ni âdaanu ten.

⁷Wâé heme nye ne, mu he ni ju pwonimenye, be time nye uce piwâgo konye. Be wâé te Padué pana e ne, ne ha a pipwodéén.

⁸Ke e bo ne tewé ni pétaapwo wâé ten, ke e ne me pitice ja kon. Ke e o te pwo ne tewé mwo ati ni naado na o te jan ne ko a mulihewé, ke e o ne tewé me piwéden, beme ni âpipati tewé me de ni béstén.

⁹Be caa te tii ne he ni tii iitihi a pwooti ce [ko pa apulie, na e paciiti Padué]: E ne me tice ja kon, te lépwona tice delé. Junihe ubwo ni âpipati ten, pwohewii ni âdaanu na hiwon. A bwo wâé nang, ke é dieli mwo. *Psaume 112.9*

O bo adéikewé

¹⁰Wo Padué na e ne ni wiinaado tenye. Be e ne ni âdaanu na nye cemi, ke e pwo me cim. Ke, me nye ne, ke e bo pwo me hiwon ni acehi ni penem denye na wâé.

¹¹Éa, e bo ne tewé, me piticenaado ne kon, ni pétaapwo naado na wâé. Ke geé bo ne ce de lépwo béstén. Ke o hiwon ce acéihi [mu lérusaléma] celi lé bo pwo-olé te Padué mu ko ni âpipati tewé, na geme bo pé nge céilé.

¹²Weengaa kuti a bwopwonen me geé pipenem delé. Be geé ne telé ana tieden kojalé. Ke geé pamwoiulé, beme lé nihe pwo-olé te Padué.

¹³Ke geé habwii a bwo piténédehi nen dewé a Pwooti Wâé te Kériso. Be geé patihi nina pwo ne tewé te lépwo acéihi ne lérusaléma, me ati lépwo béstén mwo. Éa, lé o alahi mwo pie, nihe pwonaado ne ko a bwo penem dewé me delé. Ke lé o pipwoun de Padué kon, ke lé o pwo-olé ten

¹⁴ko a wâé ten na nihe ubwo, na e caa ne tewé me tice ja kon. Ke lé o te nihe pwoiitihi ten me dewé, be junihe eânimelé tewé.

¹⁵Wâé heme nye pwoun de Padué ko pa âpipati ten na pieda, ke e piwéden, na pwocoon me nye pii!

2 Korénit 10

e pipwopain wo paulo (Pwahamii tii: 10—12)

¹ Pwo lépwo béen [mu kowé] na lé pii pie: «Wo Paulo, ke te junihe pwo niihen ne he ni tii ten, kehe te ju tice niihen, me e mu peleny!» Kehe é jenaa, ke woéo Paulo, ke é pwo me piwahin jo, ko a piwahin me a bwo bwala Kériso, beme é mwo ilekewé [pie me geé mwo te ju pwo me tabemiéo].

² Lépwoli! Geé téne, be koli é bo uce cihe me téé, hemepie é tuie lé pelewé! Be lé niimihi pie a mulihung, ke time uce pi-ité koja lépwo apulie na time lé uce temehi Padué. [Lé pipwocile, be lé bo temehi ehi pie] woéo, ke pa apulie ten, ke pwo a junuun ne kong.

³⁻⁴ Hemepie woéo, ke te pa apulie pwo bwohemwo, kehe icehi ana time é uce pwohewii lépwo béen. [Be é penem me de Padué.] Ke ni pihe pa na etong, ke time uce ni pihe pa te ni apulie. Be a niihelé, ke e âbé mu ko Padué, beme e tanahi a mwogu [te *Caatana] ke ni âniimihinaado na gele

⁵te lépwo acibehede, ni âniimihinaado na capuhi bwonilé, beme lé nemwo temehi Padué. Ke é pwopa, hane me taatééhi ni pwonime apulie, beme lé piténede Kériso.

⁶Hiwon lépwona lé mu pelewé na lé caa piténede Kériso. Kehe icehi ana te hiwon mwo lépwona te muhi telé me lé piténedeeng. Ke wo lépwonaa, ke é o caa tabuhi pwocuhinaado telé.

Caa ne tong a pihuô ne kowé

⁷Wâé heme geé alih ihi ni naado! Pwo pa céiu apulie pelewé, na e [pipiiéo, ke e te nihe pipii den. E] pii pie, pa apulie te Kériso, [ke caa te wâé] kehe icehi ana wâé heme e niimihi pie, woéo mwo, ke te pa céiu apulie te Kériso!

⁸Ke woéo, ke e pelong a pihuô ne kowé, na e âbé mu ko Padaame. Woté? Wieli [geé ko niimihi pie] é te junihe pipii dong ko anaa? Kehe icehi ana time uce tanim jo ko a pihuô naa, be a bwopwon, me é picani tewé, ke me é pamwoiukewé. Kehe time uce a bwopwon me é pwo me ta ne kowé.

⁹Ke geé nemwo niimihi pie é hane me é pwo me mwotikewé ko ni tii tong.

¹⁰Ke é ne ko pa apulie naa, ke e pii pie: «Te junihe mwoiu ni tii te Paulo, kehe icehi ana me e mu hadeniinye, ke pwohewii ni pioti, be time e uce temehi pii ni pwooti.»

¹¹Wo paceli e wonaa a bwo cihe ten, ke wâé heme e temehi ehi pie: Te tice aceli é tii ne he ni tii tong celi time é uce pii tewé gaale!

É te ju pii cehi ni penem de Padué

¹²Lé niimihi wo lépwo apulie na wonaa jélé pie, te nihe pwonaado ne kolé. Kona lé niimihi pie piticenaado ne kong? Te tice celi lé temehi, be lé te pipii jahi ne kolé mwo, [ke time lé uce omehi a mulihe lépwona pwonaado ne kolé].

¹³Ke lé pipii delé nge he ni naado na hiwon, he na te tice pihuô telé nelang. Kehe woéo, ke o time é uce wonaa, be é te ju pipii dong cehi ko a penem na e ne tong wo Padué. Ke e caa nekewé tong, beme é penem ha awiemewé.

¹⁴Ke te pwo a pihuô tong me é pii anaa. Be woéo, ke pali é mi pé lé céïikewé a Pwooti Wâé te Kériso.

¹⁵Ke wogewé, ke ni apwoamu tong, ke time é uce pipii dong ko ace apwoamu celi e te penem hen wo pace céiu. Ke é niimihi pie, geé o picediéo, hemepie piubwo da a céihi tewé.

¹⁶Ke é mulang, ke é bo â patemehi a Pwooti Wâé ne he ni duaan na e éité kojakewé. Ke o te tice ace bwopwonan, me lé pipé ne kong pie, é te ju penem cehi he ni apwoamu te pace céiu.

¹⁷ *Wo pana nimen me e pipii den, ke wâé heme e pipii den ne he Padaame. Jérémie 9.23*

¹⁸Wooélé paceli pwonaado ne kon? Time uce paceli e ju pipii den cehi! Kehe te wo pana e pii wo Padaame pie, pwonaado ne kon.

2 Korénit 11

Paulo me lépwo apostolo agele

¹Wieli geé ko niimihi pie é ko pipii dong? [Time é uce wonaa, kehe] geé te picani ne kong [heme é pipwopaing].

²Wieli [geé niimihi pie] é ko pitaaba [ne ko lépwoce béé apwocémun? Ke me é te pacémunikewé cehi?] Ke me wonaa, ke é pwohewii Padué. Be geé pwohewii ê ewa toomwo, na te junihe wâé nang. Ke é caa mi pii te Kériso pie, é bo nekewé ten, beme geé bo piaten me weeng, ke me time geé uce apulie te pace céiu.

³[Dieli jenaa, ke mwomwon, ke juuju a bwo engen dewé céi Kériso.] Kehe, geé pipwocilekewé, be koli geé bo pipatieden ni pwonimewé koja Kériso. Be wo *Caatana, ali bwien ânebun, ke e geti Éva, ke e pwo me e pipatieden.

⁴É ânebun, ke é patemehi tewé lésu [Kériso, ke geé hegi a pwooti tong]. Kehe icehi ana é jenaa ni, ke geé te nihe wele ko hegi pa céiu 'lésu' na lé patemehieng wo lépwo béén. Ke geé téte, beme geé hegi ace céiu 'jenen' na pi-ité koja a *Jenen litihi, ali geé caa mi hegi kojaéo. Ke pwohewii a bwo hegi nen dewé a céiu 'pwooti wâé', na time uce a ju Pwooti Wâé.

⁵[Wo lépwona lé pii beetihî ninaa, ke lé pii pie] woólé lépwo '*apostolo ubwo'. Kona woéo, ke woo?

⁶Wiel i juuju pie, time é uce temehi cihe. Kehe icehi ana é te nihe temehi Padué [me ni wâé ten]. Ke ati nina é pwo, ke é te habwii ne ha a pwéélang.

Time é uce iluukewé

⁷⁻⁸ É he é patemehi tewé a Pwooti Wâé na e âbé mu pele Padué, ke time é uce ilehi kojakewé pie, me geé picani tong ko mwani. Be te ni bée acéhi na lé ne ni mwani tong. Ke é heme é penem pelewé, ke pwohewiin heme é pé kojalé, beme é ne tewé. É wonaa beme é pwo me piwahin jo ne he pwahamiiwé, beme o pinekewé da. Ke woté? Kona [geé ko niimihi pie] ta nina é pwo tewé?

⁹Te pwo ni benaamwon na tice mwani tong hen, ke time é mu uce pii tewé. Kehe te wo lèpwo acéhi bénée mu Macédoine, na lé mu pébé ni bépicani tong. Éa, time é mu uce ilehi ce naado kojakewé, ke time é bo uce ilehi mwo.

¹⁰Ke time uce piwâ jo me é pii anaa, nge ati he ni piduaan ko a amu Akaï. É he é ko pii anaa, ke e pajuujuéo wo Kériso.

¹¹Kona [geé niimihi pie] time é uce pipwoééhewé [ko ana time é uce ilehi ace céiu naado kojakewé]? Geé nemwo niimihi pie wonaa, be e te temehi wo Padué pie é te junihe pipwoééhewé!

Lèpwo eabwé te Caatana

¹²Weengaa a watihen me time é o uce hegi ace céiu naado kojakewé. Be time é uce patupwo ne te lèpwo agele ace bwopwonan beme lé pii pie é pipwohewiilé.

¹³Be wo lèpwonaa, ke lé pii pie, wo Kériso, ke e nelé ngen beme lèpwo apostolo ten, ke me lé eabwé ten. Kehe icehi ana lèpwo apihaamikenye, ke lèpwo agele.

¹⁴Geé nemwo téetih anaa! Be wo Caatana, pali agele, ke e te gahe pwo me pa *âcélo na e pwéélang.

¹⁵Ke lé te gahe pwo mwo ni eabwé ten, me woélé ni eabwé te Padué na lé pwo nina wâé. Kehe icehi ana [é ha ace céiu tan] ke lé bo hegi ace cuhinaado telé, âcehi ni penem delé [na ta].

É mu he ni picani mu ko Kériso

¹⁶⁻¹⁸Wo [lèpwo ‘apostolo ubwo’ naa] ke lé te junihe pipii delé. Kehe é niimihi pie, te junihe hiwon ni watihen me é pipii dong kojalé. É he é pii anaa, ke é cihe pwohewiilé, kehe time uce wo Padaame. Kehe geé nemwo niimihi pie é pipii dong heme é pipwopaing. Kehe mepie ko wonaa ce bwo niimihinaado tewé, ke wâé heme geé picani ne kong, ke me geé hegi ana é pii.

¹⁹[Be geé niimihi pie] wogewé lèpwo atemehinaado, he geé te junihe epin ko hegi [a pwooti te] lèpwo apulie naa, na lé pipii delé hauli!

²⁰[Be wo pa céiu bélér, ke e pihaamikewé, ko ni pwooti na e pé lé céiikewé.] Ke geé neeng me e pihuôkewé, ke me ni *apenem tice ja kon den. Ke e pé ni mwani tewé, ke e wii ni acehi ni penem dewé. Ke [me e wonaa tewé, ke] e tekó

pihoonikewé, be pa upwonimen. [Pwohewiin heme] e ahi ni pwahamiiwé. Kehe icehi ana geé te pipwodéén ko anaa!

²¹Kehe woéo, ke time é uce wonaa. Wieli wâé heme tanim jo kon? Be [geé pii kong pie] tice niihung. Ke te wâé, kehe geé niimihi ehi! Wo panaa me lépwo béen, ke lé te nihe mwoiu ko pipii delé. Ke me wonaa, ke wâé heme é mwoiu, me é pipwopaing. [Kehe mepie é pwo anaa, ke wieli geé niimihi pie é] pipii dong pwohewiilé.

É te nihe pipwoeabwé ten kojalé

²²Kona [lé pipii delé pie] lépwo apulie mu ko a bele te lépwo *Ébéru? Woéo mwo. Ke [lé pii pie etelé a pwoiitihi te] lépwo *Isaraéla? Woéo mwo. Lépwo piebehi *Abérama? Woéo mwo.

²³Lé [pii pie woélé] ke lépwo eabwé te Kériso? Woéo mwo, be te junihe ubwo a bwo pipwoeabwé tong kojalé. É he é pii anaa, ke é cihe pwohewiilé, be lé pipii delé hauli. Éa, é caa te junihe penem kojalé, me de Kériso. Caa te cuwo ko neéo he karépu. Caa te cuwo ko tatiéo kojalé. Hiwon mwo ni benaamwon na é caa pwo me é mele hen [ko a bwo pipwoeabwé tong me de Kériso.]

²⁴[Mepwo é ne ko a ju bele tong] wo lépwo *Juif, ke lé ne tong [ni cuhinaado na nim na te junihe ubwo kuti]: 39 a jéhi ni bwo ahiéo ko a bwaliwota, ne ha a bwo pwocuhinaado na céiu.

²⁵Ke mepwo é ne ko lépwo Roma, ke ocié ko tatiéo ko ba-acuwo. Ke é ha a céiu, ke lé ahiéo ko péi, beme lé taunuéo. Ke é ha a céiu mwo, ke ocié jo ko tebwo he ni ong na lé mwiiê. Ke, é ha a céiu benaamwon, ke céiu a tan ke céiu a bwén na é mu he jié.

²⁶Hiwon ni a-engen dong nge he ni amu, ke é tooli nina abwobwo me ni tacebwén. Be é tooli ni jaa, ke ni abune, ke [lépwona lé cubwoniéo]: ni béen mu ko lépwo âjiénung, lépwo Juif, ke ni béen mu ko ni bée bele, die mwo ko lépwona lé pii pie lépwo acéihi ne ko lésu! Ke é te junihe mu he ni picani ne he ni pwomwo ubwo, ke é he ni melé, ke é ne he jié: [ne ha ati ni piduaan].

²⁷Ke é te junihe mwoiu ko a bwo penem dong. Ke, é he ni béen, ke te tice mwaale tong, ke te junihe emaan jo. Ke é he ni béen, ke te tice wiinaado me ûdu, ke menung. Ke, é he ni béen, ke te tice palito me pwotuun dong, ke te junihe im jo.

²⁸Ke a céiu mwo: Ke mu pinekepé a pwonimung ne ko ati ni acéihi, be é te niimilé taaci. Ke caa a âneule na te junihe téé ne tong.

²⁹Be heme tice niihe pace céiu acéihi békéng, ke woéo mwo, ke é te téne mwo. Ke mepie pihaami pace céiu, beme e pwo ace céiu naado celi ta, ke téé jo kon [ke é okéé ne ko pana e pihaamieng].

É pipii dong ko a bwo tice niihung

³⁰É heme é pipii dong, ke é te pipii dong cehi ko a bwo tice niihung.

³¹Ke time é uce gele, he é pii anaa. Be e pajuujuéo wo Padué, pa Caa te Padaame lésu, ke pana nye pipaunueng dieli mwo.

³²He li é mu ha a pwomwo ubwo Damas, ke lé hane me lé imwiéo. Be wo pa gupéno lang, ke pa apenem de pa daame Aréta, ke e pwo me lé wéhi ni pomwa ko a pwomwo ubwo wo lépwo coda ten.

³³Kehe [wo lépwo békéng ko penem, ke] lé neéo ha a éelele tai, ke lé neéo ole ha a pomwa-he-puwo, uti a goomwa babé ko a amu. Ke weengaa a bwo celuimiéo.

2 Korénit 12

Ana habwii te Paulo

¹A juuju pie, te junihe piticenaado ne kon, heme é tee pipii dong. Kehe icehi ana é o te pii tewé nina e habwii tong wo Padaame.

²[Geé mwo tabemi a jepule tong]: Pwo pa céiu apulie, pa acéihi ne ko Kériso. Ke é ha a céiu tan, caa ¹⁴ ni jo jenaa, ke e céieng da wo Padué ne ha a duaan na junihe e daaité ne he miiden. Meniing pie he e necu a één, ai e teko mu hen: Time é uce temehi, te wo Padué cehi na e temehi.

³Ke e pééeng da wo Padué, ne ha a duaan na junihe wâé. É ne ha amu naa, ke lé te mwaale ha a péém ni bée Padué. Meniing pie e te necu a één wo pa apulie naa, ai e teko mu hen: Time é uce temehi, kehe te wo Padué cehi na e temehi.

⁴Ke é ne ha a duaan naa, ke e téne ni pwooti na junihe wâé, nina pwocoon me nye pii ne he ni pati apulie.

⁵⁻⁶Weengaa a jepule na juuju, kehe time é o uce pipii dong kon. Kehe é te ju pii cehi pie woéo, ke pa apulie na tice niihung, ke é te ju pipaunu cehi [Padué]. Be time uce wâé heme geé niimihi pie, pwonaado ne kong mu ko anaa. Kehe wâé heme geé tautiéo cehi ko nina geé alahi ne kong, ai celi geé téne mu kong.

A ‘danaado’ ne ha a ééng

⁷Te junihe wâé ana é alahi ha a tan naa. Kehe icehi ana é alechen, ke e ne tong ni picani na te nihe muhi tong kon, beme é nemwo pipaunuéo, ke me é nemwo pipii dong ko nina é alahi. A picani naa, ke pwohewii a danaado ne ha a ééng, ke pwohewii mwo, pace céiu apitéteimipwooti celi e âbé mu pele *Caatana, beme e tatiéo.

⁸Ocié jo ko pwoiitihi te Padué, beme e pé kojaéo.

⁹Kehe icehi ana e pii tong pie: «Caa te jan ne kom a *pipwoééhe tice ja kon dong, be mepie pitice niihem, ke o oba go ko a junuung.» É mu ko anaa, ke é te ju pipii dong cehi ko a bwo tice niihung, beme e mu kong a junuu Kériso.

¹⁰É mu ko anaa kuti, na wâé heme tice niihung, ke me é mu he ni picani me ni téé, be caa woéo he Kériso. Ke wâé mwo heme lé pii me ta jo wo lépwo békéng,

ke me lé pwotahi ne kong. Ke é te tai hegi ninaa ne ha a pipwodéén. Be é he ni benaamwon na tice niihung hen, ke weengaa kuti a benaamwon na nihe pwo niihung hen [ne he Kériso].

Gia Paulo ne ko lépwo Korénit

11 É tee ko pipii dong, be wogewé ke time geé uce pii me wâé jo! Ke mepie [geé niimihi pie] te piticenaado ne kong, ke te piticenaado mwo ne ko lépwoli lé pii pie lépwoce ‘*apostolo ubwo’.

12 He li é mu pelewé, ke geé te alihia bwo cumang dong ne ha a tacebwén. Ke geé téetihni inenaado na é pwo ko a junuu Padué. A inen pie woéo, ke pa ju apostolo [na e pahedeéo wo Padué].

13 Ke geé hegi ati nina é ne te ni bée acéihi. Ke te céiu cehi ana, time é uce téele ilehi kojakewé pie, me geé ne ce bépicani tong. Be kona woté? Geé niimihi pie ta nina é pwo, ke me é pimiibule ne tewé?

Te tice aceli é ilehi kojakewé

14[Geé téne, wogewé lépwo béeing, be] é o te ju pwome âdé céikewé a bécociéhen. Ke o te tice celi é ilehi kojakewé. Be time uce ni mwani [ai ce bée naado] celi nimung kon ne pelewé, kehe te icehi ni pwonimewé! Be [geé pwohewii ni ju naîng. Ke] time uce ni nahi ewa na lé penem, beme lé pamwoiu ni nyaa me caa telé. Kehe te ni nyaa me caa te ewa, na lé pamwoiu ni naîlé.

15 É mu ko anaa, na é pipwodéén, he é ne tewé ana e mu kong: ati ni naamuung, me ati a pwonimung. Kona e o piwahin a pipwoééhe tewé me dong, heme piubwo ngen a pipwoééhe tong me dewé?

16[É niimihi pie, é caa habwii tewé ehi pie] time é mu uce ne huîwé ce âneule. Kehe icehi ana lé pipiiéo wo lépwo béeing pie, pa apipwohuô. Be lé pii pie: «Hemepie time e uce ilehi ace céiu naado he e mu pelenye, ke e te gahe pwo, be e caa te tooli a céiu bwopwonan celi me e bo pwo tenye.»

17 Kehe icehi ana geé cuwoteeke niimi lépwona é nelé lé céikewé. Ke kona é pahede paceli céiu nang mu kolé, beme é pé kojakewé ace céiu naado? Ûhu!

18 É he li é pahede Tit lé céikewé me pa céiu béeing, ke kona e pipwohuô tewé wo Tit? Ûhu, be wogemu, ke céiu pwonimemu, ke céiu bwo engen demu.

É pacihekewé beme é pamwoiukewé

19Kona geé niimihi [wogewé lépwo ju béeing] pie é teko pipwopaing cehi, heme é ko pii ninaa? Ûhu! É ko pacihekewé ne he pwahamii Padué, é mu ko ana nye tai mu ko Kériso. Ke ati nina é pii tewé, ke nina é pwo tewé, ke ni bwopwonan me é pamwoiukewé.

20Be mwotiéo hemepie é tehene lé pelewé, ke koli é tooli ace naado celi time uce wâé tong. Ke wiel time uce wâé tewé ace bwo hegi nen dong ne tewé. Be wiel é tooli ne pelewé ce pitaacunaado, me ce pipwokon, me ce piokéé, ke ce

pihota, me ce pipii apulie, me ce picibehede. Ke wiel i é o tooli ce béé huô celi ta ne ha a pubuuwé.

²¹ Be [he li é mu pelewé] ânebun, ke hiwon mu kowé, na lé pipule hauli me lèpwo bén, ke lé pwo ni huô na mwiihi. Ke mwotiéo pie, é o tehene lé, hemepie time geé uce téele bitekewé. Ke koli e bo pwo me tanim jo kowé wo Padué, ke wiel i é bo é wonaa mu kowé.

2 Korénit 13

Bénebwéne pwooti

¹⁻² Ha ali béokelohe bwo caniékewé tong, ke li é caa pii tewé pie, pwo lèpwo béeuwé na lé pwo nina time uce wâé. Ke é jenaa ni, he mwo woéo ité kojakewé, ke é pii tewé mwo pie: Geé pipwocile, be é o caa âdé a bécociéhen ne pelewé. Ke caa te tii ne he ni tii iitihi pie: *Hemepie nye pipé ne ko pace céiu ko aceli ta, ke time uce jan me céiu pace *apajuujuhi nen. Kehe wâé heme alo ai cié jélé. Deutéronome 19.15* Ke geé pipwocilekewé, be mepie é tehene lé pelewé, ke koli é o cihe me mwoiu ne kowé.

³Kona geé hane me é habwii tewé pie é cihe ne he nii Kériso? [É bo habwii tewé ehi pie] pana te junihe pwo niihen, ke te junihe pwojunuun, beme e penem kong ne pelewé.

⁴He li e mele ne ko a *kuricé, ke tice niihen. Kehe icehi ana e mulie cemwo mu ha amele ko a junuu Padué. Ke woéo mwo, ke tice niihung, kehe icehi ana é mu ko Kériso, ke gemu pimulie ibu. Ke e mu kong a junuu Padué, é mu kon. Ke geé o bo alihia anaa.

⁵ Geé cuwoteeke omehi ni mulihewé, pie te a ju mulihe lèpwona lé céihi ne ko Kériso. Ke mepie geé tooli pie, time e uce mu pelewé wo Kériso, ke geé caa te pitalupe.

⁶Ke é niimihi pie, geé temehi pie, woéo, ke [e caa tautiéo wo Padué, ke e tooli pie] time é uce pitalupe!

⁷Ke é pwoitihi te Padué me dewé, beme geé nebwén na geé pwo nina ta. Kehe time uce a bwopwonen me é habwii pie, time é uce pitalupe [ko ni penem dong ne pelewé]. Be te wâé tong cehi heme geé pwo nina wâé. Ke te piticenaado ne kon, hemepie lé tauti [wo lèpwo bén] pie ta ni penem dong.

⁸Be woéo, ke pa eabwé ko a [pwooti na] juuju. Ke é te ju penem cehi beme piubwo ngen a penem naa. Ke te tice apulie celi jan me e pacuwohi.

⁹Ke é pipwodéén ko a bwo tice niihung ke me pwo niihewé. Ke é pwoitihi, beme wâé mwo ni pwonimewé [ne he pwahamii Padué].

¹⁰Weengaa a watihen me é tii a tii ce, he mwo woéo ité. Be time uce nimung me é cihe me téé hemepie é mu pelewé. Be e caa ne tong a pihuô wo Padaame, beme é pamwoiukewé, kehe time uce a bwopwonen me é pwotahinaado ne kowé.

Bépinelé

¹¹É caa punuu ne éni, wogewé l épwo b ééng acéhi, ke é pii tewé pie: Geé pwo me piwâénimewé! Ke geé mwojuia mu he ni ta pwo tewé! Ke geé pipamwoiukewé, ke wâé heme céiu pwonimewé. Ke me geé mulie ha a péém, ke e bo mu pelewé wo Padué na e pipwoééhenye, ke e ne tenye a péém.

¹²Geé pipwobwocu, pwohewii a bwomu te l épwo ju acéhi b éénye. Lé tai ne bwocu tewé ati wo l épwo acéhi na élé éni.

¹³Ke me e adéikewé wo Padaame l ésu Kériso ko a *pipwoééhe tice ja kon den. Ke me e mu pelewé ati a pipwoééhe te Padué, me a *Jenen litih na e pineibukenyé! Adéikewé!

Galat

Galat 1

Pipwobwocu

¹Woéo Paulo na é pwotii. Woéo pa *apostolo, be lu pipégaliéo wo lésu *Kériso me Padué Caa, pana e pamulipi lésu mu ha amele. [Ke lu pahedeéo ngen, me é pipatemehi a pwooti telu.] Time é uce wonaa mu ko aceli lé pii ne ni apulie, be time uce ni apulie na lé pwo me woéo pa apostolo!

²É pwotii lé céikewé, wogewé ati ni *puco te ni acéhi ha a province Galat. Ke lé ne bwocu tewé mwo ati lépwo acéhi ne ko lésu Kériso na élé éni.

³Wâé heme e mu kowé a *pipwoééhe tice ja kon me a péém, na e âbé mu ko Padué Caa tenye me Padaame lésu Kériso. Adéikewé!

⁴Wo Padaame lésu, ke e pineeng me e mele, beme e tuwokenye koja ni ta pwo tenye, ke e celuimikenye koja a mulie na ta ne pwo a bwohemwo ce. Be weengaa ana nime Padué Caa tenye kon.

^{5*}A wâé, ke te a de Padué cehi, dieli mwo! Wâé heme wonaa! Amen!

te céiu cehi a ju pwooti wâé
(Pwahamii ti: 1—2)

⁶Wo Padué, ke e caa totekenye, ko a pipwoééhe tice ja kon den {na e pwaadeniin bé wo lésu Kériso}. Ke é téele kowé, he geé epin ko piâ ité koja pana e totekewé, me geé â téne a céiu pwooti [na lé pébé céikewé ne ni béen].

⁷Kehe icehi ana te céiu a *Pwooti Wâé te Kériso. Ke wo lépwo [agele] na lé pipatemehi a céiu pwooti, ke lé pibitehi a ju Pwooti Wâé. Ke lé pahaulihi ni pwonimewé.

⁸Wâé heme *piapwo pa apulie na e pipatemehi ce béé pwooti celi pi-ité koja a ju pwooti, li geme caa mi pipatemehi tewé! Ke te piwien mwo hemepie wogeme, ai é hemepie wo pace céiu *âcélo bé mu he miiden!

⁹Geme caa pii tewé kuti, ke é pii mwo ni, pie, wo lépwona lé pipatemehi a pwooti na pi-ité koja a Pwooti Wâé li geé caa hegi, ke wâé heme e piapwolé wo Padué!

¹⁰[Lé pii wo lépwonaa pie] geme hane me lé piwâékeme ne ni apulie. Ûhu! É te pipwoeabwé te Kériso cehi. Time é mu uce hane me lé wâééeo ne ni apulie; kehe é te hane cehi me e te piwâéeo wo Padué!

Tode Paulo beme e pipatemehi

¹¹Lépwo acéhi bééng, wâé heme geé temehi pie, a Pwooti Wâé na é ko pipatemehi, ke time e uce âbé mu ko ni apulie.

¹²Be time uce aceli é hegi mu ko pace céiu apulie, ke te tice pace apulie celi e pacémuniéo kon. Be te ana e te habwii tong [wo Padué] mu ko Kériso.

¹³ Be geé te temehi ehi ni bwopemiéo ânebun, he li é mwo te mu ha a pwoiitihi te lépwo [âjiénung] juif. Be é te junihe okéé ne ko nina lé céhi ne ko lésu. Ke nimung me é tanahi a céhi telé. Ke é pwo me lé picani, ke é te junihe pwotahi ne kolé.

¹⁴ É ha a benaamwon naa, ke é te junihe pitaa kojalé, ne ha a pwoiitihi te lépwo *Juif, koja lépwo âjiénung na pijéhi jo heme me woélé. Ke é wédenilé, be é te junihe âcehi ehi ati ni huô me a bwomu te lépwo watiheme.

É ali pa Naî Padué

¹⁵ Kehe icehi ana wo Padué, ke li e caa mi pipégaliéo, he mwo te woéo tina nyaa tong, ke e todeéo ha a pipwoééhe tice ja kon den.

¹⁶ Ke e niimihi pie me e habwii tong pa Naîn, beme é pipatemehieng de lépwona time uce lépwo Juif. Ke me wonaa, ke time é uce ilehi ace bwo temehinaado koja pace céiu.

¹⁷ Be time é uce taa *lérusaléma, me geme pitookeme me lépwo apostolo ânebuhung. Be é â epin nge ha a duaan Arabi. Ke é mulang, ke é mwojuia mwobé ne ha a pwomwo ubwo Damas.

¹⁸ É alecehe ni jo na cié, ke é taa lérusaléma, beme gemu pitemehikemu me Pétéru. Kehe icehi ana gemu te ju mu lang he na alo naadenitan cehi.

¹⁹ Ke time é uce ali lépwo bée apostolo, te icehi Cang, pa âjiéne Padaame.

²⁰ Ana é pii tewé ni, ke é pipatemehi tewé, ne he pwahamii Padué, ke time é uce getikewé.

²¹ É mulang [ke time é uce mu ha amu *Judé] kehe é â he lupwo piduaan ne Siri me Silisi.

²² Ke ati ha a benaamwon naa, ke time lé uce temehiéo wo lépwo acéhi mu Judé, be time lé mu uce aliéo.

²³ Kehe lé te ju piténe jepule kong. Be lé pii wo lépwo béné pie: «Wo pa apulie naa, ke weeng kuti pali e te junihe pwotahi ne kome ânebun. [Ke e pacuwo ni apulie, beme lé nemwo céhi ne ko lésu.] Kehe é jenaa ni, ke e caa pipatemehi ali céhi li e mu tanahi ânebun!»

²⁴ Ke é mu kong, ke lé tai pipaunu Padué.

Galat 2

Lé hegiéo wo lépwo bée apostolo

¹ Caa 14 ni jo alechen, ke é mwojuia ngemwo *lérusaléma imi Barnabas, ke é pé mwo Tit.

² Be wo Padué, ke e pii tong pie, me é mwojuia ne mwo lang. Ke geme pipwotapitihi me lépwo apihuô te ni acéhi, ke é pipatemehi telé a Pwooti Wâé, na é ko pipatemehi te lépwona time uce lépwo *Juif. Be o wâé ne kong, hemepie

céiu jélé ko ana é pwo. Be mepie time uce wonaa, ke wielo te piticenaado ne ko ati ni penem dong.

³[Kehe icehi ana te wâé telé. Ke wâé telé mwo a bwo penem ibu temu me] Tit, pa apulie na time uce pa Juif. Ke time lé uce wâgo kon pie, me *pwotegoop ten [pwohewii a bwomu te lépwo Juif].

⁴Be wo Kériso lésu, ke e caa tuwokenye, beme o te tice aceli me e bo uce ciekenye mwo. Kehe icehi ana pwo ni béé apulie, na lé te ju êjele bé hadenii ni acéihi. Ke lé pii pie lépwo acéihi bénée, kehe icehi ana lépwo apipwohuô. Be lé pwohewii ni coda, na lé mi êjetihi a amu, beme lé alihî ehi ni mulihe ni apulie hen. [Ke te junihe *mwiihi telé] a mwomwon na e ne tenye wo lésu. Be nimelé me lé pwo me nye *apenem tice ja kon [ne ko ni patén].

⁵Kehe icehi ana time geme mu uce pipéce ne kolé, ke time geme mu uce piténedelé, ne he ni cuwo nahi naado. Ke geme cile a juuju ko a Pwooti Wâé me dewé.

Lé alihî pie wo Padué na e pahedeéo

⁶Mepwo é ne ko lépwo apihuô, lépwo apulie na piubwo jélé ne ha a céihi, ke te tice aceli lé pwo me pitaatééhi ne he ni pwooti na é mu pipatemehi. Kehe icehi ana time uce junaado ne tong, hemepie lépwo apulie ubwo, ne he ni bwo alihî nen de ni apulie. Be wo Padué, ke time e uce pipwoinen ne ko ni apulie.

⁷Kehe icehi ana lé temehi pie, piwiekemu me Pétérû. Be wo Padué, ke e pahedeeng ngen, beme e â pipatemehi a Pwooti Wâé te lépwo Juif. Ke woéo, ke e pahedeéo ngen beme é â pipatemehi a Pwooti Wâé te nina time uce lépwo Juif.

⁸A bwopiinen pie, e penem ko Pétérû wo Padué, beme e *apostolo ten ne pele lépwo Juif; ke e penem kong, beme é apostolo ten, ne pele ni bén.

⁹Ke mepwo é ne ko lépwo apihuô ubwo na cié jélé: wo Cang, me Pétérû, me loane, ke lé hegikemu me Barnabas. Ke lé patemehi pie lépwona pibééme [ne he ni penem de Padué] ke me wogemu, ke me gemu â pele lépwona time uce lépwo Juif, ke woélé, ke me lé â pele ni Juif.

¹⁰Ke lé te ju ilekemu cehi pie, me gemu niimi lépwo acéihi na pitice naamuulé [ne lérusaléma]. Ke é te pwo ati kuti ha a ju pwonimung.

É pacihe Pétérû

¹¹⁻¹²É alechen, ke wo Pétérû, ke e âbé caniékeme ne Antioche ne Siri. É he e mwo ko mu peleme, ke lé mu piwiinaado ibu me lépwo acéihi na time uce lépwo Juif. Kehe icehi ana wo Cang, ke e pahede céiikeme [mu lérusaléma] lépwo bén [na lé te junihe pwopahi a ju bwomu te lépwo Juif]. Ke mwoti Pétérû [ko ana lé pii ne kon] ke e tabuhi picepewie lépwona time uce lépwo Juif. Ke me wonaa, ke time uce piwâ jo me é paciheeng, ne he pwahamii ati ni acéihi, beme é habwii ten pie, time uce wâé a huô ten naa.

¹³Ke time uce weeng cehi, be ati ni acéhi na lé Juif, ke lé te tai pwohewiieng, die ko Barnabas mwo! Be piwâ jélé me lé habwii nina lé niimihi. Kehe icehi ana lé te temehi pie, ana lé pwo, ke time uce wâé.

¹⁴Ke me é alihie pie, time uce mwomwon ni bwo engen delé, ne ha a Pwooti Wâé, ke é pii te Pétér, ne he pwahamii ati ni acéhi pie: «Wogo pa Juif, kehe icehi ana go tabuhi necu a bwo engen denye, ne he ni patén de lépwo Juif, beme geé pimulie ibu me lépwona time uce lépwo Juif. Ke é ko ade na go cuwoko ni béen na time uce lépwo Juif me lé pipwohewii lépwo Juif?»

A âne a Pwooti Wâé

¹⁵Mepwo é ne kome, ke geme te Juif mu ha a bwo piâbeeble teme. Ke é ânebun, ke geme mu pii ko lépwona time uce lépwo Juif pie, 'lépwo apwo na ta', be time lé uce âcehi ni *patén de Moosé.

¹⁶Kehe icehi ana é jenaa ni, ke geme caa temehi pie, time e uce *mwomwon ne he pwahamii Padué wo pace céiu apulie mu ko ace bwo piténedehi nen den ni patén de Moosé, kehe te icehi mu ko a céhi ten ne ko Kériso lésu. Ke wogeme, ke geme te céhi ne kon [beme e mu ha awiememe me Padué a péém] ke me wogeme ni apulie na me mwomwon ne he pwahamiin. A péém me a mwomwon naa, ke e âbé mu ko a céhi teme ne ko Kériso, time uce é mu ko ace bwo piténedehi nen deme ni patén. Éa, [é pii mwo pie]: Te tice pace apulie celi e bo mwomwon ne he pwahamii Padué, mu ko ace bwo piténedehi nen den ni patén!

¹⁷É mu ko anaa, na wogeme lépwo Juif, he li geme hane ace bwopwon beme geme bo mwomwon ne he pwahamii Padué. Ke geme tooli he lésu. Ke ni béen, ke lé pipé ne kome pie, wogeme 'lépwo apwo na ta', be time geme uce piténedehi ati ni patén. Éa, lé pii pie, wo Kériso, ke e péékeme, beme lépwo apwo na ta! Ûhu! Time uce a juuju!

¹⁸Weengi ana ta: é hemepie é mwojuia cemwo ne mwo ko li patén li é caa tahi taabwon!

¹⁹Me é mulie he ni patén, ke o te junihe pwocoon de Padué me e piwâééo. Kehe icehi ana te é mu ko ni patén kuti, na é temehi ninna! Ke é jenaa, ke é caa necu ni patén, beme é mulie me de Padué. Ke time e bo uce cieéo mwo, be caa pwohewiin heme é mele ne ko ni patén. Be é he e mele ne ko a *kuricé wo lésu, ke wogemu me weeng.

²⁰Heme é mulie, ke time uce woéo, kehe wo Kériso na e mulie kong. Ke a mulihung jenaa ni, ne ha a éé apulip, ke é mulie hen ha a céhi ne ko pa *Naî Padué na e pipwoééhung, ke e mele me dong.

²¹Weengaa a âpipati na e ne tenye wo Padué, é mu ko a *pipwoééhe tice ja kon den, beme nye mwomwon ne he pwahamiin. Ke woté? Kona é bo tahi taabwon anaa, beme é mu ko ni patén? Ûhu! Be mepie jan me pwo a péém ne ha awiemenye me Padué, me wogenye ni apulie na nye mwomwon ne he

pwahamiin, mu ko a bwo piténedehi nen denye ni patén, ke wieli me te piticenaado ne ko a bwo mele te Kériso!

Galat 3

tuwokenye koja ni patén (*Pwahamii tii: 3—4*)

¹[É téetikewé] wogewé lépwo Galat, be pwohewiin heme pipenem ni puniwé! Ade aceli e pahaulikewé [me geé padep koja a juuju]? Oniile jo ko pii tewé pie, wo Kériso, ke e caa mele ne ko a *kuricé [beme wâé te Padué gewé]?

²Weengi cehi ana nimung me é temehi kojakewé: Kona geé niimihi pie, geé caa hegi a *Jenen litihi, mu ko a bwo mulie tewé he ni patén? Úhu! Te é mu ko a céhi tewé, ne ko a Pwooti Wâé ko Kériso! [Ke geé temehi ehi anaa!]

³É ko ade na geé pwo me pihauli gewé kojan? Te a Jenen litihi na e tabuhi a penem ne kowé. Ke kona geé niimihi pie, geé bo panebwénihi ha a éé apulip? Wogewé, ke pipatieden ni puniwé!

⁴Kona geé o te pwo me piticenaado ne ko ati nina e tuie ne kowé dieli jenaa? Geé tahi taabwon ati ninaa?

⁵Wo Padué, ke e caa ne a Jenen litihi, ke e pwo me geé pwo ni *pipwojunuun, na lé téetihne ni apulie. Ke kona geé niimihi pie, te é mu ko a bwo piténedehi nen dewé ni patén? Úhu! [É pii mwo pie]: Te é mu ko a céhi tewé cehi, ne ko a Pwooti Wâé [ko Kériso]!

Wo Abérama ke pa béhabwiinen

⁶[Nye pine ne he ni *tii iitihi pie]: *E céhi ne ko Padué wo *Abérama, ke é mu ko a céhi ten, ke wo Padué, ke e pwo me pa apulie na e *mwomwon ne he pwahamiin.* Genèse 15.6

⁷É mu ko anaa, na wâé heme geé temehi pie, ati nina lé céhi [ne ko Padué] ke te woélé kuti naa, lépwo piebehi Abérama.

⁸Be genye pine ne mwo he ni tii iitihi pie, wo Padué, ke e mi pii ten a pwooti wâé ce, pie: *É bo *adéi ati ni bele pwo bwohemwo mu kom!* Genèse 12.3 Weengaa ana e mi pii beetihie pie, e bo hegi ni béen na time lé *Juif, ke e bo pwo me lé mwomwon ne he pwahamiin. Ke te é mu ko a céhi telé, na e wonaa.

⁹Wonaa ne mwo ko ati nina lé céhi [ne ko Padué] be lé o hegi mu kon ali adéihi li e caa ne te Abérama, mu ko a céhi ten.

Time uce jan ni patén

¹⁰Kehe icehi ana lé apwohi wo lépwona lé niimihi pie, o wâé te Padué jélé mu ko a bwo piténedehi ne ni patén delé. Be caa tii ne mwo he ni tii iitihi pie: *Apwohi pana time e uce piténedehi taaci ni patén na tii ne ha a tii ko patén!* Deutéronome 27.26

[Ke te junihe pwocoon kuti me nye piténedehi ati!]

¹¹ Nye alihie pie, o te tice apulie celi lé mwomwon ne he pwahamii Padué ko ace bwo piténedehi ne ni patén. Úhu! [Be caa te tii ne he ni tii iitihi pie]: *Wo pana e mwomwon mu ko a céihi, ke e o mulie. Habakuk 2.4*

¹² Genye alihie pie, ni patén, ke time e uce engen ne ko a céihi [kehe te é mu ko ni penem denye]. Be weengi ana caa tii ne he ni patén: *E ne a mulie te pana e piténedehi ni pihuô na e hen. Lévitique 18.5*

[Kehe me wonaa, ke genye tai apwohi, be time uce jan!]

¹³ Kehe icehi ana wo Kériso, [ke e pipatupwoeng] ke e caa tuwokenye koja a apwohi ko ni patén, be e pé ne huïin a apwohi tenye [ke cemeiteeng ne ko a kuricé]. Be caa te tii ne he ni tii iitihi pie: *Apwohi pana pawiieng ne ko a bacuwo. Deutéronome 21.23*

¹⁴ E wonaa wo Kériso, beme e o mu konye, nina nye céihi ne kon, a adéihi li e ne te Abérama wo Padué. Ke a juuju mwo, ne ko lépwona time uce lépwo Juif. Ke é mu ko a céihi tenye ne kon, ke genye hegí a Jenen litihí, na e caa mi pii ânebun wo Padué pie, me e bo ne tenye.

Ni patén ke e âbé alechehe Abérama

¹⁵⁻¹⁶ Ânebun, ke e pii te Abérama wo Padué pie, me e bo adéieng. Me nye alihie a pwooti te Padué ne he ni tii iitihi, ke genye pine pie e pii pie, me e bo adéi Abérama *me pa piebehieng*. Genèse 12.7 A bwopiinen pie *pana e bo âbeele mu kon*. Time e uce tii pie *lépwo piebehieng*, kehe e tii pie, *pa piebehieng*. Wo pa apulie naa, ke wo Kériso. Wo Padué, ke e *piapwo ne te Abérama, beme e *pajuujuhi a bwopiinen den naa. Ke geé alihie, wogewé ni béisng, pie, mepwo é ne konye ni apulie, ke me nye piapwo ne ko ace céiu naado celi nye pii, ke time uce jan me nye pitaatééhi ai patieden ni pwooti na nye caa pii. [Ke me wonaa ne pelenyne ni apulie]

¹⁷ ke genye temehi pie, wo Padué, ke time e bo uce pitaatééhi mwo nina e pii, li e caa piapwo ne kon. Weengi ana nimung me é pii: Mepwo é ne ko ni patén, ke a naado na e ne wo Padué, mwo te ju 430 ni jo alechehe a bwopiinen den te Abérama. Ke ni patén, ke time uce jan me e pitaatééhi a cuwo nahi atii, ne he ni bwopiinen den ânebun.

¹⁸ Ke hemepie a adéihi, ke me e ne tenye, mu ko [a bwo piténedehi nen denye] ni patén, ke wieli time e uce âbé mu ko a bwopiinen ânebun de Padué. Kehe icehi ana time uce wonaa, be wo Padué, he li e ne te Abérama a adéihi ten, mu ko a bwopiinen den ânebun. Ke e ne ten me piticenaado ne kon.

¹⁹ Ke heme wonaa, ke ni patén ke he me ni de? Te a naado li e ne tenye wo Padué alechen, beme e habwii tenye ni ta na nye pwo. Ke e cuwo die ko a bwo tuie te pa piebehi Abérama na te céiu nang: pana e bo pipwaadeni ati ni adéihi.

[A céiu mwo, ke time uce piwie ni patén me a piapwo, be nye pii pie, wo Padué, ke e ne] ni patén [me de a bele] na lé pipwaadeniin bé ne ni *âcélo. Ke [wo *Moosé ke] pa apipépwooti ten.

²⁰Kehe icehi ana he li e piapwo wo Padué ne te Abérama, ke te tice apipépwooti hadenilu. Be a naado na e te pipwo mu kon wo Padué [ke te tice pwooti te Abérama hen].

E mi habwii tenye Kériso

²¹Kehe wonaa, ke kona ni patén, ke e cubwonihi a piapwo te Padué? Úhu! Be te icehi a piapwo na e pébé céïkenye *a ju mulip. Ke e pwo me wogenye ni apulie na nye mwomwon ne he pwahamiin. Ke te tice ace céiu patén celi jan me e wonaa.

²²Kehe icehi ana ni tii iitihi, ke e pii beetihi pie, é ati he ni naado, me ati ni apulie, ke lé tai mu haahi a junuu a ta. Ke [te tice ace bwopwonen, me] nye hegí a adéihi ko a piapwo, [kehe te icehi] mu ko a céhi tenye ne ko lésu Kériso.

²³Ânebun, ke pwohewiin heme nye pwokarépu. Ke ni patén, ke e wéïkenye ati he ni tan, ucéhi a benaamwon na o habwii tenye a pwaaden mu ko a bwo céhi ne ko Kériso.

²⁴⁻²⁵[Weengi a ocine ko ni patén]: Ânebun, ke pwohewiin heme pace caa te cémun denye celi e pacémunikenyé, ke me e mi habwii tenye Kériso, ucéhi ace bwo tuie ten. Ke é jenaa ni, ke e caa te tuiebé kuti wo Kériso, ke genye caa céhi ne kon. Ke e caa pwo me nye mwomwon ne he pwahamii Padué. Ke time uce junaado me e mwo pacémunikenyé mwo ne ni patén.

Ni naî Padué mu ko a céhi

²⁶Heme nye céhi ne ko Kériso lésu, ke genye caa tai naî Padué.

²⁷He li puukenyé ne he nii Kériso, ke genye caa cuwohe ni epwén na mwo coho, beme nye pwohewieng.

²⁸[Me nye caa mu ko Kériso] ke caa te tice aceli pi-ité ne ha awieme lépwo Juif me lépwona time uce lépwo Juif; ke é ne ha awieme lépwo *apenem tice ja kon, me lépwona time lé uce apenem tice ja kon; ke é ne ha awieme lépwo aiu me ni toomwo. Be caa céiu genye, mu ko ana caa céiu genye me Kériso lésu.

²⁹Ke me genye caa mu ko Kériso, ke genye caa piebehi Abérama. Ke caa e konye a adéihi, li e caa mi pii te Abérama wo Padué.

Galat 4

Wogenye ke ni ju naî Padué

¹Geé cuwoteeke niimihi ani, pie: Wo pa apulie, ke e bo hegí ati ni naamuu pa caa ten [heme bo caa ubwo nang]. Kehe icehi ana heme mwo pa cuwo ewa, ke time e uce piwéden koja lépwo *apenem tice ja kon de caa ten.

²Ke e te cuwo ko piténede lépwona lé wéieng, die ha a tan na e caa jahi wo caa ten.

³Piwien ne konye. Be é ânebun, ke genye pwohewii ni cuwo ewa, be genye apenem tice ja kon de ni patén me ni duéé hauli.

⁴Kehe icehi ana é ha a benaamwon na e caa te mi pii jahi wo Padué, ke e nebé céiikenye pa Naîn. E âbeele mu ko ê toomwo, ke e [mulie ha a éé apulie ne pele lépwona lé] mu he ni *patén de Moosé.

⁵Wo Padué, ke e nebé pa Naîn, beme e tuwokenye koja ni patén na e ciekenye, ke e pwo me wogenye ni ju naîn.

⁶ A bwopwonen me nye temehi pie, wogenye ni naîn, ke wo Padué, ke e ne, he ni pwonimenye, a *Jenen litihí te pa Naîn. Ke a Jenen litihí, ke e ne me nye pii te Padué [ha a pipwodéén] pie: «Caa tong!»

⁷Ke é mu ko anaa, ke caa tice aceli e ciekenye, be genye caa naî Padué. Ke e bo ne tenye ati ni *adéihi te ni naîn, na e caa te mi pii ânebun.

Nemwo pwo me ciekewé mwo!

⁸Ânebun, ke time geé uce temehi Padué, ke wogewé ni apenem tice ja kon de ni nahi duéé, koja Padué na te céiu nang.

⁹Kehe icehi ana é jenaa ni, ke geé caa temehieng. Ke te a juuju pie, te wo Padué kuti na e temehikewé. Ke é ne he pwahamiin, ke te tice niihe ni duéé hauli, me ni patén; ke te piticenaado ne kon. Woté? É mu ko ade na geé bitekewé mwojuia, me geé piténedehi mwo ni naado naa? Kona nimewé me geé tai ni apenem tice ja kon delé mwo?

¹⁰É mu ko ade na geé paciitihí ni bée tan, me ni bée wole, me ni bée benaamwon, me ni bée jo?

¹¹Pwohewiin heme te piticenaado ne ko ati ni penem dong ne pelewé!

¹²É te cuwokowé, wogewé ni béeing, ne he nii Kériso, pie, me geé pipwohewiío [ke me geé pwo me tuwokewé koja ati ninaa]! Be woéo [pa *Juif, ke caa tuwoéo koja ni patén, beme] é pwohewiikewé [nina time geé uce Juif]. Ânebun, ke te junihe wâé ni bwomu tewé ne kong, ke wâé heme geé te cuwo ko wonaa.

¹³Geé temehi pie, he li é mi pipatemehi tewé a Pwooti Wâé, ke é mu ko a cunu kong, na é tuie lé pelewé.

¹⁴Ke geé gia ko anaa, kehe icehi ana time geé uce pihooniéo, me téétiéo. Ûhu, geé te hegiéo, pwohewiin heme woéo pa *âcélo te Padué, ke pwohewiin heme woéo, ke wo Kériso lésu.

¹⁵Ke geé te junihe pipwodéén kuti, ke pepule gewé me geé picani tong. Ke geé pipatupwokewé ati ne pehi ni wâé tewé me dong! Ke é jenaa, ke e wé a pipwoééhe me a pipwodéén dewé naa?

¹⁶Kona geé niimihi pie, woéo pa acubwonikewé, mu ko ana é pii tewé a juuju?!

Nemwo tabemi lépwo apahaulikewé

¹⁷[É temehi pie, wo lépwo apwocémun na lé tuie ne pelewé], ke lé hane me wâé tewé jélé. Kehe icehi ana time lé uce wonaa mu he ni ju pwonimelé. Be nimelé me lé pineitéékewé kojaéo, beme geé âcéilé.

18 É he li é mu pelewé, ke geé mwoiu me geé pwo nina wâé. Ke wâé heme geé te wonaa, heme te tieéo pelewé.

19 Au, [te junihe eânimung dewé] wogewé lépwo ju bêéng! Ke é te junihe picani, heme é niimikewé, pwohewii ni cunu ko ni toomwo heme lé piâbeeble ewa. Ke time o uce tuwoéo koja anaa, heme time uce téele hején a mulihe lésu ne kowé.

20 Kehe icehi ana caa time é uce temehi aceli me é pwo [beme é picani] tewé. Ke te junihe nimung me é mu pelewé, beme é cihe me bwala ne kowé.

Lupwo piapwo na alo

21 Kona pwo ce béen mu kowé celi nimelé me lé piténedehi ni patén de Moosé? Ke wâé, kehe icehi ana wâé heme lé téne ehi ana e pii ne ni patén.

22-23 Be caa te tii ne he ni tii iitihi pie, wo *Abérama, ke alo lupwo naîn. Wo pa céiu, ke pa naî ê apenem tice ja kon den; ke wo pa céiu, ke pa naî ê ju mwoden. Wo pa naî [Agar] ê apenem tice ja kon den, ke e âbeeble mu ko ana te nime pa apulie kon. Kehe icehi ana wo [Isaaka] pa naî [Sara, ê mwode Abérama], êna time uce ê apenem tice ja kon, ke e pituie be te wo Padué kuti, na e pacuwohi a bwopiinen ânebun.

24-25 Wo lu toomwo naa, ke lu ocine me denye, ne ko lupwo *piapwo [na e pwo wo Padué me de a bele ten]. Wo Agar, ê apenem tice ja kon de Abérama, ke ê ocine [ko ni patén, li e ne wo Padué me de a bele ten, wo lépwo Juif]. Be lé caa â apenem tice ja kon [de ni patén] pwohewii Agar me ni piebehieng. Ke a pwomwo ubwo [te lépwo Juif] é *lérusaléma, ke e pwohewii a juwole Sinaï ha amu Arabi, [he li lé mi hegi nelang li patén]. Be lupwo piduaan naa, ke a ine a bwo cie ni apulie.

26-28 Mepwo é ne ko Sara, ke ê ocine ko a bwopiinen ânebun de Padué, na e tuwo lépwo apulie koja ana cielé kon. Ke pwo a céiu lérusaléma na e jeda he *miiden, ke a amu te ati lépwona tuwolé. Ke te junihe hiwon jélé. Be caa te tii ne he ni tii iitihi pie: *Go pipwodéén wogo, lérusaléma na tice naîm!* *Pwonyebi me pipwodéén, wogo na time go uce piâbeeble ewa!* Lé caa tahi taabwoniko, kehe icehi ana go bo te piwéden! O te junihe hiwon ce naîm koja êna pwo aiu hen! *Ésaïe 54.1* Geé téne, wogewé ni bêéng ne he Kériso, wo lépwo naîn, ke te wogenye kuti! Éa, wogenye ke ni ju naîn, kehe time genye uce ni apenem tice ja kon de pace céiu. Be genye pwohewii Isaaka, be genye piâbeeble mu ko a bwopiinen ânebun.

29 Ânebun, ke [wo Ismaël, pa naî ê apenem tice ja kon, ke e pwotahi ne ko Isaaka]. Geé alihi, wo pa naîn na e âbeeble mu ko ana nime pa apulie kon, ke e pwotahi ne ko pa naîn na e piâbeeble mu ko a bwopiinen ânebun de Padué. Ke é jenaa ni, ke tekó piwien ne konye, nina nye piâbeeble mu ko a Jenen litihí.

30 E pii pie woté ne ni tii iitihi ne ko anaa? Weengi: *Geé cibéé ê apenem tice ja kon, me pa naîn.* *Be wo panaa, ke time e o uce hegi ni wâé te caa ten.* *Te icehi pa naî ê toomwo na time uce ê apenem tice ja kon, na e bo hegi ati.* Genèse 21.10

³¹Geé alahi, wogewé lépwo béeing ne he Kériso, time genye uce ni apenem tice ja kon de ni patén. Wogenye ni ju naî Padué na e caa tuwokenye!

Galat 5

E caa tuwokenye wo Kériso

¹E tuwokenye wo Kériso, beme te tice celi e ciekenye mwo. Ke wâé heme geé imwi me mang a bwo tuwokewé. Ke geé nemwo ne me wogewé lépwo *apenem tice ja kon mwo [ne ko ace céiu patén].

²⁻³Geé téne wogewé! Be woéo, Paulo [pa *apostolo] ke é pii mwoiuhi tewé pie: Hemepie geé [hane a péém me Padué ko a bwo] *pwotegoop âcehi ni patén, ke wâé heme geé piténedehi ati ni patén. Ke hemepie wonaa, ke te piticenaado ne ko ana e pwo wo Kériso me denye!

⁴Wo lépwo béeén mu kowé, ke lé hane me lé *mwomwon ne he pwahamii Padué mu ko a bwo piténedehi nen delé ni patén. [Lé pipwocile!] Be wieli o pineitéélé koja Kériso me a *pipwoééhe tice ja kon de Padué.

⁵Kehe icehi ana wogenye, ke genye te ju céhi cehi, ke genye ucéhi ne ha a pipwodéén a tan na e bo hegikenye wo Padué ne pelen, ke o wâé ten genye. Ke e picani tenye na a *Jenen litih, ha a benaamwon na nye mwo ucéhi a tan naa.

⁶Hemepie tegoop genye, ai mepie time uce tegoop genye, ke te piticenaado ne kon, be nye mu he Kériso lésu. Ke ana a junaado, ke te icehi a céhi tenye [ne kon]. Ke a céhi tenye, ke o habwii, heme nye pipwoééhe [lécwo béeén].

Woo celi e ne me geé padep?

⁷Wogewé lépwo béeing, geé caa te engen ehi [ne ko Kériso]. Ke woo celi e ne me geé padep koja a pwaaden naa, beme time geé uce âcehi a juuju?

⁸Time uce wo Padué, be te weeng na e todekewé!

⁹[Geé pipwocile, be wo pa apulie na e gele, ke jan me e ne me geé tai pilééng.] Pwohewii ana nye mu pii pie: «A cuwo nahi nyaa te pwoloa, ke e pwo me cibu a pwoloa.»

¹⁰Kehe icehi ana é céhi me mang pie, me céiu a bwo niimihinaado tenye, mu ko a bwo céiu genye ne ko Padaame. Mepwo é ne ko pa apulie na e pwo me pipenem ni pwonimewé, ke wo Padué, ke e bo tautieng ke pwocuhinaado ten. Te piwien hemepie wo panaa, ke pa apulie na ubwo nang ne pelewé.

¹¹Wogewé lépwo béeing ne he nii Kériso, time é mu uce patemehi tewé a bwo pwotegoop, âcehi a bwomu te lépwo *Juif. Be mepie é wonaa, ke wieli time lé uce pipiéo me ta. Úhu! Weengi ana é patemehi: [E celuimikenye wo pa *Mesia, he e mele ne ko] a *kuricé. Ke weengaa a piolo ne te lépwo Juif.

¹²Mepwo é ne ko lépwona lé iluukewé, ke [caa emaan jo kolé]. Hemepie nimelé me lé pwotegoop tewé, ke wâé heme lé tahagéi taabwon a aiu telé!

Piténede a Jenen litihi

¹³Caa te todekewé, wogewé lépwo béis ne he Kériso, beme tuwokewé ati koja ni naado na ciekewé. Kehe icehi ana geé nemwo pé hauli a bwo tuwokewé naa, beme geé mulie mwo ha a ta. Geé pipenem dewé ne ha a pipwoééhe.

¹⁴Ati ni âne ni *patén de Moosé, ke e mu ha a âpihuô na te céiu. Weengi: *Go pwo me eânimem de ni béén, pwohewii a bwo pieânimem dem. Lévitique 19.18*

¹⁵É hemepie geé te cuwo ko pipwotahinaado ne kowé, pwohewii ni wota apiaba, ke geé pipwocile, be wiel geé bo pitaunukewé.

¹⁶Weengaa ana é pii tewé: Geé piténedehi a Jenen litihi. Be mepie wonaa, ke time geé o uce âcehi nina te nimewé kon na ta.

¹⁷Be nina te nimenye kon na ta, ke lé pwobwonih a Jenen litihi; ke a Jenen litihi, ke e pwobwonih nina nimenye kon na ta. Ke lu pipwopa ne konye. Ke lu pineitééhi ni pwonimenye.

¹⁸Ke hemepie e pihuôkewé na a Jenen litihi, ke caa time geé uce mu haahi ni patén. [Ke weengaa ali é pii tewé.]

Utehe nina nimenye kon na ta

¹⁹Genye omehi ehi ni huô te lépwona lé te âcehi nina nimelé kon na ta: Lé nenimelé ne ko ni naado na tanim genye kon; Lé pipule hauli me ni béén; Lé pwo ni huô na mwiihi ne ko ni éélé;

²⁰Lé pipwoun de ni *déme duéé, ke lé pwo eti ta, ke lé piténede ni duéé; Lé pitaaba; Lé pitéétilé, ke lé piokéé; Lé pipwoun delé mwo, ke lé caa â huîi lépwo béén; Lé pineitéélé, ke lé niimihi pie, te ni juuju cehi nina lé pii ne he ni muko puco telé;

²¹Lé nenimelé ne ko ni de lépwo béén; Lé piolo, ke lé piwiinaado me ûdu pwohewii ni puwokwo. Ke hiwon mwo ni naado na lé pwo na ta. Ke é pii tewé mwo ana é caa pii, pie: Wo lépwona lé pwo ni naado naa, ke time lé o uce hegi ni *adéihi te a *Mwametau te Padué.

Ni acehi a Jenen litihi

²²Kehe icehi ana weengi ni acehi a Jenen litihi, na e ne he ni mulihenye: A pipwoééhe; A pipwodéén; A péém; A piuca; A pipwowâé; A pipwoeabwé; A piténedehi ha a céhi;

²³A pwonime na bwala; A pipwoiipihi. Ke ni patén, ke te ju tice aceli e pii ne ko ninaa.

²⁴Wogenye na lépwo apulie te Kériso Iésu, ke genye caa cemeite ne ko a kuricé nina te nimenye kon na ta.

²⁵Kehe mepie e pamulipikenye na a Jenen litihi, ke wâé heme nye ne me e pihuôkenye.

²⁶Genye nemwo pwo me piubwo genye, ke pihabwiikenye! Genye nemwo pwo me pita ni bénaye! Ke genye nemwo pitaaba!

Galat 6

Bénebwéne pwooti

¹Lépwo ju béis ne he Kériso, hemepie gé temehi pie, pa céiu béis, ke e ko pwo nina ta, ke wâé heme gé pééeng mwobé ha a pwaaden na wâé. Ke weengaa a penem dewé hemepie gé cumang ne ha a bwo mulie tewé âcehi a *Jenen litih. Ke gé cihe me bwala ne kon. Ke gé pipwocile, wogewé ati, be koli lé bo céikewé mwobé, me gé pwo nina ta.

²Geé picani tewé ko pé ni âneule tewé. Be me wonaa, ke gé piténedehi a pihuô te Kériso [pie, me genye pipwoééhenye, be weengaa a ju patén me denye].

³Mepie e niimihi wo pace céiu pie pwonaado ne kon, ke wo panaa, ke e pipweéo, be te piticenaado ne kon!

⁴Ke go nemwo tee ome pace céiu, beme go pwo me piubwo go kojaeng. Go te pitauti mwo ni huô tem. Ke mepie wâé, ke go pipwodéén kon.

⁵Be wâé heme nye te muko pétaapwo alihni penem denye.

⁶A céiu mwo: Ke wâé heme gé pipatihi ni wâé tewé me pana e pacémunikewé ko a pwooti.

Nye tii nina nye cemi

⁷Go pipwocileko ne ko ni bwopemiko! Go nemwo niimihi pie go taduwo ne he pwahamii Padué! Be go o te tii nina go te cemi.

⁸Be hemepie nye cemi, âcehi nina te nimenye kon na ta, ke nye bo tii mwo ne ha a mele, me a bwo tiekenye. Kehe icehi ana mepie nye cemi, âcehi ana nime a Jenen litih kon, ke genye bo tii a *mulie dieli mwo ne pele Padué.

⁹Ke anaa, na me time nye uce pwo me emaan genye, me nye pwo ana wâé! Ke genye nemwo pipwotupwo! Be o bo tui a tan na nye bo hegi [a *adéih].

¹⁰É mu ko ati ninaa, ke genye pé a benaamwon na mwo mu ne tenye, me nye mi pwo nina wâé te ni acéih bénaye, ke genye wonaa mwo te ati ni apulie!

Pinekenye

¹¹Woéo Paulo, na é imwi a bépwotii beme é panebwénihi ali tii. Geé alihni atii na ubwo na é pwo!

¹²[Weengi ana é pii tewé]: Geé pipwocilekewé ne ko lépwona nimelé me lé *pwotegoop tewé! Lé wonaa beme lé piwâélé wo lépwo apulie. Be mwotilé ko lépwo *Juif. Be hemepie lé pipatemehi a pwooti ko a bwo mele te Kériso ne ko a *kuricé, ke wielo o pwotahinaado ne kolé.

¹³Wielí lépwona tegoop jélé, ke time uce nimelé me lé âcehi ni *patén de Moosé. Ke te nimelé cehi me lé pipii delé ne he pwahamii l épwo Juif. Ke wâé telé heme lé pii pie, te woélé cehi, na lé ne me geé hegi a bwomu te l épwo Juif.

¹⁴Woéo, ke time é uce pipii dong ko ni naado na wonaa. É patemehi cehi a bwo mele te Padaame henye, l ésu Kériso, ne ko a kuricé. Ke é mu ko anaa kuti, ke time uce junnaado ne tong, ati ni huô na nihe pwonaado ne kon, ne pwo a bwohemwo ce. Pwohewiin heme lé caa mele ati ninaa, ne kong. Ke woéo, ke pwohewiin heme é caa mele koja ni bwomu te a bwohemwo.

¹⁵Hemepie tegoop genye, ai mepie time uce tegoop genye, ke te piticenaado ne kon. Ana pwonaado ne kon, ke ana me taatééhi a bwo mulie tenye. Be wo Padué, ke e pwo me wogenye ni apulie na mwo coho.

¹⁶Wogewé na geé mulie cehi a âpihuô tong naa, ke te wogewé kuti a ju puapulie te Padué: a puapulie *Isaraéla na mwo coho! Wâé heme e mu kowé ati a pipwoééhe me a péém de Padué!

¹⁷[É panebwénihi ne ha a bwopiinen pie]: Wo l épwona lé cubwoniéo, ke wâé heme lé cuwo! [Be te wo l ésu kuti na e ne a mwomwon dong.] Be é caa junihe mu he ni picani, he é penem me den. Ke ni ahinaado na e ha a ééng, ke ni inen.

¹⁸L épwo acéihi b ééng, wâé heme e adéikewé wo Padaame henye l ésu Kériso, mu ko a *pipwoééhe tice ja kon den! Adéikewé! Amen!

Éfeso

Éfeso 1

Pipwobwocu

¹ Woéo, Paulo, na é pwotii lé céiikewé, woéo pa apostolo te *Kériso lésu, âcehi a bwo niimihinaado te Padué. [Be e pahedeéo ngen, me é pipatemehi a pwooti ten.] É pwotii lé céiikewé, wogewé ni apulie iitihi ten ne Éfeso, [ke é ne mwo he ni béé duaan mwo] wogewé na geé *cumang ne ha a céihi ne ko Kériso lésu, ke céiu gewé me weeng.

² Wâé heme e mu kowé a *pipwoééhe tice ja kon me a péém na e âbé mu pele Padué Caa tenye, me Padaame lésu Kériso. Adéikewé!

a adéihi na e pébé wo iésu kériso
(Pwahamii tii: 1—3)

³ Wâé heme nye pipaunu Padué! Weeng Padué na e Caa te Padaame henye lésu Kériso. Be e ne tenye mu he miiden ati ni *adéihi ten, mu ko ana céiu genye me Kériso.

⁴ Ânebuhe a bwo tabuhi na a bwohemwo, ke e caa te mi pipégalikenye wo Padué, beme nye apulie ten, na e pwaadeniin bé wo Kériso. Ke nimen me wâé genye, ke me tice ta konye ne he pwahamiin. Be te junihe eânimen denye.

⁵ Ke é mu ko a pipwoééhe ten, ke a âniimihinaado ten ânebun pie, me e bo pwo me wogenye ni naîn, mu ko lésu Kériso. Weengaa a bwo niimihinaado ten, ke e te pacuwoshi.

⁶ Wâé heme nye pipaunueng, me picedieng. Be te junihe ubwo *a wâé ten, me a pipwoééhe tice ja kon den me denye! Be e ne, me piticenaado ne kon, ne tenye ni adéihi ten, na e pwaadeniin bé wo pa Naîn na te junihe eânimen den.

⁷ Ke caa céiu genye me weeng. Ke e caa tuwokenye [wo Padué] ke e caa pineuhi ni ta pwo tenye, mu ko a cewéhe Kériso [na téé he li e mele me denye]. Be te junihe ubwo a pipwoééhe tice ja kon den

⁸ na e ne tenye me tice ja kon. Ke e ne tenye ati a pitemang me a bwo temehinaado.

⁹ E habwii tenye *a bwo niimihinaado ten li e ha aduwo ânebun. Ke e pacuwoshi ne tenye, mu ko Kériso,

¹⁰ ha a benaamwon na e caa te mi pacuwoshi ânebun. Ke e bo neibuhi ati nina [e tabuhi] ne jedá he miiden, ke e jeoté pwo bwohemwo. Ke e bo tai nelé ati haahi a pihuô te Kériso.

E pipégalikenye bwolihi wo Padué

¹¹⁻¹² E pipégalikeme wo Padué, wogeme na geme mi céihi ne ko Kériso, me ucéieng. Ke e niimihi ânebun me e pwo me wogeme ni apulie ten, mu ko ana

céiu geme me Kériso. Be ati ni naado na nimen kon, ke e te pacuwohi. E pwo me wonaa, beme geme habwii *a wâé ten na junihe ubwo.

¹³Wogewé mwo, ke geé téne a pwooti na a juuju. Ke a pwooti ce, ke a *Pwooti Wâé, na e celuimikewé kon. Be geé caa téneeng, ke geé caa céhi ne ko lésu Kériso. Ke e [habwii wo Padué, pie, geé caa apulie ten. Be e] caa ne kowé a inen, a *Jenen litih, pwohewii a bwo *piapwo ten ânebun.

¹⁴Ke a Jenen litih naa, ke e ânebuhe ni wâé ten, na e ne tenye, ni apulie ten. Ke é mu ko anaa, ke genye temehi pie, genye o bo hegi ati ni wâé ten. Ke bobe tuwokenye ati koja a ta. Wâé heme nye pipii de Padué na ubwo nang ne ha a wâé ten!

É pwoitihi me dewé ni acéhi

¹⁵⁻¹⁶É mu ko ati ninaa, ke é te cuwo ko niimikewé ne he ni pwopwoitihi tong. Ke é te cuwo ko pwo-olé ten kowé. Be é téne jepule kowé pie, geé te junihe céhi ne ko Padaame lésu, ke geé pipwoééhe ati ni apulie ten.

¹⁷[Heme é pwoitihi me dewé] ke é ilehi koja Padué pie, me e picani tewé, me geé temehieng ehi ko a Jenen litih ten. Be a Jenen litih, ke e bo habwii tewé a ju bwomu te Padué: wo Padué te Padaame henye lésu Kériso, me pa Caa na oba nang ko a wâé.

¹⁸Ke é ilehi kojaeng pie, me pwéélang ehi ne he ni pwonimewé ko ati ni wâé ten na e ne tewé. Be junihe ubwo nina e bo ne te ati ni apulie ten. Be wonaa a cemewé na geé *ucéhi ne ha a céhi, alecehe a bwo todekewé ten.

¹⁹Ke [é pwoitihi mwo pie] me geé temehi a junuu Padué na te junihe ubwo me denye, wogenye nina genye céhi ne kon.

Ne te Kériso me e pihuôhi ati

E habwii a niihen me a junuun naa wo Padué,

²⁰he e pamulipi Kériso mu ha amele, ke e pwo me e tebwo *pwo a juin ne he miiden.

²¹Ke e pwo me e pihuôhi ati ni apihuô ke ni pwojunuun [ne jeda he miiden, ke éni pwo bwohemwo]; he ni benaamwo amu ce, ke ni benaamwo amu na e bo âbé.

²²Éa, e tai ne ati wo Padué haahi ni pihuô te Kériso. Ke e pwo me pa daame he a puapulie ten, a Mwaiitihi,

²³na a één, ke [wo Kériso, ke e punin; ke] céiu julu. Ke ati ni naado na e ne wo Padué, ke te tai oba ko Kériso.

Éfeso 2

Ânebun ke genye mele

¹Ânebun, ke wogewé ni apulie mele, [be time e uce mu kowé *a ju mulip] mu ko ni huô tewé na ta, me a bwo time uce piténede Padué.

²Be li geé mulie pwohewii ni apulie pwo bwohemwo na lé pwo nina ta. Ke geé piténede [*Caatana] pa caa te ni duéé na lé pihuô ne he pipuwohe a miiden me a bwohemwo. Weeng na e pihuô te ati nina muhi telé me lé piténede Padué.

³Ke é ânebun, ke wogenye, ke genye tai pwohewiilé. Be genye âcehi ni bwo niimihinaado tenye na ta. Ke genye pwo ati nina nimenye me nye pwo ko ni éénye. Ke genye ucéihi ni cuhinaado mu pele Padué, be e okéé ne ko ati ni apulie pwo bwohemwo na lé pwo nina ta.

Nye mulie mu ko a pipwoééhe ten

⁴⁻⁵ Ânebun ke wogenye ni apulie mele [ne he pwahamii Padué] ko ni ta pwo tenye. Kehe icehi ana te junihe eânimén denye, be te junihe ubwo a pipwoééhe ten. Ke e pwo me nye pimulie ibu me Kériso. Éa, celuimikewé mu ko a *pipwoééhe tice ja kon de Padué.

⁶E céikenye mu ha amele me Kériso lésu, ke e ne tenye ni atebwo he *miiden me Kériso. E wonaa, be caa wogenye he Kériso.

⁷Be nime Padué me e habwii dieli mwo pie, te junihe ubwo a pipwoééhe tice ja kon den, ke te junihe hiwon mwo ni adéihi me ni wâé ten na e ne tenye, me piticenaado ne kon, na e pwaadeniin bé wo Kériso lésu.

⁸Be e caa celuimikewé mu ko a pipwoééhe tice ja kon den wo Padué, na e pwaadeniin bé na a céihi tewé. A bwo celuimikewé, ke time uce é mu kowé. Be a âpipati, na e ne tenye [me piticenaado ne kon] wo Padué.

⁹Ke time uce wonaa mu ko ce penem dewé, ke me geé pipii dewé!

¹⁰Be wogenye ni acehi ni penem de Padué, he li e pwo me mwo coho ni mulihenye. E pwo me wonaa, beme nye te cuwo ko pwo ni penem na wâé na e caa te mi piwâam kon ânebun, beme nye bo pwo.

Céiu genye ne he Kériso

¹¹Wo l épwo *Juif, ke lé pii kolé pie, 'l épwona *tegoop jél é'. Ke lé pipii delé kon. Kehe wogewé na time geé uce Juif, ke lé pii kowé pie, 'l épwona time uce tegoop jél é'. Mepwo é ne ko a tegoop, ke ana te ju pwo ne ko a éé apulip cehi. Kehe icehi ana wâé heme geé niimihi pie, é ânebun, ke time geé uce apulie ha a bele te Padué.

¹²Ha a benaamwon naa, ke time geé uce temehi pie, woo wo Kériso, pa *Mesia [na e *celuimi a bele te Padué]. Be time geé uce apulie ha a bele *Isaraéla na e pipégali wo Padué. Ke tice dewé mu ko ni piapwo te Padué. Ke geé mulie pwo a bwohemwo ce, kehe o te tice *adéihi celi geé ucéihi mu ko Padué. Be time geé uce temehieng,

¹³ke geé mu ité kojaeng. Kehe icehi ana é jenaa ni, ke geé caa âbé céiieng mu ko a cewéhé Kériso lésu [na tée he li e mele me dewé].

¹⁴Wo Kériso, ke caa weeng pa péém denye. Ke e neibukenye, beme wogenye a bele na céiu, wogeme l épwo Juif me wogewé, nina time geé uce Juif. Be é

he e mele ne ko a *kuricé, ke e tanahi a aba ha awiemenye na bahi ko a bwo pitéétikenye.

¹⁵ [Wogeme l épwo Juif, ke geme âcehi] ni *patén de Moosé; ke [te hiwon] ni pihuô, me ni cuwo nahi patén kon. [Kehe icehi ana é jenaa ni] ke piticenaado ne ko ninaa ko ana e pwo wo Kériso. Be e ne a péém hadeniinye me wogewé na time geé uce Juif. Ke e neibukenye, beme wogenye a bele na céiu, na nye mu kon.

¹⁶ A céiu mwo: Ke e ne mwo a péém ha awiemenye ati me Padué ko a bwo mele ten ne ko a kuricé. Ke e pwo me tieden a bwo pitéétikenye.

¹⁷ Éa, e tuie wo Kériso, beme e pipatemehi a Pwooti Wâé na e pébé a péém. Ke e pipatemehi tewé [wogewé nina time geé uce Juif] na geé mu ité koja Padué. Ke e pipatemehi teme [wogeme l épwo Juif] na geme pimu mwonu Padué.

¹⁸ É mu ko ana e pwo wo Kériso, ke wogenye ati, wogeme ni Juif me wogewé l épwona time geé uce Juif, ke caa jan me nye âmwonu Padué Caa tenye. Ke genye tai â pelen, ko a *Jenen litihî ten na te céiu nang.

Wogenye ni apulie ha a pomwa ten

¹⁹ É mulang na wogewé l épwona time geé uce Juif, ke time geé uce coho, ke time geé uce a bele ité. Be geé caa apulie te Padué, ke geé taa ha a pwomwoiou ten, pwohewii ati ni béé apulie te Padué.

²⁰ [Nye pwohewii] a mwa na bahi ne pwo a paan [na mang]. Be a paamwa, ke wo l épwo *apostolo, me l épwo *péroféta, ke a péi paamwa na a junando, ke wo Kériso.

²¹ Ke weeng na e pwo me mang, me piubwo da a mwa, [wogenye na nye céhi ne kon] me â a Mwaiitihi te Padué.

²² Wogewé [na time geé uce Juif] ke geé te péi mwo ne ko a mwa naa, be caa wogewé he Kériso. Ke piwien mwo ne kome [l épwo Juif]. Ke e mulie ha a mwa naa a Jenen litihî te Padué.

Éfeso 3

Ana e niimihi wo Padué bwolihi

¹⁻² [Wo Padué, ke e pwo me céiu genye: wogeme l épwo *Juif, me wogewé na time geé uce Juif.] Ke é mu ko anaa kuti, na woéo, Paulo, ke é pipwoeabwé te Kériso lésu, he é penem me dewé. Ke é jenaa ni, ke é mu he karépu mu ko a penem naa. Kona time geé uce temehi anaa? Be e ne tong a penem naa wo Padué ne ha a wâé ten, beme e pacuwohi ana e niimihi.

³ Time e uce pii beetihî *a bwo niimihinaado ten naa, na e ha aduwo [mu ha atabuhi kon]. Kehe icehi ana é jenaa ni, ke e habwii tong, ke é bwo ko tabuhi pii tewé ne ha a tii ce.

⁴Ke, me geé pine, ke geé o temehi ana é temehi, woéo, ne ko a bwo niimihinaado ten naa, na e pacuwohi ne ko Kériso.

⁵Ânebun, ke te tice apulie celi lé temehi ehi anaa. Kehe icehi ana wo Padué, ke e caa pwo me lé temehi ne ni *apostolo me ni péroféta ko a *Jenen litih ten. Be woélé ni apulie ten na e caa pipégalilé.

⁶Weengi a bwo niimihi nen den: Heme lé mu ko Kériso lésu wo lépwona time uce lépwo Juif, ke lé caa te â pwohewii lépwo Juif, be caa â céiu a bele. Ke lé tai hegi ni wâé me a *adéihi te Padué. Ke a piapwo te Padué, ke te a delé ati. Weengaa kuti a Pwooti Wâé!

Pahede Paulo beme e pipatemehi

⁷⁻⁸ Woéo, ke te piticenaado ne kong koja ati ni apulie te Padué. Kehe icehi ana e te junihe pwopweehi ne kong ha a *pipwoééhe tice ja kon den, ke e pipégaliéo beme é eabwé ten. Ke e penem kong ko a junuun, beme é pipatemehi a Pwooti Wâé ten ne te lépwona time uce lépwo Juif. Ke é pii telé ati ni adéihi ten na e daaité, ke piwéden, na e [ne tenye, na nye] mu he Kériso.

⁹E pahedeéo ngen, beme é habwii te ati ni apulie ni bwopwonan den, me e pacuwohi a bwo niimihinaado ten na e ha aduwo mu ha atabuhi kon, he li e tabuhi ati ni naado.

¹⁰Ke [habwii mwo] te ati ni pihuô, me ni pwojunuun he miiden [me a bwohemwo] pie, te junihe ubwo a bwo temehinaado ten, weeng Padué, na ati he ni naado. Be lé o alih [a bwo céiu lépwo Juif me ni béén, ne ha a puapulie ten], a Mwaiitihi.

¹¹Ati ninaa, ke e caa te niimihi ha atabuhi kon pie me e bo pwo. Ke e caa pacuwohi ne ko Kériso lésu Padaame henye.

¹²Wogenye, ke genye mu ko Kériso, ke genye céihi ne kon. Ke é mu ko anaa, na pwo mwomwon denye, me nye âbé céii Padué, me nye mu pelen. Ke time uce piwâ genye [ke time uce mwotikenye].

¹³Ke wonaa, ana é pii tewé pie, me geé nemwo pwo me pinekepé tewé ko a bwo mu he ni picani tong me dewé. Be é mu ko anaa [ke piubwo da a céihi tewé]. Ke o ne tewé me geé mu pele Padué, ne ha a bwo ubwo na a wâé ten!

Te junihe ubwo a pipwoééhe te Kériso me denye

¹⁴É tidihi jiling he pwahamii Padué Caa [ke é pipaunueng] ko anaa.

¹⁵Be weeng pa Caa te ati lépwona élé jedi he miiden, ke éni pwo bwohemwo. Ke e pwo me nye tai apulie ha a bele na céiu.

¹⁶Te junihe ubwo a wâé ten, ke te junihe hiwon ni adéihi ten. Ke é ilehi kojaeng pie, me e bo pamwoiukewé ko a Jenen litih ten, beme mang ni pwonimewé.

¹⁷Wâé heme e mu he pwonimewé wo Kériso mu ko a céihi tewé! Wâé heme [geé pwohewii ni acuwo na mwoiu] ni waan, ke e bwolu ne ha a pipwoééhe ten.

¹⁸Ke me wonaa, ke wogewé me ati ni bée apulie te Padué, ke geé temehi ehi pie, te junihe ubwo wéden a pipwoééhe te Kériso, na ati he ni bwomunen.

¹⁹Be e piwéden koja ni bwo temehinaado tenye lépwo apulie. Ke wâé heme oba gewé ko a mulihe Padué, ke me e mu kowé ati.

²⁰E penem konye wo Padué ko a junuun na junihe ubwo. Ke jan me e pwo ce naado celi junihe ubwo ne konye koja nina nye niimihi pie me nye ilehi kojaeng.

²¹Wogenye a Mwaiitihi ten na nye mu ko Kériso lésu, ke wâé heme nye pipaunueng taaci dieli mwo! Amen! Wâé heme wonaa!

Éfeso 4

a mulihenye ne ha a pimu ibu tenye (*Pwahamii tii: 4—6*)

¹É mu he karépu, be é pipwoeabwé te Padaame. Ke é wâgo kowé, me [geé niimihi ati nina e pwo me dewé wo Padué, ke] me geé mulie ha a mulie na wâé ten. Be e todekewé beme geé apulie ten.

²Wâé heme geé te cuwo ko pwo me piwahin gewé, me bwala gewé, ke me geé uca. Wâé heme geé te cuwo ko pipwoééhewé, ke me geé picani ne kowé.

³Be e neibukewé na a Jenen litih. Ke wâé heme geé te cuwo ko mulie ha a péém, beme te céiu gewé.

Céiu a éénye me Kériso

⁴Te céiu cehi a éé apulie, ke te céiu a Jenen litih. Ke te céiu a cemenye na nye ucéihi, alecehe a bwo todekenye.

⁵Te céiu cehi Padaame henye, ke te céiu cehi a céihi, ke te céiu cehi a pipuu apulip.

⁶Te céiu cehi Padué, pa Caa tenye ati. Weeng pana e pihuôhi ati, weeng pana e pwo ati, ke e mu ati he ni naado.

⁷A juuju pie wo Kériso, ke e muko ne tenye me piticenaado ne kon ni muko pétaapwo âpati.

⁸Be caa te tii ne he ni *tii iitihi pie: *E taa ha a duaan na e daaité*. Ke e pé da céin nina lé téétieng, na e piwéden kojalé. Ke e ne te ni apulie ten ni âpati. *Psaume 68.19*

⁹A bwopiinen pie woté ana e pii pie: *E taa ha a duaan na e daaité?* A bwopiinen pie, ânebuhe a bwo taa ten, ke e mi ole ha a duaan na te junihe ole bwolu ne ha a pule wo Kériso.

¹⁰Wo pana e ole, ke weeng kuti pana e taa ha a duaan na e daaité ne he miiden, beme Padaame he ati ni naado na e tabuhi wo Padué, ke me e tidilé ati [beme hején jélé].

¹¹ [A bwopiinen pie woté ana e pii pie: *E ne te ni apulie ten ni âpati?*] Wo Kériso, ke e muko pétaapwo pipatihi ne ko ni apulie ten ni penem na me lé pwo. [Weengi ni bén]: Lépwo *apostolo (lépwona lé caa alieng, ke lé pipatemehi a pwooti ten); Lépwo péroféta (lépwona lé hegi ha a jenen ni pwooti te Padué, ke lé bwo pébé céiikenye); Lépwo évangéliste (lépwona lé pipatemehi ngen a Pwooti Wâé); Lépwona lé pwoipihi me pacémuni ni acéihi.

¹² E ne telé ni âpati naa, beme lé o bo uce pamwoiu ati ni apulie te Padué, ke me lé pipwoeabwé telé mwo. Ke me wonaa, ke o piubwo da a puapulie ten, a éé Kériso.

¹³ Ke o wogenye ibu, ke o céiu ace céihi tenye ne ko pa *Naî Padué, ke ace bwo temehieng denye. Ke genye o tai cumang, pwohewii Kériso, ke o tai piwiekenye me weeng.

Wâé heme nye cumang ne ko Kériso

¹⁴ Me wonaa, ke o caa time genye uce pwohewii ni cuwo nahi ewa [ne ha a céihi. Be time lé uce ju téele cumang ne ni bén mu konye. Lé] pwohewii a ong na tice eaong kon, na e te ju titiéhi pwo ni jié na a dan. Be lé te junihe tabemi ni pwooti te ni apulie na lé gele, na lé âbé picéidekenye, beme lé pipatiedenikenye.

¹⁵ Úhu, genye nemwo wonaa. Wâé heme nye te mulie ha a juuju me a pipwoééhe. Ke genye o â pwohewii Kériso, ati ne he nina nye pwo. Weeng Padaame [he a Mwaiitihi ten, na a éé apulie] ke weeng pa punin.

¹⁶ Weeng na e pihuô, me piwéhi ati ni piduaan ne ko a één, beme céiu jélé ko ni acipetééhi kon. E pwo me lé wiinaado, ke e pamwoiulé, beme pieânimelé telé, ke me lé muko pétaapwo penem ehi. É ko anaa na piubwo da a één, ke e cumang ne ha a pipwoééhe.

A mulihenye na mwo coho

¹⁷ É cuwokowé ne he nii Padaame pie, me geé nemwo mulie pwohewii lépwona time lé uce temehi Padué, lépwona tice pwonimelé.

¹⁸ Melepiing he ni bwo temehinaado telé, be mwoiu ni punilé [ke time uce nimelé me lé piténede Padué]. Ke é nelang he na tieden kojalé *a ju mulip na e ne wo Padué.

¹⁹ Time lé uce temehi pineitééhi aceli wâé me aceli ta. Ke lé pinelé te a mulie hauli, ke me lé pwo ni muko huô na mwiihi na time uce tanim jélé kon.

²⁰ Time uce wonaa a mulihenye céi Kériso na geé caa picaa.

²¹ Be geé caa téne ali pwooti ko Kériso li pacémunihi tewé, ke geé temehi pie e kon a juuju. Be wogewé ni apulie ten.

²² É mu ko anaa, na geé nemwo mulie ha a mulie na ta, li geé mulie hen ânebun. Geé necu ati ni huô me ni bwopemikewé na mwiihi. Be é ânebun, ke geé âcehi nina nimewé kon na lé pwo me geé mele.

²³Geé taatééhi ni pwonimewé, me ni bwo niimihinaado tewé, me ni bwopemikewé,

²⁴beme wogewé ni apulie na mwo coho ni mulihewé. Ke geé o pwohewii nina lé céi ni epwénelé na tooli, ke lé cuwohe ni epwén na mwo wâé. Be é he e nekewé wo Padué, ke nimen me geé pwohewiieng, beme geé mulie ha a juuju. Ke wâé heme ni huô tewé, ke me mwomwon ke pipaunuhi.

Nye taatééhi ni bwopemikenye na ta

²⁵Geé nemwo gele, kehe geé pii a juuju te l épwo béewé acéihi. Be wogenye ati, ke céiu genye pwohewii ni piduaan mu ko a éé apulie na céiu.

²⁶ *Mepie geé piokéé me pace céiu, ke geé nemwo pwo celi ta. Psaume 4.5* Kehe geé pwome necu a okéé tewé ânebuhe a bwo nuule na a téale.

²⁷Ke geé nemwo ne te *Caatana [me e tacebwénikewé, me geé pwo nina ta].

²⁸Hemepie wogewé l épwo abune, ke wâé heme geé cuwo! Kehe geé mwoiu me geé penem, [beme pwo ce mwani tewé] beme geé pwocuhi celi tice tewé, ke me geé o ne te l épwona tice telé.

²⁹Geé nemwo pii ni pwooti na mwiihi [ke geé nemwo pwo nina ta ne ko l épwo béén]. Kehe geé pii ni pwooti na wâé, beme bépicani telé me pamwoiulé.

³⁰Geé nemwo pwo me piwahin a Jenen lithihi [ko nina geé pwo]. Be e caa neeng kowé wo Padué, beme [e habwii pie, wogewé, ke ni apulie ten. Ke] a béhabwiinen pie, e bo tuwokewé ati mu he ni ta pwo tewé, ha a Tan den.

³¹Geé nemwo pwotahinaado ne ko ni béén, me pipii me ta jélé. Geé nemwo cile ne he ni pwonimewé nina ta na lé pwo tewé. Geé nemwo pipééle, me piokéé. Ke geé nemwo pijeta kowé.

³²Wâé heme geé pwopweehi ne ko ni béén. Ke geé habwii telé a pipwoééhe na e he ni pwonimewé. Ke geé pineukewé, pwohewii ana e caa pineukewé wo Padué mu ko Kériso.

Éfeso 5

Mulie pwohewii ni ju naî Padué

¹Wogewé ni naî Padué, na te junihe eânimén dewé. Ke wâé heme geé pwohewiieng,

²ke wâé heme geé pipwoééhe ni béén. Be e pipwoééhenye wo Kériso, ke e patupwo a mulihen, ke e mele beme e *âpwailo me denye na te junihe wâé te Padué.

³Geé nemwo pipule hauli, ke geé nemwo pwo ni naado na mwiihi ne ko ni éewé. Geé nemwo hane me hiwon dewé ni naado ne éni pwo bwohemwo. Be wogewé, ke ni apulie te Padué. Ke time uce nimung me [é téne pie] lé pii ne ni apulie pie geé wonaa.

⁴Geé nemwo pii ni pwooti na ta, ke mwiihi, na time uce wâé me geé pii. [Geé nemwo pii haulihi ni naado na nye paciitihi.] Ke geé nemwo piauhi ni jepule na ta, [pwohewii lépwona tice pwonimelé]. Kehe wâé heme nina geé pii, ke me geé pipwo-olé te Padué kon.

⁵Wâé heme geé temehi pie: O te tice atebwo ha a *Mwametau te Padué me Kériso te lépwona lé pipule hauli, me lépwona lé pwo ni naado na mwiihi ne ko ni éélé. Te piwien ne ko lépwona lé te cuwo ko hane ni naado ne éni pwo bwohemwo. Be, me nye wonaa, ke pwohewiin heme nye pipaunu ni *déme duué.

Nye mulie ha a pwéélang

⁶Lé pii wo lépwo béén pie, te tice ta ko ni huô naa. Kehe icehi ana lé gele, ke geé nemwo nelé me lé pwo me geé pipatieden. Be e okéé wo Padué ne ko lépwona time lé uce piténdeeng, ke e bo tautilé me pwocuhinaado telé.

⁷Ke geé nemwo pipwohewii lépwo apulie na lé wonaa!

⁸⁻⁹Ânebun, ke wogewé, ke geé mu ha a melepiing. Kehe é jenaa, ke geé caa mu ha a pwéélang, be geé caa mu ko Padaame. Ke wâé heme ni bwopemikewé, ke me ni bwopemi lépwona lé mu ha a pwéélang, ha a mulie na wâé, ke mwomwon, ke juuju.

¹⁰Wâé heme geé tee hane nina wâé te Padaame.

¹¹⁻¹²Geé nemwo pipwohewii lépwona lé penem ha a melepiing, be te tice acehi ni penem delé celi wâé. Me nye te ju niimihi cehi ni bwopemilé, ke nye caa te mwiihilé. Geé téétihi ati ninaa, ke geé pé nge ha a pwéélang ati nina ta.

¹³⁻¹⁴Be a pwéélang, ke e habwii a ju bwopwone ati ni naado, heme wâé, ai heme ta. Ke é mu ko anaa, na nye pii pie: «Go ûmiê wogo pana go ko pule! Go cuwoda mu ha awieme ni amele! Be e bo pwo me pwéélang kom wo Kériso!»

Nye penem ehi he ni benaamwon na ne tenye

¹⁵Geé pipwocile a mulihewé. Geé pipwohewii lépwona lé pwoipihi ni bwomu telé, kehe time uce wo lépwona tice pwonimelé.

¹⁶Ke geé penem ehi he ni benaamwon na e mwo ko ne tewé wo Padué [beme geé pwo ana wâé]. Be piubwo ngen a ta ha a benaamwon jenaa.

¹⁷Ke é mu ko anaa, na geé nemwo mulie hauli, kehe geé hane ana wâé te Padaame.

Nye mulie ha a Jenen litihi

¹⁸Geé nemwo piolo ko a tabe megele, be koli e bo pwotahi ne kowé. Kehe wâé heme e te tidikewé taaci na a *Jenen litihi.

¹⁹Ke geé pipamwoiukewé ko ni nyebi: ni *psaume*, me ni *cantique*, me ni bée nyebi na e ne tewé na a Jenen litihi. Ke é heme geé pwonyebi, ke geé pipaunu Padaame he ni ju pwonimewé.

²⁰Wâé heme geé te cuwo ko pipwo-olé te Padué Caa ne ko ati ni naado, ne he nii lésu Kériso, Padaame henye.

Ni pwomwo na lé céihi

²¹Geé paciiti Kériso, ke geé pwo me piwahin gewé ne ko l épwo acéihi b éewé.

Lu aadomwin @ —Ê toomwo

²²Wo ê toomwo, ke wâé heme e pwo me piwahin nang ne ko pa aiu hen, pwohewii a bwo pwo me piwahin nang ne ko Padaame.

²³Be e pihuô ê mwoden wo pa aiu, pwohewii ana wo Kériso, ke e pihuôhi a puapulie ten, a Mwaiitihi, na [e pwohewii] a één. Ke weeng pana e celuimieng.

²⁴A Mwaiitihi ten, ke e pwo me piwahin nang ne ko Kériso, é mu ko anaa, na wâé heme ê toomwo, ke me e pwo me piwahin nang ne ko pa aiu hen, na ati he ni naado.

Lu aadomwin @ —Pa aiu

²⁵Mepwo é ne ko pa aiu, ke wâé heme eânimen de ê mwoden, pwohewii ana eâname Kériso te a Mwaiitihi ten. Ke e pawie a mulihen [ke e mele] me den.

²⁶Ke e pineeng me de Padué. Ke e puueng ko tabe, me a pwooti, beme paciitieng,

²⁷ke me e cuwo he pwahamiin, ke me oba nang ko *a wâé, ke te tice nyeluhen ke tice ta kon [pwohewii ê ewa toomwo na me lu piaten me weeng].

²⁸Piwien ne ko pa aiu. Be wâé heme eânimen de ê mwoden pwohewii a bwo eânimen de a één. Be wo pana eânimen de mwoden, ke te pieânimen den mwo.

²⁹Be te tice pace apulie celi e pitéétihi mwo a één. Be e pawiinaadonieng, ke e wéieng ehi, pwohewii ana e pwo wo Kériso te a Mwaiitihi ten.

³⁰[Genye temehi anaa] be wogenye, ke genye één.

³¹Caa te tii ne he ni tii iitihi pie: *E patupwo lu nyaa me caa ten wo pa aiu, beme lu pimu me ê mwoden. Ke me wonaa, ke caa céiu julu.* Genèse 2.24

³²A pwooti naa, ke e bwolu, be é niimihi pie, a ocine ko a bwo [pimu ibu te] Kériso me a Mwaiitihi ten.

³³A bépanebwénihi nen, [ke é pii mwo pie]: Wo pa aiu, ke wâé heme eânimen de ê mwoden, pwohewii a bwo pieânimen den. Ke wo ê toomwo, ke wâé heme e paciiti pa aiu hen.

Éfeso 6

Ni ewa me lu nyaa me caa telé

¹Wogewé ni ewa, ke wâé heme geé piténede lu nyaa me caa tewé. Weengaa ana me geé pwo, {be wogewé ni apulie te Padaame}.

²Be [caa te tii ne he ni tii iitihi pie]: *Go paciiti lu nyaa me caa tem. Exode 20.12*
Anaa, ke a bécéiuhe patén de Padué na pwo *adéihi hen. Be e pii pie, e bo ne
[te lépwona lé piténédehi a patén naa]:

³*Ke o bwali, ke wâé a mulihem ne éni pwo bwohemwo. Exode 20.12*

⁴Wogewé lépwo caa te ewa, ke geé nemwo pwo me lé okéé ne ni naîwé. Kehe
wâé heme geé cilelé ehi, ke geé cihe ne kolé, ke pacémunilé. [Be weengaa ana
me e pwo wo pa acéihi] ne ko Padué.

Lépwo eabwé me lépwo apihuô telé

⁵Wogewé lépwona geé penem tice ja kon, ke wâé heme geé piténéde lépwo
apihuô tewé ne éni pwo bwohemwo. Ke geé paciitilé, ke geé pipwoeabwé telé
ehi he ni ju pwonimewé, pwohewii a bwo pipwoeabwé tewé te Kériso.

⁶⁻⁷Geé penem ehi, beme lé pipwodéén kowé [ati ne he ni naado]. Ke time uce
é ne he ni benaamwon cehi, na lé alikewé hen. Kehe geé niimihi pie, geé penem
me de Padaame, kehe time uce ni apulie. Be wogewé, ke ni eabwé te Kériso,
kehe wâé me geé pwo ana nime Padué kon, na ati he ni pwonimewé.

⁸Be wâé heme geé temehi pie, e bo muko pétaapwo ne ni cemenye wo
Padaame, ko nina wâé na nye pwo. Piwien ne ko lépwo *apenem tice ja kon,
ke é ati ne ko lépwo béen mwo.

⁹Pwohewii ne mwo kowé, wogewé lépwo apihuô. Be wâé heme geé paciiti ni
apenem dewé [ke me geé pwopweehi ne kolé]. Ke geé nemwo pwohuu telé.
Be céiu pa apihuô tewé ati ne he miiden, na time uce pipwoinen ne ko ni apulie.

Naamuu pa tenye

¹⁰É panebwénihi ne ko a bwopiinen pie: Wâé heme geé mwoiu ne he a junuu
Padaame na junihe ubwo.

¹¹Geé pé ati ni naamuu pa na e ne tewé wo Padué, beme o jan me geé
cubwonihi ni huô te *Caatana na ta.

¹²Be time nye uce pwopa ne ko ni apulie. Kehe genye pipwopa me lépwo
apihuô te ni duéé me ni iténaado [na time nye uce alilé ko ni naamiinye]. Nye
pipwopa ne ko lépwo daame na pwojunuulé ha a melepiing he pipuwohe a
miiden me a bwohemwo, na lé pihuô ne ko a bwohemwo ce.

¹³⁻¹⁴Ke é mu ko anaa [na é pii tewé pie]: Geé pé ati ni naamuu pa na e ne tewé
wo Padué, beme o jan me geé cumang, he ni benaamwon na e tuie ne kowé a
ta. Be, me nebwén a pa, ke geé o piwéden. Weengi ni naamuu pa tenye: *Ni taihenanye*: a juuju te Padué; *Ni epwén toki me bépwobwonihni bwaangenyé*:
a mulie na *mwomwon ne he pwahamiin;

¹⁵ *Ni dihibwaanye*: a bwo cuwo ko pipatemehi nen denye a Pwooti Wâé na e
pébé a péém;

16 *Ni bépedinaado* : a céhi tenye ne ko Padué, na ati he ni naado. Ke nye pé téteda beme nye taunuhi ni duwele miû ko ni da na e nuô wo Caatana, pana ta nang.

17 *Ni bewéihi ne ni puninye*: a mulip na e ne tenye wo Padué, he e celuimikenye; *Ni teua tenye* na e ne tenye na a *Jenen litihi: a pwooti te Padué.

18 Geé tee ko pwoitihi na [ati he ni piduaan me] ati he ni benaamwon, âcehi ni pihuô na e ne tewé na a Jenen litihi. Ke geé tee ûmiê, ke geé te cuwo ko pwoitihi me de ati ni apulie te Padué.

19-20 Geé pwoitihi me dong, beme e ne tong a pwooti ten wo Padué. Be e pahedeéo, beme é pipatemehi te ati ni apulie a Pwooti Wâé na time lé uce temehi ânebun, be te e ha *aduwo. Ke weengaa a watihen na cieéo ko itihe toki ne éni he karépu. Ke anaa, na me geé pwoitihi, beme time o uce piwâ jo me é tee cuwo ko pacihe ni apulie [ko Kériso].

Bépinelé

21-22 É pahede Tichike lé céiikewé, beme e piuti tewé a jepule kong, ke me e pamwoiukewé. Wo panaa, ke pa ju bénnye, ke pa eabwé na e te junihe piténede Padaame, he gemu pipenem ibu me weeng.

23 Wâé heme wo Padué Caa tenye, me Padaame Iésu Kériso, ke me lu ne tewé, ati ni acéhi béeemu, a péém me a pipwoééhe. Ke me lu picani tewé, me geé *cumang ne ha a céhi ne kolu.

24 É ile Padué pie, me e adéihi, ko a *pipwoééhe tice ja kon den, ati lépwona lé cumang ne ha a bwo eânimelé te Padaame Iésu Kériso.

Filipi

Filipi 1

Pipwobwocu

¹ Woéo Paulo na é pwotii, he wogemu me Timoté, be lupwo apenem de *Kériso lésu. É pwotii lé céikewé, wogewé lépwo apulie te Padué na geé mu Filipi, me lépwo apihuô me lépwo dikone. Wogewé lépwo apulie te Padué, be geé mu he Kériso lésu.

² Wâé heme e mu pelewé a *pipwoééhe tice ja kon me a péém na e âbé mu ko Padué Caa tenye, me lésu Kériso, Padaame henye. Adéikewé!

E pwo-olé te Padué wo Paulo

³ É ati he ni benaamwon na é niimikewé hen, ke é pwo-olé te Padué kowé.

⁴ Be é te pipwodéén taaci, ne he ni pwopwoiitihi tong me dewé.

⁵ Be geé picani tong ko a bwo patemehi na a *Pwooti Wâé, tabuhi he geé mi céihi, dieli jenaa.

⁶ Wo Padué, ke e tabuhi a penem na te nihe wâé ne he ni pwonimewé. Ke é céihi me mwoiu pie, e bo nihe penem kowé, ke e bo panebwénihi ha ace tan celi e bo mwojuia mwobé hen wo Kériso lésu.

⁷ Nihe eânimung dewé! Ke wonaa a pwonimung kowé ati, be geé te nihe picani tong ne he ni penem na e ne tong wo Padué. [Ke genye tai hegi neibuhi a *adéihi ten] jenaa, he é mu he karépu; pwohewiin ânebun [he mwo time uce téele cieéo]. É ha a benaamwon naa, ke é pwopahí a Pwooti Wâé, ke é patemehi te ni apulie beme lé céihi ne kon.

⁸ Éa, e te temehi wo Padué pie, é pii a juuju. Be é nihe tai pipwoééhewé pwohewii a bwo pipwoééhewé te Kériso lésu.

⁹ Wonaa a pwopwoiitihi tong, beme o piubwo da a pipwoééhe tewé. Wâé heme geé temehi ehi [a céihi na e mu konye]. Ke wâé heme geé temehi pineitééhi aceli wâé me aceli ta.

¹⁰ Ke me wonaa, ke geé o alihí temehi ana wâé me ana juuju, [beme geé mulie hen]. Ke é ha a tan na e bo mwojuia mwo hen wo Kériso, ke o te tice ta kowé celi me tautikewé kon.

¹¹ Ke e o te nihe wâé ke hején ni acehi ni penem dewé, é mu ko ana e mulie kowé wo lésu Kériso. Ke [wo lépwo apulie, ke lé] bo alihí *a wâé te Padué, ke lé bo pipaunueng.

E piân a Pwooti Wâé

¹² Lépwo bééng acéihi, nimung me geé temehi pie, a bwo mu he karépu tong, ke [pwo a naado na wâé hen. Be] é mu ko anaa, ke e te nihe piân a Pwooti Wâé.

13-14 Be wo lépwo coda na lé mu ha a pomwa te pa gupéno, ke ati ni apulie éni, ke lé caa temehi pie, é mu he karépu ko a bwo penem dong ne ko Kériso. Ke hiwon ni acéihi na e nihe pamwoiulé wo Padaame, beme time uce abwobwo jélé me lé patemehi a pwooti ten.

15-17 Be hiwon nina lé pwojepule ko Kériso mu he ni pwonimelé na wâé. Be lé temehi pie, é mu he karépu mu ko a bwo *pajujuhi na a Pwooti Wâé. Ke lé temehi pie, [wo Padué na e] ne tong a penem ce. Kehe pwo lépwo béeén na lé patemehi a pwooti é mu ko a pipwokon delé. Be nimelé me lé wédeniéo. Ke lé pwo me é mu he ni picani, he é mu éni.

18 É hemepie lé pwo ni penem de Kériso mu he ni ju pwonimelé, ai é heme lé te piniimilé cehi, ke te ju piticenaado ne kon. Be patemehi a nii Kériso mu ko nina lé pwo. Ke é pipwodéén jenaa ko ninaa. Éa, é te cuwo ko pipwodéén.

A mulihe Paulo me de Kériso

19 É pipwodéén, be é temehi pie, geé pwoitihi me dong, ke e nihe picani tong a *Jenen litih te Kériso [ke e wéhi a jenung]. É mu ko anaa, na é céihi pie, o bo tuwoéo [mu he karépu].

20 Nihe nimung me [woéo pa apenem ehi te Kériso. Ke] me o time uce tanim jo [ko ni penem dong] ke me time uce piwâ jo me é habwii pie, te nihe ubwo Kériso, é hemepie é mulie, ai é hemepie é mele.

21 Be é hemepie é mulie, ke é mulie me de Kériso. Ke é hemepie é mele [me de Kériso] ke nihe wâé mwo.

22-23 Be caa nihe nimung me é mu pele Kériso dieli mwo, be a naado na te junihe wâé wéden. Kehe icehi ana te nihe hiwon ni bwo niimihinaado tong. Be é hemepie é tee mulie éni pwo bwohemwo, ke é o tee pwo ni penem na wâé me den.

24-25 Ke o wâé me dewé, heme é mu éni pwo bwohemwo, beme é picani tewé, beme o piubwo ngen a céihi me a pipwodéén dewé. Ke é mu ko anaa, na é céihi pie e o mwo te ne tong wo Padué, me é mwo te mu éni.

26 Wonaa, hemepie é âdé céikewé, ke geé o pipwodéén me pipaunu Kériso lésu, é mu ko nina e pwo me dong.

Ni pihuô te Paulo ne te ni Filipi Geé tee cumang

27 Ana wâé me dewé, ke me geé mulie cehi a Pwooti Wâé te Kériso. Ke é hemepie é âdé caniékewé, ai é hemepie time é uce âdé, ke é o bo téne pie, geé cumang ne he ni céihi tewé, ke me geé pipenem ibu ne ha a pwonime na céiu. Be geé [pwohewii lépwona lé] pwopa, ke wâé heme geé penem me mwoiu, beme ubwo a céihi tenye na e âbé mu ko a Pwooti Wâé.

28 Geé nemwo pwo me mwotikewé ko lépwona lé cuwodekewé. Be [é hemepie geé mwoiu] ke lé o alahi pie lé o patieden ati dieli mwo. Ke geé o temehi pie [geé piwéden, ke] e o bo celuimikewé wo Padué.

²⁹ Be weeng, ke e ne tewé a céhi ne ko Kériso, ke weeng mwo, ke e ne me geé mu he ni picani be wogewé l épwo apulie ten.

³⁰ Be woéo mwo, ke é te nihe mu he ni picani me den, jenaa ni, pwohewiin ânebun, [he é mwo mu pelewé]. Be geé caa alihia bwo pwopahenong dong [a Pwootî Wâé]. Ke a penem naa, ke tai ni penem denye ati.

Filipi 2

Geé piténedekewé

¹E pamwoiukewé na a mulihewé ne he Kériso, ke e pwopweehi ni pwonimewé na a pipwoééhe ten. Ke a *Jenen litih, ke e pineibukewé me weeng. Ke geé pipwoééhewé mu he ni ju pwonimewé.

²É mu ko anaa, ke [é cuwokowé pie] me geé piténekewé. Wâé heme céiu a pipwoééhe tewé, ke me céiu a pwonimewé, ke me céiu a bwo niimihinaado tewé. Be, me geé wonaa, ke nihe ubwo a pipwodéén dong.

³Ke geé nemwo niimihi pie, te nihe pwonaado ne kowé, ke geé nemwo penem beme geé pihabwiikewé. Kehe geé pwo me piwahin gewé, ke geé pipaunu l épwo béén.

⁴Geé nemwo piniiimikewé cehi, kehe geé hane aceli wâé me de l épwo béén.

Geé pwohewii lésu

⁵Wâé heme geé pipwohewii Kériso lésu ne he ni bwo niimihinaado tewé, me ni bwomu tewé.

⁶Be te céiu julu me Padué ne ha ati ni naado. Kehe time e uce cile [a bwo ubwo nang].

⁷ E patupwo atebwo ten. E patupwo ati. Ke e pé a éé apulie, ke e penem tice ja kon.

⁸ E pwo me piwahin nang. E piténede Padué die ko a bwo mele ten, a bwo mele ne ko a *kuricé

[pwohewii ne ko ni cabin de ni apulie ati].

⁹ Kehe e pineeng da wo Padué. Ke e ne ten a nii apulie na te nihe ubwo wéden.

¹⁰ Beme é ne he nii lésu, ke lé tidihi jililé ne he pwahamiin ati ni naado jedha he *miiden, ke éni pwo bwohemwo, die ha amu te ni amele.

¹¹ Ke ati ni pwocihe ke lé toii da pie: Wo lésu Kériso, ke Padaame! Beme a bwo pipaunu Padué Caa.

Geé ceni ha a melepiing

¹²É he é mwo mu pelewé, wogewé l épwo ju b éeng, ke geé piténedeéo. Ke wâé heme geé te cuwo ko piténedeéo jenaa ni, heme tieéo pelewé. Geé nihe paciiti

Padué. Ke geé penem den ati ne he ni naado, ke geé pipenem ibu, beme te wâé a mulihewé ne kon.

¹³Be e ko penem kowé wo Padué, ke e bo pwo me wâé tewé ana nimen kon. Ke e bo ne ce niihewé, me geé piténedeeng.

¹⁴[É ne he ni mulihewé me ni penem dewé] ke geé nemwo pipééle me pihuú ne kowé,

¹⁵beme o te tice celi ta pelewé, ke me o te tice celi o tautikewé kon. Ke me wogewé ni naî Padué na wâé gewé, ne ha awieme ni apulie pwo bwohemwo, na ni agele, me ni apulie na ta jélé. Be me wonaa, ke geé o pwohewii ni ceni na lé niê heme bwén,

¹⁶he geé pé nge céilé a pwooti ko a mulip. Heme geé wonaa, ke é o nihe pipwodéén kowé ha a tan na e bo mwojuia hen wo Kériso. Be é caa te junihe pineéo me dewé, pwohewii pa atéte ne ha a pitéte. Ke é o nihe pipwodéén, heme pwo acehi ni penem dong me dewé.

¹⁷Ke wieli [é o mele me dewé, ke] é o patupwo a mulihung pwohewii a *âpwailo ne te Padué. Ke genye o bo ne, pehi a âpwailo na geé ne ten mu ko ni céihi tewé ne kon. Ke hemepie wonaa, ke é bo te nihe pipwodéén ko anaa.

¹⁸Éa, wâé heme genye pipwodéén ibu.

É pahede Timoté me Épafrodite

¹⁹É niimihi pie, é hemepie wâé te Padaame lésu, ke é pahede Timoté lé céiikewé, beme é téne ce jepule kowé, beme pamwoiuéo.

²⁰Te icehi Timoté, na piwie nina e mu he ni pwonimemu. Ke te tice pace céiu celi e niimikewé, kehe te weeng cehi.

²¹Be wo lépwo béén, ke lé te muko hane ce wâé telé, kehe time lé uce hane ce penem celi wâé te Kériso lésu.

²²Kehe icehi ana geé temehi pie, e nihe picani tong wo Timoté. Be gemu pwohewii lupwo âmehi, na gemu pipenem ibu ko a bwo patemehi na a Pwooti Wâé.

²³Ke anaa kuti ana é niimihi pie, me é bo neeng lé céiikewé, hemepie é temehi ce huô kong ne éni.

²⁴Ke é ne kong, ke é temehi pie, é o âdé céiikewé. Be é te nihe céihi ne ko Padaame.

Geé hegi ehi Épafrodite

²⁵É jenaa ni, ke é niimihi pie, me é ne lé mwo céiikewé pa céiu acéihi bénée: wo Épafrodite, pali geé neeng bé céiéo, beme e picani tong. Be gemu te nihe pipenem ibu pwohewii lupwo apwopa [he gemu pii beethi a Pwooti Wâé].

²⁶Nihe nimen me e alikewé ati. Be te nihe téé a pwonimen, he [e téne pie] geé téne a bwo cunu nang.

²⁷Te a juuju pie, nihe cunu nang ânebun, be e caa pwo me e mele. Kehe e pipwoééhen wo Padué, ke caa te wâé nang mwo. Ke heme wonaa, ke woéo mwo, be e caa celuimiéo koja a téé na nihe ubwo.

²⁸Nimung me é neeng lé céikewé, beme geé o pipwodéén, ke me caa time é o uce gia kowé.

²⁹Geé hegieng ehi ha a pipwodéén, pwohewii a bwo hegi nen denye pa acéhi béénye ne he nii Kériso. Be wâé heme geé paciiti ni apulie na lé pwohewieng.

³⁰Be e pwo me e mele, he e penem me de Kériso. Ke e wonaa, beme e picani tong, ha a benaamwon na time uce jan ne kowé me geé picani tong, wonaa mu ko a bwo pimu ité tewé.

Filipi 3

A junaado ke me nye temehi Kériso

¹⁻²É panebwénihi a bwo niimihinaado tong ce ne tewé, lèpwo acéhi bééng: Wâé heme geé pipwodéén ko a bwo mu tewé me Padaame.

Pipwocile nina ta ni penem delé

Time uce piwâ jo me é pii mwo pie: Geé pipwocile lèpwona ta ni penem delé. [Geé te ûmiê ke pipwopweekewé.] Be lé pii pie, wâé heme *pwotegoop tenye ati [wogenye na nye céihi ne ko lésu]. Woélé lèpwo wotaahen! Nimelé me tahagéi a céiu duaan mu ko a éénye. Kehe icehi ana te piticenaado ne kon.

³Be a ju tegoop, ke [e he ni pwonimenye. Ke] wogenye, [ke a ju bele te Padué]. Be nye penem me den ko a *Jenen litih. Ke time nye uce pipii denye ko nina nye pwo ne he ni éénye, kehe genye te ju pii cehi ana e pwo wo Kériso lésu me denye.

⁴É hemepie pwo pace céiu celi jan me e pipii den, ke o woéo. Ke é hemepie lé niimi ne ce béén pie, nihe pwonaado ne ko ni penem delé, ke woéo ke é wédenilé.

⁵Be woéo, ke pa ju *Juif, pa *Isaraéla, mu ha a pwomwoiu te *Benjamin. Ke pwotegoop tong ne he na 8 ni tan alecehe a bwo picileéo [âcehi a bwomu teme lèpwo Juif]. Ke woéo pa céiu bée lèpwo *Farasaio [a céiu dihe pwoiithi teme] na geme nihe mu ko ni *patén de Moosé. Ke woéo, ke pana é te junihe piténédehi ni patén,

⁶die ko ni cuwo nahi patén. Ke é nihe pineéo [me de a pwoiithi tong] die ko ana é pwotahi ne ko ni acéhi ne ko lésu. [Be é te niimihi pie, é pwo aceli nime Padué kon.]

Ticenaado ne ko ni penem dong

⁷[É ha a benaamwon naa] ke te junihe junaado ne tong ninaa. Kehe é jenaa ni, ke é caa temehi pie, te ju piticenaado ne kon, watihen [ana e pwo] wo Kériso.

⁸⁻⁹Ana junihe pwonaado ne kon, ke ana é temehi Kériso lésu, Padaame hung. Ati ni naado, ke te piticenaado ne kon koja anaa. Ke ati ninaa, ke pwohewiin heme te ju ni cabin, ke é tai necu ati. Be é mulie ko Kériso, ke wo Padué, ke e pwo me mwomwon jo ne he pwahamiin, watihen a céhi tong ne ko Kériso. Kehe time uce é mu ko ace bwo piténedehi nen dong ni patén.

¹⁰Nimung me é te nihe temehi Kériso me a junuu [Padué] na e ne me e mulie cemwo mu ha amele. Ke é pé ce panung ko a bwo mu he ni téé me picani, ke a bwo mele ten, beme é pwohewiieng.

¹¹Be é hemepie wonaa, ke é céhi pie [wo Padué, ke] e bo pamulipéo mu ha amele, pwohewii Kériso.

Pítete beme geé nihe âdé

¹²⁻¹³E caa celuimiéo wo Kériso lésu, beme woéo pa apulie na é hején ke wâé te Padué jo, beme mang a céhi tong. Kehe time é uce pii tewé, wogewé lépwo acéhi bééng, pie caa wâé jo, ai é caa tehene nge ko a tai ko pítete. [Be mwo te nihe bwali a pwaaden.] Ke é te omehi cehi a pwaaden na e ânebuhung, kehe time é uce niê nge alece. Ke é te junihe pineéo me de a naado na céiu:

¹⁴É téte ati ko a niihung, beme é hegi a cemung na e toteéo ne kon wo Padué, é mu ko ana e pwo wo Kériso lésu me denye.

¹⁵Wogenye ati na genye cumang ne he ni céhi tenye, ke wâé heme wonaa ace bwo niimihinaado tenye. Ke mepie pi-ité ce bwo niimihinaado te lépwoce béén ne ko ace céiu naado, ke e bo habwii telé wo Padué a juuju ko ninaa.

¹⁶Ke wâé heme nye piengen ibu, âcehi ni pihuô na genye caa âcehin dieli jenaa ni.

Geé pipwohewiiéo

¹⁷Wogewé, lépwo acéhi bééng, ke wâé heme geé pipwohewiiéo. Ke geé pipwohewii mwo lépwona lé pipwohewiikeme.

¹⁸[Geé pipwocile ni huô tewé.] Be é caa pii tewé ânebun pie, te nihe hiwon ni acéhi na lé â cubwonih a *kuricé te Kériso, mu ko ni huô telé. Ke [nihe piwahin jo ko ninaa, ke] é é.

¹⁹Woélé, ke lé te ju pinenimelé cehi ne ko ni naado pwo bwohemwo. Ke lé pinelé ati ne ko nina nimelé kon na ta, ke lé pipii delé ne ko nina me tanim jélé kon. Tai ninaa, ke e o péélé nge ha a mele [ité koja Padué dieli mwo].

²⁰Ke hemepwo é ne konye, ke wogenye ni apulie he miiden, é he na e tebwo lang wo Padaame lésu Kériso. Ke genye mwo te ucéhi a bwo mwojuia cemwo ten, beme e bobè celuimikenye.

²¹Ke e bo taatééhi a éénye na tice niihen, ko a junuun, beme pwohewii a één na te junihe wâé wéden. Ke é ko a junuun naa, ke e bo piwéden ati koja ni naado, ke e bo pihuô telé.

Filipi 4

Ni bée pihuô te Paulo

¹Lépwo ju béeing, nihe nimung me é alikewé mwo. Be é te nihe pipwodéén kowé, be wogewé lépwo acehi ni penem dong. Kehe é ilehi kojakewé pie, geé te cumang ne ko Padué.

²Wogeu, [lu ewa toomwo] wo Évodi me Sintike, é ilehi kojakeu me mwoiu pie, geu piténekeu me céiu geu ne ko Padaame.

³Ke é ileko, go pa ju béeing ko penem pie, go picani telu. Be te junihe binyi a bwo penem deme me woilu, me piân a Pwooti Wâé; a penem na geme pwo, me Klément, me lépwo béeen. Ke wo Padué, ke e caa tii ni niilé, ne ha a tii ko ni apulie na lé bo hegi kojaeng *a ju mulip dieli mwo.

Geé tee pipwodéén taaci

⁴Geé te cuwo ko pipwodéén, he geé te mu ko Padaame. Éa, é te pii mwo pie, wâé heme geé tee pipwodéén!

⁵Ke wâé heme bwala gewé ne ko ati ni apulie. Be e o caa mwojuia cemwo wo Padaame.

⁶Geé nemwo gia ko ni naado, kehe geé pwoitihi da céii Padué, me geé ilehi kojaeng ce naado celi tieden kojakewé. Ke geé cuwo ko pwo-olé ten.

⁷Ke a péém na e âbé mu ko Padué, ke e bo wéihi ni pwonimewé me ni bwo niimihinaado tewé, na e he Kériso lésu. Ke a péém naa, ke te junihe wédenihi a bwo niimihinaado tenye, [lépwo apulie].

Geé tee mu ko ana wâé

⁸É panebwénihi a bwo niimihinaado tong ne éni, wogewé lépwo acéihi béeing: Wâé heme geé nenimewé ne ko nini: Nina wâé; Nina juuju; Nina *adéihi; Nina hején; Nina nye pipaciitihi; Nina nye picedihi; Nina e ha a pwéélang; Nina *mwomwon ne he pwahamii Padué.

⁹Ke geé pipwohewiiéo, ne ha ati nina geé picaa mu kong, ke nina geé hegi mu kong, ke nina geé téne heme é pii, ke nina geé alihi heme é pwo. Ke e bo mu pelewé wo Padué, pana e ne a péém.

E picani tenye wo Kériso

¹⁰[É te temehi pie] te junihe ubwo a pwonimewé kong. Kehe icehi ana é dieli jenaa, ke time uce hiwon ni benaamwon na jan ne kowé me geé habwii a pipwoééhe tewé me dong. Ke é jenaa ni, ke é nihe pipwodéén ko Padaame, be e caa ne tewé a bwopwonen, beme geé picani tong [ko ni âpipati tewé].

¹¹Time é uce pii tewé pie, tieden kojaéo ace céiu naado. Be é caa te temehi me é mulie ko nina pwo ne tong.

¹²Be é te hegi nina e te tuie ne kong, ne ha ati ni piduaan me ati he ni benaamwon. Ke é te temehi mulie, é hemepie hiwon dong, ai é hemepie te tice tong; ai é heme pwoluu jo, ai é heme menung.

¹³Be tai jan ne kong ati ninaa, é mu ko Kériso na e pamwoiuéo.

Olé tewé ko ni âpipati

¹⁴Kehe icehi ana te nihe wâé [tong, nina geé pwo, mu he ni pipwoééhe tewé] wogewé lépwo ju bééng, lépwo Filipi. Be geé caa picani tong, he é mu he ni picani.

¹⁵Geé niimihi [a bwo mulie tong] he li é engen mu ha a province Macédoine, beme é pii beetihi a Pwooti Wâé [ne pelewé]. É ha a benaamwon naa, ke te tice mwo ce bée acéihi celi lé niimihi pie, me lé picani tong ko mwani: te wogewé cehi.

¹⁶Ke é he li [é engen kojakewé, ke] é mu ha a pwomwo ubwo Tésalonik, ke geé piohiwon ko patiéo.

¹⁷É hemepie é pii tewé ati ninaa, ke time é uce hane mwo a pipwoééhe tewé! Kehe icehi ana é te temehi pie, é hemepie geé ne, ke geé o te hegi ace cemewé.

¹⁸Be ni âpipati tewé ne tong, ke pwohewii a *âpwailo te Padué na te junihe wâé. É ne ko nina geé ne tong na e pwaadeniin bé wo Épafrodite, ke é te hegi ne ha a pipwodéén. Be tai pwo ne tong nina nimung kon. Be caa nihe hiwon, ke caa nihe wéden.

E bo ne tewé nina tieden

¹⁹[E bo adéikewé] wo Padué hung ko ni wâé ten na nihe hiwon. Ke e bo ne tewé ati celi tieden kojakewé, na e pwaadeniin bé wo Kériso lésu.

²⁰Wâé heme nye pipaunu Padué Caa, dieli mwo. Amen! Wâé heme wonaa!

Bépinelé

²¹Geé tai pwobwocu ati te [lépwo acéihi na lé mu pelewé: wo] lépwo apulie te Padué, mu ko Kériso lésu. Ke lé pwobwocu tewé mwo wo lépwo acéihi bénée na élé éni.

²²Ke lé pii mwo pie bwocu tewé wo lépwo acéihi na lé penem ha a pomwa te pa daame he lépwo Roma, me ati lépwo bée acéihi mwo.

²³Wâé heme e mu kowé ati a *pipwoééhe tice ja kon de Padaame lésu Kériso. Adéikewé!

Kolosé

Kolosé 1

Pipwobwocu

1-2Woéo Paulo na é pwotii lé céiikewé, wogewé lépwo apulie te Padué, ne ha a pwomwo ubwo ne Kolosé. He wogemu me Timoté, pa acéhi béenye. [Ke e pwobwocu tewé mwo.] Woéo pa *apostolo te *Kériso Iésu, âcehi ana nime Padué kon. [Be e pahedeéo ngen, me é pii beetih a pwooti ten.] Ke wogewé, ke e pipégalikewé, beme ni apulie ten, me geé piténedeeng, be céiu gewé me Kériso. Wâé heme e mu pelewé a *pipwoééhe tice ja kon me a péém na e âbé mu pele Padué henye. Adéikewé!

A pwopwoitihi te Paulo

3 Geme te cuwo ko pwoitihi me dewé, ke geme te cuwo ko pwo-olé te Padué, pa Caa te Padaame Iésu Kériso.

4 Be geme téne a jepule ko a céihi tewé ne ko Kériso Iésu, me a pwonimewé ko ati ni apulie te Padué.

5 Ke geé wonaa, be geé ucéihi ne he ni céihi tewé ni *adéihi na e pipwopweehi me dewé ne he *miiden wo Padué. Ke geé caa temehi anaa, he li geé caa mi téne a *Pwooti Wâé, a pwooti na e juuju,

6 ke e ko piubwo ngen ati pwo a bwohemwo, ke e ko taatééhi a mulihe ni apulie, na ati he ni piduaan. Ke e pébé ni adéihi ne huïilé. Ke e caa te wonaa ne pelewé, tabuhi ha a benaamwon na geé tabuhi téne hen, ke geé caa te mi temehi a juuju ko a pipwoééhe tice ja kon de Padué, [me denye lépwo apulie].

7 Be e pé lé céiikewé a pwooti naa wo Épafras, pa béeme ko penem. Pa apipenem na e piténede Kériso, ke e penem me dewé.

8 Ke e piuti teme mwo a pipwoééhe na e ne kowé na a *Jenen litih.

Geme pwoitihi me dewé

9 Tabuhi ha a tan na geme téne a jepule kowé, ke time uce mwaale geme ko a bwo pwoitihi me dewé. Ke geme ilehi koja Padué pie, me e ne tewé a bwo temehinaado na e pwaadeniin bé na a Jenen litih ten, beme geé temehi ehi ana nimen kon.

10-11Ke me wonaa, ke geé o bo mulie pwohewii ana nime Padaame kon, ke geé bo pwo ati ce pétaapwo bwomunen celi wâé ten. Ke o bo junihe ubwo ace bwo temehi Padué tewé na te nihe ubwo nang ne ha a wâé ten. Ke e bo ne ace niihewé ko a junuun na te nihe ubwo, beme geé cumang, ke me geé te picani, ke me te piwâénimewé ne ha ati ni naado na e o tuie ne kowé.

12 Ke geé bo pwo-olé te Caa. Be e ne tewé a mwomwon beme geé hegí mu ko ni adéihi ten na e pipwopweehi, beme ni de lépwo apulie ten, na lé mulie ha a pwéélang.

¹³ Be e celuimikenye mu ha a pihuô he a mwametau te a melepiing. Ke e péékenye nge ha a Mwametau te pa Naîn, na te nihe eânimén den.

¹⁴ É mu ko pa Naîn, ke e caa tuwokenye, ke e caa pineuhi ni ta pwo tenye.

Wo Kériso ke pa junaado koja ati ni naado

¹⁵ Time uce jan me nye ali Padué. Kehe icehi ana wo Kériso, ke pa déme Padué na nye alieng.

[Be e pwohewii Padué, na ati he ni bwomunen.] Pa Naîn, na e ânebuhe ati ni naado. Ke e piwéden koja ati ni naado na e tabuhi wo Padué.

¹⁶ Ati ni naado, ke tai tabuhi mu kon: ati ni naado jeda he miiden, ke éni pwo bwohemwo; ati ni naado na nye alihi *me* nina time nye uce alihi; ati ni jenenaado me ni junuun; ati ni apihuô, me ni daame, ati ni mwametau *me* ni mwodaame. Weeng na e tabuhi ati ni naado me den. Be ana nime Padué kon, ke wo Kériso na e pacuwoshi.

¹⁷ Caa te e lang ânebuhe ati. Ke ati ni naado, ke âbé mu kon, ke e te cilelé ehi.

¹⁸ Weeng ke pa Puni a één,

[Padaame he] a Mwaiitihi, a puapulie ten. Weeng na e ne a mulip. Weeng pa apulie na e mi *mulie* cemwo mu ha amele. Weeng pa bécéiuhen kojalé ati.

¹⁹ Ke wâé te Padué *me* e paai pa Naîn, ati ne he ni bwomunen.

²⁰ É mu ko pa Naîn, na e ne a péém wo Padué, ne ha awieme weeng *me* ati ni apulie, ke ni naado ati na élé éni pwo bwohemwo, ke é jeda he miiden. Wonaa mu ko a cewéhe Kériso

[he li e mele ne ko a *kuricé].

E caa ne a péém me wogewé

²¹ [Ni pwooti naa, ke e cihe me dewé mwo.] Be é ânebun, ke geé te pimu ité koja Padué, ke li geé téétieng, ke geé cubwonieng ko ni bwo niimihinaado tewé, me ni huô tewé na ta.

²² Ke é jenaa, ke wo Padué, ke e caa ne a péém ne ha awiemewé me weeng. Be e â pa apulie wo pa Naîn, ke e mele [ne ko a kuricé] beme e péékewé nge he pwahamii Padué, beme geé iitihi. Ke me te tice ta kowé celi me e bo tautikewé kon.

²³ Wâé heme geé cumang ne he ni céhi tewé. Geé nemwo piâ ité koja a Pwooti Wâé na geé caa hegí, be weengaa a watihe a céhi tewé. É mu ko anaa, na geé ucéhi ne he ni céhi tewé ati ni adéhi te Padué. A Pwooti Wâé naa, ke caa pii beetihí pitihí a bwohemwo. Ke woéo Paulo, ke pa apipenem den.

A penem de Paulo me de ni acéhi

²⁴ É ne ko woéo, ke é pipwodéén ne he ni picani me dewé. Be é ko pé a âneule mu ko ni picani te Kériso me de a één, na a Mwaiitihi ten.

²⁵Be e pahedeéo wo Padué, beme pa apipenem de ati nina lé céhi ne kon, beme é pii beetih tewé ati ni Pwooti Wâé ten:

²⁶ni pwooti ko ni bwo niimihinaado ten na e caa pacuwohi beme denye. Ânebun, ke mwo te e ha *aduwo, ke mwo te tice apulie celi lé temehi. Kehe é jenaa ni, ke e caa patemehi tenye, wogenye a puapulie ten.

²⁷Be nimen me nye temehi pie, te junihe ubwo ke te junihe wâé a adéhi na e pwo me denye. A naado na nihe ubwo me de ati ni puapulie, kehe time uce a de cehi lèpwo *Juif. Ke weengi a ânen: E mulie konye wo Kériso! Ke é mu ko anaa, ke nye temehi pie, genye bo mu ha a bwo ubwo na a wâé ten.

²⁸Ke weengaa kuti a watihen me geme patemehi Kériso te ati ni apulie. Ke geme pacihelé me pacémunilé ko ati ni bwo temehinaado na e kome. Geme wonaa, [beme geme péélé nge pele Padué] ke me lé cumang, ke me oba jélé [ko ni céhi telé] ne ko Kériso.

²⁹Weengaa kuti, na é ko mwoiu ko penem ko a junuu Kériso na nihe ubwo, na e ko penem kong.

Kolosé 2

¹Nimung me geé temehi pie, é mwoiu ko penem me dewé me lèpwo acéhi na élé Laodicé, me lèpwo bén mwo na time uce téele pitapitikeme.

²Be nimung me é pamwoiukewé ati, beme céiu gewé ne ha a pipwoééhe, ke me geé mwoiu ne he ni céhi tewé [ne ko nina e pwo wo Padué]. É mu ko anaa, na geé temehi ehi *a bwo niimihinaado ten me denye, ana e ha aduwo ânebun. Ke a bwo niimihinaado naa, ke wo Kériso.

³Ke weeng na e mu kon ati ni wâé ne ha a bwo temehinaado, me ni pitemang de Padué na te neduwohi [ke te weeng cehi na e habwii tenye].

⁴É ko pii tewé ninaa, beme o te tice apulie celi me lé o âdé pihaamikewé ko ce bwo cihe telé celi ju wâé heme geé téne.

⁵Be é hemepie caa woéo ité kojakewé, kehe é te niimikewé. Ke é te junihe pipwodéén he é téne pie, te ju wâé ni mulihewé, ke geé pipwoiipikewé, ke geé cumang ne he ni céhi tewé ne ko Kériso.

Geé mu mang ko Kériso

⁶Geé caa hegi Kériso lésu, beme Padaame hewé. Ke wâé heme geé mu mang kon,

⁷[pwohewii ni acuwo] na pwo waan [ne ha a pule na wâé]. Ke me geé mu mang ne ha a céhi li geme caa pacémunikewé kon [pwohewii a mwa na bahi] ne pwo a paan na mwoiu. Ke me geé tee pwo-olé te Padué mu he ni ju pwonimewé.

⁸Geé nemwo pwo me lé pihaamikewé wo lèpwoce bén ko ce âpicaanaado celi gele. A pwooti telé [ke nihe wâé heme nye téne] kehe icehi ana te junihe

piticenaado ne kon. Be te ni bwo niimihinaado me ni bwomu te pa apulie, na e âbé mu ko ni duéé, kehe time uce ace pwoooti celi e âbé mu ko Kériso.

⁹ Ke é hemepie pa apulie pwohewiikenye wo Kériso, kehe icehi ana te piwielu me Padué Caa, na ati he ni béé bwomunen.

¹⁰ Ke me oba gewé ko a mulip na geé caa hegi, é mu ko anaa, na geé te mu ko Kériso. Weeng na eten ati a mwomwon, ke pwojunuun ne ko ati ni pihuô me ni duéé.

E caa ne tewé a ju mulip

¹¹ Me geé âbé céii Kériso, ke pwohewiin heme *pwotegoop tewé. Kehe a tegoop naa, ke time uce pwo ne ha a éé apulie, [kehe ana e pwo ne he ni pwonimewé]. Be wo Kériso, ke e pétaabwon nina e teko pwo me nye âcehi nina ta.

¹² Be li caa puukewé, ke [pwohewiin heme] caa neduwokewé ibu me Kériso. Ke geé caa ûmiê mu ha amele me weeng. Be geé caa céihi ne ko a junuu Padué na e pwo me e mulie cemwo.

¹³ Be é ânebun, ke wogewé ni apulie mele [be time e uce mu kowé *a ju mulip] é mu ko ni ta pwo tewé. Ke é ha a benaamwon naa, ke time uce téele tahagéi taabwon nina e teko pwo me geé âcehi nina ta. Ke é jenaa, ke wo Padué, ke e pwo me nye pimulie ibu me Kériso. Ke e caa pineuhi ati ni ta pwo tenye.

¹⁴ Ke e caa ciitili ni ‘kérédi’ tenye [a bwopiinen pie ati ni naado na nye pwo na ta] na o bo tautikenye kon âcehi ni patén. Ke e pwo me tieden ni niihe ni naado naa, be e caa cemeite ne ko a *kuricé [he li e mele wo Kériso].

¹⁵ Be é mu ko a kuricé] ke e piwéden koja ni jenenaado me lépwo daame [he a melepiing na lé cubwonieng]. Ke e cielé, ke e pwo me tice niihelé, ke e teuulé ngen [ne he ni bwo tanim jélé] ne ânebuhe ni apulie ati.

Ni patén na ni gele

¹⁶ [Geé nemwo pwo me lé ne ce patén dewé ne ce apulie.] Ke geé nemwo pwo me lé tautikewé mu ko celi geé wii, ai celi geé ûdu, ai ni béé tan [na lé niimihi pie iitihi] heme tebwo a wole, ai a céiu tan ne ha a naadenitan.

¹⁷ [Lé âcehi ninaa ânebun ne ni apulie] kehe te ju ni déme nina me e bo âbé. Ke caa pacuwoshi ati ninaa jenaa ne ko Kériso.

¹⁸ Geé nemwo pwo me lé pacuwokewé koja a pipwodéén dewé. Be nime ni béén me nye pipaunu ni *âcélo, ke lé te nihe âcehi ni niûlé. Te junihe pwo ni bwo temehinaado telé [na lé pii pie e âbé mu ko Padué] ke lé te nihe pipii delé ne kon. Kehe icehi ana te ju ni bwo niimihinaado te pa apulie!

¹⁹ Ke muhi telé me lé mu ko Kériso, pa punin. Be é mu ko a punin na e pwopweehi ati ni piduaan ne ko a één, beme céiu jélé ko ni acipetééhi kon me ni mehieng. Ke e pwo me ubwo jélé wo Padué.

E tuwokewé koja ni huô na ta

²⁰ Wogewé, ke geé caa mele me Kériso, ke e caa tuwokewé koja a junuu a pihuô pwo bwohemwo. Ke é mu ko ade na geé mwo teko mulie he ni pihuô naa? Be geé mwo teko piténédehi ni patén [ko a pwoiitihi].

²¹ Be lé pii pie: «Geé nemwo pé ani, ke geé nemwo wii ani, ke geé nemwo ti ko nini!»

²²⁻²³ Ke ni patén naa, ke ni bépwonen ne ko ni naado na o bo tieden hemepie nye penem kon. Lé niimihi ne ni bée apulie pie, ni bwopwonan me nye mulie ne ha a mulip na wâé te Padué. Be lé pii pie, te wâé heme nye te nihe pwo me piwahin genye, ke me nye pwo me e mu he ni picani na a éénye. Úhu! Te ju piticenaado ne kon! Be te ju ni patén na e âbé mu ko pa apulie. Kehe te tice niihelé me lé pacuwohi nina nimenye kon na lé pwo me nye pwo nina ta.

Kolosé 3

Genye mulie ha a mulie he Kériso

¹ [Wo Padué, ke e] pwo me geé mulie cemwo mu ha amele me lésu Kériso. Ke e mu he miiden wo Kériso *pwo a jui Padué [beme e pihuôhi ati ni naado]. É nelang, ke wâé heme geé hane ni naado na e he miiden.

² Ke geé ne ni pwonimewé ne ko ninaa, kehe time uce ni naado éni pwo bwohemwo.

³ Be geé caa mele pwohewii Kériso. Ke a ju mulihewé, ke neduwohi ibu me Kériso ne he Padué.

⁴ Kehe me e bo pihabwiieng, ke geé bo pimu ibu me weeng, he geé bo mu ha a bwo ubwo nang me *a wâé ten.

Geé necu ni bwomu tewé na ta

⁵ Weengaa kuti a watihen me geé necu nina ta na nimewé kon, na e mwo teko mu kowé. Geé nemwo niimihi pie me geé pipule hauli me ce béén, ke geé nemwo pwo ni naado na ta ne ko ni éewé. Ke geé necu ni bwo niimihinaado na tanim genye kon. Ke geé nemwo hane me pihiwon dewé ni naado ne éni pwo bwohemwo, be, me geé ne ni pwonimewé ko ni naado naa, ke pwohewiin heme geé pipaunu ni duéé hauli.

⁶ Ke wo Padué, ke e okéé ne ko lèpwona lé wonaa ni bwomu telé [ke e bo tautilé, ke e bo ne telé a cuhinaado ko ninaa].

⁷ Ânebun, ke geé wonaa, he geé mwo mulie he ni bwomunen na ta.

⁸ Kehe é jenaa, ke [é pii tewé pie] geé necu ninaa! Geé necu mwo a okéé, ke ni piéi. Geé nemwo pwotahinaado ne ko lèpwo béén, ke geé nemwo piciheta ne kolé. Geé nemwo pii ni pwootti na ta, na time uce wâé me genye pii.

⁹ Ke geé nemwo geti ni acéihi béewé.

Geé caa céi a epwén na alili

[Ati ninaa, ke pwohewii a epwén na alili, na] geé caa céi. [Be geé caa necu] a bwo mulie tewé ânebun, me ni bwomu tewé na ta.

¹⁰Ke geé caa cuwohe [a céiu epwén] na mwo wâé. Ke e tee penem kowé wo Padué, pana e nekewé, beme geé te pipwohewiieng, ke me geé temehieng ehi.

¹¹[Ke a mulie na mwo coho na e ne tewé] ke caa te tice celi pi-ité koja lèpwo Juif, me lèpwona time uce lèpwo Juif: lèpwona *tegoop jélé, me lèpwona time uce tegoop jélé. Ke caa te tice penebé, me ce kepune. Ke caa te tice lèpwona lé ‘pitemang’, me lèpwo ‘apulie bwolihi’. Ke caa te tice celi pi-ité koja lèpwo *apenem tice ja kon, me ati lèpwo béén. Kehe ana junaado, ke wo Kériso, ke te weeng cehi. Ke tai e konye ati.

¹²E pipwoééhewé wo Padué, ke e pipégalikewé beme wogewé a puapulie ten na iitihi. Ke wâé heme geé pipwoééhe, ke me geé te cuwo ko pwo nina wâé ne ko ni apulie. Ke wâé heme bwala gewé, ke me geé pwo me piwahin gewé, ke me geé cumang ne ha a piuca.

¹³[Geé mu ehi me lèpwo acéihi béewé, ke] geé picani ne kolé. Ke geé pineulé heme lè pwo ce naado celi time uce wâé tewé. Be e caa pineukewé wo Padaame!

¹⁴Ana junaado, ke a pipwoééhe. Be anaa kuti a tai na e pineibukenye, ke e ciekenye, beme te céiu genye na ati he ni naado.

¹⁵E todekewé wo Padué, beme geé pwohewii a éé apulie na te céiu, ke me e mu kowé a péém na e âbé mu pele Kériso. Ke wâé heme a péém naa, ke me e pé ati ni pwonimewé [me ni bwo niimihinaado tewé]. Ke me geé tee pwo-olé ten.

¹⁶Wâé heme e mulie ne kowé ni pwooti te Kériso me ati ni *adéihi na e pébé céiikewé. Geé pipacémunikewé, ke geé pipamwoiukewé ko ni bwo temehinaado [na e ne tewé]. Ke geé pwo-olé te Padué mu he ni ju pwonimewé. Ke geé pwonyebi ko ni *psaume*, me ni *cantique*, me ni nyebi na e ne tewé na a *Jenen litihî.

¹⁷Ati nina geé pwo, me nina geé pii, ke me geé pwo ne he nii Padaame Iésu Kériso. Ke [ati ne he ni naado] ke geé pwo-olé te Padué Caa, mu ko nina e pwo wo Kériso me dewé.

Ni pwomwo na lè céihi

¹⁸Wogewé ni toomwo, geé pwo me piwahin gewé ne ko ni aiu hewé. Be te wonaa [ne ko êna e céihi] ne ko Padaame.

¹⁹Wogewé lèpwo aiu, ke geé pipwoééhe ni pétaapwo mwodewé [ne ha a péém] ke geé nemwo pwohuu telé.

²⁰Wogewé ni ewa, ke geé piténede ni nyaa me caa tewé ne ko ati ni naado. Be wâé te Padaame ni bwomunen na wonaa.

21 Wogewé lépwo caa te ewa, geé nemwo tee pwohuu te ni naîwé. Be koli geé bo pipatupwolé.

Lépwo apenem me ni caa telé

22-23 Wogewé lépwo apenem tice ja kon, ke geé piténede ni caa tewé na ati he ni naado ne éni pwo bwohemwo, mu he ni ju pwonimewé. Ke geé penem ehi he ni benaamwon na lé wéa kowé hen, ai heme tielé pelewé. Be time geé uce penem beme e piwâékewé wo pace céiu apulie, be geé penem me de Padaame. Be weeng ke pa apihuô tewé na me geé paciitieng,

24 ke te weeng na me geé penem den. Be geé temehi pie, e bo ne tewé a cemewé ko ni penem dewé, na e pwopweehi me de a puapulie ten.

25 Kehe wo pana e pwo ana ta, ke e bo hegí a cuhinaado ten. Be wo Padué, ke time e uce pipwoinen ne ko ni apulie.

Kolosé 4

1 Wogewé lépwo caa te lépwo *apenem tice ja kon, ke wâé heme geé pwopweehi ne kolé. Ke geé nemwo pineuhi pie, wogewé mwo, ke te pwo pa apihuô tewé na e jeda he miiden.

Bénebwéne pwooti

2 Geé te cuwo ko pwoiitihi. Ke geé ûmiê ne ko ni pwopwoiitihi tewé, ke geé te cuwo ko pwo-olé te Padué.

3 Ke geé pwoiitihi mwo me deme, beme e bo ne teme ace bwopwonan me gême pii beetihi a pwooti ten. A pwooti ko *a bwo niimihinaado ten na e ha aduwo, [ke caa pacuwahi jenaa ne] ko Kériso. [Geé pwoiitihi me dong mwo] be é ko mu éni he karépu, mu ko a bwo patemehi nen dong a pwooti naa.

4 Ke geé pwoiitihi, beme o pwaale ne telé ni pwooti na é pii. Be weengaa a penem na e ne tong.

5 Ke geé engen ha a pitemang ne pele lépwona time uce lépwo acéihi, ke geé penem ehi he ni benaamwon na e mwo ko ne tewé wo Padué.

6 Geé pacihelé ehi, beme o nimelé me lé te tabemikewé. Ke wâé heme geé temehi me geé hegí ehi ne te ni apulie ni naado na lé tahimwokewé kon.

Adéikewé

7-9 É pahede Tichike, pa béeng ko penem, me e âdé céiikewé, woilu me Onésime, pana e âbé mu pelewé. Lupwo ju bénaye, ke lupwo eabwé na lu te junihe piténede Padaame. É pahedelu lé céiikewé, beme lu piuti tewé a jepule kong, ke me lu pamwoiukewé.

10-11 Lé ne lé a bwocu tewé mwo wo Maréko, pa béé Barnabas; me lésu na pii kon pie Justus, me Aristarke, na gemu tai mu he karépu. Hiwon ni Juif na lé caa céihi ne ko Kériso, kehe te icehi lépwonaa mu kolé na lé picani tong. Ke lé pamwoiuéo ne he ni penem ko a *Mwametau te Padué. Mepwo é ne ko Maréko,

ke wieli e bo âdé céïikewé. Ke hemepie wonaa, ke wâé heme geé hegieng ehi, pwohewii ana geme pii tewé ânebun.

¹²Ke e ne mwo a bwocu tewé wo Épafras, pana e âbé mu pelewé, pa eabwé te Kériso lésu. Be e te pwopa me dewé ne he ni pwopwoiitihi. Ke e te cuwo ko ilehi koja Padué pie, me geé cumang ne he ni céihi tewé, ke me geé temehi ni naado na nime Padué kon, ke me geé piténedeeng.

¹³É *pajuujuhi pie, e te junihe mwoiu ko penem me dewé, ke é ne mwo ko ni acéihi na lé mu he lupwo pwomwo ubwo Laodicé, ke é Iérapolis.

¹⁴Ke lu ne a bwocu tewé mwo wo Luka, pa dotéén na te junihe eânimung den, me Démas.

¹⁵Geé pii te ati ni acéihi bénée ne ha a pwomwo ubwo Laodicé pie geme pwobwocu telé. Ke me bwocu mwo te Nimfa, me ni acéihi na lé mu pitapitilé ne pelen.

¹⁶Ke mepie geé caa pine ati a tii ce ne pelewé, ke geé ne te ni acéihi ne Laodicé, beme lé pine mwo. Ke geé pine mwo a tii tong na lé bo ne lé céïikewé.

¹⁷Ke geé paniimihi te Arkipe pie, wâé heme e panebwénihi ehi a penem na e ne ten wo Padaame.

Bépinelé

¹⁸Woéo Paulo, ke é pé a bépwotii beme é panebwénihi a tii ce. Ke geé nemwo pineuhí pie, mwo teko woéo éni he karépu. Ke me e mu kowé a *pipwoééhe tice ja kon de Padué! Adéikewé!

1 Tésalonik

1 Tésalonik 1

Pipwobwocu

¹ Woéo Paulo na é pwotii, he wogeme me Silas me Timoté. É pwotii lé céiikewé, ni acéihi ne ha a pwomwo ubwo Tésalonik, na geé mu ko Padué Caa tenye, me Padaame lésu *Kériso. Wâé heme e mu kowé a *pipwoééhe tice ja kon, me a péém. Adéikewé!

A mulie na wâé @ ne pele lépwo Tésalonik

²⁻³ Geme te cuwo ko pipwo-olé te Padué Caa, heme geme pwoiitihi me dewé. Geme pipwo-olé ten ko ati ni penem na geé pwo, ne ha a céihi me a pipwoééhe tewé. Ke geme pipwo-olé ten mwo ko a bwo cumang dewé, be geé ucéihi ne he ni céihi tewé [a bwo mwojuia mwobé te] Padaame lésu Kériso.

⁴ Lépwo bééme ne ko Kériso, geme te temehi pie, e pipwoééhewé wo Padué, ke e pipégalikewé, beme geé apulie ten.

Geé pipwohewiikeme

⁵ He li geme pii beetihi tewé a *Pwooti Wâé te lésu, ke time geme uce ju pii tewé ko pwocihe cehi; kehe geme pipatemehi tewé ko a junuu a *Jenen litih. Geme céihi pie, a pwooti teme, ke a juuju. Ke geé temehi ehi a muliheme ne pelewé, me a bwo picani teme tewé.

⁶ Ke wogewé, ke geé âcehi a bwo mulie teme me a bwo mulie te Padaame. Be geé caa hegí a pwooti, ne he ni tacebwén na ubwo. Kehe icehi ana a Jenen litih, ke e ne tewé a pipwodéén na te junihe ubwo.

⁷ Ke geé caa béhabwiinen de ni acéihi, ati ne he lupwo province Macédoine, me Akaï.

⁸ Be a pwooti te Padaame, na e engen mu pelewé, ke genye téne a één pitih a Macédoine, me a Akaï [pwohewii a tikekele]. Ke ati ni apulie lang, ke lé temehi pie, geé céihi ne ko Padué. Te tice pwooti celi jan me geme pii.

⁹ Be, me lé pwojepule kome, ke lé te piuti mwo a bwo hegikeme tewé, ne pelewé. Ke lé pii pie, geé caa bitekewé nge céii Padué. Ke geé necu ni *déme duéé, beme geé pipaunu, me piténede Padué na e mulip, ke juuju.

¹⁰ Ke lé piuti ngen pie, geé *ucéihi ne ha a céihi, pa Naîn lésu Kériso, na e bo mwojuia mwobé, mu he *miiden. Be e caa mulie cemwo mu ha amele, ke e celuimikenye mu ha a cuhinaado ko ni ta: a cuhinaado na e bo ne te ni apulie wo Padué, ne ha a okéé ten.

1 Tésalonik 2

A penem de Paulo ne Tésalonik

¹Geé te temehi, wogewé mwo ni béeème acéhi, pie a bwo mu teme pelewé, ke time uce piticenaado ne kon.

²É he li geme mu Filipi, ke geme mu he ni picani, ke lé téétikeme, ke lé pijeta kome, me pwohewii ana geé temehi. Kehe icehi ana wo Padué, ke e pamwoiukeme, beme geme patemehi tewé a Pwooti Wâé ten, ne ha awieme ni tacebwén.

³Be ana geme cihe kon, ke time e uce cuwo pwo a gele, ai é ne pwo ni naado na time uce wâé, ai é ne ha a pipwohuô.

⁴Kehe wo Padué, ke e niimihi pie wâé heme e ne teme a Pwooti Wâé, me geme cihe, time uce a bwopwonan beme lé piwâékeme wo lèpwo apulie, kehe me de Padué na e alihî bwoluhi ni pwonimeme.

⁵Geé te temehi pie, time geme mu uce téele cihe me geme pihaami ni apulie. Ana nimeme kon, ke time uce aceli me geme pé ce mwani kon. Wo Padué, ke e te alihî ni pwonimeme.

⁶Ke time geme uce hane *a wâé na e âbé mu ko ni apulie, ai é mu kowé, ai é mu ko ce béen.

⁷Kehe wogeme lèpwo *apostolo te Kériso, hemepie nimeme, ke geme o huôhi ne huïiwé. Kehe é he li geme mu pelewé, ke te ju bwala geme, pwohewii ê nyaa te ewa na e cile ehi ni naîn.

⁸É mu ko a bwo wâé geme ne kowé, geme caa piwâam beme geme ne tewé, time uce a Pwooti Wâé cehi te Padué, kehe ni muliheme mwo. Be te junihe ubwo a pwonimeme kowé.

⁹Wogewé ni béeème, geé teko piniimihi ni bwo penem deme, ke ni bwo mwaale geme. Geme penem bwén ke pwang, beme te tice celi gia gewé kon. Ke wonaa a bwo patemehi nen dewé a Pwooti Wâé te Padué.

A bwopemikeme ne pelewé ke wâé

¹⁰Wogewé lèpwo *apajuujuhi nen, ke wo Padué mwo, pie a bwopemikeme ne pelewé, wogewé lèpwo acéhi, ke mwomwon, ke juuju, ke te tice celi me tautikeme kon.

¹¹Geé te temehi mwo pie, muko pétaapwo wogewé, ke geme pwohewii pa caa te ewa ne ko ni naîn me dewé.

¹²Geme ne tewé ni pune, beme be pamwoiukewé. Geme wâgo kowé me geé mulie pwohewii ana nime Padué kon, weeng Pana e todekewé me geé taa ha a Mwametau ten, beme geé mu pelen ne ha a bwo ubwo na a wâé ten.

Geé caa hegi ehi a pwooti te Padué

¹³Geme te pipwo-olé te Padué, be li geé hegi a pwooti ten he li geme patemehi, time uce pwohewii a pwooti te ni apulie, kehe a pwooti te Padué na e penem kowé, wogewé na geé céhi.

¹⁴ Be wogewé ni béeème, geé pipwohewii ni acéhi ne ko Padué ne *Judé, na élé he Kériso lésu. Be wogewé mwo, ke geé mu he ni picani mu ko lépwo béewé mu ha amu tewé, pwohewii ni acéhi na lé mu he ni picani mu ko lépwo âjiénelé juif,

¹⁵ na lé pwo me e mele wo Padaame lésu, me lépwo *péroféta. Ke lé pwotahinaado ne kome, ke lé tééti ni apulie! Ke wo Padué, ke muhi ten kolé.

¹⁶ Nimelé me lé pwo me time geme cihe te lépwona time uce lépwo *Juif ko a pwooti na me e celuimilé. Ke lé bwo nihe pwo kuti nina ta. É mu ko anaa, ke wo Padué, ke e bo tautilé, ke e bo pwocuhinaado telé.

Nimung me é alikewé mwo

¹⁷ Mepwo é ne kome, wogewé lépwo béeème, alechehe a bwo pipiiden denye lépwo apulie ha a céiu benaamwon, ke time nye uce pialikenye, kehe te wogewé he ni pwonimeme! Ke geme hane me geme alikewé mwo, be geme te junihe niimikewé.

¹⁸ Ke nimeme mwo me geme âdé die pelewé, te woéo Paulo, pa bécéiuhen; kehe wo *Caatana, ke e pwo me time geme uce âdé.

¹⁹⁻²⁰ Nihe wâé teme gewé, ke geme pipwodéén kowé. Ke é mu kowé na geme ucéhi a tan na e bo mwojuia mwobé wo Padaame henye lésu Kériso. Be, é ha a tan naa, ke o wogewé na geé o cememe, pwohewii ana ne te lépwona lé piwéden.

1 Tésalonik 3

Geme pahede Timoté lé céiikewé

¹ Caa time geme uce ucéhi, geme niimihi pie wâé heme gemu te pimu cehi éni Atène,

² ke gemu ne lé pa béeumu Timoté, pa eabwé te Padué, ke pa béeumu ko penem, ko a bwo patemehi na a Pwooti Wâé te lésu Kériso, beme e paûmiêhi, ke pamwoiukewé ne he ni céhi tewé,

³ beme te tice paceli me pihauli nang ne he ni tacebwén jenaa. Be geé te temehi pie é lang he na nime Padué me nye â die lang.

⁴ É he geme mwo mu pelewé, ke geme pii tewé ânebun pie, genye bo mu he ce picani celi ubwo; ke anaa, ke e caa tehenebé, geé teko temehi.

E pii me wâé gewé

⁵ É mu ko anaa, ke é caa ne lé Timoté, be time uce nimung me é tee uca, kehe nimung me é alihí ace bwo engen dewé ne ha a céhi. Be mwotiéo pie pa atacebwénikenye, ke e caa tacebwénikewé, ke wieli geme penem me te ju piticenaado ne kon.

⁶Kehe wo Timoté, ke e mwo ju tehenebé mu pelewé, ke e ne teme ni jepule wâé mu ko a céhi tewé, ke a pwonimewé ne ko Padué. E pii teme pie, geé teko pipaniimikeme, ke nimewé me geé alikeme mwo, pwohewii ne kome mwo.

⁷⁻⁸É mu ko anaa, ke wogewé ni béeème, é ne ha awieme ni tacebwén, me ni picani, ke te junihe pamwoiukeme a céhi tewé, be geé teko cumang ne he Padaame.

⁹Ade ace bépipwo-olé celi me geme ne te Padué, é ne kowé, mu ko a bwo piwâénimeme kowé ne ânebuhe Padué?

¹⁰Bwén ke pwang, geme ileeng ne he ni ju pwonimeme, beme e ne teme beme geme alikewé mwo, ke me geme ne behi nina tieden he ni céhi tewé, beme jéhin.

É pwoiitihi me dewé

¹¹Ke me weeng Padué Caa tenye, ke Padaame henye lésu Kériso, ke me lu tehi ace pwaaden die pelewé!

¹²Ke wo Padaame, ke me e pwo me ubwo a bwo eânimem dewé me de ni béeuwé, ke me de mwo ati ni apulie, pwohewii a bwo eânimem tewé.

¹³Ke me e pwo me mang ni pwonimewé, ke me te tice celi me pipé ne kon, é ne ha a bwo pipaciitikewé, ne ânebuhe Padué Caa tenye, heme e bo âbé wo Padaame henye lésu me ati ni apulie iitihi ten.

1 Tésalonik 4

A mulie na wâé te Padué

¹Lépwo béeng ne he Kériso, geme panebwénihi [ne ha a bwo niimihi nen ce]: Geme caa pacémunikewé ko a mulie na wâé te Padué, ke geé caa mulie hen. Ke é jenaa ni, ke geme cuwokowé, ne he nii Padaame lésu, pie, me geé pwo celi piwéden.

²Be geé caa te temehi li pihuô li geme caa ne tewé, ne he niin.

³Wo Padué, ke nimen me geé mulie ne ha a mulie na wâé ten, ha ati ni bwomunen. Ke geé nemwo pule imi ni apulie hauli.

⁴Go wéihi ehi a éém, beme go iitihi, ke me wâé go, ne he pwahamii Padué.

⁵Go nemwo pwo me céiko nina te nimem kon na ta, pwohewii lépwona time lé uce temehi Padué.

⁶Go nemwo pipwohuô te pa acéhi béeém, ke me go pule imi ê mwoden. Wo Padué, ke e pwocuhinaado te lépwona lé wonaa, pwohewii a bwopiinen na geme caa mi pii tewé.

⁷Be time e uce todekenye, beme nye mulie hauli. Kehe e todekenye beme nye mulie me den.

⁸Ke wo pana e tahi taabwon a pwootti naa, ke time e uce tahi taabwon ni pihuô te ni apulie, kehe e tahi taabwoni Padué, Pana e ne tewé a *Jenen litih ten.

Pwo me piubwo da a bwo pieânimewé tewé

⁹Mepwo é ne ko a bwo pieânimewé tewé, ke te tice aceli me é pii tewé ne kon. Be geé caa te temehi, mu ko Padué, a bwo eâнимe ni béeuwé ne ko Kériso.

¹⁰Ke [geme temehi pie] te junihe ubwo a bwo eâнимewé te lépwo acéhi na ati ha a Macédoine. Ke geme pii tewé pie, wâé heme geé junihe pwo celi piwéden.

¹¹Geé hane me geé mulie ha a péém me ni béeén. Ke geé nemwo pwo me ânenimewé ko ce bwomu te pace céiu. Kehe geé penem ehi, pwohewii a bwo ilehi nen deme kojakewé.

¹²Ke me wonaa, ke wo lépwona time uce lépwo acéhi, ke lé paunuhi a bwo mulie tewé. Be o time geé uce wiinaado téte nge he ni pwomwo.

A bwo mwojuia cemwo te Padaame Lé o bo mulie mwo ne ni amele

¹³Lépwo béeeng ne he Kériso, nimeme me geé temehi ana e o tuie ne ko lépwo a[céhi na lé caa] mele. Beme o time uce piwahin gewé, pwohewii lépwona time uce lépwo acéhi.

¹⁴Be genye céhi pie, e mele wo lésu, ke e mulie cemwo mu ha amele. Ke é nelang he na geme temehi pie, é heme e mele wo pa acéhi ne kon, ke wo Padué, ke e pwo me e mulie cemwo, mu ko lésu.

¹⁵Éa, weengi a pwootti te Padaame na geme pii tewé: É ha a tan na e bo mwojuia mwobé wo Padaame, ke ni apulie ten na lé caa mele, ke [lé o bo mulie cemwo mu ha amele, ke lé o tooeng. Ke] o time lé o uce ucéikenye lépwona nye mwo mulie.

¹⁶É ha a tan naa, ke genye bo téne ce pwoviikau celi ubwo: a pati pa daame he ni *âcélo, me a éé a tutu te Padué. Ke wo Padaame, ke e bo opé, mu he miiden. Ke wo lépwona lé céhi ne kon na lé caa mele, ke lé mi cuwoda mu ha amele.

¹⁷Ke é alechen, ke wogenye lépwona nye mwo mulie, ke o tai céikenye da ibu me woélé, da he ni nii, da céii Padaame, ke o pitapitikenye me weeng. Ke genye o bo pimu ibu me Padaame dieli mwo.

¹⁸Geé pipamwoiukewé ko a pwootti naa!

1 Tésalonik 5

Patéeti lépwo apulie

¹Time geme uce tii ace benaamwon, ke ace tan celi e bo tuie hen wo Padaame.

²Be geé caa te temehi ehi pie, e mwojuia mwobé, pwohewii pa abune heme e âbé he bwén. [Be time lé o uce ucéieng wo lépwo apulie.]

³Be lé o niimihi pie, lé caa mulie ha a péém, ke o wâé ne kolé ati. Kehe icehi ana o patéetilé a tan naa, pwohewii a bwo cunu ê toomwo na e piâbeeble ewa. Ke o time uce jan me lé cela.

⁴Ke mepwo é ne kowé, ni acéihi bééng ne ko Kériso, ke time geé uce mulie ne ha a melepiing. Ke time geé o uce téetih a tan naa, na e tuie pwohewii pa abune.

⁵Be wogewé ni apulie ha a pwéélang, be wogewé ni apenem heme pwang. Kehe time genye uce mu ha a melepiing.

Genye tee ûmiê

⁶Genye nemwo pule pwohewii lèpwo bén, kehe genye tee ûmiê, ke nye wéa, ke pipwocilekenye.

⁷Be a bwén, ke a de lèpwona lé pule, me lèpwona lé piolo.

⁸[É pii mwo pie]: Wogenye, ke lèpwo apulie ha a pwéélang. Ke genye wéa, ke pipwocilekenye. Genye pé a céhi, me a bwo pieâname beme epwén ko pa. Genye pé me boonye a bwo mwomwohi nen pie caa celuimikenye.

⁹Wo Padué, ke time e uce totekenye me e pwocuhinaado tenye, kehe me e celuimikenye, na e pwaadeniin bé wo Padaame henye, lésu Kériso.

¹⁰Be wo lésu, ke e caa mele me denye, beme genye o pimulie ibu me weeng, [hemepie genye caa mele, ai hemepie nye mwo te mulie; ke] mepie genye tekó pule, ai é hemepie nye tekó ûmiê; ha ace tan celi e o bo mwojuia mwobé hen.

¹¹É mulang, he na wâé heme geé te cuwo ko picani tewé, me pipamwoiukewé, pwohewii ana geé caa tekó pwo.

Bénebwéne pwooti

¹²Lèpwo béeème ne he Kériso, geme ilekewé pie, me geé pipaunu lèpwo apihuô tewé ne ha a céhi na e nelé wo Padaame me lé pwopune tewé, ke pacémunikewé.

¹³Geé paciitilé, ke geé pipwoééhelé ne ko nina lé pwo ati ne kowé. Ke geé mulie ha a péém me lèpwo béeuwé.

¹⁴Geé cihe me mwoiu ne ko ni apwoemaan, ke geé pamwoiu nina piwâ jélé [me lé penem de Padué] ke geé picani te nina tice niihelé, ke geé picani ne kolé ati.

¹⁵Geé pipwocile, geé nemwo pwotacu ko a ta, ko ana ta. Kehe geé hane me geé te cuwo ko pipwo tewé nina wâé. Ke geé wonaa mwo te ati ni apulie.

¹⁶Geé te cuwo ko pipwodéén,

¹⁷geé te cuwo ko pwoiitihi,

¹⁸ke geé te cuwo ko pipwo-olé te Padué, heme wâé ai, é heme ta ne kowé. Be weengaa kuti, ana nimen me geé pwo, wogewé nina caa céiu gewé me Kériso lésu.

¹⁹ Geé nemwo pacuwohi a *Jenen litihi heme e penem.

²⁰Ke geé nemwo pwo me piticenaado ne ko ni pwooti na lé pébé wo lépwo péroféta ne he nii Padué.

²¹Geé omehi ati me pineitééhi nina wâé koja nina ta. Ke geé cile cehi nina wâé,

²²ke geé â ité koja nina ta.

Bépinelé

²³Geme ilehi koja Padué, Pana e ne a péém, pie, me e pwo me geé iitihi, ke me geé mulie me den cehi. Ke me e wéhi dieli mwo ati ni mulihewé: ni jenewé, me ni pwonimewé, me ni bwo niimihinaado tewé, me ni éewé. Ke, é ha ace tan celi e o mwojuia mwobé hen wo Padaame henye lésu Kériso, ke o te tice ta kowé celi me tautikewé kon.

²⁴Be wo Padué na e caa todekewé, ke e caa te cuwo pwo ana e pii, ke e bo te tai pacuwohi ati ninaa.

²⁵Ke geé pwoiitihi me deme mwo, wogewé lépwo béeume ne he Kériso.

²⁶Geé pipwobwocu mu he ni ju pwonimewé te ati ni bénnye acéhi ne ko Kériso.

²⁷Ke é ilehi kojakewé, ne he nii Padaame pie, me geé bo pine a tii ce, te ati ni acéhi.

²⁸Wâé heme e mu pelewé a *pipwoééhe tice ja kon de Padaame henye lésu Kériso! Adéikewé!

2 Tésalonik

2 Tésalonik 1

Pipwobwocu

¹Woéo Paulo na é pwotii, he wogeme me Silas me Timoté. É pwotii lé céikewé, ni acéihi ne Tésalonik; na wogewé ko Padué Caa tenye, ke wo Padaame lésu *Kériso.

²Ke me lu ne tewé a *pipwoééhe tice ja kon, ke a péém wo Padué Caa, ke wo Padaame lésu Kériso.

Pamwoiuhi ne he ni tacebwén

³Lépwo béeome, gême te pipwo-olé te Padué é mu kowé, be a céihi tewé, ke piubwo ngen, ke a pwonimewé ko ni béén, ke e teko piubwo ngen.

⁴Ke anaa, na gême pipii dewé te ni bée acéihi ne ko Padué, wonaa mu ko a bwo cumang dewé, ke a céihi tewé, é ne ha ati ni tacebwén ke ni picani na geé mu hen.

E bo tauti ni apulie wo Padué

⁵Ni téé me ni picani, ke e habwii pie wo Padué, ke e tauti ne ha a mwomwon, be me wonaa, ke me jan ne kowé me geé taa ha a *Mwametau te Padué. Ke é mu kon, na geé ko mu he ni picani.

⁶Wo Padué, ke e bo pwo nina mwomwon, beme e ne a picani ne te lépwona lé pwo me geé mu he ni picani.

⁷Ke me e ne tewé, wogewé na geé mu he ni picani, a mwaale me wogeme, hemepie Padaame lésu, ke me e pihabwieng ne jedi he *miiden me ni *âcélo na pwojunuulé,

⁸ne ha awieme a duwele miû, beme e pwocuhinaado te nina muhi telé ko Padué; ke nina time lé uce ténedehi a pwooti te Padaame lésu.

⁹A cuhinaado telé, ke o te ju patiedenilé, ke lé o mu ité koja a junuu *a wâé te Padué dieli mwo.

¹⁰É hemepie e bo âbé a tan na e âbé hen wo lésu, ke ni apulie ten, ke lé bo pipaunueng, ke lé o bo picedieng nina lé céihi. Geé bo mu pelelé, be geé céihi ne ko nina gême pii tewé.

E pwoiitihi me delé wo Paulo

¹¹É mu ko anaa, na gême tee pwoiitihi me dewé, beme e picani tewé, beme geé mulie ne ha a mulip na wâé ten. Be e todekewé [me geé mulie me den cehi]. Ke gême ileeng me e picani tewé ko a junuun, beme geé panebwénihi ati nina wâé na nimewé me geé pwo, mu ko a céihi tewé.

¹²Ke me wonaa, ke o paunuhi a nii lésu, Padaame henye, mu kowé. Ke wogewé mwo, ke o pipaunukewé me weeng, mu ko a pipwoééhe tice ja kon de Padué henye, me Padaame henye lésu Kériso.

2 Tésalonik 2

Ânebuhe a bwo mwojuia mwobé te Padaame

¹Lépwo acéihi bééme, [nimeme me geme pacémunikewé] ko a bwo mwojuia mwobé te Padaame henye lésu Kériso, me a bwo pineibukenyen ten, beme nye mu me weeng.

²Geé nemwo pwo me hauli ni pwonimewé, ke mwotikewé, heme lé pii ne ni béén pie, e caa mwojuia mwo, be a jepule gele. Ke wielí lé o pii pie, te a *Jenen litihí na e te habwii telé anaa, ai lé o pii pie, wogeme na geme pii, ke tii ne telé anaa.

³Ûhu! Geé nemwo pwo me lé pipwohuô tewé!

E bo tehenebé wo pa Acubwoni Padué

Time e o uce ju téele tuie a tan naa, ânebuhe a bwo tuie ne [ni béé naado. Be e o mwo mi cuwo] a benaamwon, na lé o pwobwoni Padué ne ni apulie na te junihe hiwon jélé. Ke e bo te â tuiebeeble wo pana pii kon pie pa Acubwoni Padué. Ke wo panaa, ke wo Padué, ke e bo pwo me e patieden.

⁴ E bo pihoonihi ati ni naado na iitihi, me ati nina lé pipaunuhi me paciitihi ne ni apulie. Ke e bo pipaunueng mwo, me pii mwo pie, e eda koja ati ni naado. E bo â taa tebwo ha a *mwaiitihi te Padué, me pipatemehi pie weeng Padué!

⁵ É caa pii tewé ati ninaa, ha ali benaamwon li é mwo mu pelewé. Ai, kona geé caa pineuhi anaa?

⁶ Wo pa Acubwoni Padué, ke time o uce jan me pihabwieng, ânebuhe a tan den. Be pwo ana e pacuwoeng dieli ha a tan naa. Ke geé caa te temehi ehi anaa.

⁷ A juuju pie, e caa teko penem éni pwo bwohemwo, a *pipwojunuun na e pwobwoni Padué. Kehe icehi ana é dieli jenaa, ke te wogenye cehi ni naî Padué na nye ali temehieng. Kehe me e céieng mwo wo pana e pacuwoeng,

⁸ ke wo pa Acubwoni Padué, ke e bo te â tuiebeeble. [Weengi ana e o tuie ne kon ha anebwén kon]: E bo tuie wo Padaame lésu, ha *a wâé ten. Ke e bo pwo me e mele

[wo pana e cubwonieng] heme e cuueng ko a pwon. Ke e bo pwo me tieeng dieli mwo ko a bwo tuiebé na a wâé ten!

⁹ [Kehe icehi ana é ânebuhe anaa, ke] wo pa Acubwoni Padué, ke e bo pwo ni inenaado na hiwon ko a junuu *Caatana: ni naado na lé o téetihi ne ni apulie, ke e o pipwohuô telé kon.

¹⁰Ke o hiwon mwo ni naado na ta na e bo pwo, beme e pigeti ni apulie. Wo lépwonaa, ke o tielé dieli mwo, be muhi telé ko a juuju na me e celuimilé.

¹¹Te wo Padué na [e ne me wonaa, ke] e ne a pipwojunuun na ta, me e pipwohuô telé. Ke lé o céhi ne ko a gele.

¹²Ke e bo tautilé, ke e bo pwocuhinaado telé, ko ana tee nimelé me lé pwo ana ta, kojan me lé céhi ne ko a juuju.

Bénebwéne pwooti

¹³Lépwo acéhi bééme, te junihe eâname Padaame tewé, ke wâé heme geme te cuwo ko pwo-olé ten kowé! Be e caa te mi pipégalikewé ha atabuhi kon, beme e celuimikewé. Ke e wonaa ko a Jenen litihi ten, ke e pwo me wogewé ni apulie iitihi te Padué, ke é mu ko a bwo céhi tewé ne ko a juuju.

¹⁴Ke e todekewé, he li geme pipatemehi tewé a *Pwooti Wâé, beme geé mu ha a bwo ubwo na a wâé te Padaame henye, Iésu Kériso.

¹⁵Ke wonaa, wogewé ni bééme, wâé heme geé te cumang [ne he ni céhi tewé]. Ke geé cumang ne ko ni pwooti na geme ne tewé ko patime, ai nina geme tii me dewé.

¹⁶Wo Padué Caa tenye, ke te junihe eânimén denye. Ke é mu ko a *pipwoééhe tice ja kon den, ke e o te cuwo ko pamwoiukenyé dieli mwo. Ke e caa ne tenye a céhi na ubwo, ha a benaamwon na nye mwo ucéhi ati ni wâé, na me e bo ne tenye. Ke geme ilelu me Padaame Iésu Kériso,

¹⁷me lu pamwoiukewé, beme time o uce piwâ gewé, me geé te cuwo ko pwo ke pii nina wâé!

2 Tésalonik 3

Geé pwoiitihi me deme

¹Ke wogewé ni bééme, ke geé pwoiitihi me deme, geé ilehi pie me a pwooti te Padaame, ke me epin ko ân, ke me lé pipaunuhi pwohewii ne pelewé.

²Geé pwoiitihi mwo, beme e wéikeme koja lépwona ta ni pwonimelé. Be hiwon nina time lé uce céhi ne ko Padué.

³Kehe wo Padaame, ke e te mu ha a bwo mu ten, ke e bo pwo me pwo niihewé, ke e bo wéikewé ne ko *Caatana, pana ta nang.

⁴Geme céhi ne ko Padué ne ha a bwomu tewé, be geé pwo nina geme pii tewé, ke geé bo tee pwo mwo ce béén.

⁵Ke me wo Padaame, ke me e pwo me ni pwonimewé, ke me eânimewé te Padué, ke geé bo *ucéhi ne ha a céhi na e âbé mu Kériso.

Geé penem pwohewiikeme!

⁶ Geme ilekewé, ni bééme, ne he nii Padaame lésu Kériso pie, me geé mu ité koja lépwo acéhi béénye na lé pwoemaan, ke time lé uce âcehi ni cémun na lé hegi mu kome.

⁷ Wogewé, ke geé te temehi a bwopwonen me geé pipwohewiikeme, be time geme uce pipwohau li ne pelewé.

⁸ Ke time geme uce ju wiinaado heme tice cuhin pele pace céiu apulie; kehe geme penem, ke binyi ke mwaale geme, bwén ke pwang, beme time geme uce ne mwo huîiwé ace âneule.

⁹ Time uce a bwopiinen pie tice mwomwon deme, kehe nimeme me geme habwii tewé a bwomunen na me geé pipwohewiin.

¹⁰ É he geme mwo mu pelewé, ke geme pii tewé pie: Hemepie wo pace céiu, ke me te muhi ten me e penem, ke wâé heme time e uce wiinaado!

¹¹ Geme téne pie pwo lépwoce béén mu hadeniiwé celi lé mulie ne ha a pihauli: Time lé uce penem, kehe lé gaale he nina e piehadenii ni béén.

¹² Ke ni apulie naa, ke geme pihuôlé, ke geme pamwoiulé ko Padaame lésu Kériso, pie me lé penem ehi, beme lé wiinaado.

Geé tee pwo ana wâé

¹³ Kehe é ne ko wogewé lépwo bééme ne he lésu, geé nemwo pwo me emaan gewé, me geé pwo ana wâé.

¹⁴ Hemepie pwo paceli time e uce piténédehi ana geme pii ne ha a tii ce, ke geé nemwo âcéin ne he nina e pwo, beme tanim nang.

¹⁵ Geé nemwo pééeng me pwohewii paceli e téétikenye, kehe geé paciheeng pwohewii pa acéhi.

Bépinelé

¹⁶ Ke me wo Padaame he a péém, ke me e ne tewé a péém ati he ni benaamwon! Ke wo Padaame, ke me e mu pelewé ati!

¹⁷ Woéo Paulo, na é pé ali bépwotii, beme é panebwénihi ali tii. Be é te wonaa, ko ati ni tii tong, beme é habwii pie te woéo na é tii.

¹⁸ Ke me e mu pelewé ati a *pipwoééhe tice ja kon de Padaame lésu Kériso. Adéikewé!

1 Timoté

1 Timoté 1

Pipwobwocu

1-2 Woéo Paulo na é pwotii lé céiiko, go Timoté. Woéo pa apostolo te *Kériso lésu, pa watihe a céihi tenye. Be lu pahedeéo ngen, woilu me Padué, pa *aceluimikenye [beme é patemehi a pwooti te Kériso]. Wogo pa ju naîng ne ha a céihi ne ko Kériso. Wâé heme e mu kom a *pipwoééhe tice ja kon, me a péém na e âbé mu ko Padué henye me Padaame Kériso lésu. [Ke wâé heme go temehi] a bwo wâé julu ne kom.

Pipwocile ni apwopune na lé gele

3 Pa béeng, é te ju paniimihi tem ali é pii he li é engen kojako me é â ha a province Macédoine. Be é pii tem pie, wâé heme go tee mu ha a pwomwo ubwo Éfeso, beme go pacuwo lépwo apwopune na lé gele.

4 Lé te cuwo ko cihe ko ni jemaa na gele, ke ni jame jepule ko ni nii lépwo watihenye. Ke go pii telé pie me lé necu ninaa. Be ninaa kuti na bo taapwii ni pitaacunaado, ke time lé uce picani ko ni penem de Padué, a penem na nye pwo ne ha a céihi.

5 É pii tem pie, me go pwo anaa, [go Timoté, ke me go pacémuni ni acéihi] beme lé pipwoééhelé mu he ni ju pwonimelé. A pipwoééhe, ke e âbé mu ko a bwo piténedehi nen denye a *pwocihe na e âbé mu he ni pwonimenye. Ke e âbé mwo mu ko a bwo céihi nen denye na juuju.

6 Kehe icehi ana wo lépwo apwopune na lé gele, ke lé piâ ité koja a pwaaden na wâé. Ke lé pipatieden ne he ni jepule telé na te ju piticenaado ne kon.

7 Be nimelé me lé pacémuni ni apulie ko ni *patén de Moosé. Kehe icehi ana time lé uce temehi nina lé tee ko mwoiu ko pacémunihi!

Ni patén ke wâé, heme nye mulie hen

8 Genye te temehi pie te wâé ni patén, heme nye mulie ehi hen.

9 Be time e uce ne ni patén [wo Padué] me de lépwona wâé ni mulihelé. Kehe e ne, beme de lépwona lé te cuwo ko pwo nina ta. Be muhi telé me lé piténedehi, ke lé caada ni pihuô ten: Lé bitelé koja Padué, ke muhi telé me lé pipaunueng; Lé pihoonihi ni naado na iitihi; Lé taunuhi apulie die ko ni nyaa me caa telé;

10 Lé cibe mwa; Lé pipule hauli me ni béén, die ko ana wo lépwo aiu, ke lé te pipule mwo me ni aiu; Lé pwo âicu ko ni apulie; Lé gele; Lé pipé ne ko ni béén ne he ni mwopitautinaado. Be [e ne ni patén wo Padué me de lépwona wonaa jélé] me ati lépwona lé pwo ni béé huô na ta. Be time lé uce piténedehi ni pune na mwomwon na genye hegi,

¹¹ke e âbé mu ko a *Pwooti Wâé, na e ne tong wo Padué [beme é wéhi, ke me é patemehi]. Ke wâé heme nye pipaunueng, be te junihe wâé nang.

Pwo-olé te Kériso na e celuimikenye

¹²É pwo-olé te Padaame henye Kériso lésu. Be e niimihi pie jan ne kong me é pwo a penem na e ne tong, ke e ne tong mwo a niihen beme é pwo.

¹³Kehe é ânebun, ke é mu cihe me ta ne kon. Ke é mu pwotahinaado [ne ko ni apulie ten]. Kehe icehi ana e pipwoééhung, [ke time e uce pwocuhinaado tong. Be e alihia pie] é wonaa be time é uce temehi, be time é uce téele céhi ne kon.

¹⁴Nihe ubwo a pipwoééhe tice ja kon de Padaame Padué ne konye; a pipwoééhe na e pieda me dong. Ke e pwo me é céhi ne ko Kériso lésu, ke e pwo me é pipwoééhe ni apulie ko a pipwoééhe na e âbé mu kon.

¹⁵Be [nye mu pii pie]: «E âbé ne pwo a bwohemwo wo Kériso lésu, me e celuimi nina ta jélé.» Ke weengaa a pwooti na juuju, ke nina wâé heme genye céhi ne kon. Ke te woéo kuti pana é te nihe pwo nina ta!

¹⁶Kehe icehi ana e pipwoééhung wo Padué, beme e habwii pie e picani ne kong wo lésu Kériso. Be, heme e wonaa tong, woéo pa apulie na junihe ta jo, ke o bo a cémun de ni béé apulie. Ke lé bo céhi ne kon, ke lé o bo hegi mu pelen a *mulie dieli mwo.

¹⁷Me genye pipaunu Padué me pipii den! Be weeng Padaame ne ha a wâé ten; Pana te tice anebwén kon; Pana te mulie dieli mwo; Pana time nye uce alieng; Pana te céiu nang! Me genye pipwoun den dieli mwo! Wâé heme wonaa! Amen!

Go cumang ne ha a céhi

¹⁸Ana é pii tem, go Timoté pa naîng, ke te ju piwien me ali lé pii wo lèpwo péroféta [he li lé pébé a pwooti te Padué] ne kom. Ni pwooti naa, ke e bo ne ace niihem, beme go pwopahi [a Pwooti Wâé].

¹⁹Wâé heme go *cumang ne ha a céhi tem [ne ko Kériso]. Ke go pipwocile, beme go mulie ehi âcehi ni pwooti na e âbé mu ha a pwonimem. Be wo lèpwo béén, ke muhi telé me lé piténédehi a pwocihe na e âbé mu he ni pwonimelé. Ke lé caa patieden a céhi telé.

²⁰Woili pelelé wo Iméné me Alexandre. Ke é caa nelu te *Caatana, be me wonaa, ke me lu temehi pie, lu nemwo pii pie lu cihe ne he nii Padué!

1 Timoté 2

A pwooti ko a bwo pwoitihi

¹É mu ko ati ninaa, ke é pamwoiukewé [go Timoté, me ati ni acéhi] pie me geé pwoitihi te Padué me de [lèpwo acéhi béewé me ati] ni apulie [mu he ni ju pwonimewé]. Geé ilehi kojaeng pie, me e pwo ce naado celi wâé me delé; ke geé pwo-olé ten ko ninaa. Weengaa kuti a junado.

²Geé pwoitihi me de lépwo daame, [me lépwo apihuô, me lépwona piubwo jélé] me ati lépwona lé pipwahamiinye [ne he ni amu tenye]. Be me wonaa, ke genye mulie ha a péém. Ke genye o bo paciiti Padué, ke genye o engen ehi ati he ni bwomunen.

³Weengaa kuti [a bwo pwoitihi] na wâé heme genye pwo, be ana piwâénime Padué kon, pana e celuimikenye.

⁴Be nimen me e *celuimi ni apulie ati, ke me [lé hegi ke] temehi a juuju [ko lésu].

⁵Be te céiu cehi Padué

[he ati ni apulie]. Ke te céiu cehi pa apipépwooti hadeniinye me Padué: ke wo Kériso lésu. Be e â pa apulie pwohewiikenye,

⁶ke e patupwo a mulihen, beme e tuwo ati ni apulie

[koja a ta me a mele]. Weengaa ali e caa habwii wo Padué ha a tan na e caa te mi ne, pie nimen me celuimi ni apulie ati.

⁷Ke é mu ko anaa kuti, na e pahedeéo, beme pa apostolo ten me de lépwona time uce lépwo *Juif. Be e pahedeéo ngen, me é â pwopune telé, ke me é pacémunilé ko a pwooti na juuju [ko lésu] na nye ko céihi ne kon. Ke heme é ko pii anaa, ke é te juuju, kehe time é uce gele!

Ni bwomu tenye heme nye pwoitihi ibu

⁸Weengi ana é huôhi: Ati he ni benaamwon, [heme geé pipitikewé ne he nii Padaame] ke wâé heme geé pwoitihi ten. Ke geé necu a pipééle me a pitaacunaado. Ke me geé eti ni iwé da céii Padué, ke wâé heme geé pwo, mu he ni ju pwonimewé na wâé.

⁹Ke é huôhi ne te ni toomwo pie: [Heme geé pipitikewé ne he nii Padaame] ke wâé heme geé pipwocile a bwo cuwohe ni epwénnewé, ke a bwo tuti ne ni puniwé, beme geé nemwo pihabwiikewé. Ke geé nemwo cuwohe ni epwén na junihe ubwo ni cuhin. Ke geé nemwo ne ni mwani megele, me ni *perle*.

¹⁰Be a ju wâé te ê acéihi, ke e habwii ko ni penem den na wâé.

¹¹⁻¹²Wâé heme ni toomwo, ke me lé pwo me piwahin jélé, ke me lé te ju mu me lé tabemi a pune. Be time é uce ne telé a mwomwon me lé pacémuni lépwo aiu, ai me lé pwohuu telé ne he nina lé pwo.

¹³Be wo Padué, ke e mi tabuhi [pa aiu, wo] *Adamu; ke é alechen, ke e bwo ne [ê toomwo na wo] Éva.

¹⁴Ke time uce wo Adamu li e pihaamieng [na ali bwien, wo *Caatana]. Kehe wo êgi toomwo li e pihaamieng, ke time e uce ténedehi ni patén de Padué.

¹⁵Kehe icehi ana o celuimi ni toomwo ne ha a bwo picile ewa telé, hemepie lé tee mulie ha a mulie na wâé te Padué, ne ha a céihi, me a pipwoééhe, ke me lé pwo me piwahin jélé.

1 Timoté 3

A pwooti te ni apihuô te ni céihi

¹ Weengi a céiu pwocihe [na nye mu pii pie]: «Hemepie nime pace céiu apulie me pa caa te lèpwo apihuô te ni acéihi, ke a penem na wâé.» Ke a pwooti na juuju.

²⁻³Ke wo pa apulie naa, ke wâé heme e pipwoiipihi a mulihen [ne he pwahamii ni apulie ati]. Ke wâé heme te tice celi me pipé ne kon: Me e ju mu ehi ko ê mwoden; Me time e uce nihe wiinaado, me ûdu; Me time uce pa apipééle, ke pitaacunaado; Me time e uce pwo me wâé ten a mwani. Me e éewo ko ni apulie; Me e cihe me bwala; Me e hegi ehi ni apulie na lé âbé tuie ne pelen; Me e temehi pacémuni ni acéihi;

⁴Me e temehi pihuôhi a pomwa ten, beme lé piténedeeng ne ni naîn ne ha a bwo pwo me piwahin jélé.

⁵Be mepie time e uce temehi me e wéihi ehi a pomwa ten, ke kona e bo woté ko ace bwo pé na a puapulie te Padué, a Mwaiitihi ten?

⁶Wo pace apihuô, ke time uce wâé hemepie paceli e mwo ju tabuhi céihi. Be koli e bo cibehede, ke koli e bo paupaaeng wo *Caatana.

⁷Ke a céiu mwo: Ke wâé heme a mulihen, ke me wâé te lèpwona time uce lèpwo acéihi, beme te tice apulie celi me lé pii celi ta ne kon. Ke me time e uce tupwo ne ha a pwojé na e pipwopweehi me den wo Caatana.

Lèpwo dikone

⁸Te piwien ne ko lèpwo dikone, be wâé heme lèpwo apulie na lé woni: Me lé pipaciitilé; Me mwomwon jélé, ke me lé nemwo te pitaatééhi pwocihe; Me time lé uce nihe ûdu tabe megele; Me time uce lèpwo ahane mwani.

⁹Ke wâé heme lé âcehi a céihi [na caa pacémunilé kon]. Be a juuju li e ha *aduwo ânebun, ke e caa habwii tenye wo Padué. Ke wâé heme lé tabemi ehi a *pwocihe na e âbé mu he ni pwonimelé.

¹⁰Ânebuhe ace bwo pipégali pace apulie beme pa dikone, ke wâé heme nye mwo mi alahi ni penem den, beme te tice naado celi me o bo pipé ne kon.

¹¹Ke é ne ko ni dikone toomwo, ke wâé heme lé woni: Me lé pipaciitilé; Me time lé uce pipii apulie; Me time lé uce wiinaado me ûdu hauli; Me lé juuju ne he nina lé pwo.

¹²Wo lèpwo dikone, ke wâé heme lé paciiti ni mwodelé. Ke wâé heme lé pacihe ehi ni naîlé, me ni pwomwoiou telé.

¹³Be mepie lé pwopweehi ni penem delé, ke nye o tai paciitilé. Ke o te mu mang ni céihi telé ne ko Kériso lésu.

A pihuô te Paulo ne te Timoté

¹⁴Nimung me é mwo âdé die pelem, kehe icehi ana é mi pwo a tii ce lé céiiko,

¹⁵be wiel i o bwoliéo. [Be wâé tong] me go temehi ce bwomu tenye celi wâé ne ha a pwomwoiu te Padué. A pwomwoiu naa, ke a Mwaiitihi te Padué na e mulip, a puapulie ten. Ke a Mwaiitihi, ke e imwi me pwopah i a ju pipwopune [ko Kériso]. Be e pwohewii pa acuimi na a mwa.

Nihe ubwo a wâé te Kériso

¹⁶Go alih i, a juuju na e habwii tenye wo Padué, ke a naado na te nihe ubwo wéden. Ke genye nihe céhi ne kon! Be: E pé a éé apulie wo lésu Kériso. Ke e pajuujueng a *Jenen litih i. Ke lé alieng ne ni *âcélo. Genye patemehieng te ni bele. Ke lé céhi ne kon pitih i a bwohemwo. Ke céieng da he *miiden ne ha a wâé te Padué Caa.

1 Timoté 4

Lé bo piâ ité wo l épwo béén

¹E patemehi na a *Jenen litih i pie, lé o bo patieden ni céhi telé wo l épwo béén he *ni bénebwéne tan. Be lé o âcehi ni bwo temehinaado na gele na e âbé mu ko ni duéé.

²Wo l épwo apulie naa, ke ni agele na lé pipwohuô tenye, be lé caa patieden a *pwocihe na e âbé mu he ni pwonimelé, ko a bwo time lé uce tabemieng.

³Lé huôhi [te l épwo acéhi] pie me lé nemwo piaten, ke lé paciitih i kolé ni bée wiinaado. Kehe icehi ana ni wiinaado naa, ke nina e ne wo Padué beme nye wii. Kehe wogenye ni acéhi, ke genye caa temehi a juuju, ke te wâé heme genye wiinaado, ke me nye pwo-olé te Padué kon.

⁴Éa! Te tai wâé ati ni naado na e pwo wo Padué! Ke te tice celi me genye paciitih i! Kehe genye te tai hegi ati [ne ha a pipwodéen] ke genye pwo-olé te Padué.

⁵Be ni naado naa, ke nina wâé te Padué mu ko a pwoooti ten, ke ni pwopipwo-olé ten.

Wo pana e penem ehi me de Kériso

⁶Wâé heme go te picaa ni naado naa te l épwo acéhi bée. Be me wonaa, ke bo wogo pa ju eabwé te Kériso lésu. Ke go te hegi [ne ha a pwonimem] ni pune na juuju ko a céhi tenye [ne ko Kériso]. Be go caa te âcehin, ke wâé mwo heme pwohewii ni wiinaado tem ati he ni tan.

⁷Go nemwo pipéce ne ko ni jemaa na gele, be te ju piticenaado ne kon ne te pa apulie na e paciit Padué. Wâé heme go tee mwoiu ko penem, beme wogo pa apipwoiipi, ke me go paciit Padué.

⁸Be [nye mu pii pie]: «Ni jele, ke ni penem na lé pwopweehi a éénye, ke ni naado na wâé. Kehe icehi ana a naado na nihe wâé, ke a penem ko a mulihenye, beme wâé te Padué. Be é mu ko anaa, na nye hegi *a ju mulip tabuhi jenaa, ke é dieli mwo.»

⁹A pwooti naa, ke a juuju, ke wâé heme lé hegi ati ne ni apulie.

¹⁰É mu ko anaa kuti, na me genye mwoiu ko penem, be genye caa céihi ne ko Padué, na e mulie [ke e ne a mulip]. Be weeng li e *celuimi ati ni apulie; ke anaa, ke a juuju te lépwona lé céihi ne kon.

¹¹Ke weengaa kuti ana me go te cuwo ko pacémunilé kon.

Go pipwocile a bwo mulie tem

¹²Wâé heme go habwii ce bwomu tem celi wâé te ni acéihi ne he ni bwo cihe tem me ni penem dem, me a pipwoééhe tem, ke a céihi tem, me a bwo pipaciitiko. Ke me wonaa, ke o te tice bwopwonen me e pihooniko wo pace céiu apulie, mu ko ana wogo, ke mwo pa ewa aiu.

¹³Heme go ucéihi a bwo tuie tong, ke wâé heme go te cuwo ko pine ni *tii iitihi te ni apwoiitihi. Ke go tee pamwoiulé, ke go tee pacémunilé.

¹⁴Go nemwo neuhi ali âpipati li e ne tem na a Jenen litihi, he li lé ne li ilé huîim wo lépwo apihuô te ni acéihi, ke li lé pii li pwooti ne huîim [ne he nii Padué].

¹⁵Ke wâé heme go ju mu cehi ko li penem [li é caa pii tem]. Ke go penem ehi, beme lé alahi ne ni apulie pie, caa piubwo da a utehe a penem dem.

¹⁶Go pipwocile a bwo mulie tem me a bwo pwocémun dem. Ke go te ju mu kon cehi. Ke e o bo celuimikewé [wo Padué]: wogo me lépwona lé hegi ni pwooti tem.

1 Timoté 5

A bwo pacémuni ni pétaapwo acéihi

¹Go nemwo cihe me mwoiu te pace ukéiu. Hemepie go pwopune ten, kehe go paciitieng, pwohewiin heme pa caa tem. Ke go pwopune te ni ewa pwohewiin heme ni ciéém;

²ke ni ukéiu toomwo, pwohewiin heme ce nyaa tem; ke ni ewa toomwo pwohewiin heme ce toomwo pwaadeniim.

Ni depwele

³Geé pwopweehi ne ko ni depwele na te tice apulie celi me lé picani telé.

⁴Ke mepie te pwo ce nailé, me ce pabulé, ke wâé heme lé mi pwopweehi te ni pwomwoiu telé. Be weengaa kuti a ju penem de pa acéihi. Be ni taacu me mwojuia ko ni naado na lé hegi mu ko ni caa me nyaa telé, me ni ao me gee telé. Ke o te junihe wâé te Padué.

⁵Ke mepwo é ne ko ni depwele na te tice apulie celi me lé picani telé, ke woélé kuti ni toomwo na lé céihi ehi ne ko Padué. Be lé te pwoiitihi ten heme bwén ke pwang. Ke lé te cuwo ko ilehi kojaeng me e picani telé.

⁶Ke mepwo é ne ko ni depwele na lé te ju hane cehi ni pipwodéén delé, ke pwohewiin heme lé caa mele, te piwien heme lé mwo tekó mulie.

⁷Weengaa kuti a huô na me go pii te ni depwele, [me ni pwomwoiu telé], beme o te tice naado celi me nye o bo pipé ne kolé kon.

⁸Be [te a penem denye] me nye pwopweehi ne ko a pwomwoiu tenye, tabuhi mu ha a pomwa tenye. Ke wo pana time e uce wonaa, ke e â ité koja a céhi ten, ke caa junihe ta nang koja pana time uce pace acéhi.

Ni depwele na nye ne mwani telé

⁹É ne ko ni depwele na nye ne mwani telé ne ha a Mwaiitihi, ke wâé heme lé caa wédenihi a 60 ni jo helé. Ke nina lé te mu ehi ko ni aiu helé ânebuhe a bwo mele telé.

¹⁰Ke wâé mwo hemepie ni toomwo na nye temehilé mu ko ni naado na wâé na lé mu pwo: Me lé te ju cile ehi ni naîlé; Me lé te hegi ehi ni apulie; Me lé pipenem ehi te ni acéhi; Me lé picani te lépwona lé mu he ni picani me ni téé; Me lé pwo ati ni pétaapwo naado na wâé.

¹¹Geé nemwo ne ce bépicani te ni depwele na mwo ni ewa. Be koli lé bo âcehi ana te nimelé kon, beme lé piaten mwo. Ke koli lé bo piâ ité koja [ni penem na lé mi pii pie me lé pwo me de] Kériso.

¹²Ke é he ko wonaa, ke time lé uce pacuwoshi a *piapwo telé me den,

¹³ke koli lé bo uce pwoemaan. Ke a naado na nihe ta koja anaa, ke koli lé bo te â he ni pwomwo, ke lé pipii apulie, ke lé gaale he ni naado na te tice panelé ne kon, ke lé tee pwome pii ni naado.

¹⁴Ke é mu ko anaa kuti, na é pii te ni toomwo depwele na mwo ni ewa pie, wâé heme lé piaten mwo. Ke wâé heme lé cile ehi ni naîlé, ke me lé pwoiipihi ehi ni pomwa telé. Ke me wonaa, ke time lé o uce ne pwaadeni lépwona muhi telé konye, me lé pipii me ta genye.

¹⁵Be é ne ko ni bée depwele, ke lé caa te piâ ité, be lé âcéi *Caatana, ke lé caa pipatieden.

¹⁶[Go pii te] ni toomwo na lé céhi pie, mepie pwo ce depwele he ni pwomwoiu telé, ke wâé heme lé picani telé. Be me wonaa, ke me time uce a âneule te a *puco te ni acéhi, beme e bo te ju picani cehi te ni depwele na tice apulie celi me lé picani telé.

Lépwo apihuô te ni acéhi

¹⁷Wâé heme nye paciitihi, ke me nye pwocuhi lépwo apihuô na lé pé a puapulie te Padué. Ke me nye pwocuhilé ehi, hemepie lé te mwoiu ko pwopune me patemehi a Pwooti Wâé.

¹⁸Be caa te tii ne he ni tii iitihi pie: *Go nemwo pacuwohi a paaci me e wii ni ace blé, heme e ko penem me dem.* *Deutéronome 25.4* Ke caa tii mwo pie: «Wo pa apenem, ke wâé heme e hegi a cuhieng.»

¹⁹É hemepie pwo pace céiu apulie celi e pipé ne ko pace céiu apihuô, ke go nemwo uce pipéce ne kon, hemepie te weeng cehi. Be wâé heme alo ai cié lépwoceli lé *pajuujuhi.

²⁰Wo lépwona lé te cuwo ko pwo nina ta, ke go pacihelé ne he pwahamii ni apulie ati. Be me wonaa, ke me mwoti lépwo bén me lé pwo nina ta.

²¹Weengaa nina é huôhi ne tem ne he pwahamii Padué, me Kériso lésu, me ni *âcélo na lé pipenem delu. Ke go piténedelé ehi, ke go nemwo pipwoinen ne ko ni apulie.

²²Wâé heme go omehi a mulihe pa apulie ânebuhe a bwo pipégalieng beme pa apihuô te ni acéhi. Be koli go bo habwii pie, te wâé tem ni ta na e pwo. Go pipwocile, ke go pipwoipiko ati ne he ni bwomunen.

²³Ke é ne ko wogo, go Timoté, ke wo pana mu te cuwo ko cunu go, kehe é pii tem pie: *Go nemwo ju ûdu ju tabe cehi; kehe go neibuhi me ace tabe megele,* beme wâé a nam.

²⁴É ne ko lépwona lé cuwo ko pwo nina ta, ke genye te mi alahi ni ta pwo telé ânebuhe a tan ko tautinaado. Ke é ne pele lépwo bén, ke genye bo tee alahi mwo alechen.

²⁵Pwohewii ni penem na wâé. Be pwo ni bée penem na te ju epin ko alahi. Ke ni bén, ke nye bo tee alahi alechen.

1 Timoté 6

Lépwo apenem tice ja kon

¹Weengi a pwootti me de lépwo acéhi na lépwo *apenem tice ja kon: Geé paciiti lépwo caa tewé me piténedelé ehi. Be me wonaa, ke wo lépwo apulie, ke me o time lé uce pihooni Padué, ke é ne ko ni cémun denye.

²Hemepie pa caa tem ke pa acéhi bém, ke time uce a bwopiinen pie, me go nemwo paciitieng na ati he ni bwomunen. Wâé heme go te penem ehi me den, beme go picani te pa acéhi bém, na te wâé mwo te Padué nang.

Bénebwéne pwootti

Wâé heme go pacémuni lépwo acéhi ati ko ninaa, go Timoté. Ke go wâgo kolé me lé piténedehi.

Lépwo agele

³Pwo ni bée apulie na lé pacémuni ni acéhi ko ni naado na te ité koja [nina é pii tem]. Ke time lé uce âcehi a pwootti te Padaame henye, wo lésu Kériso. A pwootti naa, ke juuju, ke wâé, ke e pacémunikenye ko a mulip na wâé te Padué me nye mulie hen.

⁴Wo lépwo apulie naa, ke te nihe lépwo acibehede, kehe te tice celi lé temehi. Caa te a cunu kolé anaa: Wâé telé heme lé tee pitaacunaado. Kehe ati ni pwooti telé naa, ke e taapwii a pitaaba, me a pineité, me ni piciheta, me ni bwo niimihinaado na ta.

⁵[Te nihe wâé telé] ni picihe na tice anebwén kon, be lé âcehi ni bwo niimihinaado telé na time uce mwomwon. Be time lé uce alahi a juuju. Ke lé niimihi pie, a céhi ne ko Padué, ke a pwaaden beme o pwo ce delé.

A ju wâé tenye

⁶Te a juuju pie, a céhi tenye ne ko Padué, ke caa te a wâé tenye na nihe ubwo! Ke wâé heme nye pipwodéen ko nina caa e peleny.

⁷Be te tice celi nye pébé ne éni pwo bwohemwo, ke e te tice mwo celi nye o mwojuia imi.

⁸Ke hemepie pwo ce wiinaado, me ce epwénenye, ke caa te jan ne konye ninaa.

⁹Ke é ne ko lépwona lé tee ko hane ce naamuulé, ke lé ne [te *Caatana a watihen] me e pipaupaalé, ke lé o bo â pwo ni naado na ta. Be time lé uce ko alahi pie, lé tekó pipwotahinaado ne kolé mwo, be lé tekó âcehi nina te nimelé kon, na te ju piticenaado ne kon. Pwohewiin heme ko cielé ko itihe toki, ke me tahilé ne he jié beme lé mwiiê, ke me tielé dieli mwo.

¹⁰Be a watihe ni pétaapwo naado na ta, ke a bwo wâé tenye a mwani. Hiwon nina lé nihe hane a mwani, ke lé pineuhi a céhi. Ke lé te nihe mu he ni picani kon.

Ni bée huô te Timoté

¹¹Go cela ko ni naado na ta, go Timoté, be wogo ke pa apulie te Padué. Go pipwoipiiko, beme wâé te Padué go. Go mulie ne ha a céhi, me a pipwoééhe, me a piuca. Ke me bwala a pwonimem.

¹²Go cumang ne ha a pa na wâé, âcehi a céhi tenye. Ke go imwi mangihi a mulip ne pele Padué dieli mwo [ke go mulie ehi hen jenaa]. Be e caa toteko ne ha a mulie naa, ha a tan na go patemehi a céhi tem ne ânebuhe ni apulie na hiwon.

¹³⁻¹⁴É huôhi ne tem pie, me go pitenedehi ni patén na go caa hegí. Ke é pii tem anaa ne he pwahamii Padué, na e ne a mulihe ati ni naado. Ke é pii mwo ne he pwahamii Kériso lésu, pana e te pii cehi a juuju he li e cuwo he pwahamii gupéno Ponce *Pilate. Go ténedehi ni patén naa, beme o te tice alili kom; ke me o te tice celi me o tautiko kon, die ha a tan na e bo mwojuia mwobé hen wo Padaame henye lésu Kériso.

¹⁵Be: E pihuôhi ati wo Padué henye, na wâé heme nye pipaunueng. Padaame he ni daame, ke pa Apihuô te ni apihuô. E caa pacuwohi a tan na e bo habwii Kériso

[he e bo mwojuia mwobé.]

¹⁶Te weeng cehi kuti na e *mulie dieli mwo. Pwomelaa a pwéélang den; pwocoon me nye omeeng; time uce jan me nye alieng. O bo pipaunueng he ni tan ati. Mu kon a pwojunuun dieli mwo. Wâé heme wonaa! Amen!

Lépwo acéihi na pwo ni wâé telé

¹⁷Go pii ehi te lépwona pwo ni wâé telé ne éni pwo bwohemwo pie, me lé nemwo pipaunulé. Ke me lé nemwo céihi ne ko ni wâé telé, be time o uce mu dieli mwo. Ûhu! Wâé heme lé céihi ne ko Padué, pana e ne tenye me piticenaado ne kon ati ni naado beme nye pipwodéén kon.

¹⁸Go pii telé pie me lé pwo ce naado celi hiwon celi wâé. Ke me lé pati ni béén, ke me lé ne, me piticenaado ne kon.

¹⁹Ke me wonaa, ke lé ne a wéa ko a céiu benaamwon, he na e lang a wâé na junihe wéden, na o time uce nyaale: ke *a ju mulip.

Bépinelé

²⁰Go cile ehi, go Timoté, ana e ne tem wo Padué. Go nemwo tabemi ni pwocihe na tice ânen na lé nekenye ité koja a céihi. Be wo lépwona lé taacunaado ko ni naado naa, ke lé pii pie e pelelé ni bwo temehinaado [na e bwolu] kehe icehi ana lé gele.

²¹Ke hiwon lépwona lé piâ ité koja a ju céihi, be lé âcehi ni âniimihinaado naa. Wâé heme e mu pelewé ati a *pipwoééhe tice ja kon de Padué. Adéikewé!

2 Timoté

2 Timoté 1

Pipwobwocu

1 Woéo Paulo [na é pwotii lé céiiko go Timoté] woéo pa *apostolo te *Kériso lésu, âcehi ana nime Padué kon. Be e pahedeéo ngen me é pii beetihi a pwooti ko a mulip. Be e caa pii ânebun pie, e bo ne tenye a mulip naa, na e pwaadeniin bé wo Kériso lésu.

2 Wogo pa ju naîng ne ha a céihi, go Timoté, na te junihe eânimung dem. Wâé heme e mu kom a *pipwoééhe tice ja kon me a péém na e âbé mu ko Padué henye me Padaame Kériso lésu. Ke [wâé heme go temehi] a bwo bwala julu ne kom. Adéiko!

E pamwoiu Timoté wo Paulo

3 É heme bwén ke pwang, heme é pwoiitihi, ke é mu tee cuwo ko pii a niim. Ke é pwo-olé te Padué, pali lé pipwoeabwé ten wo lépwoli ukéiu tenye. Ke é ko pipwoeabwé ten mwo, mu ha a ju *pwonimung na time uce pipé ne kong.

4 É niimihi ali bwo é tem [he li é engen kojako]. Ke junihe nimung me é aliko mwo, ke é o te junihe pipwodéén hemepie genyu bo pitokenyu mwo.

Pwo mwo me éle a miû na e kom

5 É temehi pie wogo, ke go céihi ne ko Padaame mu ha a ju pwonimem. Be go pwohewii gee tem Loïs, êgi te mi ê acéihi kojako, ke wo Eunice êgi nyaa tem.

6 É mu ko anaa kuti, na é pamwoiuko, beme go wéihi ehi a âpipati te Padué na e kom, li go hegi he li é ne lupwo ing huîm. Be caa pwohewii a miû na e caa pwo me e mele. Ke wâé heme go pwo me éle mwo.

7 Be a *Jenen litih, na e ne tenye wo Padué, ke time e uce ne me piwâ genye, ai me mwotikenye. Be e pébé céiikenye a junuun, me a pipwoééhe, me a bwo pipwoiipikenye!

8 É mu ko anaa, na go nemwo pwo me piwâ go me go patemehi Padaame henye. Ke go nemwo pwo me mwotiko ko a bwo mu tong éni he karépu me den! Kehe wâé heme nyu pimu ibu he ni picani, mu ko [a bwo patemehi na] a *Pwooti Wâé. [Ke go cumang ne ko Padué] be e ne tem a junuun [li é caa pii tem].

A nyebi da céii Padué na e celuimikenye

9 E caa *celuimikenye [wo Padué]. Ke e todekenye ati, beme wogenye ni apulie ten. Time uce wogenye na nye pwo anaa; Kehe te a bwo niimihinaado ten, na e caa te mi *pajujuhi, he mwo te tieden a bwohemwo. E habwii tenye a pipwoééhe ten na e pwaadeniin bé wo Kériso.

10 E tuiebé wo Kériso, pa aceluimikenye; e pwo me tieden a niihe a mele. Ke e ne tenye a *mulie dieli mwo. Weengaa a Pwooti Wâé ten!

Time uce piwâ jo me é patemehieng

¹¹ Wo Padué, ke e pwo me woéo pa céiu apostolo ten, beme é patemehi a Pwooti Wâé ten naa, ke me é pacémuni ni apulie kon.

¹² Weengaa kuti nina é ko mu he ni picani kon jenaa. Kehe icehi ana time uce mwotiéo kon. Be é te temehi Pana é céhi ne kon. Ke é te céhi me ubwo pie, e bo te wéhi ali e ne tong, dieli ha a *Tan Alece.

¹³ Go âcehi ni pwooti na juuju, na go caa hegi kojaéo, ke go mulie hen, ne ha a céhi me a pipwoééhe na e ne tenye wo Kériso lésu.

¹⁴ Ke go cile ehi a [Pwooti Wâé] na ne tem. Be e bo picani tem a Jenen litih na e mulie konye.

Pa bénye Onésifor

¹⁵ É ne ko lépwo acéhi mu ha a province Asia, ke go teko temehi pie, lé bitelé kojaéo; wonaa mwo ne ko lupwo béeing, wo Figèle me Ermogène.

¹⁶ Te icehi Onésifor. Ke wâé hemepie wo Padaame, ke me e ne a pipwoééhe ten me de a pwomwoiou ten. Be e tee cuwo ko picani tong, ke time uce mwotieng me e pwokarépu pwohewiiéo.

¹⁷ Be é he e tuiebé ha a pwomwo ubwo *Rome, ke time uce mwaale nang ko haneéo ati he ni piduaan, ke e te tooéo.

¹⁸ Ke go teko temehi ehi ati ni penem na wâé na e pwo me dong ne ha amu ten é Efeso. Ke é ile Padaame me e habwii ten a pipwoééhe ten, ha ace Tan celi e bo tauti a bwohemwo wo Padué.

2 Timoté 2

Pa coda na e piténede Padaame

¹ É mu ko ati [ni naado naa] go pa naîng, ke wâé heme go cumang ne ko a *pipwoééhe tice ja kon de Kériso lésu.

² A pwooti na go caa téne heme é pii ne ânebuhe ni apulie na hiwon jélé, ke wâé heme go ne te ni apulie na mwomwon jélé, lépwona jan ne kolé me lé pacémuni ni bée apulie.

³ Go pé ce dem mu ko ni picani na genye mu hen, pwohewii pa coda te Kériso lésu.

⁴ Be pa coda na nimen me e piwâéeng wo pa caa ten, ke time e uce nenimen ne ko ni penem na e pwomwo koja a mwocoda.

⁵ Ke wo pace ajele, ke te tice cemen hemepie time e uce âcehi ni patén ko a jele.

⁶ [Pwohewii ali nye mu pii pie]: Wo pana e te nihe penem he ni apwoamu, ke e o te mi pé ni acehi ni penem den.

⁷Go pitautinaado ehi ne ko nina é ko pii tem, be e o bo pwo me go temehi ati wo Padué.

Wo lésu ke pa béhabwiinen denye

⁸Wâé heme go piniimihi pie, e caa mulie cemwo mu ha amele wo lésu Kériso, pa piebehi pa daame *Davita. Weengaa kuti a Pwoot Wâé na é ko patemehi.

⁹Ke é ko mu he ni picani mu ko a Pwoot Wâé naa, ke lé taa kong ni itihe toki pwohewii pace ataunuhi apulie. Kehe pwocoon me lé taa a pwooti te Padué!

¹⁰Ke é te pé ne huîng ati ninaa, be me de nina e pipégalilé wo Padué. Ke me woélé mwo, ke me celuimilé mu ko Kériso lésu, ke me lé mulie ha *a wâé na ubwo [te Padué] dieli mwo.

¹¹Be a juuju a pwooti [na nye mu pii pie]: Hemepie genye mele me lésu, ke genye o te mulie mwo *me weeng*.

¹²Ke é hemepie genye cumang, ke genye o pihuô me weeng. Kehe mepie muhi tenye kon, ke weeng mwo, ke o te muhi ten konye.

¹³Kehe mepie time nye uce cumang, kehe icehi ana weeng, ke e te cumang. Be weeng ke e te mu ha a bwo mu ten.

Pipwocile nina lé â ité koja a juuju

¹⁴Go paniimihi ni pwooti naa te ati [lépwo acéih]. Ke go pii me mwoiu telé ne he pwahamii Padué pie, me lé nemwo pitaacunaado. Be te ju piticenaado ne ko ni pwocihe naa, be e pwotahi ne ko lépwona lé ko tabemi.

¹⁵Wogo, ke go mwoiu ne he ni penem dem, ke go pii ehi a pwooti na juuju, beme e o pipwodéén wo Padué ko a penem dem, ke me time o uce tanim go kon.

¹⁶⁻¹⁷ Go nemwo mu pele lépwo apulie na lé uti ni jepule na te ju piticenaado ne kon, pwohewii Iméné me Filète. Be ni pwooti naa, ke pwohewii ni ahinaado ne he ni éewé na tee piubwo ngen. Ke e pébé ni huô na time e uce paciiti Padué.

¹⁸Kehe é ne ko lupwona, ke lu caa piâ ité koja a juuju, be lu pii pie, lé caa mulie cemwo wo lépwo amele, [ke o caa te tice mulie cemwo celi me nye ucéih]. Ke me lu wonaa, ke lu pwotahi ni céhi te ni bée apulie.

¹⁹Kehe e te mu mang a paan na e ne wo Padué. Weengi ni pwooti na pii ne kon: *Wo Padaame, ke e te temehi nina te ni apulie ten [ke e te alih ni penem delé me den]. Nahoum 1.7* Ke a céiu mwo: «Ke wo pana e pii pie, pa apulie te Padué, ke wâé heme e piâ ité koja a ta.»

²⁰Ha a mwa te paceli te junihe pipwonaado ne kon, ke time e o uce mu hen cehi ce tam celi ubwo a cuhin. Kehe o te pwo mwo ce tam pule, be te ni pihe ati ni tan. Ke ni tam na junihe wâé, ke ni pihe ni tan na genye pwo ni piwiinaado hen na ubwo.

²¹Ke hemepie go pétaabwon ni ta pwo tem mu ha a pwonimem, ke ni cémun na gele, ke go o pwohewii a tam na wâé me de Padué. Ke e bo pééko me pa bépenem den. Ke o bo hiwon ce pétaapwo penem celi wâé celi e bo pwo ne kom.

Go cela ko a ta me a gele

²²Go cela ko ni bwo niimihinaado na ta te ni ewa, go Timoté. Ke go hane me go mulie ha a mulie na mwomwon ne ha a céhi, me a pipwoééhe, me a péém. Be weengaa a bwomu te lépwona lé paciiti Padaame, mu he ni ju pwonimelé na wâé ne he pwahamiin.

²³Go nemwo pipéce ne ko ni picihe na tice ânen, ke piticenaado ne kon, be e âbé mu ko ninaa ni pitaacunaado.

²⁴Kehe wo pana e pipwoeabwé te Padaame, ke wâé heme time uce pa ataacunaado. Ke wâé heme bwala nang, ke me e pé ne kon ni naado na lé pii ne kon. Ke me e temehi pacémunilé ehi.

²⁵Be wâé heme e temehi cihe me bwala ne ko lépwona lé cubwonieng. Ke é mulang, ke e bo picani telé wo Padué me lé pininim, ke me lé temehi a juuju.

²⁶Ke lé o bo wie mu he ni pwojé te *Caatana na e teko imwilé. Ke o caa time lé uce pwo nina nimen kon, be caa wâé ni bwo niimihinaado telé.

2 Timoté 3

O hiwon nina lé pipwohuô

¹Wâé heme go temehi pie, he *ni bénebwéne tan, ke o caa tuierbé ni benaamwon na binyi.

²Be ni apulie ke [o te junihe ta jélé]: Lé o te piniimilé cehi; Ke o wâé telé a mwani; Ke ubwo ni pwonimelé, ke lé o pipii delé; Ke lé o pii me ta Padué; Ke o time lé uce piténede lu nyaa me caa telé; Ke o caa time lé uce pwo-olé. Ke o time lé uce paciitih i naado na iitihi;

³Ke mwoiu ni pwonimelé, ke te tice pipwoééhe kolé; Ke lé pii me ta lépwo béén; Ke lé mulie hauli; Ke lépwo a-okéé; Ke lé cubwonihi ni naado na wâé;

⁴Ke lé icu lépwo bélél; Ke lé o pwohewii lépwona pipenem ni punilé; Ke lé pipwohauli; Ke wâé telé a pipwodéén ité koja Padué.

⁵Ke lé o gahe pwo me lépwo apulie te Padué, ke lé âcehi ni bwomu te ni acéhi, kehe icehi ana o te tice niihe ni céhi telé [ne he ni mulihelé]. Ke go cela ko ni apulie na lé wonaa!

⁶[Ke mwo teko wonaa jenaa] be lé mwo te picedi pwomwo wo lépwo béén mu kolé, ke lé pihaami ni toomwo na time uce mang ehi ni céhi telé. Be ni toomwo naa, ke lé te niimihi pie nihe ubwo ni ta pwo telé, be te nihe gaale ni pwonimelé ne ko ni pétaapwo naado.

⁷Ke lé tee cuwo ko picaa ni naado, kehe pwocoon me lé temehi a juuju.

⁸ Lépwo apipune agele naa, ke lé pwohewii Janès me Jambrès, na lu cuwode *Moosé bwolihi. Be ni apulie na lé mu cubwonih a juuju. Ke time uce wâé ni bwo niimihinaado telé, be te tice paa a céhi telé.

⁹ Kehe icehi ana time lé o uce â ité. Be ni apulie ke lé o bobe alahi a bwo pipwohauli telé, pwohewii ali lé alahi ne ko Janès me Jambrès.

Ni cémun ne te Timoté

¹⁰ Kehe icehi ana wogo go Timoté, ke go caa te nihe temehiéo, ke [wâé heme] go âcéing na ati he ni naado: ni cémun dong, ke ni bwomu tong, me ni bwo niimihinaado tong; ke a céhi tong ne ha a bwo uca tong; me a pipwoééhe tong, me a bwo cumang dong.

¹¹ Go te temehi mwo a bwo pwotahinaado ne kong, ke ni picani na é mu hen, ne Antioche ne Pisidi, ne Ikone, ke é ne Listre. Kehe icehi ana e te celuimiéo mu he ni naado naa wo Padaame.

¹² Ke te wâé, be heme nimenye me nye âcéi Kériso lésu, ke me nye mulie ha a mulie na wâé te Padué, ke lé o te pwotahinaado ne konye.

¹³ Kehe é ne ko lépwona ta jélé me lépwo apipwohuô, ke lé bobe te junihe pwo kuti nina ta. Ke lé bo pipwohuô te ni béen, kehe icehi ana o bo uce te pipwohuô telé mwo.

¹⁴ Kehe wogo, ke wâé heme go âcehi a juuju na go caa picaa, ke nina go caa céhi ne kon. Be go te temehi lépwona lé pacémunik.

¹⁵ Be go temehi ni *tii iitihi mu ha a bwo ewa go. Ke e ne tem a bwo temehinaado ko a bwo celuimikenye mu ko a céhi tenye ne ko Kériso lésu.

¹⁶ Be lé tai âbé mu pele Padué ati ni pwootti ne he ni tii iitihi, beme picaa tenye ana juuju, ke me patemehi tenye ko ni cémun na gele, ke me pamwomwonikenye, ke me e pacémunikeny ko a bwo mulie ha a mulie na wâé ke mwomwon.

¹⁷ Te é mu ko ni tii iitihi na [e penem konye wo Padué, beme] wogenye lépwo apenem den. Ke e pipwopweekeny beme nye pwo ati ni naado na wâé.

2 Timoté 4

Go patemehi a pwootti te Padué

¹ E bo âbé pihuô te ni apulie ati wo Kériso lésu, ke e bo tautilé: nina lé mwo mulie me lépwona lé caa mele. É mu ko anaa, na é huôhi ne tem ne he pwahamiin, ke é ne he pwahamii Padué pie:

² Go te cuwo ko patemehi a pwootti te Padué, ati he ni benaamwon, hemepie wâé, ai hemepie ta. Ke go pacihe lépwona lé pwo nina ta. Ke go picani ne kolé, ke go ne ni pune te ni apulie, ke go pacémunilé ehi, ke go pamwoiulé, ke go pwo ati ninaa ne ha a piuca.

³ Be e o caa tuiebé a benaamwon na o caa muhi te ni apulie me lé téne a [pwooti te Padué na] a juuju. Kehe lé o te âcehi nina nimelé kon na ta. Ke lé o tee hane lépwoce caa te cémun celi hiwon jélé, celi lé ju pii cehi nina wâé telé me lé téne.

⁴ Be bwéjé jélé ne ko a juuju, ke lé bwo te tabemi ni jepule na gele.

⁵ Kehe wogo, ke wâé heme go pipwoiipiko ne ha ati ni naado. Ke go pé ne huîim ni picani, ke go cumang. Ke go patemehi a Pwooti Wâé, ke go panebwénihi ati ni penem na e ne tem wo Padué, be wogo ke pa apenem den.

É caa pwo a pa na wâé

⁶ É ne ko woéo, ke é o caa patupwo a mulihung beme é *pwoâpwailo kon te Padué. Be e o caa tuie a benaamwon na é o caa mele hen.

⁷ É caa pwo a pa na wâé, ke é caa panebwénihi a pitéte tong, kehe é te imwi mangihi a céhi tong.

⁸ Ke é ha a benaamwon ce, ke e ko ucéiéndo na a cemung: a kuron na e bo ne tong wo pa atautinaado na mwomwon nang, ha a Tan na e bo tauti ni apulie hen. Be e bo ne te ati lépwona eânimelé ten, ke lé ucéhi a tan na e bo âmwobé hen.

Bénebwéne pwooti

⁹ Wâé heme go epin bé céiéo.

¹⁰ Be e caa engen kojaéo wo Démas, be te junihe wâé ten ni naamuu a bwohemwo ce, ke e â Tésalonik. Kehe wo Kresen, ke e â Galat; ke wo Tit, ke e â Dalmati.

¹¹ Ke te icehi Luka na ko e éni pelong. Kehe go hane Maréko, ke go toteeng me e âbé céim. Be pana e te nihe picani tong ne he ni penem na e ne tong wo Padué.

¹² É ne ko Tichike, ke é neeng nge Éfeso.

¹³ Hemepie go bo âbé, ke go bwo pébé a palito li é ne pele Karpus ha a pwomwo ubwo Troas. Ke go bo pé mwobé ni tii tong; ke go nemwo neuhi ni tii li tii ne pwo li imuto.

¹⁴ E te nihe pwo tong ni naado na ta wo Alexandre, pa acii toki. Kehe icehi ana wo Padaame, ke e bo te ne ten ce cuhi ni penem den [na ta].

¹⁵ Ke go pipwocileeng, be e te junihe cubwonihi ni pwooti teme.

Lé tai patupwoéo

¹⁶ É ha a tan na tabuhi tautiéo hen ne he mwopitaautinaado, ke te tice celi lé picani tong, be lé te tai patupwoéo. Kehe wâé heme e pineulé wo Padué.

¹⁷ Kehe icehi ana e te picani tong wo Padaame, ke e te pamwoiuéo. Ke e ne tong a niihen beme é patemehi ati a pwooti ten ne te lépwona time uce lépwo *Juif na lé mu éni. Ke e celuimiéo mu ha a pwo liô [a bwopiinen pie ha a mele].

¹⁸[Ke é te temehi pie] e o bo te celuimiéo koja ati ni bée naado na ta, ke e bo pééo da ha a Mwametau ten he *miiden. Me paunueng ke adéieng dieli mwo! Wâé heme wonaa! Amen!

Bépinelé

¹⁹Bwocu te Priscile me Akilas me a pwomwoiu te Onésifor.

²⁰E te mu Korénit wo Éraste. É ne ko Trofime, ke é âbé kojaeng ne Milet, be cunu nang.

²¹Timoté, go piepin bé, ânebuhe a benaamwon na ubwo a bwala hen. Lé pii pie me bwocu tem wo Eubule, ke Pudens ke Lin, me Klaudia, ke ati ni béénye na lé céihi ne ko Kériso na élé éni.

²²Wâé heme e pelem wo Padaame [go Timoté]. Ke me e mu pelewé ati a *pipwoééhe tice ja kon den. Adéikewé!

Tit

Tit 1

Pipwobwocu

¹Woéo Paulo [na é pwotii lé céiiko, go Tit]. Woéo pa eabwé te Padué, ke é *apostolo te lésu *Kériso.

[E pahedeéo wo Padué] beme é ne me piubwo da a céihi te lépwona e caa pipégalilé. Ke e pahedeéo, beme é patemehi a juuju ko lésu, beme lé mulie, ke me lé mu mang ko Padué.

²Ke me wonaa, ke lé o céihi me ubwo pie, e o mu kolé a *mulie dieli mwo ne pele Padué. Be ânebuhe [a bwo ne na a bwohemwo] ke e caa mi pii pie, e bo ne tenye a mulie naa, ke time e uce gele.

³Ke é ha a benaamwon na e caa te mi pacuwoshi wo Padué, pa *aceluimikenye, ke e caa patemehi a pwooti ten naa, ke e pahedeéo beme é pipatemehi.

⁴Wogo Tit, ke go pwohewiin heme te pa ju naîng, mu ko a céihi na e pineibukenyu. Wâé heme e mu kom a pipwoééhe me a péém na e âbé mu ko Padué henye me Kériso lésu, pa aceluimikenye.

Go pé ehi ni acéihi

⁵É he li é pineko ne pwo a één Krète, ke é pii tem pie, me go bo tee panebwénihi ni penem denyu nelang. Be wâé heme go ne ce apihuô te ni acéihi, ne he ni béé mwopopwaalé.

Pipégali ehi ni apihuô

⁶⁻⁷ Mepwo é ne ko pa apihuô te ni acéihi, ke wâé heme a mulihen, ke me pipwoiipihi, ne ânebuhe ni apulie ati, beme te tice celi me tautieng kon: Me e te mu ehi ko ê mwoden; Me time e uce pipaunueng; Me time uce pa aûdu; Me time uce pa a-okéé, me pa apiipié; Me time e uce pipwohuô beme hane mwani; Ke wo lépwo naîn, ke me lépwo acéihi ne ko lésu, ke me lé piténelé, ke me time lé uce mulie hauli.

⁸Wâé heme: E hegi ehi ni apulie na lé tuie ne pelen; Ke me eânimén ko ni naado na wâé; Ke me e pininim ehi; Ke me e mwomwon ke e pipwoiipieng.

⁹Ke wâé heme e âcehi a pwooti na juuju, na patemehi [te ni acéihi]. Ke me wonaa, ke o juuju a pune, na e ne te ni apulie, ke e pamwoiulé kon. Ke o jan me e patemehi te lépwona lé pwobwonihi a pwooti.

Go capuhi ni pwo ni agele!

¹⁰ Te nihe hiwon ni apulie na time lé uce piténedehi, ke lé pigeti ni apulie ko ni pwooti telé, na piticenaado ne kon. Lé te nihe mu pele ni Juif na lé caa céihi [ke lé wâgo ko ni béén pie, me *pwotegoop telé].

¹¹Wâé heme go capuhi ni pwolé. Be lé pacémuni ni apulie ko ni naado na time uce ni juuju, ke lé pwo me pipenem a céhi te ni pwomwoiu. Ke a céiu mwo, ke lé hane mwani ko ni gele na lé pii.

¹²Be te pa céiu apulie pitemang mu pele lépwo apulie Krète, na e pii ko ni béisne ha a puapulie ten pie: «Pa apulie mu Krète, pa agele, me pa apwoemaan. Te nihe pa awiinaado. Time e uce piténedekenyé; pa wota apiwii!»

¹³A pwooti naa, ke te a juuju. É mu ko anaa kuti, ke wâé heme go pacuwolé me péélelé, beme mwomwon a céhi telé.

¹⁴Ke go pii telé pie, me lé nebwén na lé tee tabemi ni jemaa ke ni huô na gele te ni bée *Juif. Be lé jéilé ne ko a juuju.

¹⁵[Lé paciitihi me nye nemwo wii ni bée wiinaado. Kehe icehi ana nye temehi pie]: Ati ni naado, ke wâé ne te nina wâé ni pwonimelé. Te tice celi wâé ne te nina ta ni pwonimelé, *me* nina muhi telé me lé céhi. Wonaa, be ta ni bwo temehinaado telé, me a *pwocihe na e âbé mu he ni pwonimelé. [Be time lé mu uce téele pineitééhi nina wâé me nina ta.]

¹⁶Lé pii pie lé temehi Padué, kehe icehi ana é ne he ni bwomu telé, ke lé piâ ité kojaeng. Time lé uce piténedeeng, ke muhi ten ko nina lé pwo. Piticenaado ne ko ati ni penem delé, ke caa te junihe pwocoon me lé pwo ace céiu naado celi wâé.

Tit 2

A bwo pacémuni ni acéhi Ni ukéiu

¹Wogo, go Tit, wâé heme go pacémuni lépwo apulie ko ni cémun na mwomwon.

²Go pacémuni ni ukéiu aiu, beme lé pipwoiipilé, me pipwocilelé. Ke wâé heme lé mulie ne ha a céhi, me a pipwoééhe, me a piuca.

³Ke go pii te ni ukéiu toomwo pie, wâé heme lé cile ehi a mulie na wâé ne ale Padué. Ke lé nemwo pipii apulie, ke lé nemwo nihe ûdu tabe megele. Wâé heme lé habwii ne he ni bwomu telé, ni naado na wâé me nye pwo.

⁴Ke wâé heme lé pacémuni ni toomwo na pwo ni aiu helé, beme: Lé pipwoééhe ni aiu helé, me ni naîlé;

⁵Lé pipwoiipilé; Lé penem ehi ne he ni pomwa telé; Lé pwo me piwahin jélé ne ko ni aiu helé. Ke me wonaa, ke ni apulie, ke me time lé o uce pii me ta a pwooti te Padué.

Ni ewa

⁶Go pamwoiu ni ewa, beme lé pipwoiipilé.

⁷Ke wogo mwo, na ati he ni bwomu tem, ke wâé heme go habwii telé ni ju bwomu tenye. Ke go pacémunilé, ha a ju pwonimem.

⁸ Wâé heme ni pwocihe tem, ke me juuju, ke wâé, beme time lé o uce pipiiko. Ke wo lèpwo apwotahinaado ne konye, ke me o tanim jélé, be o te tice celi lé tooli me lé pipii me ta genye kon.

Ni apenem tice ja kon

⁹ Wo [lèpwo acéihi na] lèpwo *apenem tice ja kon de ni apulie, ke wâé heme lé pwo me piwahin jélé ne ko ni caa telé, na ati he ni naado. Wâé heme lé hane ace bwopwonen me piwâé jélé me ni caa telé. Ke me time lé uce hegi ne telé ko a okéé.

¹⁰ Ke me lé nemwo bunelé. Wâé heme lé habwii telé pie lé juuju, ke lé mwomwon ne ha ati ni naado na lé pwo. Ke me wonaa, ke lé o alihi wo lèpwo apulie pie a pwooti te Padué, pa *aceluimikenye, ke a naado na nihe wâé, ke *adéihi.

A mulie na mwo coho

¹¹ Wo Padué, ke e caa habwii a *pipwoééhe tice ja kon den, beme e celuimi ati ni apulie.

¹² Ke e pacémunikenye ko a pipwoééhe ten naa, beme nye necu ati ni huô na time nye uce paciiti Padué kon, me nina te nimenye kon na ta. Ke me wonaa, ke nye mulie ha a benaamwon ce, ha a mulie na pipwoipihi, ke mwomwon, ke nye paciiti Padué.

¹³ Genye *ucéihi ne ha a céihi a tan na te nihe wâé. É ha a tan naa, ke e bo mwojuia mwo wo lésu Kériso ne ha a bwo ubwo na a wâé ten. Be weeng Padué henye, ke pa aceluimikenye.

¹⁴ E caa patupwo a mulihen, beme e tuwokenye koja ati ni bwomu tenye na ta. Ke e pwo me wogenye a puapulie ten, na caa tice ta kon, ke te cuwo ko nimen me e pwo ana wâé.

¹⁵ Weengaa ana wâé heme go pacémuni ati ni apulie kon, ke go pamwoiulé, ke go pacihelé. Be etem a mwomwon me go wonaa. Ke go nemwo uce pwo me e téétiko wo pace céiu apulie.

Tit 3

Geé hane me geé pwo ana wâé

¹ Go paniimihi [te ni acéihi na élé pelem ne Krète] pie, me lé pwo me piwahin jélé ne ko ni daame, me ni apihuô, me ni gupéno, ke me lé piténedelé. Ke wâé heme lé te cuwo ko hane me lé pwo ni penem na wâé.

² Lé nemwo pii me ta ce bée apulie. Ke lé nemwo pitaacunaado. Wâé heme lé pipwoipiilé, me bwala jélé, ke me lé pwo me piwahin jélé, ne ânebuhe ati ni apulie.

³ A juuju pie, é ha a benaamwon na mwo time celuimikenye, ke mwo te tice aceli nye temehi [ne ko Padué]. Ke muhi tenye me nye piténedeeng. Ke nye

pipatupwokenye, beme nye piâ ité kojaeng. Ke wogenye ni *apenem tice ja kon ne ko nina te nimenye kon na ta, me ni pipwodéén hauli. Nye mulie ha a mulie na ta. Nye pitaaba. Ke pimuhi tenye konye.

⁴Kehe icehi ana: E habwii a bwo wâé nang wo Padué pa *aceluimikenye, be e pipwoééhenye.

⁵ E te celuimikenye cehi ko a *pipwoééhe tice ja kon den, kehe time uce wogenye, na genye piceluimikenye ko ni penem denye. E ne me puukenyé ko a *Jenen litihí.

[E puu ni ta pwo tenye *mu* he ni pwonimenye.] E ne me nye âbeeble cemwo, ke e ne tenye a mulie na mwo coho.

⁶ E ne konye a Jenen litihí *mu* ko lésu Kériso, pa aceluimikenye.

⁷ E ne me nye mwomwon ne ânebuhen, *mu* ko a pipwoééhe ten. O mu konye a *mulie dieli mwo, be e caa mi pii, ke genye te céhi ne kon.

⁸Weengaa a pwocihe na a juuju.

Necu ni picihe ko a pwoiitihi

Nimung go Tit me go mwoiu ko pii ninaa, te ati lépwo acéhi ne ko Padué. Be me wonaa, ke me lé te cuwo ko pwo ni penem na wâé. Ke me nina lé pwo, ke o wâé heme junaado ne te ni apulie ati.

⁹Go pile ni jepule hauli ne ko ni nii ni watihenye: [ni bwo pipii delé ne ko a pwoiitihi]. Go cela ko ni pitaacunaado ko ni *patén de Moosé. Be ati ninaa, ke piticenaado ne kon, ke time uce ni naado na e picani tenye.

¹⁰Hemepie pwo pace apulie celi e pwo me time lé uce piténelé ne ni acéhi, ke go cihe ten a bécéiuhen, ke a bálohen. [Ke mepie time e uce piténedeko] ke go neeng ité koja ni acéhi.

¹¹Be pa apulie na e wonaa, ke e caa padep koja a juuju. Ke e pwo ana ta, ke e te picieeng mwo.

Bénebwéne pwooti

¹² É bo ne lé céïko Artémas, ai wo Tichike. Ke mepie e tuie lé, ke go piepin ko âbé tooéo ne ha a pwomwo ubwo Nikopolis. Be nimung me é mu lang, ha a benaamwon ko ta-amu.

¹³Ke go picani te Zénas pa avoka, me Apolos, ke geé piwâam ko a bwo engen delu kojakewé, beme o te tice celi tice telu.

¹⁴Be me wonaa, ke ni acéhi bénye [ne Krète] ke me lé picaa a bwo pwo ne nina wâé, beme lé picani te nina tice telé. Be wâé heme pwo ce acehi ni penem delé.

Bépinelé

¹⁵Ati ni acéihi na élé pelong, ke lé adéiko. Ke go pwobwocu te ni ju bélénye ne ha a céihi, na élé lang. Ke me e mu pelewé ati a pipwoééhe tice ja kon de Padué. Adéikewé!

Filémon

Filémon 1

Pipwobwocu

¹Woéo Paulo na é pwotii lé céiiko, go Filémon, pa béiseng ko a penem, na te nihe eânimung dem. É ko mu he karépu, mu ko ni penem dong me de *Kériso lésu. Ke [e ne bwocu tem mwo] wo Timoté, pa céiu acéhi béisenyu.

²Ke [go ne a bwocu temu] te Apia, ê céiu béisenyu, ke wo Arkipe, pa béisenyu ko pwopa [me de Padaame henye lésu Kériso]. Ke [go pwobwocu mwo] te ni béisé acéhi, na lé pineibulé ne he pomwa tem.

³Wâé heme etewé a *pipwoééhe tice ja kon me a péém na e âbé mu ko Padué Caa tenye me Padaame henye lésu Kériso. Adéiko!

A pipwoééhe me a céhi te Filémon

⁴Tee ati he ni benaamwon na é mu pwoiithi hen, ke é pwo-olé te Padué kom.

⁵Be é téne ni jepule ko a céhi tem ne ko Padaame lésu, me a bwo pipwoééhe tem ne ko ati ni acéhi.

⁶É ilehi koja Padué pie, wâé heme te nihe ubwo da a pipwoééhe tem ne ko lèpwo béisém acéhi. Ke ni apulie, ke lé o alih ihi ati ni pétaapwo naado na wâé, na e konye, mu ko Kériso.

⁷Te nihe pipwodéén a pwonimung, go pa ju béiseng, ko a pipwoééhe tem. Be go pwopweehi ni pwonime ni apulie te Padué, ke anaa kuti ana e pamwoiuéo.

Go hegi mwo Onésime

⁸[É mu ko a pipwoééhe tem] ke time é uce pi-imwiéo, me é ilehi kojako [pie, me go hegi ehi pa ju béiseng]. Te jan ne kong me é pihuôhi ne tem anaa, ne he nii Kériso.

⁹Kehe icehi ana é te ju ilehi kojako, be te nihe eânimung dem, woéo Paulo, na caa pa apulie pwonimung, ke é ko mu he karépu, [mu ko ni penem dong] me de Kériso lésu.

¹⁰Weengi ana é ilehi kojako: Me go hegi mwo pa *apenem tice ja kon dem [li e cela kom]: wo Onésime. Be [caa pa acéhi] he é mu éni he karépu. Ke caa pa naîng ne ha a céhi.

¹¹[A nii Onésime, ke a bwopiinen pie ‘pa apicani tenye’] Ke é hemepie time e uce picani tem ânebun, kehe é jenaa ni, ke e te nihe picani tenyu.

É neeng mwo lé céiiko

¹²⁻¹³Be pana te junihe e ha a pwonimung. Ke te nihe nimung me é te imwieng ne éni pelong, ha a benaamwon ce, beme e mwo picani tong, he mwo ko tieko. Be é mwo mu he karépu mu ko [a bwo patemehi nen dong] a *Pwooti Wâé te lésu Kériso. Kehe icehi ana é o neeng mwo lé céiiko,

¹⁴hemepie nimem. Kehe time é o uce wonaa hemepie te muhi tem. Be wâé heme go hegieng ha a ju pwonimem, kehe me time uce é mu ko a bwo huôhi ne tem dong.

¹⁵A juuju pie, pwo a céiu benaamwon na time geu uce pimu ibu hen. Wieli me wonaa, beme geu bo pimu ibu mwo dieli mwo.

¹⁶Be é jenaa ni, ke caa time uce pa apenem dem cehi, kehe caa pa âjiénenu mwo ne he nii Kériso. Caa pa ju bééng, ke wogo, ke wâé heme go te nihe piwâéeng. Be pa apenem dem, ke a céiu mwo, ke caa pa acéihi béém ne ko Padaame.

Go hegieng pwohewii ne kong

¹⁷Hemepie junaado ne tem pie wogenyu lupwo béis [ne he nii Kériso] ke go hegieng mwo, pwohewiin heme woéo.

¹⁸Ke mepie e bune ace céiu naado kojako, ke mepie e pwo ace naado celi time uce wâé, ke go ne he niing ati.

¹⁹Woéo na é tii ni atii ce, ko a ing: Woéo Paulo, na é bo pwocuhin ne tem. Kehe icehi ana wogo mwo, go pa bééng, ke wâé heme go niimihi pie, é mu kong li go hegi *a ju mulip.

²⁰É mu ko anaa, ke é ilehi kojako go Filémon pie, go pwo ana é pii, ne he nii Padaame, beme o wâé a pwonimung, be wogenyu lupwo acéihi ne ko Kériso.

²¹É caa céihi ne ko a bwo piténédehi tem. Ke anaa é pwotii lé, be é temehi pie, go o bo pwo celi nihe piubwo koja nina é ko pii lé.

Bépinelé

²²É niimihi pie [wo Padué, ke e] o caa ne me é âdé caniêkewé ati, wonaa mu ko ni pwopwoitihi tewé. Ke go pwopweehi ace nemwa celi me é mu hen.

²³E pwobwocu tem wo Épafras, pa bééng ko a mu éni he karépu, mu ko [a bwo patemehi nen den] Kériso lésu.

²⁴Ke lé pwobwocu tem mwo wo Maréko, me Aristarke, me Démas, me Luka, l épwo bééng ko a penem.

²⁵Wâé heme tai e pelewé ati, a pipwoééhe tice ja kon de Padaame henye lésu Kériso! Adéikewé!

Ébérū

Ébérū 1

Wo iésu kériso ke e piwéden (*Pwahamii tii: 1.1—4.13*)

¹ É ânebun, ke e pacihe lèpwo watihenye wo Padué, na lé pwaadeniin bé ne ni *péroféta ten, ne he ni bwopwonan na hiwon.

² Ke, é ha a benaamwon ce, na caa *ni bénebwéne tan, ke e pacihekenye ko pa Naîn. Be é mu kon, ke wo Padué, ke e tabuhi a miiden me a bwohemwo me ati ni naado na lé mu hen. Ke te weeng kuti, na e pipégalieng wo Padué, beme e bo ne ten ati ni naado naa.

³ Me genye ali pa Naîn, ke genye alihî *a wâé me a bwo ubwo Padué Caa. Be te piwielu ne ha ati ni bwopwonan. Ati ni naado na lé tuie, ke lé te tai mulie mu ko ni pwooti ten, na nihe pwojunuun. Te weeng kuti pa Naîn, li e puu taabwon ni ta pwo tenye. Ke é alecehen, ke e mwojuia daamwo he *miiden, pele Padué. Ke wo Padué, pana te nihe pwojunuun, ke e pwo me e tebwo *pwo a juin [beme e pihuôhi ati ni naado].

E piwéden koja ni âcélo

⁴ Wo Padué, ke e ne me e piwéden koja ati ni *âcélo wo pa Naîn. Ke e ne ten a nii apulie, na te nihe pwonaado ne kon, koja ati ni nii apulie.

⁵ Be time e mu uce pii te pace céiu âcélo wo Padué pie: É jenaa, ke é pii beetihî: Wogo pa naîng, ke woéo pa caa tem. *Psaume 2.7* Ke a céiu mwo: O woéo pa caa ten, ke bo pa naîng. *2 Samuel 7.14*

⁶ Kehe me e habwii pa Naîn, ne pele lèpwona lé mu pelen, ke e ne ten a mwomwon de pa bécéiuhe ewa. Ke e huôhi pie: Wâé heme ati ni âcélo tong, ke me lé tai pipaunueng. *Psaume 97.7*

⁷ Ke mepwo é ne ko ni âcélo, [ni apipenem den] ke e pii wo Padué pie: É ne me lè pwohewii a dan , ke me lè pwohewii ni duwele miû. *Psaume 104.4*

Pwooti ko pa Naîn

⁸ Kehe icehi ana weengi ana e pii ne ko pa Naîn: Te wogo [pa Naîng] ke wogo Padué ! O te tice pwonehi a Mwametau tem. Go bo Daame dieli mwo. O mwomwon a bwo pihuô tem.

⁹ Wâé tem a mwomwon, ke muhi tem ko a ta. Ke woéo Padué Caa tem, ke é caa pipégaliko koja ni bêém. É céhi a tabe ûde ne pwo punim. É ne tem a pipwodéén na te nihe ubwo wéden. *Psaume 45.7–8*

¹⁰ E pii mwo wo Padué ne ko pa Naîn pie: É ha atabuhi kon, ke te wogo Padaame , na go tabuhi a bwohemwo. Go pwo ko ni im a miiden.

¹¹⁻¹² O bo tieden a bwohemwo ati, me a miiden [me ati nina e mu hen]. Kehe icehi ana te wogo cehi na go o bo mu dieli mwo. Go o tapipidulé pwohewii a

*epwén. Go o capipilé pwohewii a ukéiu talihi. Te wogo cehi na go te mu cawi; go te *mulie dieli mwo.* Psaume 102.26–28

¹³ Ke weengi a céiu naado li e pii wo Padué: Go âbé tebwo éni pwo a juing.

[*É ne tem a pihuô. Ke o pipaunuko dieli mwo.*] É pwo me go caaite nina lé pipwopa ne kom. Psaume 110.1 Kona geé niimihi pie, e pii anaa te pace céiu âcélo ten? [Ûhu! E pii anaa te pa Naîn!]

¹⁴ Be mepwo é ne ko lèpwo âcélo, ke te ju ni apipenem cehi. Be e pahedelé wo Padué, beme ni apicani tenye, wogenye na e bo celuimikenye.

Ébérû 2

E pébé a pwaaden @ na te nihe pwonaado ne kon Nemwo pwo me piticenaado ne kon

¹ É mu ko anaa, ke wâé heme genye engen ehi, cehi ni pwooti na genye téne. Be koli genye bo piâ ité kojan.

² Be é ne ko ni *patén de Moosé, ke e habwii pie a juuju, ke e pwo me lé pwocuhinaado ati wo lèpwona time lé uce ju âcehin.

³ Kehe icehi ana [wo Padué, ke] e caa ne tenye a pwaaden na te nihe pwonaado ne kon! Ke genye o woté ko ace bwo cela tenye ko a cuhinaado, hemepie time genye uce âcehi a pwaaden naa?! Be te wo Padaame lésu li e mi patemehi a pwaaden. Ke wo lèpwona lé téneeng, ke lé *pajuujuhi ne tenye.

⁴ Ke wo Padué mwo, ke e pipajuujueng ne ko ni *inenaado na pwojunuun: ni naado na lé o téetihî ne ni apulie. Ke e muko ne ni âpipati, na e pwaadeniin bé na a *Jenen litihî, âcehi ana nimen kon.

E pwo me piwahin nang me denye

⁵ É ko pacihékewé ko a Mwametau na e o bo tuie. Ke o time uce ni âcélo na e bo nelé me lé pihuô nelang wo Padué.

⁶ Be e pii ten wo pa céiu apulie, ne ha a céiu duaan ne he ni *tii iitihi pie: Woo pa apulie, beme go o niimieng, [go Padué]? Ke é mu ko ade na eânimem de pa nahi apulie ?

⁷ Go pineeng ole koja lèpwo âcélo ha a cuwo benaamwon. Go ne ten a kuron he daame. Go pwo me pipaunueng.

⁸ Go tai ne haahi ni an

[*me e pihuô ne ko ati ni naado.*] Psaume 8.5–7 Be te tice ace céiu naado celi e o mu ité koja ni pihuô ten. Kehe icehi ana é jenaa, ke genye te ju alihî ehi, pie mwo time uce cuwo ati ni pwooti naa.

⁹ Ke genye alihî mwo pie, e caa neole lésu haahi ni âcélo, ha a cuwo benaamwon. Be e mu he ni picani, ke e mele me denye, ati ni apulie, é mu ko a *pipwoééhe tice ja kon de Padué. Ke é mu ko ana e pwo wo lésu, ke caa ne

ten a kuron: a bo lépwo daame. Ke genye alihie pie pipaunueng [pwohewii a pwootii naa, ne he ni tii iitihi].

Pa cuwo ati ni naî Padué

¹⁰Wo Padué, ke e ne ati ni naado me den, ke e tee ko wéa kolé. Pwo ni bée naî Padué mwo, na te nihe hiwon jélé [wogenye kuti]. Ke wâé ten, me genye tai mu ha a bwo ubwo na a wâé ten, na e pipwaadeniin bé a bwo mu he ni picani te lésu me a bwo mele ten. Ke é mu ko anaa kuti, ke wo Padué, ke e ne te lésu a atebwo na hején, ke jan ne kon. Be wo lésu, ke Padaame na e *celuimi ati ni naî Padué, ke e pipéelé nge [ha *a ju mulip].

¹¹Te wo lésu kuti, na e pwo me pwéélang ni pwonimenye, ke e péékenye, wogenye ni apulie ten, nge céii Padué [pa caa ten] beme céiu pa caa tenye ati me weeng. É mu ko anaa kuti, na time uce tanim nang me e pii konye pie ni âjiénen.

¹²Be weeng na e pii te Padué pie: É *bo pipatemehi a niim te lépwo âjiénung*. É *bo pwonyebi ko ni nyebi tem, heme lé pitapitilé* .Psaume 22.23

¹³Ke e pii mwo pie: Woéo mwo, ke é *bo céihi ne ko Padué*. Ésaïe 8.17 Ke a céiu mwo: Woéo-ni, me ni béén na e nelé tong wo Padué, beme ni naîng. Ésaïe 8.18

E pé a éé apulie pwohewiikenye

¹⁴Wogenye ni naî Padué, ke tai etenyé ati, a éé apulie na e bo mele. Ke e pé a éé apulie wo lésu, beme e pwohewiikenye. Ke e caa mele me denye, beme e pétaabwon a junuu *Caatana, pana e pwo me genye mele.

¹⁵Ke me wonaa, ke e tuwokenye koja a bwo mwotikenye ko a mele, na genye teko mu hen ânebun, ati he ni tan.

¹⁶Genye temehi ehi pie, time e uce âbé wo lésu beme e picani te ni âcélo. Kehe e âbé picani te ni piebehi *Abéraama.

¹⁷Ke e pipwohewiikenye, ne ha ati ni bwomunen. Be [mepie time uce wonaa, ke wieli o time uce jan me] pa apipépwooti ha awiemenye me Padué. Ke e caa *apwoâpwailo ubwo tenye, na e piténede Padué, ne ha a bwo penem den. Ke e pipwoééhenye [wogenye na tice niihenye]. Ke e pwo a âpwailo, beme pineuhi ni ta pwo tenye.

¹⁸Ke te jan me e picani tenye, hemepie e tuiebé ne konye ni tacebwén. Be e temehi ni tacebwén, me ni picani mwo.

Ébérú 3

E piwéden koja Moosé wo lésu

¹Ni acéihi bééng, wo Padué, ke e caa todekewé, beme geé apulie ten. Ke wâé heme geé nenimewé ne ko lésu, be pa watihe a céihi tenye. Be e neeng bé céiikenye wo Padué, beme pa *apwoâpwailo ubwo tenye.

²Ke e piténede Padué na e pipégalieng, ke e penem den ehi pwohewii *Moosé, he li e penem me de ati a puapulie te Padué, a mwa ten.

³Kehe icehi ana te nihe pwonaado ne ko lésu, ke wâé heme te nihe pipaunueng koja Moosé. Be pa abahi mwa, ke e te nihe piwéden koja a mwa.

⁴Be muko pétaapwo ni mwa, ke te pwo ni abahi mwa, ke te wo Padué, na e pwo ati ni naado.

⁵ Mepwo é ne ko Moosé, ke te nihe pa apenem ehi, ne ha ati a mwa te Padué, ke e te nihe piténedeeng. Kehe icehi ana te ju pa apenem cehi. Be te ju pa déme ati nina e bo patemehi wo Padué, alecehen.

⁶Ke wo *Kériso, ke pa *Naî Padué ne ha a mwa te Padué, ke ne ten a pihuô. Ke a mwa naa, ke wogenye, hemepie genye te *ucéihi ne ha a céihi, ke genye imwi mangihi a céihi tenye.

Hegi a ju péém na e pébé wo lésu Nemwo pwohewii ni Isaraéla

⁷ É mu ko ninaa, ke [wâé heme nye piténedehi] nina e pii na a *Jenen litihí pie:
Me geé téne a pwoto te Padué ha a tan jenaa,

⁸ ke geé piténedehi ! Geé nemwo bitekewé kojan pwohewii [ni *Isaraéla] ne ha a melé . Be muhi telé ko Padué helé, ke lé ne jéilé ne kon. Lé tee pipwopwocihe ko ni bwomu telé.Psaume 95.7–8

⁹[Ke te piwien mwo me ana e pii ne kolé wo Padué, pie]: Lé tacebwéniéo ne ha a melé wo lépwo caa tewé, ke lé alihí ana é pwo

¹⁰ ne he na 40 ni jo. É okéé ne kolé, ke é patemehi pie: “Lé ne jéilé ne kong, ke time lé mu uce piténedeéo !

¹¹ O time lé bo uce tuie nge ha amwaale tong,
[a péém] na é caa pipwopweehi!”Psaume 95.9–11

Nye nemwo pwo me mwoiu ni puninye

¹²Geé pipwocile, wogewé ni bééng! Be mepie geé cile ni âniimihinaado na ta, ke mepie muhi tewé me geé céihi, ke wieli geé bo piâ ité koja Padué na e mulip.

¹³Be a ta na genye pwo, ke e pahaulikenye, ke e pwo me mwoiu ni puninye [ke e pwo me genye bitekenye koja Padué]. Ke anaa, na me geé te pipamwoiukewé ibu, beme time e uce tuiebé kowé ninaa! Ke geé wonaa ati he ni tan. Be a tan naa, [na caa te tii ne he ni tii iitihi] ke caa te é jenaa [kehe time bo uce é meé]!

¹⁴Genye caa bée Kériso, wogenye na nye céihi ne kon. Ke wâé heme genye imwi mangihi a céihi naa, pwohewiin he li genye céihi, die ha a pwonehin [beme o pwo ce denye mu ko nina eten].

¹⁵ Ke [genye nemwo pineuhí ana genye] pine ne he ni tii iitihi pie: Me geé téne a pwoto te Padué ha a tan jenaa, ke geé piténedehi! Geé nemwo bitekewé kojan pwohewii [ni Isaraéla] ne ha a melé.Psaume 95.7–8

Time lé uce tuie nge ha amwaale

¹⁶ Wooélér lèpwona lè téne a pwoto te Padué, ke li lè bitelé ne kon? Te wo lèpwo watihenye kuti, li e péélér wie wo Moosé mu ha amu *Aigupito,

¹⁷ ke li e ne a pwo-okéé kon wo Padué, ne he na 40 ni jo. Te woélér, li lè pwo ana ta ne ha a melé, ke li lè tai mele nelang.

¹⁸ Ke te woélér, li e apwolé wo Padué pie, o time lé uce tuie nge ha amu li e caa pipwopweehi me delé.

¹⁹ Ke caa time lé uce tuie nge ha amwaale [me a péém] te Padué mu ko ana muhi telé me lè céhi ne kon.

Ébérū 4

¹ Wo Padué, ke e caa mi pii [te ni watihenye] pie: «É bo péékewé nge ha amwaale [me a péém] na é caa pipwopweehi me dewé.» Ke ana e caa mi pii, ke e caa cuwo me denye jenaa. Ke anaa, me genye pipwocile, be koli e bo tauti ce béén mu konye wo Padué, be e bo pii pie, time lè bo uce tuie nge ha amwaale ten.

² Be caa te patemehi tenye a pwooti na wâé [ko a amwaale naa] pwohewiilé. Kehe icehi ana woélér, ke te tice ceme a pwooti na lè téne, mu ko ana time lè uce hegi ko a céhi.

³ [Weengaa a watihen me] e pii wo Padué pie: É okéé ne kolé, ke é patemehi pie: O time lè bo uce tuie nge ha amwaale tong,
[a péém] na é caa pwopweehi!Psaume 95.11

Tehi ne tenye a amwaale naa

Kehe icehi ana wogenye na nye céhi, ke genye o hegi a ju mwaale me a péém de Padué [na e caa nebwén ko pwopweehi wo Padué ha atabuhi kon]. Be ati ni âniimihinaado ten ne ko ni penem na e bo pacuwohi, ke caa hején, ânebuhe a bwo tabuhi na a bwohemwo.

⁴ Genye te pine mwo ne ha a céiu duaan ne he ni tii iitihi [li e pwo wo Padué, ha atabuhi kon]. Be caa tii pie: E mwaale wo Padué ha a bê7 he ni tan, alecehe ni penem na e pwo. Genèse 2.2

[Weengaa a bê7 he ni tan ha a naadenitan.]

⁵ Genye mwojuia ne mwo ko a niide a tii, li e pii pie: O time lè bo uce tuie nge ha amwaale tong,

[a péém] na é caa pwopweehi!Psaume 95.11

⁶ [Me genye pine anaa, ke genye te temehi pie] te pwo amwaale [me a péém] na e caa pwopweehi wo Padué. Ke genye caa alihi pie, ni béén na lè caa mi hegi a pwooti na wâé [ko a amwaale naa] ke time lè uce taa hen, be time lè uce piténédeeng.

⁷Ke anaa kuti, na e ne a céiu tan wo Padué [beme lé o hegi a ju péém den wo lépwo bée apulie]. Ke a tan naa, ke “é jenaa”! Ke ali e pii, ne ha ali niide a tii, ne he ni tii iitihi pie: *Me geé téne a pwoto te Padué ha a tan jenaa, ke geé piténedehi !Psaume 95.7–8* Ke a pwootti naa, ke caa junihe bwolihi, ke wo pa daame *Davita na e pwaadeniin mwobé [ne ko a bwo engen de ni ukéiu tenye ne ha a melé].

⁸ Ana genye alahi pie, a amwaale [me a péém] ke time uce a amu li e péélé nge hen wo losua. Be mepie wonaa, ke wielu time e bo uce cihe mwo ko ace céiu tan wo Padué.

⁹⁻¹⁰ É mu ko anaa, ke pwo amwaale [me a péém] tenye, ni apulie te Padué. Ke genye o taa hen, ke genye o bobo mwaale koja a penem denye. Ke genye o pwohewii Padué, li e mwaale ha a bé7 he ni tan [alecehe a bwo pwo nen den a bwohemwo].

¹¹Mepie wonaa, ke wâé heme genye hane ne he ni ju pwonimenye me genye hegi a ju péém de Padué. Ke genye nemwo pioi ko ni watihenye [légwo *Isaraéla] be li lé cibe. Be wo pana time e uce piténede Padué, ke e piâ ité.

A pwootti te Padué ke a teua

¹² A pwootti te Padué, ke te nihe pwojunuun, beme e penem konye. Be e pwohewii a teua, na te nihe ânyee lupwo piduaan, be e tahagéi die ko ni acipetééhi konye, ke é die ko ni béle he duunye. Be e gaale die ko ana nimenye kon, me a âniimihinaado na e ha aduwo, ne he ni pwonimenye. Ke e [pwo me pwéélang kolé, me] tautilé.

¹³ Be te tice ace céiu naado, me pace apulie celi e ha aduwo ne ko Padué. Be weeng na e nelé ati, ke e te temehi a bwopwonen ne kolé. Ke te weeng kuti, na genye bo cuwo he pwahamiin, me habwii ten ati ni penem na genye pwo.

wo iésu ke pa apipépwooti hadeniinye me padué

(*Pwahamii tii: 4.14—10.18*)

E te temehi a bwo tice niihenye

¹⁴ [É ko pii tewé pie] wo Iésu, pa *Naî Padué, ke pa *apwoâpwailo ubwo tenye, na e caa taa he miiden [beme pa apipépwooti hadeniinye me Padué]. É mu ko anaa, na wâé heme genye imwi mangihi a céihi tenye ne kon.

¹⁵ Time uce pa apwoâpwailo na e ité kojakenye, be e te temehi ehi a bwo tice niihenye, be te tacebwénieng, ne ko ati nina tacebwénikenye kon. Kehe icehi ana time e uce tupwo ne hen, ke time e uce pwo celi ta.

¹⁶ É mu ko anaa kuti, na me time uce piwâ genye, me genye âbé ne he pwahamii Padué, Padaame [na e pwaadeniin bé wo Iésu]. Be genye o bo hegi a *pipwoééhe tice ja kon den. Ke e bo picani tenye [wogenye na tice niihenye] ke e bo te nihe pwo celi wâé ne konye, ha a benaamwon den.

Ébérū 5

Wo Padué na e ne ten a penem den

¹Pa *apwoâpwailo ubwo, ke pa apulie na pipégalieng, beme pa apipépwooti hadenii ni apulie me Padué. Be e ne te Padué ni âpipati me ni âpwailo, beme pineuhi ni ta pwo te ni apulie.

²Ke [te pa apulie] pwohewiilé, ke e temehi a bwo tice niihe ni apulie. Ke bwala nang ne kolé, ke e pipwoééhelé, heme lé piâ ité, mu ko a bwo time uce temehi nen delé.

³Ke, é ha a benaamwon na e pwo a âpwailo me pineuhi ni ta pwo te a puapulie, ke e pwo a âpwailo me den mwo, mu ko ana te pa apulie mwo na tice niihen, pwohewiilé.

⁴Be te tice pace apulie celi me e te picaamada mu kon, beme pa apwoâpwailo. Be a penem na te nihe pwonaado ne kon. Kehe te icehi Padué na jan ne kon me e pipégali pace apulie, pwohewii a bwopwonan den ne ko *Aarona.

⁵Piwien ne ko Kériso. Be time e uce pipaunueng mwo. Ke te wo Padué na e neeng me pa apwoâpwailo ubwo. Be e pii ten pie: *É jenaa, ke é pii beetih: Wogo pa Naîng, ke woéo pa caa tem.* Psaume 2.7

⁶Ke genye pine [ne ha a céiu niide a tii ne he ni tii iitihi] ana e pii wo Padué pie: *Wogo pa apwoâpwailo dieli mwo, âcehi a bwopwonan de Melkisédek.* Psaume 110.4

E piténedehi wo Kériso he ni picani

⁷É he e mwo mulie ne éni pwo bwohemwo wo lésu, ke pwo a benaamwon na e é me toii da céii Padué pie, me e celuimieng [koja a bwo mele ten]. Ke e téne a pwopwoiitihi ten wo Padué. Be wo lésu, ke e te nihe paciitieng ke e piténedeeng.

⁸Ke te pa *Naî Padué, kehe icehi ana jan me e picaa a bwo piténedehi, ko a bwo mu he ni picani ten.

⁹Ke [e piténedehi die ha anebwén kon, ke] e caa panebwénihi ati ni penem den. Ke é mu ko anaa kuti, na o caa pa aceluimi ati lépwona lé piténedeeng. Ke e ne telé *a ju mulip ne pelen.

¹⁰Ke e etieng wo Padué, me pa apwoâpwailo ubwo pwohewii Melkisédek.

A bwo paténe lépwo acéhi

¹¹Hiwon ni naado na nimung me é pii tewé ne ko [a bwo piwie lésu me Melkisédek]. Kehe icehi ana time geé uce temehi, be wogewé lépwo apwoemaan, ke time geé uce pininim ehi [ne ko ni céhi tewé].

¹²Caa bwolihi [na geé céhi, kehe icehi ana mwo te junihe wahin ni bwo temehinaado tewé, ne ko a pwooti te Padué. Ke mepie geé te cumang] ke me geé caa ko pacémuni lépwo béen. Kehe wogewé, ke mwo te lépwo acémun, ke mwo time geé uce nihe ân. Geé pwohewii ni cuwo nahi ewa na lé mwo dile. Be mwo time lé uce wii ce wiinaado celi mwoiu.

¹³⁻¹⁴Ke wo pa [acéih] na e wonaa, ke mwo time uce jan me e pineitééhi ana juuju me ana ta. Kehe wo pana e cumang [ne ha a céih] ke e temehi, be e caa mulie hen, ke e picaa. Ke jan me e wii a wiinaado na mwoiu.

Ébérū 6

Genye pitaa koja ni cémun ânebun

¹⁻²Wâé heme wogenye ni apulie, na genye cumang ne he ni céhi tenye ne ko Kériso. Genye pitaa koja ni cémun ânebun, li genye caa hegi, ke li genye caa céhi ne kon: A bwo pininim me a bwo bitekenye koja ni bwomu tenye na ta, na lé péékenye nge ha amele; A bwo céhi ne ko Padué; A bwo *pipuu apulie; A bwo ne inye [ne ko pana e mwo ju pineeng]; A bwo mulie cemwo mu ha amele, te ati ni apulie; A pitautinaado te Padué [beme e ne telé ni cemelé ko ni penem delé]. Ke mepwo é ne ko a tautinaado ten, ke o te cuwo dieli mwo. Be ati ni naado naa, ke genye caa mi picaa ânebun. Ke time o uce jan me genye mwo picaa mwo.

³Be wâé heme genye pitaa, âcehi ana nime Padué kon.

⁴Ade aceli genye pii ne ko lèpwona lé caa tupwo mwo ne ha a mulie na ta? [O caa pwocoon me lé bitelé mwo.] Be li e caa pwo me pwaale ne telé [a juuju ten]. Ke lé caa hegi ni *adéih ten, na e âbé mu he miiden. Ke e caa te e kolé a *Jenen litih.

⁵Ke lé caa te nemi mu ko a bwo wâé na a pwooti te Padué. Ke lé caa te alahi mwo, a junuu a *Mwametau te Padué, na e o bo tuie.

⁶Ke mepie lé necu ati ninaa, ke lé o te nihe pipwotahinaado ne kolé mwo. Ke o te nihe pwocoon me nimelé me lé pininim, ke me lé mwojuia mwo. Be pwohewiin heme lé cemeite mwo pa *Naî Padué ne ko a *kuricé, ke lé pwo me tanim nang, ne ânebuhe ni apulie.

⁷[Wo lèpwona lé wonaa, ke lé pwohewii a pule na ta.] Mepwo é ne ko a pule na wâé, ke e hegi ehi a ute, ke e pwo me cim ni âdaanu beme a wiinaado te ni apenem hen. Ke e adéih a pule naa wo Padué.

⁸Ke a pule na e ne me cim ni acuwo pwo dan me ni meté na ta, ke te ju piticinaado ne kon. Ke wiel i e o apwohi a pule naa wo Padué, me cini taabwon.

Geé cumang die ha a pwonehin

⁹Mepwo wogewé, lèpwo ju béoing, ke é te nihe céhi ne kowé. Be é niimihi pie, geé teko mu ha a ju pwaaden na wâé, na e péékewé nge ha a bwo celumikewé.

¹⁰Be wo Padué, ke e mwomwon, ke time e uce pineuhi a pipwoééhe tewé ne kon, me ni apulie ten. Be geé te nihe picani telé, ke geé teko cumang hen jenaa.

¹¹Ke te nihe wâé tong, heme geé teko mwoiu ko penem [ne he ni pipwoééhe tewé naa] die ha anebwén kon. Geé o bo hegi ni cemewé na wâé, na geé ucéhi.

12Ke geé nemwo pwoemaan! Wâé heme geé pipwohewii lépwona lé cumang ne he ni céhi telé. Be lé *ucéhi ne ha a céhi, die ko ana e bo ne telé ce cemelé ne ko ni penem delé wo Padué, li e caa mi pii telé.

E pacuwoshi nina e caa mi pii

13-14 É ânebun, ke e pwo a *piapwo wo Padué ne he niin, be te tice pace apulie celi nihe pwonaado ne kon kojaeng. Ke e pii te *Abérama [pa watihenye] pie: *É o te nihe adéiko. Ke é bo pwo me te nihe hiwon ni piebehiko.* Genèse 22.17

15Ke wo Abérama, ke e ucéhi ne ha a céhi ana e caa mi pii wo Padué. Ke é mu ko anaa, na e te hegí.

16Ne pelenyé ni apulie, ke me nimenye me genye habwii te ni béén pie, genye pii a juuju, ke genye pwo ace piapwo ne he nii pa apulie na te nihe pwonaado ne kon kokane. Be me wonaa, ke e pacuwoshi ni picihe hadeniilé, ke genye capuhi ni pwolé.

17Te piwien mwo ne ko Padué. Be he e pii pie, e bo adéi ni apulie, ke e te pwo a piapwo ne kon, beme e *pajujuhi ne telé nina e pii. É mu ko anaa, na lé temehi pie, lé o te hegí ana e caa mi pii, ke time e o uce pitaatééhi ana e caa pii ânebun.

18 [Be genye temehi pie, hemepie e pii pie, e bo pwo ace céiu naado] wo Padué, ke time e uce gele. [Ke mepie e piapwo ne kon, ke e te pacuwoshi.] Weengaa lupwo alo naado na me nye céhi mu kon, ke weengaa a bépamwoikeye, wogenye na genye cela nge pelen. Ke pwo niihenye me genye imwi mangihi ana e caa mi pii ânebun me denye, na nye ucéhi ne ha a céhi.

19-20 A piuca tenye naa, ke e pwohewii a pehinyu na binyi na taa me mang he ni pwonimenye. Ke e ceta ehi ne ha a duaan na junihe iitihi ne he miiden. Be wo lésu, ke e caa tehi a mwaanu ubwo na e capuhi a duaan naa, ke e mi engen kokane, beme e taa lang, [beme pa apipépwooti ha awiemenye me Padué]. Be te weeng kuti na e caa *apwoâpwailo ubwo tenye, na e pwohewii pa daame Melkisédek ânebun. Ke e bo wonaa wo lésu dieli mwo.

Ébérû 7

Wo Melkisédek ke e déme Kériso Wooélé Melkisédek?

1 Wo Melkisédek, ke pa daame ne ha a pwomwo ubwo Salem, ha a céiu benaamwo amu. Pa *apwoâpwailo te Padué henye na nihe e daaité. Ke wo Melkisédek, ke pitapitilu me *Abérama [pa watihenye] he e mwojuia mwobé mu he pa. Be e piwéden koja ni daame. Kehe me pitapitilu, ke e adéieng wo Melkisédek.

2 Ke wo Abérama, ke e ne ten a céiu duaan mu ko ni duaan na 10 mu ko nina e hegí ne ha a bwo pwopa ten. A nii Melkisédek, ke a bwopiinen pie ‘pa daame na e mwomwon’. Ke Salem, ke a bwopiinen pie a ‘péém’. Ke é mu ko anaa, na e daame he a péém mwo.

³[Time uce hiwon ni pwootti kon ne he ni tii iitihi. Be]: Time uce pii tenye luce nyaa me caa ten, *me ce watihen*. Ke time uce patemehi ace bwo âbeeble ten, *me ace bwo mele ten*. Pa ocine ko pa *Naî Padué, pa apwoâpwailo dieli mwo.

⁴Geé te alahi pie wo Melkisédek, ke te nihe pwonaado ne kon. Ke wo Abérama, pa ukéiu tenye, ke te pwonaado ne kon mwo. Kehe icehi ana e ne, ne ânebuhe Melkisédek, ni âpipati ten: a céiu duaan mu ko ni duaan na 10 mu ko nina e hegi mu ha a bwo pwopa ten.

⁵Ke weengaa a jéhi nina e pihuôhi wo *Moosé ne he ni patén den, beme o bo ni mwoto te lépwo apwoâpwailo. Ke ni patén naa, ke ni denye, wogenye ni piebehi Abérama. Ke nina genye ne, ke genye ne te ni béénye mwo, wo lépwo apwoâpwailo tenye, mu ha a pwomwoiu te Lévi.

⁶⁻⁷Ke wo Melkisédek, ke time uce pa apulie mu ha a pwomwoiu te Lévi. Kehe icehi ana e te hegi koja Abérama a céiu duaan mu ko ni duaan na 10 mu ko nina e pé. A céiu mwo: Ke wo Abérama, ke [pa apulie na ubwo nang, be] li e pwo a *piapwo ne ten wo Padué. Ke genye temehi mwo pie, pa apulie na ubwo nang, ke e *adéi pa apulie na wahin nang. Kehe icehi ana [genye pine pie] wo Melkisédek, li e adéi Abérama.

⁸⁻⁹Ke ni apwoâpwailo, wo lépwo piebehi Lévi, ke lé hegi ni âpipati na wonaa. Kehe icehi ana ni apulie naa, ke lé o te tai mele pwohewiikenye. Ke mepwo é ne ko Melkisédek, ke pii kon pie, pa apulie na e *mulie dieli mwo. Ke heme e ne te Melkisédek ali âpipati ten wo Abérama, ke pwohewiin heme lé tai wonaa ten ati ni piebehi Lévi. [Be wo Abérama, ke pa ukéiu telé ati.]

¹⁰Be mepie wo Lévi [pa caa telé] ke he mwo time e uce âbeeble, kehe e caa te mu ha a éé pa watihen, Abérama, pali e ne ali âpipati ten ne te Melkisédek.

Taatééhi a bwo pwoâpwailo ânebun

¹¹Genye tabuhi alahi a bwo pwoâpwailo, ha a benaamwon ko ni patén de Moosé. Be te wo *Aarona me lépwo apulie ha a pwomwoiu te Lévi, na lépwo apwoâpwailo tenye. Kehe icehi ana genye alahi pie, a bwo pwoâpwailo naa, ke time e uce pacuwahi ana nime Padué kon. Be mepie [wo Padué, ke] wiel time e o uce neopé céiikenye pace céiu apwoâpwailo ubwo, celi ité nang kojalé, na pwohewii Melkisédek.

¹²Ke mepie e tuie wo pa apwoâpwailo ubwo, ke me e pwo a âpwailo na mwo ju coho, ke wâé mwo heme taatééhi ni patén.

¹³⁻¹⁴Geé téne ehi pie, é ko cihe tewé [ko Melkisédek] ke é pwo-ocine ko Padaame henye, lésu Kériso, na e wie mu ha a pwomwoiu te *Juda, kehe time uce é mu ha a pwomwoiu te Lévi. Ke te tice pace apulie mu ha a pwomwoiu ten celi e mu pwoâpwailo. Be te tice mwomwon delé me lé pwo a penem naa, ne he ni *patén de Moosé.

E piwéden wo lésu Kériso

¹⁵Geé caa alihí pie, wo pa apwoâpwailo tenye [wo lésu Kériso] ke te ité nang [koja ni apwoâpwailo âcehi ni patén de Moosé]. Ke geé bwobe temehi, hemepie genye pii pie, e pwohewii Melkisédek.

¹⁶Be time uce etieng mu ko ace bwo wie ten mu ha ace céiu pwomwoiu. Kehe te icehi mu ko a junuu a mulihen na e dieli mwo.

¹⁷Be genye caa alihí pie, caa te tii ne he ni tii iitihi pie: *Wogo pa apwoâpwailo dieli mwo, âcehi a bwopwonen de Melkisédek. Psaume 110.4*

¹⁸Weengaa ana e ne me tieden ni patén de Moosé [ne konye]. Be te tice niihen me e pacuwohi [ana nime Padué kon].

¹⁹Be time uce jan me e ne me hején genye [me mwomwon ne ale Padué]. Ke é jenaa, ke e ne tenye a pwaaden nge pelen, na te nihe wâé koja ni patén [mu ko a piapwo ten ne tenye, na mwo coho]. Ke genye *ucéihi ne ha a céihi [ace bwo pacuwohi nen].

E te mu dieli mwo

²⁰⁻²¹A céiu mwo: É he e pipégali Kériso wo Padué, ke e pwo a piapwo pie, bo pa apwoâpwailo ten dieli mwo. Kehe time e mu uce pii pie wonaa te lépwo bée apwoâpwailo. Be weengi ana e pii: *E caa pwo a piapwo wo Padaame. E caa pii tem pie:*

'Wogo pa apwoâpwailo dieli mwo.' O time e bo uce pitaatééhi mwo ana e caa ne. *Psaume 110.4*

²²É mu ko anaa kuti, na wo lésu, ke caa pa inenaado ko a piapwo na e pwo tenye wo Padué, na te nihe wâé koja ni patén.

²³A céiu mwo, ke wo [lésu, ke e piwéden koja] lépwo apwoâpwailo ânebun. [Be weeng, ke te céiu nang, ke woélélé] ke te nihe hiwon jélé. Be mepie e mele wo pace céiu, ke e o taatééeng wo pana e âbé céin.

²⁴Ke o te tice apulie celi me lé taatéé lésu, be e te mu dieli mwo.

²⁵Ke me wonaa, ke jan me e *celuimi lépwona lé âbé céii Padué ne he niin. Be e mulie dieli mwo, ke e te pwoiitihi me delé.

E iitihi ke hején nang

²⁶Te tice pace apulie celi jan me pa apwoâpwailo tenye, [ke me pa apipépwooti tenye ne ânebuhe Padué] kehe te wo lésu cehi. Be e iitihi, ke te tice ta kon. Ke wâé te Padué nang. Ke wo Padué, ke e caa pwo me e mu daaité koja lépwona lé pwo nina ta. Be e céieng da, ne ha a duaan na e daaité ne he miiden [beme o te nihe pipaunueng].

²⁷Wo lésu, ke time e uce pwohewii lépwo bée apwoâpwailo, na lé pwoâpwailo ati he ni tan, me de ni ta pwo telé mwo, ke me de ni ta pwo te a puapulie. Be e te océiu ko pwoâpwailo dieli mwo, he li e pineeng me e mele [ne ko a *kuricé].

²⁸Wo l épwo *daame he l épwo apwoâpwailo na e nelé ne ni patén de Moosé, ke wo l épwo apulie na tice niihelé [pwohewiikenye]. Ke wo Padué, ke [e taatééhi ni patén] ko a piapwo ten. Ke e eti pa Naîn, na e hején dieli mwo.

Ébérū 8

Pa apwoâpwailo ubwo tenye @ wo lésu Kériso

¹Weengi a âne ana é pii: Pwo pa *apwoâpwailo ubwo tenye, na e he miiden, [ke pa apipépwooti tenye] ne ânebuhe Padué. Wo Padué na te nihe pwojunuuun, ke e neeng me e tebwo pwo juin [beme e pihuôhi ati ni naado].

²Ke e pwo a penem den, ne ha a duaan na junihe iithi ne ha a ju mwa ko pwoiitihi. Be a naado na e pacuwohi wo Padué, kehe time uce ana e pwo wo pa apulie.

³⁻⁴Pwo a âpipati na e ne, ke weengaa a penem de l épwo apwoâpwailo ne éni pwo bwohemwo. Be mepie e mwo tekó mu éni pwo bwohemwo wo Kériso, ke wielí time o uce jan me pa apwoâpwailo. Be wo l épwo bén, ne éni pwo bwohemwo, ke ni apwoâpwailo âcehi ni *patén de Moosé. Ke a penem delé, ke me lé pwoâpwailo, ke me lé ne ni âpipati.

⁵Kehe icehi ana ati ninaa, ke te ju a déme a ju *mwaiitihi na e jedá he miiden. Be wo Moosé li e pacuuli a mwaiitihi pwo ko mwaanu, ke e huôhi ne ten wo Padué pie: *Go pwo ati ni naado âcehi ana é caa habwii tem ne pwo ali juwole. Exode 25.40*

⁶Be a penem na e ne te Kériso wo Padué, ke te nihe pwonaado ne kon [koja a bwo pwoâpwailo âcehi ni patén de Moosé]. Be wo lésu, ke pali e pébé céiikenye ali *piapwo [li mwo ju wâé, na e pwo tenye wo Padué]. Ke a piapwo naa, ke te junihe pwojunuuun koja ni patén, ke e pébé céiikenye ni *adéihi na te nihe wâé.

A piapwo na mwo coho

⁷[Ânebun, ke wo Padué, ke e pwo a piapwo ne te a bele ten, *Isaraéla, ko ni patén de Moosé.] Ke mepie a bécéiuhe piapwo ânebun naa, ke mepie e caa te *pajuujuhi a bwo niimihinaado te Padué, ke wielí time e bo uce pwo mwo ace béalohen.

⁸[Kehe icehi ana a piapwo ânebun, ke time uce hején be] e cihe okéé ne ko a bele ten wo Padué, ke e pii pie: *O tuie a benaamwon na geme bo piténekeme me lupwo bele Isaraéla me *Juda. Ke geme bo pwo mwo ace piapwo celi mwo coho.*

⁹Li geme pwo ali piapwo me ni caa telé, li é pawielé mu ha amu *Aigupito.

[É péélé wie beme é celuimilé.] Ke geme pwo a piapwo. Kehe time l é uce piténedehi, ke l é pineuhi ni pwoooti. Ke é ne a jéing ne kolé. Kehe time o uce piwien

¹⁰ me a piapwo na mwo coho na me gemu bo pwo, wogemu me Isaraéla, lépwo apulie tong. É bo ne ni patén dong ne he ni pwonimelé. É bo tii a pwoooti tong ne he ni bwo temehinaado telé. Ke é bo Dué helé, ke bo woélé a bele tong.

¹¹ O time lé uce tahimwo ni béélé beme lé temehiéo. Be lé tai temehiéo ati, lépwona pwonaado ne kolé ke nina piticenaado ne kolé.

¹² É bo pineulé ko ni ta pwo telé. Ke o time é bo uce niimihi ni bwomu telé na ta. Jérémie 31.31–34

¹³ Ke me e pii kon pie, a piapwo na mwo coho, ke a bwopiinen pie, caa ukéiu a piapwo ânebun. Be a naado na caa ukéiu, ke o caa tieden.

Ébérū 9

Time uce jan ni âpwailo ânebun A bwomune lupwo duaan na iitihi

¹ A *piapwo ânebun [ke tii ne he ni *patén de Moosé]. Ke, he ni patén ânebun, ke e pihuôhi ne te lépwo apulie a bwo pwoitihi telé, ne he ni duaan na iitihi ne kolé, ne éni pwo bwohemwo.

²⁻³ Ke lé pacuuli a mwa mwaanu beme a *mwaiitihi, ke alo lupwo nemwa hen. Pwo ‘a nen na iitihi’, ke a céiu nen, ke ‘a nen na junihe iitihi’. Ke a nen naa, ke capuhi bwonihi ko a mwaanu. Ke a nen na iitihi, ke e hen a taap, me a mwomiû, me ni pwoloa na ne te Padué.

⁴ Ke a nen na junihe iitihi, ke e hen a *apwoâpwailo na timi ko mwani megele, na lé mu cini encens [ni dep na ûde wâé] nelang. Ke e lang mwo a piélele mwopiapwo na timi ati ko mwani megele. Ke é ha a mwopiapwo naa, ke pwo ni naado [na cié, na te junihe iitihi] na élé hen: A piélele na mwani megele na oba ko ni nehi pwoloa manne opé mu he miiden; Ali bwaja *Aarona li e muu; Lupwoli péi na tii ne pwon li 10 patén ko a piapwo ânebun.

⁵ É ne pwo a capuhe ali piélele mwopiapwo, ke pwo lupwo déme âcélo na mwani megele. Be lu habwii a bwo mu te Padué me *a wâé ten. Ke ni puuilu, ke talui ali capuhe piélele, é nelang he na lé mu pétaabwon ni ta pwo te a bele, ko ni cewéhe ni wota. Kehe mwo time uce téele a benaamwon me genye nihe cihe ko ni bwomunen naa.

Penem de ni apwoâpwailo

⁶ A mwa mwaanu, ke alo ni nemwa hen. Ke lépwo apwoâpwailo, ke lé mu taa ha a duaan na iitihi, ati he ni tan, beme lé pwo ni penem delé.

⁷ Kehe te icehi pa apwoâpwailo ubwo, na pwo mwomwon den me e taa ha a báalohe nemwa [ha a duaan na junihe iitihi]. Ke te océiu nang ko taa lang ha a jo. Ke e pé da a cewéhe ni wota, na e ne beme âpipati te Padué. Ke a cewéle naa, ke a âpwailo bápineuhi ni ta: ni ta pwo ten me ni ta pwo te a puapulie, na lé pwo he time lé uce temehi.

⁸Ati ninaa, ke weengi ana nime a *Jenen litih me e habwii tenye: Be time uce jan ne konye me nye taa ha a duaan na junihe iitihi [jeda he miiden] mu ko a bwo pwoâpwailo ne ha a mwa mwaanu [ânebun ne éni pwo bwohemwo].

⁹ Be genye alihie pie é ha a benaamwon ce, ke hiwon ni utepanu me ni âpwailo na lé ne te Padué ne ni apulie. Kehe icehi ana time uce jan me e pwo me mwomwon ni pwonimelé ne ânebuhen.

¹⁰Be a pwoiitihi naa, me ati ni patén den, ne ko ni wiinaado me ûdu, me ni bwo pipuulé, ke te ju ni naado ha a éé apulie, ke e te ju engen cehi die ko a ju bwopwonan de Padué.

Hején a âpwailo te Kériso

¹¹Mepwo é ne ko Kériso, ke caa apwoâpwailo ubwo tenye, na e pébé céiikenye ati ni *adéihi na genye ko mulie hen. E caa taa ha a mwaiitihi na e jedi he miiden, na e piwéden ke hején. Be time uce pwo ko ni i apulie, ke time uce a naado pwo a bwohemwo ce.

¹²Ke wo Kériso, ke e te taa me océiu ne ha a duaan na junihe iitihi. Ke e pé da lang a cewéle [beme âpwailo bérpineuhi ni ta]. Time uce a cewéhe nani me paaci, kehe te a cewéhen [na e téé, he li e pineeng beme e âpwailo]. Ke me wonaa, ke e tuwo ni apulie mu ko ni ta pwo telé dieli mwo.

¹³Âcehi ni patén ko a bwo pwoiitihi ânebun [ke hiwon ni naado na *mwiihi te ni apulie kon]. Ke hiwon ni âpwailo me ni pwopwoiitihi telé, beme puu taabwon ni ta pwo telé. Ke lé mu pitaipuulé ko a cewéhe nani, me a cewéhe paaci, me ni dep ko a nahi paaci na cini, ne ko nina lé pwo na ta. Ke é alecehe a bwo puu taabwon na a ta mu ko ni éélén, ke jan me lé bo pwoiitihi mwo.

¹⁴Te icehi a cewéhe Kériso na te nihe pwojunuun koja ninaa! Be e puu taabwon ni ta mu he ni pwonimenye dieli mwo. Ke e tuwokenye mu he ni huô me ni ta, na lé péékenye nge ha a mele. Be é mu ko a Jenen litih, ke e pineeng wo Kériso ne te Padué, beme pa âpwailo na hején, na tice tooli me ta kon. Ke é mu ko anaa kuti, na o time e uce pipé ne konye ni *pwonimenye. Ke jan me genye cuwo ânebuhe Padué na e *mulie dieli mwo, beme genye pipaunueng, ke me genye penem den.

¹⁵Ke a bwo mele te Kériso, ke e tuwokenye koja ni ta na genye pwo, na genye mulie hen haahi a piapwo ânebun. Ke e ne a piapwo na mwo coho. Ke ati lèpwona e caa todelé wo Padué, ke lé bo tai hegi ati ni adéihi naa, dieli mwo.

A piapwo ko a cewéle

¹⁶⁻¹⁷Mepwo é ne ko [a piapwo, ke pwohewii] a tii na e tii wo pa apulie, ânebuhe a bwo mele ten. Be e tii ni nii ati ni apulie na lé o hegi ni wâé ten. Kehe icehi ana mwo time uce cuwo a tii naa, be mwo time e uce mele wo pa atii nen. [Ke o mwo te tice apulie celi me e hegi ce den mu ko ni wâé ten.]

¹⁸Ke piwien ne mwo ko a piapwo ânebun. Be e te *pajuujuhi cehi ne ko a bwo téte na a cewéhe [a wota na taunuhi].

¹⁹ Be, me e pipatemehi ati ni patén te a puapulie wo Moosé, ke e pé a cewéhe ni nahi paaci me ni nani, na e bitehi neibuhi me a tabe. Ke e neole hen a dihe acuwo *hysope* na cie ko a pumajoo megele. Ke e taipuu a tii ko patén. Ke e wonaa mwo ne ko ni apulie ati.

²⁰ Ke e patemehi telé pie: *Weengi a cewéle bérpajuujuhi na a piapwo na e pwo wo Padué me dewé, ke wâé heme geé âcehin. Exode 24.8*

²¹ Ke e taipuu ko a cewéle a *mwaiitihi na pwo ko mwaanu, me ati ni naado na iitihi na lé mu hen.

²² Âcehi ni patén, ke te icehi a cewéle na jan me e ne me wâé ni naado ne ânebuhe Padué. Ke te tice ace bwo pineuhi ne ni ta, hemepie time uce téte a cewéle.

E habwiikenye te Padué

²³ Genye caa alihī pie, a mwaiitihi pwo ko mwaanu, me ni naado na lé mu hen, ke wâé ne ânebuhe Padué. Be wâé ko a cewéhe ni wota. Kehe icehi ana ni naado naa, ke te ju a déme ni naado na piwéden, na e jeda he miiden. Ke é mu ko ninaa, ke o wâé mwo ni âpwailo na nihe piwéden. [Be time uce jan a cewéhe ni wota, me e ciitili ni ta.]

²⁴ Wo Kériso, ke e taa ha a mwaiitihi na e jeda he miiden, beme e habwiikenye te Padué. Kehe time e uce wonaa ne ha a mwaiitihi ne éni pwo bwohemwo, na pwo ko ni i apulie. Be a mwaiitihi naa, ke te ju a déme a junado [na e jeda he miiden].

²⁵ [Ke a céiu mwo, ke] a âpwailo na e pébé wo Kériso, ke te a cewéhen [kehe time uce a cewéhe ni wota]. Ke time e uce pwo me piohiwon ko pwoâpwailo, pwohewii pa apwoâpwailo ubwo juif ne éni pwo bwohemwo, na e te pwo téteda ati he ni jo.

²⁶ Be mepie wonaa, ke me e o pwo me piohiwon ko mu he ni téé [me mele] tabuhi mu ha atabuhi ko a bwohemwo. Time uce wonaa! E caa te océiu ko tuie, ha a céiu benaamwon, ânebuhe a anebwén ko a bwohemwo. Ke e pineeng beme pa âpwailo. Ke e caa pwo me tieden a ta, ko a bwo mele ten.

²⁷ Mepwo é ne ko ni apulie, ke lé te océiu ko mele. Ke é alechen, ke e bo tautilé wo Padué.

²⁸ Ke wo Kériso mwo, ke e te océiu ko mele, beme pineuhi ni ta pwo te ni apulie na hiwon jélé. Ke mepie e bo âmwobé, ke caa time uce a bwopwon me e mwo tuwokenye mwo mu ha a ta. Kehe e o âmwobé beme e celuimikenye, wogenye na genye ucéieng. [Ke *a ju mulip na e ne tenye, ke o é dieli mwo.]

Ébérū 10

E te océiu ko pwoâpwailo wo Kériso

¹[É caa habwii tewé pie]: Ni *patén de Moosé, ke te ju a déme cehi, ni *adéihi na e bo âbé alece. Ke time uce a ju déme ninaa. Be ni patén, ke e wâgo ko pa

*apwoâpwailo ubwo pie, me e pwo me océiu ko pwoâpwailo ne ha a jo. Ke te piwien ati he ni jo. Kehe icehi ana ati ni âpwailo naa, na te junihe hiwon, ke time uce jan me lé ne me mwomwon ke hején ni apulie na lé âbé mwonu Padué,

²ke me puu taabwon ni ta pwo telé. Be mepie jan, ke wieli caa time e o uce pipé ne kolé a pwonimelé, ke caa time lé bo uce pwoâpwailo mwo.

³Ni âpwailo na lé ne, ati he ni jo, ke lé paniimihi telé mwo ni ta pwo telé [na e teko mu kolé].

⁴Be te nihe pwocoon me pétaabwon ni ta pwo te ni apulie, ko a cewéhe paaci me ni nani aiu.

⁵⁻⁶ Weengaa a watihe ni pwootti ce, li e pii te Padué wo Kériso, he li e tuiebé ne éni pwo bwohemwo: *Time uce nimem ko ni âpwailo bépineuhi ne ni ta. Time go uce hegi ni paaci na cini. Time uce wâé tem ni âpipati. Kehe go ne tong cehi a éé apulie bépenem dem.*

⁷ Ke é pii tem pie: “Woéo-ni ânebuhem. É bo pacuwohi ana nimem kon. Be wonaa apii kong ne he li tii tem.”Psaume 40.7-9

E ne a piapwo na mwo coho

⁸Go alih, e pii wo Kériso pie, time uce wâé te Padué ni âpwailo me ni âpipati, me ni paaci na cini! Kehe icehi ana te ni patén, na e te wâgo konye, beme genye ne ati ninaa!

⁹Ke e pii mwo te Padué wo lésu Kériso pie: *Woéo-ni ânebuhem. É bo pacuwohi ana nimem kon.* [Ke go alih, ni pwootti naa, ke lé habwii tenye pie] e pwo me tieden a *piapwo ânebun, beme e ne a piapwo na mwo coho.

¹⁰Ke wo Kériso, ke e caa te pwo ana nime Padué kon, ke e ne a één, beme âpwailo na te océiu ko pwo. Ke e caa tuwokenye mu he ni ta pwo tenye, ke e pwo me wogenye ni apulie te Padué.

¹¹[Ne ha a piapwo ânebun, ke] lé cuwo pwo apwoâpwailo wo lèpwo apwoâpwailo ati he ni tan. Ke lé piohiwon ko pwo a âpwailo na te piwien. Kehe icehi ana te tice aceli te ju céiu mu ko ni âpwailo na lé pwo, celi jan me tuwokenye mu he ni ta pwo tenye.

¹²Ke mepwo é ne ko a âpwailo te Kériso, ke e te océiu ko pwo. Ke te nihe pwojunuun me pineuhi ni ta pwo tenye dieli mwo. Ke é alechen, ke wo Padué, ke e pwo me e tebwo pwo juin [beme e pihuôhi ati ni naado] dieli mwo.

¹³Ke e te mu lang, die ha ace bwo caaite lèpwona lé pwopa ne kon.

¹⁴Te é mu ko a âpwailo ten na te céiu, na e pwo me lé mwomwon ke hején dieli mwo ne ânebuhe Padué, ati ni apulie na e caa tuwolé koja ni ta pwo telé.

Ni patén na e ne he ni pwonimenye

¹⁵E te *pajuujuhi anaa tenye na a *Jenen litih, ko a pwootti ce [na e pii wo Padué pie]:

16 Weengi kuti a piapwo na gême o bo pwo

[me ni apulie tong] ha a tan na é caa pacuwohi. É bo ne ni patén dong ne he ni pwonimelé. É bo tii a pwootitong ne he ni bwo temehinaado telé. Jérémie 31.33

17 Ke e pii mwo pie: É pineulé ko ni ta pwo telé, ke o time é bo uce niimihi mwo ni bwomu telé na ta. Jérémie 31.34

18 Ke mepie e caa pineuhi ni ta pwo tenye, ke o caa time uce jan me genye mwo pwo mwo ace âpwailo.

ni béhabwiinen de lépwo acéhi

(Pwahamii tii: 10.19—13.25)

Nye imwi mangihi ni céhi tenye

19-20 Lépwo béeing, caa tehi ne tenye ali duaan li junihe iitihi [ne jeda he miiden] mu ko a bwo téé na a cewéhe lésu. Be li e ne a één [beme e âpwailo] ke e tie ali mwaanu [bécapuhi bwonihi na ali duaan li junihe iitihi]. Ke o caa time uce piwâ genye me genye taa lang! Be anaa kuti a pwaaden na mwo coho, ne ko a mulie [dieli mwo ne pele Padué].

21 Ke caa pwo pa apwoâpwailo ubwo tenye, na e pihuô ne ha a mwa te Padué.

22 Ke e caa puu taabwon ni ta pwo tenye, beme pwaale konye, pwohewiin heme e puukenyé ko a tabe na te ju bwakenu. Ke o caa te tice ace céiu naado celi me e o pipé ne konye kon. Ke bwobe jan me genye taa pele Padué, ne ha a pwonime na juuju, me a céhi na mang.

23 Ke wâé heme genye imwi mangihi a céhi tenye ne ko ni adéhi na genye ucéhi [na e âbé mu pele Padué]. Be e o te pacuwohi nina e caa mi pii ânebun.

24 Ke wâé heme genye picani tenye, me pipamwoiukenyé ibu, beme piubwo da a pipwoééhe tenye me ni penem denye na wâé.

25 Ke genye nemwo cuwo koja ni pitihé tenye, pwohewii ni béeén, ke wâé heme genye te pipamwoiukenyé. Ke genye te cumang ne kon, be genye caa temehi pie, o caa tuie a Tan [na e bo mwojuia mwobé hen wo Padaame].

Genye pipwocile!

26 [Genye pipwocilekenye!] Be mepie genye te pwo me ubwo ni puninye, me genye pwo nina ta, wogenye nina genye caa temehi a juuju, ke o te tice ace âpwailo celi o jan me bépwonen me pineuhi ni ta pwo tenye naa!

27 Ke te tice aceli genye hegi koja Padué, kehe te icehi a bwo tautikenye ten, me a bwo pwocuhinaado tenye ten! Ke anaa, na genye ucéhi ne ha a bwo mwotikenye, me éjén genye. Be ati lépwona lé pwobwoni Padué, ke e pwo me élé jélé ne ha a miû na junihe ubwo!

28 Ke é ne ko pa apulie na time e uce piténedehi ni patén de Moosé, ke tautieng me taunueng, hemepie alo ai cié celi lé pipé ne kon. Ke time uce piwâ lépwo béeén me lé taunueng.

²⁹ Ke o ade ace cuhinaado te lépwona lé tééti pa *Naî Padué ko ni bwomu telé? Be li e caa pwo me lépwo apulie ten, é mu ko a cewéhen: a cewéle li e pacuwohi a piapwo te Padué. Ke mepie lé ne me piticenaado ne kon, ke o ade ace cuhinaado telé? Ke mepie lé piciheta ne ko a Jenen litihi, pa apébé na a *pipwoééhe tice ja kon de Padué, ke o ade ace cuhinaado telé? [É pii tewé pie]: O te nihe ubwo dieli mwo!

³⁰ Be genye caa temehi pie, e caa pii [wo Padué] pie: *Te woéo cehi na é bo uje [ne te nina lé pwo nina ta]. Te woéo cehi na é o te muko ne telé ce cemelé ko ni huô telé.* Deutéronome 32.35 Ke a céiu mwo: *Ke e bo te tauti a bele ten wo Padaame.* Deutéronome 32.36

³¹ Ke o te junihe pwoééhenye, hemepie wo Padué, na e *mulie dieli mwo, ke me e imwikenye beme e pwocuhinaado tenye!

Cumang ne ha a céihi die ha a pwonehin

³² Wâé heme geé pipaniimahi ni tan ânebun, he geé hegi a pwéélang de Padué. Be é alecehe a bwo temehi nen dewé Kériso, ke geé tooli ni tacebwén, me ni picani, me ni téé na te nihe binyi. Kehe icehi ana geé te cumang.

³³ Be lé pwotahinaado ne kowé, me pitaahikewé, ne ânebuhe ni apulie. Ke é he ni béé benaamwon, ke geé picani te nina lé pwotahinaado ne kolé, pwohewiin ne kowé.

³⁴ Be li geé mu he ni picani me ni téé ne ko ni [acéihi béewé] na lé mu he karépu. Ke geé mu ha a pipwodéén, he li lé pé kojakewé ni dewé. Be geé temehi pie, caa etewé a adéihi [na e ne wo Padué] na piwéden, ke e mu dieli mwo.

³⁵ Ke é jenaa ni, ke geé mwoiu, ke geé nemwo pwo me emaan gewé. Be [mepie geé te cumang] ne he ni céihi tewé [ne ko Padué] ke o ubwo ace cemewé!

³⁶ Ke geé te cumang, beme geé pwo ana nime Padué kon. Ke geé o hegi ni adéihi, na e caa mi pii.

³⁷ Be caa time uce bwolihi [ke e o tuiebé wo Padaame] pwohewii ana caa te tii ne he ni tii iitihi pie: *E o te ju pwome tuiebé wo pana me e âbé.* O time uce bwolihi, ke e o pihabwieng. Habakuk 2.3

³⁸ [Ke e pii mwo wo Padué pie]: *Wo pana e te céihi ne kong, ke mwomwon nang ne he pwahamiing.* Ke e kon a mulie. Habakuk 2.4 Kehe wo pana e mwojuia mwo, ke muhi te Padué kon.

³⁹ Ke wo lépwona lé mwojuia mwo koja Padué, ke o tielé dieli mwo. Kehe wogenye na genye céihi ne ko Padué, ke e celuimikenye.

Ébérū 11

A céihi te ni Isaraéla ânebun

¹ A céihi, ke a bwopiine ade? Me genye céihi, ke genye temehi me ubwo ne he ni pwonimenye, pie e o tuie ana wâé na genye ucéihi. Be a céihi, ke o *pajuujuhi

ne he ni pwonimenye pie, e te cuwo, nina mwo time genye uce alihî ko ni naamiinye.

²⁻³Te é mu ko a céihi, na genye temehî pie, wo Padué, ke e ne ati ni naado ko a pwooti ten. Be e ne a bwohemwo me a miiden, me ati nina lé mu hen. Ati ni naado na genye alihî, ke lé tai âbé mu ko nina time genye uce alihî. É bwolihi, ke lé céihi ne ko Padué wo lèpwo ukéiu tenye. Ke te é mu ko anaa, na wâé ten jélé.

Abel

⁴Wo Abel†, ke e céihi ne ko Padué. Ke te é mu ko a céihi ten, na e pwo a *âpwailo na wâé te Padué. Be piwéden koja ali e pwo wo pa cuwon, Kaina. Ke e hegieng wo Padué, ke e pwo me mwomwon Abel ne he pwahamiin, mu ko a céihi ten. Ke hemepie caa bwolihi a bwo mele te Abel, kehe ninaa, ke lé mwo teko pacihekene.

Énoka

⁵Wo Énoka, ke e céihi ne ko Padué. Ke caa te tii ne he ni tii iitihi pie, pa apulie na wâé te Padué nang. Ke te é mu ko a céihi ten, na wo Padué, ke e pééeng da he miiden, he e mwo teko mulie, be time e uce mele. Ke caa time lé bo uce alieng mwo ne éni pwo bwohemwo.

⁶Genye alihî pie, mepie tice céihi tenye, ke o pwocoon me ni apulie na wâé te Padué genye. Ke mepie [nimenye me] genye taa pelen, ke wâé heme genye céihi pie, te pwo Padué! Ke a céiu, ke wâé heme genye céihi pie, *adéi lèpwona lé âbé céieng mu he ni ju pwonimelé.

Noé

⁷Ke wo Noé, ke e céihi ne ko Padué. Ke te é mu ko a céihi ten, na e mi paciheeng wo Padué [ko a ujaa na nihe ubwo na e bo tuie]. Mwo time e uce alihî a ujaa wo Noé, kehe icehi ana e te paciiti Padué, ke e te piténedeeng. Ke e jili ali ong, ke tai celuimilé ati, me a pwomwoiou ten. Ke a céihi ten, ke e habwii tenye [a bwo time uce céihi te] lèpwo bée apulie pwo bwohemwo, na caa tautilé me pwocuhinaado telé. Ke wo Padué, ke e ne me mwomwon Noé ne he pwahamiin, beme e ne ten ni adéihi ten. Tai cuwo ati ninaa mu ko a céihi te Noé.

Abérama

⁸Wo *Abérama, ke e te céihi ne ko Padué. Ke te é mu ko a céihi ten, na e pitabemi Padué, he li e toteeng. Ke e engen koja a amu ten, nge ha amu na me e bo habwii ten wo Padué. Be mwo time e uce ju temehî, he na me e â lang.

⁹Ke me e tuie nge ha ali amu li e ne ten wo Padué, ke e te mu lang ko a céihi ten, he ni mwa mwaanu, be e pwohewii pa coho. Ke lu te wonaa mwo wo Isaaka, pa naîn, me lakobo, pa pabun. Be ali *piapwo li e pwo te Abérama wo Padué, ke te a de mwo ni piebehieng.

¹⁰Be a ju amu na e ucéhi wo Abérama, ke a amu na e bahi wo Padué, âcehi ana te nimen kon; amu na e te mu dieli mwo.

¹¹Wo Abérama, me Sara, ke caa lu ukéiu aiu me ukéiu toomwo. Wo Sara, ke ê toomwo na te tice naîn, be time uce jan me pwo naîn. Kehe icehi ana lu céhi ne ko Padué. Ke te é mu ko a céhi telu, na pwoapulie ko Sara.

¹²Ke caa nihe hiwon ni niide apulie na lé tuie mu kon. Ke caa nihe hiwon jélé pwohewii ni ceni jeda he miiden, ke ni won jeoté ticepwon, na time uce jan me genye pine. [Be caa te cuwo, pwohewii ana e caa mi pii wo Padué.] Ke lé tai âbé ati mu ko pa apulie na te céiu nang, na caa te nihe pa ukéiu!

¹³Wo Abérama, me Isaaka, me Iakobo, ke time lé uce alihî ati [ni adéhi na e âbé mu ko] ana e caa mi pii wo Padué, he lé mwo mulie. Kehe icehi ana lé te céhi taaci [pie o te cuwo ha ace céiu tan]. Ke lé pipwodéén, be pwohewiin heme lé alihî mu ité a bwo pacuwohi nen. Be lé patemehî ati pie, woélé lépwo coho ne pwo a bwohemwo ce.

¹⁴Ke wo lépwona lé wonaa ko ni bwo cihe telé, ke lépwo apulie na lé ko hane ace céiu amu, na me bo te a ju amu telé.

¹⁵Be hemepie nimelé, ke jan me lé mwojuia mwo, kehe time lé uce niimihi ali amu li lé âbé mu hen.

¹⁶Be lé niimihi a amu na te junihe wâé koja ace céiu amu éni pwo bwohemwo. Be amu na e jeda he miiden, na e pwopweehi me delé wo Padué. Ke weengaa a watihen me genye alihî pie, wo Padué, ke time uce tanim nang, heme lé toii kon pie Padué helé.

¹⁷⁻¹⁸Wo Abérama, ke e nihe céhi ne ko Padué. Ke e pii ten wo Padué pie, o bo te junihe hiwon ce piebehieng, celi lé o bo pituie mu ko pa naîm Isaaka. Genèse 21.12 Kehe icehi ana é alechen, ke e tacebwéni a céhi ten wo Padué. Be e pii ten pie, me e *pwoâpwailo ten ko Isaaka. Ke wo Abérama, ke e te pipwopweeng ne kon beme e pwo.

¹⁹Be e céhi pie, te jan ne ko Padué, me e pwo me lé mulie mwo wo lépwo amele. [Kehe icehi ana e pacuwoeng wo Padué] ke e ne Isaaka mwo te Abérama. Ke pwohewiin heme e caa mulie cemwo wo Isaaka.

Isaaka

²⁰Wo Isaaka mwo, ke e te céhi ne ko Padué. Ke te é mu ko a céhi ten na e adéi [lupwo naîn]: wo Iakobo me pa cuwon Ésaü. Ke e ne telu ni adéhi, na o bo cuwo he ni tan na mwo e he pwaaden.

Iakobo

²¹Wonaa mwo ne ko Iakobo. Be e te céhi ne ko Padué. Be é ânebuhe a bwo mele ten, ke e caamada ko a bwajaan, ke e paunu Padué. Ke e adéi lupwoli naî Josef. Ke te é mu ko a céhi ten na e wonaa.

Josef

²² Wo Josef, ke e céihi pie, alecehe a bwo mele ten, ke wo Padué, ke e bo pé a puapulie ten *Isaraéla mu ha amu *Aigupito. Ke é mu ko a céihi ten, na e mi pii te lépwo béen pie, mepie te cuwo a tan naa, ke me lé bo te pé mwo céilé ni duun mu ha amu Aigupito.

Lu nyaa me caa te Moosé

²³⁻²⁴ Wo lu nyaa me caa te *Moosé, ke lu céihi ne ko Padué. Ke te é mu ko ni céihi telu, na time lu uce piténédehi a patén de Faraô, pa daame he lépwo Aigupito. [Be e huôhi pie, me lé taunu ati ni nahi ewa aiu na lé âbeele ne pele ni Isaraéla.] Lu neduwo Moosé he na cié wole. Be lu alihii pie te nihe wâé a bwo alieng. [Ke e tooeng ê naî pa daame Faraô, ke e pééeng beme pa naîn.] Ke ubwo Moosé ne ha a pomwa te pa daame Faraô.

Moosé

Wo Moosé, ke e céihi ne ko Padué. Ke é mu ko anaa, na muhi ten me lé pii kon pie, pa naî êgi naî pa daame he lépwo Aigupito.

²⁵ Ke e mu pele [ni ju béen, wo lépwo Isaraéla], a puapulie te Padué, ha a benaamwon na ta ne kolé hen. Be nimen me e mu he ni picani na lé mu hen, koja a pipwodéen [ne pele Faraô] ne ha a mulie na muhi te Padué kon. Be time uce bwali a pipwodéen naa.

²⁶ Ke pihoonieng, pwohewii a bwo pihooni Kériso: pa *Mesia [li e neeng bé wo Padué, hiwon ni jo alecehen]. Wâé te Moosé anaa, koja ace bwo hegi ati ne ni wâé ne ha amu Aigupito. E wonaa, be e niimihi ni cemen na e bo ne ten wo Padué.

²⁷ Ke te é mu ko a céihi ten, na e [pé a bele ten, beme lé] wie mu Aigupito. Time uce mwotieng ko ace bwo okéé te pa daame Faraô. Ke e te cumang, be e te alihii, ko a céihi, pana time genye uce alieng ko ni naamiinye.

²⁸ Ke te é mu ko a céihi ten, na e [huôhi ne te a bele ten pie, me lé] pwo a pipwodéen ko a *Pacika. Be nimen me lé niimihi he li lé timi ni jije pomwa telé, ko a cewéhe a nahi muto, beme time e uce taunulé wo pali *âcélo li e taunu ni bécéiuhe ewa aiu [ha amu Aigupito].

Lépwo Isaraéla

²⁹ Wo lépwo watihenye, wo lépwo Isaraéla, ke lé céihi ne ko Padué [ke lé âcéi Moosé mu ha amu Aigupito]. Ke te é mu ko a céihi telé, na meiu a pwaadeniilé nge ha a jié Megele. Ke lé gaale ko a céihi goon [ke celuimilé]. Ke me lé tailé wo [lépwo coda te] lépwo Aigupito, ke e âbé huîlé ali tabe, ke lé tai mele.

³⁰ Ke wo lépwo Isaraéla, ke lé te céihi mwo ne ko Padué. Ke te é mu ko a céihi telé mwo, na lé engen aujenihi a goomwa babé bwonihi lériko he na 7 ni tan. Ke e te tupwo kuti ali goomwa.

Rahab

³¹ Rahab, ê toomwo pwopwaaden [ne lériko] ke e céihi ne ko Padué. Ke te é mu ko a céihi ten, na e hegi lupwo coda Isaraéla, li mi nelu ngen beme lu â alihii

a pwomwo ubwo. Ke anaa, na e *celuimi [a pwomwoiu ten]. Kehe icehi ana lé tai mele ati ni apulie ha a pwomwo ubwo, mu ko ana time lé uce piténede Padué.

Hiwon mwo ni béén

³² O ade aceli me é mwo pii mwo? Time uce jan ni benaamwon me é uti ati [nina lé pwo mu ko ni céihi telé, pwohewii] Gédéon, Barak, me Samasona, me Jefté, me *Davita, me Samuel, me ati l épwo péroféta mwo:

³³ Lé piwéden koja ni mwametau wo l épwo béén; Lé pé a pihuô ko a juuju wo l épwo béén; Lé [pwo nina wâé, ke lé] hegi a adéihi te Padué wo l épwo béén; Lé capuhi a pwo ni liô beme lé nemwo wiilé;

³⁴ Lé taunuhi ni miû na ubwo wo l épwo béén; Lé cela ko l épwona nimelé me lé taunulé; Lé hegi ni niihelé na ubwo wo l épwo béén na tice niihelé, beme lé piwéden ne ko a pa, ke me lé pacelahi ni mwocoda na nihe ubwo.

³⁵ Ke pwo ni bée toomwo, ke [te é mu ko ni céihi telé, na] lé hegi mwo ni aiu helé, me ni béeélé, me ni naîlé li lé caa mele, be lé caa mulie cemwo. Ke pwo ni bée apulie, na [te é mu ko ni céihi telé] na lé mu he ni picani, be lé pwotahi ni éélé [wo l épwona muhi telé ko Padué] die ko a bwo pwo me lé mele. Ke time lé uce [pawie ni céihi telé, beme o] tuwolé. Be lé caa mi niimihi a mulie na e alecehe a mele, na lé bo hegi; a mulie na te nihe piwéden [koja a mulie ce, ne éni pwo bwohemwo].

³⁶ Wo l épwo béén, ke pihoonilé, me ahilé ko bwaliwota. Ke wo l épwo béén, ke nelé he karépu, ke cielé ko itihe toki.

³⁷⁻³⁸ Ke taunu ni béeén ko péi. Ke woli ni béeén ko teua. Ke ei me alo mu ko ni béeén ko gili. Ke pwo ni béeén na pwotahinaado ne kolé, me cibéélé mu he ni bée duaan nge he ni bée duaan. Ke lé cela nge ha a melé, ke é nge pwo ni juwole, ke te tice mwaale telé. Ke tice naamuulé, ke lé cuwohe ni imuto, me nani. Ke lé tадuwo nge he ni mwa péi, me ni pwon na ini ne he pule. Ke te nihe pwoééhelé, be lé te junihe mu he ni picani mwo. [Au, pwoééhelé!] Be te nihe wâé jélé koja a bwohemwo ce.

Lé tai ucéihi ana genye hegi

³⁹ Ati ni apulie naa, ke lé tai céihi ne ko Padué. Ke te é mu ko ni céihi telé, na e pii me wâé jélé. Kehe icehi ana te tice paceli e ne me e hegi, ha a benaamwon naa, ati [a adéihi] li e caa mi pii wo Padué [pie me e bo ne te a bele ten].

⁴⁰ Ke he é mu ko ade?] Be lé ko ucéikenye [wogenye na genye mwo ko mulie jenaa]. Be wo Padué, ke e caa mi pwopweehi ânebun pie, me e bo pwo me tai mwomwon genye, me hején genye ne ânebuhen, wogenye me woélé. Ke a naado na te nihe wâé ne konye jenaa.

Ébérū 12

Genye tai cumang pwohewii lésu

¹Caa pajuujuhi ne tenye ni céhi te lépwona lé ânebuhenyé, lépwona te junihe hiwon jélé. A mulihelé, ke a béhabwiinen denye. Ke mepie wonaa, wogewé lépwo béisng, ke wâé heme genye pétaabwon ati ni âneule na lé pacuwohi ni bwo téte tenye. Genye necu ni ta na e imwikenye! Ke genye cumang, beme genye te téte die ha anebwén kon.

²Genye ome lésu cehi, be weeng na e céhi tenye, mu ha atabuhi kon, ke weeng na e wéihi, beme o hején die ha a pwonehin. Ke e hegi a penem den, ne ha a bwo uca ten. Ke e te nihe mu he ni picani, ke e mele ne ko a *kuricé: a bwo mele na pwo me tanim. Kehe icehi ana e pwo me piticenaado ne ko a tanim naa, be e niimihi a bwo pipwodéen den, ne ha anebwén kon. Ke wo Padué, ke e caa neeng me e tebwo pwo juin [beme e pihuôhi ati ni naado].

³Wâé heme genye niimihi a bwo picani ten ne ko ni apulie ta na lé te nihe pwotahinaado ne kon. Be mepie wonaa, ke o time genye uce pwoemaan, ke me nye patupwo [ni céhi tenye].

E punekenyé be eânimén denye

⁴[É temehi pie, lé pwopa ne kowé wo lépwo apulie ta, pwohewii ali lé pwo te Kériso, ke geé te junihe mu he ni picani kon.] Kehe icehi ana mwo time geé uce téele [pwohewii Kériso] die ko ace bwo mele tewé!

⁵Ke a céiu mwo, kona geé caa pineuhi pie, e pii kowé pie, wogewé ni naîn, ke e punekewé [ko a bwo mu tewé he ni téé me ni picani]? Be e pii pie: *Pa ju naîng wé, go tabemi Padaame na e punekewé. Go nemwo pwo me pita tem.*

⁶ E pune ati ni ju naîn. E pune ati lépwona eânimén delé. *Proverbes 3.11–12*

⁷⁻⁸ É mu ko anaa, na geé hegi ehi ni pune te Padué, he e huôhi ne tewé ni naado. Be e wonaa te ati ni naîn. Be he woo pace ewa celi time e uce ne pune ten wo pace caa ten? Ke mepie time e uce wonaa tewé wo Padué, ke a bwopiinen pie wogewé, ke time uce ni ju naîn.

⁹Ke mepie genye paciiti ni caa tenye ne éni pwo bwohemwo, nina lé punekenyé me pwopweehi ne konye, ke o te nihe wâé mwo heme genye hegi, beme e pwopweehi ne konye wo Padué Caa tenye, na e jedâ he miiden. Ke e o mu konye *a ju mulip.

¹⁰Be wo lépwo caa tenye, ke lé te punekenyé me éewo konye ha a cuwo benaamwon na te ju bahin, âcehi nina nimelé kon, me ni âniimihinaado telé. Kehe icehi ana wo Padué, ke e huôhi ne tenye ke e punekenyé, beme e picani tenye [dieli mwo]. Be wâé ten heme genye â ni apulie ten na wâé genye, ke iitihi, ke hején pwohewieng.

¹¹A juuju pie, time uce wâé tenye a cuwo benaamwon na genye mu he ni pihuô me ni pune tenye. Kehe icehi ana mepie genye hegi ehi, me picani ne kon, ke é alechen, ke e o bo pwo ce cemenye celi o nihe wâé. Be genye o bo ni apulie ko a péém: nina lé te pwo nina wâé, ke mwomwon.

Go cuwoda!

¹² Anaa na [é muko pii tewé pie]:

[Go cuwoda!] Go pamwoiuhi lupwo im! Hane ce niihe lupwo am na ején!

¹³ Go â ha a pwaaden na mwomwon! Go nemwo padep kojan!

[Pwo taaci nina wâé!] Beme o ne tem mwo ace niihem, wogo pa tebwa! Ke go engen mwomwon!

Go te cuwo ko piténéde Padué!

¹⁴[Weengi ni pihuô tong me dewé]: Geé hane me geé mulie ha a péém me ni apulie ati. Ke geé mulie ha a mulie na wâé te Padué. Be o te junihe pwocoon me geé ali Padaame, hemepie time geé uce wonaa.

¹⁵Geé pipwocile! Geé nemwo piâ ité koja a *pipwoééhe tice ja kon de Padué [be koli time geé bo uce hegi ni adéihi ten]. Ke geé piwéa kowé, me pipwoipikewé, be koli e bo ne waan ne kowé ace céiu ta, na pwohewii a meté na ta. Ke e epin ko engen, ke e ne ni acehin na maga.

¹⁶⁻¹⁷Ke geé pipwocile mwo, beme o te tice mu kowé celi lé pipule hauli. Ke a céiu mwo, ke me time geé uce pipwohewii a bwomu te Ésaü ânebun. Be genye tai temehi a jepule kon. Be te pa cuwon, na eten ni *adéihi te caa ten. Ke e icuhi [haulih te pa ciéén] ne ko a tami wiinaado na te céiu! Ke é alecehen, [ke e bwo alahi ana e pwo] ke e pimiibule ke é, ne he pwahamii caa ten, beme e ilehi kojaeng mwo ni adéihi ten. Kehe icehi ana caa time uce jan. Ke caa time e uce hegieng wo caa ten. Anaa na me geé pipwocile! Ke geé pwo me wâé tewé ni naado [ne ha a Mwametau] te Padué!

Genye piâmwonuhi a juwole iitihi

¹⁸ Wogewé lépwo bérang, genye caa piâmwonuhi a juwole na time uce jan me genye ti kon [me alahi ko lupwo naamiinye]. Mepwo é ne ko lépwo ukéiu tenye, lépwo *Isaraéla ânebun, [ke te nihe mwotilé] he li lé piâmwonuhi a juwole Sinaï, [beme lé o hegi ni patén de Padué]. Be lé alahi nelang a duwele miû me a bwén, me a melepiing. Ke e ti kolé a dan-he-duéé.

¹⁹⁻²⁰Ke lé téne a pwocuu tutu. Ke e pacihelé [wo Padué] ha a pwocihe na nihe ubwo: [*litihi me geé â pwo a juwole ce!*] *Pace wota, me pace apulie celi e ti kon, ke o taunueng ko péi!* Exode 19.12-13 Ke [te junihe mwoti lépwo Isaraéla] ke lé toii da céiieng pie: «Éé! Go cuwo, go Padaame!» Be time uce jan me lé téneeng,

²¹die ko *Moosé mwo, [pa apihuô telé]. Be caamadaim kon, ke ején nang ko a bwo mwotieng.

²²⁻²³Mepwo é ne konye, ke genye pipwodéén, me genye piâmwonuhi a juwole *Sion, me a pwomwo ubwo na e jedo he miiden. Be te é *lérusaléma [na mwo coho] a amu te Padué na e mulip. Ke genye ko cuwo ha amu te pa atauti ati ne ni apulie. Ke pwia ni pwonimenye, be wogenye lépwo ju naî Padué, wogenye na caa tii ni niinye ne he miiden [beme etenyne ni adéihi ten]. Ke genye o tai pimu ibu me nina lé caa mele ânebun, nina wâé te Padué jélé: ati lépwoli e pwo

me mwomwon jélé me hején jélé ne he pwahamiin. Ke lé aujenikenye ni *âcélo na te junihe hiwon jélé, na time uce jan me genye pinelé.

²⁴Ke genye âbé céii lésu, pali e pébé céiikenye a *piapwo na mwo coho [li e caa pwo wo Padué] me denye. Ke e caa pacuwoshi wo lésu, ko a bwo tée na a cewéhen [he li e mele me denye]. Ke a cewéhen, ke te nihe pwojunuun koja a cewéhe Abel.

²⁵Anaa na me geé pipwocile, be koli muhi tewé me geé piténede Padué, na e ko pacihewé! Be li pwocoon me lé cela ko a cuhinaado wo lèpwo watihenye, lèpwo Isaraéla, he li lé bitelé koja Moosé. Ke wo Moosé, ke te pa apulie pwo bwohemwo. Ke o bo woté ace cuhinaado te ati lèpwona lé bitelé koja Padué, na e jedo he miiden?!

²⁶Be li [é ne pwo a juwole Sinaï] he li e pwo me gun a bwohemwo ko a pwociheten, ke e caa pii tenye pie: *É bo pwo me gun mwo a bwohemwo ati.* Ke time uce a bwohemwo cehi, *kehe o te a miiden mwo!* Aggé 2.6

²⁷A bwopiinen pie: O tieden a bwohemwo me ati nina lé mu pwon, be ni naado na e ne wo Padué. Kehe te icehi ni naado na lé mu pelen, na lé o tee mu dieli mwo.

A Mwametau na time o uce gun

²⁸Genye caa hegi [a atebwo ne ha] a Mwametau ten na time uce gun! Anaa na wâé heme genye nihe pwo-olé ten, me pipaunueng. Ke genye penem den ko a mulip na iitihi ke wâé ten. Ke genye te nihe pwoiitihi ten,

²⁹be wo Padué henye, ke e pwohewii a miû na e pwo me éle tieden ati ni naado!

Ébérū 13

Bénebwéne pwooti

¹Wâé heme geé te pipwoééhewé, pwohewii ni acéhi ne ko Kériso.

²Ke geé hegi ni apulie na lé âbé pelewé. Be wo lèpwo béén, ke time lé uce temehi pie, lé hegi ni *âcélo te Padué.

³Ke geé niimi mwo lèpwo [acéhi béewé] na élé he karépu, ke geé mu he ni picani me woélé, pwohewiin heme wogewé na ciekewé mwo. Ke te piwien mwo ne ko nina ahilé me pwo ahinaado ne ko ni éélé. Wâé heme geé pwo me cunu gewé me woélé, pwohewiin heme ni éewé na lé pwotahi ne kolé.

⁴Ke geé paciitihi a piaten. Ke geé nemwo pibune: Nemwo êjele koja ni mwodewé, ai ni aiu hewé. Be wo Padué, ke e bo ne cuhinaado te lèpwona lé wonaa, me ati lèpwona lé pipule hauli me ni béén.

E picani tenye wo Padaame

⁵Geé nemwo pwo me ânenimewé ne ko a mwani! Geé pipwodéén ko ni naado na e pelewé. Be e caa te pii wo Padué pie: *Time é o uce engen kojako, ke é bo te pwopweehi ne kom.* Deutéronome 31.6

⁶ Ke anaa kuti, na me time uce pinekepé tenye. Be: E te *celuimiéo wo Padaame hung. O time uce mwotiéo ko ni apulie. Te tice aceli jan me lé pwo tong. Psalme 118.6 Weengaa a pwooti na me genye pipatemehi, ne ha a pipwodéén!

⁷ Geé niimi lépwo apihuô tewé ne ha a céhi, li lé pébé céikewé a pwooti te Padué. Ke geé nemewé ne ko ni bwo mulie telé, me ni *adéhi na e âbé mu kolé. Ke wâé heme geé pipwohewilé.

Âcéi Iésu

⁸ Wo Iésu, ke te céiu a bwo mu ten, ânebun, é jenaa, ke é dieli mwo!

⁹ Geé nemwo hegi haulihi ni muko pétaapwo pune na ité. Be koli lé bo pipatiedenikewé. Be te icehi a *pipwoééhe tice ja kon de Padué, na e temehi me e pamwoihi ni pwonimenye, kehe time uce a bwo piténédehi nen denye ni patén ko ni wiinaado. Be te junihe piticenaado ne ko ninaa.

¹⁰ Pwo a *apwoâpwailo tenye [na piwéden]. Ke wo lépwo apwoâpwailo éni pwo bwohemwo, ke te tice mwomwon delé ne kon.

¹¹ Wo pa apwoâpwailo ubwo, ke e mu pébé a cewéhe ni wota na taunuhi, ne ha a duaan na junihe iitihi, beme a âpwailo bépineuhi ni ta. Ke ni éé ni wota naa, ke cini ne âoté pwomwo [ne ha a céiu duaan na e ité koja a pimu te ni apulie].

¹² Wo Iésu, ke [weeng pa âpwailo tenye. Ke lé téétieng, ke] e mu he ni picani, ke e mele ne pwomwo koja a pwomwo ubwo. Ke téé a cewéhen, beme puu taabwon ni ta pwo tenye, ke me pwéélang [ni pwonimenye ne ânebuhe Padué].

¹³ Wâé heme genye âcéi Iésu, ke me genye te mu he ni téé me ni tanim kon. Ke genye wie me weeng koja ni bwo mulie te ni apulie [na ta jélé].

¹⁴ Be a ju amu tenye, ke time uce e pwo a bwohemwo ce, be o tieden. Kehe genye omehi cehi a amu na e jedi he miiden, he na genye o â lang.

¹⁵ Weengi ni âpwailo na wâé te Padué, na me genye ne ânebuhen: Me genye pipaunuhi a niin, me pipatemehi pie, Padaame henye.

¹⁶ Ke a céiu: Ke me genye pwo ana wâé, ke me genye pipwoééhe nina tice delé. Anaa kuti a âpwailo na wâé ten.

Pwo me piwahin gewé ke geé pwoitihi

¹⁷ Wâé heme geé pwo me piwahin gewé, ke me geé piténéde ni apihuô tewé [ne ha a céhi]. Be e bo tautilé wo Padué mu kowé. Ke geé pwo me lé pipwodéén ko ni bwomu tewé, ke geé nemwo pwo me téé ni pwonimelé. Be mepie piwahin jélé mu kowé, ke o te ta ne mwo kowé.

¹⁸ [Dieli jenaa ni, ke] time e uce pipé ne kome ni pwonimeme. Ke wâé heme geé te pwoitihi me deme, beme te wâé ni bwomu teme, ne ha ati ni bwomunen.

¹⁹ Ke a céiu mwo, ke é te ju ilekewé me ubwo pie, me geé pwoitihi beme é epin ko mwojuia ne mwo pelewé.

Adéihi

20-21 É ile Padué, pana e ne tenye a péém, pie, me e ne tewé ati celi tice tewé, beme geé pwo ana nimen kon. É ilehi kojaeng pie, me e penem kowé, na e pwaadeniin bé wo Padaame henye, Iésu Kériso, beme o pwo ce acehin ne kowé celi te junihe wâé ten. [Ke é pwoun de] Iésu Kériso, pa awéikenye, wogenye na genye pwohewii a pubu muto ten. [Be e pineeng me denye die ko a bwo mele ten.] Ke a cewéhen li e téé, ke anaa kuti ali âpwailo li e pacuwoshi a *piapwo [te Padué] ne tenye, na o tee mu dieli mwo. Ke wo Padué, ke e pamulipieng mwo mu ha amele. Wâé heme te ete Kériso a bwo ubwo na a wâé dieli mwo! Amen!

Pinelé

22 Wogewé lépwo béléng acéihi, é ilehi kojakewé pie, me geé hegi ehi ni âpihuô tong ne ha a tii ce. Be time uce bwolihi nina é tii, beme é pamwoiukewé, me patemehi tewé.

23 A jepule wâé ko pa bélénye Timoté: Be e caa wie mu he karépu! Ke mepie e epin ko tuiebé ne éni, ke e bo âbé céing hemepie é bo âdé caniékewé.

24 Geé ne a bwocu tong te lépwo apihuô tewé ne ha a céihi, me ati ni acéihi. Ke lé pwobwocu tewé mwo, ati ni acéihi éni ha amu Itali.

25 Wâé heme e mu pelewé a pipwoééhe tice ja kon de Padué! Adéikewé!

Cang

Cang 1

Pipwobwocu

¹ Woéo Cang, pa eabwé te Padué me Padaame Iésu *Kériso, na é pwotii lé céikewé ati, wogewé a puapulie te Padué, na papiidenikewé ne pwo a bwohemwo ati.

Me nye cumang ne he ni tacebwén

² Lépwo bééng, geé pipwodéén heme e tuie ne kowé ni pétaapwo tacebwén.

³ Be geé temehi pie, a tacebwén, ke e ne me nye cumang ne ha a piuca [ke e habwii a bwomune a céihi].

⁴ Kehe a piuca, ke wâé heme e pwo a penem den. Be me wonaa, ke me wâé ne kowé, ke me hején gewé, ke heme te tice aceli me tieden mu kowé.

Genye ile Padué ne ha a céihi

⁵ Hemepie pwo pace mu hadeniiwé celi time e uce temehinaado, ke wâé heme e ile Padué, be weeng pana e ne me piticenaado ne kon, ke e bo ne ten.

⁶ Ke wâé heme e ilehi ne ha a céihi, ke me time uce pinekepé ne ten. Kehe wo pana pinekepé ne ten, ke e pwohewii a jié na me e cuu na a dan, ke e â he ni piduaan.

⁷⁻⁸ Wo pa apulie na e wonaa, ke e nemwo niimihi pie, e bo hegi ace céiu naado mu ko Padaame. Be time e uce mu mang ne he ni bwopemieng.

Piticenaado ne ko ni naamuunye

⁹ Ke mepwo wo pa acéihi na te tice den, ke me e pwo me piwâénimen, be e bo pineeng da wo Padué.

¹⁰ Ke mepwo wo pana pwo den, ke me e pwo me piwâénimen ko a bwo neeng ole. Be bo tieeng pwohewii ne ko a muu meté.

¹¹ Be heme e taawie a téale, ke te nihe pwo niihen, ke e pwo me meiu a meté, ke e tupwo a muun, ke tieden a bwo wâé nen. Ke e wonaa wo pana pwo den, be e o mele ke o tieden ni penem den.

Me go pwo ana ta ke te wogo

¹² Piwâénime pa apulie na e cumang ne he ni tacebwén, be é alechen, ke e bo hegi a kuron ko a mulie na e caa mi pii wo Padaame pie e bo ne te lèpwona eânimelé ten.

¹³ Ke me te tice paceli e pii, heme tacebwénieng, pie: «Wo Padué na e tacebwéniéo.» Be wo Padué, ke pwocoon me e tacebwénieng na a ta, ke pwocoon mwo me e uce tacebwéni pace.

¹⁴Kehe muko pétaapwo ni apulie na tacebwénilé, heme lé âcehi nina te nimelé kon.

¹⁵Ke ana nimem kon, ke me go te âcehin, ke e pééko nge ha a ta. Ke a ta, ke me go tee pwo, ke e pééko nge ha a mele.

¹⁶Geé nemwo pipweéo, wogewé ni ju béeing:

¹⁷Ati ni âpipati na junihe wâé, ke ni *adéihí na nye hegí, ke tai opé mu jedá, pele Caa na e ne ni pwéélang. Te tice celi taatééhi ne pelen, te tice celi mu ha a melepiing.

¹⁸Te é mu ko ana nimen kon, ke e ne tenye *a ju mulip, mu ko a pwootti na juuju, beme junihe pwonaado ne konye mu ko ati nina e tabuhi.

Go téne ke go pwo!

¹⁹Geé téne ehi, wogewé ni béeing na eânimung dewé: Geé muko pétaapwo tabemi ehi. Ke me bwolihi me cihe. Ke me bwolihi me okéé.

²⁰Be a okéé te pa apulie, ke time e uce pwo ana nime Padué kon.

²¹É mu ko anaa, ke geé necu nina ta, ke ni naado na mwiihi. Ke geé pwo me piwahin gewé, ke geé hegí a pwootti na e caa cemi he ni pwonimewé wo Padué, ke anaa, ke jan me e celuimikewé.

Me geé ténedehi a pwootti

²²⁻²³Geé tabemi a pwootti ke geé ténedehi! Be hemepie geé te ju tabemi cehi, ke geé pipweéo, pwohewii pa apulie na e omehi a démen ne ha apiocile,

²⁴kehe é alecehen, ke e engen, ke e te ju pwome neuhi ace bwo alieng!

²⁵Kehe adéi pana e te nihe cémun ko ni patén [de Padué] hemepie e tee penem, ke me time e uce neuhi nina e téne. Ke e bo pituumé ne ha ana e pwo. Be hején a pwootti naa, ke e tuwokenye mu he nina e imwikenye.

²⁶Hemepie pwo pace apulie celi e pipii den pie pa apwoiitihi, ke hemepie time e uce pipwocile a bwo cihe ten, ke e te pigeti a pwonimen, ke te ju piticenaado ne ko a pwopwoiitihi ten.

²⁷Weengi a pwopwoiitihi na te tice ta hen ne ânebuhe Padué, pa Caa tenye: Me nye cile ni ewa na te tice nyaa me caa telé; Me nye picani te ni depwele ne he ni picani me téé na lé mu hen; Me time genye uce pwo me e âbé konye a ta pwo a bwohemwo.

Cang 2

Nemwo pipwoinen ne ko ni apulie

¹Wogewé ni béeing, heme geé céhi ne ko Padaame Iésu Kériso, na te junihe ubwo *a wâé ten, ke me time geé uce piwâé pace céiu koja pace céiu.

²⁻³Geé cuwoteeke niimihi ani, pie: Lu â taabé ha ace *mwotapitihi wo lupwoce apulie: Wo pa céiu, ke pwo ce mwani megele kon, ke te junihe wâé ni naamuun. Ke wielí geé pipéce ne kon, ke geé pii ten pie: «Aje, go âbé tebwo éni ânebun!» Ke wo pa céiu, ke tice den, ke time uce wâé ni epwénen. Ke wielí [geé pwohuu ten ke] geé pii ten pie: «Aje! Go tebwo ole pwo bwohemwo ko ni ang!»

⁴Kona é ne tewé, ke time geé uce pipwoinen ne ko ni apulie? Ke time uce wogewé lèpwo atautinaado, na ta ni bwo niimihinaado tewé?

⁵ Geé tabemi, wogewé ni béeng na eânimung dewé! Wo Padué, ke e pipégali lèpwona tice delé ne ha a bwo alihí nen de ni apulie, beme o pwo delé ne ha a céhi. Ke e ne telé a Mwametau na e caa mi pii te lèpwona eânimén delé. Ai, kona time geé uce temehi anaa?

⁶Kehe wogewé, ke geé tééti lèpwona tice delé! Kona time uce wo lèpwona pwo delé, na lé pwohuu tewé, ke lé péékewé nge he ni mwotautinaado?

⁷Kona time uce woélé, lèpwona lé pii me ta a nii [lésu] ne kowé, na ju wâé?

Geé pipwoééhe ni béen

⁸A naado na wâé, ke me geé ténedehi a patén ne he ni *tii iitihi pie: *Go pwo me eânimem de ni béen, pwohewii a bwo pieânimem dem.* Lévitique 19.18 Ke wâé anaa heme geé pwo, be a patén [na junihe pipwonaado ne kon] ne ha a *Mwametau te Padué.

⁹Kehe mepie geé piwâé pace céiu koja pace céiu, ke geé pwo ana ta. Ke geé caada a patén, ke o tautikewé kon.

¹⁰Be wo paceli e piténedehi ati ni patén, ke hemepie e caada ace patén celi te ju céiu, ke e pwo ana ta ati ne ko ni patén.

¹¹Be e pii wo Padué pie: *Go nemwo pibune.* Exode 20.14 Ke e te pii mwo pie: *Go nemwo taunuhi apulie.* Exode 20.13 Ke hemepie time go uce bune toomwo, ke mepie go taunuhi apulie, ke go caada ni patén.

¹²Wâé heme geé cihe ke geé penem pwohewii ni apulie na [lé temehi pie] o tautilé ko a patén [na piwéden koja ni *patén de Moosé]. Be a patén naa, ke tuwokenye mu he nina e ciekenye.

¹³Be é ha a tautinaado, ke o te tice pipwoééhe ne ko nina te tice pipwoééhe telé ko ni bélélé. Kehe mepie geé pipwoééhe ni béeuwé, ke time e o uce tautikewé wo Padué, kehe e o pipwoééhewé.

Ni bwomu tenye @ ke e pajuujuhi ni céhi tenye

¹⁴Ni béeng, kona te pwonaado ne ko a bwopiinen de pace céiu pie eten a céhi, hemepie time e uce habwii ko ce penem? Kona te jan me e celuimieng na a céhi naa?

¹⁵Geé cuwoteeke niimihi ani: Pwo pace ai wo êce béeanye, hemepie te tice mwaanu kolu, ke me tice wiinaado telu.

¹⁶Ke mepie geé pii telu pie: «Geu âdé ne ha a péém, ke geu picuwohe epwén, ke geu pwowiinaado ehi», ke te ju piticenaado ne ko ni pwooti naa, hemepie time geé uce ne celi me lu mulie kon!

¹⁷Ke wonaa a bwomune a céihi, be hemepie time e uce penem, ke e te mele ne kon.

Habwii a céihi tenye ne he ni huô

¹⁸Wieli go bo pii tong pie: «Wogo, ke etem ni penem; ke woéo, ke etong a céihi.» Ke é hegi ne tem pie: «Go habwii tong a céihi tem, heme te tice celi go pwo! Ûhu! Woéo, ke é bo habwii tem a céihi tong ne he ni penem dong!»

¹⁹É he go céihi pie te pwo Padué na te céiu nang, ke te wâé a bwomunen naa? Lé te céihi mwo lépwo iténaado, ke éjén jélé ko a bwo mwotilé!

²⁰Wogo pa apulie na te tice bwo temehinaado tem! Kona time go uce temehi pie, te ju piticenaado ne ko a céihi, heme te tice béhabwiinen?

A céihi te Abérama me Rahab

²¹Wo *Abérama, pa watihenye, ke he time uce mwomwon nang mu ko ni penem, he e ne pa naîn Isaaka pwo apwoâpwailo? Uhuu!

²²Go te alihí pie a céihi, ke lu piengen ibu me ni penem, ke é mu ko ni penem, ke e pwo me wâé a céihi.

²³Ke wonaa a bwo *pajuujuhi na ana tii ne he ni tii iitihi: *E céihi ne ko Padué wo Abérama, ke é mu ko a céihi ten, ke wo Padué, ke e pwo me pa apulie na e *mwomwon ne he pwahamiin.* Genèse 15.6 Ke wo Padué, ke e pii kon pie pa béen.

²⁴Geé te alihí pie, mwomwon pa apulie mu ko ni penem, kehe time uce a céihi cehi.

²⁵Wo Rahab, ê toomwo pwopwaaden, ke he time e uce pwo mwo me mwomwon nang mu ko ni penem? Uhuu! Be e hegi lupwo coda *Isaraéla [li lu â cedi bune amu ten lériko] ke e pwo me lu cela nge ha a céiu pwaaden.

²⁶Pwohewii ne ko a éé apulie, be e mele heme te tieden a jenen; ke piwien ne mwo ko a céihi, heme te tieden ni penem.

Cang 3

Ni piokéé heme geé pimu ibu

¹Me time uce hiwon mu hadeniiwé celi nimelé me lé pacémunihi, be geé te temehi pie, wo Padué, [ke e ucéihi ni naado na ubwo ne kome ni apwocémun] ke e bo te junihe tautikeme koja ni béen.

Nye pipwocile ni upehenye

²Genye muko pétaapwo pwo nina ta, kehe mepie pwo paceli e pipwocileeng ne he ni bwo cihe ten, ke jan ne kon me e pipwocileeng ati ne he ni naado.

³Be hemepie genye ne a taikopwo pa haricaan, beme e piténedekeny, ke genye o pééeng ati nge he na nimenye me nye â lang.

⁴Pwohewii ne mwo ko a ong na te junihe ubwo na e paengenihi na a dan. Be e biteeng ko a cuwo nahi eaong wo pa apé nen.

⁵Ke te piwien ne mwo ko a upehenye, be te ju a cuwo nahin, kehe e pipii den ne he ni naado na junihe ubwo.

A upehenye ke a miû

Geé alihia cuwo nahi miû, be te jan me e cini ace wii celi junihe ubwo.

⁶A upehenye mwo, ke pwohewii a miû na jan me e pwo me éle ati a éénye jame a mulihenye. Be e pébé a ta na tidi a mulihenye. Be a miû na patéi mu ha a miû na ubwo te *Caatana!

⁷Te jan ne konye ni apulie me nye pé ni muko pétaapwo wota, ke me nye pwo me lé piténedehi. Te piwien ne mwo ko ni meni, me nina lé éewo, ke nina lé mu he tabe.

⁸Kehe te tice pace apulie celi jan me e pipwocile a upehen heme e cihe! Be pwocoon me genye pacuwoshi, be oba ko a tabe na ta na genye mele kon.

⁹É mu kon, ke genye *adéi Padaame, pa Caa tenye, ke é mu kon, ke genye apwohi ni apulie na e pwo mu ko a démen!

¹⁰É mu ko a pwo pa apulie na te céiu nang, ke e wie a adéihi, ke a apwohi. Time uce wâé, wogewé lèpwo béréng, heme wonaa.

¹¹A acaamatabe, ke he e te pwo me e taawie a ju tabe, me a tabe na male?

¹²A majing, wogewé ni béréng, ke he te jan me e ne ce olive, ai ace éé tabe megele, me e ne ce ace majing? A tabe he jié, ke pwocoon me e pwo ace ju tabe.

Bwopemikenye

¹³Woo, mu hadeniiwé, paceli e temehinaado? Be, me e habwii ko ace bwopemieng celi wâé ne ha a bwo pipwoipieng.

¹⁴Kehe mepie e he pwonimewé a pitaaba ke a pipwokon, ke geé nemwo pipii dewé, ke geé nemwo gele.

¹⁵A bwo temehinaado naa, ke time e uce âbé mu jedi he *miiden, kehe é mu pwo bwohemwo, mu ko nina te nimewé kon na ta. Ke âbé mwo mu ko Caatana.

¹⁶Be é he na e lang a pitaaba ke a pipwokon, ke e lang a pihauli, ke tai ni bwopwone ni naado na ta.

Bwomu mu ko a ju bwo temehinaado

¹⁷Te tice celi ta ko pa apulie na oba nang ko a bwo temehinaado mu jedi. Weengi ni huô ten: Pa apulie na e paciitihi a mulihen; Pana e pwo ati mu ha a ju pwonimen; Pana e pipwopai ati lèpwo apulie, be time e uce pipwoinen ne

kolé; Pana e téne ehi lépwo béén ne ha a bwo pipwoiipieng; Pana bwala nang ne ha a bwo hegi nen den ne telé; Pana e pipwoééhe lépwona lé mu he ni gia; Pa apulie na junihe hiwon ni ace acuwo na wâé ne ha a mulihen.

18 Wo lépwona lé wonaa, ke lé cemi ha a péém, ke nye tai pitii âdaanu: a bwo pipwoiipihi ke a péém ne pelenye.

Cang 4

Bwopemikewé na ta

1 E âbé mu wé ni piokéé, ke nina piehadeniiwé? Kona time uce é mu ko nina nimewé kon, na lé ko pipwopa ne he ni pwonimewé?

2 Be te junihe nimewé kon, kehe time uce etewé, ke geé pitaaba. Ke geé pitaacunaado ke pipwopa die ko ana geé pwo me geé pitaunukewé. Time uce etewé, be time geé uce ile Padué.

3 É heme geé ilehi, ke time geé uce hegi, be geé pi-ilehi tahi. Be geé hane ni naado âcehi nina nimewé kon na ta.

4 Wogewé lépwo apibune, be geé engen koja Padué! Kona time geé uce temehi pie, hemepie eânimewé ko ni naado na ta pwo a bwohemwo, ke a bwopiinen pie, geé tééti Padué? Be wo pana nimen me e pipwoeabwé te a bwohemwo, ke e pwo ana ta ne ko Padué.

5 Be caa te tii ne he ni tii iitihi pie, [ana nime Padué kon, ke a ju pwonimenye] be e ne konye a *Jenen litihi ten, na te junihe eânimien den. Ai, kona geé te niimihi pie te piticenaado ne ko a pwooti naa?

Geé piâmwonu Padué

6 Te junihe ubwo a âpipati na e ne wo Padué. É mu ko anaa, na tii ne mwo he ni tii iitihi pie: *Wo Padué, ke e cuwode lépwna lé pipaunulé. Ke wâé nang ne ko lépwna lé pipwoiipilé.* Proverbes 3.34

7 Geé piténede Padué, ke geé cuwode *Caatana, ke e bo cela nge ité kowé.

8 Geé piâmwonu Padué, be e bo piâbé mwonukewé. Geé puu ni iwé, wogewé na ta ni huô tewé. Geé pwo me wâé ni pwonimewé, be lépwo apulie na time geé uce cumang [ne ko a bwo piténedeeng dewé].

9 Geé pininim [ke bitekewé nge céii Padué]! Ke me a bwo piap tewé, me a bwo pituumé tewé, ke me taatééhi ko a piwahin, ke ni pwoé.

10 Geé pipwoiipikewé ne ânebuhe Padaame, ke e bo nekewé da.

Go nemwo tauti pa béké

11 Go nemwo cihe me ta ne ko ni béké, ke go nemwo tautilé! Be wo pana e wonaa, ke e cihe me ta ne ko ni patén, ke e tauti ni patén. Kehe time uce wogo na me go tauti ni patén, kehe me go ténedehi!

¹²Te céiu pana e ne ni patén ke pa atauti nen, ke wo Padué. Ke te weeng cehi pana jan ne kon me e *celuimi ni apulie, ke me e pwo me lé patieden. Kehe wogo, ke woo, me go tauti pa béém?

**Paténe lépwona pwo delé
Geé pwo me piwahin gewé ne ko Padué**

¹³Geé téne, wogewé lépwona geé pii pie: «É jenaa ai é meé, ke genye bo â ha a pwomwo ubwo, ke genye o mulie lang he celi céiu jo. Ke genye o pwo ce bwopwonen, beme pwo ce mwani tenye.»

¹⁴Kehe time geé uce temehi aceli e bo tuie meé! Be he ade a mulihewé? Geé pwohewii a caamele na e tuie ju é ha a céiu benaamwon, ke caa te tieden mwo.

¹⁵Ke me geé o pii pie: «Hemepie te nime Padué, ke genye o mulie, ke genye bo pwo ani, ai ani.»

¹⁶Ke wogewé, ke geé pipii dewé ne he ni picibehede tewé. Kehe a naado na time uce wâé [te Padué].

¹⁷Be wo pana e temehi ana wâé ke e pwo, ke me time e uce pwo, ke e pwo ana ta.

Cang 5

Geé bo mu he ni picani!

¹Wogewé lépwona pwo dewé, wâé heme geé te nihe é me ubwo, wonaa mu ko ni picani na e o bo tuie ne kowé!

²Be o muti ni dewé, ke lé o wii ni epwénewé ne ni ma.

³Ke o paale ni mwani tewé, ke lé bo cihe da me pipé ne kowé. Ke bo wii a éewé, pwohewii ne ko a miû. Be geé caa taineibuhi ni mwani bépwo na a bwohemwo ce na o bo tieden!

⁴Ke time geé uce pwocuhi lépwo apenem dewé, ke lé tee ilehi kojakewé a cuhilé. Ke e téne wo Padaame, pana te junihe pwojunuun ne ko ati ni naado.

⁵Geé mulie ne pwo a bwohemwo ha a tuume tewé ne ko ni naamuuwé. Geé te pwo nina te nimewé kon. Geé te junihe wiinaado ehi, heme ko pwo ni apulie na lé metihi menele.

⁶Ke geé caa ne a cuhinaado te pana mwomwon nang, die ko a bwo taunueng, ke time e uce pipwopain.

**Bénebwéne pwooti
Geé cumang ne he ni picani**

⁷ Ni bééng, geé cumang heme geé ucéihi a bwo mwojuia mwobé te Padaame. Be wo pa apenem ko âdaanu, ke e ucéihi a benaamwon ko tii âdaanu, ke e ucéihi die ha a bwo tuie te ni bécéiuhe ute, ke ni bénebwéne ute.

⁸Ke wogewé mwo, me mu mang ni pwonimewé heme geé ucéihi, be o caa e mwonu a bwo âbé te Padaame.

⁹Geé nemwo pipii lépwo béén, beme time e uce tautikewé wo Padué: Be neko pa atautinaado he e caa ko cuwo he pomwa!

¹⁰Ni bééng, geé pipwohewii lépwo *péroféta na lé cihe ne he nii Padaame. Be lé te cumang ne he ni picani.

¹¹Genye pii pie, lé pituume ne nina lé mu he ni picani. Be geé caa te temehi a jepule ko a bwo uca te Job, ke geé caa te temehi ni *adéihi na e ne ten alechen wo Padaame. Be wo Padaame, ke te junihe wâé nang, ke e pipwoééhenye.

¹²Ni bééng, geé nemwo *piapwo da he a miiden, ai a bwohemwo, ai é ne ko ace céiu piapwo. Kehe me geé pii pie «éa», ke te éa, ke me geé pii pie «ûhu», ke te ûhu, beme time e uce tautikewé wo Padué.

A pwopwoiitihi te pa acéihi

¹³Kona e mu he ni picani wo pace pibééwé? Wâé heme e pwoiitihi. Pwo paceli e pituume? Wâé heme e pwonyebi, beme e pipaunu Padaame.

¹⁴Pwo pace mu hadeniiwé celi cunu nang? Ke wâé heme e tode lépwo apihuô te ni acéihi, beme lé pwoiitihi ne kon, heme lé ko ne huîin a *huile* ne he nii Padaame.

¹⁵Be a pwoiitihi ne ha a céihi, ke o bo celuimi pana cunu nang, ke e bo pwo me wâé nang wo Padaame. Ke é hemepie e pwo celi ta, ke e bo pineueng wo Padué.

¹⁶Geé pipii tewé nina geé pwo na ta, ke geé pipwoiitihi ne kowé, beme wâé gewé mu he ni cunu kowé. Be a pwoiitihi te pana mwomwon nang, ke te junihe pwo a junuun.

¹⁷Wo *Élia [pa péroféta ânebun] ke pa apulie pwohewiikenye. Ke e te junihe pwoiitihi beme time e uce ute, ke time uce ute ne pwo a bwohemwo, he na 3 ni jo ke 6 ni wole.

¹⁸Ke é alechen, ke e pwoiitihi mwo, ke te ute kuti, ke [te wâé mwo] a bwohemwo, ke pwo mwo ni âdaanu.

Pé mwobé lépwo bééwé

¹⁹Ni bééng, hemepie pwo pace mu hadeniiwé celi e caa junihe â ité koja a juuju, ke me e pééeng mwobé wo pace céiu.

²⁰Ke me geé temehi pie: Pana e bo pé mwobé pana e pipatieden, ke e bo celuimi a mulihen mu ha amele, ke wo Padué, ke e bo pétaabwon ati ni ta pwo ten.

1 Pétérū

1 Pétérū 1

Pipwobwocu

¹Woéo Pétérū, na é pwotii, woéo pa *apostolo te Iésu *Kériso. [Be e neéo ngen beme é patemehi a pwootti ten.] É pwotii lé céikewé lèpwo apulie te Padué, na geé mu he ni pétaapwo province: Pont†, Galat, Kapados, Asia ke Bitini.

²Wo Padué Caa, ke e caa pipégalikewé, be weengaa a âniimihinaado ten na caa te bwolihi. Ke a *Jenen litihí ten, ke e ne me wogewé a puapulie ten, na iitihi. Ke wo [pa Naîn] Iésu Kériso, ke e caa pétaabwon ni ta pwo tewé, ko a bwo tée na a cewéhen. Ke caa wogewé lèpwo apulie na geé piténedehi. Wâé heme etewé a pipwoééhe me a péém na piwéden!

E celuimikenye wo Padué

³Pipaunu Padué, pa Caa te Padaame henye, Iésu Kériso! Be te nihe ubwo wéden a pipwoééhe ten me denye. Ke e ne tenye a mulie na mwo coho mu ko a bwo mulie cemwo mu ha amele te Iésu Kériso. Ke é mu ko anaa, ke etenye a céihi na mang,

⁴é ne ko ati ni *adéihi na nye ucéihi. Ke weengi: Ke o tai ni de ni naî Padué a mulie na e jedá he miiden, é he na time uce ta ni naado nelang, ke time uce alili, ke time uce tieden, be e mu dieli mwo!

⁵Be e celuimikenye wo Padué mu ko a céihi tenye [ne ko Iésu Kériso]. Ke e wéikenye ko a niihen ke a junuun, beme nye bo hegí ati ni adéihi ten, na e bo habwii tenye ha a *Tan Alece.

⁶É mu ko ati ninaa, ke wâé heme geé pipwodéén, heme geé muko pétaapwo mu he ni picani na téé. Be wâé heme wonaa ha a benaamwon ce te ju bahin,

⁷beme e tacebwénihi a céihi tewé. Be pwohewii a mwani megele na cini ne pwo miû, beme pétaabwon ana alili mu kon. Ke a céihi, ke te nihe a junaado koja a mwani megele, be o tieden ha ace céiu tan. Ke mepie te mang a céihi tewé, ke [é alecehe ni tacebwén] ke geé bo hegí a pipwowâé na nihe ubwo ke piwéden, ha a tan na e bo pihabwieng de ati ni apulie wo Iésu Kériso.

⁸⁻⁹Time geé mu uce ali Iésu, kehe icehi ana o eânimewé ten. Ke time geé uce téele alieng, kehe icehi ana geé tee ko céihi ne kon. Ke é mu ko anaa, ke e celuimikewé wo Padué, ke o te junihe ubwo wéden a pipwodéén dewé, na pwocoon me nye pii.

Patemehi ânebun a bwo celuimikenye

¹⁰⁻¹¹ Lé mi pébé a pwootti te Padué wo lèpwo *péroféta bwolihi, ke lé cihe ko a âpipati na genye bo hegí: a bwo celuimikenye. Be e mu kolé, ke a Jenen litihí te Kériso, ke e ne me lé pii pwaatihi a bwo picani ke a bwo mele te Kériso, me a bwo ubwo na a wâé ten alechen. [Kehe icehi ana time lé uce temehi a pwootti na lé pébé] ke lé te nihe hane me lé temehi pie o [wooélé, ke] éniile, ke o woté.

¹²Be e pii telé wo Padué pie, ati ni naado na lé pii pwaatihi ne he niin, ke e bo pacuwohi alecehelé, me denye jenaa. Ke [weengaa ana e tuiebé. Be] li apulie [li e pahedelé ngen wo Padué] ke lé caa patemehi tewé a *Pwooti Wâé, ne ha a junuu a Jenen litihi na e âbé mu he miiden. Ke a Pwooti Wâé naa, ke te nihe nime l épwo *âcélo me lé temehi [ke me lé alihí aceli e o bo âbé alecehen].

Mulie ha a mulie na iithi

¹³É mu ko anaa, ke geé pipwoipikewé, ke geé tee ûmiê, ke geé tee niimihi ni adéihi na e bo ne tewé ha a tan na e bo pihabwiieng hen wo Kériso.

¹⁴Geé piténedehi, be wogewé ni naîn, ke geé nemwo âcehi nina te nimewé kon na ta ânebun, he time geé uce téele temehi Kériso.

¹⁵Geé pipaciitikewé ne he ni huô tewé, be wo Padué na e todekewé, ke Padué na e iithi.

¹⁶Be caa te tii ne he ni *tii iithi pie: *Geé pipaciitikewé, be é iithi. Lévitique 19.2*

Paciiti Padué

¹⁷Geé pwoiitihi te Padué, ke geé pii kon pie Caa. Ke [wâé heme geé tee niimihi pie] te weeng na e bo muko tautikenye ko nina nye pwo, ke time e uce pipwoinen ne ko ni apulie. Ke é ko anaa na me geé paciitieng he geé mwo ko mulie éni pwo bwohemwo.

¹⁸Be geé te temehi ehi pie [wogewé ni apulie ten jenaa. Be] e pwocuhikewé ko a cuhin na te junihe ubwo. E celuimikewé mu ha a mulihewé ânebun na geé pé koja l épwo watihewé; a mulie na time uce jan me e ne tewé a ju adéihi. Time e uce pwocuhikewé ko mwani megele ai mwani pwojo, ai ko ce bée naado celi nyaale, ke muti.

¹⁹Ûhu! E celuimikewé ko a cewéhe Kériso [na e téé he li e mele me dewé]: a cewéle na nihe ubwo wéden a cuhin. Wo Kériso, ke te tice ta kon, pwohewii a nahi muto na *pwoâpwailo kon, na te tice alili me cunu kon.

²⁰Be e caa mi pipégalieng wo Padué, ânebuhe a bwo tabuhi na a bwohemwo [beme e bo mele, ke me e tuwokenye mu he ni ta pwo tenye]. Ke e habwiieng tewé wo Padué he ni benaamwon ce, be caa *ni bénebwéne tan.

²¹É mu ko Kériso na geé céhi ne ko Padué na e caa pwo me e mulie cemwo mu ha amele, ke e ne ten a bwo ubwo na a wâé. Weengaa ana me geé temehi pie, wo Padué, ke e bo ne tewé ana e caa te pii. Ke geé *ucéhi ne ha a céhi.

Geé pipwoéhéhewé

²²Geé caa hegi a [pwooti na] juuju: [a Pwooti Wâé ko lésu Kériso] ke geé piténedehi, ke caa ciitili taabwon ni ta pwo tewé mu he ni pwonimewé. Ke é mu ko anaa, ke caa jan me geé pipwoéhéhewé l épwo acéhi béewé mu he ni ju pwonimewé. Ke te nihe wâé heme geé te cuwo ko wonaa.

²³Be geé caa âbeeble cemwo, ke a mulie na geé caa hegi, ke te nihe piwéden koja ana geé hegi koja lu nyaa me caa tewé! Be anaa, ke o nyaale ke tépu.

Kehe te icehi a mulie na mwo coho na é pii, ke e o mu dieli mwo, be e âbé mu ko a pwooti te Padué, a pwooti na e *mulie dieli mwo.

²⁴ *Ati ni apulie, ke lé pwohewii ni muu meté. O meiu jélén ati. O tieden a bwo wâé jélén, pwohewii a muu buké na caa meiu, ke e tupwo.*

²⁵ *É ne ko a pwooti te Padaame, ke e o te mu die ha a pwonehin! Ke e o tee cumang dieli mwo. Ésaïe 40.6–8 A pwooti naa, ke a Pwooti Wâé na caa patemehi tewé!*

1 Pétérus 2

¹ É hemepie wonaa, ke tahi taabwon ni huô na ta, pwohewii a pipwohuô, a gele, a pipwokonaado, me a pipii apulie.

² Wâé heme geé pwohewii a cuwo nahi ewa na mwo ju picileeng, be te céiu cehi a naado na wâé ten, ke a dile ten. Ke wâé heme geé wonaa ko a pwooti te Padué. Geé nenimewé ne kon, ke geé te nihe ilehi, be weengaa a wiinaado [ne ko a pwonimewé] na time e uce pimu ibu me ace céiu naado. Ke e ne tewé, beme ubwo gewé da ne ha a mulie na mwo coho na e kowé.

³ Be geé caa nemi mu ko a bwo wâé Padaame.

Wo lésu ke pa ju péi paamwa

⁴ Geé âbé céii Padaame lésu. Be weeng pa péi na e mulie, [ke pa paa a mulihenye]. Lé téétieng wo lépwo apulie [na ta jélén] kehe icehi ana e pipégalieng wo Padué, be te junihe pwonaado ne kon.

⁵ Ke wogewé mwo, ke geé pwohewii ni péi na lé mulie. Wâé heme geé pinekewé [te Padué] beme e nekewé ha a Mwaiitihi ten na e ko bahi. A céiu mwo, ke geé pwohewii ni *apwoâpwailo [âpipégali te Padué]. Ke a penem dewé, ke me geé ne ten ni âpwailo, mu ko a *Jenen Iitihi na e kowé. Ke e bo hegi wo Padué mu ko ana e pwo wo lésu Kériso.

⁶ Be caa te tii ne he ni tii iitihi [ko lésu] pie: *Go téne ani, go a puapulie! É ne ha amu *Sion a péi na te junihe pwonaado ne kon, beme a péi paan. Ke wo pana e céhi ne kon, ke time e o uce tupwo . Ésaïe 28.16*

⁷ Te junihe a junado ne tenye a péi naa, [wo lésu Kériso] be genye caa céhi ne kon. Kehe icehi ana [weengi a pwooti ko] lépwona muhi telé me lé céhi ne kon: *Ali péi li lé tahi taabwon wo lépwo abahi mwa, ke te anaa kuti a ju paamwa. Psalme 118.22*

⁸ Ke a céiu mwo: *Ke a péi na lé ténedé kon; Ke a péi na e pwo me lé tupwo. Ésaïe 8.14* Be te muhi telé me lé mwomwohi a pwooti te Padué. Ke wonaa ana me e tuie ne kolé.

Wogewé a puapulie te Padué

⁹ Kehe wogewé, ke a puapulie na e pipégali, beme e pipwoâpwailo te Padaame: a amu na iitihi, a bele ten. E todekewé mu ha a melepiing nge ha a pwéélang den na junihe wâé, beme geé pii ni wâé ten.

¹⁰ Wogewé ânebun lépwona time geé uce puapulie ten, kehe é jenaa, ke wogewé a puapulie te Padué. É ânebun, ke time geé uce hegi a pipwoééhe te Padué, kehe é jenaa, ke geé caa hegi.

A mulihenye ne pele @ nina time lé uce temehieng

¹¹ Wogewé ni ju bééng, wogewé ni apulie na geé âbé ke geé o te engemwo mu pwo a bwohemwo ce. É mu ko anaa, na é ilekewé pie, geé nemwo âcehi nina te nimewé kon na ta, na lé pwopa ne ko a mulihewé.

¹² Geé pwo me wâé ace bwopemikewé ne ha awieme nina time lé uce temehi Padué. Be mepie lé pipé ne kowé pie geé pwo aceli ta, ke lé bo alahi nina geé pwo na wâé. Ke me wonaa, ke lé bo pipaunu Padué ha a tan na e bo âbé hen.

Geé piténede lépwo apihuô ha amu

¹³ Geé piténede lépwo apihuô, wonaa mu ko Padaame: wo pa daame he amu,

¹⁴ ke wo lépwo gupéno mwo. Be nelé ngen beme lé pwocuhinaado te lépwona lé pwo ana ta, ke me lé piwâé lépwona lé pwo ana wâé.

¹⁵ Be nime Padué ko ani: É mu ko ni bwopemikewé na wâé, ke me geé capuhi ni pwo nina time lé uce temehinaado, be te ju piticenaado ne ko nina lé pii.

¹⁶ Geé engen ehi ne he ni bwomu tewé, be caa tuwokewé mu he na geé mu lang. Ke ni bwomu tewé naa, ke me time e uce neduwohi ni penem dewé na ta. Geé engen ehi pwohewii lépwo eabwé te Padué.

¹⁷ Geé éewo ko ni apulie ati. Ke geé pwo me eânimewé te ni béewé, ke geé pipaunu Padué, ke geé éewo ko pa daame he amu.

Nye pwo me piwahin genye @ pwohewii Kériso

¹⁸ Wogewé ni *apenem tice ja kon, ke geé ténedé lépwo caa tewé ko penem: time uce é ne ko lépwona wâé jélé cehi, ke wâé telé gewé, kehe é ne mwo ko lépwona lé pwo a okéé.

¹⁹ Geé mu he ni picani, na me time geé uce mu hen. Ke heme wonaa be nimewé me geé ténedé Padué, ke anaa a naado na junihe wâé.

²⁰ Be é hemepie geé pwo ana ta, ke ade aceli wâé heme geé mu he ni picani kon? Ke hemepie geé cumang ne he ni picani hemepie geé pwo ana wâé, ke a naado na te junihe wâé ne he pwahamii Padué.

²¹ Be é mu ko anaa, na e todekewé wo Padué. Ke wo Kériso, ke e te mu mwo he ni picani me dewé. Ke e habwii a pwaaden beme geé uti ni apuwon.

²² Weeng panaa: *Time e uce pwo aceli ta. Mwo te time e uce téele pipwohuô te pace céiu.* Ésaïe 53.9

²³ Lé pii nina ta ne kon, ke time e uce hegi ko a ta. É he e mu he ni picani, ke time e uce heni pace céiu. E ne a céhi ten ne ko Padué, na e tauti ne ha a mwomwon.

²⁴ E pé ne ha a één ni ta pwo tenye ne ko a *kuricé. É mu ko anaa, ke nye nebén *me* genye mulie ha a ta, ke jan me genye mulie ne ha a mulie na wâé te Padué. É mu ko ni ahinaado kon na e pwo me wâé gewé.

²⁵ Ânebun, geé pwohewii lépwo muto na lé pipatiéden, kehe é jenaa, ke geé caa mwojuia mwobé céii pa awéhi muto na e wéhi ni mulihewé.

1 Pétérus 3

A pwooti ne te lu aadomwin Ni toomwo

¹ Wogewé mwo ni toomwo, geé piténede ni pétaapwo aiu hewé. Te piwien hemepie pa aiu hem, ke me time e uce céhi ne ko a pwooti te Padué. Be e bo âbé ha a céhi mu ko ace bwomu tem, ke heme te tice pwooti tem ne ten.

² Be e o alihi ni huô tem pie go éewo kon.

³ A bwo wâé gewé, ke me time uce ju é pwomwo cehi, pwohewii ni apun na péi, ke ne mwani megele, ke cuwohe ni epwén na nihe wâé.

⁴ A ju bwo wâé gewé, ke me e te mu tinawé: a péém me a pwonime na bwala. Weengaa a bwo wâé gewé na te junihe pwonaado ne kon ne te Padué, ke time o uce tieden.

⁵ Be, wonaa a bwo wâé ni toomwo na lé céhi ne ko Padué he ni benaamwon na caa âdé, be lé piténede lépwo aiu helé.

⁶ Pwohewii ne ko Sara, be e piténede *Abérama, ke e toii kon pie: ‘pa daame hung’. É jenaa, ke caa wogewé ni naîn toomwo, hemepie geé pwo ana wâé, ke me time geé uce pwo me mwotikewé.

Ni aiu

⁷ Te piwien mwo ne ko wogewé lépwo aiu helé. Geé cilelé ehi ne ha a bwo pimu ibu tewé, be te junihe pwo niihewé kojalé. Ke geé éewo kolé, be lé bo hegi *a ju mulip pwohewiikewé. Hemepie geé pwo anaa, ke o te tice aceli e o pacuwokewé ne he ni pwopwoiitihi tewé.

Nye adéilé heme lé pwotahi ne konye

⁸ Me tai céiu gewé ne he ni bwo niimihinaado, ke geé pwo me pieânimewé tewé pwohewii lépwo pwénaâjién, me ni ténaâjién. Geé pwo nina wâé, ke geé pwo me piwahin gewé ne pele ni béén.

⁹ Geé nemwo taacu a naado na ta ko a naado na ta, ke geé nemwo taacu a piciheta ko a piciheta. Kehe geé hegi pie: «Me e adéiko wo Padué!» Be e todekewé wo Padué beme geé wonaa, ke a bwopwonan me e ne tewé a *adéihi.

¹⁰Be caa te tii ne he ni tii iitihi pie: He *ninem me go mulie ha ace mulie celi wâé?* He *ninem me go mu ha a péém?* Go *nemwo pii me ta lèpwo béeén.* Ke *go nemwo gele.*

¹¹ Cela ko a ta, ke go pwo ana wâé. Hane a péém, ke âcehin.

¹² Be e wéi lèpwona lé piténedeeng wo Padaame, ke e téne ni pwopwoiitihi telé. E cuwode lèpwona lé pwo nina ta. *Psaume 34.13-17*

Adéikenye he nye mu he ni picani

¹³Hemepie geé hane me geé pwo ana wâé mu he ni ju pwonimewé, ke time o uce hiwon celi lé pwotahi ne kowé.

¹⁴Kehe mepie geé mu he ni picani be geé pwo ana wâé, ke geé pwo me piwâénimewé! Geé *nemwo pwo me mwotikewé ko ni apulie!* Nemwo pwo me pinekepé ne tewé! *Ésaïe 8.12*

¹⁵Ke wâé heme geé paciiti Kériso he ni ju pwonimewé. Geé tee pipwopweekewé me geé hegi ne te ni apulie, mepie lé tahimwokewé pie, é mu ko ade na géé céihi.

¹⁶Ke geé hegi ne telé he ni pwonimewé na bwala. Geé pipwocile ni bwomu tewé beme time e uce pipé ne kowé na a *pwonimewé. Ke hemepie lé pii me ta gewé ne ni apulie mu ko a mulihewé, be geé âcéi Kériso, ke bo tanim jélé.

¹⁷Éa, wâé heme geé mu he ni picani é mu ko a wâé na geé pwo âcehi a pihuô te Padué. Kehe time uce wâé heme geé mu he ni picani é mu ko a ta na géé pwo!

E mu he ni picani wo Kériso ke e piwéden

¹⁸Te océiu Kériso ko mele ne ko ni ta pwo te ati ni apulie. Te tice aceli e pwo celi ta, kehe e mele me de nina ta jélé, beme e péélé nge céii Padué. Taunueng ne ha a één. Ke a *Jenen litihí ke e ne ten mwo a mulie.

¹⁹Ke e â patemehi a Pwooti Wâé ne te nina lé mele, na élé he karépu.

²⁰Ni amele naa, ke nina time lé uce piténede Padué bwolihi, he e mwo ko jili a ongen wo Noé. Ke e te junihe picani ne kolé wo Padué, ke e te junihe ucéilé. Kehe te ju mehin ni apulie, 8 jélé neibuhi, na lé taa ha a ong, ke celuimilé mu ha a tabe.

²¹Ati ninaa, ke a déme a *pipuu apulie na e celuimikewé jenaa, wogewé mwo. Be a bwopiine a pipuu apulie, ke time uce ana me pétaabwon a alili mu ko a éé apulie! Kehe a ine a bwo hegi a pwoto te Padué, ke ni ta pwo tenye, ke caa pineuhi. E celuimikewé a pipuu apulie, be e mwojuia cemwo mu ha amele wo lésu Kériso.

²²Ke e caa taa he *miiden, ke e pwo jui Padué. Ke ati ni *âcélo, ke ni jenenaado, ke ati nina pwojunuun, ke lé mu haahi ni pihuô ten.

1 Pétérus 4

Mulie ne ha a mulie na wâé te Padué

¹ Wo Kériso, ke e mu he ni picani ne ha a één. Ke wogewé mwo, ke wâé heme geé mwomwohi pie: «Wo pa acéhi na e mu he ni picani, ke weeng kuti pana e caa necu a ta.» Ke é ne tewé a bwo niimihinaado naa, beme a pihe pa tewé.

² É ha a benaamwon na e mwo ko ne tewé beme geé mulie ne pwo bwohemwo, ke geé nemwo âcehi nina te nimewé kon na ta, ke me geé piténede Padué.

³ Éa, é ha a céiu benaamwon, ke geé pwohewii lépwona time lé uce temehi Padué, ke geé te mulie hauli. Be geé te nihe wiinaado ke nihe ûdu tabe megele. Ke geé pitaaba. Ke geé pipaunu ni duéé hauli: Ke a naado na te junihe ta.

⁴ É jenaa, ke lé téetihí wo lépwo béeuwé ânebun, be caa time geé uce âcéilé ne he ni naado na lé pwo na tanim, ke lé pii nina ta ne kowé.

⁵ Kehe lé bo pwocuhin nina lé pwo ne te Padué, be e caa pipwopweeng beme e tauti lépwona lé mulie, me lépwona lé caa mele.

⁶ É mu ko anaa, na a Pwooti Wâé, ke patemehi die pele lépwona lé caa mele. Be woélé, ke tautilé ne he ni muko bwomu telé, pwohewii ni apulie ati. Kehe é jenaa, ke jan me lé mulie ne ha a bwomunen naa ne ko Padué, wonaa mu ko a *Jenen litihí.

Geé pipwoiipikewé

⁷ E o caa piâbé a pwonehi ati ni naado. Ke geé mu ehi, ke geé te ûmiê, beme geé pwoiitihi.

⁸ Weengaa kuti a junado: Geé pwo me pieânimewé tewé he ni ju pwonimewé, be «a eâname, ke e pétaabwon ni ta na hiwon».

⁹ Ke geé pihegikewé ne he ni pomwa tewé heme time geé uce pihuu.

¹⁰ Geé papenemihi ne ko ni béeuwé nina geé muko pétaapwo hegi. Wâé heme geé pwohewii lépwo apenem na wâé jélé na lé cile ehi nina pidodoni na e ne telé wo Padué.

¹¹ Wo pana e cihe, ke wâé heme pa apipépwooti te Padué. Wo pana e pipati, ke me e patihi ha a niihen na e ne ten wo Padué. É nelang, ke ati ni apulie ke lé pipaunu Padué ati ne he ni naado, mu ko lésu Kériso. Eten *a wâé ke a junuun dieli mwo! Amen!

Ni picani mu ko a bwo âcéi Kériso

¹² Wogewé ni ju béeeng, geé nemwo téetihí hemepie geé bo mu he ni picani na pwohewii a miû na ubwo.

¹³ Hemepie geé mu he ni picani te Kériso, ke geé pwo me piwâénimewé, be geé temehi pie, bo junihe ubwo wéden a pipwodéén dewé, hemepie geé bo alihia a wâé ten.

¹⁴ Hemepie lé piciheta ne kowé, be geé eabwé te Kériso, ke a naado na wâé ne kowé! Be caa e kowé a jene Padué, ke a jenen na junihe wâé wéden!

¹⁵Kehe icehi ana hemepie e mu he ni picani wo pace céiu, ke wâé heme time e uce âbé mu ko a taunuhi apulie, ai a bune, ai e pwo ana ta, ai e gaale he ni picihe te lèpwo béén!

¹⁶Ke hemepie e mu he ni picani be pa acéhi, ke me time e uce pwo me pitanim nang. Ke wâé heme e pipwo-olé te Padué ko a bwo pé na a nii Kériso.

¹⁷Weengaa atabuhi ko a tautinaado, ke e tabuhi mu ha a pwomwoiu te Padué. Ke hemepie e tabuhi mu konye, ke ade aceli e o tuie ne ko lèpwona te muhi telé me lé mwomwohi a Pwooti Wâé te Padué?

¹⁸Be caa te tii ne he ni tii iitihi pie: *Lèpwona lè pwo ana wâé, ke caa binyi me celuimilé. Ke lè bo pwo de wo lèpwo apulie na ta jélé, na lè jéilé ne ko Padué?* Proverbes 11.31

¹⁹Ke wonaa, nina lé mu he ni picani heme lé pwo ana nime Padué kon, ke me lé ne ni mulihelé ne te pana e tabuhi ati ni naado. Ke me lé tee pwo ana wâé.

1 Pétérú 5

A pwooti ne te lèpwo apihuô

¹É pamwoiukewé lèpwo apihuô te ni acéhi, be woéo, ke pa apihuô pwohewiikewé. Ke é caa alahi ni picani na e mu hen wo Kériso, ke é o mu ha *a wâé ten heme e bo habwieng [wo Padué]. Ke é ilekewé ha a ju pwonimung pie:

²Geé cile ehi a pubu apulie na e ne tewé wo Padué. Geé nemwo pwo pie ana me geé pwo, kehe geé pwo mu he ni ju pwonime, pwohewii ana nime Padué kon. Ke geé nemwo pwo beme geé pé mwani kon.

³[Geé daame helé] kehe geé nemwo huôhi me binyi ne ko a pubu apulie na e ne tewé wo Padué. Kehe wâé heme wogewé lèpwona me lé alikewé, ke me lé pwohewiikewé.

⁴Ke mepie e âbé wo pa Caa te lèpwo awéhi na a pubu apulie, ke geé bo hegí a cemewé na junihe wâé na e mu dieli mwo.

Bénebwéne pwooti

⁵Wogewé ni ewa, ke geé piténede lèpwo ukéiu! Ke tai wogewé, ke geé pipwoiipikewé ne he pwahamii ni béén. Be caa te tii ne he ni tii iitihi pie: *Wo Padué, ke e cuwode lèpwona lè pipaunulé. Kehe wâé nang ne ko lèpwona lè pipwoiipilé.* Proverbes 3.34

⁶Geé pipwoiipikewé ne haahi a junuu a i Padué, ke e bo nekewé da, heme e bo âbé a benaamwon na e caa pipégali.

⁷Geé tai ne ten ni gia kowé, be weeng pana e cilekewé.

⁸Geé tee ûmiê, be pana e pwopa ne kowé, ke wo *Caatana, be e pwohewii pa liô na e okéé, ke e biteeng aujenikewé, be e hane paceli me e wiieng.

⁹Geé cuwodeeng ne ha a céihi na mang, heme geé ko temehi pie, te piwie ni picani na pwo ne ko l épwo b éewé na élé pwo a bwohemwo ati.

¹⁰Ni picani tewé, ke mwo te ju é ha a cuwo benaamwon, kehe e todekewé wo Padué na junihe eânimén denye, beme geé mu ha a wâé ten na tice anebwén kon, ibu me Kériso. Ke e bo pwo me wâé gewé, ke bo pwo me geé cumang, ke pwo niihewé, ke o pwocoon me lé pwo me geé tupwo.

¹¹Eten a junuun dieli mwo! Amen!

Bépinelé

¹²É pwotii lé céiikewé beme é pamwoiukewé, ke me é pii tewé pie: A *pipwoééhe tice ja kon de Padué, ke ana geé caa ko mu hen. Ke geé tee cumang hen. É ne te Silas a tii ce, pa âjién na e piténedehi [beme e pé lé céiikewé].

¹³Ni acéihi na élé éni ‘*Babulona’, ke lé pwobwocu tewé. Be wo Padué, ke e pipégalilé pwohewii ne kowé. Ke e pwobwocu tewé mwo wo Maréko, pa naîng ne ha a céihi.

¹⁴Geé pipwobwocu tewé mu he ni ju pwonimewé. Ke me e mu pelewé ati na a péém, wogewé na céiu gewé me Kériso! Adéikewé!

2 Pétérū

2 Pétérū 1

Pipwobwocu

¹Woéo Simon Pétérū [na é pwotii]. Woéo pa eabwé te lésu *Kériso, ke é apostolo ten [be e pahedeéo ngen, beme é â pipatemehi a pwooti ten]. É pwotii lé célikewé, wogewé nina céiu a céihi tenye. A céihi tenye naa, ke a naado na te junihe wâé, be genye caa hegi mu ko lésu Kériso, Padué henye, na weeng wo Padué ke pa *aceluimikenye. Junihe mwomwon ati ni bwopwonen den, be time e uce pipwoinen ne konye, be e tai ne tenye a céihi na piwien.

²Wâé heme lu adéikewé wo Padué henye ke wo Padaame henye lésu Kériso. Wâé heme te piubwo ngen a bwo temehinaado tewé ne kolu, beme piubwo ngen ne kowé a *pipwoééhe tice ja kon me a péém delu!

Mulie ha a mulie na wâé te Padué

³E todekenye wo Padaame, beme nye mu ha *a wâé ten na te junihe ubwo! Ke é mu ko a bwo temehieng denye, ke jan me nye mulie ha a mulie na iitihi ke wâé ten. Ke e ne tenye, ko a junuun, ati ni junaado, be me wonaa a bwo mulie tenye.

⁴É mu ko ati ninaa, ke e ne tenye ali e caa mi pii ânebun: ati ni *adéihi na te junihe wâé, ke te junihe ubwo wéden! [Geé imwi ehi ninaa] beme o tuwokewé koja nina nimewé kon na ta, na e pwotahi ne ko ni apulie pwo bwohemwo! Ke o céiu a pwonimewé me Padué, ke geé o pwohewieng.

⁵Ke geé te nihe hane beme e ne kowé ni acehin ce, na a céihi tewé: Geé mulie ha a mulie na mwomwon; Geé temehi Padué, ke o piubwo da a bwo temehieng dewé;

⁶Geé pipwoiipikewé; Geé cumang ne he ni picani; Geé paciiti Padué me piténedeeng;

⁷Geé pwo me eânimewé te ni acéihi béewé; Geé pipwoééhe ati ni apulie.

Pwo me piubwo da ana wâé

⁸Weengaa ni wâé na me e mu kowé. Ke mepie ubwo ne kowé, ke o pepule gewé, beme geé pwo celi wâé, ke o jan ne kowé me geé temehi ehi Padaame henye, lésu Kériso.

⁹Hemepie pwo pace apulie celi tieden ne ten ni wâé naa, ke e pwohewii pana bwi nang. Be e neuhi pie, caa puueng mu he ni ta na e pwo bwolihi.

¹⁰E caa pipégalikewé wo Padué, wogewé lépwo bééng, ke e todekewé beme lépwo apulie ten. Ke wâé heme geé te junihe mwoiu, me geé habwii anaa ne he ni bwomu tewé. Be me wonaa, ke time o uce tacida mwodawé, ke o time geé uce tupwo.

11Ke e bobe hegikewé ha a pipwodéén, ne ha a Mwametau te [pa Naïn] lésu Kériso, Padaame henye, ke pa aceluimikenye; ne ha a Mwametau na tice pwonehin.

Time o uce bwolihi ke é o mele

12Geé caa te temehi ati ni naado naa, na é ko pii ni, ke geé caa te cumang, ne ha [a bwo mulie tewé âcehi] a juuju. Kehe icehi ana [time uce piwâ jo me] é te paniimihi tewé mwo.

13Ke é niimihi pie, o wâé heme é te cuwo ko wonaa, he é mwo teko mu éni pwo bwohemwo.

14Be e caa habwii tong wo Padaame lésu Kériso pie, time o uce bwolihi, ke é o caa engen mu éni pwo a bwohemwo ce.

15Ke wâé heme é te nihe penem ni, beme é alecehen, ke me geé bo tee niimihi nina é patemehi tewé.

Geme piuti tewé nina geme alihî

16[Wogeme me lépwo *apostolo béeeng, ke] geme caa pipatemehi tewé a junuu Padaame lésu Kériso, me a bwo mwojuia cemwo ten. Time uce ace céiu jemaa te lépwo apulie, ke time uce ace jepule celi e âbé mu ko ace pitemang deme. Be geme te ju piuti tewé cehi nina geme alihî ko ni naamiime. Be geme alihî a bwo ubwo na a wâé te Padaame lésu na pwomelaan,

17-18he li geme mu pwo ali juwole iitihi. Ke geme téne a pwocihe te Padué Caa mu he miiden, Padaame henye na te junihe ubwo a wâé ten ke a junuun. Be e te junihe pipaunu me pipwoun de lésu [ânebuheme] he e pii beetihi pie: «Wo paje, ke pa Naïng [na te céiu nang] na te junihe eânimung den. Weeng na é caa te pipégalieng ha a pipwodéén dong.»

A Tii litihi ke a pwootti te Padué

19É mu ko anaa kuti, ke jan me nye céihi ne ko ati ni pwootti te lépwo *péroféta, ke me nye nenimenye ne kon. Be lé pwohewii a mwomiû na e pwéélang ha a melepiing, ucéihi a bwo taa te a ceni pwopwometan, ânebuhe a téale. [Be é jenaa, ke wo Kériso] ke e caa tuie ne he ni pwonimenye!

20Go nemwo niimihi pie, jan me go te pitemehi cehi ce bwopiine ni pwootti he ni *tii iitihi, na lé pwaadeniin bé wo lépwo péroféta.

21Be time uce aceli e âbé mu kolé lépwo apulie. Kehe te a *Jenen litihi na e penem kolé, beme lé pébé a pwootti na e âbé mu ko Padué.

2 Pétérû 2

Lépwo apipune na lépwo agele

1Ânebun, ke lé tuie ne ko a bele *Isaraéla ne ni péroféta agele. Ke o te piwien mwo jenaa ni. Be lé o êjele bé céiikewé ni apipune na lépwo agele. [Ke lé o pii pie, lépwo apulie te Padaame henye.] Kehe icehi ana muhi telé kon, weeng pali

[e pineeng beme] e celuimilé. Ke lé o pwo me lé bitelé ne ni apulie mu he ni céhi telé. [Kehe icehi ana o te woélé mwo, na] o te junihe epin me ta ace bwo tanahilé taabwon!

²O hiwon ce béén celi lé o âcehi ni cémun delé, me ni huô telé na mwiihi ko ni éélélé. Ke é mu ko anaa, ke o pii me ta a ju céhi [ne ko Kériso].

³Ke wo lépwo apipune naa, na lépwo agele, ke lépwo atapi. Ke lé o pipwohuô tewé, beme lé pé ni mwani tewé. Kehe icehi ana time o uce bwolihi ace bwo pwo me tielé. Be e caa te niimihi [wo Padué] ânebun pie, me e bo ne cuhinaado telé.

Lé o pwocuhinaado

⁴Be e epin wo Padué me e ne cuhinaado te lépwoli *âcélo li lé cubwonieng. Be e cielé ko ni itihe toki, ke e nelé ha a melepiing, ucéhi a Tan na e bo tauti ni apulie hen.

⁵A céiu mwo, ke é bwolihi, ke e pwocuhinaado te ni apulie ne pwo bwohemwo na time lé uce paciitieng. Be li e pwopune telé wo Noé, me lé mulie ha a mulie na mwomwon [ne he pwahamii Padué]. Kehe icehi ana time lé uce piténedeeng. Ke lé tai mele] ne ha a jaa na te junihe ubwo wéden, na e tilihi a bwohemwo ati. Ke te 8 cehi nina celuimilé: wo Noé me [a pwomwoiu ten].

⁶A céiu mwo, ke wo Padué, ke e pwo me tieden lupwo pwomwo ubwo *Sodome me Gomore. Ke te tice aceli e cuwo, te icehi ni dehe miû. E wonaa beme a béhabwiinen ne ko ati ni apulie na time lé uce paciitieng, he ni tan na mwo e he pwaaden.

⁷⁻⁸Kehe icehi ana pwo pa apulie na te céiu nang, mu kolé, na mwomwon ni huô ten ne he pwahamii Padué: wo Lota. É ati he ni tan, he e ko mulie ha awiemelé, ke e te alahi ke téne ni naado na mwiihi na lé pwo. Ke te junihe téé a pwonimen kon. Ke te weeng cehi na e celuimieng wo Padué [koja a miû].

⁹Be wo Padaame, ke te jan me e *celuimi lépwona lé paciitieng koja ni picani telé. Ke mepwo é ne ko lépwo apulie na ta jélé, ke pwojunuun me e nelé he karépu, ucéhi a Tan na e bobo tauti a bwohemwo ati hen.

¹⁰Ke o te junihe ubwo a cuhinaado na e bo ne te lépwona lé mulie he nina nimelé kon na ta, ke lé pwo ni huô na mwiihi ne ko ni éélélé. Ke piwien ne mwo ko ni béén na lé pwo me piticenaado ne ko ni pihuô ten.

Lépwo upwonimelé

Lé wonaa wo lépwo apipune na lépwo agele. Be lé pwo upwonimelé, ke time uce piwâ jélé me lé pwo ati nina ta, ke me lé pii me ta ni âcélo na junihe ubwo *a wâé telé.

¹¹Kehe ni âcélo, nina te junihe pwo niihelé kojalé, ke time lé uce niimihi pie, me lé pii me ta lépwonaa, ne he pwahamii Padué!

¹²Kehe icehi ana wo lépwo apwocémun naa, ke [time uce mwotilé, me] lé pihoonihi ni naado [na te junihe piwéden kojalé] na te tice aceli lé temehi ne kon. Mepwo é ne ko a mulihelé, ke pwohewii ni wota apiaba na te tice pwonimelé, na lé mu éni [pwo bwohemwo] beme o tailé, me taunulé. Ke mepwo ni huô telé na mwiihi, ke e o péélé nge ha a cuhinaado dieli mwo.

¹³Ke o pwotahi ne kolé, pwohewii a bwo pwotahi ne ko lépwo béén. Wo lépwo apulie naa, ke te nihe piwâénimelé heme lé getikewé, wogewé [l'épwo ju acéhi]. Be lé temehi neduwohi ni ta pwo telé, heme lé mu he ni piwiinaado tewé, ke lé pwo me time wâé a pimu ibu tewé, ke lé pwo me tanim gewé. Be: Lé pwo ni naado na mwiihi ne ha a pwaale;

¹⁴Lé te cuwo ko ome ni toomwo, ke ta ni pwonimelé ne kolé; Lé te pwo taaci ni bwo niimihinaado na ta; Lé te hane taaci ni naado na ânenimelé kon; Lé picéide lépwona time uce mang ni céhi telé, beme lé pwo nina ta. É mu ko ati ninaa, ke e caa piapwolé wo Padué, [ke e bo ne telé a cuhinaado na junihe ubwo].

¹⁵⁻¹⁶Be lé caa piâ ité koja a pwaaden na mwomwon. Ke lé pipwohewii Balaam, pa naî Béor. Be weeng, [ke pa péroféta agele ânebun] ke te junihe wâé ten a bwo hegi mwani, beme e pwo nina ta. Kehe icehi ana [wo Padué] ke e pééleeng ko ni huô ten na ta. Ke e pacuwoeng koja nina e niimihi me e bo pwo ha a bwo tice pwonimen. Ke e pwo me e paciheeng na a buriko ten, ha a pati apulie!

Lépwo eabwé te a ta

¹⁷Wo lépwo apipune na lépwo agele, ke [te tice naado celi lé pébé celi wâé]. Lé pwohewii ni pwomiidu na tice tabe hen, me ni nii na pé na a dan: [Te junihe bwiile, kehe te tice ute hen.] Ke e caa imwi ni atebwo telé wo Padué ne ha a melepiing iitihi.

¹⁸Ubwo ni pwolé, ke lé tee pipii delé ko ni jame pwocihe na te tice ânen. Ke lé cine lépwona lé caa âbé koja a mulie na ta, beme lé pwo mwo ati ni bwopemilé na mwiihi. [Be lé pii telé pie, wâé heme nye] âcehi ati nina nimenye kon na ta.

¹⁹Lé pii tewé pie, lé tuwokewé koja nina lé ciekewé [beme time geé uce pipwoeabwé ko ce patén]. Kehe icehi ana woélé, ke cielé ko ni bwomu telé na mwiihi, na péélé nge ha a mele! Be wo pa céiu apulie, ke pa eabwé ko ana e pé pihuô ne kon.

²⁰Ânebun, ke lé te temehi lésu Kériso, Padaame henye, ke pa *aceluimikenye. Be e caa tuwolé koja ni huô na mwiihi te lépwo apulie pwo bwohemwo. Kehe icehi ana lé te mwojuia mwo, beme lé te pipwoeabwé te mwo a ta. [Te junihe pwoééhelé!] Be caa te junihe ta jélé kojan ânebun!

²¹Ânebun, ke lé hegi ni pihuô na iitihi [koja Padaame] ke lé temehi a pwaaden na mwomwon. Kehe icehi ana [lé tahi taabwon ati, beme] lé mwojuia cemwo. Ke mwo te wâé ne kolé, heme mwo time lé uce temehi a juuju!

²²Genye alihî ne kolé pie, te a juuju [lupwo alo] apii kon ce: *E pieni mwo ni unyehen wo pa wotaahen.* Proverbes 26.11 Ke «Nye puu a puwokwo, kehe e mwojuia ne mwo ha a hepule.»

2 Pétérû 3

E o bo tuie mwo wo Padaame

¹Lépwo ju békéng wé, weengi a báalohe tii na é tii, beme é paniimihi tewé ati ni naado naa, ke me é pamwoiukewé, beme o mwomwon ke iitihi ni âniimihinaado tewé.

²Wâé heme geé pipaniimihi ni pwooti na lé caa mi pii ânebun wo lépwo péroféta iitihi [te Padué]. Ke geé cile ehi ni pihuô te Padaame, pana e caa celuimikenye, li lé caa pipatemehi tewé wo lépwo *apostolo tewé.

³Weengi a pwooti na a junado, na wâé heme geé temehi ehi: [Be caa mi pii tewé pie] lé o bo tuie ne kowé he *ni bénebwéne tan wo lépwo apulie na lé te ju engen cehi ne he nina nimelé kon na ta. Ke lé o pihoonikewé

⁴me pii tewé pie: «Kona e wé naa wo pali lésu tewé li e pii pie e bo mwojuia cemwo? [O caa time e uce âbé!] Lé caa mele wo lépwoli lé mi céihi ne kon [ke time lé uce alieng]! Be te tice ace céiu naado ne éni pwo bwohemwo celi me pitaatééhi mu ha atabuhi kon!»

⁵Wo lépwo apihota na lé pii anaa, ke time uce nimelé me lé temehi pie, e ne a bwohemwo me a miiden wo Padué ko a pwooti ten. Be e taawie a bwohemwo mu ha a tabe, beme e mu aujenihi a bwohemwo na a tabe.

⁶Ke é alechen, ke e pwo me tieden a bwohemwo ko a tabe. Be e patupwo ngen a jaa na junihe ubwo.

⁷[Weengaa ana é pii]: Ke me lu mu a miiden me a bwohemwo jenaa ni, ke te é mu ko a pwooti te Padué. Ke e cile ati ni naado ko a pwooti ten, ucéihi a Tan na e bo tai tautilé hen. Ke é ha a Tan naa, ke e bo cini a miiden me a bwohemwo, me ati ni apulie na time lé uce paciitieng.

E uca be e te junihe pipwoééhenye

⁸Kehe icehi ana wogewé lépwo békéng, ke geé nemwo pineuhi pie: «A tan na céiu, ke pwohewii ni jo na 1000 ne ha a bwo alihî nen de Padaame. Ke nina 1000 ni jo, ke pwohewii a tan na te céiu.»

⁹Ke [weengaa ana geé alihî pie] time uce a juuju a bwopiinen de ni békéng pie, te bwoli Padaame me e pacuwahi ana e pii! Úhu! E tai ucéikenye, [be te junihe bwala nang] ke e picani ne konye ni apulie. Be time o uce wâé ten hemepie e mele ace apulie celi te ju céiu nang. [Ke e ne te ni apulie ati a benaamwon] beme lé bitelé ne mwo kon koja ni ta pwo telé [ke me tai celuimilé].

¹⁰Kehe icehi ana e bo te mwojuia mwobé wo Padaame, [ke e bo patéeti ni apulie] pwohewii pa abune. [Lé o bo téne] a tihinaado na te junihe ubwo, ke o

te ju pwo é tieden a miiden. Ke o éle tieden ni ceni ne ha a miû na junihe ubwo. Ke o tieden a bwohemwo me ati ni naado na e pwon!

Mulie ha a mulie na iithi

¹¹Hemepie o tieden ati, ke o ade aceli me geé pwo? Weengi: Geé mulie ha a mulie na iithi na wâé te Padué, ke geé te pipwoeabwé ten cehi.

¹²Geé wonaa a bwo ucéihi nen, be e o bo tuiebé epin a Tan naa, [na e bo tauti ati ni naado wo Padué]; a tan na o éle ati a miiden me a bwohemwo ne ha a miû na ubwo.

¹³Be e caa mi pii ânebun pie, me e bo ne a miiden me a bwohemwo na mwo coho. Ke ati ni naado na lé bo mu pwon, ke lé o mulie cehi ni bwo niimihinaado te Padué. Ke weengaa a bwohemwo na nye ucéihi [ha a pipwodéén]!

Bénebwéne pwooti

¹⁴É mu ko anaa kuti, ke wogewé lépwo ju bééng, ke geé hane me geé mulie ha a mulie na iithi, ucéihi a Tan naa. Be mepie geé wonaa, ke o tice ta kowé celi me e bo tautikewé kon wo Padué. Ke o pwo a péém ha awiemewé me weeng.

¹⁵⁻¹⁶[É ko ade na bwoli Padaame me e mwojuia mwobé?] Te ju é ko [a bwo bwala nang, me] a bwo picani ten ne konye! Ke geé nemwo pineuhi pie, wogewé, ke e caa celuimikewé [koja a cuhinaado]. Ke weengaa ana e mu tii me dewé wo Paulo, pa ju béénye na te junihe eânimene ten. Be e pipatemehi ninaa, ne he ni tii ten ati, ko a bwo temehi nen na e ne ten wo Padué. A juuju pie, te pibinyi a bwo temehi ne ni bée pwooti ten. Ke pwo ni apulie na lé pibitehi nina e pii. Wo lépwonaa, ke time uce pwo waalé ne ha a juuju, ke time uce lépwo ju acémun [ko ni tii iithi]. Be lé wonaa ne mwo he ni bée pwooti ne he ni tii iithi. Ke é mu ko anaa kuti, ke lé â benihi a mele dieli mwo na e éité koja Padué.

Bépinelé

¹⁷[É tii a tii ce, beme] é mi paténekewé, wogewé lépwo bééng, ko lépwo [apipune agele] na time lé uce paciitihi ana juuju! É ko anaa na geé tee ûmiê! Ke geé pipwocile, be koli lé pihaamikewé, ke koli geé bo tupwo mu he na geé cumang lang.

¹⁸Wâé heme piubwo ngen ne kowé a *pipwoééhe tice ja kon de lésu Kériso, Padaame henye, ke pa *aceluimikenye. Wâé heme piubwo ngen ace bwo temehieng dewé! Pipaunueng ne ha a bwo ubwo na a wâé ten jenaa, ke é dieli mwo! Wâé heme wonaa! Amen!

1 Ioane

1 Ioane 1

A pwootti te Padué na e ne a mulip

¹ A Pwootti na e ne a mulip, ke e mu ha atabuhi ko a bwohemwo. Ke geme patemehieng tewé jenaa ni, be geme caa ju téneeng; ke geme caa ju alieng; ke geme caa ju ti kon; ke geme caa ju pinenimeme ne kon.

² Be e tuie, ke geme alieng, ke geme pajuujueng. Ke geme patemehi tewé pie, e mu kon a mulie na tice anebwén kon. Be e mu pele Caa, na e caa habwieng deme.

³ Nina geme alihí ke nina geme téne, ke geme patemehi tewé mwo, beme tai piwogenye ibu ne pele Caa me pa Naîn lésu *Kériso. [Be lu te pimu ibu.]

⁴ Ke geme tii lé céiikewé a tii ce, beme hején a pipwodéén denye.

Nye mulie ha a pwéélang

⁵ Weengi a pwootti na geme téne mu ko lésu Kériso, ke geme patemehi tewé: «Wo Padué, ke pa pwéélang, ke te tice melepiing kon.»

⁶ Hemepie genye pii pie genye mu ko Padué, ke mepie genye mwo te engen ha a melepiing, ke genye gele; ke time uce e konye a *JUUJU.

⁷ Be e mu ha a pwéélang wo Padué, ke mepie genye engen ha a pwéélang, ke céiu genye. Ke a cewéhe lésu Kériso, pa Naîn, ke e pétaabwon ni ta pwo tenye.

⁸ Hemepie genye pii pie te tice ta pwo tenye, ke genye te pigetikenye, ke time uce e konye a JUUJU.

⁹ Kehe mepie genye pii te Padué ni ta pwo tenye, ke e mwomwon ke e juuju me e pétaabwon ni ta pwo tenye.

¹⁰ Hemepie genye pii pie te tice ta pwo tenye, ke genye pé Padaame me pa agele, ke time uce e konye a pwootti ten.

1 Ioane 2

A bwo mulie tenye ni naî Padué E picani tenye wo lésu Kériso

¹ Ni naîng ne ha a céihi, é tii ne tewé ni naado naa, beme time geé uce pwo nina ta. Kehe mepie pwo paceli e pwo aceli ta, ke pwo pana e pipwopainye ne pele Caa: wo lésu Kériso, na e mwomwon.

² Weeng na e mele beme pineuhi ni ta pwo tenye; time uce é ne konye cehi, kehe é ne mwo ko ni apulie pwo a bwohemwo ati.

Genye mulie pwohewii a bwo mulie ten

³ Hemepie genye ténedehi ni patén de Padué, ke genye temehi nelang pie nye te temehieng.

⁴Wo paceli e pii pie e temehi Padué, ke me time e uce téne dehi ni patén den, ke pa agele, ke time uce e kon a *JUUJU.

⁵Kehe wo pana e téne dehi a pwo oti te Padué, ke tidi ati a pwonimen ko a pipwoééhe ten. É mu ko anaa, ke genye temehi pie wogenye kon.

⁶Be wo pana e pii pie e mu kon, ke wâé heme e mulie pwohewii a bwo mulie te lésu.

Eânimem de pa béém acéihî

⁷ Ni bêéng acéihî, time uce a patén na mwo coho na é tii me dewé, kehe ana geé caa te mi temehi. Be weengaa kuti a pwo oti na geé caa te téne.

⁸A céiu mwo, ke a patén na te junihe wâé na é tii me dewé. Ke e te *pajuujuhi [ne ha a mulihen] wo Kériso, ke é ne he ni mulihewé mwo. Be caa ko pitieden ngen a melepiing, be e caa tuie a ju pwéélang.

⁹ Wo paceli e pii pie e mu ha a pwéélang, kehe mepie e tééti pa bêén acéihî, ke e mwo te mu ha a melepiing.

¹⁰Kehe wo paceli eânimem de pa bêén, ke e mu ha a pwéélang. Ke time e uce tupwo ne ha a ta.

¹¹Kehe pana e tééti pa bêén, ke e mu ha a melepiing, be time e uce temehi he na e â lang, be e pwo me bwi nang na a melepiing.

Nemwo pwo me eânimewé ko ni huô na ta

¹²⁻¹⁴É pwotii lé céikewé, ni naî Padué. Be caa pineuhi ni ta pwo tewé, mu ko a nii Kériso. Ke geé caa temehi Caa. É pwotii lé céikewé, wogewé ni ‘caa’ [wogewé na mang a céihi tewé] be geé temehi [Kériso] pana e mu ha atabuhi kon. Éa, e mu ânebun ne ko ati ni naado! É pwotii lé céikewé, wogewé ni ewa, be geé mwoiu, ke e kowé a pwo oti te Padué. Ke geé caa piwéden koja *Caatana, pana ta nang. Éa, geé caa piwéden kojaeng!

¹⁵Geé nemwo pwo me eânimewé ko a bwohemwo, ke nina élé pwo a bwohemwo. Hemepie pwo paceli eânimem ko a bwohemwo, ke time uce e kon a pipwoééhe na e âbé mu ko Caa.

¹⁶Weengi nina e âbé mu ko [a mulihe pa apulie] pwo a bwohemwo ce: Tee nimenye me nye pwo nina ta, ne he ni bwo engen denye; Tee nimenye ko nina nye alihî ko ni naamiinye; Tee eânimem ko ni denye, ke genye pipaunukenye mu kon. Ati ninaa, ke time e uce âbé mu ko Padué Caa!

¹⁷O tieden a bwohemwo, ke ati ni naado na nye alihî na eânimem ko, kehe e o mu dieli mwo wo paceli e pwo nina e pii wo Padué.

Lépwo acubwoni Kériso

¹⁸Ni naîng, caa *ni bênebwéne tan, ke geé caa temehi pie, e o tuie wo pa Acubwoni Kériso. Ke caa élé éni. Hiwon nina lé cubwoni Kériso, é mu ko anaa, na genye temehi pie caa ni bênebwéne tan.

¹⁹Lé wie mu hadeniinye, be time uce ni béenye. Be hemepie te ni béenye, ke lé o te mu konye. Kehe lé engen, beme lé habwii tenye pie time uce ni béenye.

²⁰Kehe wogewé, ke geé caa hegi a *Jenen litih. Be e pipégalikewé wo Kériso, pana e iitihi, ke e ne tewé. É mu ko anaa, ke geé caa temehi a JUUJU.

²¹Hemepie é pwotii lé céiikewé, ke time uce a bwopiinen pie, time geé uce temehi a JUUJU, kehe geé te temehi, ke te tice ace gele celi e âbé mu ko a JUUJU.

²²He woo pa agele? Wo pana e pii pie wo lésu, ke time uce wo Kériso [pana e neeng bé wo Padué]. Ke pa Acubwoni Kériso, ke pana e piwotétaa ko Caa me pa Naîn lésu.

²³Be nina lé piwotétaa ko pa Naîn, ke te tie Caa kolé. Kehe wo pana e hegi pa Naîn, ke e hegi mwo Caa.

Geé mu ko Kériso

²⁴Wâé heme e mu mang kowé ni pwooti na geé téne mu ha atabuhi kon. Hemepie e mu kowé ni pwooti naa, ke geé bo mu he pa Naîn, ke é he Caa.

²⁵Anaa, ke ali e caa mi pii tenye wo lésu: a mulie na tice anebwén kon.

²⁶É tii ninaa lé céiikewé, wonaa mu ko nina lé pipwohuô tewé.

²⁷Kehe wogewé na geé caa hegi a Jenen litih mu ko Kériso, ke geé nemwo hane lépwoce apwocémun [celi lé wonaa] be caa e kowé a Jenen litih, ke e bo pacémunikewé ko ati ni naado. Ke nina e picaa tewé, ke a juuju, kehe time uce a gele. É mu ko anaa, ke geé mu ko lésu pwohewii ana e patemehi tewé na a Jenen litih.

²⁸É jenaa, wogewé ni béeng, ke wâé heme geé mu ko Kériso, beme time uce tanim gewé, ke me geé† cela kon heme e mwojuia mwo.

²⁹Geé temehi pie e mwomwon wo Kériso, ke wâé mwo heme geé temehi pie, ati nina lé penem ha a mwomwon, ke lé âbeeble mu kon.

1 Ioane 3

Genye naî Padué

¹Geé alahi a bwo ubwo na a pwonime Padué Caa ne konye, be e toii konye pie ni naîn. Time e uce temehikenye na a bwohemwo, be time lé uce temehi Padué.

²Ni ju béeng, é jenaa, ke genye caa naî Padué. Kehe mwo time uce téele habwii ana genye bo mu hen ha ace céiu tan. Kehe genye te temehi pie, hemepie e tuie wo Kériso, ke genye o pwohewiieng, be genye bobo alieng ne ha a bwo weeng.

³Ke nina lé ucéihi a tan naa, ke lé pipaciitilé, pwohewii a bwo pipaciitieng den.

Paceli e âbeeble mu ko Padué

⁴Tai ni apulie na lé mulie ne he ni ta pwo telé, ke lé caada ni patén de Padué. Be a ta, ke e cubwonihi ni patén den.

⁵Kehe geé te temehi pie e tuie wo Iésu Kériso, beme e pétaabwon ni ta pwo tenye. Weeng, ke te tice ta kon,

⁶ke nina lé mu kon, ke time lé uce tee pwo nina ta. Ke nina lé tee pwo nina ta, ke time lé uce alieng, ke time lé uce temehieng.

⁷Ni ju béisng, me te tice paceli e péékewé koja a pwaaden: Be wo paceli e tee pwo ana mwomwon, ke mwomwon nang, be wo Kériso, ke mwomwon nang.

⁸Kehe wo pana e tee pwotahinaado, ke e âbé mu ko *Caatana. Be wo Caatana, ke e pwotahinaado mu ha atabuhi kon. Ke e tuie wo pa *Naï Padué beme e pétaabwon ni penem de Caatana.

⁹Wo paceli e âbeele mu ko Padué, ke time e uce mulie ha a ta, be e kon wo Padué, ke pwocoon me e tee pwo aceli ta, be e âbeele mu ko Padué.

¹⁰É mu ko anaa, na genye te pitemehi ni naï Padué, ke ni naï Caatana. Be wo paceli time e uce pwo ana mwomwon, ke time uce pa ju naï Padué. Ke te piwien ne mwo ko pana e tééti pa acéhi béén.

Wâé heme pieânimenyenye tenye

¹¹Weengaa a pwooti na [caa ne tewé, ke] geé caa te téne mu ha atabuhi kon pie: Wâé heme pieânimenyenye tenye.

¹²Genye nemwo pwohewii Kaina, be pa apulie te Caatana, pana ta nang, ke e taunu pa ciéén. É ko ade na e taunueng? Wonaa mu ko ni bwomu ten na ta, koja pa ciéén na e pwo ana mwomwon.

¹³Geé nemwo téele, wogewé ni béisng acéhi, hemepie lé téétikewé [ni apulie na ta jélé pwo] a bwohemwo.

¹⁴Ke mepwo wogenye, ke genye temehi pie, genye caa wie mu ha amele, me nye â ha *a ju mulip. Be eânimenyenye te ni acéhi béisnye. Kehe wo paceli e tééti pa béén, ke e mwo te mu ha a mele.

¹⁵Wo paceli e tééti pa béén, ke pa ataunuhi apulie. Ke geé te temehi pie pa ataunuhi apulie, ke time uce e kon a mulie na tice anebwén kon.

¹⁶Weengi a pwonime Padué: E mele wo Kériso me denye. Ke wâé hemepie nye ne mwo ni mulihenye ne te ni béisnye.

¹⁷Hemepie paceli pwo den ne pwo a bwohemwo, ke me e ali pa acéhi béén na tice den, ke me e capuhi a pwonimen ne kon, ke o woté a pwonime Padué ne kon?

¹⁸Ni ju béisng, geé nemwo pwo me ju pieânimewé tewé cehi ne ha a pwooti, kehe geé habwii ne he ni bwomu tewé.

Wâé ni pwonimenyenye ne he pwahamiin

¹⁹É mu ko anaa, ke genye bo temehi pie wogenye ha a *JUUJU, ke bo wâé ni pwonimenye ne he pwahamii Padué.

²⁰Kehe mepie nye niimihi ne he ni pwonimenye pie ta genye, ke wo Padué, ke e daaité koja ni pwonimenye, ke e temehi ati ni naado.

²¹Ni ju bééng, hemepie time uce pipé ne konye ni pwonimenye, ke o time uce mwotikenye ne he pwahamii Padué.

²²Ke e o bo ne tenye ati nina genye ilehi kojaeng, be genye ténedehi ni patén den, ke genye pwo nina wâé ne he pwahamiin.

²³Weengi a patén den: Me genye céhi ne he nii pa Naîn, Iésu Kériso, ke me pieânimene tenye, pwohewii a pihuô ten ne tenye.

²⁴Wo paceli e ténedehi ni patén den, ke e ko Padué. Ke e kon wo Padué. Ke genye temehi pie e konye, mu ko a *Jenen litihi na e ne tenye.

1 Ioane 4

Lépwo péroféta agele

¹Ni ju bééng, geé nemwo céhi ne ko ati ni pwooti na geé téne, kehe geé tabemi ehi, beme geé temehi celi e âbé mu ko Padué. Be hiwon nina lé pii pie, woélé ni *péroféta na lé â ati pwo a bwohemwo, kehe time uce tai ni ju péroféta.

²Woni a bwo temehi na a *Jenen litihi te Padué: Tai nina lé pii pie wo Iésu, ke pa *Mesia na e âbé ha a éé apulie, ke e kolé a Jenen litihi te Padué.

³Kehe mepie time e uce pii wo pa apulie pie wo Iésu, ke pa Mesia na e âbé ha a éé apulie, ke e kon a jene pa Acubwoni Kériso, be time e uce âbé mu ko Padué. Ke geé caa te temehi a bwo âbé ten, be é jenaa ni, ke caa e pwo a bwohemwo.

⁴Wogewé ni acéhi na geé âbé mu ko Padué, ke geé caa piwéden koja ni péroféta agele, be pana e kowé, ke te nihe ubwo nang koja [Caatana] pana e pwo a bwohemwo.

⁵Woélé, ke lé âbé mu pwo a bwohemwo. É mu ko anaa, ke lé cihe pwohewii ni apulie [na ta jélé] ne pwo a bwohemwo, ke e piténedelé na a bwohemwo.

⁶Kehe wogenye, ke genye âbé mu ko Padué. Ke wo paceli e temehi Padué, ke e o tabemikenye. Wo paceli time e uce âbé mu ko Padué, ke time e uce tabemikenye. Wonaa a bwo téne temehi na a Jene Padué na *JUUJU, ke a jene pa agele.

A pwonime Padué ke a pwonimenye

⁷Ni ju bééng, genye pwo me pieânimene tenye, be a bwo pieâниме, ke e âbé mu ko Padué. Ke ni apulie na pieânimelé telé, ke lé âbé mu ko Padué, ke lé temehi Padué.

⁸Kehe wo pana time uce eânimén de pace céiu, ke time e uce temehi Padué, be wo Padué, ke a pipwoééhe [ke ubwo a pwonimen].

⁹Weengi a bwo eânimé Padué tenye: E nebé pa Naîn na te céiu nang, ne pwo a bwohemwo, beme nye mulie mu kon.

¹⁰A pwonime naa, ke time e uce âbé mu ko a bwo eânimén ye ko Padué, kehe e âbé mu ko a bwo eânimé Padué konye, ke e nebé pa Naîn me e *âpwailo beme pétaabwon ni ta pwo tenye.

¹¹Ni ju bééng, hemepie wonaa a bwo eânimé Padué konye, ke wâé hemepie pieânimén ye konye.

¹²Te tice paceli e ali Padué, kehe mepie pieânimén ye konye, ke e konye wo Padué, ke tidikenye ati a pwonimen ke a pipwoééhe ten.

Genye mu ko Padué ke e mu konye

¹³Genye temehi pie genye mu ko Padué, ke e mu konye, be e ne tenye a Jenen litihi ten.

¹⁴Ke genye caa alihí, ke *pajuujuhi pie e caa nebé pa Naîn wo Caa, beme e *celuimi a bwohemwo ati.

¹⁵Wo paceli e pii beetihí pie, wo lésu ke pa *Naî Padué, ke e ko Padué, ke wo Padué ke e kon.

¹⁶Ke genye te temehi a pwonime Padué ne konye, ke genye céihi ne kon. Be wo Padué, ke a pipwoééhe [ke ubwo a pwonimen]. Ke wo paceli e mulie ha a pipwoééhe, ke e ko Padué; ke wo Padué, ke e kon.

¹⁷Ke me genye mu ko Padué, ke tidikenye ati a pwonimen ke a pipwoééhe ten, ke o time uce mwotikenye ha a Tan na e bo tauti ni apulie hen. Be a bwo mulie tenye pwo a bwohemwo ce, ke pwohewii a bwo mulie te lésu.

¹⁸Te tice mwoti ne ha a pipwoééhe, kehe e pwo me tieden a mwoti na a ju pipwoééhe. Hemepie mwotikenye, ke wonaa be genye ucéihi ace cuhinaado tenye. Ke wo paceli mwotieng, ke te time e uce tidieng ati a pipwoééhe [te Padué].

Geé mulie ne ha a pipwoééhe

¹⁹Ke wogenye, ke eânimén ye te Padué, be weeng pana mi eânimén denye.

²⁰Hemepie e pii wo pace céiu pie, eânimén de Padué, ke me e tééti pa acéihi béén, ke wo panaa, ke pa agele. Be hemepie time uce eânimén de pa béén na e alieng, ke e bo woté ko ace bwopwonan me eânimén de Padué, na time e uce alieng?

²¹Kehe weengi a patén na e ne tenye: *Wo paceli eânimén de Padué, ke wâé heme eânimén mwo te pa béén.*

1 Ioane 5

Céihi ne ko pa Naî Padué

¹ Wo lépwona lé céihi pie wo lésu ke pa *Mesia, ke lépwo naî Padué. Ke wo paceli eânimén de Padué Caa, ke o eânimén de ati ni naî Padué.

² Genye temehi pie eânimén te ni naî Padué, heme eânimén te Padué, ke me genye ténedehi ni patén den.

³ Be a pwonimenye ne ko Padué, ke me nye ténedehi ni patén den. Ke time uce téé ne konye ni patén den.

⁴ Be tai ni naî Padué, ke lé piwéden koja a bwohemwo, mu ko a céihi telé [ne ko lésu Kériso].

⁵ He woo paceli e piwéden koja a bwohemwo? Wo pana e céihi pie wo lésu, ke pa *Naî Padué.

Cié jélé na lé pajuuju pa Naî Padué

⁶ Te wo lésu Kériso kuti na e âbé imi a tabe ke a cewéle. Time uce a tabe cehi, kehe a tabe me a cewéle. Ke e pajuujueng na a *Jenen litih, be a Jenen litih, ke a *JUUJU.

⁷ É mu ko anaa, na cié jélé na lé pajuujueng:

⁸ A Jenen litih, ke a tabe ke a cewéle. Cié jélé, ke lé te piténelé.

⁹ E patemehi a juuju ko pa Naîn wo Padué, ke mepie genye hegi ana lé pii ne ni apulie, ke wâé heme genye hegi ana e pii wo Padué, be piwéden.

¹⁰ Be, me genye céihi ne ko pa Naî Padué, ke genye temehi ne ha a pwonimenye pie, a juuju ana e pii wo Padué ne kon. Kehe wo paceli time e uce céihi ne ko Padué, ke e pii pie pa agele wo Padué, be time e uce céihi ne ko ana e pii wo Padué ne ko pa Naîn.

¹¹ Be weengi a *JUUJU: E ne tenye wo Padué a mulie na tice anebwén kon. Ke a mulie naa, ke e he pa Naîn.

¹² Ke wo pana e kon wo pa Naîn, ke eten a mulie. Kehe pana time uce e kon wo pa Naîn, ke time uce eten a mulie.

É tii beme mang a céihi tewé

¹³ É tii ninaa lé céikewé, wogewé na geé céihi ne he nii pa Naî Padué, beme geé temehi pie etewé a mulie na tice anebwén kon.

¹⁴ E peleny a céihi na nihe ubwo: Be hemepie genye ileeng ko ace céiu naado âcehi ana nimen kon, ke e o te ténekenye.

¹⁵ Ke hemepie genye temehi pie e te ténekenye, ke ce naado celi genye ilehi, ke genye temehi pie e caa ne tenye.

Time nye uce tee pwo nina ta

¹⁶Hemepie geé ali pa acéhi béeuwé heme e pwo aceli ta, celi time e uce pééeng nge ha a mele [dieli mwo] ke wâé heme geé pwoitihi me den. Ke e o ne ten *a ju mulip wo Padué. Kehe pwo a ta na e péékenye nge ha a mele [dieli mwo]. Ke time é uce pii pie, me geé pwoitihi ne ko [pana e tee cuwo ko pwo] anaa.

¹⁷Tai ni naado na time uce mwomwon, ke ni ta pwo tenye. Kehe time uce tai ni ta pwo tenye na lé péékenye nge ha a mele [dieli mwo].

¹⁸Genye te temehi pie wo paceli e âbeele mu ko Padué, ke time e uce tee pwo ana ta. Ke time uce jan me e ti kon wo *Caatana, pana ta nang, be e te cileeng wo pa Naî Padué.

¹⁹Genye te temehi pie wogenye, ke ni naî Padué, kehe a bwohemwo ati, ke e mu haahi a junuu Caatana.

Genye temehi Padué

²⁰Genye te temehi mwo pie, e âbé wo pa Naî Padué, beme e ne tenye a bwo temehinaado, beme genye temehi Padué na [te céiu nang ke] JUUJU. Ke genye tai mu kon, be genye mu ko pa Naîn, Iésu Kériso. Be weeng Padué na e JUUJU, ke [e ne tenye] a mulip na tice anebwén kon.

²¹Ni ju béoeng, wâé heme geé pipwocilekewé ne ko ni déme duéé: [ati ni naado na lé pé atebwo te Kériso ne he ni pwonimewé]!

2 Ioane

2 Ioane 1

Pipwobwocu

¹Tii te [Ioane] pa ukéiu ne ha a céhi, ne te ê toomwo na e pipégalieng wo Padué, me ni naîn. Te nihe eânimung dewé, ke time uce woéo cehi, kehe tai nina lé temehi a *JUUJU.

²Eânimeme tewé, wonaa mu ko a JUUJU na e konye, na e o te mu konye dieli mwo.

³Me e mu pelenye a *pipwoééhe tice ja kon, ke a péém, ke a *adéihi, mu pele Padué Caa, me lésu *Kériso pa Naîn, ne ha a JUUJU ke a pipwoééhe!

Mulie ha a juuju me a pipwoééhe

⁴Te nihe ubwo a pipwodéén dong he é too ni bée naîm, na lé engen ha a JUUJU, âcehi a patén na e ne tenye wo Caa.

⁵É jenaa, go êje, ke weengi ana é ilehi: Me pieânimense tenye! Time uce a patén na mwo coho na é tii me dem, be ana genye caa te hegi ha atabuhi kon.

⁶Be a pipwoééhe, ke me genye âcehi ni patén de Padué. Wonaa a patén na caa picaa tewé ha atabuhi kon: *Geé pwo me pieânimewé tewé!*

Lépwo apipune agele

⁷Hiwon ni apulie na lé pipwohuô, na lé âbé ne pwo a bwohemwo, ke muhi telé me lé mwomwohi pie wo lésu Kériso [ke pa *Mesia na] e âbé ha a éé apulie. Woélé ni apipwohuô ke ni acubwoni Kériso.

⁸Geé pipwocilekewé, beme time geé uce patieden ni acehi ni penem dewé, kehe me geé hegi a cuhin na hején.

⁹Wo paceli e piâ ité koja a pwaaden, ke me time e uce mu ko ni cémun de Kériso, ke te time uce e kon wo Padué. Kehe wo paceli e mu ko ni cémun de Kériso, ke e kon wo Caa me pa Naîn.

¹⁰Mepie pwo paceli e âbé ne pelewé, ke me te tieden kon a cémun de Kériso, ke geé nemwo hegieng ne pelewé, ke geé nemwo pwobwocu ten.

¹¹Be wo pana e hegieng, ke e hegi mwo ni naado na ta na e pwo.

Bépinelé

¹²Hiwon ni naado na me é pii tewé, kehe time uce nimung me é tii ne he tii. Be é niimihi pie é bo âdé ne pelewé, ke me genye picuhe ibu, ne ha a pipwodéén na hején.

¹³Lé niimiko ni naî ê béeém na e pipégalieng wo Padué, ke lé pwobwocu tem.

3 Ioane

3 Ioane 1

Pipwobwocu

1 Woéo [Ioane] pa ukéiu [ne ha a céihi] ke é pwotii lé céiiko, go Gaïus, be te nihe eânimung dem.

2 Pa ju bééng, é cihe beme wâé ne kom ati ne he ni pwaadeniim, ke me pepule go ne ha a éém, ke é ne ha a jenem.

3 Te junihe piwâénimung, he lé tehenebé ni bélénye acéihi, ke lé uti a mulihem na mwomwon, âcehi a *JUUJU.

4 Be te tice aceli é pipwodéén kon, celi ubwo kojan heme é téne pie lé engen ha a JUUJU ni naîng ne ha a céihi.

Genye hegi ehi ni bélénye coho

5 Pa ju bééng, [é te temehi pie] go penem ha a JUUJU, be go pipwopweehi ne ko ati ni acéihi bélénye ne pelem, ke é ne mwo ko ni bélénye coho [na lé tuie ne ha amu tem].

6 Ni apulie naa, ke lé uti te lépwo acéihi a pwonimem kolé. Wâé heme go bo picani telé ne he ni pwaadeniilé, beme lé panebwénihi ni penem delé. Be wâé te Padué heme nye wonaa a bwo picani tenye.

7 Be lé engen ne he nii lésu *Kériso, be te tice celi lé pé mu ko nina tice céihi telé.

8 É mu ko anaa, ke wâé heme genye hegi ehi ni apulie naa, beme genye tai penem ibu ne ko a bwo patemehi na a JUUJU.

E pii me ta Ioane wo Diotrèfe

9 Ânebun, ke é pwotii nge céii lépwo acéihi, kehe time e uce hegíeo wo Diotrèfe. Be pana nimen me piubwo nang mu hadeniiwé.

10 É mu ko anaa, na mepie é tehene lé pelewé, ke é o pii beetihí tewé ni penem na e pwo na time uce wâé: Be e te nihe pipiikeme, ke time e uce hegi mwo ni apulie te Padué na lé tehene lé pelewé. Ke nina nimelé me lé hegi ni bélénye naa, ke e cubwonilé, ke e pawielé mu ha a *puco te ni acéihi!

11 Pa ju bééng, go nemwo âcéi [nina lé pwo] nina ta, kehe go âcehi nina wâé. Be wo pana e pwo ni penem na ta, ke time e uce temehi Padué. Ke wo pana e pwo ni penem na wâé, ke e âbé mu ko Padué.

12 Ke hemepwo é ne ko Démétrius, ke lé tai piieng me wâé ne ni apulie ati, be e pajuujueng ni penem den. Ke wogeme mwo. Ke go te temehi mwo pie nina geme uti, ke ni juuju.

Bépinelé

¹³ Hiwon ni naado na me é pii tem, kehe time uce nimung me é tii ne he tii.

¹⁴ Be é céihi pie, time uce bwolihi, ke genyu o caa pitookenyu mwo, beme genyu picihe ibu.

¹⁵ Me e mu kom a péém! Lé pwobwocu tem ni béis [na élé éni]. Ke go bo muko pétaapwo pwobwocu te ati ni bénée na élé pelem.

Jude

Jude 1

Pipwobwocu

1 Woéo Jude, pa eabwé te lésu *Kériso, ke pa âjiéne Cang, ke é pwotii lé céiikewé, wogewé ni apulie na e todekewé wo Padué. Ke e pipwoééhewé, ke wo lésu Kériso ke e cilekewé.

2 Wâé heme te ubwo ngen ne pelewé ati a pipwoééhe ke a péém de Padué.

Lépwo awopune na lépwo agele

3 Ni ju béeing, ânebun ke nimung me é pwotii lé céiikewé, ko *a ju mulip na tai e konye ati. Ke [heme é téne a jepule ko ni naado na e tuie ne pelewé] ke é te pwome tii, beme é pamwoiukewé, me geé te nihe pwopa beme geé pwopahi a ju céihi tenye. Be a céihi na te océiu Padué ko ne tenye, wogenye ni apulie ten.

4 Be [é téne pie] lé êjele bé céiikewé ni apulie na time lé uce paciiti Padué. Ke lé bitehi me ta a pwooti ko a *pipwoééhe tice ja kon den, beme lé pwo ni huô na mwiihi ko ni éélén. Ke muhi telé ko lésu Kériso, Padaame henye, ke pa apihuô tenye, na te ju céiu nang. Kehe caa bwolihi na tii ne he ni *tii iitihi [pie o te junihe ubwo] a cuhinaado te ati lépwona lé wonaa!

5 Geé temehi ehi ana é bo pii tewé, kehe nimung me é paniimihi tewé pie: Wo Padaame, ke e caa *celuimi a bele ten, *Isaraéla, mu *Aigupito. Kehe icehi ana ni béeen mu kolé, ke muhi telé me lé piténedeeng, ke e pwo me lé mele.

6 Ke a céiu mwo, li e ne te ni *âcélo a pihuô [na te junihe ubwo wo Padué]. Kehe icehi ana [lé niimihi] ne ni béeen mu kolé [pie te time uce jan] ke lé engen mulang. Ke é alecehen, ke e cielé wo Padué, ke e nelé ha a duaan na te nihe melepiing hen, beme lé pwokarépu, ucéihi a Tan na e bo tauti a bwohemwo hen.

7 Ke a céiu mwo, ke ni apulie mu *Sodome me Gomore, me ni amu aujenilu, ke lé pwo ni huô na mwiihi ko ni éélén. Ke [wo Padué, ke e pwo me] cinilé ha a miû na tice anebwén kon, beme a ine a cuhinaado [te lépwona time lé uce piténedeeng].

Lé pwotahi a puco tewé

8 Ke lé wonaa wo lépwo apipune naa, he lé tuiebé pelewé. Be mwiihi ni huô telé. Ke lé âcehi ni niûlé, ke muhi telé me lé téne ni pihuô te Padaame, ke lé piciheta ne ko ni âcélo na te junihe ubwo *a wâé telé.

9 Mepwo é ne ko Michel, pa daame he ni âcélo, ke time e uce niimihi pie e pii me ta *Caatana, he lu pipééle pahi a déhi *Moosé. Be e te ju pii ten cehi pie: «Me e pwocuhinaado tem wo Padaame!»

10 Kehe icehi ana ni apulie ce, ke time uce piwâ jélé, me lé pii me ta ni naado [na iitihi] na time lé uce temehi. Be lé pwohewii ni wota apiaba na te tice pwonimelé, ke lé âcehi nina te nimelé kon na e pébé a cuhinaado telé.

¹¹O ubwo ace cuhinaado telé! Be lé âcehi a pwaadeni Kaina, ke lé hane mwani pwohewii Balaam. Lé pwopa [ne ko Padué] pwohewii Koré, ke lé o mele ati!

¹²Lé pwotahi a puco tewé heme geé pwo a wiinaado te Padaame. Be lé te junihe wiinaado me ûdu, ke lé te piniimilé cehi, ke time uce tanim jélé kon. Woélé, ni nii na cuutéélé na a dan, kehe te tice ute hen. Woélé, ni acuwo na tice acehin, be mele ni miin ke mele ni waan ke tawii taabwon.

¹³Woélé, ni pihijié na lé te ju ne cehi a buloop; ke ûde ta he nen. Woélé, ni ceni na lé téte hauli, na o tahilé ne ha a melepiing na tice anebwén kon.

E mi pii a cuhinaado telé wo Énoka

¹⁴Te é mu kolé mwo, na e mi pii ânebun wo Énoka, pa bék he niide apulie tabuhi mu ko *Adamu, pie: «E o caa tuie wo Padaame *me* ni âcélo iitihi ten na te junihe hiwon jélé.

¹⁵E âbé tauti ati ni apulie. E bo pwocuhinaado te nina lé téétieng, *mu* ko ati ni pwooti na ta na lé pii ne kon.»

¹⁶Wonaa ni apulie na time uce piwâénimelé, ke lé tee cuwo ko pwohuu [te Padué]. Lé âcehi nina nimelé kon na ta. Ubwo ni pwolé, ke lé tee pipii delé, beme lé pipwoun delé. Ke lé pipaunu ni apulie beme lé pwo nina nimelé kon.

Bénebwéne pwooti

¹⁷Kehe wogewé ni ju bést, ke geé pipaniimihi ni pwooti na lé caa mi paténekenye kon ne ni *apostolo te Padaame lésu Kériso.

¹⁸Be lé pii pie: «Lé o bo tuie ne kowé he *ni bénebwéne tan wo lédwo apulie na time lé uce paciiti Padué. Ke lédwo apihota, ke lé te ju engen cehi ne ko nina nimelé kon na ta.»

¹⁹Woélé na lé pwo me [nye pipééle, ke] me nye pipiiden. Be lé te ju âcehi ni bwo niimihinaado te pa apulie, be time uce e kolé a *Jenen litih.

²⁰Kehe wogewé ni ju bést, ke geé pipamwoiukewé, beme ubwo gewé da ne ha a ju céhi [ne ko Padué] ke geé tee pwoiitihi âcehi a pihuô na e ne tewé na a Jenen litih.

²¹Geé tee mulie ha a pipwoééhe te Padué, he geé mwo ko ucéhi a tan na e bo ne tewé hen a mulie na tice anebwén kon wo Padaame lésu Kériso, pana e pipwoééhenye.

Geé pipwoééhe nina wahin a céhi telé

²²Geé pipwoééhe ni apulie na wahin ni céhi telé.

²³[Ke mepwo nina lé â ité koja a pwaaden] ke geé céilé bé koja a miû. Ke geé pipwoééhe nina lé pwo nina ta, kehe geé pipwocilekewé, be koli geé pwo me alili gewé mu ko ni bwomu telé na mwiihi.

Nye pipwoun de Padué!

²⁴Te jan ne ko Padué me e cilekewé, beme time geé uce tupwo ne ha a ta. Ke e pwo me te tice ta pwo tewé, beme geé cuwo he pwahamiin, ne ha a wâé ten na junihe ubwo, ke é ne ha a pipwodéén.

²⁵Be pa *aceluimikenye na te céiu nang. Wâé heme nye pipwoun den ne he nii lésu Kériso, Padaame henye! Be e mu pelein a wâé, ke a bwo ubwo nang, ke a junuun, ke a pihuô, mu ha atabuhi kon, é jenaa, ke é dieli mwo! Wâé heme wonaal! Amen!

Pii Beetih

Pii Beetih 1

A bécéiuhe pwooti te loane

¹Weengi ana e habwii wo lésu *Kériso, ne ko ni naado na o te ju téele tuiebé. Be e hegi mu ko Padué Caa, ke e bwo pahede pa céiu *âcélo ten, beme e pébé céiiéo a pwooti, woéo loane, pa eabwé ten, ke e huôhi ne tong pie, me é pii beetih te ni apulie te Padué.

²É *pajuujuhi ne tewé ni, pie, ati nina é alih, ke ni pwooti na e pii tong wo Padué, ne ko lésu Kériso.

^{3*}Adéi pa apulie na e pine [te ni apulie] a pwooti ce, na e âbé mu pele Padué. Ke adéi mwo lépwona lé téne, ke lé âcehin! Be caa e mwonu a tan na e bo pacuwohi ati ninaa [wo Padué].

Pipwobwocu

⁴É pwotii nge he ni ⁷*puco te ni acéihi, ha a province Asia: Wâé heme e mu pelewé a adéihi, me a *pipwoééhe tice ja kon, me a péém: A adéihi na e âbé mu pele Padué na e ânebun, ke é jenaa, ke e te mu dieli mwo! A adéihi na e âbé mu ko a *Jenen litihi, na e mu ânebuhe a atebwo te Padaame. [A Jenen litihi, ke pwohewii ni ⁷jenen ne ha a bwo hején nang]!

⁵A adéihi na e âbé mu ko lésu Kériso! Weeng pana e pipatemehi Padué ko a juuju. Ke weeng pa apulie na e mi mulie cemwo mu ha amele. Ke weeng kuti Padaame he ati ni daame éni pwo bwohemwo! Ke weeng na te junihe eânimé denye, ke e tuwokenye koja ni ta pwo tenye, ko a cewéhen [na téé he li e mele me denye].

⁶Ke e pwo me genye nahi a Mwametau ten, ke me genye cuwo he pwahamii Padué, Caa ten, beme genye pipwoeabwé ten. Wâé heme e mu pelen a bwo ubwo na a wâé, me a junuun, dieli mwo! Amen!

⁷Geé alih! Be e o te ju téele âbé, he ni nii. Ke lé o tai alieng, ati ne ni apulie, me ni béén mwo li lé tidihi kon ali da. Ke lé o bo é me pihemun, ati ni bele éni pwo bwohemwo. Amen!

⁸E pii wo Padaame Padué pie: «Woéo, ke é Alfa, ke é Oméga †, pa atabuhi kon, ke pa anebwén kon. Woéo ânebun, ke é jenaa, ke é te mu dieli mwo. Woéo pana junihe pwojunuung, ne ko ati ni naado.»

E ali lésu Kériso ne ha a wâé ten

⁹Woéo loane, pa acéihi béewé, na nye tai picani, be wonaa mu ko *a bwo âcéi lésu tenye. Kehe icehi ana nye te cumang ne he ni bwo picani tenye, me nye tai ucéihi a Mwametau ten.

[É ha a benaamwon na e paciheéo wo Padaame] ke he li é mu [he karépu] ne pwo a één Patmos, mu ko a bwo pipatemehi nen dong a pwooti te Padué, me a bwo pajuuju lésu tong.

¹⁰Ke é ha a céiu tan ko pwoitihi, a tan de Padaame, [he é mwo ko pwoitihi] ke e péeo na a Jenen litihi. Ke é téne ne céing a pwocihe na te junihe ubwo, pwohewii ni pwocuu tutu.

¹¹Ke e pii tong pie: «Go tii ne ha a tii ni naado na go alih. Ke go pawie nge he ni 7 puco te ni acéhi he ni pwomwo ubwo ce: é Éfeso, ke Smirne, ke Pergame, ke Tiatire, ke Sarde, ke Filadelfi, ke Laodicé.»

¹²Ke é biteéo, beme é alih pie, woo celi e paciheéo, ke é alih ni 7 mwomiû na mwani megele.

¹³Ke é ha awiemelé, ke e cuwo lang wo pa *Nahi Apulie. Ke e cuwohe a epwén na bwali. Ke mwani megele a taihenan.

¹⁴Ke pwojo ni apunin, pwohewii ni nii na te junihe pwojo. Ke lupwo naamiin, ke pwohewii a duwele miû.

¹⁵Ke lupwo an, ke pwohewii ni toki megele, na éle ko miû, ke te junihe pwomelaan. Ke te junihe ubwo a patin, pwohewii a éé tabe pwobwaatéép na te junihe ubwo.

¹⁶Ke e pé ne ha a in pwo jui ni ceni na 7. Ke e wie mu pwon a teua na pipwon waalihi. Ke a pwahamiin, ke pwomelaan, pwohewii a téale, heme te ju goahen ehi.

¹⁷Ke é tupwo ne ko watihe an, pwohewiin heme é caa mele. Kehe icehi ana e ne a in pwo jui huïng, ke e pii tong pie: «Go nemwo pwo me mwotiko! Be woéo pa atabuhi kon, ke pa pwonehin.

¹⁸Ke woéo Pana é mulip, li é caa mele, kehe icehi ana é caa *mulie dieli mwo, be pwojunuung ne ko a mele. Be é te pé a kilé ko a amu te ni amele.

¹⁹Ke go tii ne ha a tii nina go alih: ni naado jenaa, me ni naado na lé bo tee tuie.

²⁰«Weengi a bwopiinen na e ha aduwo, ne ko ni 7 mwomiû mwani megele, me li 7 ceni, li go alih ne ha a ing ne pwo jui: Be ili 7 mwomiû, ke 7 puco te ni acéhi, ke ili 7 ceni, ke ni âcélo telé.»

Pii Beetih 2

tii te ni 7 puco te ni acéhi <α>

(*Pwahamii tii: 2—3*)

1 <α> Te ni acéhi ne Éfeso

¹[E pii tong wo pa *Nahi Apulie pie]: «Go tii nge céii pa âcélo te ni acéhi ne Éfeso pie: «Weengi a pwooti tong, woéo pana é imwi ne ha a naatiing pwo jui ni 7 ceni; ke é engen ha awieme ni 7 mwomiû mwani megele.

²É caa temehi ni mulihewé, me ni penem dewé me ni bwo picani tewé, be geé te cumang. Ke é caa temehi pie, geé cubwoni ni béén na nimelé me lé pwo nina ta. Be geé caa temehi lépwo agele, na lé pii pie lépwo *apostolo [na é pahedelé ngen].

³Ke geé cumang ne he ni picani, be wonaa mu kong. Kehe icehi ana time geé uce patupwo a céhi tewé ne kong.

⁴«Kehe te ju céiu cehi ana geé pwo na ta, ke é cihe me mwoiu ne kowé. Be geé caa patieden ni pwonimewé kong na e mu kowé ânebun.

⁵Wâé heme geé niimihi, he celi geé tupwo nelang. Ke geé pininim ke geé bitekewé, me geé mulie mwo he ni bwomu tewé bwolihi [na wâé te Padué]! Be koli é bo âbé mwonukewé, ke é pé kojakewé ni mwomiû tewé.

⁶«Kehe icehi ana weengi ni bwomu tewé na wâé. Be geé téétihi, pwohewiiéo, ni penem de lépwo *Nicolaïte*.

⁷ «Wo paceli pwo ce pwojéénen, ke wâé heme e téne ana e pii na a *Jenen litih te ni acéhi! «Ke wo lépwona lé piwéden [koja a ta] ke é bo ne telé a mwomwon, me lé wii a acehi a acuwo ko a mulip, na e ha apwoamu te Padué na e he *miiden.»

2 <a> Te ni acéhi ne Smirne

⁸[Ke e pii tong mwo wo pa Nahi Apulie pie]: «Go tii nge céii pa âcélo te ni acéhi ne Smirne pie: «Weengi a pwootti tong, woéo na é atabuhi kon, ke é anebwén kon, li é caa mele, ke é caa mulie cemwo. Ke é pii tewé pie:

⁹ «É caa temehi a bwo mu he ni picani tewé, me a bwo tice dewé. Ke te junihe hiwon ni *adéhi te Padué ne kowé! Ke é caa temehi ni pihota te lépwona lé pii pie lépwo *Juif, kehe time uce lépwo Juif. Be lépwo apulie te *Caatana.

¹⁰ «Ke é pii tewé pie: O bo pwo ace cuwo benaamwon celi geé o mu he ni picani, me téé hen. Be wo Caatana, ke e o te ju pwome ne ce béén mu kowé he karépu, beme a bwo tacebwénikewé ati he na 10 ni tan. Kehe icehi ana geé nemwo pwo me mwotikewé. Kehe geé cumang ne he ni céhi tewé, piwien heme e â taunuukewé. Be é bo pwo ce ceme ni penem dewé: a *mulie dieli mwo.

¹¹ «Wo paceli pwo ce pwojéénen, ke wâé heme e téne ana e pii na a Jenen litih te ni acéhi!» «Wo lépwona lé piwéden [koja a ta] ke time uce tatéélé a báalohe mele. [Be lé bo mulie pele Padué dieli mwo]!»

3 <a> Te ni acéhi ne Pergame

¹²[Ke e pii tong mwo wo pa Nahi Apulie pie]: «Go tii nge céii pa âcélo te ni acéhi ne Pergame pie: «Weengi a pwootti tong, woéo pana pwo a teua tong, na pipwon waalihi, ke é pii tewé pie:

¹³ «É temehi pie, é he na geé mu lang, ke e pihuô nelang wo Caatana. Kehe icehi ana geé te cumang ne kong. Ke é caa temehi pie, lé pé kojakewé Antipas, pana mwomwon nang, ke e pajuujuéo. Ke lé taunueng, ne ha a pwomwo ubwo

tewé, he na e mu lang wo Caatana. Kehe icehi ana time geé uce tahi taabwon a céhi tewé ne kong.

¹⁴ «Kehe te ju céiu cehi ana pwo a bwopemiko na ta, ke é cihe me mwoiu ne kowé. Be élé pelewé wo lépwo apulie na lé pipwohewii Balaam. Be [pa *péroféta agele ânebun, he li] e picani te pa daame Balak, beme e pipatiedeni a bele *Isaraéla. Be e pwo me lé wii ni *âpwailo na ne te ni *dème duéé. Ke e pwo me lé jéilé ne ko Padué ne ni béén.

¹⁵ «Ke wonaa ne pelewé jenaa, be pwo ce béeuwé celi lé âcehi ni cémun de lépwo *Nicolaïte*.

¹⁶ Ke é pii tewé pie, geé pininim, ke geé bitekewé! Be koli é tuie ne kowé. Ke é pwopa ne kolé, ko a teua na e wie mu pwong.

¹⁷ «Wo paceli pwo ce pwojéénen, ke wâé heme e téne ana e pii na a Jenen litihi te ni acéhi! «Wo lépwona lé piwéden [koja a ta] ke é bo ne telé a wiinaado mu he miiden: a *manne* na neduwohi. Ke é bo ne telé a péi na pwojo, na tii ne kon a nii na mwo coho. Ke time e uce temehi a nii naa wo pace céiu apulie, kehe te icehi pa apulie na e hegí!»

4 <α> Te ni acéhi ne Tiatire

¹⁸ [Ke e pii tong mwo wo pa Nahi Apulie pie]: «Go tii nge céii pa âcélo te ni acéhi ne Tiatire pie: «Weengi a pwooti tong, woéo pa *Naî Padué, woéo na lupwo naamiing, ke pwohewii a duwele miû. Ke lupwo ang, ke pwohewii ni toki megele, na élé ko miû, ke te junihe pwomelaan. Ke é pii tewé pie:

¹⁹ «É caa temehi ni mulihewé, me ni penem dewé. Be geé céhi ne kong, ke eânimewé te ni apulie, ke geé picani telé. Ke geé picani ne kowé, ke geé te cumang. Ke é temehi pie, geé te junihe pwo ni penem na hiwon kojan ânebun.

²⁰ «Kehe te ju céiu cehi ana pwo a bwopemiko na ta, ke é cihe me mwoiu ne kowé. Be [te junihe muhi tong he] time geé uce pacuwo Jézabel. Wo ênaa, ke e pii pie, è péroféta celi e pébé a pwooti tong. Kehe icehi ana e gele, ke e bite ni apulie tong, me lé pwo nina ta. Be e pwo me lé wii ni âpwailo na ne te ni déme duéé. Ke e pwo me lé jéilé ne ko Padué ne ni béén.

²¹ «E pwohewii ni toomwo pwopwaaden. Ke é te junihe ne ten ni benaamwon me e pininim me biteeng. Kehe icehi ana time uce nimen me e pitaatééhi a mulihen, be nimen me e te pwo toomwo pwopwaaden.

²² «Ke me wonaa, ke é o tahieng ne pwo apule ko picani, me lépwona piwie ni huô telé na ta, hemepie time lé uce pininim me lé pibitelé koja ni huô naa.

²³ «Éa, é bo pwo me lé mele ati, wo lépwona lé âcéin. Ke ati ni acéhi, ke lé bo tai temehi pie, woéo pana é temehi ati ni bwo niimihinaado me nina nime ni apulie kon. [Geé pipwocile!] Be é bo muko pétaapwo ne tewé, âcehi ni muko pétaapwo penem dewé.

²⁴«Mepwo é ne ko lépwona lé âcéi Jézabel, ke lé pii pie, lé hane ce cémun celi eda. Kehe lé te ju gele, be lé hane Caatana. Kehe icehi ana time lé uce wonaa wo lépwona béen mu kowé mulang Tiatire. Kehe [a pwooti tong me dewé, ke] time uce ace âneule celi junihe téé.

²⁵Kehe geé imwi mangihi nina etewé, die ha ace bwo mwojuia mwo tong.

²⁶⁻²⁷ «Wo lépwona lé piwéden, wo lépwona lé piténedeéo dieli ha a pwonehin, ke é bo ne telé a mwomwon na e ne tong wo Caa tong. Ke lé bo pihuôhi ati ni bele pwo bwohemwo. Ke lé bo taiilé ko a betoki, pwohewii a bwo taii ne ni tam pule.

²⁸Ke é o ne telé mwo a ceni pwopwometan, na e pé da a téale [beme a inenaado ko a bwo piwéden delé].

²⁹«Wo paceli pwo ce pwojéénen, ke wâé heme e téne ana e pii na a Jenen litih te ni acéihi!»

Pii Beetahi 3

5 <α> Te ni acéihi ne Sarde

¹[Ke e pii tong mwo wo pa *Nahi Apulie pie]: «Go tii nge céii pa âcélo te ni acéihi ne Sarde, pie: «Weengi a pwooti tong, woéo na e tidiéo [na a junuu a *Jenen litih, na e pwohewii] ni 7 jenen [ne ha a bwo hején nang]; ke dong mwo ni 7 ceni. Ke é pii tewé pie: «É caa temehi ni mulihewé, me ni penem dewé. É téne a pwooti kowé, pie geé teko ûmiê, kehe icehi ana geé caa mele.

²Ke é alihie pie, ni huô tewé, ke time uce wâé te Padué Caa tong. É mu ko anaa, na é pii tewé pie: Geé cuwoda! Ke geé pamwoiuhi a cuwo nehinaado na wâé na mwo te e pelewé. Be koli geé bwobe ju mele.

³ «Geé pininim, ke geé bitekewé! Ke geé niimihi ni pwooti, na geé caa téne ke hegi. Ke geé piténedehi! Be koli é âbé pwohewii pa abune. Be time geé o uce temehi ace benaamwon celi é o tookewé hen.

⁴ «Kehe céiu cehi ana pwo ni béen mu kowé, mu Sarde, na time lé uce pwo me tooli ni epwénelé; na wâé tong ni mulihelé. Ke é bo ne telé ni epwén pwojo na mwo wâé. Ke geme bo piengen ibu.

⁵ «Be lépwona lé piwéden [koja a ta] ke lé o cuwohe ce epwén pwojo celi wonaa, ke time é o uce ciitili ni niilé, mu ha a tii ko ni apulie na lé bo hegi *a ju mulip dieli mwo. Ke é bo pipatemehi, ne he pwahamii Caa tong me ni *âcélo ten, pie, ni apulie tong.

⁶«Wo paceli pwo ce pwojéénen, ke wâé heme e téne ana e pii na a Jenen litih te ni acéihi!»

6 <α> Te ni acéihi ne Filadelfi

⁷[Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Filadelfi pie: «Weengi a pwooti tong, woéo pana é iitihi, ke é juuju. Woéo

pana é pé a kilé ko a pwodaame te *Davita. Woéo pana é tehi, ke o te tice paceli jan ne kon me e capuhi; ke me é capuhi, ke o te tice paceli jan ne kon me e tehi. Ke é pii tewé pie:

⁸ «É caa temehi ni mulihewé, me ni penem dewé. Te junihe tice niihewé, me junuuwé, kehe icehi ana geé te piténedehi ni pwootti tong. Ke time geé uce téétihi a niing. Geé téne, be é caa ne he pwahamiiwé a pwaaden, ke te tice paceli me e capuhi.

⁹ «Pwo ni béen mu pelewé, na lé pii pie, l épwo *Juif. Kehe icehi ana time uce l épwo Juif, be l épwo apulie te *Caatana. Ke é bo pwo me lé tidihi jililé he pwahamiiwé. Ke lé o te temehi pie te junihe eânimung dewé.

¹⁰ «Be geé te piténedehi ni pwootti tong, beme geé cumang! Ke é mu ko anaa, ke é bo wéikewé, he ni tan ko téé me picani. He ni tan naa, ke o tacebwéni ati ni apulie pwo bwohemwo.

¹¹ «Kehe icehi ana geé te ûmiê! [Be koli é bo patéetikewé.] Kehe geé imwi mangihi ni wâé [na e he ni pwonimewé]. Be koli bo pé kojakewé ni cemewé.

¹² «Wo l épwona lé piwéden [koja a ta] ke é bo pwo me lé amwo ha a *mwaiithi te Padué Caa tong. Ke lé o te mu lang dieli mwo. Ke é bo tii ne kolé a nii Padué Caa tong, ke a nii a pwomwo ubwo te Padué Caa tong: a *lérusaléma na mwo coho, na e opé mu he miiden, pele Padué. Ke é bo tii mwo, ne kolé, a niing na mwo coho.

¹³ «Wo paceli pwo ce pwojéénen, ke wâé heme e téne ana e pii na a Jenen litihi te ni acéihi!»

7 <a> Te ni acéihi ne Laodicé

¹⁴ [Ke e pii tong mwo wo pa Nahi Apulie pie]: «Go tii nge céii pa âcélo te ni acéihi ne Laodicé pie: «Weengi a pwootti tong, woéo pana pii kong pie ‘Amen, ke Wâé heme wonaa’. Woéo kuti na é pii beeti Padué ha a juuju. Ke woéo pa atabuhi ko ati ni naado na e pwo wo Padué. Ke é pii tewé pie:

¹⁵⁻¹⁶ «É caa temehi ni mulihewé, me ni penem dewé. [Time geé uce pipwoeabwé tong, ati he ni pwonimewé.] Kehe te ju cuniê gewé. Ke geé pipwocile, be koli é bo unyehikewé!

¹⁷ «Geé pipii dewé pie, te junihe hiwon ni naamuuwé me ni mwani tewé, ke te tice ace céiu naado celi tieden kojakewé. «Kehe icehi ana tice tewé, be time geé uce aliji temehi pie, te junihe pwoééhewé! Be te ju tice ace cuwo naamuuwé, ke bwi gewé, ke tice mwaanu kowé!

¹⁸ «Ke é pii tewé pie: Wâé heme geé pwocuhin, kojaéo, ni mwani megele na cini ne pwo miû, na te junihe pwomelaan, ke te tice alili hen, ke ubwo a cuhin. Ke o pwo naamuuwé, ne he pwahamii Padué. Ke geé pwocuhin ce epwén celi te junihe pwojo, me geé cuwohen. Be me wonaa, ke o time bo uce tanim gewé ko a bwo tice mwaanu kowé. Ke geé pwocuhin kojaéo, ce etihe naamiiwé, beme geé o niê ehi.

¹⁹ «É ne pune ke é pwocuhinaado te lépwo apulie na te junihe eânimung delé. Ke é mu ko anaa, ke geé ûmiê, ke geé pininim, ke geé bitekewé. Ke geé taatééhi ni mulihewé!

²⁰ «Be é cuwo he pomwa, ke é cii. Ke mepie e téne a pating wo pace céiu apulie, ke me e tehi ne tong, ke é o taa céiieng, me gemu piwiinaado ibu!

²¹ «Wo lépwona lé piwéden [koja a ta] ke é bo pwo me lé tebwo pwohewiiéo, ne pwo a atebwo tong. Be é caa piwéden, ke gemu caa tebwo pwo a atebwo he daame me Caa tong.

²² Wo paceli pwo ce pwojéénen, ke wâé heme e téne ana e pii na a Jenen litih te ni acéhi.»

Pii Beetahi 4

Lé pipaunu Padué ne he miiden

¹ É ne alecehe ni naado naa, ke é alihí mwo a céiu naado. É alihí ne jeda he miiden a pomwa na tehi. Ke é téne mwo ali pwocihe, li pwohewii a pati tutu. Ke e pii tong pie: «Go taabé éni, beme é habwii tem ni naado na o te ju téele tuie.»

² Ke e ole kong a *Jenen litihí, ke é alihí a atebwo jeda he miiden, ke é ali Padaame he e ko tebwo pwon.

³ Ke te junihe wâé nang, ne ha a wâé ten, be pwodaadiin, pwohewii ni péi na pun bupwi ke megele, na te junihe ubwo a cuhin. Ke e aujenihi a atebwo na a aduwoho, na pwomelaan pwohewii a péi émeraude.

Lépwo 24 ukéiu

⁴ Aujenihi a atebwo he daame, ke é alihí ni béé atebwo na 24; na lé ko tebwo pwon wo lépwo ukéiu na 24 jélé, na lé cuwohe ni epwén na pwojo, ke lé pwobo he ni kuron na mwani megele.

⁵ Ni ilehi, ke a huu he a tikekele, ke lé wie mu ko ali atebwo. Ke é ânebuhe a atebwo naa, ke 7 ni mwomiû na tole. Ke weengaa [ni inenaado ko] a Jenen litihí te Padué.

⁶ Ke é alihí ne mwo lang, a jié, na te junihe bwakenu.

Lépwo âcélo na paa jélé

É ha awiemen, ke é aujenihi a atebwo he daame, ke lé cuwo lang wo lépwo âcélo na paa jélé, na lé pwohewii ni wota, na hiwon ni naamiilé ânebun ke é alechelé.

⁷ Pa bécéiuhen, ke pwohewii ni liô†; pa béalohen, ke pwohewii ni nahi paaci; pa bécéiéhen, ke e pé ana pwohewii ni pwahamii apulie; pa bépaahen, ke pwohewii a bwaanoléé heme e téé.

⁸ Muko pétaapwo pi 6 telé ni puuilé. Ke pwo ni naamiilé ati, pwo ni puuilé, ke é haahi ni puuilé. Ke bwén, ke pwang, ke lé tee pwonyebi, ke lé pii pie: «E iitihi!

E iitihi! E iitihi wo Padaame, be weeng Padué. Te junihe pwo niihen ne ko ati ni naado. Be weeng jenaa, ke weeng ânebun, ke e te mu dieli mwo!»

⁹Lé pwonyebi beme lé pipwoun, me pipwo-olé te pana e ko tebwo pwo a atebwo he daame, pana e *mulie dieli mwo.

¹⁰Ke ati he ni benaamwon na lé pipwoun den hen, ke lé tidihi jililé he pwahamiin wo lépwoli 24 ukéiu. Ke lé pipaunu pana e mulie dieli mwo. Ke lé tahi ni kuron delé ne he pwahamiin, ke lé pii ten pie:

¹¹«Wogo Padaame, Padué heme, ke wogo pana jan me pipaunuko ne ha *a wâé tem, *me* a junuum. Wogo pana go tabuhi ati ni naado. Wogo na go pacuwohi ana te nimem kon!»

Pii Beetih 5

7 apinyihi ko tii <β>

(*Pwahamii tii: Pii Beetih 5—7; Pii Beetih 8.1—5*)

E tehi a tii wo pa Nahi Muto

¹É alihia tii na capuhi, na e pé ne ha a in ne pwo juin wo pana e ko tebwo pwo a atebwo he daame. Pwo a atii he ni piduaa a tii naa. Ke pwo ni apinyihi kon na 7.

²Ke é ali pa céiu *âcélo na te junihe pwojunuun, ke e toii da pie: «Woo celi jan ne kon me e tuwo ni apinyihi, ke me e pale a tii ce?»

³Kehe icehi ana te tice pace apulie celi jan ne kon me e tuwo, ke me e pale ali tii, me e alihia. Te tice jedi he miiden, ke éni pwo bwohemwo, ke é haahi a bwohemwo.

⁴Ke é te junihe é kuti, ko ana te tice pace céiu apulie celi jan ne kon me e tuwo.

⁵Ke e pii tong wo pa céiu béé lépwoli ukéiu pie: «Go nemwo é! Be te pwo pa céiu apulie na jan ne kon me e tuwo ni apinyihi na 7 naa, ke me e pale a tii. Be wo [pana lé pii kon pie] pa Liô mu ha a pwomwoiu *Juda, pa apulie mu ha a pwomwoiu te pa daame *Davita, ke e caa piwéden, ke e bo tuwo ni 7 apinyihi naa, me e tehi a tii.»

Jan ne ko pa Nahi Muto

⁶Ke nebwén, ke é ali pa *Nahi Muto, na e ko cuwo ânebuhe a atebwo te Padaame, ha awieme ni âcélo na paa jélé, na lé pwohewii ni wota, me lépwoli ukéiu. Ke pwohewiin heme taunueng me *pwoâpwailo kon. Ke 7 ni gi ten, ke 7 ni naamiin. Ni naamiin, ke a *Jenen litih [na pwohewii ni 7 jenen ne ha a bwo hején nang] na e neeng opé wo Padué ne pwo a bwohemwo ati.

⁷Ke e âbé wo pali Nahi Muto, ke e pé ali tii mu ha a in ne pwo jui pali e tebwo pwo ali atebwo he daame.

⁸Ke lé tai miibule, ke tidihi jililé he pwahamiin wo lépwoli âcélo li paa jélé, me lépwoli 24 ukéiu, ke lé pipaunueng. Ke te pipétaa lépwoli 24 ukéiu ni gitar telé,

me ni mwotabe mwani megele, na oba ko tabe ûde. Be anaa, ke ni pwopwoiitihi te ni apulie te Padué.

⁹Ke lé pwo a céiu nyebi na mwo coho, ke lé pii pie: «Wogo na jan ne kom *me* go pé a tii, *me* go tuwo ni apinyihi kon. Be caa wogo pa âpwailo, ke lé taunuko. Tée a cewéhem me de ni apulie: ati he ni pwomwoiu, *me* ati he ni pati apulie *mu* he ni amu ati, *me* ati ni bele. Ke go pwo me lé bele te Padué.

¹⁰Ke go pwo me lé nahi a Mwametau ten, ke me lé pipwoeabwé ten. Lé bo pihuôhi ni apulie pwo bwohemwo!»

¹¹Ke é alechen, ke é alih, ke é téne ni âcélo, na te junihe hiwon jélé, na pwocoon me nye pinelé, na lé tai cuwo aujenihi a atebwo he daame: Lé cuwo ânebun ne ni âcélo na paa jélé, ke lé cuwo lang wo lépwoli ukéiu, ke lé panebwénihi ne ni âcélo naa.

¹²Ke lé te junihe toii da wo lépwo âcélo, na lé pwonyebi pie: «Pipaunu pa Nahi Muto, pali lé taunueng! Be eten ni pipwojunuun, *me* ni wâé ten, *me* a temehinaado ten. Pwo niihen ko a wâé ten. Jan me pietieng da!»

¹³Ke é téne ni pwocihe te ati ni naado na e pwo wo Padué ne jeda he miiden, ke éni pwo bwohemwo, ke é he jié, ke é haahi a bwohemwo. Ke lé tai pwonyebi, *me* pii pie: «Me nye pipaunu pana e tebwo pwo a atebwo, *me* pa Nahi Muto! Nye pipwoun delu dieli mwo! Pwo *a wâé telu, *me* a niihelu dieli mwo!»

¹⁴Ke lé pii wo lépwoli âcélo li paa jélé pie: «Amen! Wâé heme wonaa!» Ke lé tai miibule ke tidih jililé wo lépwoli 24 ukéiu, ke lé pipaunulu.

Pii Beetih 6

Tuwo li 7 apinyihi ko tii 1 <β> Pa atebwo pwo a haricaan pwojo

¹É alechen, ke é ali pali *Nahi Muto, he e tabuhi tuwo a bécéiuhe apinyihi ko ali tii. Ke é téne pa céiu béé lépwoli âcélo li paa jélé, li lé pwohewii ni wota, he e cihe ha a patin na te junihe pwo niihen, ke e pii pie: «Go âbé!»

²Ke e tehenebé wo pana e tebwo pwo a haricaan pwojo, na e pé a mwonyigé. E hegi a cemen, be e caa piwéden, ke e engemwo beme e piwéden mwo.

2 <β> A pa

³Ke e tuwo mwo ali báalohe apinyihi ko tii wo pali Nahi Muto. Ke é ha a benaamwon naa, ke é téne pa báalohe âcélo, he e toii pie: «Go âbé!»

⁴Ke e tehenebé wo pa haricaan na megele nang pwohewii a duwele miû. Ke wo pana e tebwo pwon, ke ne ten a teua na te junihe ubwo. Ke pwo mwomwon den me e pétaabwon a péém, mu éni pwo bwohemwo, beme lé pitaunulé wo lépwo apulie.

3 <β> A menele

⁵É alechen, ke e tuwo a béciéhe apinyihi ko tii wo pali Nahi Muto. Ke é ha a benaamwon naa, ke é téne pa béciéhe âcélo, he e toii pie: «Go âbé!» Ke e tuiebé pa haricaan na bwiile nang. Ke e pé a béja wo pana e tebwo pwon.

⁶Ke é téne a céiu pwocihe mu ha awieme lépwoli âcélo li paa jélé. Ke e pii pie: «Céiu a béja ko blé ha a tan ko penem, ke cié ni béja ko orge ha a tan ko penem. Kehe go nemwo pwotahi a géréén, me a tabe megele!»

4 <β> Mele

⁷Ke e tuwo a bépaahe apinyihi ko ali tii wo pali Nahi Muto. Ke é ha a benaamwon naa, ke é téne pa bépaahe li âcélo, he e toii pie: «Go âbé!»

⁸Ke é alihia haricaan na pwiu. Ke wo pana e tebwo pwon, ke a niin pie ‘Mele’. Ke pwo pa céiu na e âcéin, na a niin pie ‘Amu te lépwo Amele’. Ke ne telu a mwomwon, me lu pihuô ne ha a céiu duaan, mu ko ni duaan na paa, mu ko ni apulie pwo bwohemwo. Ke lu ne a pa me a menele, me ni wota apiaba pwo bwohemwo, me ati nina e pébé a mele.

5 <β> Lépwona taunulé

⁹Ke é alechen, ke e tuwo a bénim he ni apinyihi wo pali Nahi Muto. Ke é ha a benaamwon naa, ke é alihia, ne haahi *apwoâpwailo, ni jene ni apulie na taunulé watihen a pwoooti te Padué, ke woélé mwo lépwo apajuujueng.

¹⁰Ke lé toii da pie: «Padaame wé! Wogo na te junihe pwojunuum ke go iitihi ke go juuju, ke go bo tauti ni apulie pwo bwohemwo, ke go bo pwocuhinaado telé, be lé taunukeme. Ke kona go o mwo te Jame uca?»

¹¹Ke muko pétaapwo ne telé ni epwén pwojo. Ke e pii telé pie: «Geé mwo te ju pwome mwaale, ucéihi ace bwo âbé te ati ni béewé: [ni eabwé te lésu] na o taunulé pwohewiikewé. Be mwo time lé uce tuie ati.»

6 <β> Penem ati ni naado

¹²Ke é ali mwo pali Nahi Muto, he e tuwo a béo he apinyihi ko ali tii. Ke é ha a benaamwon naa, ke e te tuie kuti a penem bwohemwo na te junihe ubwo. Ke a téale, ke bwiile pwohewii a epwén he doole mele. Ke a wole, ke megele pwohewii a cewéle.

¹³Ke lé tai tupwo ne pwo bwohemwo ne ni ceni, pwohewii ni ace majing wamin heme patupwohi na a udan.

¹⁴Ke te pieadi ngen a miiden, pwohewii a talihia heme nye capipihi. Ke ati ni juwole me ni één, ke péélé mu he ni amu telé.

¹⁵Ke lé tai cela wo lépwo daame pwo bwohemwo, me lépwo apulie na piubwo jélé, me lépwo caa te coda, me lépwo apulie na pwo naamuulé, me lépwo apulie na pwo niihelé, me ati lépwo *apenem tice ja kon me ati lépwo béén mwo. Ke lé â tadtuo he ni péi, ke é he ni mwa péi ne pwo juwole.

¹⁶ Ke lé pii te ni juwole, me ni péi pie: «Geé tupwo ne huîme! Geé neduwokeme ité koja pana e ko tebwo pwo a atebwo he daame! Geé neduwokeme ité koja a okéé te pa Nahi Muto!

¹⁷ «Be e tuie a tan na ubwo ko a okéé telu. Ke woo paceli e o mwo mulie?»

Pii Beetih 7

A bele te Padué

¹ Ke é alecehen, ke é ali ni béé âcélo na paa jélé, na lé ko cuwo he ni uhin ko a bwohemwo, ke lé imwi ni dan na paa na te junihe ubwo ne pwo a bwohemwo. Ke wonaa, beme te tice dan celi me e cuu a bwohemwo, ke a jié, me ni acuwo.

² É ali mwo pa céiu âcélo he e ko taa ha a duaan na e taa tuie hen a téale, he e ko pé ana me e ne me a inef Padué na e mulip. Ke e toii da me ubwo te lèpwo béé âcélo na paa jélé, na ne telé ni pipwojunuun, me lé pwotahi a bwohemwo me a jié. Ke e pii telé pie:

³ «Geé mwo neme cuwo! Geé nemwo téele pwotahi a bwohemwo, me a jié, me ni acuwo! Be geme o mwo mi ne ânebun a inen ne pwo bwaade lèpwo eabwé te Padué henye.»

⁴ Ke é téne a jéhi lèpwona lé hegi a ine Padué. Be lèpwo 144000 ni apulie, mu ha ati ni pwomwoiou te a bele *Isaraéla:

⁵¹²ooo mu ha a pwomwoiou te *Juda,
12000 mu ha a pwomwoiou te Ruben,
12000 mu ha a pwomwoiou te Gad,
⁶¹²ooo mu ha a pwomwoiou te Asser,
12000 mu ha a pwomwoiou te Neftali,
12000 mu ha a pwomwoiou te Manassé,
⁷¹²ooo mu ha a pwomwoiou te Siméon,
12000 mu ha a pwomwoiou te Lévi,
12000 mu ha a pwomwoiou te Issakar,
⁸¹²ooo mu ha a pwomwoiou te Zabulon,
12000 mu ha a pwomwoiou te Josef,
12000 mu ha a pwomwoiou te *Benjamin. Tai woélé, ke lé tai hegi a ine Padué.

Lé pipaunu Padué ne ni apulie na te junihe hiwon jélé

⁹ É alecehe ninaa, ke é omehi mwo, ke é ali ni apulie na te junihe hiwon jélé, na time uce jan me nye pinelé. Be lé âbé mu ati he ni bele, me ni pwomwoiou, me ni amu, me ni pati apulie pwo bwohemwo. Ke lé tai cuwo ânebuhe a atebwo te

Padaame, me pali *Nahi Muto. Ke lé tai cuwohe ni epwén pwojo, ke lé tai pé ne he ilé, ni madi alica.

¹⁰ Ke lé tai toii da pie: «Geu caa celuimikeme, wogo Padaame Padué heme, na go tebwo pwo a atebwo tem, ke wogo pa Nahi Muto!»

¹¹ Ke lé tai cuwo aujenihi a atebwo naa: Ke é aujeni lépwo ukéiu, ke wo lépwoli âcélo li paa jélé, li lé pwohewii ni wota. Ke lé tai miibule, me tidihi jililé ânebuhe a atebwo he daame, ke lé pipwoun de Padué.

¹² Ke lé pii pie: «Amen! Wâé heme wonaa! Pipaunu Padué henye! Olé me ubwo ten! Be eten ni pipwojunuun, ke a bwo temehi nen den, ke a niïhen, me a wâé ten! Jan me pietieng da! Wâé heme wonaa! Amen!»

Lé âbé mu he ni picani me ni téé

¹³ Nebwén, ke e [biteeng ne kong] wo pa céiu ukéiu, ke e tahimwoéo pie: «He woéle ni apulie na lé ko cuwohe ni epwén pwojo, ke lé âbé mu wé?»

¹⁴ Ke é hegi ne ten pie: «Pa daame, te wogo pana go temehi.» Ke e pii tong pie: «Woélé, ke lépwona lé âbé mu he ni picani me ni téé na junihe ubwo. Lé caa puu ni epwénelé ne ha a cewéhe pa Nahi Muto, ke ni epwénelé, ke caa pwojo.

¹⁵ «Lé cuwo he pwahamii Padué, na e tebwo pwo a atebwo ten. Ke lé pipwoeabwé heme bwén ke pwang, ne ha a *mwaiitihi ten. Ke e bo wéilé wo pana e tebwo pwo a atebwo he daame.

¹⁶ Ke o caa time uce menelé, ke o caa time uce nimelé *me* lé ûdu; ke o caa time uce éle jélé ko a téale, me a éle.

¹⁷ Éa, be bo pa awéihi muto telé wo pa Nahi Muto na e mwonuhi a atebwo he daame. E bo péélé nge ha acaamatabe, a tabe na e ne a mulip. Ke wo Padué, ke e bo tahi ati ni tabehaamiilé.»

Pii Beetih 8

Tuwo a bénebwéne apinyihi ko ali tii 7 <β> Pwopweehi ni tutu

¹ E tuwo ali bé₇ he apinyihi ko ali tii wo pali *Nahi Muto. Ke é ha a benaamwon naa, ke te ju tice pwocihe jeda he miiden he na céiu bebehi inetéale.

² Ke é ali ni *âcélo na ₇ jélé na lé ko cuwo he pwahamii Padué. Ke muko pétaapwo ne telé ni tutu.

³ Ke e âbé cuwo mwonuhi a *apwoâpwailo wo pa céiu âcélo, ke e pé a mwocini tabe ûde na mwani megele, ke e hegi ni tabe ûde na te junihe hiwon. Ke e patihi ne pehi ni pwopwoiitihi te ati ni apulie te Padué, ne pwo a apwoâpwailo mwani megele na e ânebuhe a atebwo he daame.

⁴ É mu ha a naatii pali âcélo, ke e taa he pwahamii Padué a muu tabe ûde ne pehi ni pwopwoiitihi te ati ni apulie ten.

⁵ Ke e pé ali mwocini tabe ûde wo pali âcélo, ke e paobaahi ko a miû ko ali apwoâpwailo, ke e tahi ole pwo bwohemwo. Ke pwo ni pwocihe, ke te ilehi kuti, ke e huu wo tikekele, ke penem a bwohemwo.

**7 âcélo ke 7 tutu <y>
(Pwahamii tii: 8.6—11.18)**

⁶ Lé pipwopweelé wo lépwoli 7 âcélo, beme lé cuu li tutu telé.

1 <y> Cini a céiu duaas bwohemwo

⁷ E cuu a tutu ten wo pa bécéiuhen, ke lé te tupwo kuti, ne pwo bwohemwo, ni aceute na te junihe ubwo ke te junihe bwala, ke a miû na pwo cewéle hen. Ke e cini taabwon a céiu duaan mu ko a bwohemwo, ke a céiu duaan mu ko ni acuwo, me ni meté na e mu pwon.

2 <y> Megele a céiu duaas jié

⁸ E cuu a tutu ten wo pa béalohé âcélo, ke e te tupwo kuti ne he jié a miû, na pwohewii a juwole na te junihe ubwo. Ke cewéle a céiu duaan mu ko a jié.

⁹ Ke lé mele a céiu duaan mu ko nina lé mulie ne he jié, ke tanahi a céiu duaan mu ko ni ong.

3 <y> Maga a céiu duaas éémwa

¹⁰ E cuu a tutu ten wo pa bécéhé âcélo. Ke e te tupwo kuti a ceni na te junihe ubwo, ke e pwéélang ngen pwohewii ni ei, ke e tupwo ne pwo a céiu duaan mu ko ni éémwa, me ni acaamatabe.

¹¹ A nii a ceni naa pie ‘Muceni’. Ke a céiu duaan mu ko a tabe, ke mucenihi. Ke te junihe hiwon ni apulie na lé mele kon.

4 <y> Bwiile a céiu duaas téale me a wole

¹² E cuu a tutu ten wo pa bépaahe âcélo. Ke tanahi a céiu duaan mu ko a téale, ke a wole, ke ni ceni. Ke bwiile ni duaan na tanahi: Ke patieden a céiu duaan mu ko a pwéélang he a tan, ke a bwén mwo.

¹³ Ke é niê daamwo, ke é alihia bwaaoléé na e ko téé ko miiden, ke é téneeng he ko toii da pie: «Pwoééhe! Pwoééhe! Pwoééhe ni apulie pwo bwohemwo, heme lé bo cuu ni tutu telé wo lépwo bée âcélo na cié jélé!»

Pii Beetih 9

**A bénim he ni tutu
5 <y> Koléé na pwo dan**

¹ E cuu a tutu ten wo pa bénim he ni *âcélo. Ke é alihia a ceni na e caa tupwo ne pwo bwohemwo mu he miiden. Ke e hegi a kilé, ko a pwon na te tice anebwén kon, é lang he na lé pwocuhinaado nelang ne ni iténaado.

² E tehi ali pwon na tice anebwén kon na ali ceni, ke e taawie a muun, na pwohewii ni muu miû na te junihe ubwo. Ke piing a téale, me a amu, wonaa mu ko a muu ali pwon.

³Ke lé wie mu ha ali muu miû ne ni koléé, ke lé talui a bwohemwo. Lé hegi ni pipwojunuun, na piwien me ni *scorpion* pwo bwohemwo, heme lé wolikenye.

⁴Kehe icehi ana paciitihí kolé me lé nemwo pwotahi ni meté, ke ni naado na cemi, me ni acuwo. Kehe te ju pwo mwomwon delé cehi me lé pwotahi ne ko ni apulie na tice ine Padué pwo bwaadelé.

⁵Te tice mwomwon delé me lé taunulé, kehe me lé te junihe pwo me lé picani he na nim ni wole, pwohewii a bwo cunu ne ni awoli he ni *scorpion*.

⁶É ha a benaamwon naa, ke ni apulie, ke lé o hane a mele, kehe icehi ana time lé o bo uce tooli mwo. Ke o nimelé me lé mele, kehe a mele, ke e caa ecelé.

Ni duéé na lé wie mu ha ali pwon

⁷Ni koléé, ke lé pwohewii ni haricaan na lé piwâamihi ne ko pa. Ke pwo ni boolé, na pwohewii ni kuron na mwani megele. Ke ni pwahamiiilé, ke pwohewii ni pwahamii apulie.

⁸Ke ni apunilé, ke bwali pwohewii ni apuni ni toomwo. Ke ni pecuwolé, ke pwohewii ni pecuwo liô.

⁹Pwohewiin heme lé cuwohe ce epwén toki. Ke a tihi ni puuilé, ke pwohewii a tihi ni otuun na lé céi ne ni haricaan na hiwon jélé, na lé téte ne ko pa.

¹⁰Ke pwo ni tubwolé, na pwohewii ni tubwo *scorpion*, ke don ni utehen. É ko ni tubwolé, ke jan me lé pwotahi ne ko ni apulie he na nim ni wole.

¹¹Pa daame he ni koléé, ke pa âcélo he ali pwon li tice anebwén kon. É he pwo *ébérü, ke a niin pie Abadon, ke é he pwo *grek, ke a niin pie Apolion, a bwopiinen pie ‘pa ataunuhi apulie’.

¹²E caa âdé a bécéiuhe apwohi. Ke é alecehe anaa, ke o alo lupwo apwohi na lu o mwo âmwobé.

A bé6 he tutu 6 <γ> A pa na te junihe ubwo

¹³E cuu a tutu ten pa bé6 he âcélo. Ke é téne a pwocihe na e âbé mu he ni uhi a *apwoâpwailo mwani megele na e mu he pwahamii Padué.

¹⁴A pwocihe, ke e pii te pa bé6 he âcélo, na e cuwo imi a tutu pie: «Go pawie lépwo âcélo na paa jélé, na cielé ne mwonuhi a éémwa ubwo Eufrate.»

¹⁵Ke e pawie lépwoli âcélo li paa jélé, li lé caa piwâamilé ne ko a inetéale, ke a tan, ke a wole, ke a jo na me lé taunuhi a céiu duaan mu ko ni apulie pwo bwohemwo.

¹⁶Lé pii tong a jéhi ni coda na lé tebwo pwo haricaan pie, *200 million*.

¹⁷Te wonaa mwo a bwo alilé tong: Pwo ni epwén toki pwo bwaangelé, na hiwon ni apunen, ke megele pwohewii ni miû, ke pun bwiile pwohewii ni péi na pwomelaan, ke nyen pwohewii a dep na élé. Ke ni puni ni haricaan, ke pwohewii ni puni ni liô. Ke lé puutihi ni miû, ke ni muu miû, ke ni dep na élé.

¹⁸A miû, ke a muu miû, ke a dep na éle, na lé wie mu pwo ni haricaan, ke ni cié apwohi na ubwo. Ke lé taunuhi a céiu duaan mu ko ni apulie pwo bwohemwo.

¹⁹Be a junuu ni haricaan, ke e mu pwolé, ke é ko ni tubwolé. Ni tubwolé, ke pwohewii ni bwien; pwo ni punilé beme lé pwotahi ne ko ni apulie.

Time lé uce bitelé ne ni apulie

²⁰Te junihe ubwo ni apwohi naa, kehe time lé uce taatééhi ni mulihelé ne ni apulie na lé mu. Be lé mwo te cuwo ko pwoeabwé te ni duéé me ni démenaado na time lé uce niê, ke time lé uce téne, ke time lé uce engen. Be nina lé te pwo, woélé, ko ni mwani megele, me ni mwani pwojo, ke ni toki na te junihe mwoiu, ke ni péi, me ni ba-acuwo.

²¹Ke lé mwo te cuwo ko pitaunulé, ke lé pwodooki, ke lé pipule hauli, ke lé bune.

Pii Beetihî 10

Pa âcélo me a cuwo nahi tii

¹É ali pa céiu *âcélo na pwojunuun, na e opé mu he miiden. Ke pwo a nii na e tawiieng, beme a epwénen. Ke e mu pwo punin aduwoho, beme a boon. Ke a pwahamiin, ke pwomelaan pwohewii a téale. Ke te junihe pwo niihe lupwo an, ke pwohewii ni duwele miû.

²Ke e pé ne he in a cuwo nahi tii na tehi. Ke e ca pwo jié ko a an ne pwo juin, ke e ca ha a meiuhi ko a an ne pwo eaamun.

³Ke e cihe da me ubwo pwohewii a liô [heme e okéé]. Ke me e cihe, ke ni tikekele na 7 jélé, ke lé hegi ko ni pwohuu telé.

⁴É alechehe ni 7 pwohuu te tikekele naa, ke nimung me é tii nina lé pii ne li 7 pwohuu te tikekele. Ke é ha a benaamwon naa, ke é téne a pwocihe mu he miiden na e pii tong pie: «Go nemwo tii nina lé pii ne ni 7 pwohuu te tikekele. Kehe go neduwohi!»

⁵Ke wo pali âcélo li é alieng, he e ko cuwo pwo jié, ke é ha a meiuhi, ke e eti da he miiden a in ne pwo juin,

⁶beme e *piapwo ne he nii Padué na e *mulie dieli mwo, ke e pwo a miiden, me a bwohemwo, me a jié, ke ati ni naado na e hen. Ke e pii wo pali âcélo pie: «O caa time uce bwolihi [ace bwo ucéihi nen dewé]!

⁷É ha a benaamwon na e bo tabuhi cuu a tutu wo pali béké he ni âcélo, ke e o bo caa pacuwoshi *a bwo niimihinaado ten wo Padué, na e ha aduwo. E caa pipatemehi anaa te ni eabwé ten, ni péroféta.»

Go wii ke go pii beetihî

⁸Ke e cihe tong mwo a pwocihe mu he miiden na é caa mi téne, ke e pii pie: «Go â pé a [cuwo nahi] tii na tehi, mu ha a i pa âcélo na e ko cuwo pwo a jié, ke é ha a meiuhi.»

⁹ Ke é piâ céii pali âcélo, ke é ileeng me e ne tong ali cuwo nahi tii. Ke e pii tong pie: «Go pé ke go wii. O maga ne tinam, kehe é ne pwom, ke o te junihe neje pwohewii ni duhimepu.»

¹⁰ É pé ali cuwo nahi tii mu ha a i pali âcélo, ke é wii. Ke te junihe neje ne pwong pwohewii ni duhimepu. Kehe me é nemih, ke te junihe maga ne tinang.

¹¹ Ke e pii tong mwo pie: «Go pii beetihi mwo a pwooti te Padué, ne ko ni bele na hiwon, ke ni amu, ke ni pati apulip, ke é ne mwo ko ni daame na hiwon jélé.»

Pii Beetiji 11

Lépwo apajuuju Padué

¹ Pwo pa céiu na e ne tong a bewomeéle na pwohewii a ba-acuwo, beme a béja. Ke e pii tong pie: «Go â jahi a *mwaiitihi te Padué, ke a *apwoâpwailo. Ke go pine mwo nina lé pwoiitihi ne ha a mwaiitihi.

² Ke go nemwo jahi a napwomwo ko a mwaiitihi. Go nemwo jahi, be genye necu ne ko nina time lé uce temehi Padué. Lé o pé pihuô ati ha a pwomwo ubwo iitihi he na 42 ni wole.

³ «Ke é bo ne a pihuô te lupwo apajuujuéo na lu cuwohe ni epwén he doole mele. Ke lu bo cihe ko a nii Padué he na 1260 ni tan.»

⁴ Lupwonaa, ke lupwo *olivier*, ke lupwo mwomiû na lu cuwo he pwahamii Padaame he a bwohemwo ati.

⁵ Mepie nime pace céiu apulie me e pwotahi ne kolu, ke e o wie mu pwolu a miû, ke o éle nang. Éa, wo pace apulie celi nimen me e pwotahi ne kolu, ke o wonaa ace bwo mele ten.

⁶ Ke pwojunuulu me lu pacuwoshi a ute me ole ha a benaamwon na lu ko cihe ko a nii Padué. Pwojunuulu me lu taatééhi a tabe me a cewéle. Jan me lu tanahi a bwohemwo ko ni toto bwomunen ko ni apwohi na ubwo, piohiwon julu heme nimelu.

Ana e o tuie ne kolu

⁷ Ke me lu caa panebwénihi a bwo *pajuujuhi nen delu, ke pa iténaado na e taa mu ha ali pwon li tice anebwén kon, ke e o pwopa ne kolu, ke e o piwéden kojalu, ke e o taunulu.

⁸ Ni éélu, ke e o te mu ha apimu ibu ne ha a pwomwo ubwo, é lang he na lé cemeite Padaame helu ne ko a *kuricé. A nii a pwomwo ubwo naa pie ‘Sodome’ ai ‘Aigupito’.

⁹ Ke ni apulie mu ati he ni bele, ke é mu he ni pwomwoi, ke é mu ati he ni pati apulie, ke é mu ati he ni amu, ke lé bo âbé alahi ni éélu he na cié ni tan, ke pwo a behin. Ke time lé o uce pwo me lé neduwolu.

¹⁰Ke ni apulie pwo bwohemwo, ke lé o te nihe pipwodéén ko a bwo mele te lupwo péproféta naa. Lé o te junihe pituumé, ke lé o muko pine telé ni âpati, be lupwo apulie naa, ke lu te junihe pwo me lé picani.

¹¹Kehe é alecehe ni tan na cié, ke pwo a behin, ke e te pamulipilu mwo wo Padué. Ke lu te cuwoda kuti. Ke te junihe mwoti nina lé alilu.

¹²Ke lu téne a pwocihe na e âbé mu he miiden wo lupwoli péproféta, na e pii telu pie: «Geu taabé éni!» Ke lu taa he miiden, ne he ni nii, ne he pwahamii nina lé téétilu.

¹³Ke é ha a benaamwon naa, ke te pwo kuti a penem bwohemwo na te junihe pwo niihen. Ke niihi a céiu duaan mu ko ni duaan na 10 mu ko a pwomwo ubwo, ke 7000 ni apulie na lé mele. Ke te junihe mwoti nina lé mwo te mulie, ke lé pipaunu Padué na e he miiden.

¹⁴E caa âdé a béalohe apwohi. Kehe a bécéhen, ke e o te ju téele tuie.

A bénebwéne tutu 7 <γ> Mwametau te Padué

¹⁵E cuu a tutu ten wo pa bé7 he ni *âcélo. Ke geme téne ni pwocihe na te junihe pwo niihen ne he miiden, na lé pii pie: «A mwametau pwo bwohemwo, ke caa ne mwo te Padué Padaame henye *me* pa *Mesia ten. Ke e o Daame dieli mwo.»

¹⁶Ke lé tai miibule, me tidihi jililé wo lépwoli 24 ukéiu, li lé tebwo pwo li atebwo telé ne he pwahamii Padué. Ke lé pipaunueng,

¹⁷ke lé pii pie: «Padaame Padué na pwojunuum ne ko ati ni naado, wogo ânebun, ke wogo jenaa. Geme pipwo-olé tem. Go pihuô ha a junuum na ubwo, ke é jenaa, ke go daame.

¹⁸Lé okéé ne ni bele. Kehe caa a benaamwon na go habwii a okéé tem beme go tauti ni amele. Caa a benaamwon na go pwoceme ni eabwé tem, ni péproféta, me ni apulie tem, nina lé paciitiko, nina piticenaado ne kolé, *me* nina pwonaado ne kolé. Caa a benaamwon na go tanahi nina lé pwotahi a bwohemwo.»

7 ni inenaado <δ> (*Pwahamii tii: 11.19—15.4*)

¹⁹Ke tehi a mwaiitihi te Padué he miiden, ke é alihi a mwopiapwo ne ha a mwaiitihi ten. Ke pwo ni ilehi, ke a tihinaado na ubwo, ke e huu na a tikekele, ke penem a bwohemwo, ke e ole a ute na te junihe ubwo, ke te junihe bwala.

Pii Beetahi 12

1 <δ> È toomwo me a dragon

¹Pwo a inenaado na te nihe ubwo, na e tuie ne he miiden: è toomwo na tawiieng ko a téale. Ke a wole, ke e haahi ni an. Ke e pwobo ha a kuron na pwo ko ni ceni na 12.

²E o te ju téele piâbeeble ewa, ke e é ko ni picani ko piâbeeble ewa.

³ Pwo a céiu inenaado na e tuie ne mwo he miiden: a dragon na te junihe ubwo nang, ke megele nang pwohewii a miû. Ke 7 ni punin, ke 10 ni gi ten, ke é pwo ni pétaapwo punin, ke e mu pwon ni kuron.

⁴ Ke é ko a tubwon, ke e baléhi a céiu duaa ceni mu he miiden, ke e tahi ole pwo bwohemwo. Ke e cuwo ânebuhe ê toomwo na me e piâbeeble ewa, beme e wii a naîn, hemepie e âbeeble.

⁵ Ke e picile pa cuwo nahi aiu wo êgi toomwo. Ke e bo pihuôhi ati ni bele wo panaa, ko a bwaja toki ten. Ke me e pituie, ke te celuimieng kuti koja ali dragon, ne pele Padué, ne pwo a atebwo he daame ten.

⁶ Ke e cela nge ha a melé wo êgi toomwo. É lang he na e piwâamihi a amu ten nelang wo Padué, beme cileeng nelang, he na 1260 ni tan.

E pwopa ne kon wo Michel

⁷ Ke é mulang, ke pwo a pa ne he miiden. Wo Michel me ni *âcélo ten, ke lé pwopa ne ko ali dragon me ni duéé ten.

⁸ Ke time uce pwo niihe ali dragon, be te tice mwomwon delé me lé mu he miiden.

⁹ Ke ali dragon ubwo, ke tahieng ole pwomwo. Be pali bwien he li bécéiuhe tan, a niin pie ‘pa apipé ne konye’, ai wo *Caatana, ‘pa acubwonikenye’. Ke e pipwohuô te a bwohemwo ati. Ke tahieng ole pwo bwohemwo, woélé me ni âcélo ten.

¹⁰ Ke é téne a pwocihe na ubwo na e âbé mu he miiden, na e pii pie: «É jenaa, ke a benaamwon na e *celuimi wo Padué. É jenaa, ke e daame ko a junuun. E habwii a mwomwon den wo pa *Mesia. Be e caa tahi ole Caatana, pana e pipé ne ko ni bénye, he ni tan ke ni bwén.

¹¹ Kehe lé piwéden kojaeng, ko a cewéhe pa *Nahi Muto; ko a pwooti na lé *pajuujuhi. Be time uce piwâ jélé, *me* lé patupwo ni mulihelé, ke me lé mele me den.

¹² Geé pipwodéén, wogewé a miiden, ke wogewé na geé mu hen! Apwohi a bwohemwo me a jié! Be e oté céiikewé wo Caatana. Kehe e te junihe okéé, be e caa te temehi pie, caa tice benaamwon den.»

E tai êgi toomwo na ali dragon

¹³ Ke me e alahi na ali dragon pie, caa tahieng ole pwo bwohemwo, ke e tai êgi toomwo li e picile pali cuwo nahi aiu.

¹⁴ Ke wo êgi toomwo, ke e hegi lupwo puui a bwaanoléé na te junihe ubwo nang. Ke e téé kojaeng nge ha a melé, ha a duaan na caa piwâamihi me den, ne ité koja a bwien. Ke e bo hegi ni wiinaado nelang he na cié ni jo, ke pwo a behin.

¹⁵ Ke wo pali bwien, ke e puutihi a tabe na pwohewii a tabe he éémwa céi êgi toomwo, beme cetieng.

¹⁶Kehe icehi ana e picani te êgi toomwo na a pule, ke e tehi a pwon, ke e nemih ali tabe.

¹⁷Ke e te junihe okéé kuti na ali dragon, ne ko êgi toomwo, ke e â pwopa ne ko ni nehi naîn. Ninaa, ke nina lé piténédehi ni pihuô te Padué, ke lé pajuuju lésu.

¹⁸Ke e te cuwo ticepwon ali dragon.

Pii Beetahi 13

2 <δ> Pa iténaado mu he jié

¹Ke é ali pa iténaado na e taawie mu he jié. Ke a wota na 10 ni gi ten, ke 7 ni punin. É pwo ni pétaapwo gi ten, ke e mu pwon ni kuron. Ke é pwo ni pétaapwo punin, ke e mu pwon a nii na e pihooni Padué.

²A één, ke pwohewii a *léopard*. Ni an, ke pwohewii ni a *ours*, ke a pwon, ke pwohewii a pwo liô. Ke e ne ten a niihen na ali dragon, ke a atebwo he daame ten, ke a pihuô ten na junihe ubwo.

³Ke pwo ahinaado ko a céiu puni pali iténaado, ke te junihe ubwo, ke pwohewiin heme e caa mele. Kehe icehi ana caa te mali mwo, ke caa wâé. Ke lé picedieng ati ne ni apulie pwo bwohemwo, ke lé âcéin.

⁴Ke lé pipaunueng, ke lé pii pie: «Woo celi pwo niihen pwohewii pa iténaado? Woo celi jan me e pwobwonieng? Te tice!» Ke lé pipaunu mwo ali dragon, be weeng na e ne ten a junuun.

E pii me ta Padué

⁵E caa te hegi wo pa iténaado, me e pii ni pwootí na ta ne ko Padué, ke ne ten a pihuô he na 42 ni wole.

⁶Ke e te junihe pii me ta Padué me a niin, me a atebwo ten ne he miiden, me ati nina lé mu lang.

⁷Ke e caa te hegi a junuun me e pwopa, ke me e piwéden koja ni apulie te Padué. Ke e caa te hegi mwo ni pihuô, ne ko ati ni apulie pwo bwohemwo: ati ni pwomwoiu, me ni pati apulie, me ni amu, me ni bele.

⁸Ke lé tai pipwoun den ati ne ni apulie pwo bwohemwo na time uce tii ni niilé ne ha a Tii te pa *Nahi Muto, ha atabuhi ko a bwohemwo. Wo pa Nahi Muto, ke weeng kuti pana e caa mele, beme e *âpwailo.

⁹[Woéo loane na é tii a tii ce, ke é pii pie]: Wo paceli pwo ce pwojéénen me e téne, ke wâé heme e téne!

¹⁰[Be o pwotahi ne ko ni apulie te Padué.] Lé o pwokarépu ne ce béén, ke o taunu ce béén. Kehe wâé heme lé imwi mangihi a céhi telé, ke me lé cumang [ne he celi e o tuie ne kolé].

3 <δ> Pa iténaado mu he pule

¹¹É alechen, ke é ali pa céiu iténaado, na e taa tuie mu he pule. Ke a wota na alo ni gi ten, pwohewii ni gi te ni nahi muto, kehe icehi ana a patin he e cihe, ke pwohewii a dragon. [Ke a niin mwo pie pa pérféta agele.]

¹²Ke e penem me de pa iténaado: ali wota ânebun, li caa mali mwo ali ahinaado kon. Be e hegi koja pali iténaado ati a pihuô ten, me a junuun. Ke e cuwoko ati ni apulie pwo bwohemwo, beme lé pimiibule, ke pipwoun de pali iténaado li caa mali mwo ali ahinaado kon.

¹³⁻¹⁴Ke e pwo ni inenaado na te junihe ubwo, ko ni pipwojunuun, ne he pwahamii pali iténaado. Be e neole a miû mu he miiden, ke lé tai téetih ne ni apulie pwo bwohemwo. Ke ne ten me e pahaulilé, ke e huôhi ne telé me lé pwo ace déme pali iténaado li caa mali mwo ali ahinaado kon.

E pamuliphi a déme iténaado

¹⁵Wo pa báalohe wota naa, ke wo pali pérféta agele, ke e hegi a pihuô me e pamuliphi ali déme iténaado. Ke e ne te ali démen me e cihe, ke me e taunu ati ni apulie na time lé uce pipaunueng.

¹⁶Ke e cuwoko ni apulie ati, me lé hegi a inen ne ko ni ilé ne pwo jui, ai é ne mwo pwo ni bwaadelé. E wonaa te ati ni apulie na piubwo jélé me nina piwahin jélé, ke ni bén na pwo naamuulé, ke nina tice delé, ke ni *apenem tice ja kon, ke ni apulie na time uce ni apenem tice ja kon.

¹⁷Ke te tice apulie celi jan me e pi-icu heme te tice inen. A inen naa, ke a nii pali iténaado, me a *numéro* na a ocine ko a niin.

¹⁸[Woéo loane na é tii a tii ce, ke é pii tewé pie]: Wo pace apulie celi e pitemang, ke wâé heme e temehi ehi a *numéro* te pali iténaado. Be a *numéro* ten, ke a nii pa céiu apulie: Ke 666.

Pii Beetih 14

4 <δ> Pipaunu pa Nahi Muto

¹[É alechen, ke é alihí mwo ni bée naado na o bo tuie]: É ali pali *Nahi Muto, he e ko cuwo pwo a juwole *Sion. Ke lé ko mu pelen ne ni apulie na 144000 jélé. Woélé ati, ke caa tai tii ne pwo bwaadelé a niin, ke a nii Caa ten.

²Ke é téne a pwocihe, na e âbé mu he miiden, na pwohewii ni tihi gitar celi te junihe hiwon. Te junihe ubwo a tihin, pwohewii a éé tabe pwobwaatéép na te junihe ubwo, ke a huu he a tikekele.

³Ni apulie naa, ke lé pwonyebi ânebuhe a atebwo iitihi, ke é he pwahamii ni âcélo na paa jélé, na pwohewii ni wota, me ni ukéiu na 24 jélé. Ke mwo coho a nyebi telé, ke te tice pace céiu apulie celi e temehi, kehe te icehi ni 144000 na caa celuimilé mu pwo bwohemwo.

⁴Woélé, ke ni apulie na time lé uce pwo me alili ni mulihelé, ne ko ni toomwo pwopwaaden. Lé te pipaciitilé, ke lé âcéi pa Nahi Muto ati ne he na e â lang.

Be e caa pwocuhilé mu hadenii ni apulie, beme lé bécéiuhe âpipati ne te Padué, me pa Nahi Muto.

⁵Time lé mu uce gele. Ke te tice ta pwo telé.

5 <δ> A pwooti te ni âcélo

⁶Ke é ali mwo pa céiu *âcélo na e ko téé ko miiden, beme e â pipatemehi te ni apulie pwo bwohemwo a *Pwooti Wâé na e dieli mwo, ne ha ati ni amu, ke ati ni pwomwoiu, me ati ni pati apulie, me ati ni bele.

⁷Ke e toii da pie: «Geé paciiti Padué, me pipaunueng ne ha *a wâé ten! Be e caa tuie a benaamwon, na me e tauti ni apulie pwo bwohemwo hen. Pipwoun de pana e tabuhi a miiden me a bwohemwo, me a jié, me ni acaamatabe!»

⁸Ke e âbé alechen wo pa béalohe âcélo, ke e toii da me ubwo pie: «E caa tupwo, e caa tupwo ali pilehe Babulona! E pwo me lé ûdu a tabe megele ten ne ni amu ati. Ke lé pipule hauli pwohewieng.»

⁹Ke e âbé alechen wo pa bécéhé âcélo, ke e pii ha a patin na ubwo pie: «Mepie pwo pace apulie celi e pipaunu pa iténaado me a démen, ke me e hegi a inen ne pwo bwaaden, ai é ne pwo a in,

¹⁰ke e o te ûdu mwo weeng, a tabe megele ko a okéé te Padué, na time uce tahagéi, na céihi ne ha a bêûdu ko a okéé ten. Ni apulie naa, ke lé o te junihe picani ne ha a miû, me a dep na élé, ne he pwahamii ni âcélo iitihi, me pa Nahi Muto.

¹¹ «Tee taa dieli mwo a muu a miû na e pwo me lé te nihe picani. Nina lé pipaunu pali iténaado me a démen, ke lé hegi a ine a niin, ke time lé uce mwaale, heme pwang ke bwén.»

¹² Nina élé ko Padué, ke me lé ténedehi ni patén den, ke me lé cumang ne he ni céihi telé ne ko lésu [he ni picani].

¹³Ke é téne a pwocihe na e âbé mu he miiden, na e pii pie: «Go tii pie: “*Adéi nina lé mele, tabuhi jenaa, mu ko a bwo céihi telé ne ko Padaame!”» E pii na a *Jenen litihí pie: «Éa, be lé o mwaale koja ni téé me ni picani telé. Ke lé o hegi ni cemelé mu ko ni penem delé.»

6 <δ> Pitii âdaanu

¹⁴ É niê ngemwo, ke é ali pa *Nahi Apulie, he e ko tebwo ha a nii na pwojo. Ke e pwobo ha a kuron na mwani megele, ke e pé a bêpwopwi na te junihe ânyee.

¹⁵Ke é ali mwo pa céiu âcélo na e wie mu ha a *mwaiithi [jeda he miiden]. Ke e toii da céii pali e tebwo ha ali nii pie: «Go penem ko a bêpwopwi tem! Be caa tuie a benaamwon ko pitii âdaanu, be caa pun ni âdaanu!»

¹⁶Ke e tahi ole pwo bwohemwo ali bêpwopwi ten wo pali e tebwo ha ali nii, ke e pitii âdaanu ati pwo a bwohemwo.

¹⁷Ke é alechen, ke e wie mu ha a mwaiitihi he miiden wo pa céiu âcélo. Weeng mwo, ke e te pé mwo a bépwopwi na te junihe ânyee.

¹⁸Ke pwo pa céiu âcélo na e âbé mu ko *apwoâpwailo, na jan ne kon me e pihuôhi a miû. Ke e toii da céii pali e pé ali bépwopwi li te junihe ânyee pie: «Go penem ko a bépwopwi tem, na te junihe ânyee, ke go tahagéi ni jele ace tabe megele pwo bwohemwo! Be caa megele.»

¹⁹Ke e tahi ole pwo bwohemwo ali bépwopwi ten wo pali âcélo. Ke e tahagéi li jele ace tabe megele pwo bwohemwo. Ke e tahi nge ha a mwopwoti tabe megele ko a okéé te Padué.

²⁰Ke lé hegeti li ace tabe megele, ne ha a mwopwoti nen ne pwomwo koja a pwomwo ubwo. Ke e téé a cewéle, ke e pwice nge he na *300 kilomètre*, ke e taa die ko a paapwo haricaan.

Pii Beetih 15

7 <δ> Pwopweehi ni 7 apwohi

¹É alihí ne he miiden a céiu inenaado na te junihe ubwo, ke é téetihí: 7 ni *âcélo na lé pé ni 7 apwohi. Weengaa kuti ni bénebwéne picani, be a okéé te Padué, ke e o caa cuwo ne kolé.

²Ke é alihí a céiu jié na pwohewii ni kéle, na pwo miû hen. Ke é alihí nina lé piwéden koja pali iténaado me a démen, ke a *numéro* na e habwii mwo a niin, he lé ko cuwo pwo a jié na piniédiihi, ke lé pé ni gitar te Padué.

³Lé pwo a nyebi te *Moosé, pa eabwé te Padué, ke a nyebi te pa *Nahi Muto: «Te junihe ubwo ni penem dem, ke ubwo a wâé tem, go Padué! Te junihe pwo niihem ne ko ati ni naado. A pwodaame tem ati ne ko ni bele! Mwomwon ni pwaadeniim!

⁴Te wogo cehi na go iitihi. Te wogo cehi Padué. Woo pace apulie celi time uce mwotient kom? Woo pace apulie celi time e o uce pipaunuko? O te tice paceli te ju céiu nang! Lé o tai âbé ne ni bele, ke lé o pimiibule ne he pwahamiim. Be lé caa tai alihí ni penem dem na wâé!»

7 mwotabe ko a apwohi <ε> (Pwahamii tii: 15.5—16.21)

⁵É alechen, ke é omehi, ke é alihí a *mwaiitihi na pwo ko mwaanu, he tehi ne he miiden.

⁶Ke lé wie ne ni âcélo na 7 jélé, na lé pé ni 7 apwohi na te junihe ubwo. Ke lé cuwohe ni epwén na pwojo pwomelaan. Ke lé cie ni bwaangelé ko ni taihena na mwani megele.

⁷Ke pwo pa céiu béé l épwo âcélo na paa jélé na lé pwohewii ni wota, na e muko ne te l épwo 7 âcélo naa, ni mwotabe mwani megele, na oba ko a okéé te Padué, pana e *mulie dieli mwo.

⁸ Ke te oba kuti ali mwaiitihi ko muu miû, mu ko a bwo ubwo na a wâé te Padué, me a junuun. Ke te tice pace céiu apulie celi jan ne kon me e taa ha ali mwaiitihi, heme mwo time uce pacuwohi ni apwohi na 7 te ni 7 âcélo.

Pii Beetahi 16

¹ É alechen, ke é téne a pwocihe na ubwo, na e âbé mu ha ali *mwaiitihi, na e pii te lépwoli 7 *âcélo pie: «Geé â céihi ole pwo bwohemwo ni 7 mwotabe ko a okéé te Padué.»

1 <ε> Ni tongo

² E ân wo pa bécéiuhe âcélo, ke e céihi ole pwo bwohemwo a mwotabe ten. Ke e te tuie kuti ni tongo na te junihe ta ke mwiihi, ne ko nina e kolé a ine pa iténaado, me pipaunuhi a démen.

2 <ε> A jié na megele

³ Ke e âbé wo pa báalohe âcélo, ke e céihi a mwotabe ten ne he jié. Ke te bitehi kuti a jié, ke megele tooli, pwohewii a cewéhe pa apulie na e caa mele. Ke lé te tai mele ati ni naado na lé mu he jié.

3 <ε> A éémwa na megele

⁴ Ke e âbé wo pa bécéhé âcélo, ke e céihi a mwotabe ten, ne he ni éémwa, me ni acaamatabe; ke te cewéle kuti.

⁵ Ke é téne pa céiu âcélo, na e pihuôhi ati ni tabe, he e pii te Padué pie: «Te wogo cehi pana go mwomwon! Be wogo jenaa, ke wogo ânebun! Wogo pana go iitihi. Mwomwon ke juuju a bwo tautilé tem.

⁶ [Be lé pwo ana ta]: Lé pwo me tée a cewéhe a bele tem *me* ni péroféta tem. Ke go te paûdulé mwo ko a cewéle, beme a cuhinaado telé!»

⁷ Ke é téne mwo a pwocihe na e âbé mu pwo ali *apwoâpwailo, na e pii pie: «Éa, go Padaame, Padué na pwojunuun ne ko ati ni naado: Be juuju, ke mwomwon ati ni tautinaado tem!»

4 <ε> A élé

⁸ Ke e âbé wo pa bápaahé âcélo, ke e céihi a mwotabe ten ne pwo a téale. A téale, ke e hegi a junuun me e élé ni apulie ko a miû kon.

⁹ Ke te junihe élé kuti ni apulie ko a élé na te junihe pwo niihen. Ke lé pii me ta a nii Padué na pwojunuun, na e ne ni apwohi naa. Kehe time lé uce pitaatééhi ni mulihelé, ke time uce nimelé me lé temehi a bwo ubwo Padué.

5 <ε> A bwén

¹⁰ Ke e âbé wo pa bénim he ni âcélo, ke e céihi a mwotabe ten, ne pwo a atebwo te pa iténaado. Ke a bwén, ke e tawii a mwametau te pali iténaado. Ke lé piwii ni upehelé ne ni apulie, ko ni bwo picani telé.

¹¹Ke lé pii me ta Padué he miiden, watihen ni bwo picani telé, me ni ahinaado kolé, kehe time lé uce pininim me lé cuwo koja ni ta pwo telé.

6 <ε> Meiu a éémwa Eufrate

¹²Ke e âbé wo pa bé6 he ni âcélo, ke e céihi a mwotabe ten ne ha a éémwa ubwo Eufrate, ke te ju meiu kuti ali éémwa. Beme o bo a pwaadeni l épwo daame na lé bo âbé mu ha a duaan na e taa tuie hen a téale.

¹³Ke é alechen, ke é alihni duéé na cié jélé, pwohewii ni gérénuen. Ke lé wie mu pwo a dragon, ke é mu pwo pa iténaado, ke é mu pwo pa péroféta agele.

¹⁴Be e nelé bé wo *Caatana, beme lé pwo ni *inenaado na pwojunuun. Lé â too ni daame ati pwo bwohemwo, be nimelé me lé neibulé, ne ko a pa he a tan ubwo te Padué na te junihe pwojunuun.

¹⁵E pii wo Padaame pie: «É bo mwojuia mwobé [ke é o patéetikewé] pwohewii pa abune [he bwén]. Ke *adéi pana time e uce pule, ke e te cile ni epwénen ne cebwon, beme time e o uce engen heme te tice naamuun, ke me time o uce tanim nang, heme lé alieng ne ni apulie.»

¹⁶Wo l épwoli duéé, ke lé taineibu ni daame pwo bwohemwo, ne ha a duaan na pii kon he pwo *ébérue pie Armaguédon.

7 <ε> Penem a bwohemwo

¹⁷Ke e âbé wo pa bé7 he ni âcélo, ke e céihi a mwotabe ten nge ko miiden. Ke é téne a pwocihe na ubwo na e âbé mu pwo a atebwo te Padué, ne ha a mwaiithi, na e toii da pie: «Caa tai cuwo ati!»

¹⁸Ke ilehi, ke pwo ni pwocihe, ke e huu wo tikekele, ke pwo a penem bwohemwo, na te junihe pwo niihen. Tabuhi he pwo ni apulie pwo bwohemwo, ke time genye uce téele alihni ace penem bwohemwo celi wonaa.

¹⁹Ke tanahi ni pwomwo ubwo ne pwo bwohemwo. Ke pipii me cié mu ko a pwomwo na junihe ubwo. Ke time e uce neuhi *Babulona wo Padué, ke e pwo me e ûdu ha a mwotabe na oba ko tabe megele ko a okéé ten na ubwo.

²⁰Ke tieden ati ni één, ke caa time nye uce alihni juhole.

²¹Ke lé te tupwo kuti mu he miiden ni aceute na pwo 40 kilo, na bwala. Ke lé tanahi ni apulie. Ke lé pii me ta Padué, watihen a apwohi na ubwo ko a ute na bwala. Be te junihe ubwo a apwohi naa.

Pii Beetih 17

Ê toomwo pwopwaaden Babulona

¹É alechen, ke e âbé céiéwo pa céiu bée l épwoli 7 *âcélo, li lé céihi li 7 mwotabe. Ke e pii tong pie: «Go âbé, me é habwii tem a cuhinaado [na e bo ne wo Padué] te ali pwomwo ubwo li e mu ko jije ni tabe na hiwon, na pii kon pie ‘Ê toomwo pwopwaaden, na te junihe ta nang’.

²[Be te junihe mwiihi ni penem den.] Be lé pipule me ati ni daame pwo bwohemwo. Ni huô ten, ke pwohewii a tabe megele, na e ne te ni apulie pwo bwohemwo, beme lé tai piolo, ke me lé pipule hauli me weeng.»

³ Ke e âbé kong a *Jenen litih, ke e péeo nge ha a melé wo pali âcélo. Ke é ali ê toomwo na e tebwo pwo a wota na megele, [pali iténaado]. Ke 7 ni puni a wota naa, ke 10 ni gi ten, ke tawiieng he ni niinaado na pii me ta Padué kon.

⁴ Wo êgi toomwo, ke e cuwohe a epwén na pun ke megele [pwohewii ni epwéne lèpwo daame, me ni apulie na piubwo jélé]. Ke te ju oba nang ko mwani megele, ke perle, ke ni péi na ubwo ni cuhin, na pwomelaan. Ke e pé a mwotabe mwani megele, na oba ko ni naado na mwiihi. Be ni naado na ta ko ni bwomu ten na te junihe ta.

⁵ Ke tii ne pwo bwaaden a nii na neduwoshi, na pii pie: BABULONA NA TE JUNIHE UBWO: nYAA TE NI TOOMWO PWOPWAADEN, mE ATI NI HUÔ NA MWIIHI NE PWO BWOHEMWO.

⁶ Ke é alihie pie e piolo, be e caa junihe ûdu a cewéhe ni apulie te Padué na taunulé mu ko a céhi telé ne ko lésu.

Pii te loane a bwopiinen

É omeeng, be é te junihe téetieng.

⁷ Ke e pii tong wo pali âcélo pie: «É ko ade na go téetieng? É bo pii tem a bwopiinen na neduwoshi ne ko ê toomwo naa, me a wota na e ko pééeng: [pali iténaado] li 7 li punin, ke 10 ni gi ten.

⁸ «A wota na go alihie, ke e mwo te mulie bwolihi, kehe é jenaa, ke caa tieeng. Ke e bo taamwobé, mu ha a pwon na te tice anebwén kon, beme e â pipatiedenieng. Ke lé o téetieng ne ni apulie pwo bwohemwo: nina time uce tii ni niilé ne ha a tii ko a mulip, ânebuhe a bwo tabuhi na a bwohemwo.

⁹ «Wo pana e tauti ehi ni naado, ke wâé heme e temehi ni, pie: Ni 7 punin naa, ke ni cuwo nahi juwole na 7, na e mu pwon ê toomwo naa. Ke te ni daame na 7 jélé.

¹⁰ Be lé caa tupwo ne nina nim mu kolé, ke e mwo te mu wo pa céiu. Ke mwo te tie pa céiu. Ke hemepie e bo tuie, ke time o uce bwolihi ace bwo mu ten. [Be e caa te pacuwoshi anaa wo Padué.]

¹¹ «Wo pali iténaado li e mulie ânebun, ke caa tieeng, ke weeng kuti pa bê8 he ni daame. Be te pa céiu bêé lèpwoli 7 daame ânebun. Ke e bo mwojuia mwo, beme e bê8 mwo he ni daame, ânebuhe a bwo pipatiedenieng.

¹² «Mepwo ni gi ten, na go alihie, ke ni 10 daame, na mwo te tice mwametau telé. Ke o te ju ne telé cehi a cuwo benaamwon na time uce bwali, me lé pihuô hen, me pa iténaado.

¹³ «Te céiu a bwo niimihinaado telé, me lé ne te pali iténaado ni junuulé, me a mwomwon me lé pihuô.

¹⁴Be lé bo pwopa ne ko pa *Nahi Muto. Kehe icehi ana e o te piwéden kojalé. Be te weeng kuti pa Apihuô te ni apihuô, ke e Daame he ni daame. Ke lé o tai piwéden me weeng ne nina e todelé wo Padué, ke pipégalilé, na lé cumang ne he ni céhi telé.»

Lé tééti êgi toomwo wo l épwo daame

¹⁵E pii tong mwo wo pali âcélo pie: «Go alihí ni tabe na hiwon, he na e mu lang wo êgi toomwo pwopwaaden, ke ni puapulie, me ni pati apulie, me ni amu, me ni bele.

¹⁶«Ni 10 gi ten na go alihí, ke pa iténaado, ke lé bo tééti êgi toomwo pwopwaaden. Lé bo pé kojaeng ati nina eten, ke lé bo pwo me tice naamuun. Lé bo wii a één, ke lé bo tahi da pwo miû ni nehin.

¹⁷«Lé wonaa, beme lé pacuwohi a bwo niimihinaado te Padué. Be weeng kuti na e ne a bwo niimihi nen naa, he ni pwonimelé, beme lé tai piténelé, me lé ne te pa iténaado ni pwodaame telé. Ke o wonaa dieli ha ace bwo pacuwohi ati na ali e caa mi pii wo Padué.

¹⁸«Mepwo é ne ko ê toomwo naa, na go alieng, ke a pwomwo na junihe ubwo na e pihuôhi ati ni daame pwo bwohemwo.»

Pii Beetihí 18

7 pwooti ko babulona <ζ> (Pwahamii tii: 18)

¹É alecehe ninaa, ke é ali mwo pa céiu *âcélo na e opé mu he miiden, ke ne ten a junuun na ubwo. Ke pwéélang pitihí a bwohemwo *a wâé ten.

E tautieng wo Padué 1 <ζ> O tupwo Babulona

²Ke e toii da pie: «E caa tupwo, e caa tupwo ali pilehe *Babulona. É jenaa, ke lé caa mu lang ne ni iténaado. Caa a ataduwo te ni jenen na ta, ke ni toto meni na *mwiihi.

³Be e pwo me lé ûdu a tabe megele ten na ati ni bele ke ni daame pwo bwohemwo. Ke lé pipule hauli me weeng. Ke pwo naamuun ni a-icu pwo bwohemwo mu ko ni huô ten na ta.»

2 <ζ> Te junihe ubwo a cuhinaado ten

⁴Ke é téne a céiu pwocihe bé mu he miiden, na e pii pie: «Go wie koja Babulona, wogo a bele tong, beme time go bo uce mu he ni huô ten na ta, ke me time go uce picani ne he ni apwohi na ubwo na é bo ne ten.

⁵Éa, ni ta pwo ten, ke pitahipwon die he miiden. Ke wo Padué, ke time e uce pineuhi ni ta pwo ten.

⁶Wâé heme pwocuhinaado tem âcehi ati nina e pwo. Ne ten aceli junihe ubwo koja ana e pwo. Paobaanihi a mwoûdu ten. Be e ne a tabe megele ten

[beme e pwotahi ne ko ni bele]. Paobaanihi beme e te ûdu mwo [ke me te nihe cunu nang kon].

⁷ Te nihe eânimén ko a wâé ten, *me* ni naamuunaado. Ne mwo ten ni picani, *me* ni doole tahagéi. Be e pipii den pie: “É tebwo pwo a atebwo he toomwo daame, ke time é o uce depwele, ke time o uce piwahin jo.”

⁸ É mu ko anaa, ke weengi ni apwohi me den: O tupwo ne huîn a mele, ke a piwahin, ke a menele, ha a tan na te céiu, ke o élé nang ko a miû. Éa, pwojunuu Padaame Padué na e tautieng.»

Lé é niimieng ne ni apulie 3 <ζ> Lépwo daame

⁹ Lépwo daame pwo bwohemwo, na lé pipule hauli me weeng, ke lé téele ne kon, mu ko ni naamuun na te junihe ubwo. Ke heme lé bo alihi a muu a miû na élé nang kon, ke lé bo é, ke pihemun ne ko a pwomwo ubwo naa.

¹⁰ Ke lé bo cuwo ité kojaeng, be bwo mwotilé ko ni picani na e mu hen. Ke lé bo pii pie: «Mwoli Babulona! Mwolihi a pwomwo ubwo! Tanahi me tieeng, ha a inetéale na te ju céiu!»

4 <ζ> Lépwo api-icu

¹¹ Lé é niimieng, me pihemun wo lépwo api-icu éni pwo bwohemwo, be caa tice apulie celi me lé pwocuhi ni âicu telé.

¹² [Be weeng na e mu pwocuhi ati ni naado] na te junihe ubwo ni cuhin, na lé mu icuhi: Ni mwani megele, me ni mwani pwojo; Ni péi na te junihe ubwo ni cuhin; Ni toto mwaanu na te junihe wâé; Ni ba-acuwo na ûde wâé; Ni naado na pwo ko ni béokéé te ni éléphant; Ni naado na pwo ko ba-acuwo; Ni toki na mwoiu; Ni péi na pwojo na te junihe wâé;

¹³ Ni toto tabe ûde, me ni eti na ûde wâé; Ni wie acuwo na ûde wâé heme nye cini; Ni tabe megele, me gérémon, me farine, me blé; Ni paaci, me muto, me haricaan, me otuun; Ni *apenem tice ja kon.

5 <ζ> Lépwo pwo mwani telé

¹⁴ Lé pii te a pwomwo ubwo wo lépwo a-icu pie: «Ati ni âicu na nimem kon, ke caa tieden mu pelem. Ati ni naamuunaado na wâé, ke caa tice dem kon. Ati ninaa, ke time go bo uce tooli mwo!»

¹⁵ Lépwo a-icu na pwo delé, ko a bwo icu ha a pwomwo ubwo naa, ke lé o cuwo ité kojaeng, ko ni bwo mwotilé ko ce picani celi e o mu hen, ke lé bo é me pihemun.

¹⁶ Ke lé bo pii pie: «Mwoli Babulona! Weeng na e cuwohe ali mwaanu megele pun, ke te junihe wâé, ke ubwo a cuhin. Ke oba nang ko mwani megele, ke ni péi na pwomelaan.

¹⁷ É he na te ju céiu inetéale, ke te jan me tai tanahi ati ni naamuunaado naa!»

6 <ζ> Lépwo a-engen pwo ong

Ati ni apihuô pwo ong, ke nina lé engen pwo ong, ke ni apenem, me lépwo awoli ikua, ke lé caa mu ité kojaeng.

¹⁸ É he lé alahi a muu a miû na éle nang kon, ke lé toii da pie: «Mwo te tice ace pwomwo ubwo celi pwohewii a pwomwo ubwo ce!»

¹⁹ Ke lé o é me pihemun, ke lé tahi muu pule ne he ni punilé [ko ni bwo téé jélé]. Ke lé o wiikau ko pii pie: «Mwoli Babulona! Mwolihi a pwomwo ubwo naa, be te junihe pwo naamuu ati nina pwo ni ongelé he jié. Ke é he na te ju céiu inetéale, ke tanahi ati ninaa!»

²⁰ Miiden, go pipwodéén! Caa tanahi a pwomwo ubwo! Geé pipwodéén mwo, wogewé ni apulie te Padué, ni *apostolo, ke ni péroféta! Éa, be e caa tautieng wo Padué ko ni ta na e pwo tewé.

Bénebwéne pwootि kon 7 <ζ> O time bo uce alieng mwo

²¹ Ke é ali pa âcélo na te junihe pwojunuun, na e pé a péi na te junihe ubwo, ke e tahi ne he jié, ke e pii pie: «O wonaa ace bwo pabetii Babulona, a pwomwo na te junihe ubwo, ke o tahi taabwonieng. Ke time genye bo uce alieng mwo.

²² Ke time genye bo uce téne mwo, ce pati gitar, me ce pwocuu oopwé, me ce pwocuu tutu. O te tice pace apenem ko ba-acuwo me toki celi te ju céiu nang. Ke time genye bo uce téne mwo ce tihi bécemeii blé.

²³ Ke o caa time bo uce pwéélang mwo ce miû lang. Ke o caa time genye uce téne mwo ce pwocihe te pa apiaten me ê mwoden. «[O pé kojako, go Babulona, ati ninaa, watihen ni huô tem na ta.] Be go pwohewii ni toomwo apwodooki. Be lé pwo me lé pipatieden ati ni bele wo lépwo a-icu tem, na caa junihe piubwo jélé ne pwo a bwohemwo ati.

²⁴ «A céiu mwo, ke téé ne pelem a cewéhe ni péroféta, ke a cewéhe mwo ni apulie te Padué, ke ati nina taunulé ne pwo bwohemwo.»

Pii Beetih 19

Nyebi ko piwéden ne he miiden

¹ É alecehe ni naado naa, ke é téne a éénaado na pwohewii ni pwocihe te nina te junihe hiwon jélé, ne jedo he miiden. Lé toii da pie: «Pwonyebi pipaunu Padaame! Be e caa celuimikenye! A den a wâé me a pipwojunuun!

² Juuju ke mwomwon ni tautinaado ten. E pwocuhinaado te ê toomwo pwopwaaden na e pwo me alili a bwohemwo, ko ni huô ten na ta. Ke e pwocuhinaado ten wo Padué, be e taunu ni eabwé ten!»

³ Ke lé toii daamwo ne nina te junihe hiwon jélé pie: «Pwonyebi pipaunu Padué! Be tee taa dieli mwo a muu a miû na e cini a pwomwo ubwo!»

⁴Ke wo lépwo 24 ukéiu, me ni âcélo na paa jélé na lé pwohewii ni wota, ke lé miibule, ke tidihi jililé he pwahamii Padué ne pwo a atebwo he daame ten, ke lé toii da pie: «Amen! Pwonyebi pipaunu Padaame!»

⁵Pwo a pwocihe, na e âbé mu pwo a atebwo he daame, na e pii pie: «Pwonyebi pipaunu Padué, wogewé ati ni eabwé ten, na geé pipaciitieng, *me céhi* ne kon, na ubwo gewé ke wahin gewé!»

E piaten wo pa Nahi Muto

⁶Ke é téne a éénaado na pwohewii ni pwocihe te ce apulie celi te junihe hiwon jélé. Te junihe ubwo a tihin, pwohewii a éé a tabe pwobwaatéép, me a pwohuu te a tikekele heme e huu me ubwo, he lé ko pii pie: «Alélua! Alélua! E pihuô wo Padué, Padaame henye! Te junihe pwo niihen ne ko ati ni naado!

⁷Genye tai pipwodéén *me* pituumé, ke genye pipaunueng! Be, é jenaa, ke e piaten wo pa *Nahi Muto. Ke e pipwopweeng ê toomwo na e pipégalieng *me* ê mwoden.

⁸Caa ne ten a epwénen, na a mwaanu elélowo na pwomelaan, na tice alili hen.» A mwaanu elélowo, ke ni penem na wâé, na lé muko pwo ne ni apulie te Padué.

⁹Ke e pii tong wo pali *âcélo pie: «Go tii pie: “*Adéi nina todelé ne ko a piwiinaado ko piaten de pa Nahi Muto.”» Ke e pii mwo pie: «Juuju ni pwootí naa, be ni pwootí te Padué.»

¹⁰Ke é tidihi jiling he pwahamii pali âcélo beme é pipaunueng. Ke e pii tong pie: «Ûhu! Go nemwo wonaa, be wogenyu, ke tai lupwo eabwé te Padué, pwohewii ni bénye na lé *pajuujuhi pie, woélé ni apulie te lésu. Te wo Padué cehi na me go pipaunueng. Éa, ati lépwona lé pajuuju lésu, ke e mu kolé a *Jenen litihí na e mu ko lépwo péroféta, ke e ne me lé patemehi a pwootí te Padué.»

pwonehi a bwohemwo: @ 7 naado na e alihí wo loane <η>
(Pwahamii tii: 19.11—21.8)
1 <η> Pa atebwo pwo a haricaan pwojo

¹¹É alechen, ke é alihí a miiden he tehi, ke é alihí a haricaan na pwojo. Ke pwo pa apulie na e tebwo pwon, na pii kon pie ‘Mwomwon ke Juuju’. Be mwomwon ke juuju a bwo tauti ne ni apulie ten. Ke e tauti ke e pwopa ko a mwomwon.

¹²Ni naamiin, ke pwohewii ni duwele miû, ke hiwon ni kuron pwo punin. Pwo a nii apulie na tii ne kon, na te tice pace apulie celi e temehi. Te weeng cehi na e te temehi.

¹³Ke e cuwohe a epwén na timi ko cewéle. Ke a niin pie: ‘Pwootí te Padué’.

¹⁴Lé âcéin ne ni mwocoda he miiden, pwo ni haricaan na pwojo. Ke te ju elélowo ni epwénelé, ke te ju pwojo ehi.

¹⁵E wie pwon a teua na te junihe ânyee, beme pwocuhinaado te ni bele. Ke e bo pihuô me mwoiu ko a bwaja toki. Ke e bo caagetilé pwohewii a bwo caageti

ne ni ace tabe megele. Weengaa a pwo-okéé ko Padué, na te junihe pwojunuun.

¹⁶Ke é pwo a epwénen, ke é pwo a pan, ke tii ne pwon pie: Pa Apihuô te ni apihuô, ke e Daame he ni daame.

2 <η> A meni bwaaoléé me a pa

¹⁷Ke é ali pa âcélo, na e cuwo ha a téale. Ke e ko toii da céii ni meni bwaaoléé, na lé ko téé ko miiden pie: «Geé âbé ne ko a piwiinaado ubwo na e piwâamihi wo Padué me dewé.

¹⁸Geé âbé, beme geé wii a mehi ni daame, ke a mehi ni caa te coda, ke a mehi nina pwo niihelé, ke a mehi ni haricaan, me nina lé tebwo pwon. Geé wii a mehi ni apulie ati: ni *apenem tice ja kon me nina time uce ni apenem tice ja kon; ni apulie na piubwo jélé me nina piwahin jélé.»

3 <η> Imwi pa iténaado me pa péroféta agele

¹⁹Ke é ali pa iténaado me ni daame pwo bwohemwo, he lé ko pitapitihi ni mwocoda telé, beme lé pipwopa ne ko pali e tebwo pwo ali haricaan pwojo, me a mwocoda ten.

²⁰Ke imwi pali iténaado me pali péroféta agele. Weeng kuti pali e pwo li *pipwojunuun me de pali iténaado, beme e pipwohuô te li apulie, li lé hegi a ine pali iténaado, ke lé pipaunuhi a démen. Ke lé tahilu ne ha a jié miû, he lu mwo teko mulie, beme e cinilu na a dep na élé.

²¹Ke tai taunu ati lépwoli apwopa telu, ko ali teua li e wie mu pwo pali e tebwo pwo ali haricaan pwojo. Ke ni bwaaoléé, ke lé tai wii, ke pwoluu jélé ko ni mehi li apulie.

Pii Beetih 20

4 <η> Cie Caatana he na 1000 ni jo

¹É alechen, ke é ali pa *âcélo na e opé mu he miiden. Ke e pé ne he in a kilé ko a pwon na te tice anebwén kon, me a itihe toki na te junihe ubwo.

²Ke e imwi ali dragon. A dragon naa, ke pa bwien he ni bécéiuhe tan, a niin pie 'pa apipé ne kon', ai wo *Caatana, 'pa acubwonikenye'. Ke e cieeng wo pali âcélo he na 1000 ni jo.

³Ke e tahieng ole ha ali pwon li te tice anebwén kon, ke e kiléhi bwonieng ne ha ali pwon, beme time e bo uce pipwohuô mwo te ni bele, ânebuhe a anebwén ko ni jo na 1000. Ke é alechehe anaa, ke bo tuwoeng mwo, ha a cuwo benaamwon.

⁴Ke é alihni atebo he daame. Nina lé tebwo pwon, ke lé hegi a mwomwon me lépwo atautinaado. Ke é ali mwo lépwona taunulé. Weengi a watihen me taunulé: Be woélé lépwo apajuuju lésu, ke lé pipatemehi a pwootti te Padué. Time lé uce pipaunuhi pa iténaado me a démen. Ke time lé uce hegi a inen ne

pwo bwaadelé, ai é ne ko ni ilé. Be e caa pamulipilé mwo wo Padué mu ha amele, ke lé caa daame me Kériso he na 1000 ni jo.

⁵Be woélé l épwo bécéiuhen na e pwiilé wo Padué mu ha awieme ni amele. Ni béé amele, ke time lé o uce mulie cemwo mu ha amele ânebuhe a anebwén ko ni jo na 1000.

⁶Lé te junihe pipwodéén ne ni bécéiuhe amele, be e caa pwiilé mwo wo Padué, be eânimén delé. Ke a báalohe mele, ke te tice mwomwon den ne kolé. Ke lé o pipwoeabwé te Padué me Kériso. Ke lé o daame me Kériso he na 1000 ni jo.

5 <η> Tahi Caatana ne ha a miû

⁷Hemepie bo caa nebwén ni 1000 jo, ke wo Caatana, ke bo pawieeng mwo mu he karépu.

⁸Ke e o engen pitihí a bwohemwo, beme e â pipwohuô te ati ni bele pwo bwohemwo, a bwopiinen pie Gog me Magog. Ke e neibulé, beme lé pipwopa [ne ko Padué, me ni apulie ten]. Ke te junihe hiwon jélé koja ni won jeoté ticepwon [ke pwocoon me nye pinelé].

⁹Ke lé â ati pwo a bwohemwo, ke lé mu aujenihi a apimu ibu te ni naî Padué: a pwomwo ubwo na te junihe eâname Padué kon. Ke e opé mu he miiden a miû te Padué, ke e te cini ati kuti a bele na e neibuhi wo Caatana.

¹⁰Ke mepwo é ne ko Caatana, pali e pipwohuô telé, ke tahieng ne ha a jié miû me a dep na élé, pele pali iténaado me pali péroféta agele. Ke lé o te junihe picani bwén ke pwang, dieli mwo.

6 <η> A bénébwéne tautinaado

¹¹É alechen, ke é aliihi a atebwo ubwo he daame na te ju pwojo ati. Ke pwo pa apulie na e tebwo pwon. Ke tieden a miiden me a bwohemwo ne he pwahamiin, ke caa time genye bo uce alilu mwo.

¹²Ke é ali ni apulie na lé caa mele, nina pwonaado ne kolé ke nina piticenaado ne kolé, he lé ko cuwo ânebuhe ali atebwo he daame. Ke tehi a tii ko [ni apulie na lé bo hegí] *a ju mulip dieli mwo. Ke pwo ni bée tii na tehi mwo, na tii ne hen ati ni bwomu te ni apulie. Ke tauti ni amele, âcehi ana tii ne he ni tii naa.

¹³A jié, ke e ne mwo nina lé mele ne he jié. A mele, ke a amu te ni amele, ke lé ne mwo ni amele na lé wéilé. Ke tai woélé, ke tai tautilé, ne he nina lé mu ko pwo.

¹⁴Ke a mele, ke a amu te ni amele, ke tai tahilé ne ha a jié miû. A jié miû, ke a báalohe mele.

¹⁵Ke mepie pwo ace apulie celi time uce tii a niin ne ha a tii ko a mulip, ke o tahieng ne ha a jié miû.

Pii Beetihí 21

7 <η> A miiden me a bwohemwo @ na mwo coho

¹ É alechen, ke é alihia miiden me a bwohemwo na mwo coho. Be caa tieden a bécéiuhe miiden me a bécéiuhe bwohemwo, ke caa tieden mwo a jié.

² Ke é alihia pwomwo ubwo iitihi, a *lérusaléma na mwo coho, he e neopé mu he miiden wo Padué. E te junihe pipwopweeng, pwohewii êce toomwo celi e pipwopweeng ne ko pa aiu hen, beme lu piaten.

³ Ke é téne a pwocihe na ubwo na e âbé mu pwo a atebwo he daame, na e pii pie: «É jenaa, ke wo Padué, ke e ha awieme ni apulie. Ke lé o caa bele ten. Ke e o caa mu pelelé, ke o caa Padué helé.

⁴ Ke e bo tahi ati ni tabehaamiilé. Ke caa tieden a mele, ke caa tice téé me picani. Be caa tieden ni naado bwolihi.»

⁵ Ke e pii wo pana e ko tebwo pwo ali atebwo he daame pie: «Geé alih! Be é pemihia ati ni naado me tai coho.» Ke e pii mwo pie: «Go tii, be juuju ke mwomwon ni pwooti tong.»

⁶ Ke e pii tong mwo pie: «Caa tai cuwo ati! Be woéo, ke é Alfa, ke é Oméga; woéo, na é atabuhi kon, ke é anebwén kon. Wo paceli nimen me e ûdu, ke é bo ne ten me e ûdu a tabe na te tice cuhin: a tabe he a acaamatabe ko a mulip.

⁷ Ke é bo ne te lépwona lé piwéden ati ni *adéihi naa. Ke é bo Dué helé, ke lé bo naîng.

⁸ «Ke mepwo é ne ko ni béén [ke é bo pwocuhinaado telé]: Nina mwotilé me lé pwo celi wâé; Nina muhi telé me lé céihi; Nina lé gele; Nina mwiihi ni bwomu telé; Nina lé pipule hauli; Nina lé pitaunulé; Nina lé pwodooki; Nina lé pipaunuhi ni *dème duéé. «Ati ni apulie naa, ke o tahilé ne ha a jié miû, me a dep na élé. Be weengaa a bálohe mele te ni apulie naa.»

A lérusaléma na mwo coho

⁹ É alechen, ke e âbé beniéo wo pa céiu bée lépwoli 7 *âcélo, li lé pé li mwotabe li oba ko li 7 bénébwéne apwohi li ubwo. Ke e pii tong pie: «Go âbé, me é habwii tem ê ewa toomwo na e caa pipégalieng wo pa *Nahi Muto me e mwoden.»

¹⁰ Ke e âbé kong a *Jenen litihi, ke e péeo da pwo a juwole na te junihe ubwo, ke te junihe bwali. Ke e habwii tong a pwomwo ubwo iitihi lérusaléma na e neopé wo Padué mu he miiden.

¹¹ Ke pwéélang kon *a wâé te Padué. Ke pwomelaan pwohewii a péi na te junihe ubwo a cuhin, pwohewii a péi na pun bupwi, na te junihe piniédiihi pwohewii a kéle.

¹² Ni goomwa babé, ke te junihe bwali, ke tabo. Ke 12 ni pomwa kon, ke 12 ni âcélo na lé wéhi. Ke tii, ne ko ni pomwa, ni nii ni 12 pwomwoiu te a bele *Isaraéla.

¹³ Cié ni pomwa he ni piduaan: cié he na e taa tuie lang a téale, ke cié he na e nuule lang na a téale, ke cié ne he pwon, ke cié ne cehimwa.

¹⁴Ni goomwa babé, ke ne a paan pwo ni péi na 12. Ke ni péi na 12 naa, ke e pwon ni nii ni 12 *apostolo te pa Nahi Muto.

A ja ko a pwomwo ubwo

¹⁵Ke e pé a béja a womeéle na mwani megele wo pa âcélo na gemu picihe, beme e jahi a pwomwo ubwo, ni pomwa kon, ke a babé kon.

¹⁶Ke te ju piwie jame ni goomwa he ni piduaan na paa. Ke e jahi ko ali béja womeéle, ke te tai 12000 ni jame ni piduaan nge hemwo, ke é da ko miiden.

¹⁷Ke e jahi li goomwa babé, ke e pwo 144 béja. Be e te jahi ko a béja te ni apulie wo pali âcélo.

¹⁸Ni goomwa babé, ke pwo ko ni péi na te junihe ubwo a cuhin, na pun bupwi. A pwomwo ubwo, ke mwani megele, na te junihe piniêdiihi pwohewii a kéle.

¹⁹Ni péi paa a babé kon, ke lé pwonaamuun ko ni péi na te junihe ubwo a cuhin, ne he ni muko pétaapwo bwomunen: A bécéiuhe péi paan, ke pun bupwi; A béalohen, ke pun; A béciéhen, ke pihiwon ni apunen; A bépaahen, ke pun bupwi ke pun miiden;

²⁰A bénim hen, ke megele pwohewii a cewéle; A bé6 hen, ke megele bwiile; A bé7 hen, ke pun bupwi pwojo; A bé8 hen, ke muuéi pwojo; A bé9 hen, ke nyen; A bé10 hen, ke nyen pun bupwi; A bé11 hen, ke megele nyen; A bé12 hen, ke muuéi.

²¹Ni 12 pomwa, ke ni *perle* na 12. Ke ni muko pétaapwo pomwa, ke te pwo ko a *perle* na te céiu. Ke te ju mwani megele a apimu ibu te ni apulie, ke pwéélang pwomelaan.

Pwéélang a pwéélang de Padué

²²Kehe time é uce alahi ace *mwaiitihi, be a mwaiitihi ten, ke wo Padaame Padué na pwojunuun ne ko ati ni naado, me pa Nahi Muto.

²³Ke a pwomwo ubwo, ke caa time e uce hane a pwéélang ko a téale, me a wole. Be a wâé te Padué, ke caa te pwéélang kon. Ke wo pa Nahi Muto, ke a pwéélang den.

²⁴Ke lé bo mulie ha a pwéélang ko a pwéélang den na ati ni bele. Ke ni daame pwo bwohemwo, ke lé bo pé ngen ati ni wâé telé.

²⁵Ke o caa time uce capuhi ni pomwa ten, be o caa time uce bwén hen.

²⁶Ke ni bele pwo bwohemwo, ke lé bo pé ngelang, ati ni naamuulé me ni wâé telé.

²⁷Te tice ace céiu naado celi mwiihi, celi e o taa ha a pwomwo ubwo naa. Ke time lé o uce taa lang ne ni apulie na mwiihi ni huô telé, ke lépwo agele. Kehe te icehi nina caa tii ni niilé ne ha a tii ko a mulip te pa Nahi Muto.

Pii Beetiji 22

A éémwa na e ne a mulip

¹ É alechen, ke wo pali *âcélo, ke e habwii tong a éémwa na e ne a mulip. Te ju bwakenu, na e téte mu ko a atebwo te Padué, me pa *Nahi Muto,

² é ha awieme a apimu te ni apulie ati ne ha a pwomwo ubwo. Ke é ko lupwo jije éémwa, ke e cuwo lang a acuwo ko a mulip. Ke e ne ni acehin, he na ¹² ni wole ha a jo. Ke ni madihin, ke lé pwo me etihelé na a bele.

³ Ke o caa te tice apwohi. Ke o caa e ha a pwomwo ubwo a atebwo te Padué me pa Nahi Muto. Ke lé bo pipaunu Padué wo lépwo eabwé ten.

⁴ Ke lé bo alihia pwahamiin. Ke a niin, ke o bo tii ne pwo ni bwaadelé.

⁵ Ke o caa te tice bwén, ke o caa te tice apulie celi lé hane me pwéélang kolé, ce mwomiû, ai a pwéélang ko a téale. Be wo Padué, ke e bo pwo me pwéélang ko ni eabwé ten a pwéélang den, ke lé bo daame dieli mwo.

Bénebwéne pwooti

⁶ É alechen, ke e pii tong wo pali âcélo pie: «Ni pwooti ce, ke mwomwon, ke juuju. Ke e ne a *Jenen litihia te ni péroféta wo Padaame Padué. Ke e pahede pa âcélo ten, me e â habwii te ni eabwé ten, nina e o caa tuie.»

E mwojuia cemwo wo lésu

⁷ E pii wo lésu pie: «Geé téne, é o caa âbé!» *Adéi pa apulie na e piténédehi ni pwooti te Padué na e ha a tii ce!

⁸ Woéo loane na é alihia ke é téne ni naado naa. Ke me é caa nebwen ko téne ke alihia ni naado naa, ke é tidihia jiling ko ni a pali âcélo na e habwii tong ni naado naa, beme é pipaunueng.

⁹ Kehe e pii tong wo pali âcélo pie: «Ôhu! Go nemwo wonaa, be woéo, ke te pa eabwé pwohewiiko, pwohewii ni bée péroféta, ke pwohewii mwo nina lé ténedehi ni pwooti na e ha a tii ce. Te wo Padué cehi na me go pipaunueng.»

¹⁰ Ke e pii tong mwo pie: «Go nemwo cile me dem cehi, ni pwooti te Padué na élé ha a tii ce. Be caa e mwonu a tan, na e o caa pacuwohi ati niniaa wo Padué.»

¹¹ «Wo pana ta nang, ke wâé heme e te cuwo ko pwo ana ta! Ke wo pana wâé ten me e te cuwo ko pwo ana mwiihi, ke wâé heme e te cuwo ko pwo ana mwiihi! Ke wo pana wâé nang, ke wâé heme e te cuwo ko pwo ana wâé! Ke wo pana e mulie me de Padué, ke wâé heme e te cuwo ko mulie me de Padué!»

Woéo na é atabuhi kon ke é anebwén kon

¹² E pii wo lésu pie: «Go téne, be é o te ju téele âbé! Ke é bo pébé ni cemung. Ke é bo muko ne telé, ne he ni muko bwo penem delé.»

¹³ Woéo, ke é Alfa, ke é Oméga, pa bécéuhien, ke pa bénebwénen, pa atabuhi kon, ke pa anebwén kon.»

¹⁴ «Adéi nina lé puu ni epwénelé. Be o pwo mwomwon delé me lé wii a acehi a acuwo ko a mulip. Ke o pwo mwomwon delé me lé taa he ni pomwa ko a pwomwo ubwo.

¹⁵ Ke lé mu pwomwo ne nina lé mulie hauli, ke ni apwodooki, ke ni apipule hauli, ke ni ataunuhi apulie, ke nina lé pipaunuhi ni *démé duéé, ke ni agele!

¹⁶ «Woéo lésu, ke é pahede pa âcélo tong, beme e â patemehi ninaa, me de ni acéihi. Ati ninaa, ke juuju. Be woéo, ke pa piebehi a pwomwoiu te pa daame *Davita; woéo pa ceni pwopwometan, na é pé da a téale.»

¹⁷ A Jenen litihi me ê Apiaten, ke lu pii pie: «Âbé!» Ke wo paceli e téne anaa, ke me e pii pie: «Âbé!» Ke me e âbé wo paceli nimen me e ûdu. Wo paceli nimen kon, ke e o hegi me tice cuhi a tabe na e ne a mulip.

Nemwo taatééhi ni âne a pwooti ce

¹⁸ Woéo loane, na é patemehi te ati ni apulie na lé téne ni pwooti na e ha a tii ce, pie: Mepie pwo pace apulie, celi e pibitehi ni pwooti na e ha a tii ce, ke wo Padué, ke e o pinebehi ni apwohi na ubwo na tii ne ha a tii ce.

¹⁹ Ke mepie e pétaabwon ace céiu naado mu he ni pwooti na e ha a tii ce wo pace céiu apulie, ke wo Padué, ke e o pétaabwon kojaeng a den mu ko a acehi a acuwo ko a mulip, ke a den mu ko a pwomwo ubwo iitihi na tii ne ha a tii ce.

²⁰ Wo [lésu] pana e *pajuujuhi ni naado naa, ke e pii pie: «Éa, é o te ju téele âbé!» Amen! Âbé, go Padaame lésu!

²¹ Ke a wâé te Padaame lésu, ke e bo mu pelewé ati! Adéikewé!

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil